作語

引到





北京大學《儒藏》編纂與研究中心

圖書在版編目(CIP)數據

儒藏. 精華編. 五七/北京大學《儒藏》編纂與研究中心編. 一北京:北京大學出版 社,2011. 1

ISBN 978-7-301-11775-0

I. 儒··· II. 北··· III. 儒家 IV. B222

中國版本圖書館 CIP 數據核字(2011)第 011878 號

書 名: 儒藏(精華編五七)

著作責任者,北京大學《儒藏》編纂與研究中心 編

責任編輯: 黨偉龍 吴遠琴

標 準 書 號: ISBN 978-7-301-11775-0/B・0461

出 版 發 行:北京大學出版社

地 址:北京市海淀區成府路 205 號 100871

網 址: http://www.pup.cn

電子郵箱: dianjiwenhua@163.com

電 話:郵購部 62752015 發行部 62750672 編輯部 62756694

出版部 62754962

印 刷 者:北京中科印刷有限公司

經 銷 者:新華書店

787 毫米×1092 毫米 16 開本 50.75 印張 490 千字

2011年1月第1版 2011年1月第1次印刷

定 價:500.00元

未經許可,不得以任何方式複製或抄襲本書之部分或全部内容。

版權所有,侵權必究 舉報電話: 010-62752024

電子郵箱: fd@pup. pku. edu. cn

《儒藏》精華編第五七册

首席總 編 纂 季羡林

項目首席專家 湯一介

湯一介 龎 樸

總

編

纂

孫欽善

安平秋 (按年齡排序)

毛遠明

本

册

主

編

《儒藏》精華編凡例

則的典籍的叢編。 爲儒家經典和反映儒家思想、體現儒家經世做人原 、中國傳統文化以儒家思想爲中心。《儒 收書時限自先秦至清代結束。 藏》

藏》中的精要書籍。 二、《儒藏》精華編爲《儒藏》的一 部分,選收《儒

外,其他一律省略

四部分類法分類,大類、小類基本參照《中國叢書綜 出土文獻。 録,並注明互見。 凡單書已收入入選的個人叢書或全集者,僅存目 録》和《中國古籍善本書目》,於個 部 越南儒學者用漢文寫作的儒學著作,編爲海外文獻 以古文字書寫者一律收其釋文文本。 類 三、《儒藏》精華編所收書籍,包括傳世文獻 傳世文獻按《四庫全書總目》經史子集 出土文獻單列爲一個部類,原件 别處略作調 韓國、日本、 整。 和

> 編,不改編,保持原書的完整性和 四、所收書籍的篇目卷次,一仍底本原貌,不選 獨 立性

爲主,酌校異同。校記力求規範、精煉 勘價值的版本爲校本。 確定内容完足、精確率高的版本爲底本,精選有校 五、對人選書籍進行簡要校勘。 出校堅持少而精 以對校爲主 ,以校正 誤

例,進行規範化標點。 六、根據現行標點符號用 專名號除書名號用角號(《》) 法,結合古籍標 點 通

落。 般不分段。 正文原已分段者,不作改動。 七、對較長的篇章,根據文字内容,適當劃 千字以 内的 短文 分段

出 及其他有關情況。 及整理時所確定的底本、校本(舉全稱後括注簡稱 介紹作者生平、該書成書背景、主要内容及影響,以 現 傾序前詳 八、各書卷端由整理者撰寫《校點說明》,簡 後略 重複出現的作者,其生平事 蹟按 要

九、本書用繁體漢字豎排,小注一律排爲單行。

《儒藏》精華編第五七册

經部 禮類

禮記之屬

禮記集解〔清〕孫希旦

禮記卷二十七

國史館纂脩孫希旦集解賜進士及第翰林院編脩

内則第十二之一《别録》屬《子法》。

簡。 所言不相比附,而文體亦異,疑係他篇脱 老,有虞氏以燕禮」至「皆有惇史」,與通篇 井有條,獨此未易曉暢。」 錯,恐或當屬上文『冬宜鱻羽,膳膏羶』,及 簡錯,或當在上文『玄衣而養老』之下。又 『凡養老,五帝憲』止『皆有惇史』一節,疑 引曾子之言,某疑他簡脱誤在此耳。 之養老」』一節、雖承上章『養老』之文而 民」,則是古昔盛時朝廷所下教命,恐不應 云,然此篇既曰【后王命冢宰降德于衆兆 之天下以及人之老耶? 又『曾子曰「孝子 不然,亦豈先王之成法,因子事父母 『雉兔皆有芼』之下。自此外數節,上下井 『淳熬』止『以與稻米爲酏』一節,亦疑 止「玄衣而養老」一節,疑《王制》文重出 若以「淳熬」接上「士於坫一」之下,則 愚謂:自「養 丽 又 簡 達

通 篇 條 理秩然矣。

后王命冢宰,降德于衆兆民

焉。」 兆。 記者 鄭氏 别官,今此篇内既有飲食,又有教令,則篇 蓋雖以諸侯爲主,而雜以天子言之,故又 宰掌飲食,司徒掌十二教,今一云『冢宰』, 兼冢宰』,是也。 首當言『命冢宰、司徒』,今惟一云『冢宰』, 稱『王』及『兆民』也。 建邦之六典」,而二曰『教典』,則教民雖司 宰實天子之冢宰耳。 司徒或兼冢宰之事也。 不言『司徒』,是記者據諸侯并六卿爲三, .或』焉。」 曰 據諸侯也。 天子曰兆民,諸侯曰萬民。 孔氏曰:「君謂諸侯,王謂天子。 「后,君也。 朱子曰:「注疏言『諸侯司 但此言『后王之命」,則冢 諸侯并六卿爲三,或兼職 德猶 蓋《周禮 飲食教令,所掌各有 意疑 教 而 也。 大宰》『掌 不定,故稱 《周禮》家 萬 億 徒 日

> 諸人」也。 德,乃降之以教於民,所謂「有諸己而後求 不言「降教」而曰「降德」者,見王者身有此 司 國,而諸侯承之以教其民,自不害冢宰爲 之。其在諸侯,則 徒之職,而 徒之兼官也。」 冢宰無所不統,故以 亦天子之宰施典於邦 愚 謂: 后王,天子也 其重者言

反,徐作「滯」。 偪,本又作「幅」,彼力反。 綦,其記反。」 觿, 許規反, 本或作「鑴」。燧, 音遂。 捍, 户旦反。遰, 時世 音箭,又音晉。 救反,徐素遘反。縰,所買反,徐所綺反。 管、遰、大觿、木燧,偪,屦著綦。《釋文》:「漱,所 拂髦、冠、緌、纓、端、鞸、紳,搢笏,左右佩用 子事父母,鷄初鳴,咸盥、漱、櫛、縰、笄、總 左佩紛帨、刀、礪、小觿、金燧,右佩玦、捍 鄭氏曰:「咸,皆也。 紛,芳云反,或作「帉」,同。帨,始鋭反。 維,韜 髪 **鞸,音必。 搢,徐** 者 也。

束髮也,垂後爲飾。

拂髦,振去塵著之。

全幅

叠而用之。」盧説爲優。

笄者,著縰既

鳴也。

維,韜髮者也。

《士冠禮》云『緇

纙

據年稍長者,若孺子則晏起,而不能

鷄

初

紳,搢笏」故也。

盤謂洗手,漱謂漱

Ц̈́

此

長六尺」,鄭云:『纚一幅長六尺,足以

韜

髮而結之矣。」盧云:「所以裹髻承冠,以

於日,陰則 鞞之刀,大於左廂 所採孔疏,今本《禮記注疏》及衛氏《集説》皆無之。 端,著鞸,又加大帶也。 故佩小物。 遂。自「玦當作決」以下至此,見朱子《儀禮經傳通解 骨爲之,著於右手大指,所以鉤弦閱體 笄訖加總,然後加髦著冠,冠畢然後服玄 之笄,故文在「冠」上。」總者,裂練繒爲之, 髻也。故《士喪禮》云「笄用桑,長四寸, 拾,以皮爲之,著於左臂以 連文,故知刀爲小刀。 所陳,皆依事先後: 櫛訖加縰,縰訖 束髮之本,垂餘於髻後,以 中」,是也。纋中,謂殺其中使細。非固冠 以 畢,以笄插之。 縱韜髮作髻既訖,横施此笄於髻中以固 以木燧 右廂用力爲便,故佩大物。 熊氏云:『此謂安髻之笄, 鑽火。 刀也。 玦當作 『決』,以象 『刀、礪」與『小觽 晴則以金燧取火 左旁用力不便, 爲飾也。 遂弦,故亦名 加笄 此經 刀 纋

爲之。

金燧,可取火於日。

捍,謂拾也,言

也。小觿,解小結也。觿貌如錐,以象骨

巾,今齊人有言紛者。

刀、礪,小刀及礪礱

必

佩者,備尊者使令也。

紛帨, 拭物之佩

於紳。笏,所以記事也。

紳,大帶,所以自紳約也。

搢猶扱也,扱笏

佩用,自佩也。

纓之飾也。端,玄端,士服

也。

庶人深衣。

髦

」用髮爲之,象幼時鬌,其制未聞也。

緌,

可以

捍 弦 也。

管,筆彄也。

遰,刀鞞

也

孔氏曰:「此『子』謂男子,以經云『端、鞸、

木燧,鑽火也。偪,行縢。綦,屨繫也。」

七七〇

氏云: 施 之偪。男子事父母有偪、《詩》諸侯朝天子 纏於足,故謂之邪偪,所以自偪束也,故謂 也。 亦然。 婦同 者」,而不顯女子已笄者之禮,蓋女子笄則 謂男子已冠者也。 是,爲行戒者絇也。」 事舅姑無偪。」 有偪,則凡行皆有偪。 曰:『赤芾在股,邪偪在下』,蓋以幅帛邪 見之爾。 適人,故略之。 其或在室者,則其禮 金爲之者。 繫以結於足也。」 也。 「大觿」與「木燧」相連,蓋鑽燧 金燧,以金爲之。 || 屨 刀皆有鞞,左言「刀」,右言「遰」,互 婦人吉總尺有二寸,則男子之總 觿,錐也。字或作「鑴」,是有 頭 小觽 施 繋 以 朱子曰:「屢繫,或説爲 以 下文言「男女未冠笄 解 爲 陳氏祥道曰:「《詩 愚謂: 《考工記》「金錫 小結,大觿 行 特婦人不用,故 戒。」 一或云: 子事父母, 以 亦 角 與子 解 屨 婦 半 之 大 以 上

耳。 鑑,謂之陰鑒」。 謂 冠 《士冠禮》皮弁、爵弁有笄,而於冠不言 孔 數,陽也。 於日者屬陽,故金燧佩於左。 出火、《論語》云「鑽燧改火」,是也。 似,欲取火則向日照之,以引取其火也 遂取明火于日,以鑒取明水于月」,鄭云: 據此以決玄冠之制也。 屬陰,故木燧佩於右。 用桑柘,秋用柞楢,冬用槐檀,用鑴鑽之以 木燧以木爲之,春用榆柳,夏用棗杏,夏季 鑄銅爲鑒,謂之陽遂。夏至日午時 夫遂,陽遂也。」成伯璵謂:「冬至日 了, 其 之鑒燧之齊」,是也。 疏謂「玄冠有纓約,有纓者無笄」,蓋 然《士冠禮》初加之冠乃大古之緇 、制質 右所佩凡六物,偶數,陰也。 、略,不獨 是金遂 無笄,且無武矣,未 左所佩凡五物,奇 \sim 亦鑒 司 冕、弁有紘 烜 火出於木者 氏 類,其狀 学掌 鑄 又有 子時 火出 以夫 銅 可 笄 以 相 爲

等,冠有纓,何必無笄乎?《國語》范武子以杖擊文子,「折委笄」,注謂「委貌之笄」,以杖擊文子,「折委笄」,注謂「委貌之笄」,以杖擊文子,「折委笄」,注謂「委貌之笄」,以杖擊文子,「折委笄」,注謂「委貌之笄」,以杖擊文子,「折委笄」,注謂「委貌之笄」,則冠之有笄見於此矣。男子有二笄。一戶过」上,則爲固髮之笄而非固冠之笄也。緣,有曠。繫,字又作「樂」,同步干反。裹,陳乙反,又作「終」。衿,本又作「終」,其鳩反。嬰,又作「總」。と、以杖擊文子,「折委笄」,注謂「委貌之笄」, 「供」。於,本又作「終」,其鳩反。嬰,又作「總」。」

『女子吉笄尺二寸』者也。但婦人之笄異と。」、孔氏曰:「婦人之笄、《喪服》所謂續有之。衿猶結也。婦人有纓、示繫屬繫、小囊也。縏袠言『施』、明爲箴、管、線、鄭氏曰:「笄、今簪也。衣紳、衣而著紳。

髮,而因以爲 髮,一以固冠。婦人惟有尺二寸之笄以固 之笄矣。」 纓别也。」 朱子曰:「婦人不冠,所謂『吉 制未聞。』未笄無纓。下『男女未冠笄者 禮之,因著纓,明有繫。蓋以五采爲之,其 鄭注《士昏禮》云:『婦人十五許嫁,笄而 纊」之下而言『施縏袠』,明爲四物而 也。餘物皆不言『施』,獨於『箴、管、線 刺也。」以針刺袠 簪 於上男子笄、縱,乃皮弁爵弁之笄,故鄭以 笄』即爲固髻之用,亦名爲簪,而非如二弁 亦云『衿纓』,彼用以佩容臭,與此既笄之 弁、爵弁之笄,故朱子非之。《特牲禮》: 「男子冠而婦人笄」也。而孔氏乃以當皮 「主人服玄端,主婦笄纚綃衣。」 是婦人之 解之也。衣,謂玄綃衣。熊氏云:『袠, 愚謂:男子有二笄:一以 、飾,與男子之冠相當,所謂 而爲縏囊,故云『縏袠 施矣。 固

水,請沃盥,盥卒授巾。 燠寒,疾痛苛癢,而敬抑搔之。 以適父母舅姑之所。及所,下氣怡聲,問衣 稻、黍、粱、秫唯所欲,棗、栗、飴、蜜以甘之, 色以温之,饘、酏、酒、醴、芼、羹、菽、麥、蕡、 或後,而敬扶持之。 也。 笄飊 纓」,蓋昏夕暫脱之耳,非一脱不復著也。 子已冠者無此,則婦人可知。《昏禮》「脱 有事也。 婦人之所當佩,而箴及線、鑛則女工之所 蓋玦、捍用於射,刀之大者用以割斷,皆非 物,管、大觿、木燧與男子同,餘三物則異。 玄端爲常服,則其妻以笄纚綃衣爲常 事舅姑之纓乃佩容臭之纓,非許嫁之 婦人左佩五物,悉與男子同。 綃 然香纓惟男女未冠笄者有之,上男 衣與男子之玄端 陳用之據《士昏禮》壻脱婦纓,謂 進盥,少者奉槃,長者奉 問所欲而敬進之,柔 相 當。 出入則或先 共 右佩六 大 夫 服 以

> 音髓。 堇、 荁 反。免,音問。薨,字又作「稟」,苦老反。滫,思酒反。瀡 反。秫,音述。飴,羊之反。堇,音謹。荁,音丸。枌,扶云 酏,羊支反。芼,毛報反。蕡,字又作「黂」,扶云反,徐扶畏 丈反。温,本又作「蕰」,又作「愠」,同於運反。饘,之然反。 本又作「奧」,同於六反。苛,音何。養,本又作「癢」,以想 膏之。父母舅姑必嘗之而 反。少,詩召反,後皆同。奉,芳勇反,本或作「捧」。長,丁 膏之,古報反。」 粉、榆、 免、薨、滫、 瀡 后退。《釋文》:「燠 以 滑之,脂、膏以

瀡。 者。 搔 氏曰:「『苛』與「癢」連文,故知是疥。 之、滑之、膏之,謂用調 鄭氏曰:「恰,說也。 生者。薨,乾也。秦人溲曰滫,齊人滑 浮摩也。 冬用堇,夏用荁。榆白曰枌。 酏,粥也。芼,菜也。蕡,熬枲實。 巾以涚手。温,藉也,承尊者必 父母舅姑必嘗之而後退 先後之,隨時便也。 苛, 疥也。抑, 按。 和飲食也。 敬 槃,承盥水 也。」 荁, 堇 免,新 和顏 甘 藉 孔

《士虞禮》記:『夏用葵,冬用荁。』鄭云: 者所食,悉皆須熟,故云『熬枲實』也。以 《釋草》云:『黂,枲實也。』菽豆以下,供尊 薄者,則饘爲厚者。《公食禮》三牲皆有 堇,夏用荁也。《釋木》云:『榆,白枌。』孫 甘之者,以此棗、栗、飴、蜜以甘和飲食。 芼,『牛藿、羊苦、豕薇』,用菜雜 炎云:『榆白者名枌。』《庖人》云『共鱻 用乾荁。」此經「堇」「荁」相對,故知冬用 色,承藉父母,若藻藉承玉然。 之令柔滑也。 免、薨。以滑之者,言以此數物相和,滫隨 薨、《周禮》據肉爲言,此則 之物」,『鱻』『薨』相對。 「荁,堇類也,乾則滑。 夏秋用生葵,冬春 「薨」,薨既是乾,故知免 以 承 藉於物,言子事 凝者爲脂,釋者爲膏。 此經以「免」對 爲 父母 以堇、荁等爲 新 生也。 肉爲羹也。 酏是 當 和 以膏 **企粥之** 柔 魚魚、 薨 顔 0

> 也。 苦堇。」郭氏云:「今堇荼也。子如米,汋 滑」。以膏之,《周官》所謂『膏香』、『膏臊 和飲 似蕺,花紫色。」邢氏云:「《本草》云 『味 黏者皆謂之秫,不獨粟也。 蘗煎成,亦謂之糖,《方言》[餳謂之糖」,是 少者奉之,水重故長者奉之。飴,餳也,米 以匜、《左傳》「奉匜沃盥」,是也。 之類也。」 愚謂:槃以承盥水,其盛水 大。」 方氏慤曰:「以甘之,《周官》所 之者,以膏沃之,使之香美。 食之滑。』《唐本草》云:「俗謂之堇菜,●葉 『調以甘』。以滑之,《周官》所謂『調 《爾雅》:「秫,黏粟也。」然凡黍稻之 食。」 陸氏 德明曰:「荁似 《爾雅》:「齧, 此 等 槃輕 堇 總 而 爲 故 蓋 以 葉

^{, 「}堇」,原誤作「莖」,今據四庫本《爾雅翼》、《詩傳名物集

朝,直遥反,下「而朝」同。」

具,饌

庾氏

不佩

朱子

略爾。 名茎。 苦也。」荁,堇類。榆,刺榆也,一名樞,又 諸物,古今異制,風土異宜,不能盡曉,然 慈以旨甘,則亦當與命士同,此不言者,文 之所,無時焉不可以朝夕限也。若日入而 以旨甘」,此不命之士,父子同宫,在父母 父子異宫,昧爽 葉皆可爲茹,而刺榆尤美也。下云「命士 白榆。」是枌爲白榆、榆爲刺榆。 亦可見古人察物之精,用物之詳也。」 上,昧爽而朝,慈以旨甘」,「日入而夕,慈 父母舅姑之所未昧爽也。又下言「命士以 甘」,云『苦』者,古人語倒,猶甘草謂之大 ○陳氏澔曰:「此篇所記飲食珍羞 陸璣云: 而朝」,則此不命之士,至 「樞葉如 榆,爲茹美,滑於 粉、榆之 具。《釋文》:「冠,古亂反。

成人差後也。 以容受香物也。 也。」 爽,謂天將明而未明時也。 幼儀,則其習此禮宜矣。 冠笄」,謂十年以上者。 愚謂"下文言「孺子晏起」,則此「男女未 曰:「恐身有穢氣觸長者,故佩香物。」 用,而佩容臭,示未能 云: 『以臭物可以脩飾形容,故曰容臭。』」 以纓佩之、爲迫尊者、給小使也。 鄭氏曰:「總角,斂髮束之。 方氏慤曰:「臭,香物,蘭蒞之類。 孔氏曰:「臭,謂芬芳香物。 昧,暗也。 即 十年出就 容臭,謂爲 事也。」 爽, 昧爽而朝,視 容臭,香物。 明也。

字,又於既反。灑,本又作「洒」,所買反,又所賣反。」 埽室堂及庭,布席,各從其事。 凡内外,鷄初鳴,咸盥、漱,衣服,斂枕、簟,灑 《釋文》:「衣,如

髦,總角,衿纓,皆佩容臭。

昧爽而

朝,問「何

食飲矣」。若已食則退,若未食則佐長者視

男女未冠笄者、鷄初鳴、咸盥、漱、櫛、縱、拂

外

傅學

小囊

昧

以旨

也。 婦 鄭 治外事也 布席,布坐席也。各從其事,内治内事,外 枕、簟親身之物,斂之者,爲其褻露,且避 謂:凡内外,謂尊卑長 簟,席之親身也。」 污也。灑埽室堂及庭,内外皆徧灑埽之 氏 而外卑賤之人,爰及僕隷之等。」 自室及堂,自堂及庭,先後之序也。 曰:「斂枕、簟,不 孔氏曰:「此總論子 欲 幼莫不皆然 人見己) 褻者。 愚 也

孺子蚤寢晏起,唯所欲,食無時。

昧爽之朝。 鄭氏曰:「孺子,小子也。」 蚤寢則未與乎日人之夕,晏起則 唯所欲,食無時,則以弱 方 氏 慤 未 與 而 曰 未 乎

旨甘。 由 合士 日出 以 上,父子皆異宫。 而退,各從其事。日人而夕,慈 昧爽 而朝,慈以

勝其制節,且養之不可不備也。」

門而北周者,若《昏義》「祖廟未毁,教於公 垣之所周也。凡言「宫」,有據牆之起乎大 朝見曰朝,夕見曰夕。」 以下之禮。」 程子曰:「命士以 鄭氏曰:「異宫,崇敬也。 愈嚴,故異宮,猶今有逐位,非如異居也。」 方氏慤曰:「尊卑之際辨則敬 孔氏曰:「此論命士以 上事親 愚謂:宫,謂 慈,愛敬 同 異 上愈貴則 (於命士 進之。」)則褻。

牆

爲正寢門,正寢之後爲燕寢,燕寢之後爲 北周者也。 禁」,是也。有指牆之起乎寢門而北周者, 妻之正寢,其旁爲側室。 矣」,是也。 不舉祭」,《公羊傳》「群公子之宫則已卑 若《喪服》傳「有死於宫中者,則爲之三月 小宰》「掌宫刑」、《宫正》「掌王宫之戒令糾 宫」、《詩》「于以用之,公侯之宫」、《周禮 父子異宫,謂牆之起乎寢門而 姑以大夫、士言之: 大門之内 自燕寢以後,

長則每 耳。 侍親者,疑人君視朝,惟卿大夫及一官之 其官事。 栗、飴、蜜」諸物也,但命士之物或當更備 朝可稍晏也。 既貴,其父母猥辱之事蓋僕御供之,故其 搔、沃、盥之事皆親之,故其朝宜蚤。 妻之寢而已,而其制簡。 宫則唯父備有此制,而其子或唯有燕寢及 各有正寢、燕寢、側室之屬,而其制備。 各有寢門,故謂之異宫。異宮則父子之寢 不命之士,其子之寢室亦别有門,而包乎 有常參、九參、六參之别,意古制亦如此 命之士稍晏也。不命之士賤,於父母抑、 父之正寢門之内,故謂之同宫。 有 日出而退,視朝膳而退也。 日皆朝,餘則不必然。 m 人君日出視朝,此命士日出猶得 正寢之門實北 慈以旨甘,即上節所言「棗 昧爽而朝,視不 逩 而周乎其外。 唐宋官制, 退則各治 命士父子 命士 同

> 爾。日人又夕,每日再朝也。不命之士, 嚴敬,故其朝限以二時,自此以上以至於 嚴敬,故其朝限以二時,自此以上以至於 世子之事親皆然,《世子記》言「朝夕至於 世子之事親皆然,《世子記》言「朝夕至於 大寢之門外」,是也。日人而夕,則當問親 之夕膳,而又慈以旨甘,此又在夕食之後 之夕膳,而又慈以旨甘,此以上以至於 之夕膳,而又慈以旨甘,此以上以至於 之夕膳,而又慈以旨甘,此以上以至於 之夕膳,而又慈以旨甘,此

枕,斂簟而襡之。《釋文》:「縣,音玄。篋,口協反。少者執牀與坐,御者舉几,斂席與簟,縣衾篋曰:「此論父母舅姑將坐將卧奉席之禮。」鄭氏曰:「將衽,謂更卧處也。」 孔氏

者偶然暫憩之所用。《周禮·掌次》:「王古人坐皆席地,此云「執牀與坐」者,蓋尊

襡,音獨。」

牀也。 枕。 少者執牀與坐,侍御之人執几以進之,使 大旅上帝,則張氊案,設皇邸。] 賈疏謂: 席則否。」 尊者,使憑之,斂其所卧在下之席 者執牀,則牀之制蓋不大鉅矣。 長者暫憩以待,然後乃斂卧席等物也。 身之簟,又縣其所卧之衾,以篋貯所卧之 曰:「蚤旦親起、侍御之人捧舉其几以進 氊案,牀上置氊。」是王於次中暫憩亦 簟既襯身,恐其污穢,故以襡韜藏之。 蚤旦親起之後,斂卧席,布坐席,則 與上 孔氏 少 有 襯

反。后,音支。匜,羊支反,一音以氏反。〕 丈專反。近,「附近」之近。敦,音對,又丁雷反。牟,本侯用,與恒食飲,非餕莫之敢飲食。《釋文》:「傳,稱敬之,勿敢近。敦、牟、卮、匜,非餕莫敢父母舅姑之衣、衾、簟、席、枕、几不傳,杖、屨

鄭氏曰:「傳,移也。非餕莫敢用,餕乃用

之也。 饌,子婦不得輙食。」 《左傳》云『奉匜沃盥』,是也。 此論父母舅 《隱義》曰:『堥,土釜也。』今以木爲器,象 敬,故祗敬之勿敢偪近。 敦,今之杯盂也 嚮他處。杖、屢是尊者服御之重,彌須 御之人停貯常處,子婦不得轍更傳移,令 之。恒,常也,朝夕之常食。」● 牟,黍稷器 姑所用之物,子婦不得輙用,所恒飲食之 曰:「父母舅姑之衣、衾、簟、席、枕、几,侍 則其貴重者可知 而 疏以爲杯、盂,非是。敦、牟、卮、匜非重物 土釜之形。卮,酒器也。匜,盛水漿之器, 不 敢 牟讀曰 輙 用,恒飲食非珍饌而不敢輙食 也。 堥。 非餕莫之敢飲 卮、匜,酒 愚謂:敦,簋 食,餕 漿 器 孔氏 乃食 也。 恭

「朝」、《禮記注疏》作「旦」。

0

父母 没母 柔滑,孺 存,冢子御 在 子餕。 朝 夕恒 食,子婦佐餕,既食恒 食,群 子婦佐餕 如 初。 餕 旨甘 父

愚謂: 食恒餕 餕。 也,謂 鄭氏 群子 及長子之婦食必須盡。以父母食不能 餕 者,如上『父母在』,『子婦佐餕』之禮。」 故子婦 猶皆餕也。」 也。 夫 以 以 婦,謂冢子之弟及衆弟婦。 曰:「子婦佐餕,婦皆與夫餕也。 長子侍 子婦佐餕,謂長子衆子及其婦皆佐 此記觀之,則士之禮夫婦共食矣, 佐 上則同 甘滑之物,於孺子爲宜,故使孺子 ,每食餕而盡之,末有原也。 助 **一餕**,食之使盡,勿使再 母 庖而各食與。 孔氏曰:「佐餕者,謂長子 食 也。 侍食者不餕,其 佐餕. 御,侍 進 如 也。 初 婦 既

周旋慎齊,升降、出人、揖遊不敢噦、噫、嚏、在父母舅姑之所,有命之,應、唯敬對,進退、

反。 苦愛反。 撅 襲,癢不敢搔,不有敬事,不敢袒裼,不涉 咳、欠、伸、跛、倚、睇視,不敢唾 澳」,同吐細反。 》,褻衣 齊,側皆反。 倚,於義反,又其寄反。 衾 不 撅,居衛反。見,賢遍反。」 噦,於月反。 見裏。《釋文》: 噫,於界反。 睇,大計 「唯、于癸反、徐 、洟。 反。 嚏,音帝。 涕,本又作 寒不 咳, 伊 不 敢 水

咳嗽。 噦,氣 襲 自 偏任一足曰跛,依物曰 遠,亦必俯身而行,而不敢縱肆其容體 也。 裼,露臂也。 敬,其貌必齊莊,升降出人,雖於尊者稍 堂階,出 應、唯者不 重 П 出 進退、周旋於尊者之前 逆聲。 衣 欠,張 爲唾 也 人 敢諾 於 , 自 撅,揭 敬 口 噫, 飽 門 出 事,爲尊 ,敬對者不敢慢。 目 户。 氣。 (衣也。 出 食氣。 揖,俯 日 倚。 伸,竦體 涕 者執 褻衣衾不見裏 睇視,邪 嚏,噴嚏。 自 身也。 ",則其 勞事 鼻 也。 出 升降於 心 也。 游 視也 爲 立 必 咳, 也 洟 衵 m 肅 行

但此所言「裼」「襲」,自爲别義,與《玉藻》敬無文,孔氏謂「父母之前不裼」,是也。爲文,故父母之所不敢袒裼。」 愚謂:至節也。○孔氏《玉藻》疏云:「子於父以質爲其穢而不潔也。此節言事父母恭敬之爲其穢而不潔也。此節言事父母恭敬之

所謂「裼」,謂露其中衣也。此所謂「裼」,中衣也。此所謂「襲」,謂重衣也。《玉藻》「裼」「襲」不同。《玉藻》所謂「襲」,謂掩其

謂

露臂也。

若混而

爲一,則誤矣。

反。 父母唾、洟不見。冠帶垢,和灰請漱。 又作『列』。紉,女陳反,徐而陳反。 『浣」,户管反。綻,字或作『綻』,直莧反,徐治見反。裂,本 請 日 垢,和灰請澣。 靧 則燂湯請浴,三日具沐。 醲,音悔。」 足垢, 燂湯 衣裳綻裂, 紉箴請 請 洗。 《釋文》:「澣,本又作 燂,詳廉反。 其 間 面垢,煙潘 補綴。五 潘,芳煩 衣裳

鄭氏曰:「唾、洟不見, 輙刷去之也。手曰

針也。燂,温也。潘,米瀾也。此節言事見之而生憎穢也。綻,解也。紉,以線貫漱,足曰澣。」 愚謂:唾、洟不見,恐父母

少事長,賤事貴,共帥時。

父母服勤之禮

也

之法。○自篇首至此,言事父母舅姑及尊長帥,循也。時,是也,謂上二節所言之禮

不通乞假。男女不通衣裳,内言不出 後取之。外内不共井,不共湢浴,不通寢席 其相授,則女受以篚,其無篚,則皆坐奠之而 不人。《釋文》:「篚,非鬼反。温,彼力反,本又作『偪』。」 男不言内,女不言外,非祭非喪,不相授器 地 鄭氏曰:「祭嚴喪遽、授器不嫌也。 敬之時,喪是促遽之所,於此之時,不嫌男 女有媱邪之意。」 也。 温,浴室也。」 愚謂: 孔氏 内謂内事 曰:「祭是嚴 奠,停

集 解

職。 也。 不得 外 事 相 男不言内,女不言外,所以 内言不出,外言不入,所 預 在 也。 内 言内,在外 其相授,謂 言外, 非 喪 各治 以嚴 祭 别 第 其 而 内外 分女之 相 事 授 而

男子入内,不嘯不指,夜行以燭, 止。《釋文》:「嘯,依注音叱。」〇今按:嘯! 女子出門,必 擁 蔽 其 面 n, 夜行 以 (",如字。 燭 無燭 ´; 無 則 燭 啃 則

之限。

氏 鄭氏曰:「嘯讀爲叱、嫌有隱使也。」 如 嫌 惑人也。 口 已,故云『嫌有隱使也』」。 出聲也。 有姦私 曰:「常 也 夜行必皆以燭者,所以遠暗昧之 ,恐人聞知,不以言語,但諷 事 不 以 . 嘯 言語 不指,爲其聲容不 處分,是 愚 謂: 顯 使 肅 嘯,蹙 人 叱 也。 一, 且 孔 而

道 路 此 謂宫中之道路也。 男子 ·由右,女子由 左。 地 道尊右,

男子由

之下。 嫌厚别之法,朱子移於「男不入,女不出 之别也。 右,女子由左,蓋以 ○自「男不言内」至此,論男女遠 相 避遠,而因 以爲尊卑

反。 欲,必服 飲食之、雖不耆、必嘗而待。加之衣服、雖不 姑與之而姑使之,而后復之。《釋文》:「飲,於鴆 子婦孝者敬者,父母舅姑之命勿逆勿怠。若 食,音嗣。 而待。 耆,市志反。」 加之事,人代之,己雖 弗欲

也。 鄭氏曰:「嘗而待,待後命 怠,此謂不可變節以傷尊者平日慈愛之心 待,待後命釋藏也。」 其恃愛而 子婦之孝敬者,必爲父母舅姑之所愛,恐 姑與姑使者,嫌於怨懟而必争。」 人代之者,謂尊者既 人代之而弗欲者,慮以 **三驕,故** 戒 以 勿 命之事,又惜其勞而 逆 朱子曰:「勿逆 勿 而去 自逸 怠。 也。 加之事 而 愚謂: 謹命。 服 丽

者,俟代者休解,而後復其本業於己也。之者,姑以己之意教使之也。而后復之己之意也。姑與之者,姑聽其代也。姑使使人代之也。弗欲者,爲其所爲不必能如

休之。《釋文》:「縱,本又作「從」,足用反。數,色角反。」子婦有勤勞之事,雖甚愛之,姑縱之,而寧數

凡此皆勿逆勿怠之事也。

禮焉。教,而后怒之。不可怒,子放婦出而不表子婦未孝未敬,勿庸疾怨,姑教之。若不可解氏曰:「不可愛此而移苦於彼也。」

孝於父母舅姑,自『子婦有勤勞之事』而 酒明也,猶爲之隱,不明其犯禮之過也。」 愚謂:不可怒,謂怒之而不從命也。子 於婦出而不表禮,忠厚之道也。○應氏鏞 鄭氏曰:「庸之言用也。怒,譴責也。表

黨州間,寧孰諫。父母怒,不説而撻之流血,起敬起孝,説則復諫。不説,與其得罪於鄉父母有過,下氣怡色柔聲以諫。諫若不入,下,勉父母舅姑之慈於子婦。」

不敢疾怨,起敬起孝。《釋文》:「說,音悅。」

憚也。 黨州間,其罪重。二者之間,甯可孰諫,謂 説,其罪輕。 者,雖不説而必圖復諫,雖犯顏而 孝之大,故父母之過足以得罪於鄉黨州 無犯者,雖事親之道,而陷親不義者,乃不 孝敬、冀以感動乎親而復進其説也。 不人者,必己之孝敬有未至,故復興起 諫」也。起者,悚然興起之意。諫之所 下、怡、柔,皆和順之意,所謂「事父母幾 父母有过諫諍之禮。」 純孰殷勤 而諫,若物之成孰然。 孔氏曰:「犯 畏懼不諫,使父母 7顔而 諫,使父母不 此一節論 得罪 有 有隱 於 所 誾 鄉 不 其 以

父母有婢子若庶子庶孫,甚愛之,雖父母没,

没身敬之不衰。

不足以盡其意故也。」曰:「父母愛而己則敬之,重親之意,愛之婢子夾我」,是也。若,及也。 高氏愈婢子,賤妾也。《檀弓》陳乾昔曰「使夫二

高氏愈曰:「由,自也。視,比也。親之所不衰。

行夫婦之禮者,恩情不敢稍殺也。宜與不高氏愈曰:「宜猶善也。出,謂出其妻也。

微賤 不敢專,至於父母没而不衰焉,則又事 者當以父母之愛惡爲愛惡,雖婢妾庶孽之 得失有不必計矣。 當然也。」 母之僻惡僻愛而亦不敢有所違,順親之道 如事生之孝也 姑則婦,不能事舅姑則 宜,子與父母 而有所不敢忽,雖妻妾之親私 愚謂:婦以 未 知孰 此以上三節,言爲 是,然人子之心 不婦,而其他 事舅姑也,能事舅 而 事之 人子 即 有 所 死

爲不善,思貽父母羞辱,必不果。父母雖没,將爲善,思貽父母令名,必果。將

繫於親,蓋孝子之心如此。」 惡其辱親,則惡必去。榮辱不繫於其身而勇,人情之常也。喜其榮親,則善必爲。

姑,介婦請於冢婦。 舅没則姑老。冢婦所祭祀賓客,每事必請

於

老,謂 重矣。 敢專行也。 夫,蓋祭必夫婦親之。 婦人之傳重,則 傳 每事必請於姑者,婦雖受傳,猶 家 事 介婦,衆婦 於長婦也。 不係 於己之年而 夫没則妻不得不 也。 男子七十而傳, 介婦請 係 於 於 冢 不 · 傳 其

舅姑使冢婦,毋怠、不友、無禮於介婦。

婦

,以其代姑統家事也

鄭氏

日

「善兄弟日

友。

娣姒猶兄弟

也

姑使冢 矣。 所生 至不友、無禮於介婦 愚謂: 怠於敬 也。 婦,冢婦 友猶愛也。 怠於事 而 以 不可以己之尊 慢 而 加 以勞加介婦, 也。 介婦 不友、無禮,皆怠之 則無禮 而懈怠,以 則不 矣。 舅 友

不敢並命,不敢並坐。 舅姑若使介婦,毋敢敵耦於冢婦,不敢並行,

以舅姑之任己而敵耦於冢婦,至於並行、命,謂使令其下。舅姑使介婦,介婦不可

至矣。蓋冢婦即異日之宗婦,介婦所宗而至矣。蓋冢婦即異日之宗婦,介婦所宗而上二節言冢婦、介婦相與敬事之道。蓋家此二節言冢婦、介婦相與敬事之道。蓋家此二節言冢婦、介婦相與敬事之道。蓋家下介婦,爲介婦者能盡禮以事冢婦者的與大婦人,以尊冢婦者的與其道,而家無不和矣。

請於舅姑。 凡婦不命適私室不敢退。婦將有事,大小必

之命 私室 婦 敢 鄭氏曰:「婦侍舅姑者也,必請於舅姑,不 而言。 專行。」 如 不敢擅退,私事大小必請,蓋重舅姑 此 私室、婦所居室也。 高氏愈曰:「凡婦,通 事 ', 謂 冢 **海、介** 私

敢私與。釋文:「畜、許六反、又許又反、又勑六反。」子婦無私貨、無私畜、無私器、不敢私假、不

,養牲也。假,以物借人。與,以物遺人

畜

也。 鄭氏曰:「家事統於尊也。」

乏。《釋文》:「茝,本又作「芷」,昌改反,章昭昌以反。」反賜之,則辭。不得命,如更受賜,藏以待而獻諸舅姑。舅姑受之則喜,如新受賜。若婦或賜之飲食、衣服、布帛、佩帨、茝蘭,則受婦或賜之飲食

約人。

之法,所以申上「無私貨」三句之意。 其初受於私親兄弟之時,蓋物之藏於舅 姑,不啻其藏於己也。不得命,不見許也。 如更受賜者,如更受舅姑之賜,蓋物雖出 如更受賜者,如更受舅姑之賜,蓋物雖出 於私親兄弟,不啻其出於舅姑也。藏於舅 之者,待舅姑之乏而獻之也。如初受賜者,如 是者,得舅姑之乏而獻之也。並、蘭,皆

句。賜而后與之。 婦若有私親兄弟,將與之,則必復請其故,

請於舅姑,舅姑賜之物而後與之。此申上復,白也。復請其故者,謂以當與之故,白

若富,則具二牲,獻其賢者於宗子,夫婦皆齊

「不敢私假,不敢私與」之義。

貴富人宗子之家,雖衆車徒,舍於外,以寡適子、庶子祗事宗子、宗婦,雖貴富,不敢以

於宗子也。舍於外而不敢畢入,所以降下弟。宗子,謂大宗也。宗婦,大宗子之婦。適子,謂父及祖之適子。庶子,謂適子之

於宗子之門,不敢以貴富加於父兄宗族。而后敢服用其次也。若非所獻,則不敢以入子弟猶歸器,衣服、裘衾、車馬則必獻其上,

至於父兄宗族,皆不可以此加之也。人,無往而可,故非但不敢以入宗子之家,非宗子之爵所當服也。」 愚謂:貴富驕見饋賜,當以善者與宗子也。非所獻,謂鄭氏曰:「猶,若也。子弟若有功德,以物

而宗敬焉,終事而后敢私祭。《釋文》:「齊,側

智 反

文》:「稰,思呂反。穛,側角反。」 飯:黍、稷、稻、粱、白黍、黄粱,稰、穛。《釋

爲孰穫。」 愚謂:稰、樵者,言六種之飯,以其生穫,故斂縮也。「稰」既對「穛」,故梁」,則上「梁」是白粱也。 穛是斂縮之名,曰 雅。」 孔氏曰:「此飯凡有六種。下云『黄鄭氏曰:「飯,目諸飯也。孰穫曰稰,生穫

雉、兔、鶉、鷃。《釋文》:「膷,音香。臐,許云反。 羊炙、羊胾、醢、豕炙,醢、豕胾、芥醬、魚膾 膳:膷、臐、膮、醢、牛炙,醢、牛胾、醢、牛膾 爲加,四簋六簋,惟據其正者言之,其加者 六。 其穀皆有生穫、孰穫之異也。 朔食自當有麥、苽,但不在六簋之數耳。 不在此數也。《膳夫》天子「食用六穀」,則 皆黍、稷也。 粱。此則據諸侯,其天子則加以麥、苽爲 「案《玉藻》,諸侯 愚謂: 諸侯朔食四簋,天子六簋 蓋食以黍、稷爲正,以稻、粱 朔食四簋:黍、稷、稻 〇孔 ,氏曰: 膮

始。 膾 謂 謂 炙 南 也。」 《公食大夫禮》以『鷃』爲『鴽』。 十五 九,羊胾十,醢十一,豕炙十二。 也。 此饌綪設之: 行,從西爲始。此是上大夫所加二十豆。 七,兔十八,鶉十九,鷃二十。 三行,從西爲始。 肉醬 共 羊 八。 .醯 以上十六豆,是下大夫之禮也。 強,醢 爲 ,魚膾十六。 臛 · 醢 羊胾東豕炙,豕炙南醢,醢西豕胾,醢 ,羊炙東羊胾,羊胾東醢,醢 也。 二行 愚謂: 也 四物爲第二行,從東爲 西 牛 西牛胾, 醢爲 ,最在於北 膮 牛胾六,謂切牛肉。 膾,醢 三,謂 腳、臐、膮、牛炙最 醢、醬皆所 醢十三,豕胾十四,芥醬 四物爲第四行,從東爲 爲 豕 4 臛 ,從西爲始。 膾設 牛胾設也。 也 以 配裁、 也。 四物爲第五 牛 四物爲第 始。 炙 爲羊 鴽,鴇母 在 醢 牛 四 七,牛 北,牛 膾也。 醢 雉十 牛 羊炙 ·胾設 膾 五, 胾 南 四

> 糟。 文》:「重,直龍反。 飲 : 爲 爲 無醬。」 重醴,稻 或 魚 豕 胾 以 膾 設 酏 設 也 也。 爲 醴 醴, 清、糟,黍 糟,子曹反,徐徂到 《公食大夫》記 胾 黍 西 **| 芥醬** 酏、漿、水、醷、 醴 「, 醬 清、 西 反。 糟 魚 云:「凡 粱 膾 醷,本又作 7,芥醬 醴 清、 《釋 炙

「臆」,於紀反,徐於力反。濫,力暫反。」

鄭氏 載也。 醇也。 間,名諸爲 設之也。 雜之名。案《漿人》『六飲』: 水,謂以諸雜糗飯之屬 水也。」康成以涼與濫爲 飲」有『涼』,注云:『涼,今寒粥,若糗飯 周禮》『六飲』校之,則濫、涼也。 曰:「飲,目 醷,梅漿也。 清,游也。 以酏爲醴,釀粥爲醴 濫。」 諸 致飲有醇者,有泲者,陪 孔氏曰: 飲也。 濫,以諸和 和 水 物 重,陪 也。 則 一曰水,則 「《漿人》『六 也。 水也。 此 紀、莒之 諸者,衆 也 漿,酢 諸 糟 此 以 雜 和

此 爲醴」一也。六曰酏,則此經『黍酏』一也。 經『水』一也。二曰漿,則此經『漿』一也。 六飲之外,此經別有『醷』,若鄭司農之意, 三曰醴 經『濫』一也。 ,則此經『重 五曰醫,則此經『或以酏 禮一 也。 四日 凉 列則

也。 以醢」、「若醯醷」,則醷是醯之類,又云『獸 **醷與醫爲** 用梅』,故知梅漿也。」 康成以醷爲梅漿者,見下文云『調之 一物,即以酏爲醴者,非康成義 愚謂:或以 酏 爲

漿,當從康成,醫、醷 成注《漿人》以此爲醫,非是。蓋醷爲 物,當從司 農。 黍 梅

醴,此即上文之「重醴」而爲之異法者。

康

六物,與《漿人》「六飲」相當: 醴一,酏二, 黍爲粥也。 水,即井水也。 此飲凡

酏,以

即《漿人》之「涼」也 漿三,水四,醷五 ,即《漿人》之「醫」,濫六,

酒 清、白。

> 也。一 俱白 此無『五齊』者,五齊祭祀所用,非人常用 鄭氏曰:「酒,目諸酒也。 ,故以一『白』標之,配清酒 孔氏曰:「清,謂清 酒。 白,事酒、昔酒 事酒、 則焉三酒 1、昔酒

餌,音二。 酏,讀曰復,又作「餰」,之然反,又之善反。」 羞: 糗餌、粉酏。 《釋文》:「糗,起九反,又昌糾 反

故也。」

爲之。糗者,擣粉熬大豆。 著,故以粉、糗摶之。』《周禮》『粉』下有 臅膏爲餈,是也。」 食。』此記似脱。酏當爲『蹇』,以稻米與 之實,糗餌、粉餈。 鄭氏曰:「羞,目諸 酏者,於《周禮》羞豆之實也,自當作『餐』 。 曰餌,餅之曰餈。 餈』,今無者,記人脱漏,更以『酏』益之。 羞籩之實,糗餌、粉餈」,鄭注云: 『合蒸 此二物皆粉稻米、黍米 羞也。《周禮》:『羞 羞豆之實, 酏 孔氏曰:「案《周禮 爲餌、餈之黏 食、 狼 糝 簜

鄭

稌、●犬羹、兔羹,和糁不蓼,濡豚包苦實蓼, **鯤,古門反。殿,丁亂反。** 折,之列反。 膾、芥醬、麋腥、醢、醬、桃諸、梅諸、卵鹽。 濡鷄醢醬實蓼,濡魚卵醬實夢,濡鼈醢 一,腶脩、蚳 謂: 若 言内羞也。 且寝雖雜 而言之,當云「糗餌、粉餈、酏食、糝食」,而 「餈」,其事 '糝食」文連,則是糝類。 粉」下脱去一字,「酏」下脱去三字也。 蝸醢而苽食、雉羹,麥食、脯羹、鷄羹,析 「食,音嗣。 羞有庶羞、内羞,上文「膳」是庶羞,此 酏 則 稌,音杜,徐他古反。 濡,音而。 是 以 醢、脯羹、兔醢、麋膚、魚 亦 此云「羞」,蓋總籩、豆之内羞 蝸,力戈反。苽,音孤,字又作「菰」,同。 ,粥,非 狼臅膏,亦粥之般類。」 相 連 **蚳**,直其反。卵鹽,力管反。」○ 醢,一本作「醯」。 卵醬,依注音 ,故知『酏』當作『答』。 膳羞之用。 八珍内作『糝』與 和,和卧反。糁,三敢 此「酏 醢 《釋 實 與 魚 愚

> 注: 胡也。 亂。 用。 此二十六物,似皆人君燕所食也。 也。 鄭氏曰: 者味相宜。 膚,切肉也。 也,以包豚,殺其氣也。 肉」也。凡濡,謂亨之以汁和也。 屑之糝,蓼則不矣。 此脯,所謂『析乾牛羊 犬、兔爲羹,此三者亦味相宜。 爲羹,三者亦味相宜。 「卵,或作「攔」。 以蝸爲醢,以苽米爲飯,以雉爲羹,三 殿脩,捶 稌,稻也。凡羹齊宜五味之和,米 孔氏曰:「此 「食,目人君燕食所 以麥爲飯,析脯爲羹,又以 卵鹽,大鹽也。 脯 施薑桂也。 膚,或爲「胖」。」 節總明 細 卵 析 蚔,蚍蜉子也。 讀 稻 角 人 自「蝸醢」至 爲 米 也。 君 和糝不蓼 苦,苦茶 鯤,魚子 爲飯,以 燕食 其饌 苽 所 則

注

^{♪ 「}析」,原誤作「折」,今據四部叢刊景宋本及《禮記

菹也。 須加 破開 也。 魚以 脯 云。桃 之,食麋膚以魚醢配之,食魚膾以芥醬配 之般類,故讀爲鯤。 蚍蜉之子,『卵醬』承『濡魚』之下,宜是 知卵讀爲鯤者,鳥卵非爲醬之物 者,此等之羹,宜以 十六物,蝸醢一,苽食二,雉羹三,麥食四, 藏之,必先乾之,故《周禮》謂之『乾藤』,鄭 鹽配之。麋膚,孰肉。 之,食麋腥以麋醢配之,食桃諸、梅諸 裹以苦菜,殺其惡氣,濡鷄加以醢及醬,濡 羹五 其腹 夢也。 魚子爲醬,濡鼈 食殿脩以蚳醢配之,食脯羹以兔醢 諸、梅諸」,是也。 桃菹、梅菹、今之藏桃、藏梅也。 ,雞羹六,析稌七,犬羹八,兔羹九, ,實夢於其中,更縫 濡,亨煮之,以其汁 五 亦加醢 鯤,魚子也。 味調 麋腥,生肉也。 自『蝸醢』至此二 和 及醬,四者皆 米屑 而合之以 ?,蚳醢 調 爲 濡豚 和 巻,不 以卵 也。 欲 煮 配 包 魚 是

則《公食大夫禮》具有其文,與此又異,故 相配 自此 即鼈之醢醬也。 雞」之下,即雞之之醢醬也。 盡用之也。 食,用得此諸物,然每 屬在豆,是上下雜亂也。」 後,此不依牲之次第,又飯食在簋,醢羹之 疑是人君燕食。 簋十有二,其正饌與此不同。其食臣下, 故不數, 自此以下, 醢及醬各自爲物,但 濡 五,卵鹽二十六。《掌客》諸侯相食,皆鼎 二十二,醬二十三,桃諸二十四,梅諸二十 脯羹重出,兔醢十六,麋膚十七,魚醢十 八,魚膾十九,芥醬二十,麋腥二十一,醢 豚十,濡 丽 以上,醢、醬皆和調、濡 食,故數之。 雞 濡雞 + 一,濡 醢 上陳庶羞,依牲 糜腥 醬實蓼,「醢醬」承「濡 殿脩十四, 蚳 ·用自有常數,非一 魚 醢 十 二; 醬 愚謂:人君燕 ,即麋之醢 漬雞豚 濡鼈之醢醬, 濡 醢 鼈 大 之屬 十三。 小 食 先

殿脩乃籩實,不用於食。此與下

大夫

也

「有脯無膾」,皆以脯用於食者。案八珍中

之熬,有濡食、乾食之異,熬捶而加薑桂,

鄭氏以爲若今之火脯。是脯脩有濡食之

醢,而盛之則以豆與。麋腥,謂生切麋肉法,則其用於食者也。其皆釋而煮之以

以醢釀之,即下文「麋、鹿、魚爲菹」,是也。

氏以爲菹,蓋亦用醢釀之者,故用之於《周禮》之「乾藤」亦籩實,此桃諸、梅諸,孔

食也。

凡食齊視春時,羹齊視夏時,醬齊視秋時,飲

齊視冬時。《釋文》:「食,音嗣。齊,才細反。」

宜寒。」 鄭氏曰:「食宜温,羹宜熱,醬宜

一 涼,

飲

凡和春多酸,夏多苦,秋多辛,冬多鹹,調以

滑甘

鄭氏曰:「多其時味,以養氣也。《周禮》

宜苽。 牛宜稌,羊宜黍,豕宜稷,犬宜粱,鴈宜麥,魚 氣。 方》: 『春不食酸,夏不食苦,秋不食辛, 火、金、水之成於土。」 注 不食鹹。」謂時氣壯者,減其時味以殺盛 曰 此恐氣虚 : 各 尚 其 羸,故多其時味以養氣也。」 時 味 耐 甘 以 孔 氏 成 之, 曰:「《經 猶 冬

焉。 鄭氏 養親 百醬、八珍之齊。」而曰『凡君子之食恒放 醫》:『掌和王之六食、六飲、六膳、百羞 和飲食之法。」 此,皆《周禮·食醫》文,而記者載之,論 滋味爲美,故不同。 宜粱』者,此據尊者正食,上據人君燕食以 「上云『折稌用犬羹」,此云『牛宜稌』,『犬 也。 曰:「言其氣味相成。」 此大司徒以 劉氏 施諸教,人子皆視此以 自『食齊視春時』至 |彝曰:「《周官 孔 氏 食 日 調

〈釋文》:「薌,音香。 宜 膏臊, 也。 魚。 方 火剋金,火盛則 爲木王,牛中央土畜,春東方木,木剋土 之宜 盛,煎以 西方金,金剋木,金盛則 木盛則土休廢。 人》曰:『牛屬司徒,土也。 臊,素刀反。 羔、 氏曰:「腒,乾雉也。 犢、靡, 火,冬水王,水 孔氏曰:「此記《庖人》論 羽,鴈也。 ,以王、相、休、廢相參,其味 犬屬司 雞膏腥,羊膏羶。 豚 休 膳 膳 廢之膏,節其氣 腥,音星,《説文》作『胜』。 寇、金也。 膏 膏 腒,其居反。 此八物, 腥 薌 金休 犬屬 剋 冬宜 夏 火,水 廢。 羊屬 西方金,夏 宜 ,四時肥; 鱐,本又作「驌」,所求 鱅,乾魚。 木休廢。 鄭 雞屬 鮮、 腒、 也。 盛 四 司 雞屬宗伯,木 注《周禮 鱅 羽 ... 馬,火也。」 則 東 羶,升然反。」 牛膏薌、犬 美,爲其大 乃善。 放和膳 火休 膳 方木,秋 南 膳 羊屬 鮮,生 方 膏 膏 廢 火, 羶 臊 南 春 食 庖 王 彦 口 物

反。

秋

春

性定。 也。 春木王火相,土 『宜』,謂氣味相宜,其事同 羽,鴈也。 制》『獺祭魚,然後漁人入澤粱』,是冬魚 爲生魚也。 執腒。』故知腒爲乾雉。 義 食之弗勝,是以用休廢之脂膏煎和膳之。」 『膴、鮑魚、鱐』,「鱐」與『鮑』 周 土 成 知 曰:「殺牲謂之用,煎和謂之膳。 故知鱅 與此同 禮》 羽族 相 而 王所剋者死,相 此八物者,得 ,金死水囚 鄭 充,腒、鱐 既多,而冬來可 注云:『羔、 \Rightarrow 是乾 《月令》云『季冬獻 念 士 周禮》云『行』,謂 魚也。 死 相 暵熱 ,木爲休廢。 金囚,水爲休廢。 見禮》云:『冬執 四時之氣尤盛,爲 所剋者囚,新謝者爲 豚 而 鯆 《周禮 物 乾 食者 既 也。 生 魚、鴈 相 爲 而 行 以下推之, 唯 對 魚』,又《王 乾 籩人 》云 肥, 用, 腐,故 鮑 魚 賈氏公 水 、雉,夏 五行 故 犢、 夏火 此 爲 涸 굸 知 成 鮮 溼 人 麛 丽

芝栭、蔆、椇、棗、栗、榛、柿、瓜、桃、李、梅、 或爲『胖』。」 作『檽』。蔆,音陵。 杏、楂、❶棃、薑、桂。《釋文》:「磨,九倫反,本又作 豕、麕皆有軒,雉、兔皆有芼,爵、鷃、蜩、范、 牛脩、鹿脯、田豕脯、麋脯、蠯脯,麋、鹿、田 「麇」,又作「鷵」。軒,音憲,出注,後放此。 鄭云『休廢』者,相 休 亦爲休廢,故鄭以『休廢』言之。」 廢。 若 然, 柿,音俟。楂,側加反。」○鄭注:「軒 繒 所 對死與休廢別 膳 膏 皆 是 死 栭,音而,本又 ?;散則 之脂 膏 死

備録。」 可爲 芰 鄭氏 切 此三十一物,皆人君燕食 【周禮》天子『羞用百有二十品』,記者不能 也。 ,故云『皆有軒』。不言『牛』者,牛唯 曰: 脯 椇, 枳 ,又可腥食,皆藿葉切之,而 孔氏 「軒,讀 椇 曰:「麋、鹿、田豕、鷹,非 也。 爲憲,謂 柤, ❷梨之不 藿 所 葉 加 切 庶 也。 臧 羞 不 者。 也。 蔆, 細 但 可

> 也。」 之。 惟 皆《籩人》之籩實也。 薑、桂二者,則調 也、皆用以食者也。 豕、麕之軒,及雉、兔、爵、鷃、蜩、范,庶 杏、楂、梨,蓋亦盛之以**籩**,而 未知孰是。脩、脯、蔆、棗、栗、榛、桃、梅, 十一物,賀氏以芝栭爲二,則爲三十二物 雉羹、兔羹皆有菜以芼之。 細 人》,則此乃人君私燕所用也。 曰芝栭。 切 有雉、兔及鷃,則 鄭以此三十一物並爲庶羞,非也。 爲膾,不宜爲 愚謂: 賀氏曰:『芝,木椹。 孔氏以芝栭爲 和 軒 此 羞膳,及爲殿 也。 上大夫庶羞二十豆 芝栭、椇、柿、瓜、桃 人君所用 雉、 無華葉而生者 兔皆有芼者, 不見於《籩 一,則爲三 麋、鹿、 栭, 庶 脩皆 羞 軟棗 也 用 羞 庶 田

^{, 「}柤」,原脱,今據《禮記注疏》補。, 「楂」,據《禮記注疏》阮校當作「柤」。

羞盛於豆,皆濡物,無脯、脩之屬也。

胾。庶人耆老不徒食。 大夫燕食,有膾無脯,有脯無膾。士不貳羹、

醢,而 是。 庶人 朔食惟特豚,則不得貳胾矣。六十曰耆。 得有羹、胾,而不得重設也。 或偶無膾,則得以脯代之。 蓋釋而煎之以 此大夫燕食乃有脯者,蓋燕食物不必備, 是也。孔氏分燕食與朝夕常食爲二,非 之,下云「羹食無等」,是也。 食則奉膳贊祭」,賈疏「燕食,朝夕常食」, 有胾,非六十者不得食也。 脯 (耆老不徒食者,六十非肉不飽,食得 ,謂朝夕常食。 盛之則 爲 籩 實,凡食無 以豆 也。 《周禮 貮,重也。 籩,惟飲酒 • 膳夫》「王燕 羹則庶人皆有 胾出於牲,士 士燕食 有之。

脂用葱,膏用薤,三牲用藜,和用醯,獸用梅。膾:春用葱,秋用芥。豚:春用韭,秋用蓼。

芥,芥辛,於秋宜也。 芥醬也。 氏曰:「上云『魚 薌,蘇荏之屬也。 相和也。 鄭氏曰:「此言調和菜釀之所宜 切雜之也。『鴽』在『羹」下,烝之不羹也。 烝熟之。 雛是鳥之小者,火中燒之,然後 用鷄爲羹,駕唯烝煮之不以爲羹,故文在 `羹』下,三者皆釀之以蓼。 爾雅》謂之榝。 獸用梅,亦野物自相和。 藙,煎茱萸也。 三牲和用醯 膾、芥醬」,則謂 燒,煙於火中也。」 鶉、鷄羹者 漢律,會稽獻 魴、鱮二魚皆 ,畜與家物自 謂 也。 秋 釀,謂 時用 用 孔 鶉

既 醯 釀 用 諸 芥醬食時相配者不同 雛 羹,其用無定,故直云『雉』。 言魴、鱮 調 春則用韭。自「葱」至「藙」五者,皆用 下文云「肉腥,細者爲 淡 熟 而 醯 也 蓼,即上文「濡豚包苦實蓼」,是也。 和 酸之屬謂之和。 ,醯及梅 燒并雉三者,調和 以柔之」,是也 和 之也。 愚謂:此 則 用 以 和也。 釀者雜之以亨煮,和 論 唯以 雉 若秋 調和 [膾],「切葱若 也。 或烝或燒,或 用菜謂之釀,用 蘇荏之屬,無用 之宜,與 則用芥。 膾,春用葱 魚 薤 豚秋 烝 可 膾 實實 ·,即 若 以以 則 及 爲

不食 文》:「去,起吕反。尻,苦刀反。腦,奴老反。」 尻 狐 雛 去首, 鼈。 狼去腸,狗去腎,狸 豚去腦, 魚去 Z, 鼈 去正脊 去 醜 兔去 0 《釋

乙,魚體中害人者名也。今東海鰫魚有骨鄭氏曰:「皆爲不利人也。雛鼈,伏乳者。

攢,再官反,本又作『鑽』。」 桃 肉 日 曰膽之,柤、梨曰攢之。《释文》:「膽,丁敢反 孔, 豕俯精 直,狗腎熱,狸 出。 『魚腸謂之乙。』餒自腸始,故去乙。」 之昏人精神。」 脱之,魚曰作之,棗曰 乙,在 醜,謂 目旁,狀如篆『乙」,食之鯁人不 聚 鼈 竅 在 脊上 腦。 也。」 方氏慤曰:《爾雅 《醫方》云:『豕腦 道如界,兔尻有 陸氏佃曰:「狼 新之,栗日 「撰之, 食 九 腸 可

注云:『 小 其鮮餧。』《爾雅》李廵注云:『作之,魚骨 云:『作,謂 郭氏云: 『剥其 處。』《爾雅》李廵注云:『肉去其骨曰 鄭氏曰:「皆治擇之名也。」 肉曰 *, 所去。」郭 脱之者,皇氏云:『除其筋膜 謂削 動 鱗 摇 也。』 棗曰新之者, 棗易有 氏《 皮。」魚 也。 爾雅》今本作 凡 取 曰 魚,摇 作 之者,皇 孔氏 動之,視 『散之』, 心,取好 脱。 曰 氏

腥。 音零。 音螻,力侯反。」 沙,如字,一音所嫁反。睫,音接。 躁,臊。 牛 音先定反。般,音班。 好食 夜鳴則庮。 曰 : 塵 者,桃多毛,拭去之,令色青滑如膽也。 攢之者,恐有蟲,故一一攢視其蟲孔也。」 埃,恒 馬黑脊而般臂,漏。《釋文》:「庮,音由。 毳,昌锐反。 謂若桃有苦如膽者擇去之。柤、梨曰 ,數數布揀。 鳥皫色而沙鳴,鬱。 治拭之使 麃,本又作「皫」,徐芳表反,又普表反。 羊羚毛 臂,本又作「擘」,必避反。漏,依注 撰,省視也。 新。 而毳,羶。 栗曰 腥,依注作『星』、《字林》 豕望視而交睫, 撰之者 狗赤 桃 曰 東 栗 ?股而 膽 泠 或 之 蟲

《春秋傳》曰:『 鄭氏曰: 望視,遠 色,毛變色也。 聚旃不解者也。 視 「亦皆不 也。 沙猶 腥 赤股,股裹無毛也。 薰 利 當 爲『星』,聲之誤 嘶 人也。 唐。』 泠毛毳, 毛别 也 庮, 惡 鬱,腐臭 臭也。 也。 也 皫

> 則其肉. 嘶。 星,肉 豕,令肉中生小息肉也。」是腥者豕生小肉 謂舉動急躁。 如螻蛄臭也。」 馬之前 視望揚。 色,色變而 如此,則其肉羶氣。 泠,謂毛本希泠。 漏當爲『螻』,如 腥臊」之「腥」作「胜」。 鄭司農云:「庮,朽木臭也。」《説文》 鳥若如此,則其 中 如 脛,其色般般然。 如 交睫,謂目睫 星。 米 無潤澤。 狗若如此 者。 黑脊,謂馬脊黑。般臂, 螻蛄臭 愚謂:此《周禮 牛若夜鳴,則其肉庮臭。 **毳**,謂毛頭 般 赤股,股裹無毛。 (肉腐 沙,嘶也,謂 臂,前 、毛交。 腥字云:「星見食 ,則其肉臊惡。 也。 馬若如 臭。 脛 結聚。 豕若 望視,謂 般 孔 此 般 鳴 氏 内 了, 其 如此: 然 羊若 丽 티 : 也。 肉 豕 謂 皫 聲

如星,故從肉從星

雛 尾不盈握弗食、舒鴈翠、鵠、 、鴞胖

七九六

字又作「閒」,同。」〇鄭注:「鵠,或爲「鴇」。」 鴞,于驕反。 雞 肝 鴈 胖,音判。 鴇 奥、 鴇,音保。 鹿 胃 《释文》: 奥,於六反。 鵠 胃,音 胡 篤 謂 反。

謂: 利 脅側薄肉也。 鄭氏曰:「舒鴈、鵝也。 者、據物理之常而知之也。 之變而察之也。此節所言,一體之不可食 人 孔 上節所言,全體之不可食者,因物形 也。 氏 曰:「此廣言不堪食之物,亦 奥,謂 舒鳧,鶩也。奥,脾肶 脾肶 藏之深奥處。」 翠,尾肉也。 爲不 也。 胖, 愚

鄭氏曰:「細者爲膾,大者爲軒,言大切、

皆牒 齏也。 齏。 爲菹,野豕爲軒,是菹也。 孔氏曰:「凡大切,若全物爲菹 軒,聶而不切。 鹿埋地中令臭,乃出食之,名鹿矮。 菜而柔之以醯,殺腥 切之』也。軒、辟 細 與麋、鹿並言,是魚之大者。 鹿矮者,近由此爲之矣。《釋文》云:「益州人殺 之醋中,悉皆濡孰,故曰『柔之』。 其辟雞 云『魚』,比云『魚』者,記者異 而切之。』●是菹大而齏小也。《少儀》不 切異名 性體大者菹之,小者齏之。 而不切。 《少儀》曰:『麋鹿 也。 屬爲辟雞,兔爲宛脾,皆 膾 辟雞、宛脾,聶而切之。」 者 雞、宛脾,皆菹類 必先軒 肉及其氣,今益州 爲菹,野豕 辟雞、宛脾,是 之,所謂『聶 **矮,於僞反。**」 菹 聞 肉及蔥薤置 ,細切者爲 麋、鹿、魚 也。 也。 爲 此魚 軒 牒 有 釀 而

者爲 也。 禮》云:「全物若牒爲菹,細切爲齏。」此 爲膾,大切者皆爲軒也。或者之説,則謂 腥 宛 切菜大小之異名,故《醢人》云:「掌五 切肉之名,牲各不同,故又記之。 釀牲肉,故鄭云「軒、辟雞、宛脾,皆菹 雞、宛脾皆齏也。 名,菜、肉通,故此言菹 七菹。」此專謂菜 脾 八軒,此 及軒之名,其 用 生 謂 肉 釀 不辨牲之大小,凡細切者皆 而食之也。 爲齏、菹也。 齏、菹雖異,然皆是以 義 未 與軒,皆菹 聞。」 細者爲 然齏、菹 愚 鄭注《周 謂 也 膾 大 辟 之 齏 謂 類 醯 肉

「食,音嗣。」

不貳羹、胾,庶人耆老不徒食,則庶人非耆愚謂:無等,謂常食皆得有羹食也。士鄭氏曰:「羹食,食之主也,庶羞乃異耳。」

於閣三、士於坫一。 左達五,右達五。公、侯、伯於房中五,大夫 大夫無秩膳,大夫七十而有閣。天子之閣 矣。此之謂有等。 諸侯日食特牲,則大夫日 膾,有膾無脯 之差,則諸侯以下遞有降殺,未嘗無等也 故曰「無等」。若羹食所用之物,與其多少 老,常食不 · 得 有胾矣。 ,則士常 若羹食則上下皆有之, 食不 大夫 食 得 燕 矛 有 食, . 得 脯 有成牲 有 、膾矣。 脯無

食也。 者也。● 也。 之,庋食物也。達,夾室。」 鄭氏曰:「大夫無秩膳,謂五十始命,未 檀弓》:「始死之奠,其餘閣也與?」《士 夾室與房,謂 秩膳,謂 七十有閣,有秩膳 常置美食於左右以備食 燕寢 之 夾室 也。 愚 閣以 謂:膳,美 與房也 板 爲 老

❶ 「未」下、《禮記注疏》有「甚」字。

七九八

閣惟 喪 坫亦 於坫 之坫也。士之坫亦在房。《王制》曰「九十 子之文也。 **站以庋食也。公、侯、伯不言「閣」者,蒙天** 侯可知。坫,土坫也。 來,是閣在燕寢明矣。 東。」疾必居 諸 氏 者,謂閣與坫之數,非謂 室,當在房可知也。 對文則板爲者曰閣,土爲者曰坫,散文則 飲食不離寢」,則未九十者飲食不得 公侯之文也。大夫特言「於閣」者,别於士 謂 侯朔食正 置 謂之閣、檀弓》言「餘閣」是也。 諸侯之五、爲三牲、魚、腊」,非 ,而餘閣有脯、醢,則大夫以上非 「醴酒、脯、醢 種明矣。 大夫、士不言「於房中」者,蒙 Œ 少牢,則閣不得備三牲矣。 寢, 而餘閣之奠,别從他 日五日三日一 士坫 ,升自阼階,奠於 士禮如此,天子、諸 士不得爲閣,爲土 膳之種數也。士 亦七 十乃有之。 在 也。 寢 尸 處

> 之法。 非 五閣,諸侯卑,庖厨宜稍近,故於房中」,亦 於房中,非大夫與天 諸侯於房中亦爲閣,大夫之閣、士之坫亦 氏 不在此也。 「天子尊,庖厨遠,故左夾室五閣,右夾室 也。 又謂「大夫之閣與天子同處」,亦非也。 夾室與房,特庋食之所耳,庖 ○自「飯黍稷」至此,雜記 八子同 . 虚 也。 孔 飲食 疏 厨 初

禮記卷二十七終

禮記卷二十八

國史館纂脩孫希旦集解賜進士及第翰林院編脩

内則第十二之二

以 凡養老,有虞氏以 君命,一坐再至,瞽亦如之,九十者使人受。 紟、衾、冒死而 制,七十時制,八十月制,九十日脩,唯絞、 九 五十異粻,六十宿肉,七十貳膳,八十常珍, 六十養於國,七十養於學,達於諸侯,八十拜 飽,七十非帛不煖,八十非人不煖,九十雖得 食禮,周人脩 一飲食不違寢,膳飲從於遊可也。 后制。 而 燕禮,夏后氏以饗禮,殷人 兼用 五十始衰,六十非肉不 之。 凡五· + 養於鄉, 六十歲

及也。 皆引年。八十者一子不從政,九十者其家不 凡自七十以上,唯衰麻爲喪。 服戎,七十不與賓客之事,八十齊喪之事弗 存,九十日有秩。五十不從力政,六十不與 則就其室,以珍從。 杖於國,八十杖於朝,九十者,天子欲有 冕而 膠,養庶老於虞庠。虞庠在國之西郊。 氏養國老於東序,養庶老於西序。 從政,瞽亦如之。凡父母在,子雖老不坐 人不煖矣。 氏皇而祭,深衣而養老。 老於右學、養庶老於左學。 有虞氏養國老於上庠,養庶老於下庠。 衣而養老。 祭,玄衣而養老。 五十而爵,六十不親學,七十致政。 殷人冔而祭,縞衣而養老。 五十杖於家,六十杖於鄉,七十 七十不俟朝,八十月告 夏后氏收而 周人養國老 凡三王養老 殷人 祭,燕 夏后 有虞 周人 於東 養國 問焉

七九九

子雖老不坐,謂在父母之側也。

文》、「樂、音洛。忠養、羊亮反。」

文》、「樂、音洛。忠養、羊亮反。」

文》、「樂、音洛。忠養、羊亮反。」

文》、「樂、音洛。忠養、美元。」

文》、「樂、音洛。忠養、羊亮反。」

文》、「樂、音洛。忠養、羊亮反。」

文》、「樂、音洛。忠養、羊亮反。」

文》、「樂、音洛。忠養、羊亮反。」

《釋文》:「惇,音敦。」
「應,既養老而后乞言,亦微其禮,皆有惇史。體而不乞言,有善則記之爲惇史。三王亦凡養老,五帝憲,三王有乞言。五帝憲,養氣

厚者。 篇首。 虞氏以 也。」 鄭氏 言」,而亦未至於勞老者之氣體矣。 則帝王養老之所同也。 憲之以爲法於一身,記之以垂訓於後世 其禮,則其求之也不敢堅。 養老而後乞言,則其求之也不敢遽,微 行之善則記録之,爲惇厚之史也。 三王既 其氣體,而不欲乞言以勞動之,老人有 已,三王又從之求乞善言也。 曰 微其禮者、依違言之、求 燕禮」至此,疑他篇之脱簡。 愚謂: 五帝以老人宜安静,故務 憲 ,法也。 養之法, ○自「凡養老,有 然則雖曰「乞 惇史,史惇 其德 丽 若夫 不 行 略 德 切 眷 而

《釋文》:「淳,之純反。熬,五羔反。」 淳熬:煎醢加于陸稻上,沃之以膏,曰淳敖

地之稻也。以陸地稻米爲飯,煎醢使熬加孔氏曰:「淳,沃也。熬,煎也。陸稻,陸

《釋文》:「母,依注音模。食,音嗣。」 清。以沃之以膏,故曰淳;煎醢,故曰熬。」 濟。以沃之以膏,故曰淳;煎醢,故曰熬。」

不言『陸』者,黍皆在陸,無在水之嫌。」但用黍爲異耳。食,飯也,謂以黍米爲飯。淳熬。」 孔氏曰:「淳母,法象淳熬爲之,鄭氏曰:「母讀曰模。模,象也。作此象

侯反。 反。 依注作『墐』,音斤。 夜毋絶火,而后調之以醯醢。《釋文》:「炮,步交 以 爲酏,以付豚,煎諸膏,膏必滅之。 之、濯手以摩之、去其皾、爲稻粉、糔溲之以 **萑以苴之,塗之以謹塗。** 炮:取豚若將,刲之刳之,實棗於其腹中,編 小鼎,薌脯於其中,使其湯毋滅鼎,三日三 將,依注音牂,子郎反。刲,苦圭反。 編,必緜反,又步典反。 塗,本亦作「涂」。 萑,音丸。 炮之,塗皆乾,擘 擘,必麥反。 刳,口孤反,又口 苴,子餘反。謹, 鉅鑊湯, 去,起

湯」。」
「所九反。付,徐音賦。鑊,户郭反。使湯,一本作『使其所九反。付,徐音賦。鑊,户郭反。使湯,一本作『使其呂反。皽,章善反。糔,息酒反,又相流反,又息了反。溲,

乾塗也。 穰草相和之塗塗之。 中,編連薍草以裹匝 析其肉使薄,如爲脯然,唯 塗不净,其肉又熱,故濯手摩之,去其皽莫 或取豚,或 曰:「萑,薍草也。苴,裹也。爲炮之法 入鼎三日,乃内 中,使之香美也。 爲『墐』,墐塗,塗有穰草也。 上魄莫也。 爲『牂』,牧羊也。 鄭氏曰:「炮者,以塗燒之爲名也。 **滫瀡」之滫同。薌脯** 濯手以摩之,去其皽者,手既擘 取 糔溲,亦 牂, 刲 醯 謂之脯者,既去皽,則 封、刳,博異語也。 醢,可 刳 豚、牂。 炮之,塗皆乾,擘 ,謂煮豚若羊於小 博異語 其腹,實香棗於腹 豚 食 皽,謂皮 裹之既畢,以 全耳。 也。」 也。 糔 豚、羊 孔氏 將當 謹當 讀 肉之 去 解 薡 與

之炮。 脯, 此牂 形既 其微熱勢不绝。 鑊 中 没此豚、牂也。 也。 外,若牂 也 見之爾 則知豚之置於鼎 肉,有似脯然,故 此牂實不爲脯, 炮豚者,爓去其毛而炮之。」豚既毛炮,則 中,則令食壤也。 湯 者 則知牂之用酏付之者亦薄析者也,互 小鼎盛膏,以膏煎豚、牂於鼎中,膏必 亦當毛炮。」 小、故知全體。《周禮》鄭注云:『毛 中 爲 謂用 也。 糔 稻 則 粉、 溲,謂溲 大鑊盛 解 使其 糔、 析其 鉅鑊湯,以小鼎,薌脯 以擘去乾塗之後,薄析其 日 《周禮》有毛炮之豚。 中者亦全體也,下曰「薌 溲之以 湯毋滅鼎者,若湯 三日三夜毋绝火者,欲 湯,以 2釋其 肉,以 「薌脯」。 愚謂: 裹物 、粉也。 小鼎 爲 粥 酏 上曰「付豚」, 和 薌 ,付全豚 之。 付,傅· 脯 而 燒之謂 置 滅, 一於大 於其 也。 鼎 豚 之 没

> **濤珍**: 作「皾」,下句作「餌」。」 柔其肉。《釋文》:「胨,音每,徐亡代反。餌音二,本或 牛若 ,捶反側之,去其餌,孰出之,去其皽 取牛、羊、麋、鹿、麕之肉必脄,每物與

鄭氏 與。」 餌,筋 曰: 曰 「咸其脢 腱 愚謂: 也。 「脄,脊 柔, 脄與 汁 側 脢同,背肉也。 和 肉 也。 也。 汁 捶, 和 擣 亦 之 《易》 醯 也 醢

漬 : 諸美酒,期朝而食之,以醢若醢、醷。 湛,子潛反,又直蔭反,又將鴆反。期,音朞。」 朝,匝一 绝其理,謂横斷其肌理也。湛亦漬 取牛肉必新殺者,薄切之,必絶 其 也。 《釋文》 (理,湛 期

日也

之。 薑以 釋而 爲熬: 捶之去其皽,编 煎之以 洒 施麋、施鹿、施麕皆如牛羊。 諸 上而鹽之,乾 醢。 欲乾肉, 雈 丽 布 則 食之。 4 捶 肉 而食之。 焉。 欲濡肉,則 施 羊 屑 亦 桂 如 與

之,一本無「而食之」三字。濡,音儒。」○鄭注:「醢,或爲文》:「洒,所買反,徐西見反。鹽,音艷,又如字。 乾而食

禮》「八珍」,其一肝膋是也。」 孔氏 鄭氏曰:「熬,於火上爲之,今之火脯似 耳。《王制》曰「八十常珍,九十者,天子欲 氏以淳熬等八物爲八珍,因擣珍之名,以 推其餘也。「肝膋」宜在「糝」上,簡錯在下 豚若牂,第五擣珍,第六漬,第七熬也。 具」,則珍物者,老者之所需也。 有問焉,以珍從」,《文王世子》「養老之珍 人,文不依次,故在『糁』下。」 「七者,第一淳熬,第二淳母,第三、第四 肝膋,則此「糁」下「肝膋」也。但作記之 欲濡欲乾,人自由也。 此七者,《周 愚謂: 曰 其 鄭 炮炮

米,稻米二,肉一,合以爲餌,煎之。 糁:取牛、羊、豕之肉三如一,小切之,與稻

鄭氏曰:「此《周禮》『糝食』也。

子消反。」〇鄭注:「舉,或爲「巨」。」
燋,其膋不蓼。《釋文》:「幪,音蒙。焦,字又作「燋」,
肝膋:取狗肝一,幪之以其膋,濡炙之,舉

其肝當實夢矣。皆也。舉燋,謂徧皆燋也。其膋不夢,則皆也。舉燋,謂徧皆燋也。其膋不夢,則濡炙之者,謂用膋濡潤其肝而炙之。舉,膋,腸間脂也。炙,謂抗於火上而燒之也。

反,又之善反。」

她。《釋文》:「臅,昌録反,徐又音燭。酏,讀爲簑,之然取稻米,舉糔溲之,小切狼臅膏,以與稻米爲

粥之類,但視粥差厚,故名曰「寝食」,言在順、體。。寝食以稻米合狼臅膏爲之,則亦即用於六飲,則不可用爲豆實,故知此當與「饘」字同。寝與酏皆粥,而厚薄不同。與「饘」字同。寝與酏皆粥,而厚薄不同。如食」也。 配當從『寝』。」 愚謂:「復」

所言也。○自「淳熬」至此,記八珍食、粥之間爾。○自「淳熬」至此,就言其品節制設已見篇首。蓋飲食者,人子之所以孝養説已見篇首。蓋飲食者,人子之所以孝養。 ○自「淳熬」至此,記八珍食、粥之間爾。○自「淳熬」至此,記八珍

女不出。《釋文》:「閹,音昏。」女子居内。深宫固門,閽、寺守之,男不入,禮始於謹夫婦,爲宫室,辨外内。男子居外,

《檀弓》「閻者止之」,是也。 《檀弓》「閻者止之」,是也。 写宗则对外有君臣然後有父子,有父子然後有君臣, 之勢遠,門固則出入之限嚴。《周禮·閻之勢遠,門固則出入之限嚴。《周禮·閻之禁。」《寺人》:「掌内人人》:「掌守中門之禁。」《寺人》:「掌内人人》:「掌守中門之禁。」《青人》:「掌内門之禁。」《青人》:「掌守中門之禁。」《青人》:「掌内,正寝在外也。為宮子,有父子然後有君臣,有夫婦然後有父子,有父子然後有君臣,

> 男女不同椸枷,不敢縣於夫之楎、椸,不敢藏 於夫之箧、笥,不敢共湢浴。《釋文》:「她,本又作 「椸」,以支反。 枷,音架。 縣,音玄。 楎,音輝。」 取乎遠嫌,然其謹之如此者,所以厚男女 愚 椸是同類之物。 横者曰椸,以竿爲之。」 楎。」郭景純云:『植曰楎,横曰椸。』是楎 日: 方曰箧,圓曰笥,皆所以藏衣也。 鄭氏曰:「竿謂之椸。楎,杙也。」 謂: 「《爾雅 直曰楎 ,横曰椸,皆所 釋宮》云:『在牆者謂之 以 架衣也 夫婦無 孔氏

長,賤事貴,咸如之。 夫不在,斂枕箧,簟、席襡器而藏之。 少事

之别也。

用,此謂夫不在,簟、席未即用故也。器盛而藏之。前謂每日常禮,簟席晚即須母舅姑,斂簟而褐之」,此簟、席並褐,又以重夫之所用,而不敢褻露也。前云「事父

間,謂同處居藏,無所間别,以其衰老無所 復 者在後。 姪、娣卑於兩媵,如望前,則 姪、娣,凡六人,故三日。 則妻雖五十猶與也。 嫌疑故也。 天子十五日乃一御。」 媵,則四日也,次夫人專夜,則五 勸息也。 鄭氏曰:「同藏無間,衰老無嫌。 九女,姪、娣兩 出御矣。 望後乃反之。」 五十始衰,不能孕也,妾閉房,不 妾未滿一 五日一御,諸侯制也。 兩 而御,則三日 五十,必與五日之御, 夫人、左、右媵各有 孔氏曰: 如 鄭 卑者在前,尊 此言,夫人 也; 同 御、侍夜 諸侯取 日 次兩 .藏無 也。

將御者、齊、漱、澣、慎衣服、櫛、縰、笄、總角、

○鄭云:「「角」,衍字。拂髦,或爲「繆髦」。」愚謂「角、拂拂髦,衿纓,綦屨。《釋文》:「齊,争皆反,下皆同。」

髦」皆衍字。

耳。 字。 脱之節也 没去右。婦人外成,若有髦,則無以爲除 朝於君,故其致敬如此。 衣服,以謹其禮衣。 齊,以齊其心志。 蓋髦者,子事父母之飾,父没去左,母 男女未冠笄者言「拂髦」,主男子言之 前婦事舅姑,不云「拂髦」,則婦人無 漱、澣,以潔其 妾之御於夫,猶臣 角,拂髦,皆衍 、裏服 芝 慎

豆反。」雖婢妾,衣服飲食必後長者。《釋文》:「後,胡雖婢妾,衣服飲食必後長者。《釋文》:「後,胡

鄭氏曰:「人貴賤不可以無禮。

妻不在,妾御莫敢當夕。

鄭氏曰:「辟女君之御日也。」 孔氏曰:

此謂卿大夫以下。大夫一妻二妾,則三

至于子生,夫復使人日再問之。 之,作而自問之。妻不敢見,使姆衣服而對。 妻將生子,及月辰,居側室。 人側室之門。《釋文》:「見,賢徧反,下同。姆,音茂, 長,賤妨貴,以妾爲妻之禍絶矣。」 氏 日 禮始於謹夫婦」至此,明夫婦居室之禮。 /愈曰:「一夕之微,而謹之如此,則少 御 妻一妾,則二日 夫使人日再問 御 夫齊,則不 徧。」 ○自 陵 高

自問之,謂感動之日,夫自問之也。妻不作,有感動。不入側室之門,若初時使人定子不於夫正室及妻之燕寢,必於側室室又次燕寢,在燕寢之室在前,燕寢在後,側室,一人也。夫正寢之室在前,燕寢在後,侧室,一人也。夫正寢之室在前,燕寢在後,侧室。 八氏曰:「側室,謂夾之室,次燕寢也。

之門。 之門者,謂作之日適值夫齊,則夫不自問 夫又日使人再問之也。夫齊則不入側室 人日再問之者,言自作之後,以至于子生, 復嫁,能以婦道教人者。」至于子生,夫使 敢 而使人問之也。齊必處正寢,故不入側室 士昏禮》注云:「婦人年五十無子,出不 見, 所 以 遠私 媚之嫌 也。 姆, 女師

三日始負子,男射女否。子生,男子設弧於門左,女子設帨於門右。

其禮也。 其禮也。 其禮也。 其謂:男射女否者,女子卑,略 可男射,始有事也。負者,謂抱之而使鄉 示有事於武也。帨者,事人之佩巾也。三 鄭氏曰:「設弧、設帨,表男女也。弧者,

日,卜士負之,吉者宿齊,朝服寢門外,詩負國君世子生,告于君,接以大牢,宰掌具。三

度,下「接子」同。射天地,食亦反。食,音嗣。」○今按: 反,下「接子」同。射天地,食亦反。食,音嗣。」○今按: 大夫之妾,使食子。《釋文》:「接,依注音捷,字妾 乃負之。宰醴負子,賜之東帛。卜士之妻, 之。射人以桑弧、蓬矢六射天地四方,保受,

之牢具也。 接,接子也。就子生之室陳設饌具,以禮 路寢之門外也。不入門者,以子尚未見 接待之也。 也。保,保母也。 本大古也。 接負之也。射人,司馬之屬。桑弧、蓬矢, 夫爲獻主之義也。食子**,**使乳之也。 禮,以東帛酬之,使宰主其禮,猶君燕,膳 負之也。 曰:「士之妻,大夫之妾,隨課用一人。」 詩之言承也。詩負之,謂以手承下而 醴,以 天地四方者,男子之所有事 宿齊,前一夕齊也。 宰,膳宰也。 醴禮之也。禮以一獻之 受乃負之,受之於士而 掌具,掌爲接子 寢門外, 皇氏

皆降一等。

豕,大夫少牢,國君世子大牢。其非冢子,則凡接子擇日,冢子則大牢,庶人特豚,士特

也。降一等,天子、諸侯少牢,大夫特豕,謂長子也。非冢子,謂冢子之弟及妾子言長子,通於下也。『庶人特豚』以下,皆焉。冢子大牢,謂天子世子也。冢子,猶鄭氏曰:「雖三日之内,尊卑必皆選其吉

他人無事不往。 世人無事不往。 一位人無事不往。 一位人無事不往。

妾也。 君之禮· 鄭氏曰:「此人君養子之禮也。 異爲孺子 室於宫中,特埽一處以處之也。 往,爲兒精氣微弱,將驚 居處者。 善道者。 庶母慈己者。」然則大夫之子,但以庶母爲 近於禮,故可以爲子師。 寬裕、慈惠、温良則近於仁,恭敬、寡言則 也。 可者,傅、御之屬也。 慈母,知其嗜欲者。保母,安其 士妻食乳之而已。 《喪服》「小功」章、「君子子爲 動也。」 養子備三母,人 子師 他人無事不 諸母,衆 ,教示以 愚謂

文》:「看,丁果反,徐大果反。」 三月之末,擇日翦髮爲看,男角女羈,否則男 左女右。是日也,妻以子見於父,貴人則爲 在服,由命士以下皆漱、澣,男女夙興,沐浴 衣服,由命士以下皆漱、澣,男女夙興,沐浴 衣服,由命士以下皆漱、澣,男女夙興,沐浴 本服,由命士以下皆漱、澣,男女夙興,沐浴 本服,由命士以下皆漱、澣,男女夙興,沐浴

也。 也。 此謂大夫以下之禮也。鬌,所留不翦之髮 出 諸侯少牢,大夫特豕,士特豚。 適子見在 具,夫婦人食之饌具也。 下,雖不爲衣服,亦漱、澣以致其潔也。 男 階而出於東房也。 正寢,夫入門者,入正寢之門也。 女,謂下文「諸婦」「諸母」「諸男」之屬也 自房者,妻由側室至夫之正寢,升自北 爲衣服,夫妻皆别製新服也。 夾囟曰 角,午達日 妻不使人抱子,子不升 二羈。 朔食,天子大牢, 貴人,卿大夫 妻 命士以 抱

楣。 自 在阼亦當楣,不言者,可知也。 於内寢,見庶子於内寢,豈見適子反 「大夫以下見適子於側室」,非也。 西 階,皆避人君之禮也。 妻當楣立,在西階之上而當楣 次棟之梁謂之 ○鄭氏 側室卑 也。 在 謂 側 夫

室乎?

之。 告諸男名,書曰「某年某月某日某生」而 告諸婦、諸母名,妻遂適寢。夫告宰名,宰辯 姆先相曰:「母某敢用時日祗見孺子。」夫對 尚反。」○鄭注:「祗,或作「振」。」 反。孩,字又作『咳』,户才反。 藏諸州府。 府,其一獻諸州史。 妻對曰:「記有成。」遂左還授師子,句。 "「欽有帥。」父執子之右手,咳而 宰告間史,間史書爲二:其一 夫人食,如養禮。 州史獻諸州伯,州伯 還,音旋。 《釋文》:「相,息 辯,音遍。 藏 名之。 諸 師辯 養,羊 閶 藏 命 亮

姆先,謂在妻側而稍前也。相,助之傳辭

以 尊,不褻言也。宰,家臣之長也。諸男,謂 也。 也。 藏於家也。 時皆在,故遂以名告之。 子若昆弟之子也。 諸婦,大功以上卑者之妻。諸母,衆妾也。 代其子答父也。 循 千五百家爲州,州長治之。 州伯,即州長 母房中南面,諸男阼階下東面與。其大功 適寢,適夫之燕寢也。不言「人御」者,妻 名之,以手承子之咳而名之也。妻對者 子右手,示將授以事也。 而有所成就也。授師子,謂授師以子也。 也。 上尊屬,當使人就其寢告之也。 吏也。 閶 某,妻之氏 欽有帥,謂其子當敬循善道 府 州府,間 二十五家爲間,間胥治之。二 夫入食,自正寢 也。 記有成者,言當記識父言 諸婦、諸母、諸男見子 胥、州長之府。 祗、欽,皆敬 其位、蓋諸婦、諸 咳,頷也。 入燕寝, 也 也。 藏之, 藏史, 帥, 與 執

非 禮 則上文已言「具視朔食」,不應再出也。 耳,二禮不可相方。 妻 同 也。 也 、乾行曰:「命名即 舅姑之饋,婦饋之也。 鄭氏 也 謂 如 養禮 「養禮」 爲婦始饋舅姑之禮」, 如平 若謂指 告州、間,使藏 時 夫 其饌具 此夫婦自食 婦 供 養之常 줆 諸

黄氏 受征役,以稽德行,以應賓興,皆始於是。 府,將俟其長而 世之獘哉?」 安有時過後學,老壯不均,冒年冒籍,如後 就間塾也。 以承教訓 "; 以

阼階, 世子生,則君沐浴朝服,夫人亦如之,皆立于 降。 西鄉。 世 婦抱子升自 西階,君名之

乃

孔氏 路寢也。 鄭氏 見王及賓客。 日 「案《内司服》注云:『展衣,以 「子升自西階,則人君見世子於 諸侯夫人朝於君,次而緣 **禒衣,御于王之服。」諸侯夫** 衣。」 禮

誤也。 宜也。 展衣。 綃衣。」男子玄端之上爲朝服,婦人笄纚 以禮見王服展衣,則夫人以禮見君服 於正寢,但大夫、士避世子之禮,故子不 於見世子之禮略而不言,其實世子亦執 手,咳而名之」,及戒告之辭,其文既具,故 進入君寢,侍御於君,故服進御之服,不服 衣。此云『次而緣衣』者,此見子訖,則當 主婦被 衣之上爲褖衣,故《少牢禮》:「主人朝服 同,則后與夫人以禮見王之服亦當異。 自西階而出自房耳。天子、諸侯朝服 咳而名之及戒告也。」 寢,與君同著朝服,則是以禮見君,合服 人 以 下, 前文卿大夫見適子,既有『父執子 《特牲禮》:「主人玄端,主婦 此見子,君服朝服,則鄭謂「夫人次 ·錫衣侈袂。」被即次,錫衣即緣衣之 所 得 之 服 各 如 王 愚謂:見適子皆 后 今 既 笄纚 褖 在 后 綃 升 衣 不 展 路

丽 **褖衣」者,不可易** 也。 后御於王祿衣 , 則

夫人御於君亦笄纚綃衣耳。

帥 適子庶子見於外寢,撫其首,咳而名之。 初,無辭。《釋文》:「適,丁歷反。」 禮

也。 見適子之庶亦於正寢者,敬適妻也。 適子庶子,謂適子之母弟也。 之所同與。 其右手,又無辭者,降庶子也。此禮尊卑 生,既非長適,則亦爲庶子矣。外寢,正寢 辭,謂「欽有帥」、「記有成」之辭 蓋雖適 不執 妻所 也。

凡名子,不以 夫、士之子,不敢與世子同名。 日月,不以國,不以隱 疾。 大

説並見《曲禮》。

文》:「三月之末,一本作『子生三月之末』。_ 妾將生子,及月辰,夫使人日一問之。 子生 三月之末,漱、澣,夙齊,見於内寢,禮之如始 入室。君已食,徹焉,使之特餕,遂入御。

> 公庶子生,就側室。 三月之末,其母沐 也。 也。 餘,無特餕之法。豈妾之待年而 畢,衆妾並餕,今使生子之妾特餕,如始 於内寢,尊卑之差也。 穿」,是也。 別就室也。故《左傳》「趙氏有側室子曰 大夫、士之妾居側室,即其所居而生子,不 此謂大夫、士之妾也。不云「就側 或非媵而買諸他姓者,其始至特餕與? 嫁之禮也。《士昏禮》媵餕 有辭,適子庶子見於正寢而無辭,庶子見 内寢,夫之燕寢也。 君,謂夫也。特,獨也。 夫使人日一問之,降於正 其子見。 始入室,始 適子見於正 君所有賜, 夫餘,御 常時夫 後至者 來 室」者, 君名 浴朝 餕 婦 嫁 寢 食 時 而 妻

> > 829

服見於君,擯者以 之,衆子則使有司名之。

世婦視大夫,諸妻視士,其朝服亦緣衣也。 公庶子生,就側室,人君宫室多也。 君之

八一

有司,臣有事者也。」尊,雖妾不抱子。有賜於君,有恩惠也。也。 鄭氏曰:「擯者,傅姆之屬也。人君見於君,不言其所者,蒙上節「内寢」之文

音嗣。」

之也,與子見父之禮無以異也。 庶人無側室者,及月辰,夫出居群室。其問

大夫、士同也。
謂夾室之屬也。其問妻與見子之禮,則與妻及月辰,則夫出居群室以避之。群室,無人或無側室,其燕寢夫婦共之而已,故

無辭。凡父在,孫見於祖,祖亦名之,禮如子見父,

雖卒,而庶孫猶無辭也。」 愚謂:孫見於父卒而有適孫,則有辭,與見冢子同。父則無辭,有適子者無適孫,與見庶子同也。鄭氏曰:「見子於祖,家統於尊也。父在鄭氏曰:「見子於祖,家統於尊也。父在

祖

,亦就祖之正寢見之。

有食母,士之妻自養其子。《釋文》:「食,並食子者三年而出,見於公宮則劬。大夫之子

如字,今從之。 循其首。《釋文》:「旬,音均,出注。」〇按:旬,朱子讀而見,必執其右手。 適子庶子已食而見,必由命士以上及大夫之子,旬而見。 冢子未食

也。」 愚謂:適子,冢子之母弟也。庶記大夫禮,而又别其冢、適、庶子之異同不待三月也。『冢子未食』以下,承上文不持三月也。『家子未食』以下,承上文本

卑生子之禮。○自「妻將生子」至此、言尊一無異禮矣。○自「妻將生子」至此、言尊一子已食而見、蓋列國禮俗不同、記者並記子已食而見、遊列國禮俗不同、記者並記一時未食而見、此則冢子未食而見、適子庶子,妾之子也。循猶撫也。上文「三月而子、妾之子也。循猶撫也。上文「三月而

步于反。一鞶革,女鞶絲。《釋文》:「食食,上如字,下音嗣。鞶,子能食食,教以右手。 能言,男唯女俞。男

帶,厲是大帶之垂者,《詩毛傳》亦云『厲,鞶囊裂帛爲飾。若服虔、杜預則以鞶爲大桓二年傳作「鞶厲」,鄭此注作「鞶裂」,謂雖今異,意實同也。」 孔氏曰:「《春秋》雖今異,意實同也。」 孔氏曰:「《春秋》雖今異,意實同也。」 孔氏曰:「《春秋》鄭氏曰:「俞,然也。鞶,小囊,盛帨巾者。鄭氏曰:「俞,然也。鞶,小囊,盛帨巾者。

也。 絲者,革勁而絲柔也。 此男子鞶革,蓋孩提時所用爾。 男革而 藻》云:「童子錦紳。」又云:「弟子縞帶。」 游纓」,乃馬之鞶纓,此鞶爲大帶也。 鞶」,揚子《法言》「繡其鞶帨」,此鞶爲小 言「施縏袠」、《士昏禮》「庶母至門内 其帶革、帶絲耳。」今按鞶一名而二物:前 記》『男鞶革,女鞶絲』,鞶是帶之别稱,言 辭。但唯之聲直,俞之聲婉,故以爲男女 革」,帶也。」 者大帶、革帶並謂之鞶、《内則》所謂『男鞶 帶之垂者」,與鄭異。」 之别。孔氏引服、杜、毛傳之説,蓋以鄭氏 欽哉」,又曰「俞,往哉汝諧」,是唯、俞皆應 先生召無諾,唯而起」、《虞書》「帝曰俞,往 「鞶裂」之説爲非。《左傳》疏亦云:「《禮 此言「鞶革」「鞶絲」、《左傳》言「鞶厲 愚謂:《曲禮》「父召無諾, ○自此以下,皆言 陳氏祥道曰:「古 《 玉 女 施

教子之法。

六年,教之數與方名。

百、千、萬也。方名,四方之名。六年,稍有知識,始可教也。數,一、十、

七年,男女不同席,不共食。

始示之别也。

之讓。《釋文》:「後,胡豆反。」八年,出入門户及即席飲食,必後長者,始教

文》:「襦,字又作『襖』,音儒。袴,苦故反。

肆,本又

作

·肆」,同以二反。」

九年,教之數日。《釋文》:「數,所主反。

儀,幼少所行之儀法,其事甚多,不第出人

教長幼之禮,帥

而

行之,而不敢忘也

」。 幼 襦袴。禮帥初,朝夕學幼儀,請肆簡諒。《釋曰:「二者切於日用,且五行陰陽之理,具於干支中矣。此九年以内,宮中女師之於干支中矣。此九年以内,宮中女師之。」「二者切於日用,且五行陰陽之理,具

以帛爲之,防奢侈也。禮帥初者,謂初所為。書計,即六藝中六書、九數之學也。」 居宿,日居夜宿也。十歲則男女已大,爲 是。書計,即六藝中六書、九數之學也。」 為明 女不出,男不入,蓋内外之防始嚴 人,為 高氏愈曰:「外傅,教學之師也。不用帛爲

詳也。 非也。 所請肄習者貴乎簡要而誠實也。 飲 服始用素帛爲裳,則童子之上服不用帛可 前,男女之教同。十年以後,男女之教異。 男拜,尚左手」,專言教男子之法。 九年以 知。《玉藻》「童子緇布衣,錦緣」,是童子 流於泛濫,諒則不至於虚浮。 用帛宜矣。 非禮也。童子上服用布,襦袴在内,其不 之上服以緇布爲深衣之制也。以帛裹布, ○輔氏謂「衣不帛襦袴,則上服猶用帛」, 食必後長者而已,朝夕學之,而益 成人之服,深衣玄端,皆布爲之,朝 肄,習也。 諒,信也。 請肆簡諒,謂 自此至「凡 簡則 求 其 不

《象》,學射御。 十有三年,學樂,誦詩,舞《勺》。 成童舞

也。成童,十五以上。」 熊氏安生曰:鄭氏曰:「先學《勺》,後學《象》,文武之次

《南籥》,文王之文舞,《象箾》,文王之武 舞,皆小舞也。射御,五射、五御之法也 樂也。詩,樂章也。 小學,十五人大學。」《曲禮》:「人生十年 小學,十八人大學。」《白虎通》:「八歲入 就外舍,束髮而就大學。」《尚書周傳》: 矣。○《大戴禮》云:「古者王子年八歲而 所以培養其德性,成就其才具者,固已深 爲之本,而餘力學文,蓋雖未及乎大學,而 蓋至此而六藝之事略備矣。 也。《勺》,即所謂《南籥》也。 其詳固不可盡考,然《周禮 「王子,公、卿、元士之適子,十五入小學, 「《勺》,《籥》也。」 「禴」亦作「礿」,是「勺」「籥」字通明矣。 一十人大學。」《書傳略説》:「餘子十三人 幼,學。」《内則》:「十年出就外傅。」今 愚謂: 學樂、誦詩,弦誦 學樂,學琴瑟之 以孝弟忠信 樂 「禴祠」之 (師》[: 教國 相

八一六

子小 其人大學固不可限以定期,大約自十三以 其小學有三,則其遞升於大學也遲。 學惟一,則其升於大學也速,庶民之子, 小學,以鄉之庠爲大學。公卿之子,其小 大學, 庶民之子以家之塾, 州、黨之序爲 矣。蓋古者公卿與庶民之子,其學不同 佩弦。出人間里,則視聽游習與政事之 耳,舞干羽以養其氣,其心急則佩韋,緩則 子曰:「古人爲學也易。八歲入小學,十 上,二十以下,皆入大學之歲也與。〇程 人之材質有敏鈍,學業之成就有蚤暮,則 公卿之子以師氏所教者爲小學,以成均爲 序,故未嘗有不入學者。八歲入小學,十 人。」又曰:「古者家 施,莫不由此 三人大學,舞《象》舞《勺》,有弦歌以養其 舞」,則國子之人大學,固 如此 7,則非 有塾,黨有庠,遂有 僻之心無 不待既 而又 自 冠 而

> 則欲立 古者教胄子必以樂,欲其體和也。 欲柔其體也。 惡?」 張子曰:「古者教童子先以舞者・ 理,興起於《詩》,其心固已善矣。後世 十三,又使之舞《象》。 篇》之類,人人諷誦,莫非止於禮義之言。 之序。至於間、里、鄉、黨之間,如《三百五 古所習,安得不厚? 白首,未嘗知有《詩》。 三老坐於里門,出入察其長幼、進退、揖讓 五 擇 其 ,體則欲和。」 秀者人大學,不可 心下則氣和,氣和 以今所習,安得不 然則雖未能深知義 此古今異習也。 教者 歸之於農。 則 學者志 體 柔 以 雖

内,音納 古亂反。衣,於既反。行,如字,又下孟反。弟,音悌。」○ 惇行孝弟,博學不教,内而不出。《釋文》:「冠 二十而冠,始學禮 ,可以衣裘帛,舞《大夏》,

冠,加冠也。禮,吉、凶、軍、賓、嘉之禮也。

《大磬》、《大夏》、《大濩》、《大武》。」此言 《大夏》,禹樂,文舞之大也。 聞以 已知孝弟,至此 但學小舞,至此則學《大夏》之大舞。 此不帛襦袴,至此則有裘帛之盛服。 前此但學幼儀,至此則學鄉國之通禮 蓋 多識前言往行以畜德,而才未可以經世。 之教,自二十而始也。 人子、爲人弟之全行。蓋成人之禮與大學 舞《大夏》」,則六舞皆學可知。 以樂舞教國子,舞《雲門大卷》、《大咸》、 《釋文》:「孫,音遜。」 面 |初進乎大學之事,而其德猶未幾乎成也。 窮理,而善未可以及人。内而不出者, 有 室,始理男事,博學無方,孫 則益惇而行之,而貴 博學不教者,廣見博 《大司樂》: 惇,篤也。 前此 友視 以爲 前 前 此

也。方猶常也。無方,言學無常,在志所鄭氏曰:「室猶妻也。男事,受田給政役

愚謂: 好 善而已,孫友視志,則善足以 也。 輔 氏 博學無方 孫, 廣 日: 順 也。 博學不教,内 7、敬業 順於 吅 (衣,視: 所 以 及 其 而 窮理 《人矣。」 所 不 者詳 出。 志 也 獨

則去。四十始仕,方物出謀發慮,道合則服從,不可四十始仕,方物出謀發慮,道合則服從,不可

孫友視志

,樂群而所以觀人者審

物。 容也。 慮 以行之,始可 出謀,則謀不過物。 朱子曰:「方猶比也。 學,又無利可趨 人學,至四十始仕,中間二十五年 道 從,謂服其 合則服從,不合則去,不可 ,則於所治之職,謀慮者無不當矣。 愚謂: 〇程子曰:「古之爲士者,自 事 ,仕也。 而從君也。 四 ,則其志可知。 十則道明 方物發慮,則慮 比 比方以窮理。 方 君臣以義合,故 (徳立) 事 物 以阿 , 學 此所 而出發 有 徇 方物 事 而 而 不 成 五 服 謀 取 過 將

誘,何由向善。」成。後世立法,自童稚即有汲汲利禄之德。故古之人必四十乃仕,然後志定業

无十命爲大夫,服官政。七十致事。 五十命爲大夫,服官政。七十致事也。四十始仕,不躁進也。七十致 一次不事也。四十始仕,不躁進也。七十致 一次,明知也。五十爲大夫以長人,聞邦國 一、不負所學也。」

反。 文》:「婉,紆晚反,徐紆願反。 於祭祀,納酒漿、籩豆、菹醢,禮相 治絲繭,織紝、組、紃,學女事以共衣服。 女子十年不出,姆教婉、娩、聽從。 鄭氏 紅,女金反,又如林反。 相,息亮反。」 曰:「左,陽也。」 組,音祖。 娩,音晚,徐音萬。 紃,音巡。共,音 助 執麻 奠。 枲,思里 枲 《釋 觀

凡男拜,尚左手。

織紅組 紃。 尸也。 謂: 也。 奠置 學之以供衣服也。納,謂納於廟室以進於 紅組 娩爲容貌,鄭意以此上下備四德:以婉爲 令,婦容婉娩,婦功絲枲。』此分婉爲言語 曰: 也。 鄭 下爲婦功。 紝爲繒帛,故杜注《左傳》云: 婦言,娩爲婦容,聽從焉婦順,『執麻枲』以 『紝,謂繒也。』組 婉、娩、聽從」以下,皆姆教之。 氏 是綬也。」然則 「案《九嬪》注云:『婦德貞順,婦言辭 執麻枲,績 祭 日 祭祀之禮,當及女時 娩之言媚也。 朱子曰:「納,謂奉而人之。」 紃,織事也。 禮相助 饌 「不出,恒居内也。 也。 奠,謂以 此 事也。 紃 又學 瀬陽 媚,謂容貌 此三者皆女工之事 俱爲絛。 禮 祭祀 治 爲 相長者,而 絲 而 組, 之禮 繭,蠶 知。 婉, 也。 似繩者爲 皇氏云: 此以下, 也。 謂 糾,絛 事 助 孔 言 也 愚 其 氏 自 語

專言教女子之法。

月,令會男女。於是時也,奔者不禁。」 以禮聘問,則得與夫敵體。妾之言齊也。 以禮聘問,則得與夫敵體。妾之言齊也。 以禮聘問,則得與夫敵體。妾之言接也。 以禮聘問,則得與夫敵體。妾之言接也。 以禮聘問,則得與夫敵體。妾之言接也。 以禮聘問,則得與夫敵體。妾之言務也。 以禮聘問,則得與夫敵體。妾之言務也。 以禮聘問,則得與夫敵體。妾之言務也。

.

禮記卷二十八終

鄭氏曰:「右,陰也。」

凡女拜,尚右手。

八一九

禮記卷二十九

國史館纂脩孫希旦集解賜進士及第翰林院編脩

玉藻第十三之一《别録》屬《通論》

爲最詳,然其中多逸文錯簡云。 此篇首記天子、諸侯衣服、飲食、居處之此篇首記天子、諸侯衣服、飲食、居處之此篇首記天子、諸侯衣服、飲食、居處之此篇首記天子、諸侯衣服、飲食、居處之此為一時首記天子、諸侯衣服、飲食、居處之

《釋文》:「藻,本又作「璪」、音早。旒,力求反。邃,雖醉天子玉藻,十有二旒,前後邃延,龍卷以祭。

衮,古本反。」反。延,如字,徐餘戰反,《字林》作「綖」,弋善反。卷,音

旒。 纁裏。 旒十有二就,每一就貫以玉,就間相去一 謂雜采之絲繩,以貫於玉,以玉飾藻,故曰 旒,旒十有二。前後邃延者,言皆出 采者,先朱,後緑。 以下各依旒數,垂而長短爲差。旒垂五采 寸,則旒長尺二寸,故垂而齊肩。 『玉藻』也。 後而垂也。 鄭氏曰:「雜采曰藻。天子以五 而復始,其三采者,先朱,次白,次蒼。 白,次蒼,次黄,次玄。 玉,依飾射侯之次,從上而下,初以朱,次 下各有差降,則九玉者九寸,七玉者七寸, 龍卷,言畫此龍形卷曲於衣。天子之 龍卷,畫龍於衣。」 天子齊肩,延冕上覆也,玄表 十有二旒者,前後各十有二 又《王制》疏曰:『凡冕 五采玉既貫徧,周 孔氏曰: 采 諸侯以 冕前 藻 爲

數也。 冕。 六寸 玄布衣之於上,謂之延。』以朱爲裏,但不 之制,皆玄上纁下,以木版爲中,以三十升 絲故也。 知用布繒耳。 冕 專記卿大夫? 官儀》廣七寸,長八寸,皇氏以爲卿大夫 長尺二寸。』皇氏謂此爲諸侯冕。應劭《漢 所服也。凡冕之旒敷,與衣之章數相配, 服》王冕有六,而大裘之冕爲最尊,祭天之 今依《漢禮器制度》爲定。」 愚謂: 旒,毳冕五章則五旒,絺冕三章則三旒,玄 大裘襲十二章之衣,其冕亦十二旒,則天 絺冕同,此《弁師》所以止言「五冕」也。 一章宜一旒,而一旒不 也。 若如皇氏言,豈董巴專記諸侯,應劭 衮冕九章則 按《漢禮器制度》,廣八寸,長尺 又董巴《輿服志》云:『廣七寸, 當以繒爲之,以其前後旒用 蓋冕隨代變異,大小不同, 九旒, 驚冕七章則七 可以爲飾,進而 《司

E 之五冕皆玄冕、朱裹、延、紐、五采繅十有 就,則與十二旒之冕同。 降,而每旒皆五采玉十二,皆五采藻十二 同。王之冕自衮服以下,其旒數雖有差 黄,又次以玄也。五色玉之次,亦當 以五行相克爲次,冕藻亦然。 五采則次以 禮》記:「繅六等,朱、白、蒼。」 圭藻之色, 十二,故曰「天子玉藻,十有二旒」。 玉,謂之藻。 王祭天之冕,其旒前後各十有二,每旒之 皆九就 等諸侯之冕,旒數雖異,而其玉皆三采,繅 下,其冕之旒數皆視服章爲差降,然《弁 就 師》「諸侯之繅斿皆九就,瑉玉三采」,則五 二就,皆五采玉十有二。」是也。 自公以 以五 7,大夫 一 一采玉 也。 采而五就,就間皆相去一寸也 以此差之,則 爲飾,又以 其玉之數與藻之就數,亦皆 五采絲 《弁師 孤 卿二采而七 爲繩 》云:「王 |與藻 《聘 以繫

孔 也。 采者當以朱,孔氏據《周禮・典瑞》注,謂 服 皆長出於冕而深邃,邃指延言,不指旒言 布爲之。 冕用三十升布,則延之表裏亦皆以三十升 三寸,似太短矣。 一采用朱、緑,亦非是。 延者,冕之上覆。 疏謂旒之長短依旒數爲差,則三旒者 龍卷之衣而祭天也。 龍卷以祭,謂首服十二旒之冕,又身 前後邃延者,延在冕上,其前 又二采者當以朱、白, 後 止

「玄端」當如字。 獵反。左扉,音非,一本作「則闔門左扉」。」○按篇内「朝」 冕,出注,下「諸侯玄端」同。朝,直遥反,篇内皆同。闔,胡 閏月則闔門左扉,立于其中。《釋文》:「端,音 玄端而朝日於東門之外,聽朔於南門之外,

門、南門,皆謂國門也。明堂在國之陽,每玄衣而冕也。朝日,春分之禮也。● 東鄭氏曰:「端當作『冕」,字之誤也。玄冕,

月就 孔氏曰:「凡衣服,皮弁尊,次以諸侯之朝 當作『冕』,謂玄冕也。」 與諸侯不類。且聽朔大,視朝小,故知端 服視朝」,今天子皮弁視朝,若玄端聽朔 服,次以玄端。下文『諸侯皮弁聽朔』,『朝 其朔於明堂門中,還處路寢門,終月。」 牲》「玄冕齋戒」,疏謂「五冕通玄」,是也。 言者、《弁師》「王之五冕皆玄冕」、《郊特 夫之服,自玄冕而下」,是也。 言者、《司服》「祭群小祀則玄冕」,又「卿大 朝日、聽朔,其服不同,記不具言,故但以 五冕之服皆玄也。 毳冕,祭社稷、五祀則絺冕。] 日者,天神之 玄冕該之。 。 其堂 而聽 《司服》:「王祀 朔 焉。 蓋玄冕有指一章之冕 閨 月, 愚謂: 非 四望、山 有通指五 常月也 玄冕者 Ш 聽 則

0

尊,在 門左扉,立於其中」,謂聽朔時也。每月聽 禮,於《燕》、《射》、《聘》、《食》見諸侯之禮 其中以聽朔也。還則居路寢門終月,《大 子聽朔不當以一章之玄冕矣。 采又爲何服乎? 爲冕服之下,若朝日用一章之玄冕,則少 異,特其 餘則見大夫、士之禮,宮室名制,不見其有 室無所當,故闔明堂應門之左扉,而立於 朔於明堂之十二室,閏月非常月,於十二 日,少采夕月」,孔晁以大采爲衮冕,是也。 曰:「《禮經》雖亡闕,然於《觀》見天子之 史》「閏月,韶王居門終月」,是也。○朱子 少采降於大采,蓋鷩冕與。 設斧扆牖間? 顧命》,成王崩於路寢,其陳位 四望、山 廣狹隆殺 南嚮」,則户牖間也。 川之上。《國語》「大采朝 諸侯聽朔以皮弁,則天 有所不 一章之玄冕, 可 「閏月則闔 考 耳。 『西序 也,曰 按

自此 《士喪禮》『殯宫曰廟』合也。 也。 可考,而《觀禮》在廟亦言「几俟于東箱」, 典,亦未敢必信也。」 堂位》與《考工記》明堂之制度,非出於舊 子廟及路寢如明堂制」者,蓋未必然。《明 也。『東堂』『西堂』,則東西廂也。 門之内」,則路寢門也。 塾之前,右塾之前」,則門内之塾也。 嚮」,則夾室也。 重屋爲路寢,而大廟、路寢、明堂同制之説 三代明堂之異名,鄭氏誤以世室爲大廟 「夏后氏世室,殷人重屋,周人明堂」,此蓋 則北階也。又曰『諸侯出 『西垂」,則東西堂之宇階上也。 『側階』, 東嚮,東序西嚮」,則東西序也。『西 起矣。 『賓階面、阼階面」,則兩階前也。 天子路寢之制,見於《顧命》者 『東房』『西房』,則左 『兩階戺』,則堂廉 愚謂:《考工記 廟門俟』,則 則鄭氏謂『天 『東垂』 |夾南 二畢 右 _元 與 房

謂甚 位,有必不可與明堂同制者。 然後可以奉宗祏,適興居,以行朝祭、獻 經典而 者同制之説,而疏家墨守其義,至其證之 酬、揖讓之儀,以敘吉、凶、賓、主、内、外之 爲堂,後爲房室,東西爲兩序、兩夾、兩階 茅 難 與 明 而 不合,則爲之委曲以求其通,亦可 党司 實非者矣。 制 要之,大廟、路寢,必前 自鄭氏 爲三

酏。 日少 皮弁以 也。 居。」 鄭氏曰:「餕、食朝之餘也。 以敬養身體。 上水,水爲上,其餘次之。 王食必以樂侑,所以和其心志,而助氣體 牢,朔月大牢。 卒食,玄端而居。《釋文》:「酏,以支反。」 月朔禮, 日視朝,遂以食。 孔氏曰:「皮弁視朝,遂以朝食,所 大,故用大牢。」 餕尚奏樂,即朝食奏樂可知 五飲:上水,漿、酒、醴、 日中而餕,奏而 天子服玄端燕 奏,奏樂 方氏慤曰: 也。 食。

也。 專指朔食也。 有俎。」蓋每日之少牢,朔月之大牢,皆舉 之屬用白布,玄端及朝服已緇之矣。 之後也。居,燕居也。天子朝皮弁,夕 無「涼、醫」,記者所聞異也。 有「涼、醫」而 水爲上,貴其自然之性也。《周禮》「六飲」 食之間,特餕朝食之餘而已。 此每日之正食也。 也。《膳夫》:「王日一舉,鼎十有二物,皆 牢,重朔以敬始,而殺常日,以爲豐儉之節 尊於朝服,豈反用白布乎? 之差,繒尊於布,玄尊於白,惟深衣、麻衣 白鹿皮爲弁,而以素繒爲衣裳也。 之養也。」 ·皮弁服之衣用十升白布爲之」,非也。 鼎十有二物,以舉之尤盛者言之,則 愚 謂: |無「酒」,此「五飲」有「酒」而 日出 天子視朝 餕非 而朝食,逮日而 正食,在 日少牢,朔大 卒食,謂既餕 以 上水者,以 皮弁服 朝 舊説 夕食, 食、夕 皮弁 衣

上|下。《釋文》:「上,時掌反。」 動則左史書之,言則右史書之,御瞽幾聲之

之事。 《左傳》王命内史叔興父策命晉侯爲侯伯 傳》齊大史書「崔杼弒君」,是大史記動作 職》云「大師,抱天時,與大師同車」,又《左 史、右史之名。熊氏云:『按《周禮・大史 書》其存者。 瞽,樂人也。 鄭氏曰:「左史、右史所書,《春秋》、《尚 瞽』。幾,察也。瞽人審音,察樂聲上下哀 是皆言誥之事,是内史所掌在君之右 右史也。」御,侍也。 右陰,陰主静,故記言。《周禮》無 内史》掌諸侯、孤、卿、大夫之策命, 和 在君左廂,則大史爲左史也。 則樂聲樂,政酷則樂聲哀,察之以 孔氏曰:「左陽,陽主動,故記 瞽人侍側,故曰『御 幾猶察也。 《 周 「, 爲 左 察

> 樂,凡視朝燕居,無時 防君之失而格其非心也 防君之失。」 愚謂: 不在君之側,皆所以 史記言動, 瞽 察聲

年不順成,則天子素服,乘素車,食無樂。 素耳。 其臣下,則不恒素服,唯助君禱 樂》:「大札、大凶、大烖,令弛縣。」此皆自 服》:「大札、大荒、大裁、素服。」《大司 者。《周禮・巾車》「王之喪車五乘」,次爲 云:「素端者,爲札、荒有所禱請. 貶損,以責己而憂民也。 服,冠衣皆以素繒爲之也。 氣不順則水旱至,物不成 素車、棼蔽、犬複、素飾」、是也。 故《司服》云「士服玄端、素端」,注 則 素車,車不 孔氏曰:「若 饑饉 也。 請之時乃 生。 《 司 素 漆

大,音泰。」 廟,朝服以日視朝於内朝。 諸侯玄端以祭,裨冕以 朝,皮弁以 《釋文》:「裨,婢支反 聽朔於大

禮記卷二十九

八二六

鄭氏 爲『玄冕』。」 之誤也。」 孤、卿、大夫自祭之服,皆降於助祭,而諸 子男毳冕,記亦不具言,言「玄冕」以該之。 侯皆以上服祭其宗廟,公衮冕,侯伯鷩冕, 副褘受之」。此上公之禮也。 副褘立于東房。」《祭義》獻繭之禮,「夫人 玄」也。《祭統》曰:「君衮冕立于阼,夫人 文『皮弁聽朔』,不應玄端以祭,故知亦 也。 服冕者各以其上服之次爲裨冕,公服衮, 面之君,遠王而伸也。 侯乃以上服祭者,北面之臣,近君而屈,南 爲裨冕,子男服毳冕,自絺冕以下爲裨冕 自鷩以下爲裨冕,侯伯服鷩冕,自毳以下 故不敢服 裨冕以朝者,人天子之國,宜自降下, 「祭先君 上服而服其次。《覲禮》「侯氏裨 孔氏曰:「玄端賤於皮弁,下 愚謂; 玄冕,亦謂「五冕通 也。 端亦當爲『冕』,字 裨猶 副 然則五等諸 也,益也。 當

王與祖 《論語》云『告朔之餼羊』,是也。於時聽此 《士冠禮》:「主人玄冠朝服,緇帶素韠。」 受而藏之祖廟,每至月朔,以特羊告廟,受 者,天子頒來歲十二月之朔於諸侯,諸侯 冕,乘墨 也。 受之天與祖也。諸侯聽朔於大廟,明受之 朔」,是也。 告朔又謂之告月,文六年閏月 聽朔又謂之視朔,文十六年『公四不視 月朔之事,謂之聽朔,此《玉藻》文,是也。 服」者,皆此服也。 凡裳與韠同色,故知朝服素裳,凡言「朝 而聽之,謂之朝廟。天子聽朔於明堂,明 侯於大祖廟訖,然後祭於諸廟,謂之朝享, 不告月」,是也。 孔氏曰:「每月以朔告神,謂之告朔 皮弁聽朔,朝服視朝,皆降於天子也。 也。 車」,裨冕亦乘墨之義 朝服,玄端 行此禮,天子於明堂,諸 内朝,路寢門外之正朝 而 緇衣、素裳也。 也 聽 朔

是也。 也。 注。 堂,無祭於祖廟之禮。 旗、王命有之,何獨抑其服乎?」《大戴禮 統》曰『君衮冕立于阼,夫人副褘立于東 朝正于廟」,是也。 祭於己,非其差也。 房』,是也。 陰爵不敢申也。君與夫人皆申其服,《祭 命婦祭於君,皆盡其服,自祭於家降 文,不應其餘諸侯獨異。三則卿大夫自祭 屈者不同。二則衮冕、副禕,《祭統》有 雖不申 皆月祭之』,是也。」〇盧氏辨曰:「臣及 又謂之朝廟,文六年云『猶朝于廟』, `尊彝》云『朝享』,是也。 愚謂:鄭氏之説,可 又謂之『朝正』,襄二十九年『釋不 上服,然大夫朝服,士玄端,而 則南面之君,與北面之臣近 鄭氏頓貶公侯,使一同玄冕以 《司尊彝》言「朝享」,謂大袷之祭 又謂之月祭、《祭法》云 且諸侯專國,禮樂車 以 按天子告朔於明 決其必 等, 君 不 《雜 明 而 然

稱『内朝』,則知中門之外別更有朝,是諸 朝」,對路寢庭爲外也。 朝」,對中門外朝爲内,《文王世子》云『外 朝」,皆謂路寢門外朝,是二也。此云『内 是三也。諸侯三朝者,《文王世子》云『公 法」,注云『外朝在庫門之外,臯門之内』, 侯皆三朝:《大僕》云『掌燕朝之服位』,注 祭,是反貶於其臣。 此。 侯中門外、大門内又有外朝,是三朝也 云『其在外朝,司士爲之』,與此『視朝於内 族朝於内朝」,路寢朝,是一也。《世子》又 於路門外」,是二也。《朝士》云『掌外朝之 士》云『正朝儀之位』,注云『此王日視朝 云『燕朝,朝於路寢之庭』,是一也。《司 非一章之玄冕也。 記》所言,則 若五等諸侯不辨命數,並 又 有 服 〇孔氏曰:「天子、諸 以是知玄冕以祭,必 爵弁者,其爲 此據路寢門外而 服 玄冕自 差 等 如

八二八

階下」。 也。 諸 迎賓于大門内,賓入門。」又《聘禮》「歸饔 則在大門之外。《聘禮》:「賓至于朝,公 僕、大右、大僕從者在路門之左。」若外朝, 子、諸侯皆有三朝: 皐門,若魯則 子外朝所在,雖無明文可見,然《周禮 其忠心。」是諸侯外朝在大門外明矣。 朝」,無「入門」之文,故知在大門外。」又 之惠於大門外。」賈疏云:「直言『賓拜 餼,明日,賓拜于朝」,鄭注云:「拜謝主君 儀之位,王族故士、虎士在路門之右,大 云:「門外,大門外也。 、聘禮》賓死,「介復命,柩 爲外朝。 侯 燕朝在路寢庭,故《燕禮》「公立于阼 門 治朝在路門外,故《司士》:「正朝 此言「視朝於内朝」,即治朝 尋 庫、雉、路 常 諸 侯,中 一爲燕朝,一爲治朝 必以柩造朝者,達 也。」 菛 止 爲 于門外」,鄭 應門,外 愚謂:天 朝 天 於 有

> 多而 諸侯有庫門、雉門,無應門、皐門。説 外朝在中門外、大門内」,鄭氏《朝士》注 官之屬,以致其嚴肅之意。 之位也。 位在門外,無可取節,故樹槐、棘以 焉,州長、衆庶在其後。」若朝位在門内,則 子、男位焉,群吏在其後。 當取節於門,今乃以槐、棘表位,亦必 夫位焉,群士在其後。 明堂位》。 外朝在庫門外、皐門内」,皆恐非是。 龐雜,故在大門之外,而且掌之以 「掌建外 蓋外朝乃大詢衆庶之所,其人衆 朝 之法: 右九棘、公、侯、伯 左 九 面三槐,三公位 此疏謂「諸 棘 ,孤、卿、大 表 因 臣 又 謂 侯 刑 民 朝

人常先君,出恒後,尊卑之體然也。小寢,朝,謂臣朝君也。辨色,昧爽之後也。臣政,使人視大夫,大夫退,然後適小寢釋服。朝,辨色始入。君日出而視之,退適路寢聽

退適 故君 路寢 燕寢 子亦然。 有當入謀於君者,若孔子攝齊升堂是也 小寢釋服也。 未可即 , 卿 也。 大夫亦治事於治朝之左右,或 諸侯正寢一,燕寢三。 鄭氏曰:「釋服,服玄端。」 退,俟大夫治事畢退 此雖言諸 侯禮 君既 朝,然後 ,其實天 退適

肉。 嗣。」〇按陸氏以「四簋」爲「四簠」,蓋據皇氏本。 夫人與君同庖。《釋文》:「簠,本或作「簋」。食,音 又朝服以食,特牲,三俎,祭肺,夕深衣,祭牢 鄭氏曰:「食必復朝服、所以敬養身也。 忌 羹,忌日貶也。 天子 言『日 曰:「紂以甲子死,桀以乙卯亡,後王以 三俎,豕、魚、腊。 祭牢肉,異於始殺 『餕』,諸侯言『祭牢肉』,互相挾。 百 朔月少牢,五俎四簋。子卯稷食菜羹, 稷食者,食,飯也,以稷穀爲飯,以 中」,諸侯言『夕』,天子 同庖,不特殺也。」 稷食菜 孔 也。 爲 氏

簋也。 腊,加羊與其腸胃也。 簋 爲 食二簋。 食,無膚 俎,加羊與膚爲五,但少牢祭神,此人君 稻、粱各一簋 牲體貴右也。 庖,蓋以右胖爲君俎,以左胖爲夫人俎,凡 稷食則無黍,菜羹則不殺也。 稻粱爲加,此惟言其正者也。 各二也。不言「稻粱」者,食以黍稷 羊也、豕也、魚也、腊也、膚也。 特牲而曰「牢」,通朔食言之也。五 菜爲羹而食之。」 云『每食四簋』,注云:**『四**簋 ,則日食二簋,天子當朔食六簋,日食四 小段以祭,《士虞禮》所謂「膚祭」,是也 子卯忌日貶損,所以致戒懼之意 而有腸胃也。 以稻粱美物,故知各一簋。《詩》 而 ○鄭氏 己。二 愚謂: 曰:「五俎,豕、魚、 朔月 孔氏 朔月四 祭牢肉者,切肉 四簋,故 曰:「少牢五 夫人與君同 諸侯朔食四 簋 四簋,黍稷 黍、稷、稻 一,則 爲正 一俎,謂 日食 知日 所

八三〇

粱。』是 注意 **苽各一簋**,若盛食則八簋 此 粱,故以『四簋』爲『四簠』,未知然否。 正,以 所據,不 之實耳。 物、《少牢禮》有明文。 八簋」,當加以稻粱也。」 此言「四簋」、《詩》言「陳饋 祭,未爲不可。 鄭氏以腸胃備五 祭牢肉,膚既用以夕祭,則不當又爲五俎 無「膚」而有「腸胃」者,蓋鄭氏以夕深衣, 及其加,故但言「簋」而不及「簠」。 言「六簋」,皆謂黍、稷耳。 簋』字,皇氏以 而推,天子朔月六簋,黍、稷、稻、粱、麥、 也。 稻粱爲加,凡言飯食,多舉其正 簋 可從 孔氏 然五 盛 稻 也。 乃以 俎有膚,而别留之以供 注云『稻粱』,以 粱 簋 也。 爲神、人之别,此誤 盛 此注言「五 黍 且 ,故《小雅》『陳饋 愚謂: 五俎之 稷,簠 此 蓋 八簋」、《祭統 文 食以 簠 諸 盛 俎,義無 俎」,乃 本 《公食 黍稷爲 宜 一稻粱。 皆 盛 以 夕 不 解 稻 作

降於天子,昧爽及日入之食皆不侑 夕食之後,五 宫,昧爽而朝,慈以旨甘」,此在朝食之前 粱、秫唯所欲」,又云「命士以上,父子異 母,雞初鳴」而衣服,「適父母舅姑之所, 食。 祭牢肉,此夕食也。此二者爲每日之正 大夫禮 有亞飯、三飯、四飯之官。《白虎通》乃謂 四也。又云「日入而夕,慈以旨甘」,此在 饘、酏、酒、醴、芼、羹、菽、麥、蕡、稻、黍、 食、夕食之間,三也。 皆非是。 食,特牲,三俎,祭肺,此朝食也。 夫之禮云八豆、八簋、六 天子四飯,諸侯三飯」,誤矣 簠」,亦此義也。注疏於簋兼稻、粱言之, 又前於天子言「日中而 》備 ○古者貴賤日皆五食:朝服 有黍 也。 、稷、稻、粱 王每食皆以樂侑,諸侯 又《内則》「子事父 鉶、九俎,亦不言 而 餕」,此在 其 (後言· 夕深衣 · 故魯 上大

踐也。《釋文》:「遠,于萬反。踐,音翦,子淺反,出注。」殺犬豕。 君子遠庖廚,凡有血氣之類,弗身君無故不殺牛,大夫無故不殺羊,士無故不

聲之誤 節制 故無故不殺羊。 牢,諸侯朔食少牢差之,則大夫朔食特牲 鄭氏曰:「故,謂祭祀之屬。 不 獨牲牢之大而已也。 其死,聞其聲不忍食其肉,是以遠庖廚」。 食少牢,故無故不殺牛。以天子朔食大 至於凡 有以養其仁愛之心也 而 「君子之於禽獸也,見其生不忍見 有 也。 不敢過,其不得已而殺者,亦未嘗 血 翦猶 氣之類,皆不忍親殺之,又不 士朔食特豚,故無故 殺也。」 蓋於其不當殺者,既 愚謂:諸 踐當爲『翦』, 侯 不殺 朔

至于八月不雨,君不舉。

雨,盡建未月也。《春秋》之義,周之春夏鄭氏曰:「爲旱變也。此謂建子之月不

則雩。 也。 零而 無 建未之月得雨,而不書「旱」,故爲説如此 年六月書「雨」,又文二年書「自十有二月 成,不必盡建未之月而已爲災矣。記者蓋 謂: 周之春夏不雨,則首種不入,宿麥不 食,則舉肺脊以祭,不舉,謂不殺牲 不知《春秋》書「不雨」即爲災,不必書「旱」 不雨,至於秋七月」,皆歷時不雨,至建午 見《春秋》於僖二年冬十月書「不雨」,至三 雨,未能成災,至其秋秀實之時 舉,謂舉肺脊以祭也。 不得,則書『旱」,明災成也。」 零而得之,則書『零』,喜祀 君每日殺 有 而 也 益 無 性以 也 雨 愚

文》:「衣,於既反。搚,徐音箭,又如字。」而不賦,士功不興,大夫不得造車馬。《釋年不順成,君衣布攢本,關梁不租,山澤列

八三二

本以象。 也。 素服也。 愚謂:衣布,以 之禁,不得非時 今但用象爲本,與大夫、士同也。 貶降之禮,而其文各有詳略,亦所以互相 司徒》「荒政」爲「眚禮」「去幾」「舍禁」「弛 力」之事,所以自貶責,省國用而寬民力 ,去珽、荼,佩 前言凶年天子貶降之禮,此 搢,謂 列之爲言遮迾也。 所 白 取也。 土 笏 布爲衣,又降於天子之 也。 造,謂 士 雖不賦 以 作新 君笏用象, 竹 又言諸 此於《大 爲 也。 笏, 獲 爲 飾 侯

卜人定龜,史定墨,君定體 定墨,視兆坼也。 鄭氏曰:「定龜 繹 龜者,按《龜人》云:『天 公曰:「體,王其無害。」」 屬,東龜 曰果屬,西龜 ,謂靈、射之屬所當用 定體,視兆所 龜 日靁屬,南龜日獵 曰靈屬,地 孔氏 得也。 E. 龜 「定 者。 周

也

屬, 之。」鄭云:『屬,言非 春用果,秋用雷之屬也。 《爾雅》作「射」,射即繹也。《釋文》引《爾雅》作「謝」。 用靈,祭地用射,射則繹也。 右倪若。』定之者,定其所當用,謂卜祭天 俯者靈,仰者繹,前弇果,後弇獵,左倪靁 玄,地龜黄,東青,西白 兆廣也。」體,謂五行之兆象。既得兆象, 必以墨畫龜,求其吉兆。 墨,卜人占坼。」 故《占人》云: 『君占體,大夫占色,史占 君定其體之吉凶,尊者視大,卑者 廣,謂之卜從。《周禮 氏云:「上,仰者也。下,俯者也。左,左 辨龜之上下、左右、陰陽以授命龜 定龜,定龜體所當灼。《卜師》云:「凡卜, ٦É 龜 曰若屬,各以其方之色與其 愚謂: 卜人, 卜師也。 占人》注云:『墨, 也。 ,南赤,北黑也。 史定墨者,凡卜 若卜從墨 按《周禮 色,謂天龜 》作「繹」 .視小。 (體辨 圃 兆 龜

之從 [X] 之墨也。 裂紋不必皆從墨,以其吉者名之,故總謂 裂者吉,不從墨而裂者凶,故卜吉謂之從。 之墨者,卜以墨畫龜腹而灼之,其從墨而 其鉅紋謂之墨,其細紋旁出者謂之坼。 也 占其色之明暗。次則大史視之,而占其墨 之,而定其五行之體。次則大夫視之,而 師定龜以授命龜者。 曰霽、曰蒙、曰驛、曰克」,是也。 將卜,卜 龜。」凡卜以火灼龜,視其裂紋,以占吉凶。 傳》:「晉趙鞅卜救鄭,占諸史趙、史墨、史 語》:「晉獻公卜伐驪戎,史蘇占之。」《左 也。《大史》:「大祭祀、與執事卜日。」《國 倪也。右,右倪也。 。」即此「卜人定龜」之事也。史,大史 故《周禮 次則卜人視其坼,而總斷其吉 體,謂五行之體,《洪範》「曰 占人》云:「君占體,大夫 陰,後弇也。 卜兆既成,君先 陽,前 雨 謂 視 弇

> 與「卜人」者,文略也。 占色,史占墨,卜人占坼。」此不言「大夫」

依注音直。齊,側皆反,下同。」齊車鹿幦豹犆。《釋文》:「幦,音覓,徐苦狄反。君羔幦虎犆。大夫齊車鹿幦豹犆,朝車。

士

載朝服。」道車則朝車也。「乘車」在「道 《士喪禮》:「乘車鹿淺幦。」又曰:「道 **幦豹犆」也。** 車」之上,則 與齊車不同,但無文以言之。」 氏曰:「《詩·大雅》『鞹靷淺幭』,毛傳 飾幦,謂之淺幭也。據此注,則君之朝車 以虎皮爲幭,此用羔幦者,《詩》據以 云:『幭,覆式。』即幦也。 齊車之飾。臣之朝車,與齊車同飾。」 鄭氏曰:「幦,覆苓也。犆,讀皆如『直道 而行』之直。直,謂緣也。 齊車 道車不言其幦,明 也。 鹿淺幦,即此之「鹿 《詩》云『淺幭』, 羔幦虎犆 與乘 愚謂: 一,此君 虎皮 車 孔

同也。

『衣布』同,又如字。』《釋文》:「首,手又反。迅,音峻,又音信。衣,於既反,下雷、甚雨,則必變,雖夜必興,衣服冠而坐。一君子之居恒當户,寢恒東首。若有疾風、迅

鄭氏曰:「當户,鄉明。東首,首生氣也。 以頭養爲名。 以頭養爲名。 以頭養爲名。

職,音悔。櫛,則乙反。● 樿,章善反。禨,其既反。」櫛,進機進羞,工乃升歌。《釋文》:「盥,音館。日五盥,沐稷而醴粱,櫛用樿櫛,髮晞用象

氣也。更言『進羞』,明爲羞籩豆之實。」鄭氏曰:「晞,乾也。沐靧必進禨,作樂盈

櫛,梳也。 故 洗面也。 孔 謂 用象牙滑梳以通之也。 以爲梳。晞,乾燥也。 體虚,補益氣 之後,樂工乃升堂,以琴瑟而歌,皆爲新沐 而設,今爲飲設羞,故知非 也。 氏 羞籩羞豆之實。 曰: 人 「盥,洗手 君靧 用稷粱之湯汁洗面沐髮,並須滑 沐髮爲除垢膩,故用白理澀 也。一 沐皆粱。 知非庶羞者,庶羞爲食 也。 沐已,燥則髮澀,故 機,謂 沐, 樿, 庶羞也。 沐 白 髪 酒 理 也。 也。 木 進 也。 靧, 羞 木

湯,履蒲席,衣布晞身,乃屨,進飲。《釋文》: 浴用二巾,上絺下綌。 一村,音雩。 也。 鄭氏曰: 蒯席澀,便於洗足也。 蒯,苦怪反。 「用絺 連,力旦反。 綌,刷去垢也。 出村,履蒯席, 屨,本又作『履』。」 連猶釋也。 村,浴器 連用 進

0

(, 書思對

既

服、習容觀、玉聲,乃出

, 揖 將適公所,宿齊戒,居外寢,沐浴。

史進

象

進飲 前可知 蒲 也。 也。 出 飲 湯,乃履蒲 湯,言釋去足垢而 之布者,以别於巾之用絺綌也 曰:「屨,服之末,進屨則衣服皆舉矣,故 浴」,則浴之禮非 飲,即進禨也。不言「進羞」「升歌」者,蒙 衣布晞身,言衣浴衣以拭乾其身也。 《内則》及《聘禮》皆言「三日 ",亦盈 一杆 席 為。」 出 《喪大記》曰:「挋用浴衣如它日。」謂 精,上絲下給,出杆履蒯席 而 也。 足踐 杆,浴竟而出盤也。 氣 也。」 席,皆用物之宜 愚謂: 履澀草席 或謂「浴之禮殺於沐」,非也。 殺於沐矣 絺 用 孔氏曰:「村,浴之盤 精 湯 上,刮去垢 闌也。」 而 綌 也。 蒯菲草席澀 沐」而「五 粗 也。 晞,乾也。 布,浴 既 蒯 輔 席粗 連 氏 連 進 衣 用 廣 用 日

郭氏曰:「思,沂思念务以告ず皆也。 討,暉。」○今按:觀,當音古亂反。

私

朝,煇

如

也,登車則有光矣。《釋文》:「煇,音

門 也。 也。 居正寢。 所以對君者也。 煇 服,朝服也。 衣以筮。」象笏者,大夫之笏,以象爲本也。 戒,謂前夕齊戒也。 笏,爲失忘也。 鄭氏曰:「思,所思念將以告君者 之美,故揖 夫之史也。《雜記》:「如筮,則史練冠 居外寢,沐浴,以祭祀之禮自處也。 境邑之臣入見於君者也。 家之朝也。 也。 玉聲,玉佩進退鏘鳴之聲。 蓋内存乎齊肅 煇、光,皆謂儀容之盛,而 臣之對君,如對神明,故宿 私 揖其臣 容觀,謂容儀可 朝 玉聲,玉佩。 而 命,所受君命也。 已煇 外寢,正寢也。 乃行。」 之誠,而 如 ,其登車 宿,夙也。 私朝,自大夫 以 外 愚 觀示 謂 發 光又盛於 出,出 也。 爲 而 書之於 史,大 齊戒 於人 齊必 儀 宿 此 至 長 容 寢 齊

八三五

所 則有光明而不至隕越矣。

如字,徐胡豆反。」 也。《釋文》:「珽,他頂反。茶,音舒。 直,讓於天子也。 天子 搢珽,方正於天下也。諸侯荼,前詘 大夫前 詘 後 詘,無所不讓 詘,丘勿反。 後, 後

終葵首。 然無所屈也。 或謂之大圭,長三尺,杼上 鄭氏曰:「此亦笏也。 殺其首,不爲椎頭。 書》曰:『珽玉六寸,明自炤。』茶,讀爲『舒 如椎頭,是謂 下者,言珽然無所詘,示己之方平正直而 天子,下有己君,又殺其下而圜。」 以謂笏爲荼。大夫奉君命出入者也,上有 布於天下。 曰:「此論天子以下笏制不同。方正於天 終葵首者,於杼上又廣其首,方 舒懦者,所畏在前 前詘 無所屈,後則恒直。《相 ,謂圜殺其首。 諸侯唯天子詘焉,是 謂之珽,珽之言珽 也。 後直,下 詘 門,謂圜 孔氏 玉

者命其實也。」 諸侯曰荼,大夫以下曰笏,尊者文其名,卑 荼。大夫執聘圭,必 搢笏。 者贄也、所搢者笏也。 角正方。 玠」,而《詩》言「錫爾介圭」,則侯伯七寸之 蓋珽玉别有長六寸者耳,非謂天子大圭之 長四寸也。而《相玉書》言「珽玉六寸」者, 云「大圭長三尺」,則天子之笏,其終葵首 笏之異名也。 御珽,諸侯御荼,大夫服笏。」是珽與荼皆 授圭,則執其所潛而已。天子之笏曰珽, 夫前詘後詘,無所不讓者,大夫上有天子, 終葵首也。 曰:「天子之朝日,執鎮圭,搢大圭,所 下有己君,上下皆須謙退 圭耳,豈相妨哉? 讓於天子者,降讓於天子也。大 《爾雅》云「圭大尺二寸謂之 笏長二尺有六寸,而《玉人》 愚謂:《荀子》云:「天子 諸侯執命圭,必搢 也。」 及其合瑞而 陳氏祥道 執

有定,豈以君之親黨而有異乎? 以引卻而稍離君所,皆所以明退讓之義以引卻而稍離君所,皆所以明退讓之義以引卻不可之為其席而遠君,如君命之勿退,則亦以引卻而稍離君所,皆所以明退讓之義也。鄭以黨爲親黨,非是。大夫、士位次也。鄭以黨爲親黨,非是。大夫、士位次也。鄭以黨爲親黨,非是。大夫、士位次也。鄭以黨爲親黨,非是。大夫、士位次也。鄭以黨爲親黨,非是。大夫、士位次本,所也。黨,鄉之細者。退,●

如字。躐,力輙反。」登席不由前,爲躐席。《釋文》:「爲,于僞反,本又

下,升必由下,於坐乃便也。若由前,則失之席也。數人同坐之席,以前爲上,後爲「失節而踐曰躐。」 愚謂:此謂數人同坐鄭氏曰:「升必由下也。」 庾氏蔚曰:

徒坐不盡席尺。

禮記卷二十九

其節矣。

孔氏曰:「徒,空也。空坐,謂非飲食及講鄭氏曰:「示無所求於前,不忘謙也。」

謙也。」

間

時

也。

不 盡

席之前畔,

有

尺,

讀書,食,則齊。豆去席尺。

皆同。辯,音徧。」
辯賞羞,飲而俟。《釋文》:「飯,扶晚反,下至『三飯』
若賜之食而君客之,則命之祭然後祭,先飯,

將食,臣先嘗之,忠孝也。飲而俟,俟君食鄭氏曰:「雖見賓客,猶不敢備禮也。君

■ 「退」,原脱,今據北大本、《禮記注疏》補。

侍君 者共 噎。 禮,食未飧,必先啜飲以利滑喉中,不令澀 食,若以客禮待臣,則不使膳宰嘗食,以主 則命之祭,臣乃祭也。 祭」,是也。 皆主人先祭而客祭、《曲禮》「主人延客 俟君飧,臣乃敢飧。」 食, 偏嘗羞膳, 嘗食之義也。 後乃敢祭也。 待之則得祭。 丽 道自居也。 宰之事也 後 食則 食。」 君既未飧,故臣亦不敢飧,而啜飲以 而賜之食則不祭,若賜食而君以客禮 先祭,若降等之客則後祭。 若侍君食則不祭。 孔氏曰 故 雖得祭,又先須君命之祭, 侍食者先飯、辯嘗羞、示代 飯,食也。 : 祭,祭先也。 愚謂: 君食必有膳 君未食 飲 共食之禮, 若君客之, 而俟者, 而臣先 禮 若臣 二字嘗 敵

若有嘗羞者,則俟君之食然後食,飯,飲而

俟。

飯」字句

欲。 君命之羞,羞近者。命之品嘗之,然後唯所 也。 鄭氏 羞 者、謂既飯、亦先啜飲、而俟君之飧也 君之食, 日己乃食也。」 則君自使膳宰嘗羞也。 曰 :「此謂臣侍食得賜 凡嘗遠食,必順近食 一,膳宰存也。 既不得爲客,故不得祭,亦不得當羞 曰:「不祭,侍食不敢 飯、飲、利將食 食 既不祭不嘗,則俟 愚謂:飯,飲而 備 而非君所客者 禮 也。」 也。 孔氏 不嘗 俟

若越次前食遠者,則爲貪味也。命之品嘗食,而猶未自專嘗,先食其近前一種者而止。食,而猶未敢食羞,故又須君命。雖得君食,而猶未敢食羞,故又須君命。雖得君。此治也。」 孔氏曰:「君命之羞,羞近者,與氏曰:「羞近者,辟貪味也。順近食,從

■「食」下、《禮記注疏》有「後」字。

順近食,亦辟貪味也。客與不客,悉皆如則隨己所欲,不復次第也。凡嘗遠食,先多食,故君又命已徧嘗,而己乃徧嘗之,後之,然後唯所欲者,品猶徧也,既未敢越次

者,三飯也。《釋文》:「覆,芳服反。飧,音孫。」君未覆手,不敢飧。君既食,又飯飧。飯飧

此

,故云『凡』。」

也。」 以循 食也。 《弟子職》曰:「既 畢,不敢遽勸之也。 鄭氏曰:「覆手,以循咡,已食也。飧,勸 已食覆手,臣 未覆手,不敢飧者,飧以勸君之飽,君食未 勸助令飽實也。」 飲澆飯於器中也。 口邊,恐有殺粒污著之也。 孔氏曰:「覆手者,謂食飽必覆 三飯 也 乃又飯飧以勸其飽也。 者,臣 食乃飽,循咡覆手。」君 禮、食竟、更作三飧、以 愚謂:食畢者必覆手, 君既食,又飯飧者,君 勸 君食,如是 飧,謂用 手 可

> 飧以三飯爲節也。 飯,謂食三口也。 飯飧者,三飯也者,言飯

才用反。」君既徹,執飯與醬,乃出授從者。《釋文》:「從

無者,食之主,執飯、醬以授從者,重君飯、醬者,食之主,執飯、醬以授從者,重君
無食之禮殺於禮食也。《公食大夫》:「賓應食之禮殺於禮食也。《公食大夫》:「賓應食之禮殺於禮食也。《公食大夫》:「賓此授從者,臣侍君食,異於爲賓客之禮也。出授從者,臣侍君食,異於爲賓客之禮也。出授從者,臣侍君食,異於爲賓客之禮也。以所有食,不盡食。食於人不飽。唯水漿不凡有食,不盡食。食於人不飽。唯水漿不凡有食,不盡食。食於人不飽。唯水漿不不食,若祭,爲已傑卑。《釋文》:「僕,虚涉反。」

侑,勸也。侑食,謂侍食於尊者,主於勸尊爲太有所迫畏,臣於君則祭之。」 愚謂:鄭氏曰:「已猶太也。水漿非盛饌,祭之

本作「而後屨」。」

之禮也。不飽者,謙退不敢取足也。 過於厭降卑微,而失禮之節也。 非盛饌,故不祭。 飯也」,是也。 者之飽,故不 進,賓受,坐祭,遂飲」。 則祭之,故《公食大夫禮》「宰夫執觶漿以 盡 「食於人」以下,明敵者爲 食,即上文云「飯飧者 傑,厭也。 若祭水漿,則 若臣於君 水漿 客 =

句。 言斯,句。 君若賜之爵,則越席再拜稽首受,登席祭之。 [二爵而言],注云:「飲二爵,可以語也。」又云「言斯禮」, 也。』言言,魚斤反。 子之飲酒也,受一爵 已」及下「油」字也。 ·釋文》:「洒,先典反,又西禮反,王肅作「察」,云:『明貌 飲,卒爵 人種,隱 語 必 禮已三爵,而油油以 以禮 辟 而俟 而 也。」「三爵 油油、音由、本亦作「由」。 辟,匹亦反,徐房亦反。 后屨,坐左納 君卒爵,然後授虚 (而色酒. 而 油』,注云: 如也,二爵而 右,坐右 退。 『悦敬貌。』無 「而后屨」,一 王肅本亦作 句。 爵。 納 退 左。 則 言 君

侍飲於君,則有勸 之嫌,故後君 者,蓋燕禮爲賓客,於君則 此言臣侍君私 、受賜爵者,公卒爵 而飲,所以明 燕受爵 飲之義,故先君 而 之禮 後 飲。」此 退讓之義。 有 也。 以 賓禮 乃先君 自

《左傳》曰:「臣侍君宴,過三爵 二爵 蓋私燕之禮如此。 也。 與誾誾 以盡忠孝之懷也。 謂堂下序東也。 屨 專於敬,繼而兼於和,至油 不止於三爵也 燕飲之間,其情之漸洽者如此。 解 7,則和 禮已三爵者,侍燕之禮 於堂下,退則 同, 而 和敬貌。 不 流,又有 隱辟而後屢者,不敢對君 油油、自得之貌。 跪 洒如,肅 若正燕,則有無算爵 而 斯,語 取之、敬也。 以 油則和之至矣。 不 止 助 敬貌。 失其 於三 詞。 ,非禮也。」 然禮止於 而飲,所 蓋始則 隱辟, 敬 一爵也 已,止 言言, 矣。 此 飲

納 履,故就君所不見之處而納之也。 坐左

納 右,坐 右 納左者,雖 在隱 辟,猶不 ·敢不

敬也。

凡尊必上玄酒。

南,以南爲上。 西爲上、《燕禮》、《大射》南北列尊,玄酒在 飲酒》、《特牲禮》東西列尊,玄酒在西,以 此明設尊之法也。凡設尊,必以玄酒配 而設,而以玄酒爲上,重古之義也。 故《鄉 酒

唯君面尊

南上。 鄉。 於兩 面猶鄉 疏以 之前,而君鄉之,言此酒出自君也。 蓋人君燕其臣子,得專恩惠,故設尊於君 面尊爲尊鼻鄉君,又謂「兩君相見,尊 司宫尊于東楹之西,兩方壺,左玄酒, 楹間」,皆非是。 公尊瓦大兩,有豐,在尊南,南上。」 也。 《燕禮》:「公席于阼階 説見《少儀》及《郊特 上,西 〇 孔

牲》。

唯饗野人皆酒。

鄭氏曰:「飲賤者不備禮。」

孔氏

又無德,則宜貪味,故 饗野人,謂蜡祭也。 K唯酒而. 野人賤,不得本古, 無水也。」

大夫側尊用棜、士側尊用禁。 《釋文》:「棜,於

據反。」

鄭氏曰: 「棜,斯禁也,無足,有似 於棜。」

曰「尊于房户之間,賓主共之也」,是也 人鄉之,明與賓客共此酒也。 愚謂: 側尊,謂設尊於旁側,不專使主 《鄉飲酒義

始冠緇布冠,自諸侯下達。 棜、禁,説見《禮器》。

《釋文》:「始冠,古亂反,「冠而」同。 冠 敝,音弊,本亦作 而敝之可 也。

弊」。」

鄭氏 也。」 曰: 愚謂: 「本太古耳,非時王之法 自諸侯下達者,天子冠不用 服

其間。」 緇 十不散送』及『親没不髦』,記者雜録 始也」,廣論上下及吉凶冠之所用,唯『五 布 冠 也 孔 氏 曰 : 自 此 至 魯 ~,厠在 桓 公

注:「績,或作「繪」。緣,或作「蕤」。」 侯之冠也。《釋文》:「績,户内反。緣,耳佳反。」○鄭玄冠朱組纓,天子之冠也。緇布冠繢緌,諸

言 緇布冠無矮,而諸侯則繢緌,尊者文縟也。 諸 繢 於諸侯言「緌」不言「纓」,言「緌」則 緌,纓之垂者,繢緌則繢纓矣。 侯以下,始冠緇布冠,而天子玄冠朱組 鄭氏曰:「皆始冠之冠也。 冠,青組纓。」饋之色華於青,朱之色盛於 纓」不言「緌」,諸侯有矮,則天子可知也。 也。 院解布冠有矮,尊者飾 纓則 緌不見也。 《士冠禮》: 也。 玄冠,委貌 於天子言 愚謂: · 編 、纓見, 纓。 也。 諸 布

既反。」 士之齊冠也。《釋文》:「齊,側皆反。綦,音其,徐其玄冠丹組纓,諸侯之齊冠也。 玄冠綦組纓,

服 諸侯齊雖玄冠,與大夫、士同,其衣蓋 爲諸侯之齊冠,而不及天子,則天子齊不 丹,赤色。 祭異冠。」 玄裳,絻而乘輅者,志不在於食葷。」蓋謂 以玄冠也。《大戴禮·哀公問》曰:「端衣 色差次之,卿大夫蓋繢組纓與。 不以玄冠矣,特其纓有異耳。以丹與綦之 鄭氏曰:「言齊時所服也。 自可通。 上,齊、祭異冠」,此以自祭其宗廟言之,義 天子之齊也。 士,則卿大夫助祭與自祭其宗廟,其齊無 而 亦變其裳以玄與。 若助祭於君 綦,蒼艾色。 愚謂: 此言齊冠之纓之别也 是天子齊服,玄冕玄裳矣。 ,則雖士亦齊、祭異 ○鄭氏謂 上舉諸侯,下舉 四命以上,齊、 此言玄冠 四 一以朝 命 以

冠者而加精美焉。

喪既大祥,除去喪冠

祭,則其説愈支而愈窒矣。 冠,豈待四命乎? 孔疏乃欲曲通之於助

縞冠玄武,子姓之冠也。

爲服者言之則爲孫,故曰「子姓之冠」。 既,冠卷也。古者冠、卷殊。」 孔氏曰: 。如,玄爲吉,冠在上,武在下,以象父猶有 时,玄爲吉,冠在上,武在下,以象父猶有 时,玄爲吉,冠在上,武在下,以象父猶有 时,玄爲吉,冠在上,武在下,以象父猶有 时,玄爲吉,冠在上,武在下,以象父猶有 时,玄爲古,冠在上,武在下,以象父猶有 以,玄爲古,冠在上,武在下,以象父猶有

也。衣冠之制,其用爲緣者,必視其爲衣為,白色生絹。素,今之白色綾也。紕,緣支反。」

禮 《小記》、《雜記》、《間傳》諸篇之注疏 侯素帶,弟子縞帶觀之,亦可見矣。 然。縞薄而素厚,縞惡而素美,以天子、諸 哀情未忘,更服纖冠朝服。」見於此 故縞冠素紕。 縞冠,既祥,以哀情未忘,更服微凶之服, 雖異,其實則一冠也。 縞、《間傳》「大祥素縞麻衣」,是也。 祥,雖不當編者必編」,是也。或兼謂之素 或但謂之縞、「檀弓》「祥而縞」、、雜記》「既 則謂之素冠,《詩》「庶見素冠兮」,是也。 成喪者朝服縞冠」,是也。 冠或以其冠名之,則謂之縞冠,《小記》「除 則以縞爲冠,以素爲紕,素精於縞 凶於素則可,謂素凶於縞則 ·蓋本於戴德《變除禮》。 ,以漸即吉,未有既除 橝日玄冠黄裳,既橝,亦以 ○先儒謂:「祥日 而反服微凶之服 或以其紕名之, 愚竊以 非。 變除之 也。 謂 為不 着不 其 名 篇及 縞 此

冠也。 禫而除者也。 禫之纖冠,從禫日服之以至 也。 縞」,猶士練帶緇紕,而或謂「練帶」,或謂 他冠乎? 於吉祭而除者也,又何疑焉? 緇帶」耳,未可因其名之不同 雜記》云「既祥,雖不當編者必 然則大祥之素縞,從祥日服之以 爾 編冠素紕,而或曰「編冠」,或曰「素 則 此云「縞冠素紕,既祥之冠 練 祭練 冠,練後 何 而 ~縞」, 以 强生 不 至於 實 别 品 别 製

服也。 垂緌五寸,惰游之士也。玄冠縞武,不齒之

鄭氏 服之象也。 自領 長 曰:「以『惰游』與下『不齒』相連,故 周 短未聞,以居冠屬武推之,則緌之長,可 禮》坐嘉石之罷 而 曰:「惰游,罷民也。 上結於武、蓋吉冠尺有二寸,而 不齒,所放不率教者。」 民。」 亦編冠素紕 愚謂: 冠 矮之 知 孔 祥 是 氏 <u>N</u>

> 人激勸之權審矣。 素紕爲稍優,然猶不得遽同於平人也。 坐嘉 夏 齒者, 圜土之罷民既出, 而三年不齒者也 辱之,又減其緌,以别於既祥之服 冠 重於坐嘉石者,及其既改而 土之罷民,弗使冠飾 一尺與。 石者爲輕,故玄冠 罷民凶冠,所以表其 加 丽 縞 加明刑,其罪本 出 武 亦視 園土,則視 凶 |徳以耻 也。 縞 不 聖

文》:「屬,章欲反。」居冠屬武,自天子下達,有事然後緌。

飾也。自天子以下皆然。垂者分屬於武之兩旁,有事然後垂之以爲居,燕居也。燕居無事於飾,故以冠纓之

五十不散送。《釋文》:「散,悉但反。」

啟殯之後亦散垂,至葬乃絞之。五十不散愚謂:始死要絰散垂,三日成服乃絞之,鄭氏曰:「送喪不散麻,始衰不備禮。」

送,則始死猶當散麻與。

親没不髦。

鄭氏曰:「去爲子之飾。」

大帛不緌。帛,鄭氏讀爲白,今如字。

帛 傳》「衛文公大帛之冠」,蓋人君遭凶札,喪 白布冠也。不緌,凶服去飾。」 鄭氏曰:「帛當爲「白」,聲之誤也。 貶損之意也 之漸;大帛在吉而自處以 縞冠由凶而轉趨於吉,故有緌,以明變除 大帛精於縞,縞冠有緌而大帛無緌者,蓋 矮,大帛之制,如喪冠而厭伏,故不緌。 師邑,及士、大夫去國之所服也。《雜記》 曰:「委武玄縞而后緌。」是冠有武者乃有 ,謂以白色繒爲冠,所謂素冠也。《左 凶,故去緌以示 愚謂:大 大白, 然

玄冠紫緌,自魯桓公始也。

鄭氏曰:「緌當用績。」 孔氏曰:「上文

「僭宋王者之後服」,臆説無據。

綾。時人尚紫,故魯桓公用之。鄭氏謂績。」 愚謂:紫,間色不正,不當用爲冠云『緇布冠繢緌,諸侯之冠』,故知緌當用

朝玄端,夕深衣。《釋文》:「朝,直遥反。」〇今按:

衣。 緇而爲之,前後各二幅,其長二尺二寸,幅 衣也。端,正也。玄端之衣,以十五升布 朝服也。 食、卒食服深衣也。若大夫、士視私朝、亦 寢釋服,服玄端,又朝服 食,卒食服玄端。諸侯朝服 深邃,故曰「深衣」。天子皮弁視朝,遂以 深衣以十五升白布連衣裳爲之,以其被體 廣亦二尺二寸,長與幅廣正等,故曰「端」。 此謂大夫、士燕居之服也。 大夫、士朝服以朝,退朝,服玄端以 ○凡禮服,皆端也。 以 食,卒食服深 視 玄端,玄冠 《樂記》「端 朝,退適路

四

六

端獨 其袂 冕 端同 婦錫 端委以治周禮」,此朝服謂之端也。 袂」,則袂不侈也。 袂可 服侈袂可知。 袂。」弁経之衰侈袂,則吉時皮弁、爵弁之 名焉。玄端之衣,雖與朝服以上同制,而 乃禮服之下,衣之端者自此始,故專以端 冕端委,以治民臨諸侯」,又子贑曰「大伯 委立於虎門之外」,又劉定公曰「吾與子弁 乘輅」,此冕服謂之端也。 而《喪服》記言喪衰之制云:「袂屬 二尺有二寸,袪尺二寸。」士之喪衰,與玄 而 知。 以 .'制者也。是玄端之袂屬於衣爲二尺 聽古樂」、《大戴禮》「端衣玄裳, 衣侈袂。」主婦衣侈袂,則主人朝服 則 端爲名、蓋深衣連衣裳爲之、玄端 異。 《特牲禮》「主人玄端」,不言「侈 《雜記》: 《少牢禮》:「主人朝服,主 玄端之制,雖不可考, 「凡 《左傳》「晏子端 弁經,其 幅 衰 而玄 絻 · 衣 侈 侈 而

> 反。 齊、音咨、本或作「齎」。要,一遥反。衽,而審反,又而鴆 《釋文》:「深衣三袪,起魚反,本或無「衣」字。縫,音逢 深衣三袪,縫齊倍要,衽當旁,袂可以回肘。 若朝服以上,則其袂不殺,不殺故侈,殺之 ○自此以下至「弗敢充也」,明衣服之制 故不侈 二寸,至袖 袂,面世反。 此 肘,竹丑反。」○鄭注:「縫,或爲「逢」,或 口 端端 而 衣與 園殺爲尺二寸,與深 朝 服 以 上之異 制 衣同。 也

爲「豐」。」

制也。衽,衣襟也。禮衣之衽在 寸,又倍於要中之數也。 其要中之度也。 此詳深衣之制 言裳之下畔縫紩之,而 縫,紩也。 而其要中七尺二寸,三倍於其袪之數也。 三袪者,深衣袪尺二寸,圍之爲二尺四寸, 齊,裳之下畔也。 也。 要,謂裳之上畔也。 袪,狭 其 此二句,言裳之 口 度 也。 縫齊倍要者 丈 三袪, 中,而深 四四 深衣 尺四 謂

在

衣之衽也。

衽

也。

左襟之上,而

不屬。

之衽也。

裳之兩旁,以

衣之衽掩於旁,與禮衣異也。 鄭氏之注既未晰 所以掩衣裳之交際者也。然有禮衣之衽, 者,袂廣二尺二寸,肘長尺二寸,故可 衣之裳幅爲衽,是以其説愈繁而愈亂也。 於裳,或混禮衣之衽於深衣,或又即指深 摺其衽於左襟之内,謂之裼。 上。若舒其衽以掩於右襟之内,謂之襲, 古之禮衣,皆直領而對襟,其衽在左襟之 此二句,言衣之制也。 衣之衽,有在衣之衽,有在 而其衽二尺有五寸,屬於衣 深衣之衣,爲 禮衣之裳,前三幅,後四幅 恒以 掩其前 其 ,而後之説者或混衣之衽 裳 掩於右襟之外,此深衣 則 曲領相交,其衽 後際,此禮 前六幅,後六幅,皆 〇凡衽者,皆 此禮衣在 袂 衣 可 裳之衽。 在 以 而 一, 前 以 裳 回 垂於 亦 在 肘 之 後 衣 口 衽也。 交裂之,寬頭在下,狹頭在 唯在衣之衽,則禮衣之衽 爲衽而縫合於後裳,於前裳之右爲衽 留 五 至小要之取名於衽 右腋之側。 上一 尺爲正。

肘。

上,於前

裳之左

丽

有深

之衽稍濶,又緣其旁而掩於襟外,以交於 内,其襲而見於外,則當心而直下,深衣 縫合,至衣時則交於後裳,此深衣在裳之 邪向下一畔一尺五寸,去下畔亦六寸,横 衽,而其在衣之衽,與禮服之衽皆無與焉。 衣,乃指在衣之衽,而非指在裳之衽 「上正一尺,燕尾二尺有五寸,凡用布三尺 喪服》記云「衽二尺有五寸」,鄭注云: 之,留下一尺爲正,則用布三尺五寸,得 寸。」賈疏云:「取布三尺五寸,廣 在裳之衽,禮衣與深衣皆在 此言「衽當旁」,以見其異於禮 一尺之下,旁入六寸,乃 ,則當獨指深衣在裳之 狹而又掩於襟 幅, 兩 也。

其制若此。 幅 兩 邊」,而鄭氏喻之以「曲 相交,正如小要之形,故《深衣》記謂之「鈎 衽 則 濶頭在上,狹頭在下,其所交後 ,衽各二尺五 濶 頭在下,狹頭在上。 如 深衣之衽,在裳之左右者亦 寸。」蓋禮衣在裳之衽 裾」也。 此 則上下 裳之

放此。」半。《釋文》:「治、音刼。緣、尹絹反。廣、徐公曠反、後長、中、繼揜尺、給二寸、袪尺二寸、緣廣寸

也。 尺,若今褎矣。深衣則緣 鄭氏曰:「其爲長衣、中衣,則繼袂揜 恒 謂之中衣,喪服謂之長衣。蓋吉服之中衣 長衣、中衣,皆衣於上服之内者也。 故不謂之中衣,而因其袂之長,謂之長衣 夫,大夫筮葬之史,皆釋衰 服 袪,袂口也。 在内,凶服之中衣則如遭喪受聘之大 緣,飾 邊也。」 丽 而即 릲 用爲外服, 袷, 愚謂 吉服 曲 領

> 稱也。 之也。深衣用十五升白布爲之,長、中則 禮服袂長,故長、中之袂亦長,欲其與上服 也。 各視其上服之所用焉。 短,反屈之及肘而已。長、中在禮服之内, 於深衣者唯此也。 覆於手也。 繼揜尺者,更以一 「給二寸」以下,兼承深衣長 長、中之制,悉與深衣 蓋深衣用 尺續於袂 之燕居 同 口 ', 其異 , 故 袂 、中言 而 揜

以帛裹布、非禮也。

中衣用, 布,其裹亦宜用布也。 裏、僧弓》「練衣黄裏」,是也。 鄭氏曰:「中外宜相稱也。 衣用帛,其裹亦同帛; 用,與上服 長、中與深衣同制。 中衣用素。皮弁服、朝服、玄端,麻衣也, 布。」 同"皮弁服、爵弁服、冕服,中 愚 謂:裏,謂 然深衣襌 玄端、 鄭氏以裏爲中衣 、朝服 冕服,絲 中衣 而長、 中衣之所 之 中衣用)裹也, 衣也, 、中有

祭服之中衣用玄,下言「玄綃衣」是也。鄭非是。又中衣所用之色,亦並與上服同,

氏謂「冕服中衣用素」,亦非也。

鄭氏曰:「織者,染絲織之。士衣染繒。 學之綾綢。 與此之,若今之緞。染繒,織成而染之,若 以上衣織。無君者不貳采,是有 也。大夫以上衣織。無君者不貳采,是有 也。大夫以上衣織。無君者不貳采,是有 以,三月之後,服玄端玄裳。」 孔氏曰: 以,三月之後,服玄端玄裳。」 孔氏曰: 今之綾綢。

雜,故爲間色。皇氏云:『正,謂青、赤、「玄是天色,故爲正;纁是地色,赤黄之鄭氏曰:「謂冕服玄上纁下。」 孔氏曰:衣正色,裳間色。《釋文》:「間,「閒厠」之間。」

正色,五方之純色。衣在上爲陽,故用 水、水黑、故駵黄之色黄黑也。」 中央正,駵黄是中央間。 水,水黑克火,火赤,故紫色赤黑也。 黄是 青白也。黑是北方正,紫是北方間。 黄,並以所克爲間,故緑色青黄也。 正,緑是東方間。 色、緑、紅、碧、紫、駵黄、是也。』青是東 黄、白、黑,五方正色也。不正,謂 者土之母,故兼二色以象地焉 之耦也。祭服上玄象天,下纁象地,纁兼 色,所以法陽之奇也。間猶 西方間。 金白,故紅色赤白也。白是西方正,碧是 南方正,紅是南方間。 赤黄之色,黄爲土之正色,而赤色屬火,火 一色。裳在下爲陰,故用間色,所以 西爲金,金白克木,木青,故碧色 東爲木,木青克土,土 南爲火,火赤克金, 中央土,土 雜 也,謂 愚謂: 五. 赤是 一黄克 北方 法陰 方間 兼 Œ

非 人公門,襲裘不人公門。《釋文》:「振, 列 采不入公門,振絺、綌、 不入公門,表裘不 依注 爲

纊,音擴。 氏 出。 鄭氏 之褻衣,其上必 外,可鄙褻也。」 表裘,外裘也。二者形且褻,皆當表之乃 也。 采,故據其 輕涼,故據其不加餘服 絡,表裘,皆謂 良夫紫衣是也。 日 繭, 曰:「列采,正服。 朝 襲裘不入公門,衣裘必當裼也。」 緼, 紆粉反, 又紆郡反。 緼 「袗絺、綌,其形露見。 君以 爲 在外 袍, 裼 爲敬,故襲裘不入公門。 以裘葛爲外服也。 襌 露 有中 絺、綌,夏之褻衣;裘,冬 爲 見 愚謂:非列采,若衛 丽 絅,帛爲褶。 衣與禮衣焉。 曰「表」,其實則 而曰「袗」,裘有 振讀爲袗,禪 絅,苦迥反,徐又音迥。 表裘 但 《釋文》: 袗絺、 締、 在 也。 孔 文 衣 綌 渾

褶,音牒。

纊

惡而 謂 之新綿 鄭氏 馮 則服 衣裳 皆行。」鄭 者以褶,則必有裳」,是也。 絅」,與袍、繭爲類,此絅衣之服於中服之 此絅之加於禮服之外者也。 者謂之禪、《詩》言「衣錦絅衣,裳錦絅 袍、《論語》「衣敝緼袍」,是也。 内者也。 雜記 喪大記》「君褶衣、褶衾」、《士喪禮》曰 雜記》子羔襲有「繭衣裳」、《左傳》楚遠子 「重繭衣裘」,是也。 續與緼,皆漬繭擘之,新 穎。」是絅者麻、葛之類。 舊者爲鰛。 日 而 》:「如三年之喪, 也。 無 「繭袍, 云: 衣之有表裏 裹。 緼,今之鑛及**舊** 「額,草名。 褶,有 衣有著之異名 衣以纊著之者謂之繭 表 衣以緼著之者謂之 而 裹 則既 無著者謂之褶 無葛之鄉,去麻 而 2絮也。 而美者 無 顡 此 絅 也。 襌 衣之無裏 著。」 了, 其 言「 與 以 絅,有 練、祥 顈 爲 纊、 「禪爲 絅 裳 同。 襚 爲 愚

服 此 於稍寒之時,故皆用帛,貴其煖也。 中 裹用帛可知。 之,故曰「帛爲 之,故曰「禪爲絅」。 衣,中衣之外,則有上服。 四者,春秋之褻衣也。四者之外,則 於温煦之候,故用絅,貴其輕涼也。 裘與絲、綌,冬夏之褻衣也 褶 褶既 褶,則表裹皆用 用帛 袍、繭、 則袍、繭 褶 常用爲 襌 衣 服 有 表

「朝服而朝,卒朔然後服之。」朝服之以編也,自季康子始也。孔子曰:

唯君

有

黼

裘以誓省,大裘非古也。

釋

文》

此上

蓋有脱文。

「省,依注作「獮」,息典反。」○今按:省,當讀爲社

以素。 凡在 引 卒視朔之事也。 夫 服,卒視朔之事 吅 、朝服之衣,而又不敢盡同也。 .惡於素,康子以此爲朝服,蓋僭天子大 此,以明 ·朝,君臣同服。 天子朝服皮弁服,衣 諸侯朝服玄冠緇衣。 朝服 以編之非 ,然後服 孔子言諸侯視朔用皮 朝 禮也 服 縞,色與素同 以 朝 卒朔,謂 記 者 弁

曰:「國家未道,則不充其服焉。」

道。 道。」 鄭氏 之時,則君不充其服,自貶損以足用 之時未平也。 此曰「未道」者、言非國政之失 曰:「謂若衛文公者。 愚謂: 蓋或承喪亂之後,或值凶 國政治曰有道 未道,未合於 國 政 丽 亂 所值 曰 札 無

《月令》孟冬始裘,獮在仲秋,未 也。 裘,天子祭天之服。 田 省。」此「誓省」亦當作「誓社」。 獮田之禮。」 則大裘而冕。黼裘,以羔與狐白雜爲黼文 鄭氏曰:「大裘,僭天子也。 郊特性》「君親 而誓衆也 省當作『獮』,秋田 誓衆尚嚴斷,故服 愚謂:《夏小正》季秋始裘 誓 社」, 謂之大裘者,尊其稱 也。 鄭注:「社 國君有黼 天子祀上帝 誓社,爲社 可服裘也。 黼裘。 一或作 裘誓

非 然羔裘自諸侯以下皆服之,而大裘則唯天 裘,蓋以祭服必玄,故據以推裘之所用耳。 裘 爲之與。 猶 子服以祀天,若大裘即羔裘,何以言「大裘 記者言諸侯唯得服黼裘以誓社,若服 可 八則非 古一乎? 考,今裘以玄狐爲最尊,大裘蓋 祭天之車謂之大路 古禮 時魯僭郊禮,故服大裘以祭天。 也。 〇先儒 也。 謂 大裘之所 大 裘爲黑 用 一玄狐 用 大 羔 不

鄭氏 服 天子狐白之上衣,皮弁服與? 之者,裘褻也。 裘色也。」 衣覆之,使可裼也。 ,内有狐白錦 曰:「君衣狐白毛之裘,則 孔氏曰:「天子視朝服 然 衣,諸侯在天子朝亦然。 則 袒而有衣 錦 衣復 有上衣 日 凡裼 裼。 以素錦 衣,象 说明矣。 必覆 皮弁 爲

凡在 不 而又辨其色,使略與外服相稱,故此篇詳 變易,若褻衣則絲、給用葛,禪用 則爲裼。 以掩中衣則爲襲,褶上服之衽 繭、褶用帛,皆無 有冕服、皮弁服、 有絲、給、春秋則有繭、袍、絅、褶,其外則 屬,皆中衣也。 裘』是也。其在國視朔,則素衣麑裘,卿大 裘以告廟、《秦詩》云『君子至止,錦 諸侯之士在天子之朝,當麛裘素裼也。 夫亦然。」 侯朝天子,受皮弁之賜,歸國則亦錦 衣,當用素衣。士不衣狐白,天子之士 大夫在天子之朝,亦狐白裘,其裼 ,先王制禮,因别其貴賤 朝,君臣 中衣之所用與其色,皆隨 愚謂:錦衣及下「玄綃衣」之 同服。 中衣之内,冬則有裘,夏則 異 朝服之屬。 物 天子卿大夫及諸 者也。 輕重而 舒上服之衽 唯裘之取材 丽 露 河綱,袍 禮 其 不用 服之, 衣 服 中 衣 侯 爲 諸 戸 衣 狐 狐 錦 卿

經義未晰。《曲禮》曰:「天子視不上於屬之即爲中衣,且又誤立裼衣之名,故於衣上有上衣」,皆是也。然不能明錦衣之言之。鄭氏謂「袒而有衣曰裼」,又謂「錦

而露見者,即爲中衣明矣。裘褻不露見,給。」給者,中衣之交領,則在外服之内,裼

袷。」又此篇云:「凡侍於君,視帶以

及

故服中衣於裘外,裼時則露見,此「衣裼」

錦衣者,皮弁服以素爲中衣,而以朱錦爲非衣名也。 狐白裘,人君皮弁服之裘也。

言「黼繡丹朱中衣」也。此不用黼繡丹朱之領緣也。以領緣名其衣,猶《郊特牲》之

領緣以表之。以人君中衣領用丹朱,故知中衣,而用錦衣者,以狐白裘華美,故異其

用二裘。其所用之異不可考,孔氏之所區之裘。士不衣狐白,則大夫以上皮弁服兼此錦亦朱錦也。狐白裘、麛裘,皆皮弁服

别,未知是否也。

君之右虎裘,厥左狼裘。

左,虎賁氏、旅賁氏之屬也。《虎賁氏》:鄭氏曰:「衛尊者宜武猛。」 愚謂:右、

裘、狼裘,象其威猛以衛君也。 執戈盾夾王車而趨,左八人,右八人。」虎

掌先後王而趨以卒伍。」《旅賁氏》:「掌

士不衣狐白。

鄭氏曰:「辟君也。狐之白者少,以少爲

貴也。

褎,絞衣以裼之。羔裘豹飾,緇衣以裼之。君子狐青裘豹褎,玄綃衣以裼之。麝裘青豻

豻,音岸,胡地野犬。絞,户交反。」

狐裘,黄衣以裼之。《釋文》:「綃,音消。

衣之裘。豻,胡犬也。絞,蒼黄之色也。染之以玄,與狐青裘相宜。狐青裘,蓋玄鄭氏曰:「君子,大夫、士也。綃,綺屬也,

端也。 裘。』 狐 孔 裘,不用狐青也。』劉氏云:『凡六冕皆黑 雜以豹褎。 弁無裘。』熊氏云:『六冕皆有裘。 畿外諸侯,鄭注此何得云 『君子,大夫、士 諸侯緇衣,畿外諸侯玄衣』? 裘。』唐、檜、魯非畿内之國,何得云『畿 此玄衣爲玄端,與皇氏同。 下冕皆不云「裘」,是皆用羔裘也。」劉氏以 羔裘,故《司服》云「祭昊天大裘而冕」,以 而云「大夫、士」者,君用純狐青,大夫、士 「玄」,謂六冕及爵弁也。天子、諸侯皆然, 云:『羔裘 子 青是畿外諸侯朝服之裘。 『羔裘豹袪,卿大夫之服。』《檜 曰 畿内諸侯用緇衣,畿外用玄衣。此 孔氏 素 逍遥。』《論語》云:『缁衣羔 内外諸侯朝服皆缁衣,以羔爲 衣 曰:「皇氏云:『玄衣,謂玄 麑 裘, 緇 衣羔 今按《詩》箋 凡六冕及爵 若此玄衣爲 裘, 黄 此云 衣 風》 内 狐

非也。 也? 居而 也。黄中衣不與上服同色者,以其用於燕 言「豹褎」也。狐裘,玄端服用於燕居之裘 言絞耳。』」 裘青豻裦,絞衣以裼之。]又引《論語》云: 《聘禮》『公裼降立』,注引《玉藻》云:『麛 異,劉氏之説非也。熊氏之説,踰於二家。 也。大夫、士朝玄端則服狐裘,夕深衣則 袂」,「狐貉之厚以居」。 豹飾,朝服、玄端服之裘也。 色白。麛裘青豻褎,皮弁服之裘也。羔裘 希冕、玄冕、爵弁服之裘也。 素,臣用絞。』皇氏云:『素衣爲正,記者亂 則裼衣或素或絞不定也。熊氏云:『君用 『素衣麑裘。』 皮弁時或素衣。如鄭此言, 略其制 六冕皆用大裘,是以小祭與昊天不 又祭服無裘,文 愚謂: 君子狐青裘豹褎,此 也。 《論語》曰「褻裘長,短右 無 褻裘,深衣之裘 所 出 豹飾,猶《詩 靡,鹿子,其 皇氏 之説

其流離之狀,魯人作歌於敗 黄。」晉士蔿言「狐裘蒙尨,一國三公」,以 服 獨 譏武仲。 指 本 冠以祭」,乃謂蜡祭時野夫之服,與此言 臘祭先祖之服」,誤矣。 夫、士之所常服也。 厞 ·黄衣」不同。 若如鄭氏之説,則黎人自賦 貉 無臘祭,説已見《月令》。 舉臘祭之服以爲言,果何義 獻公與二公子。 車 裘。 木 東。」《都人士》之詩 是狐裘者,自人君以下至於大 ○《旄丘》之詩曰: 魯人言「臧之狐裘」,以 鄭氏云「黄衣,大蜡時 《郊特牲》「黄衣 曰 : 北 狐 乎? 之餘 M 裘蒙茸, 淡裘黄 且 丽 黄 周 乃

錦 衣 狐 裘,諸侯之服 也。

鄭氏 素衣 也。 愚 謂: 裼之,不得用錦衣也 士不衣狐 日 錦 非 衣狐 諸侯則不用錦 淡裘,謂 白,大夫雖得衣狐白,但用 狐 白 衣 以 爲 錦 裼 衣 也。 裼 之

> 犬羊之裘不裼,不文飾 也不裼

飾。 鄭 雖裼,若非行禮之地,無事乎文飾者,亦不 略之也。不文飾也不裼者,大夫、士服裘 犬羊之裘,庶人之所服也。 氏 曰:「犬羊之裘質略,亦庶 **愚謂:此下三節,雜明裼、襲之義** 不裼者,賤 人 無文 而

裼 也,不裼則襲也。

裘之裼

也,見美也。

弔則襲,不盡

飾

也。

君

裼。 敢袒 鄭氏 弔、檀弓》『子游裼裘而弔」,是也。 襲,喪非所以見美。」 有二體: 子於父以質爲敬,故父母之所不 主人既小斂之後。若未斂之前,則裼 裼。 若平敵以下亦襲,以其質略故也。」 曰:「君子於事,以見美爲敬。 凡中衣之領緣,皆華於外服 臣於君以文爲敬,故於君 孔氏 日 襲,謂 凡敬 所 弔 則 裘 則

裼

削

愚

謂

在則裼,盡飾也。《釋文》:「見,賢遍反。」

以致飾也。弔主哀,故去飾。君在主敬,露其中衣之領緣,故謂之見美。見美,所

無事則裼,弗敢充也。 服之襲也,充美也。是故尸襲,執玉、龜襲。

故

飾

襲也。 裼。 鄭氏 玉、龜襲,重寶瑞也。 專屬於裘也。 其美,亦謂在 裼,謂行禮已致龜、玉之後則裼,不敢充覆 尋常所執及卜則襲,敬其神靈也。 龜、玉也。」 變言「服之襲_ 聘禮》執圭璋致聘則襲,若執璧琮行享則 事則襲。」 此『執玉』或容非聘享,尋常執玉則亦 曰:「充,覆也。 龜是享禮庭實之物,執之亦裼,若 孔氏曰:「凡執玉得襲,故 君前故裼也。 」者,以 充者,足乎内而無待於外之 愚謂: 上文言「裘之裼」,此 明裼、襲四時皆有,不 無事則裼, 尸 襲,尸 若不在君所, 尊 無事 謂已 也。 致 則 執

> 意。 當襲之義也。 之重器而敬存於中,而無待於見美也 當見美也。尸襲,執玉、龜襲,一則以 不必見美也。 足見美也。 非一端。犬羊之裘不裼 有爲爲之也。 其禮之輕則見不裼之義,據其禮之重則見 即不裼,而記或言「不裼」,或言「襲」者,據 鬼神之尊嚴而德充於内,一則以 裼以見美,凡以致敬而已,而 不文飾也不裼,以其事之 弔則襲,以其主於哀戚 凡行禮以裼爲常,其襲者皆 ,以其人之賤 其 襲 執 其 而 輕 則 國 丽 象 襲 家 不 不 義 而

禮記卷二十九終

夫以

魚

須文竹者,庾氏云:『以鮫

魚須飾

國 賜 史館纂脩 進士及第翰林院編脩 孫希旦 集解

玉藻第十三之二

之制。

笏,天子以球玉,諸 竹之邊。』須,音班。」〇按「須」字,孔疏讀如字。 文竹,崔云:「用文竹及魚班也。」《隱義》云:「以魚須飾文 竹,士竹。 本,象可也。《釋文》:「球,音求。 侯以象,大夫以 魚 須文 魚須

孔 璞等並云:『璆、琳,美玉。』球與璆同。 士飾竹以爲笏,不敢與君並用純物 鄭氏曰:「球,美玉也。文猶飾也。大夫、 氏 :墟之璆、琳、琅玕焉。] 李巡、孫炎、郭 曰:「按《釋地》云:『西北之美者,有 也。」 大

> 竹以成文。二 前云「史進象笏」,通謂大夫、士之禮也。 不飾,而 士並以竹爲笏,大夫以魚須飾其側,士則 ○自此以下至「其殺六分而去一」,明笏 其本則大夫、士並 愚謂:象,象牙也。 可用象也。 大夫、

也。 反。説,本亦作『税』,同他活反。免,音問。」 盥,雖有執於朝,弗有盥矣。《釋文》:「見,賢 見於天子與射,無説笏。人大廟説笏,非古 小功不説笏,當事免則説之。 既搢必

帶,不執不搢,是謂説笏。 笏,謂去於身也。 笏也。 搢笏必盥,爲必執事。」 鄭氏曰:「言凡吉事無所説笏也。大廟之 不在於記事也。 中,唯君當事説笏也。 小功輕,不當事,可以 搢 笏或執於手,或搢 免,悲哀哭踊之時 天子尊極,射禮 愚謂 ··· 説 於

八五七

禮記卷三十

既搢 既 必 之事而免,則説之,亦爲其妨於辟踊故也。 鄭氏謂「大廟之中,君當事則説笏」,非也。 之無時而離也。 文繁,大廟之中嚴敬,舉三事不說,以 有失墜也,小功輕喪,故不説笏。 喪事則説笏,哀不在於記事,且爲辟踊之 圭,執鎮圭以朝日」,是天子主祭亦 盤也。 盤,自後雖在朝執笏,可以不復盥也。 必 雖主祭者亦然。 盤 雖有執於朝,弗有盥矣者,搢笏 |者,言臣將朝君 當廟中有事,則層 \Rightarrow 典瑞》「王 ,搢笏而往,則 當殯斂 滑笏。 搢 之而 見笏 大

去

一。《釋文》:「殺,色戒反,下同。

去,起吕反。」

報反,舊七刀反。」 書於笏。 凡有指畫於君 也。 忽也,其字從竹。蓋本以竹爲之,如簡札 造,進也。 畢,盡 笏畢用也,因飾焉。《釋文》:「造,皇七 也,謂 謂 前 人臣 ,用笏。 指畫記事盡 在朝,進 造受命於君前,則 而 用笏也。 受命於君前

别焉。又别用象玉爲之,復殊其稱,以爲尊卑之不别用象玉爲之,復殊其觀,而天子、諸侯亦文,乃飾以他物以美其觀,而天子、諸侯之用,執之以便記事,備忽忘而已。後王

笏度二尺有六寸,其中博三寸,其殺六分而

鄭氏曰:「殺猶杼也。天子杼上終葵首, 对半。」 孔氏曰:「天子、諸侯上首廣二寸半,其天子惟頭不殺也。大夫、士下首 又廣二寸半,唯中央同博三寸。」 周氏諝 写:「《考工記》曰:「天子、諸侯上首廣二 才明自照。」此言『笏度二尺有六寸』,蓋 於者工記》,雖一央同博三寸。」 周氏諝 以而言之。天子服之。《相玉書》曰:『珽玉六 时,明自照。』此言『笏度二尺有六寸』,蓋 是二尺有六寸』,蓋 以而言之。天子無所屈,則杼上終奏首,

有五分。」 皆博三寸,其殺皆六分去一,而止於二寸 又杼其下圜其末。三等之笏雖殊,而其中 大夫前屈、後屈,則不特杼其上圜其首,而 葵首。諸侯前屈,則杼上四寸而圜其首。

鞸,君朱,大夫素,士爵韋。《釋文》:「轉,音必。」 裳也。 後。 卑之别焉。 前,以示不忘古之意,而因備其飾,以 韠,蔽膝也。 君與大夫、士無別,何得云『大夫素,士爵 玄衣纁裳。 玄端朱裳、大夫素裳、唯士玄裳、黄裳、雜 凡轉,以韋爲之,必象裳色,則天子、諸侯 鄭氏曰:「此玄端服之鞸。 後世聖人易之以布帛,而 且祭服名韍,不名鞸也。」 愚謂 皮弁服皆素鞸。」 凡衣服之色,衣從冠 知此朱韠非祭服者,若祭服 上古衣皮,先知蔽前 孔氏曰:「祭服 韠之言蔽也。 猶 韓、 後 存 (爲尊 屨從 其 知 蔽 則 蔽

> 之制。 鞸。 《特牲》記:「玄端爵韠。」是士齊、祭服 素,燕居之韠也。 齊服必玄,上下通 裳,各因其上下之類 則與朝服同,但朝服侈袂,自别於玄端耳。 燕居,諸侯以 ○自此以下至「三命赤韍葱衡」,明韠韍 此燕居玄端亦爵鞸者,士賤,禮略也。 下又用以 大夫玄端、素裳、素鞸, 用 也。 齊,士又用 玄端服上下通以 此君朱,大夫 以祭。 爵

卧反。」後挫角,士前後正。《釋文》:「團,音圓。挫,作復挫角,士前後正。《釋文》:「團,音圓。挫,作圜、殺、直:天子直,公侯前後方,大夫前方

後。士前後正,士賤,與君同,不嫌也。其上角,變於君也。韠以下爲前,以上爲天子也。所殺者,去上下各五寸。大夫圜克,無圜、殺。公侯殺四角,使之方,變於鄭氏曰:「圜、殺、直,目韠制。天子四角

尺,上廣一尺,下廣二尺。天子之轉,自上 其上端不方,剡其兩角,故圜。 之左右角、斜裁至下之左右角、直而無所 之士則方。」 别,無所據也。 爲是。鄭氏以直、方爲天子、諸侯之士之 裁方、上端不剡圜,前方而後直,故曰『前 裁,故方。大夫下之左右角亦正裁五寸, 左右角不盡五寸止。上下各有五寸不斜 屈,故曰『直』。諸侯上下、左右角各正裁 記》云『韠會去上五寸』,是上去五寸。又 方」,是殺四 後正』。」 五寸,自上之左右角五寸,下斜裁至下之 正,直、方之間語也。 云『紕以爵韋六寸,不至下五寸』,是去下 處,以物補飾之使方,變於天子也。按《雜 愚謂:「士前後正」,吴氏之説 角也。上下各去五寸,所去之 吴氏澄曰:「韠之制 〇孔氏曰:「經云『前 天子之士則直,諸 士下端亦 長三 後 侯

> 又云: 矣。疏乃謂「上去五寸是領,下去五寸是 下各五寸」,謂所殺之度離上畔下畔各五 純」,其説尤混,不可曉也 以爵韋,純以素,則爲韠之通制,非獨公侯 經注之義皆不合。且鄭注此文,本以 物補之」,則以注中「去」字爲上聲讀之,與 寸而止也。孔疏乃云「上下各去五寸,以 所殺當以此爲度。 會去上五寸,其紕不至下五寸,則其上下 處别異之,使殊於餘邊也。」 愚謂:鞸之 去上畔下畔,而云『殺四角』者,蓋四角之 五 「公侯前後方」之義,若韠之上有會,下紕 五寸是領也,下去五寸是純也。 寸。 鄭注《 『純、紕之所不至五寸。』然則上去 雜 記 故鄭氏云「所殺者 *****: 一會 謂 上 領縫 若然,唯 去上 也。 解

肩,革帶,博二寸。《釋文》:「頸,吉井反,又吉鞞下廣二尺,上廣一尺,長三尺,其頸五寸,

繫韠、佩故也。」 於革帶者,以大帶用紐約,其物細小,不堪 凡佩,繫於革帶。」 鄭氏曰:「頸五寸,亦謂廣也。 兩角,皆上接革帶以繫之,肩與革帶 孔氏曰:「韠、佩並 頸中央,肩

廣同

繋

幼糾反。」 衡。《釋文》: 命緼韍幽 衡,再命赤韍幽 「緼,音温。 **敬**,音弗。 衡,三命赤 幽,讀爲黝,出注, 韍 葱

命數爲差也。

衡 韍,色又淺耳。」 黝。 色,所謂韎也。 其名耳。 鄭氏曰:「此玄冕爵弁服之轉,尊祭服,異 子純朱,諸侯黄朱。』 黄朱色淺,卿大夫赤 他服稱轉、祭服稱載。 ,佩上之珩也。 黑謂之黝,青謂之葱。」 載之 言亦蔽 衡,佩玉之衡 珩在上 愚謂: 也。 《詩》毛傳云:『天 **緼載,即靺韐也。** 而横,故曰「衡」。 緼,赤黄之間 也。 孔 幽讀 氏 曰: 爲

> 韍」,非也。 赤韍葱衡,大夫一命而赤韍幽衡,士 此據公、侯、伯之國卿三命,大夫再 差降但以 而緼韍幽衡也。 命者言之。若子、男之國,則卿 爵而不以命數,則其於韍必不以 《司服》於諸侯卿大夫之服,其 孔疏謂「子男大夫服 再 命,士 示 命 緼 命 而

下節「并紐約用組」五字,舊在「韠,君朱」之前。 反,徐又音卑,下『緇辟』同。率,音律。」○「而素帶」以下及 弟子缟帶。《釋文》:「帶,音戴。 天子素帶,朱裏,終辟。而素帶,終辟。 素帶,辟垂。 ·諸侯』字。」 宜承「朱裹終辟」,亂脱在是。」南滙陳氏云:「「而」下脱 士練帶,率,下辟。 辟,依注爲「裨」,婢支 居士 鄭氏云: 錦 大夫

爲之,如今衣帶爲之,下天子也。大夫亦 素帶,終辟,謂諸侯也。 鄭氏曰:素帶、朱裹、終辟、謂大帶也。 諸侯不朱裹,合素 而

八六一

裨。 如之。 率,義如《左傳》「藻率、鞞、琫」之率,以采 藝處士也。」 積,如今作幧頭爲之也。 緇,大夫以上無文。居士錦帶,尚文也 則帶之率及其重屈者而止也。 率下,謂率之所不至者。 夫裨其紐及末,士裨其末而 帶終辟」以下皆當移就「朱裹終辟」之下, 帶之制,舊本簡策倒錯,不相承接。孔氏 之度與士同也。 弟子缟帶,尚質也。 而但裨其率下也。大夫辟垂,士辟率下, 五采,士二采。]辟在帶側,則率在帶中也。 色飾物也。 已依鄭注次其先後,但據鄭注則自「而素 裨,謂以繒 率, 繂 《雜記》曰:「率帶,諸侯大夫 也 「采飾其側。人君充之,大 ○自此至「走則擁之」,明 愚謂:練,白色熟絹 士以 二帶不言其裨者,裨 下 辟讀如『裨冕』之 士以練帛爲帶, 皆禪 已。居士,道 ,不合而 士帶裨以 也。 繂

而居「轉」之後。而孔疏則自「凡帶有率,而居「轉」之後。而孔疏則自「凡帶有率,亦依鄭氏説移正。

秋」之下,鄭氏云:「宜承「約用組」。」
 鄭注云:「結或爲「衿」。」○自「三寸」以下,舊在「夫人揄政反。紐,女九反。組,音祖。紳,音申,本亦作「申」。」○下,紳居二焉。」紳、鞸、結三齊。《釋文》:「弟,必三尺,有司二尺有五寸。子游曰:「參分帶三尺,有司二尺有五寸。子游曰:「參分帶并紐約用組,三寸,長齊于帶。紳長制:士

謂 也 也 約 用組爲之、組濶三寸也。 日 四 三者俱長三尺,故云『三齊』。』 陳氏祥道 尺五寸與。」 :「紳、舞、結三齊,則有司之韠、結蓋亦 紐組 天子以下,至弟子之等,其紐約之物,並 尺五寸,分爲三分,紳居二分,紳長三尺 紳謂紳帶,鞸謂蔽膝,結謂約紐餘組, 重屈而舒申。 餘長三尺,與帶垂者齊也。 人長八尺,大帶之下 長齊于帶者 紳,重

寸」之下,鄭氏云:「宜承「紳、韠、結三齊」。」《釋文》:「繚,音了。箴,音針。」〇此節舊在「肩革帶博二緇辟二寸,再繚四寸。凡帶有率,無箴功。大夫大帶四寸。雜帶,君朱緑,大夫玄華,士二月三、貞。」

言「雜帶」,故言「大帶」以别之也。雜帶,文但言「帶」,此特言「大帶」者,以下文又帶四寸,則天子、諸侯可知皆四寸也。上鄭氏曰:「華,黄色也。」 愚謂:大夫大

帶」,以其辟名帶也。 帛辟其側,故《士冠禮》、《士喪禮》謂之「緇 雜帶降於大帶也。 明矣。君、大夫大帶五采,而雜帶唯二采, 大帶於上」,則人君大帶之外別有朱緑帶 者宜精緻矣。 以麤沽,以别有采飾在上故也, 天子以下之帶也。 大帶四寸,其繞於身也重之。 士帶二寸, 大帶,其博二寸也。 夫以玄華也。《雜記》公襲「朱緑帶, 大帶之外,别有雜帶,其飾則君 雜服之帶,燕居之服之所 而再繞不重,則其 廣亦四寸矣。凡帶,凡 緇辟,謂士之練帶以緇 凡帶有率,則其箴 繚,繞也。 士無雜帶,唯有緇 用 也。 以 ·則其· 大夫以上 朱緑,大 君、大夫 申加 無率 功可

氏云:宜承「無箴功」。」
文》:「肆,音肆,以四反。」〇此節舊在「皆朱錦也」之下,鄭肆東及帶,勤者有事則收之,走則擁之。《釋

紐之餘 充勤 氏 鄭 收之擁之,而不可扱之也。 擁抱於懷也。」 愚謂:此見雖有事,但當 日 氏 勞之事 曰 組 謂 「肆 也。 約 `,則斂持在手,若身須趨走,則 讀爲肄。 帶之餘 勤 ,謂執勞辱之事也。」 組 肄,餘 及帶之垂者,若身 也。 餘束,約 孔

音暈,許韋反。揄,音摇,羊消反。屈,音闕。」王后褘衣,夫人揄狄,君命屈狄。《釋文》:「褘,

鄭氏 雉名 服 繒爲 衣。 亦侯 氏 天子、諸侯命其臣,后、夫人亦命其妻以衣 以爲名也,後世作字異耳。夫人,三夫人, 日 也。 翟,不畫也。 伯之夫人也。 日: 君,女君也。 謂『夫尊於朝,妻榮於室』也。」 「翬,謂畫翬於衣,六服之最尊 刻繒而畫之,著於衣以爲飾,因 禕讀 爲翬,揄讀爲摇,翬、摇 屈,《周禮》作『闕』,謂刻 此子男之夫人也。禮, 王者之後,夫人亦 孔 禕 皆

摇者。 鞠衣色如鞠塵,服之以桑。 展衣,以 **暈**。江、淮 也。 赤 王 於衣以爲文章。 摇。』王后之服 鳥》:『伊、雒 副 周公,其夫人亦褘衣,故《明堂位》云『夫人 翟 云『闕翟』。 后也。屈,闕也。 夫人副禕」,若祭先君則降焉。 先王,夫人亦褘衣,《禮記》每云『君衮冕, 夫 ,摇翟青,褘衣玄,鞠衣黄,展衣白 及賓客之服。 入,謂 **禕立于房中**』。 ,摇翟,謂畫 被后所命,故曰『君命』,或可女君謂 闕翟,刻而不畫。 三夫人及侯伯夫人也。 而南,青質 按鄭注《内司服》引《爾雅 而南,素質五色皆備成 ,刻繒爲之形,而采畫之,綴 |摇翟於衣。 緣衣,御於王之服 緯衣,畫翬者。 直刻雉形 君,謂 五色皆備 此三者皆祭服。 女君,子男之妻 王者之後,祭其 ,闕其采畫 魯祭文王 **揄翟**,畫 成 狄 /禮見 章 章 闕 讀 釋 曰 曰 如

冕,而 事。 黑,其六服皆以素紗爲裏,故《内司服》陳 服,鞠衣、展衣、褖衣。」是王之外内命婦 之夫人也。《内司服》:「辨外内命婦 尊於朝,則妻榮於室,無别受爵命之法。 命婦則又欲其與内命婦相準,故孤、卿 並后之端,故於其服章使遠降於后,而 服三狄者矣。原其意,蓋於内命婦深 制,以白縳爲裏。」」 六服之下云 《素沙》,鄭注云: 《六服皆 贊王后爵命之事,是王后 命」,字之誤也。 夫人闕狄」,恐皆未然也。 君命,當作「五 《内宰職》所言贊王后之禮事者詳矣,而 「夫人」兼言「三夫人」、《周禮注》又謂「三 其 注疏謂 其妻不服三狄,以此與。 ,則夫人及再命、一命之妻,孰非受 君命爲受王 婦人從其夫之爵位,故夫 愚謂:夫人,謂 后之命,非也。 亦無爵 鄭此 命人之 注 侯伯 防 且 之 無 於 服 外 其 無 袍

下至「其他則皆從男子」,明王后、夫人及命者,何獨於子男之妻言之? 〇自此以

命婦之服。

鄭注:「褖,或作「稅」。」

注音鞠,居六反,又曲六反。

檀,張戰反。緣,吐亂反。]〇

再命褘衣,一命檀衣,士褖衣。《釋文》:「禕,依

之。」孔氏 皆分爲三等,其妻以次受此服也。 鄭注《士喪禮》: 子、男之臣,卿爲上,大夫次之,士次 臣,孤爲上,卿大夫次之,士次之。侯、伯、 鄭氏曰:「禕當爲『鞠』。子男之卿再命而 褖衣者,子男之士不命,其 展也,子男大夫一命,其妻服展衣也。 禕當爲『鞠』,謂子男卿妻服鞠 妻鞠衣,則鞠衣、襢衣、褖衣者,諸侯 愚謂:諸侯之臣之服爲三等: 曰:「再命,謂子男之卿也 『褖之言緣,黑衣裳以赤 妻服 衣也。 緣衣也。 公之 之臣

言也。 展衣」,非專爲無孤之國言也。 大夫之服,自玄冕以下」,非專爲有孤之國 孤之國,卿希冕,大夫玄冕。 子,謂有孤之國,孤希冕,卿大夫玄冕, 卿 國,孤鞠衣,卿大夫皆展衣,無孤之國,則 衣,士皆禒衣也。 孤 妻之服亦爲三等: 希 鞠衣,大夫展衣。 冕,卿大夫皆玄冕,士皆爵 《雜記》復,「内子以鞠衣,下大夫以 如鄭氏之説,則有孤之 孤卿皆鞠衣,大夫皆 孔氏 又通其 然《司服》「卿 弁也。 (例於男 無 展 其

承1夫人揄狄1。」 屈狄」以下至此,舊在「紳、轉、結三齊」之下,鄭氏云:「宜屈狄」以下至此,舊在「紳、轉、結三齊」之下,鄭氏云:「宜唯世婦命於奠繭,其他則皆從男子。自「君命

也。世婦之尊視大夫,服展衣。凡夫尊於婦之吉者使蠶,既成則從夫人而獻之於君也。諸侯有公桑蠶室,卜於三宫夫人、世世婦,謂諸侯之内世婦也。奠繭,猶獻繭

之乃得服其服,明君不以私寵加賜也。天服其服,唯世婦乃諸侯之妾,必因奠繭命朝,妻榮於室,故卿大夫之妻皆得隨夫而

子之内命婦蓋

亦如此

音咨,本又作「齎」。鄉,許亮反。」而聽上,視帶以及給,聽鄉任左。《釋文》:「齊,凡侍於君,紳垂,足如履齊,頤霤,垂拱,視下

袷。 也。 使也。」」 者,視高則敖,故下矚也。 俯,故頭臨前,垂頭 也。 以及給者,視君之法,下不過帶,高 語 前下緝委地,足如 鄭氏曰:「紳垂,則 宜諦聽 庾云:『聽上及聽嚮任 身直則帶倚,磐折則帶 袷,交領也。」 ,故仰頭 愚謂:此侍立於君之禮也。 而繒上 履之也。 如屋霤。 磬折也。 孔氏曰:「紳,大帶 以聽之也。 聽上,謂: 垂。 雷 左,皆備君 視下 齊,裳 屋簷 身折則 而 聽尊者 視帶 不 聽 下 教 過 君 Ŀ 身 裳 緝

解「聽 也。 乎君也。 頤霤,垂拱」,則侍君者固 以 尊右』,則坐者尊左。侍君之時,君坐,是 左耳 者,坐則節於面,立則節於領,立則容俯 者,視以 佩 左,義無 倚 聽嚮皆以左爲節。」此 克 臣 目明,任左,欲其聽之審也。 聽鄉者,聽之所鄉也。 響任左」云"「鄭注《少儀》云"立者 所出。 佩 國 聽 垂,君恒高於臣。 君綏視,此云「視帶 以 且經云「紳 神,視雖在 謬 人右耳目不 未嘗坐。又云 垂,足如履齊, 説 下 視下而 也。 丽 神 以 坐者尊 〇孔 則 及 聽 恒 袷 如 氏 故 上 屬

不俟屢、在外不俟車。凡君召以三節,二節以走,一節以趨。在官

説乎?

坐而

臣

立

侍之,則安以「坐者尊

左」爲

視帶

以

及給」,「視下

·而聽

上」,則亦非

君

此言人臣被召之法。 鄭氏曰:「節,所

趨。 餘未聞 也。 以 官府 緩 外遠,故言『車』。」 君召臣有二節 廷治事處也。」 車,趨君命也。 明信 則 官,謂朝廷治事處 持 也。 急則二節,臣故 輔君 也。 ___ 在官近,不須車,故言『屨』。 《周禮》曰:『鎮 命也。 今漢使者擁節。 诗,有 必有執授之者。官,謂 孔氏曰:「節,以玉爲之。 使使召 走, 一節時,故合云『三』 也。 緩則 臣,急則持二, 圭以徵守。」其 外,謂其室 不俟屨,不俟 一節,臣 故 及 朝

一拜,進面,答之拜則走。 士於大夫,不敢拜迎而拜送。 士於尊者,先

貴賤 則先 不 於門外也。 士於大夫,謂於大夫之見己也。 敢 迎 拜 不敵,主人敬客則先拜客,客敬主人 主 而 拜 人。J然則士於大夫非 《曲禮》曰:「大夫、士相見,雖 耳。 蓋 拜 迎者,敵者之禮 :不拜也 迎,謂 迎

先拜之,乃進入門而見大夫也。答之拜則 者,大夫於士不迎,待之於門内,士於門 以見,辭不得命,請走見。● 者請見之、則辭、辭不得命、則曰:『某 大夫之拜也。 走者,若大夫於門內答拜,則走辟不敢當 拜辱矣。 其贄,於其人也,一拜其辱也。」則大夫先 迎於門外矣。 始相見,則《士相 於尊者、謂士見於大夫也。 此皆謂尋常相見之法。 又曰:「士見於大夫,終辭 見禮》云: 「若先生異 先見之。二則 先拜, 進 若 無 爵 外 面

與大夫言,名士,字大夫。「言」字並句絶。孔疏讀士於君所言,大夫没矣則稱謚若字,名士。

云「士於君所言大夫」,非是。

大夫五十而受爵命,死乃有謚。名士,字稱謚若字者,有謚則稱謚,無謚則稱字也。鄭氏曰:「君所,大夫存亦名。」 愚謂:

大夫,謂其生者也。若没則所稱與君

所同。

不諱,教學臨文不諱。

於大夫所,有公諱,無私諱。

凡祭不

·諱,廟·

中

下。 鄭氏曰:「公諱、若言語 謂 則不諱父也。 諱父母也。 君之名者也。 凡祭不諱,廟中不諱,謂祝嘏之辭 正 師長也。 曰:「有公諱,無私 也。」 簡 教學臨文不諱,爲惑未知者。」 牒 及 教 讀 廟中上不諱下,若有事於祖 人若諱,疑誤 法律之事,若 凡祭,祭群神。 有事於父則諱 諱,但諱 所辟 後 諱 公君,不得私 祖 生 廟中上 先君之名。 也 則 教學,謂 失 中有先 臨 於事 孔 **示**諱 氏

古之君子必佩玉、右徵、角、左宫、羽、趨以

辟之心無自入也。《釋文》:「徵,張里反。趨,七 作「旋」。辟,本亦作「僻」,匹亦反,又婢亦反,徐芳益反。」 反,本又作「趣」。齊,依注作「薺」,疾私反。 進則揖之,退則揚之,然後 、采齊》,行 鸞在 以勞。 門内至堂謂之行,行時歌《肆夏》爲節 至應門謂之趨,趨時歌《采齊》爲節。 以《采齊》,路門外之樂節也。 玉聲所中也。 鄭氏曰:「君子,士以上。 折還,曲行也,宜方。 夏》,登堂之樂節。 車則聞鸞、和之聲,行則鳴 齊,當爲《楚薺》之薺。 揚之,謂 衡,和在式。」 宫、羽在左、君也、物也、宜逸。 |以《肆| 徵、角在右,事也,民也,可 小仰見於後 夏》,周 周還,反行也,宜圜 揖之,謂 孔氏曰:「路寢門外 還 中 玉 徵、角、宫、羽, 也。 -規,折 鏘 佩玉,是以 鳴 小俯見於前 還,音旋,本或 鏘,聲貌 門外謂之 也。 行以《 還 中 路寢 故 矩 趨 肆 非 君 按 須 也。 而行 也 爾雅

趨。

也。

子在

門亦如之。 廷。然則王出,既服,至堂而《肆夏》作,出 中姑洗也。宫,謂聲中黄鐘,羽則 路門而《采薺》作。其反,入至於應門、路 之,門内謂之行,門外謂之趨。 之行,堂下謂之步,門外謂之趨,中庭 令從北嚮南,或從南嚮北。 五鐘皆應。」』是也。反行,謂到 之鐘,右五鐘 之前。《尚書傳》曰:「天子將出,撞黄 之事,登車於大寢西階之前,反降於阼 師》云:『行,謂於大寢之中。 走,大路謂之奔。] 此對文耳。 徵,陰音之首,故居右,角間二律,與 ,假令從北嚮南,行曲折 • 吴氏澄曰: 釋宮》云: 此謂步 皆應。 「黴,謂聲 『室中謂之時,堂 迎賓客。 人則撞蕤賓之鐘,左 曲 中林鍾 而 王如 趨,謂於朝 若總 行,謂屈 東嚮 反而行,假 鄭注《樂 中 有車 , 角 西西 ·南吕 謂 丽 上 鍾 階 曲 則 出 之 謂

(七)

蓋謂 疏: 也。 左,羽間二律,與宮近,故以羽配宫。」 故 焉 所 君子之養其心,非徒恃乎鸞、和、佩玉,而 折 義 商,蓋佩玉所以養德,故亦無取乎殺伐之 意,故不用。 爲宫」之屬,皆不用 但其詳不可考耳。《周禮・大司樂》「函鍾 玉四聲,亦必其大小、長短、厚薄之不同, 也。 佩 以 俯 徵、角、宫、羽,謂 「樂云:『磬前長三律,後長二律。』」 黄鐘之磬。 凡以律均鍾者,倍而 消 玉 仰,故佩 故 一則備 其 中矩言其方,中規言其圜。 此節所言 以 匪 角 四聲,行步則有樂節,在車則 僻,而導其和平者,此亦有 此佩玉有徵、角、宫、 記徵。 玉之璜觸衝牙而鳴鏘然也。 此以 ,蓋主謂天子、諸侯之禮 商,説者謂 左右 宫, 律均磐之法也。 陽音之始, 又半。 兩璜之聲所中 商有殺伐之 《磬氏》 羽 其身周 故 而 佩 無 愚 居 助

也。 辭,朱子以爲笙《詩》蓋如《投壺》「魯鼓 有 之詩也。《左傳》宋公「賦《新宫》」,則《新 世子》云「下管《象》」、《象》、《周頌・維清 物則當有降殺矣。 宫》亦詩也。 必詩篇也。 名之者也。 詩乎?《南陔》《白華》等名,必取詩 六詩用以笙者一也。《新宮》《象》爲詩,則 曰「笙」曰「樂」而不曰「歌」,以此決其 曰《白華》、曰《華黍》者,何所取以名之? |薛鼓」之節。蓋以《九夏》、笙《詩》曰「奏_ 儀禮》之笙《詩》,劉原 肆夏》與《采薺》同用,觀《采薺》之名,亦 南陔》六篇之曰「笙」曰「樂」者,何害其 和、鸞。 然《大射》、《燕禮》「管《新宫》」,《文王 若大夫、 若但如曲譜,則其曰《南陔》、 則《肆夏》亦詩,而《王夏》以下 此二詩用以管,與《南陔》等 士 ○《周禮》之《九夏》, 雖有佩 父謂皆有聲 玉,而 辭而 無 其 而 爲 無 儀

皆當爲詩矣。 但先儒謂《肆夏》即 《周 頌》

之《時邁》,則未有以見其必然耳。

則 君在不佩玉,左結佩,右設佩。 居則設佩,朝 結

佩

鳴也。 時也。 設佩 者,示其德之不敢擬於君也。 此謂大夫、士之禮也。 同 而 佩爲事佩。 鄭氏以此爲世子之禮,又以左結佩、右設 左右皆設之也。 而設其右焉耳。 ·,鄭於彼注云「臣在君所」,此不當爲異 及之? 忽爲事佩 又上下文俱言「佩玉」,亦不應結佩、 君在 結佩,謂結其兩璜於綬,而 君在不佩玉,正與「君在則裼」 然上文並未言「世子」,此何忽 不佩玉,非 也 朝則結佩、結其左也。 君子於玉比德,結其左 全不 君在,謂君出視朝 佩 居則佩玉, 也,結其 使 一 得 左

齊則 綪 結 佩 而 爵 韠。 釋文》: 「齊,側皆反。 績,側

記卷三十

縈收繩 齊服 而已。 也。 即齊者不樂之義也。 佩玉有聲,齊者欲静以致思,故綪結其佩 與琚而結之,又屈 襲事於房中,不綪」,鄭云: 用朱轉、素轉也。」 齊,而以爵韋爲鞸,同士禮。 綬而又屈上之也。 鄭氏曰:「綪,屈也,結又屈之。 君子無故玉不去身」也 君在不佩玉,爲時暫,以兩璜上結之 玄端。」 齊有十日 索爲綪。」是綪者,屈而又屈之義 孔氏 ,則以璜及衝牙屈 而上當珩而結之也。 諸侯以 曰:「綪 愚謂: 不去而但綪結之者 「江、沔之間 《士喪禮》「陳 下,皆以 結佩 以其齊,故不 爵鞸者 謂 上 玄端 結其 當 蓋 瑀 謂

凡帶必有佩玉,唯喪否。 無故玉不去身,君子於玉比 佩玉有衝牙。 德馬

鄭 氏 曰:「喪主於哀,去飾也。 凡,謂

半,貫 也。 以 璜。 上横 瑀,而下 曰 曰 [衝牙。 · · · · 至 也。」 É 故,謂喪與災眚。」 士。 又以 一大珠日 其末各縣一 珩,下繫三組,貫以 繋於兩 兩旁組半,各縣一玉,長 佩 兩 組 玉有衝牙, 貫 . 瑀。 璜,行 珠,上繋珩 玉,如半璧 末縣 則 居 衝 朱子曰 中 一玉,兩端皆鋭 (蠙珠。 了牙觸 兩端,交貫 · 央 以 加 前 璜 中組 博 内 後 向 而 丽 之 於 玉 觸 有 曰 方

音温。」 受。純讀爲緇,側其反。瑜,羊朱反。 反,徐又作「瑌」,同。 綦組綬,士 綬,大夫佩水蒼玉 天子佩白玉而玄組綬,公侯佩 佩瓀玟 玟,武巾反,字又作『砹』,同 而純組綬,世子佩 而 緼 組綬。《釋文》:「綬,音 綦,音其。 山玄玉而朱組 瑜 瓀,而 玉 緼, 而 兖

似也。綬者,所以貫佩玉,相承受者也。鄭氏曰:「玉有山玄水蒼者,視其文色所

文雜色也。 謂: 也。 水蒼,玉色似山之玄而雜有文,似水之蒼 純當爲『緇』,古文緇字或作絲旁才。 衝牙之玉也。其在上之珩,則前云「一命 諸侯世子 不定也。 雜,而世子及士唯論玉質,不明玉色,則 而雜有文。 再命幽衡,三命葱衡」,是也。 佩白玉、玄玉之屬,皆謂 瓀玟,石次玉者,賤,故士佩之。」 瑜是玉之美者,故世子佩之。 雖佩瑜 尊者玉色純,公侯以下玉色漸 緼,赤黄。」 玉,亦應降殺天子世 孔氏曰:「山 兩 瑀、兩璜及 玄 然 子 色 愚

孔子佩象環五寸而綦組綬。

若 象環,以象牙爲環也。《爾雅》曰: 有文理者也。 燕居佩之,非禮服之正 孔子佩象環 謂之環。」 · 謙 環,取可循環而無窮。」 陳氏 不比德,亦不 澔 衏 曰:「象環五寸, 也。」〇鄭氏曰: 事 也。 「肉好 孔

> 之錦、皆朱錦也、取其華美也。 其帶紳也。 緇組,今童子用錦爲束髮。 六尺。」總之色宜與纚同。是成人束髮用 喪禮》:「鬠用組。」又《士冠禮 紐之所用 紐,帶之紐也。 之,而辟其 與辟 紳以錦,與士之率下辟同 弟子縞帶,則童子之帶以縞爲 同也。 童子錦紳而 束髮,謂 凡此童子所用 錦 紐 總 緇 也。 ,則凡帶 纙 也。 長

人。《釋文》:「約,其俱反。見,賢徧反。」無事則立主人之北,南面。見先生,從人而重子不裘不帛,不屨約,無緦服,聽事不麻。

傷壯 也。 冬不衣裘,其袍繭及褶,又皆以 鄭氏曰:「皆爲幼少不備禮也。 用帛,亦爲防其奢汰也。 行孝弟,情不能至緦也 凡服必稱其情,童子無緦 氣也。 約,屨 頭飾 也。」 不屨 當 愚謂: 童子 服,以 室 約,不備 布爲之,不 則總,既 裘帛温 未 能

與族 斂 役使也。不麻,不加麻絰也。 教使便也。南面者,别於主人也。見先生 主人之位,在阼階下西面,立於其北者,爲 從人而入,不敢輕動長者也。○《問喪》: 人相 ,而使之企而及也。 加麻、聽事不麻、亦謂所爲服緦者也。 接, 則 使遂其服,責之以 聽事,往給喪 有服者至小 必 當 家 盡

「不當室而免者,謂未成服而來」,不知成總猶免」,顯與《問喪》違。崔氏、熊氏謂則不總者固不免矣。鄭於此注云「雖不服「童子不總,唯當室總。總者其免也。」然

服以後,雖成人亦不免矣,豈獨童子哉?

坐」,是也。

禮,皆後主人而祭,嫌此或異,故明之。先

飯,示爲長者嘗食也。

客祭,主人辭曰:「不足祭也。」客飧,主人辭

以「疏」。

「飧者,食竟作三飯飧也。飧是已飽猶食,主人之食也。疏之言麤也。」 孔氏曰:鄭氏曰:「祭者,盛主人之饌也。飧者,美

主人自置其醬,則客自徹之。

美故也。」

徹飯齊,以授相者,主人興辭於客,然後客也。主人辭焉則止。《曲禮》「客自前跪,客自徹之,徹主人所自置者,禮欲其相當

徹。凡燕食,婦人不徹。一室之人,非賓客,一人徹。壹食之人,一人

也。婦人質,不備禮。」 孔氏曰:「賓客客則各徹其饌也。壹猶聚也,爲赴事聚食鄭氏曰:「一室之人,同事合居者也。賓

「後,胡豆反。先,悉薦反。」

一室之人,謂同事合食而各設饌具者也。事壹聚共食,則亦推一人徹也。」 愚謂:必少者一人徹饌也。壹食之人,謂暫爲赴則各徹其饌,今同事合居,既無的賓主,故則

壹食,謂相聚共饌具而食也。 燕食,朝夕

常食也。

所操。《釋文》:「操,七刀反。」食棗、桃、李,弗致于核。瓜祭上環,食中,棄

潭也。 潭古,以上爲尊。棄所操者,爲手持有垢 聖問,下環是脱華處,用上環祭先而食中, 童間,下環是脱華處,用上環祭先而食中, 電間,下環是脱華處,用上環祭先而食中, 電話,以上爲尊。棄所操者,為 調懷其核不 類氏曰:「弗致于核,謂懷其核不

凡食果實者後君子,火孰者先君子。《釋文》:

故先君子而嘗之。」
當。火熟調和是人之所爲,恐和齊不備,「果實是陰陽所成,非關人事,故不得先孰者先君子,備火齊不得也。」 孔氏曰:鄭氏曰:「果實,陰陽所成,非人事也。火

有慶,非君賜不賀。

有憂者。

勤者有事則收之,走則擁之。 鄭氏曰:「此下絶亡,非其句也。」

鄭氏曰:「此補脱,重。」

孔子食於季氏,不辭,不食肉而飧。

禮,故以此示其意也。 禮,故以此示其意也。 一門賴。今孔子不食肉而飧,蓋以季氏失興辭,今孔子不辭。凡食,先食殺胾,既飽興辭,今孔子不辭。凡食,先食殺胾,既飽調:孔子於季氏,降等之客也,禮宜執食

字絶句,陸氏佃曰:「「拜賜」句。」今從陸氏讀。句。君未有命,弗敢即乘、服也。按孔疏本「拜」君賜車馬,乘以拜賜,句。衣服,服以拜賜。

受大路之賜 後、君再命之乘、服、乃敢乘、服之。 受君車馬衣服之賜,既拜受之矣,至明日, 之?」蓋 有命,則不敢乘、服也。《左傳》魯叔 更乘、服所賜,往至君所而拜也。 南 之命,故終身不敢乘。 遺 調 季 叔 孫 孫 於王,及卒,杜洩 曰 : 豹受賜歸魯,王無 「叔 孫 此雖受賜於天子之 未 乘 路,將焉 將以路 再使乘 既拜之 若未 孫豹 葬。 路 用

事,受賜於其君者亦然也。

再拜。 君賜,稽首,據掌,致諸地。酒肉之賜,

弗

也。 至地 首、謂拜君賜者、當爲稽首之拜也。 覆按右手也。 鄭氏曰:「稽首,致首於地。 致諸地,謂爲稽首之拜之法也。 者,拜受,又拜於其室。」 左手據右手之掌也。 也。 酒肉之賜輕,雖君賜,不再拜。 再拜者,賜時拜受,明日又往 酒肉之賜, 致諸 地,謂 愚謂**:** 輕也。 據掌,以左手 首及手俱 據掌,以 君賜,稽 受重賜 據掌, 拜

凡賜,君子與小人不同日。

鄭氏曰:「慎於尊卑。」

凡獻於君,大夫使宰,士親,皆再拜稽首

送之。

夫使人,則於阼階下南面拜送, 士親,則宰,家臣之長也。皆再拜稽首送之者,大

夫》:「受致福

者而膳之。」《祭僕》:「凡

於君之門外拜送也。

「鼠」。」
音例。去,起吕反。造,七到反。」●○鄭注:「葷,或作葷,皆造於膳宰。《釋文》:「葷,許云反。莿,音列,又膳於君,有葷、桃、茢,於大夫去茢,於士去

菜也。 也。 授之。」 也。 其爲鬼神之餘,恐有不祥之干也。葷,辛 鄭氏曰:「膳,美食也。 物,能去穢惡。 而致膳於君子,曰膳。」用葷、桃、茢者,以 食,誤也。」 非是,則無事於桃、茢。 三者,大夫去其一,士去其二,尊卑之差 造猶内也。 大夫用葷、桃、士桃而已。 茢, 菼帚也。 陳氏祥道曰:「膳,致福之膳也。 愚謂:《少儀》曰:「爲己祭 桃、茢、能解不祥。 膳宰,膳夫也。《周禮 造於膳宰,既致命而 葷、桃、莂,辟凶 鄭氏以膳爲凡美 葷,薑 於君備 及辛 邪

祭僕受而内之也。 祭代致福者,展而受之。」造於膳宰者,蓋

僞反。」 大夫不親拜,爲君之答己也。《釋文》:「爲,于

君答拜己,故不親也。」「解大夫所以不自獻之義也。自獻則屈動鄭氏曰:「不敢變動至尊。」 孔氏曰:

❶ 「到」、《釋文》作「報」。

八七七

弗

者 臣掌群臣之復逆也。 臣 臣 又 命,掌三公、孤卿之復逆」,故知諸侯亦小 待 入告君者,以《周禮 ,謂君不答士拜也。」 傳君諾出,士又拜君之諾報也。 小 臣 傳君之報諾 而 · 小臣》「掌王之小 退 愚 謂: 也。 又拜者, 鄭 弗答 氏知 小 拜 小

又作「適」,音狄。」

服以拜。敵者不在,拜於其室。《釋文》:「敵,本
大夫親賜士,士拜受,又拜於其室。衣服弗

服弗服 謂 謂來賜時不見 鄭氏曰:「弗服 在家拜受,則明日當往拜,若孔子於陽貨蒸 又就拜於其家,是所謂再拜 豚之饋是也。 士於大夫之賜亦再拜,大夫尊也。 以拜,則車馬亦然。 若在家拜受,則不再拜也。 也,見則不 以拜,異於君惠也。 敵者來饋,己不 復往 也。 敵者不 也。」 拜受, 在 衣 愚

> 屬也。」 鄭氏 者,但當云『致馬資於有司』及『贈從者』之 馬資於有司。」』 將適他,臣若致金玉貨貝於君 謂 有物獻尊者,其辭 日 此謂 獻 是其類 辭 也 不敢云『獻』,聞 也。」 \wedge 少 儀》 則曰: 孔 日 氏 於尊 日 「 致 **『君**

禮不盛,服不充,故大裘不裼,乘路車不式。

此

,明受賜及獻人之法。

凡於尊者有獻

,而弗敢以聞

敬。」 鄭 者,外襲衮服 敬於内,則不敢致其飾於外也。大裘不裼 車,郊天車。 禮乃然,故大裘不裼,證禮盛服充也。 曲敬之例。」 氏 孔氏曰:「服襲是充美於内,唯 禮 也。 乘路車不式,亦是禮盛 愚謂: 盛者服充,大事不崇 禮盛則服充者,專其 不 曲 爲 路 盛

吐之,走而不趨。《釋文》:「唯,于癸反,徐以水反。」父命呼,唯而不諾,手執業則投之,食在口則

皆爲急趨父命也。

您期也。孝子事親,豈必老而後如此,以曰:「出不易方,有定所也。復不過時,無有疾,文王色憂,行不能正履。」 方氏慇鄭氏曰:「言非至孝也。癠,病也。王季

「圈,起權反。」杯、圈不能飲焉,口澤之氣存焉爾。《釋文》:好、圈不能飲焉,口澤之氣存焉爾。《釋文》:父没而不能讀父之書,手澤存焉爾。母没而

897

○自「父命呼」至此,明事親之禮。 也。圈,屈木所爲,謂巵、匜之屬。」 孔氏 也。圈,屈木所爲,謂巵、匜之屬。」 孔氏 也。圈,屈木所爲,謂巵、匜之屬。」 孔氏 鄭氏曰:「孝子見親之器物,哀惻不忍用

君入門,介拂闑,大夫中棖與闑之間,士介拂

禮記卷三十

八〇

棖。《釋文》:「闌,魚列反。根,直衡反。」

於後 鄭 賈疏 闑者 門之兩旁長木。 君人必中門,上介夾闑,大夫介、士介雁行 此謂 上 棖闑之中,主君在闑東,賓在闑西。 去闑遠,故拂棖。 介微遠於闡,故 當君後,在棖闑之中。」」 在賓之後,稍近東而拂闑。 之間者,下文謂「大夫出聘,不敢僭君禮」, 下文云「賓入不中門」,此大夫得中棖與闑 擯 氏曰:「此謂兩君 2,示不相沿 ,所以界别左右,以表賓主之所行也 在君之後,稍近西 介隨君後而行,故不嫌也。 孔氏曰: 「主君於東闑之内,賓於西闑之 當根與闑之間。 也。 「闑,門中所豎短木。 上介近君,故拂闑。 崔氏、皇氏云:『君入當 相見也。根,門楔也 君若迎聘賓,擯者亦 而拂 闑 愚謂:門中設 大夫擯、介各 賓之上介 又《聘禮 士介卑, 主君 大夫

> 東。《釋文》:「閾,音域,又況域反。」 賓人不中門,不履閾,公事自闑 之文,則門唯一闡明矣。 門中闑西閾外」,皆但曰 堂」「西堂」之類,無不然。 之,若「東楹」「西楹」,「東塾」「西塾」,「東 然《儀禮》於凡宫室之制有東西者,皆著言 下人門之法,皆與崔氏、皇氏之説不同。 棖。」如賈氏之説,則門中有二闑,而 **根與** 翼之間。 東闑之外,皆拂闑。 内,並行而 日 日,「布席于門中闑西閾外」、《士喪禮》「卜 ,席於闑西閾外」,《特牲禮》「筮日 人。 末介、末擯皆士,各自 上介於西闑之外,上擯 次介、次擯皆大夫,中 「闑」,無「東」「西 賈氏説非是。 而《士冠禮》筮 西 ,私事自 : ,席于 君 以 拂 於於 闑

辟尊 也 鄭氏曰:「此謂聘客也。不中門,不 私事 者 所 ,覿面 行 也 也。 閾 門限。 孔氏 曰:「不中門、 公 事 聘、享 履閾

禮 》: 私事。 禮 謂 **闑西,但初從闑東,辭之乃就闑西耳。** 聘、享奉 擯者辭。 也。 不當 「賓覿,入門右,北 私事,謂私覿也。 自闑東,從臣禮也。」 闑 ·君命,故謂之公事。 賓出,奉幣入門左。」是私事亦自 西 棖 闖之中, 面奠幣,再拜稽首 非行君命,故謂 而 稍 自 愚謂:《聘 東 闑 近闑 西 用 也 賓

君 鄭氏 武,迹相及。中武,迹間容迹。」 與尸行接武,大夫繼武,士中武 尊者行徐,卑者行疾也。 接武,大夫稍卑,故繼武,士又卑,故中武。 中,尊卑行步之法也。 容一足地也。」 足迹相繼也。 武者,二足相躡而蹈 曰:「君,謂天子、諸侯也。 曰:「尊者尚徐。 中猶間也。 愚謂: 其半 接武,蹈半 君與尸尊,故其行 此謂在君宗廟之 也。 中武,每徙足間 武,迹也。 繼武者,兩 孔氏 迹。 接 繼

注:「欲,或爲「數」。」
徐趨皆用是,疾趨則欲發,而手足毋移。○鄭

也。」 發,起也,謂起 《聘禮》:「公當楣再拜,賓三退,負序,而 武、中武之差,所謂「君行一,臣行二」也。 其直且正。」 趨,則欲 此言「徐趨」,一也。 發,謂起屨也。 鄭氏曰:「疾趨,謂直行也,疏數自若。 動,故欲其 繼武之節,於此可見矣。疾趨,疾行也。 公受玉於中堂與東楹之間。」君接武,大夫 相與行禮,其徐趨之法,皆用是接武、繼 廟之中,尊卑行步如 三:徐曰 愚謂:徐趨,徐行也。 起 行,疾曰趨,甚疾曰走。 無移。 踵 丽 踵 孔氏曰:「移,謂 移之言靡 離 也。 地 皆用是者,言不獨宗 凡 上文之所言,凡君 也。 徐趨、舉前 行 迤 行疾 步 也 疾 上言「行」, 徐之節 則 曳踵。 靡 此云「徐 毋 手足 迤 7移,欲 動 易 疾 臣 摇

《采齊》」,又曰「二節以走,一節以趨」。又 趨,即 是也 也。 端行正名爲趨,故曰「行以《肆夏》,趨 趨 爲趨,此云「疾趨」,包下「端行」「弁行 趨」、《聘禮》云「將授志趨」,是也。 走則下文所謂「弁行」也。 曰「父命呼,走而不趨」。 上不趨,執玉不趨。」此皆正指端行爲 若通而言之,則行亦名爲趨,此云「徐 即 趨與 行也 (走也。 一,下文所 趨則下 謂 圏 《曲禮》曰:「堂 文所謂 若别而言之,唯 「豚行」也。 「端行」, 走亦名 趨 以 疾

卷 徐徒困反。 下下行, 「圈、舉遠反、又去阮反。 齊,音咨,本又作『齌』,同。」 不 舉足,齊如 滕,本又作「豚」,同大本反 流。 席上亦然。 《釋

鄭氏 執 不舉足,曳踵則衣之齊如水之流矣。 圭 一則然。 曰 : 圏 此徐趨也。」 ,轉也。 豚之言若 孔氏曰:「圈 有 所 孔子 循

容,故但狀其起屨之急疾而已。

君,不爲容,進

退走。」蓋趨爲容

而

走不

見禮

庶

人

(見於

不離 席上亦然者,言在席上未坐,其行之時,亦 豚 如是圈豚行,齊如流也。」 又俯折 ,言曳轉足循 地 也。 ,則裳下 齊,裳下緝 委地, 地 而 行也。 曳足 也。 如 足既 不舉足,謂足 水 流 不舉,身 狀 也。

或爲[霆]。] 端行,頤霤如矢。 「弁,皮彦反。 「弁行」。 行,走也。 霤之垂也。 謂:端行,謂趨也。 鄭氏曰:「此 屨剡剡然也。 「端行」。 剡,以漸反,《字林》因冉反。」○鄭注: 剡剡,起屨貌。 頤霤,身俯 弁,急也。 如矢,謂行直而不邪曲 《士相 疾趨 弁行, 剡剡 也。 趨則張拱端好,故 而 行莫急於走,故 頭 端,直 | | | | | 行疾,故見其起 前 起 臨 屨。 , 其 也。」 《釋 頤 也 如 文》: 頤 弁 屋 曰 愚

執龜、玉,舉前曳踵,蹜蹜如也。《釋文》:「宿宿,

色六反,本或作「蹜」,同。」

鄭氏曰:「著徐趨之事。」 孔氏曰:「蹜

蹜,舉足促狹也。」

禮反。翔,本又作「洋」,音詳。」文》:「愓,音傷,又音陽。齊,才兮反,賀在啟反。濟,徐子凡行容愓愓,廟中齊齊,朝廷濟濟翔翔。《釋

齊齊,恭慤貌。濟濟翔翔,莊敬貌也。」〇自鄭氏曰:「凡行,謂道路也。憬憬,直疾貌。

君與尸行」至此,明行步之法。

非是。 咨,又側皆反,下音速。」○按:齊,當音側皆反,皇氏讀咨, 君子之容舒遲,見所尊者齊邀。《釋文》:「齊邀,音

鄭氏 自 見所尊之人則齊邀 [寬奢也。] 孔氏 曰 : 曰 「齊遫,謙慤貌。 「舒遲」 愚謂 閑雅 ,謂自斂持迫促,不敢 君子之容舒遲,申申 也。 遫猶 尋常舒遲,若 「蹙蹙· 也。」

> 速而不敢遲緩。 夭夭是也。齊則莊嚴而不敢舒散,邀則急

文》:「德如字,徐音置。」〇按:德,當如字。容直,氣容肅,立容德,色容莊,坐如尸。《釋足容重,手容恭,目容端,口容止,聲容静,頭

居神位, 也。」 妄動 傾顧 鄭氏曰: 人有所得於己, 動 儼然有德之氣象 立則磬折, 有予也。 且正也。 ,不惰慢也。 移也,所謂 也。 也。 應氏鏞曰:「立容德,蓋中立不倚, ,敬慎也。」 「足容重,舉欲遲也。 色容莊,勃如戰色。 氣容肅 聲容静,不噦 目容端,不睇視也。 如人授物予己,己受得之形 山 則 坐如尸,不箕踞 立是也。 を也。」 似 無 不息 孔 所 欬 氏 愚謂: 奪於外也。 德者 也。 也。 曰 頭容 「德,得也。 ,得也。 立容德,不 坐如尸,户 立容德,如 手容恭, 口容止,不 也。 直,不 色容 凡

年反。

視容,又作「目容」。瞿,紀具反,又紀力反。」

皆君子容貌之常也。 養,更於甚處存養?」 容,與《論語》『九思』同。 存養,於容貌之間,又欲隨事省察。」朱子 曰:「即此便是涵養本原。)問: 本原之地 這處不是存 ||《禮記 固 影九 欲

燕居告温温。

鄭氏曰:「告,教使也。」 欲嚴慄。」 色尚和善。 教人使人之時, 孔氏曰:「燕居 唯須温温,不

凡祭,容貌顔色如見所祭者。

孔氏曰:「祭如

在

也。」

愚謂:

下文「喪

蓋祭祀無言,而容貌即一身之容,顔色即 容」、「戎容」分别言之,此言「祭」獨否者 視容、色容,而皆不外於本愛慤之誠,以著

繭。 喪容纍纍,色容顛顛,視容瞿瞿梅梅,言容繭 《釋文》:「纍,良追反。顛,字又作「顛」,音田,又丁

爲如在之敬,不容以别言也

然。 昧也。 鄭氏 思,不舒暢也。 氏曰:「纍纍,謂容貌毀瘠。 顛顛,顏色憂 瞿瞿梅梅,不審貌。 容」對下三者,謂身容也。 曰:「張則瞿瞿,收則梅梅。」 繭繭,猶綿綿,聲氣微 曰 孝子在喪,所視不審,故瞿瞿 「纍纍,羸 **瞿瞿,驚遽貌。** 憊貌。 繭繭、聲氣微也。」 下「戎容」亦然。 細。 顛顛,憂思 梅梅,謂 愚謂:「喪 陸氏 梅 貌。 孔 微 佃 梅

《釋文》:「暨,其記反。詻,五格反。視如字,徐市志反。」 戎容暨暨,言容詻詻,色容厲肅,視容清明。

鄭氏曰:「暨暨,果毅貌。 詻詻,教令嚴

也。厲肅,義形貌。清明,察於事也。」 旲

先。戎容之嚴,先在號令,故言容在先。」

氏澄曰:「喪容之哀,先觀顔色,故色容在

彼檢反,《字林》貶音方犯反。 讇,音諂,舊又音鹽。」○按鄭 立容辨,卑毋讇,頭頸必中。《釋文》:「辨讀爲貶,

氏讀辨爲貶,以「立容貶卑」爲句,黄氏辨如字,以「立容辨」

爲句,「卑毋讇」爲句,今從之。

山立,時行,盛氣顛實揚休,玉色。《釋文》:

顛,依注讀爲闐,音田。」

内,而發揚其休美於外,若《聘禮》記所謂字。盛氣顛實揚休,謂盛其氣以闐實於物也。玉色,色不變也。」 愚謂:揚讀如盛身中之氣,使之闐滿其息,若陽氣之體盛身中之氣,使之闐滿其息,若陽氣之體鄭氏曰:「山立,不揺動也。時行,時而後

下,鄭氏本不專指戎容,至孔疏乃上合於 當,宜别爲一節。」 節。 容辨』止『玉色』,合上『戎容』四句共爲一 上疑有脱文。○吴氏澄曰:「舊注以『立 戒儀容,此節似專屬一 ·戎容」解之,其義非是。 ·發氣盈容」也。 今按『立容』以下五句,於戎容無所 玉色,謂 愚謂:自「立容辨」以 事而言。 温潤也。 一 山 上節通 立之

臣。此擯於諸侯之辭也。若擯於天子,則伯,謂九州之長也。力臣,謂天子宣力之

❶ 「上下」、《集説》作「左右」。

姑、商 也。 國,擯 土也。 傳》:「魏、駘、芮、岐、畢,吾西土也。 某土者,稱其方,若東土、西土也。《左 之守臣」,是也。 也。 當曰「某土之守臣某侯某」也。其在邊邑, 天子守土之臣。《左傳》樂盈曰「得罪於王 禮》當曰「某屏之臣某子某」也。其於敵以 屏者,言在邊境爲天子之屏蔽也,約《曲 曰「某屏之臣某」,謂四夷之長,人天子之 之辭也。 謂庶方小侯也。 下曰「寡人」,謂諸侯自稱於諸侯及其臣民 曲 禮》云「九州之長,人天子之國曰 諸侯之於天子,謂擯於天子之辭 其擯於諸侯則曰「寡君」。 者 奄,吾東土也。 肅慎、燕、亳,吾北土也。」守臣,言 I所稱: 擯,傳辭也。賓主行禮,有介以 也。 曰「孤」,亦自稱於敵以下 某者,稱其名,約《曲禮》 某屏者,亦稱其方也。 巴、濮、楚、鄧,吾 小國之君, [牧]是 也 蒲 南

列反。」 擊」。《釋文》:「適,丁歷反。孽,音枿,五葛反,徐五丁,自名,擯者曰「寡君之適」。 公子曰「臣

名,亦當稱云「臣孽某」也。 之旁萌者曰孽,故以爲庶子之稱。父前子君也。」 愚謂:公子,謂諸侯庶子也。木君也。」 愚謂:公子,謂諸侯庶子也。木鄭氏曰:「孽,當爲枿,聲之誤。」 孔氏

「傳,陟戀反。遽,其庶反。」士曰「傳遽之臣」,於大夫曰「外私」。《釋文》:

亦通。」 謙 者也。」《釋文》云:「以 之辭也。《周禮・行夫》:「掌邦國傳遽之 促遽,士位卑,給車馬役使,故稱『傳遽』, 於大夫者曰『私臣』。」● 鄭氏曰:「傳遽,以車馬給使者 遽。」蓋傳遽 事。」鄭云:「傳遽,若今時乘傳騎 亦謂對己君也。 之辭也。 愚謂: 私、私臣也。 乃事之至賤者,以此自稱,甚 此稱於他國君、他國大夫 皇氏以爲對他國君 車 士於同國大夫曰 孔氏曰:「遽是 曰 傳, 也。 以 驛 「其義 馬 圃 士臣 曰 使

士訃於他國大夫曰「吾子之外私某死」,私」,是也。於他國大夫曰「外私」、《雜記》「賤私」、《士相見禮》曰「某也夫子之賤

大夫」、「寡君之老」。《釋文》:「使,色吏反。」大夫私事使,私人擯則稱名,公士擯則曰「寡

是也。

卿出大聘,其爲上介者乃大夫,此但曰「公 人,家臣也。私人擯,謂私行出疆,而使家 私事使,謂以私事自使人於諸侯也。 使聘,而公士爲之傳辭也。 主爲「寡大夫」、「寡君之老」,故稱名,謂 臣傳辭於諸侯也。 士擯」者,蓋卿聘則介有大夫、士,若大夫 曰「君之外臣某」也。公士擯,謂奉君命出 寡君之老」,小聘使大夫曰「寡大夫」。 家臣將命 ,則不得 大聘使 卿 稱 然 其 曰 稱 私

❶ 「臣」、《禮記注疏》作「人」。

聘,唯士介,故此曰「公士擯」,兼上、下大 隆敢展布之。」●此則名者也。」 使人弔夫差曰:『寡君之老無郎,使陪臣 穿來言汶陽之田。」 夫言之也。○鄭氏曰:「私事使,謂以君 不得稱諸侯爲寡君,楚隆於趙襄子雖 以君命行,則非私事矣,注説非是。 命私行,非聘也。 春秋之僭禮,不可引以證經。 名,然其曰「寡君之老」,則失辭矣。 若魯成公時,晉侯 劉氏敞曰:「趙襄子 愚謂 此乃 陪臣 使 稱 既

刃反。」 大夫有所往,必與公士爲賓也。《釋文》:「寶,必 鄭氏曰:「謂聘也。大聘使上大夫,小聘

使下大夫。公士爲賓,謂作介也。」

禮記卷三十終

「布」、《春秋左傳正義》作「謝」。

賜進士及第翰 國史館纂脩孫 希旦 林院編 一集解 脩

常政

(也,而以爲天子之政。分器同姓,諸

其鋪

張

祀也,而以爲天子之祭。振木鐸,諸侯之

用者,亦備陳之。烝、嘗、社、蜡,諸侯之常

已,其餘未嘗用

也。

而《記》於魯之所未嘗

明堂位第十四《别録》屬《明堂陰陽》。

平,而成王賜魯以天子之禮樂也。 果成王所賜,孔子何以發此嘆乎? 之,而僖公以後始行之者也。 此篇記周公相成王朝諸侯於明堂以致太 尊,魯用犧、象、山罍而已,三代之爵,魯用 不知其非,而反盛誇之以爲美。且四代之 天子禮樂,蓋東遷以後之僭禮,惠公始請 玉 魯之郊、禘,非禮 琖仍雕 而已,三代之灌尊,魯用黄目 也。 周公其衰矣!」使 孔子曰: ○魯用 記者 而

昔者周公朝諸侯于明堂之位,天子負斧依 子亦有考焉爾。 失實如此。 侯之所同得也,而以爲天子之器。 唯四代之制略有見於此者,君

南鄉而

立。《釋文》:「朝,直遥反,下皆同。依,本又作

907

『扆』,同於豈反。鄉,許亮反。」

焉。」 依,爲斧文屏風於户牖之間,周公於前 諸侯也。天子,周公也。負之言背也。 鄭氏曰:「周公攝王位,以明堂之禮儀朝 既成洛邑,輔成王以朝諸侯,乃率以祀文 中央大室户牖間。」 王宅憂,周公位冢宰,百官總己以 孔氏曰:「皇氏云:『斧依,在明堂 陳氏祥道曰:「成 聽。 及 斧 立

禮記卷三十一

政,本非朝諸侯之所。 朝受於廟、大朝覲則爲壇、明堂以祀天布 禋咸格,朝諸侯於明堂必在是時。 采、衛咸在,王在新邑。 烝祭歲,王賓,殺、 愚謂:周公營洛邑爲東都,侯、甸、男、邦、 辟』爲還政之事,以『誕保文、武受命惟 説,始於荀 王 之言周公,不過曰「位冢宰,正百工」而已, 代之受朝,是二天子也。 詩,必無至六年尚不能朝諸侯之理。 免喪即政,求助 新天下之耳目,乃一時創行之典也。 故大朝覲之事特於明堂行之,蓋異其事以 年』爲攝政之年,是皆不知《書》者也。」 王既至東都,率諸侯以祀文、武,而周公乃 曰「相王室以尹天下」而已,未有言其踐天 若曰『代之而受朝』,則誤矣。 卿、盛於漢儒。 群臣,見於《閔予小子》諸 此蓋以洛邑初成 《尚書》、《左傳》 於是以『復子明 四時常 代之之 且成 成王 +

> 代反。「此周公明堂之位也」、本或無「周公」、「之」字。」 之國,應門之外,北面,東上。 門之外,西面,北上。八蠻之國,南門之外, 此周公明堂之位也。《釋文》、「采,七在反。 上。五狄之國,北門之外,南面,東上。 北面,東上。 六戎之國,西門之外,東 諸男之國,門西,北面,東上。 東面,北上。 階之東,西面,北上。諸伯之國,西階之西, 三公,中階之前,北面,東上。諸侯之位,阼 欲侈周公之事而失其實者也 儒,遂有周公踐阼朝諸侯於明堂之説,皆 子位者。 而荀卿始言之。 諸子之國,門東,北面, 四塞,世告至。 九夷之國,東 禮記》出於漢 ·面,南 東上。 塞,先 九采

前,以對王爲尊也。門東門西,應門之左阼階、賓階,南面之三階也。三公中階之階。 東西北各二階,而南面三階。中階、三公,謂二伯,統領諸侯者也。明堂九

門也。 九采。 内,與 子、《大行人》侯服「貢祀物」,至要服 也。 世壹見」,是 無朝貢常期,每父死子立,及嗣王即位,乃 服之諸侯在 物」是也。 之采,其地在九州之内,采取美物以 也。 蠻、六戎、五狄,在九服之外,所謂四海者 采、衛五服之諸侯在中國者也。 右 千里之外,日采日 來至、《大行人》「九州之外,謂之蕃國 也。 丽 九采之國,謂蠻服諸侯也。 諸 . 外與四海接也。侯、甸、男、采、衛在 **、夷、蠻、戎、狄相近,象蕃國之守候邊** 四塞,四方邊塞之國,夷、鎮、蕃三 侯、諸伯、諸子、諸男,此侯、甸、男、 明堂四面有門,而南門之内又有應 諸 侯言位 采之地盡於蠻服,故謂蠻服 九州之外者也。 也。 四塞之國,蓋 ,諸伯以下言國,互見之 流。」自蠻服以内,皆謂 世告至者,謂 在四門之 《王制》: 九夷、八 貢 () 貢天 爲 貨

不尚 尚北,何也?《儀禮》諸侯覲於天子,壇 海在 東上」。是朝於國外與國内之禮異也。 左。公、侯、伯、子、男皆就其旂 宫於國外,「上介皆奉其君之旂置於宫,尚 東面,則不尚 右者皆尚中。 伯、子、男。 曰:「《周禮》外朝之位,左孤卿,右公、侯 五狄在北門外之西,故東上。」 西,故東上。六戎在西門外之北,故南上。 在東門外之南,故北上。八蠻在南門外之 侯朝位之差也。 之内象 應門内,要服在應門外,蕃國在四門内,四 面」,皆尚右,東西面者皆尚北,路門之左 中, 四 門外。 ,九服,近者在内,遠者在外。 在西門之外者東面 《射人》『孤 `右,在門東、門西者東上,則 而《明堂位》諸侯西面,諸伯 以應門之内象中國,以四 孔氏曰:「九夷之國 東面, (、南上 而立,位皆 卿大夫 陳氏祥道 一,則 此諸 不 西 門

明堂也者,明諸侯之尊卑也。堂位與壇壝宮相類,蓋亦國外之禮然也。」

諸侯之尊卑,乃附會之説也。故以爲名,朝諸侯特一時之事耳。以爲明愚謂:明堂蓋以其在國之陽而洞然通明,鄭氏曰:「朝於此,所以正儀辨等也。」

相 昔殷紂亂天下,脯鬼侯以饗諸侯,是以周公 於成王。《釋文》:「相,息亮反。頒,音班。 制禮作樂,頒度量,而天下大服。 天子之位 鄭氏 武 致政,以王事歸授之。」 狹 猶 不止於脯鬼侯,蓋舉其甚者以明武王之所 史記》作『九侯』。」 也。 履 王以伐紂。 也。 티 : 量,謂豆、區、斗、斛、筐、筥所容受。 以治天下。 「以人肉爲薦羞,惡之甚也。 頒讀爲班。 武王崩,成王幼弱,周公踐 六年,朝諸 度,謂丈尺、高卑、廣 方氏慤曰:「 孔氏曰:「鬼侯, 侯於明堂, 七年,致政 量,徐音亮。」 「紂之惡 踐

周公以天子之禮樂。《釋文》:「乘,繩證反。」 曲阜,地方七百里,革車千乘,命魯公世 成王以周公爲有勳勞於天下,是以封周公於 也。 鄭氏曰:「王功曰勳,事功曰勞。 錫之山川,土田附庸。』又曰:『公車千乘 啟爾宇,爲周室輔。 曰 : 地。上公之封,地方五百里,加 瓚注《漢書》云:『魯城内有曲阜,逶迆長 周,尊之也。 朱英绿縢。』祀周公以天子之禮樂,同之於 積四十九,開方之得七百里。 之附庸,方百里者二十四,并五 『王謂叔父,建爾元子,俾侯于魯。 兵車千乘,成國之賦也。 魯公,伯禽。」 乃命魯公,俾侯于東。 孔氏曰:「臣 《詩·魯頌》 革車,兵車 五二十五 魯以 曲阜,魯 世祀 四四 等

里。」 者,其廣大亦不至此。 附庸七同,子附庸五同,男附庸三同。」總 等附庸。 廩。」 騂犅,群公不毛。周公盛,魯公燾,群公 鄰宋、衛,南至泗水得淮,其不得爲方七百 以魯之封域考之,北抵汶上,東盡於海,西 天子之地,則雖 國之大者,無踰於此。若地方七百里,半 無所出。《周禮》「諸公之地,方五百里」, 四同,故云『四十九同,開方計之得七百 之封,五五二十五,爲二十五同,又加二十 爲二十四同。 司徒》注云:『公無附庸,侯附庸九同,伯 八、九里。』魯受上公五百里之封,又加四 里明矣。《公羊傳》曰:「周公白牡,魯公 則魯之祀周公,其禮固有異矣,然未 愚謂:鄭氏「四等附庸」之説,本 四等,謂侯、伯、子、男也。按《大 同,謂百里也。 漢)時封三庶孽幾半天下 此記者之夸辭耳。 既受五 百里

有以見其用天子之禮樂也。魯僭郊、禘,有以見其用天子之禮,及《吕氏春秋》之是。武宮之立,見於《春秋》。乘大路,設不觀,朱干玉戚以舞《大武》,●八佾以舞不夏》,●皆僭天子之禮,及《吕氏春秋》之出於成王之所賜者,亦未可盡信也。

○按:載,如字,亦通。

○按:載,如字,亦通。

○按:載,如字,心。《釋文》:「載,音戴,又如字。弧,音胡。韣,音獨。也。《釋文》:「載,音戴,又如字。弧,音胡。韣,音獨。也。《釋文》:「載,音戴,又如字。弧,音胡。韣,音獨。

郊」,孟獻子曰:「郊祀后稷,以祈農事也。孟春,夏正之孟春也。《左傳》「啟蟄而

[「]武」、《春秋公羊傳注疏》作「夏」。

[「]夏」、《春秋公羊傳注疏》作「武」。

祭也。 涯 故 也。 月 之,其形象弓,以張旌旗之幅,《考工 有九,而魯僭其二焉,郊及大雩是也,皆祈 禘、嘗、烝之月,則爲周正耳。 天子祭天歲 先王。』《大司樂》「冬日至,圜丘; 夏日至, 以禴夏享先王,以嘗秋享先王,以烝冬享 之衣也。 方丘」之類,無不皆然,唯《春秋》所書郊、 弧旌、枉矢以象弧」,是也。 放 明 盤而 《周禮 大路,天子祭天之車也。弧,以竹爲 其冬至大報天之祭,則魯未嘗行 日月之章,大常之旗也 凡 郊 郊而 經典所言祭祀之月,皆舉夏 大宗伯》:「以祠春享先王 卜耕。」此魯郊在建寅之 韣,所以 解弧 記

散、壁角,俎用梡嶡。《釋文》:「大廟,音泰,後「大圭,薦用玉豆、雕篹,爵用玉琖仍雕,加以壁尊用犧、象、山罍,鬱尊用黄目,灌用玉瓚大季夏六月,以禘禮祀周公於大廟,牲用白牡,季夏六月,以禘禮祀周公於大廟,牲用白牡,

犧,又如字。旦反。梡,苦管反。嶡,居衛反,又作『橛』,音同。」○按:旦反。梡,苦管反。嶡,居衛反,又祖管反。琖,側眼反。散,先本亦作『雕』。篹,息緩反,又祖管反。琖,側眼反。散,處」皆同。犧,素何反,下同。罍,音雷。瓚,才旦反。彫,

以獻· 器。 祭,祭始祖所自出之祖於大廟,而以始祖 爲之距。」 象骨飾之。 黄目,黄彝也,鬱鬯之尊也。」灌,酌鬱尊 季夏六月,夏正之六月也。 角,皆以璧飾其口也。 也,因爵之形爲之飾也。加,加爵也。散、 飾其直者也。 是謂圭瓚。 鬯之尊也,黄彝 鄭氏曰:「禘,大祭也。 世室,群公稱宫。 也。 犧尊,以沙羽爲畫飾,象骨飾 瓚形如槃,容五升,以大圭爲柄 愚謂: 篡,籩屬也,以竹爲之。 爵,君所進於尸也。 也。 此言魯禘所用之禮 白牡,殷牲 按此文誤脱,當云:「象尊 梡,始有 周公曰大廟,魯公 禘者天子之大 四足也,嶡 也。 之。 仍,因 彫,刻 尊,酒 也。 鬱

降焉, 用 前 禮樂也。 者、蓋以不及群廟之主,而所用者乃禘之 所言考之,魯之禘祭,其禮皆視天子而 之,故曰「以禘禮祀周公於大廟」。 配之也。 也。 器備用之,諸侯唯用當代之器,魯兼 臣周公之意也。 先代之牲,蓋出於成王之命,以 代之器而不備焉,降於天子而隆於諸 豆、雕篹,爵用玉琖仍雕,俎用梡嶡,皆兼 篹言「雕」,互見之也。 雕 九獻之後諸臣 代之器也。 **籩、**豆皆飾 鏤,今因其舊制 玉琖仍雕者,蓋夏 則其不及文王可 白牡者,周公之牲也。 魯之禘 以 天子宗廟之祭,於前 尊用犧、象、山罍,薦 爲加 蓋 玉而 祀 而 爵 周公, 雕鏤之,豆言「玉」, 后氏 玉琖,夏后氏之爵 加 知矣。 也 以 以玉爲琖,不 雕 四 而 升日 鏤 祭周公以 其 以 示其 也。 謂 以 魯 一散,五 之禘 公配 用 代之 用 不敢 記 加, 有 芝 前 侯 玉

> 牲》,玉瓚見《王制》,梡嶡見後。 升曰角。犧、象説見《禮器》,黄目見《郊特

妹。任,而林反,或而鴆反。」《大武》。皮弁素積,裼而舞《大夏》。《昧》,東夷之樂也。《任》,南蠻之樂也。納夷蠻之東夷之樂也。《任》,南蠻之樂也。納夷蠻之,武》。。皮弁素積,裼而舞《大夏》。《昧》,

樂』。」 後執黄 盾也。 干以待諸侯、《樂記》「總干而 歌《清廟》,下管《象》,説見《文王世子》。 夏》,夏 鄭氏曰: 玉戚,冕而舞《大武》者,武王伐紂,初執朱 朱干,赤盾也。 」,是也。 戚,斧也。 鉞 舞 愚謂: 此言魯禘所用之樂也。 《清廟》、《周頌》也。 朱干, 赤大 以 也。 天子宗廟之中舞《大武》之舞 臨六師、《牧誓》「王左仗黄 玉戚,以玉 <u>~</u> 周 《大武》,周 禮》: 『味 飾 山立,是也 斧也。 舞 師 也。 掌 教 朱干 昧 大 升

冕者, 服與。 則 於《武 之舞,而以《大武》爲重,《祭統》曰「舞莫重 之《大夏》脩而用之,以配《大武》,備文武 不親舞也。然則《大武》自王以外,蓋韋弁 治功之成,故舞者朝服。 弁,天子之朝服也。 僭禮也。 皮弁素積,裼而舞《大夏》者,皮 不得象武王。朱干玉戚以舞《大武》,魯之 武》,然其所象者,但自周公、召公以 也。 紂之功,而未及作文舞,宗廟之祭,則因夏 天子有四夷之樂,魯唯 廣魯於天下,言廣大周公之德於天下也 韎」,言服韎韋以舞也。 王 親 魯在 因祭時之服也。 宿夜》」,是也。 武王末受命,作《大武》之舞以 在 舞 東南、與淮夷、徐戎近,大廟用 位 ,執朱干玉戚以象武王 《大夏》文舞,所以 用其二,降於天子 《昧》,《周 諸侯 《任》之義未詳。 不云「冕」者,君 雖 得 禮 舞《 下 象 》 作 ·, 而 大 伐 夷 象 服

> 贊夫人,各揚其職。 迎牲于門,夫人薦豆、籩,卿大夫 君卷冕立于阼,夫人副褘立于房中。 君肉 法也。 樂,示有懷也。」 蠻之樂,蓋欲示以周公之德以 ○陳氏祥道曰 舞當代之樂,示有制也。 ::「王者舞先代之樂,示有 百官廢職服大刑,而 贊 感服之與。 舞四 君, 夷之 天 袒

鄭氏 《詩》云:『副笄六珈。』《周 揄 中,東房之中也。 大服,知周公之德宜饗此 佐夫人。 也,於外則大夫之妻也。 唯魯及王者之後夫人服之,諸侯夫人則自 「掌王后之首服,爲副。」禕,王后之上服 狄以下。 曰:「副,首飾也,今之步 揚,舉也。大刑 贊,佐也。 肉袒迎牲者,爲牲入當 命婦,於内 也。」 重罪 祭祀,世婦 禮 也。天下 愚謂 摇 追 則 是 師 以 世 也 房 下 婦

下大服。《釋文》:「禕,音輝。」

至也。」職,謂廟中之職事。百官廢職服大親殺也。《郊特牲》曰:「肉袒親割,敬之

刑,蓋祭前誓戒之辭也。

反。」○按:省,當作「社」。 天子之祭也。《釋文》:「礿,音藥。 是故夏礿、秋嘗、冬烝,春社、秋省而遂大蜡, 與。 報也。 祭,但言夏、秋、冬者,記者見《春秋》不書 作「社」,説見《玉藻》。 魯春祭,遂以爲魯但有三時之祭也。 礿當作「禘」。古「禘」「禴」字相亂,或以 禴」爲「禘」,或以「禘」爲「礿」。 天子大蜡八,諸侯之蜡蓋 方氏慤曰:「凡此亦諸侯之所同。」 春社 ,祈也。秋社, 省,讀爲獮,仙 四時 有 省當 所 降 皆 淺

廟,天子明堂」。鄭氏因此遂謂魯大廟爲天子於明堂聽朔,魯於大廟聽朔,故曰「大

大廟,天子明堂。庫門,天子皐門。雉門,天

子應門。

皐門。」、『乃立應門』。《書》曰:『二人雀 皋、應、畢,無庫、雉、路,諸侯有庫、**雉** 敞曰:「此經有五門之名,而無五門之實。 應門之内。」此皆言天子也。 **弁執惠,立于畢門之内。1又曰:**『王出 路,無皋、應、畢。 以《詩》、《書》、《禮》、《春秋》考之,天子有 旁,是魯之雉門用天子之制明矣。 同而名不同。 之雉門,制如天子之應門也。 門,天子之朝門; 外門, 庫門,諸侯之外門。 天子三門,諸侯亦三門,但其名異 明堂制,又謂天子大廟爲明堂制,皆誤也 如天子之皐門也。 亦殺焉。 「設兩觀,天子之禮也。」兩觀在雉門之兩 庫門,天子皐門者,皐門,天子之 何以言之? 天子三門,諸侯三門,門 雉門,諸侯之朝門。 雉門,天子應門者,應 《詩》曰『乃立 魯之庫門,制 畢門或謂 子家駒 ○劉氏 而其 日 制

虎門 禮,故門制同王門而名不同也。 鼓於此門之外,故曰路門。 此門,故曰 門, 門,臯、庫、雉、應、路,諸侯三門,臯、應、 也。一 雉門也。 寢,路寢之門,是謂路門。 非天子門故也。 之内。」此亦據魯之事。 門,有路門。 路。1失其傳也。天子之宫,有臯門,有應 事合於天子,所稱多傅會失實。 聞天子庫門、雉門也。《郊特牲》云"「獻命 天子、諸侯皆三門。《禮説》曰:『天子五 春秋》曰: 蓋 雉門,有路門,不 戴氏震曰:「天子、諸侯皆三朝,則 王 無道皋、應、畢者,非諸 一虎門。 在 『雉門及兩觀災。』譏 路門一曰虎門,一 國 則 《明堂位》所言,蓋魯用王 記者以魯用天子禮樂,故推魯 又或謂之路門,蓋建 虎賁氏守王之宫,蓋 聞諸侯皐門、 諸侯之宫,有 此諸侯三門也。 無道庫、雉者 曰 諸侯有路 兩觀不譏 .畢門,不 侯門 庫門 故 路 居 庫 應

振木鐸於朝,天子之政門也。」

「既卒哭,宰夫執木鐸徇於宫。」是諸侯之奮之以令於衆,使明聽也。《檀弓》曰:木鐸,以金爲口,以木爲舌,將有新令,則張木鐸於朝,天子之政也。

朝亦振木鐸矣。

坩也。 侏儒柱 户 鄭氏曰:「山 獻 重承壁材 愈也。 ,反爵於其上。 出尊,當尊 爲 也。 每室八窻爲四達。 藻文也。 節,刻欂櫨爲 刮,刮摩也。 ·南也。 崇,高也。 復 廟, 唯 山 重 鄉,牖 兩君 反站,反爵之 屋 也。 康讀爲『亢 也。 爲 藻棁,畫 屬 好,既 重 謂 夾

柱。 如今闕上爲之矣。」 之灑壁。 其上楹謂之棁。]李巡云:『樑上短柱 屏謂之樹,今桴思也。 龍』之亢。 注云:『城隅,謂角桴思也。』漢時東闕桴 屏,人臣至屏,俯伏思念其事。 重檐,謂就外檐下壁復安板檐,以避風 櫨,今之斗栱。《釋宮》云:『杗廇謂之梁, 以竹或木爲之。復笮,謂椽上有笮,椽下 注云:「重屋復笮。」笮在瓦之下,椽之上, 天子也。 思災,則桴思,小樓 「桴思」。」 爲笮也。 然則屏上亦爲屋以覆屏牆,故稱 漢時謂 復廟,鄭氏以爲重屋。《考工記 刮,摩也。 愚謂"此言魯大廟之飾同於 又爲高坫,抗所受圭奠於上焉 椽端: 屏爲桴思,解者以 横木謂之檐,漢人謂之承 楹,柱 也,故城隅 孔氏曰:「節名欂 刻之爲雲氣蟲獸 也。 按《匠人》 以密石 闕 爲天子外 上皆 也。」 屏 摩 曰 有 丽

> 明也。 氏以 間。」是天子之廟室亦東户西牖明矣。 也。 設反坫者,爲諸侯之大饗於此。設崇坫 堂制,其説非是。反坫,説見《郊特牲 刮之可知。 檐,謂於檐下復安板檐,以 壁材,蓋 者,爲諸侯之朝聘於此也。 玉於兩楹之間,則崇坫設於兩楹間也 「天子之桷,斵之磨之,加密石焉。」則 刮楹,刮摩其柱也。《穀梁 八窻四達解「達鄉」,蓋以 《覲禮》:「天子設斧依于户牖 以 其 鄉,牖也。達,謂 在 屋外 而 承 受於 避風 兩君相見,授 疏 魯大廟 達之使 壁 雨 傳》 之灑 也 其 曰 爲 鄭 之 顯 明 柱 壁 重

侯反。乘,徐食證反。」○鄭注:「鸞,或爲『樂』。」大路,殷路也。乘路,周路也。《釋文》:「駒,古鸞車,有虞氏之路也。鉤車,夏后氏之路也。

也。大路,木路也。乘路,玉路也。漢祭鄭氏曰:「鸞,有鸞、和也。鉤,有曲輿者

曰: 二 祀天。 質,未有鉤矣。」 天 略備,周有金、玉等五路,而用殷之大路 虞始爲之和、鸞,夏始爲之曲闌,至殷 乘 殷之路,今謂之桑根 鉤, 魯之乘路爲金路,而祀天亦乘大 曲 也。 曲 愚謂: 輿 謂 古時車制 曲 車 也 前 闌 也 質 孔 而 略 虞 以 制 氏

赤。《釋文》:「綏、依注爲「緌」,耳佳反。」有虞氏之旂,夏后氏之綏,殷之大白,周之大

也。 蕤。」 氏於旂之外又爲綏,殷人又增爲大白,周 鄭氏曰:「綏當作『緌』,讀如『冠蕤』之 誓》曰:「王右秉白旄以麾。」白旄,即大白 旄注於竿首而 人又增爲大赤也。綏及大白、大赤,皆染 》謂之「大麾」,言其可指麾也。 謂之綏者,言其垂旄緌緌然也。 愚謂: 有虞氏始爲交龍之旂,夏后 無旒。 **縿綏之色黑,夏所尚** 令書 I·牧 《周

> 夏后氏駱馬黑鬣,殷人白馬黑首 蕃鬣。《釋文》:「駱,音洛。 「番」,音煩。」 也。 建,而大赤,王用以朝,可合而爲 路建大麾以田。 麾之,則其杠蓋視九旗 常》之『通帛』,曰 之焉。○鄭氏注《周禮》,謂「大赤即 龍旂,而大麾、大白、大赤亦各因其事而用 姓以象路,四衛以革路,蕃國以木路,皆建 象路建大赤以朝,革路建大白以即戎,木 王之玉路建大常以祀,金路建大旂 此三 旗,皆在 諸侯則同 旜」,非也。 九旗之外, 鬣, 丽 力輙反。 稍小 姓封以 **旜乃孤卿** 也。 而可以秉之 周人黄馬 蕃,字又作 金 《周禮 乎 ? 一路,異 以實 司 所

黑 相 黑首,爲純白 鄭氏曰: 間也。 ,故用黑鬣。 「順 此馬白身黑鬣,故曰 図 正 色也。 也。 殷尚白, 白馬 孔氏 頭黑而 黑鬣 曰 駱。 曰 鬛 駱,白黑 白 夏尚 也。 殷

on a man with a man w

息營反,又呼營反。」 夏后氏牲尚黑,殷白牡,周騂剛。《釋文》:「騂,

作「犅」。各用其所尚之色也。剛猶牡也、《公羊傳》

著,殷尊也。犧、象,周尊也。《釋文》:「大,音泰,有虞氏之尊也。山罍,夏后氏之尊也。

鄭氏曰:「泰用瓦。著,著地無足。」 孔

泰,本亦作「泰」。著,直略反。」

用也。 尊。 也。 《禮器》亦謂之『罍尊』,非謂諸臣所酢之罍 殷 爲尊,因謂之壺尊也。」 有足也。」 氏曰:「疊,猶雲雷也,畫爲山雲之形也。 酢」,則山尊非諸臣所酢之罍可知。 是也。瓦尊起於大古,而有虞氏用焉。 之瓦尊無飾者、《燕禮》曰「公尊瓦大兩」, 享、朝享用大尊、山尊,諸侯唯 春夏用犧尊、象尊,秋冬用著尊、壺尊,追 彝》既言「山尊」,又言「皆有罍,諸臣之所 以「泰」與「山罍」連言,《司尊彝》以「大尊 「山尊」連言,則山罍即山尊可知。《司尊 尊著地無足,故謂之著,則泰、罍、犧並 以山罍爲尊,因謂之罍尊,亦猶 魯禘 兼用 方氏慤曰:「山罍,即 山 罍,而大尊、著尊未嘗 愚謂:泰,泰古 用當代之 山尊也。 天子 以 此 壺

爵,夏后氏以琖,殷以斝,周以爵。

斝 唯得 饋 鄭 曰:「斝有耳。」 獻 則未嘗用也 氏 以琖,酳 用當代之爵,魯禘兼用玉琖仍雕 曰:「斝, 戸以 畫禾稼 愚謂:天子 爵,説 也。」 詳《禮 朝獻 運 陳 氏 以斝, 祥 而 侯 道

文》:「勺,市灼反。」勺,夏后氏以龍勺,殷以疏勺,周以蒲勺。《釋灌尊,夏后氏以雞夷,殷以斝,周以黄目。 其

開., 鄭氏曰:「夷讀 尊,盛鬱鬯 之爲雞形。 蒲,合蒲如鳬頭也。」又曰:「雞彝,刻 彝、黄彝。』 龍,龍頭 禴,裸用雞 用之,魯用黄 《司尊彝》注。 如蒲草本合而末微 以 彝、鳥彝。 **斝讀爲稼。** 孔氏曰:「刻爲鳧頭,其 目 灌 而已。 爲彝。 者 也。 也。 秋嘗冬烝,裸 《周禮》:『春祠 開也。」 勺,所以酌鬱鬯 三代之彝,天子 稼彝,畫禾 疏,通刻其 愚謂 稼 用斝 也。 而 口 頭。 備 微 夏 灌 畫 而

注於瓚者也。

「費,讀爲由,苦對反。桴,音浮。」土鼓、費桴、葦籥,伊耆氏之樂也。《釋文》:

爲蜡,因謂其樂爲伊耆氏之樂焉。也。此上古之樂,而蜡祭用焉。伊耆氏掌土鼓、田桴,説見《禮運》。葦籥,截葦爲籥

八反。大琴,徐本作「瑟」。」代之樂器也。《釋文》:「拊,芳甫反。搏,音博。揩,居拊搏、玉磬、揩擊,大琴、大瑟,中琴、小瑟,四

禮 • 也。 《周禮》但有編磬,無玉磬,然《郊特牲》謂 鄭氏曰:「拊搏,以韋爲之,充之以穅,形 擊之,樂器之重者也。 禮》謂之「拊」、《虞書》謂之「搏拊」,此謂之 如小鼓。 拊搏」,一也。 大師》:「帥瞽登歌,令奏擊拊。」《周 四代,虞、夏、殷、周也。」 揩擊,謂柷、敔,皆所以 拊搏 所以令登歌,而大師 玉磬,特懸之磬也。 愚 謂 節樂者 ``《周

得 之,擽敔以止之,故《虞書》言「憂擊以詠」, 擊玉磬爲諸侯之僭禮,則天子之樂,編磬 絃,其常用者十九絃。頌瑟長七尺二寸, 絃。」《釋樂》又云:「大瑟謂之灑。」郭氏 之離。」郭氏云:「或曰:琴大者二十七 間」,以配堂下之樂也。《釋樂》:「大琴謂 故謂之擊。升歌與下管之樂,皆擊柷以起 揩,柷,中有椎,柄連底,撞之,令左右擊, 之外,别有玉磬明矣。 小瑟則有小琴,蓋天子備之,而魯有不盡 二十五絃盡用之。」「有中琴則有中瑟,有 「《禮舊圖》: 『雅瑟長八尺一寸,二十三 云"「長八尺一寸,二十七絃。」邢疏云" 以配堂上之樂。又言「合止柷、敔,笙鏞以 書》作「戞擊」,鄭氏及《書》孔傳皆以爲即 焉。 《虞書》曰:「戞擊鳴球,搏拊琴瑟 蓋敔以木擽其龃龉刻,故 揩,擽也。 揩擊, 謂之

之,揩以止之也。歌,而拊搏以令之,玉磬以節之,擊以起堂上,拊搏、玉磬、揩擊在堂下,琴瑟以升以詠。」凡此樂器,皆升歌之所用。琴瑟在

傳》曰:「世室者何? 《春秋》文公十五年「世室屋壞」,❶《公羊 並 君,其廟不可毀,故别立爲世室,已非諸侯 五. 之廟,親盡已毀,而至是復立也。 世室而已。成公六年「立武宫」、《公羊傳》 稱太廟,魯公稱世室。」是文公時唯有魯公 以爲出成王之所賜可乎? 已毁,乃再立於成公之時,而與魯公之廟 五廟之常。 至武公又非魯公之比,而其 曰:「武宫者何? 武公之宫也。」蓋武公 稱爲世室,以擬文武,則其非禮甚矣,而 廟,魯以周公爲太祖,而魯公乃始封之 魯公之廟也。 '禮,諸! 周公 侯 廟

文》:「貫,古唤反。璜,音黄。父,音甫。」

崇鼎、貫鼎、大璜、封父龜,天子之器也。《釋

瞽宗,殷學也。頖宫,周學也。《釋文》:「頖,米廩,有虞氏之庠也。序,夏后氏之序也。

於以考禮詳事也。魯謂之米廩。虞帝上鄭氏曰:「庠、序,亦學也。庠之言詳也,

代之學也。」 孔氏曰:「明魯立四樂祖,於此祭之。」 孔氏曰:「明魯立四所宗也,古者有道德者使教焉,死則以爲

外器,不獨魯有之,而曰『天子之器』,亦夸崇。古者伐國,遷其重器,以分同姓。大 」,夏后氏之璜。』」 孔氏曰:「《書傳》 名。定四年《左氏傳》:『夏后氏之璜,封 名。定四年《左氏傳》:『夏后氏之璜,封 父之繁弱。」封父與夏后氏相對,故知封父 文之繁弱。」封父與夏后氏相對,故知封父 分器,不獨魯有之,而曰『天子之器』,亦夸

辭也。」 愚謂:封父,疑古諸侯之字。

越棘、大弓,天子之戎器也。

鄭氏曰:「越,國名也。棘,戟也。《春秋

傳》曰: 『子都拔棘。』」

音玄。」 夏后氏之鼓足,殷楹鼓,周縣鼓。《釋文》:「縣,

孔氏曰:「《殷頌・那》之篇。鄭注云:『植我��鼓。』《周頌》曰:『應 朄縣鼓。』」上出也。縣,縣之簨虡也。《殷頌》曰:鄭氏曰:「足,謂四足也。楹爲之柱,貫中

頌》者,證周縣鼓。」 陳氏祥道曰:「足不『置讀爲植。」引之者,證殷楹鼓。 引《周

若楹之高,楹不若縣之垂,亦後世之彌

文耳。」

反。媧,徐古蛙反,又古華反。」「鍾,章凶反、《説文》作「鐘」,以此「鍾」爲酒器、《字林》之用垂之和鍾,叔之離磬,女媧之笙簧。《釋文》:

作「菨」。」 文》:「簨,本又作「筍」,恤尹反。 虡,音巨。 翣,所甲反,又 夏后氏之龍簨虡,殷之崇牙,周之璧翣。《釋 也。」 縣也。 用也。此節所言,下管、間歌之所用也 磬」,皇氏云:『無句,叔之别名。』義或然 名,有《作》篇,記諸 磬也,言其縣時希疏相離也。 孔氏曰:「和鍾,調和之鍾。 宓犧者。 鄭氏曰:「垂,堯之共工也。 曰:『垂作鍾,無句作磬,女媧作笙簧。』」 愚謂:上言四代之樂器,升歌之所 笙簧,笙中之簧也。 叔,未聞也。 作 和、離,謂次序其聲 事。 離磬,編離之 女媧,三皇承 《世本·作 云『無句作 《世本》,書

刻畫之爲重牙,以挂縣紘也。周又畫繒爲屬。簨以大板爲之,謂之業,殷又於龍上簨,飾之以鱗屬。植曰虡,飾之以羸屬、羽鄭氏曰:「簨虡,所以縣鍾、磬也。横曰

之八簋。《釋文》:「敦,音對,又都雷反。連,本又作 有虞氏之兩敦,夏后氏之四璉,殷之六瑚,周 ·璉」,同力展反。瑚,音胡。」 屬,則 樅」,是也。翣,扇也。 上,飾 簨之兩角』者,按《漢禮器制度》而知 璧於扇之上。云『垂五采羽 時簨、虡皆飾以龍,至周乃别,或因簨連言 筍飾以 重叠爲牙,謂之業,《詩・大雅》云『虡業維 虡」也。 彌 是筍飾 以 鱗屬,鍾 多 璧,垂五 崇,重也。 也。」 以龍。 虡 采羽 孔氏曰:「按《考工記 飾 簨上更加大版,刻 此并云『虡』者、蓋夏 以 於其下,樹於簨之角 周畫繒爲扇,戴小 羸 屬,磬虡飾 於其下,樹於 也。」 以 畫 羽

敦、璉、瑚、簋,四代之名雖異,而其實爲一云「分簋鉶」,則周之簋亦謂之敦矣。是愚謂:《特牲禮》先云「主婦設兩敦」,而後鄭氏曰:「皆黍稷器,制之異同未聞。」

八簋。魯之禘祭,蓋亦八簋與。四敦,以此差之,諸侯當用六簋,天子當用後王之彌文也。《特牲禮》二敦、《少牢禮》物也。有虞氏始爲兩敦,三代遞加焉,亦

房俎。《釋文》:「椇,俱甫反。」俎,有虞氏以梡,夏后氏以嶡,殷以椇,周以

俎頭各有兩足,足下各别爲跗,足間横者 **椇枳之樹,其枝多曲撓,殷俎** 故《少牢禮》: 『腸三胃三,長皆及俎距。』 之距者,言周代禮儀謂此俎之横者爲距 似横蹷,故鄭 棋之言枳椇也,謂曲橈之也。 鄭氏曰:「梡,斷木爲四 俎,足間 曰:『籩豆大房。』」 跗也,上下 歷也,謂中足爲横距之象,周禮 有横,似有横 兩間,有似於堂房。 讀爲歷,謂足横辟不正也 歷之象也。 孔氏曰:「嶡,謂足 足 而已。 似之。 房,謂足下 謂之距。 周 嶡之言 房俎 魯頌》

似堂之壁,横下二跗似堂東西頭各有

房也。」

夏后氏以楊豆,殷玉豆,周獻豆。《釋文》:「楊,

徐苦瞎反,又苦八反。獻,素何反。」

王后薦 之楬豆用之喪奠也。 禮》大斂「毼豆兩」,鄭云:「毼,白也。」毼 謂:楊豆,斷木爲之,而無他飾也。《士 音娑。娑是希疏之名,故爲疏刻之。」 鄭氏曰:「楬,無異物之飾 豆飾以 豆即楬豆。 齊人謂無髮爲禿楬。」 玉 玉豆。」是周 加 殷、周豆既有飾、故以夏后 不雕 周飾以玉 亦名玉豆矣。 《周禮 孔氏曰 也。 外宗》: 而又雕刻其 獻, 蓋 一般之 疏 · 佐 獻 氏 喪 愚 刻

有虞氏服韍,夏后氏山,殷火,周龍章。鄭

柄

,故别名獻

豆

注:「韍,或作「黻」。」

鄭氏曰:「韍,冕服之韠也。舜始作之,以

尊祭 也。 卿大夫山 龍,取其變化也。 山,取 服,禹、湯至 ,士韎韋而已。」 其 仁 · 可 仰 天子備之,諸侯火而下, 周增 也。 以 畫文,後 火,取其 王 明也。 彌

有虞氏祭首,夏后氏祭心,殷祭肝,周祭肺。 方氏慤曰:「有虞氏祭首,尚用氣也。氣 方氏慤曰:「有虞氏祭首,尚用氣也。氣 有虞氏祭首,夏后熙,尚 明氣也。至於三代,則

勝白,肺白也。」

夏后氏尚明水,殷尚醴,周尚酒。

非。 鄭氏 《禮運》云:『澄酒在下。』則周不 案《儀禮》設尊尚玄酒,是周 殷人稍文,故用 知言『尚』非也。」 曰:「此皆言其 孔氏曰:「 醴。 夏后 周 時之用耳,言『尚』 氏 人 尚 轉 亦尚 質,故 文,故 尚 明 酒,故 水也。 用 用 水。 酒。

九〇八

注了。 有虞氏官五十,夏后氏官百,殷二百,周

四代之官,此皆夸辭。」 也。 輔氏廣曰:「魯侯國,●必不能盡備之耳。周官三百六十,而言三百,舉成數之耳。周官三百六十,而言三百,舉成數之耳。周官三百六十,而言三百,聚成數

璧翣。《釋文》:「綏,耳佳反。綢,吐刀反,徐音籌。」有虞氏之綏,夏后氏之綢練,殷之崇牙,周之

飾 禮》大喪葬,巾 練爲之旒。殷又刻繒爲重牙以飾其側,亦 鄭氏曰:「綏亦旌旗之緌。夏韜其杠 喪,公西赤爲識,亦用此焉。《爾雅》説旌 天子八翣,皆戴璧垂 「持翣」,旌從遺車,翣夾柩路左右前後。 彌多也。 大夫四翣,士二翣,皆戴緌。 此旌旗及翣皆喪葬之飾。 ·車『執蓋從車持旌』,御僕 羽。 諸侯六翣,皆戴 孔子之 《周 一,以

> 也。 練旒 則是魯之喪制用天子之璧翣與。 翣戴璧,諸侯翣戴圭。 崇牙蓋刻於旌竿之首,以懸緌者也。天子 **遣車也。樂虡有崇牙以懸鐘、磬之紘,此** 車》「大喪執旌」,此旌是銘旌,故可執,非 終」者是也。 龍之旂、《爾雅》所言「纁帛緣,素升 此綢練之旌,謂乘車之所建,諸侯則爲交 有二旌"一爲銘旌,一爲乘車所建之旜。 練,綢其杠 旗 車上之大常。 日 綏,謂以旄及羽注於旗竿之首也。 九。こ 『素錦 而以練帛爲之旒也。 调杠, 天子則爲大常,鄭氏引《巾 愚 又銘旌當在柩路前,亦不從 謂 纁 此其喪葬旌旗之飾 帛縿,素 此云「周之璧翣」, 升龍於終, 《士喪禮》 龍 綢 於

❶ 「侯國」、《集説》作「百里之國」。

凡四代之服、器、官,魯兼用之。是故魯,王

禮也,天下傳之久矣,君臣未嘗相弒也,禮 之國,是故天下資禮樂焉。《釋文》:「弒,本又作 樂、刑法、政俗未嘗相變也。 天下以爲有道

殺」,音試。」〇鄭注:「資,或爲「飲」。」

結之。 間 孔氏曰:「既陳四代服、器、官於前,此經 禮。』是天下資禮樂也。」〇鄭氏曰:「春秋 道之國。《左傳》云:『諸侯宋、魯,於是觀 時,是周代之末,唯魯獨存周禮,故以 物中得有用之,不謂 簧,非唯四代而已。 髽而弔,始於臺駘,云 『君臣未嘗相弑』, 時魯三君弒,又士之有誄,由莊公始,婦人 『政俗未嘗相變』,亦近誣矣。」 朱子曰: 雍》詩,樂之變也。 夏父躋僖公,禮之變也。季氏舞八佾,歌 .亦有止舉三代者。此四代服、器,魯每 然言伊耆氏之樂,又有女媧之笙 此據其多者言之,其 僖公欲焚巫尫,刑之 事事用也。 作記之 公爲有

> 也。 變也。宣公初税畝,法之變也。 禘,非禮也,則此記所陳,適足以彰其僭 故歷舉其禮樂之盛 大夫,政之變也。 陳氏 澔曰:「此篇主於夸大魯國, 婦人髽而弔,俗之變 如此。 不知魯之郊 政 逮 於

禮記卷三十一終

而已。」

禮記卷三十二

賜 國 史館纂脩 進士及第翰林院編脩 孫希旦 集解

服 小記第十五之一《别録》屬《喪服

所 又廣記喪禮雜事,其事瑣碎,故名《小記》, 服》各章,又以補《喪服》經後記之所未備 經後有記,蓋以補經之所未備,此篇記《喪 是解傳中之曲折。」 朱子曰:《儀禮 以别於經後之記也。」 喪服》,子夏作傳,此篇 吴氏澄曰:「《喪服》

斬衰

括髮以麻。

爲母,括

髮以麻,免而

以

布。

《釋文》:「衰,七雷反,下並同。

爲,于僞反。

免,音

汶,篇内同。」

也。 也。 笄纚,而其髮不垂,以布約之,如括髮之爲 以 服殺而爲齊衰,故其始亦爲之括髮,至序 切之情,初無降殺,唯以家 之前,其服亦異。 階下之位而踊,襲經於序東,於此時改 奉尸侇於堂之後,主人降自西階東,即 父,自小斂後,括髮以 後,亦括髮以麻,與父禮同也。 以爲飾也。 東其髮,爲父小斂以後未成服以前之所服 斬衰者,主人爲父之服 髮而免焉。 而其髮下垂恐其散亂,故以麻約之,而因 麻自項中前交於額,又却 蓋親始死笄纚,既小斂後,則去笄纚 免而以布,此言其與父異者也。 爲母括髮以 蓋齊、斬之服 然父母之喪,其哀 至成服,爲母,則 也 麻者,母喪至小斂 不同,故未 無二尊,而母之 一繞於後 括 免者,亦去 髪以 麻者, 成 痛 服 括 迫 爲 阼 自 約

喪服》記曰:「女子子適人者爲其父母,

東襲絰而後改而免焉。所以明其服之本

同於父,而其降特有所爲焉爾。

「帶」字,據鄭氏注兼解笄、帶,當有「帶」字明矣。「除喪則已」之下,今詳文義宜在此。「惡笄」下,各本俱無文》:「齊,音咨,又作「齎」。」〇「箭笄終喪三年」句,舊在文》:「齊,音咨,又作「齎」。〇「箭笄終喪三年」句,舊在

> 要而除也。 要而除也。 要而除也。 要而除也。 要有首。」然則惡笄終喪者,女子子在室, 是子也。若女子子適人爲其父母,卒哭折 長子也。若女子子適人爲其父母,卒哭折 長子也。若女子子適人爲其父母,卒哭折 是子也。若女子子適人爲其父母,卒哭折 於喪之服,止於《喪服》記所言者,則此外 於喪之服,止於《喪服》記所言者,則此外

男子首有吉冠,則女首有吉笄,是男女首鄭氏曰:「别男女也。」 孔氏曰:「吉時,

❶「笄」、《禮記注疏》作「竹」。

笄。 若成服,爲父,男則六升布爲冠,女則. 婦人吉時有笄,喪自成服之後亦有笄,婦 者,吉時男子有冠,喪自成服之後亦有冠 之節,男子著免,婦人著髽,故云『男子免 纙 始死將斬衰。 人之笄與男子之冠相當也。男子免而 而婦人髽』。」 飾既異,遭齊衰之喪,首飾亦别: 爲笄,爲母,男則七升布爲冠,女則榛木爲 人之髽與男子之兔相當也。 人髽者,初喪,男子有免,則婦人有髽 之爲也。 人去孋 之異。 故云『男子冠而婦人笄』也。吉時 髽 而 而 纏。 加 髽 去纚則髮露髽髽然,故謂之髽。 若 以布 一,而以 親 小斂後,男子既 婦人去笄而纚,齊衰以 始死 繞額 愚謂: 男子冠而 麻繞額,齊衰以下 ,皆如男子括髮 男 去 冠, 免則 髽,露紒 女則 斬 當襲、 婦人笄 -,去笄 衰,婦 去 與 箭 下, 一, 婦 也。 笄 斂 婦 首 篠

免既用 之内,男不恒免,則婦人不用布髽,故知恒 服》云:『布總、箭笄、髽、衰,三年。』三年 免, 以 其著之以對括髮 麻、有布、有露紒。 者,言免與髽之義無他,特以爲男女之别 髽」也。 其義,爲男子則免,爲婦人則 髮散垂,其髮而以麻約之,免則髮不散垂。 布 婦 布髽者,此云『男子免』對『婦人髽』,男子 而已也。 垂,與男子之免同,故曰「男子免而 婦人之髽,雖有麻布之異,而其髮皆不 「免」,而不言「括髮」者,避文繁也。 麻」,則婦人於時髽亦 髽, 人之麻髽,所以當男子之括髮; 則婦人布髽也。 所 布,則婦人髽不用麻,是男子爲 以 〇孔氏曰:「髽者形有多種,有 當 男子之免。 一時 麻髽之形與括髮如 也。 知又有露紒髽者、《喪 前云『斬衰,括髮 用 麻 於男子 也。 又 婦 但言 又括 知 婦 人之 有

衰之髽用

謂

之露紒

之髽有麻髽、布髽、露紒髽,爲三,孔氏則 服》『女子子在室爲父,箭笄、髽、衰』,是斬 是齊衰布髽,皆名露紒。 今考校以爲止有二髽: 一是斬衰麻髽 紒恒居之髽則有笄以對冠,男在喪恒冠 子,還爲本親父母等,唯云『去纚大紒』,不 紒曰髽。』若如鄭旨,既謂姑、姊妹、女子 髽』,鄭謂: 『姑、姊妹、女子子也。 但戒其高大,不云有麻布别物,是知露 云『麻布』,當知期以下無麻、布也。 爾無總總爾,爾無扈扈爾。」』 宫縚之妻之姑之喪,夫子誨 麻,鄭注以爲露紒,明齊衰布髽 又齊衰輕 又案《奔喪》云『婦人奔喪,東 髽也。」 此三髽之殊,是皇氏之説。 期髽 愚謂:皇氏 必知然者,以《喪 無麻、布。 (調婦 去纚大 案《檀 然露 是 人 紒 之 髮以 謂 成 麻,則髽

婦則恒笄也。

弓

南

髽,曰:「

悉名髽也。

露紒

也。

未

笄、總而無麻、布,而皆無韜髮之纚,無纚 服之髽有麻、布而無笄、總,既成服之髽有 子則以髽卒哭者也。髽由露髻得名,未成 之布,成服則除矣。男子不以括髮終喪, 以釋三年之髽則不可。 衰三年」云:「髽,猶男子之括髮。 則紒露,故皆名爲髽。 卒哭,子折笄首以笄。」此婦則以髽終喪 此以髽終喪者也。《喪服》記:「女子子適 子在室爲父,皆布總、箭笄、髽、衰,三年。 後之髽。《喪服》:「妻爲夫,妾爲君,女子 人者爲其父母,婦爲舅姑,惡笄有首以髽 之免,此爲二髽。然齊、斬,婦人又有成服 括髮,齊衰以下,婦人有布髽,以對男子 服之前,斬衰婦 止有麻、布二髽,皇氏之説爲是。 亦以麻矣。」此以釋髽則可 人有麻髽,以 鄭氏注《喪服》「髽、 男子括髮之麻、免 對男子之 斬衰括 蓋

髽 用 婦 麻、布,則布髽何所施乎? 期以下未成服時之服也,若期以下髽無 成服以 人豈 布,則髽亦皆用 下悉免,則婦 ,則又非是。 後,而皇氏謂期以下無麻布 以 麻 髽 一終喪哉 未成服之前,男子自齊衰 人 布。 自齊衰以下悉髽,免皆 ? 故婦人之布髽,正 然 露紒 髽 爲 唯 露紒 施 於

苴杖,竹也。 及絰。 皆圓 杖。 謂:此明齊、斬之杖之所用也。 杜氏預曰:「削 杖,以配苴衰,而其色亦相似,故謂 有蕡者,其色黧黑。斬衰之喪,用爲 小 謂之削杖。 而 體本圓 削杖,齊衰之杖也,用桐而削治之,故 ,故必削治之也。苴杖黧黑,削杖稍 苴杖,斬衰之杖也。 削杖,桐也。《釋文》:「苴,七余反。」 杖大如経,経圓則杖亦圓。竹 ,故斬而用之。 杖,圓削之,象竹。」 桐木大又不必 斬 衰 苴,麻之 用 竹 衰裳 爲 苴 爲 愚

> 祖父卒,而后爲祖母後者三年。 也。」 鄭氏 澤 而 晢 曰:「祖父在,則其服 一故以 孔氏日 爲 :「此論 齊、 斬 輕 適孫 重 之别 承重之服,若 如 父在爲母

父在則不然。」

愚謂: 此言爲喪主拜賓之法。喪拜以稽鄭氏曰:「喪尊者及正體,不敢不盡禮。」

大夫弔之,雖緦,必稽顙。

顙爲重,自期以下,則吉拜而已。

婦人爲夫與長子稽顙,其餘則否。鄭氏曰:「尊大夫,不敢以輕禮待之。」

蓋稽顙唯施於三年,婦人所爲主而三年言矣。其餘則否,謂爲期喪以下爲主也。父母之喪,無爲主之法,則其不稽顙不待鄭氏曰:「恩殺於父母。」 愚謂:婦人於

者,唯夫與長子耳,其餘期 以下則手 拜

而 邑

男主必使同姓,婦主必使異姓

鄭氏曰: 一謂 爲無主後者爲主也。 異姓,

同宗之婦也。 婦人外成。」 庾氏蔚曰:

「喪有男主以

接男賓,女主以接女賓。

父母之喪,則適子爲男主,適婦爲女主。 今或無子婦,遣他人攝主,若攝男主,必使

喪家同姓之男,婦主,必使喪家異姓之 愚謂:婦主必使異姓、《士虞》記:

「女,女尸,必使異姓。」古人之慎辨於族類

如此

爲父後者,爲出 母 無服。《釋文》:「爲出,于僞反。」

鄭氏 曰:「不敢 朱子曰:「此尊祖敬宗,尊 以己私 廢父所傳重之祭 無二上

之意。」 絶,故不敢以 愚 謂 其 喪廢宗廟之祭也 喪者不祭,而母 出

與

廟

親親以三爲五,以五爲九,上殺、下殺、旁殺 親畢矣。《釋文》:「殺,所戒反,徐所例反。」

而

曾祖 者也。 殺,應小功,高祖應緦麻,而曾祖、高祖 祖 爲九也。上殺者,謂服之由父而上而漸殺 正尊,不敢以大功、小功旁尊之服服之,故 而親孫之子、孫,則及曾孫、玄孫,是 爲九者,己上親祖,下親孫,爲五。 親子之子,則及孫,是以三爲五也。 以三爲五者,己上親父,下親子,並 以期斷,加隆焉則三年,而其漸殺也 而親祖之父、祖,則及曾祖 三。又以父而親父之父,則及祖,以 此言先王制服之義也。 三月,由親有遠近,故服有隆殺也。 由期殺,應大功,加隆 則減其日月,重其衰麻 至親 以 期 斷 ,服父加隆,故三年。 先王之制服 放期。 一、高祖 一, 而 曾祖 服 又 又以 齊衰三 極 至 由 以 子 親 以 己 以 期 乃 五. 爲 孫 袓 Ŧi. 而 親 於 親

弟,由 祖 祖 但 也。 正 也 月 者 此 從 從 此皆己之昆弟,由己 父昆弟大功,從祖昆弟小功,族昆弟緦麻 殺子、孫之昆弟也。 大 體 尊 闪 孫 服 齊 也 タト '期殺,宜九月,而服父三年,世叔父與父 高 (功而 總麻。 亦 無 ,故加至 同 衰三月,曾祖報服亦三月,而曾孫卑, 本服報之,故期。孫爲祖 子服父加隆至三年,父尊, 父、祖 祖 ·殺者 袓 服 也。 以本服報之,故九月。 從 殺 加 也。 齊 放故 隆,故至期。 而殺父、祖之昆弟,由子、孫而 玄孫自緦麻三月無可降,故 「, 謂 旁殺者,謂 期。 衰三月無可 此皆父之昆弟由父而 五月。 服 從祖父既疎,加所不及, 之由 一而旁殺者也。 昆弟至親 族父又疎 由 子 殺,故 而從祖 己 丽 而殺己之昆 下 加隆 故期。 自適子外, 曾孫 而 與 故總麻 **一疎,加** 世叔父 曾曾 漸 至期, 旁殺 服 祖 殺 從 亦 與 曾 者 同

故正報 弟據 族曾祖 高 殺極 弟之孫服 之昆 報服期。 世叔 緦 及曾孫之昆 兄弟之孫服 及曾祖之昆弟由祖及曾祖 不 而 爲子期。 麻。 搋 祖 沈氏括曰 及,據大功 之 弟 父加 五 殺 於高祖)所 緦 月 曾祖 五. 由 極 麻 族 從父昆弟之子服從祖父母 朔 而 出 月,族兄弟之子正報緦麻。 昆弟之子宜九月,而昆弟之子爲 子 乎 報 從祖 :「《喪服》但有曾祖 而 弟由孫及曾孫而 祖總麻,報 殺,故三月。 據 ,下殺及於玄孫,旁殺又極於 ,世叔父旁尊,不足以加尊,故 而 而殺,故五 九 止 期殺,本 漸 亦 族,而 ,故曰「親 小功,報亦 殺者 緦 麻。 此 也。 亦 應 月。 緦 此 此 外 五 盡 一而殺 小功。 外 外 麻。 無 祖 月 族祖又疎,故 殺 無服。 無 爲 口 曾祖 浴者也。 蓋其 者 服。 族曾孫爲 、曾孫,而 孫 復推 也。 從父兄 大功。 無 由隆 此 之昆 此 也。 加 父 孫 袓

祖也。 無高 也。 服。 月, 《喪服》不言高祖之服,然族曾祖父母、族 皆曰『曾孫』。」 也。 是《喪服》「齊衰三月」章之「曾祖」,原非專 祖父母、族父母、族昆弟謂之四緦麻,此皆 王於后稷,亦稱曾孫。 易者也。 者,必爲服喪三月」,此雖聖人復起,不能 謂祖之父,而沈氏所謂「自祖以 出於高祖之親而 上殺、下殺之服有不盡於九族者矣,而 親 畢」何也? 高祖宜三月,服之殺極於三月,夫是以 是不然。 至親以 苟有相逮者,則必爲服喪三月。 祖、玄孫。 或曰: 經之所不言則不 自孫以下,皆曾孫也。 然則旁殺之服,雖盡於九族,而 期斷,則祖應九月,曾祖 曾,重也。 蓋據其本服之所殺者 有服 愚謂:沈氏之言是也。 ,則高祖有服 祭禮祝辭,無遠近 自祖 以上,皆曾 雖百 上苟相 加可知 故成 宜 世 而 逮 Ŧi. 山

謂之「親畢」。

禮,不王不禘。王者禘其祖之所自出,以其禮,不王不禘。王者禘其祖之所自出,之上。」以《大傳》證之,良是。今在「王者禘其祖之所自出」之上。」以《大傳》證之,良是。今祖配之。《釋文》:「王,如字,又於況反。」○「禮,不王不禮」、不王不禘。王者禘其祖之所自出,以其

之所自出,而以其祖配之。 天祀 之主,爲其 之意,故又推始祖所自出之帝,追祀之於 帝王既立始祖之廟 自黄帝,以祖顓頊配黄帝而祭。」 王氏肅曰:「禘,宗廟 未相遼絶,祭祀之理亦自易理會。 始祖之廟,而以始祖配祭。此祭不兼群 曰:「不王不禘,明諸侯不得有也。 曰:「禘之意最深長,如祖 地,猶有天地之顯然者,不 疏 遠 而不 ,猶謂未盡其追遠尊先 敢褻故 五年祭之名,祭其祖 若虞氏之祖 考與自家身心 也。 敢 至如 趙氏匡 禘者 朱子 · 盘 其 廟 出 郊

九一八

苟 此 心 感格之道。 2哉?」 非 至 察理之精微,誠意之極至,安能與於 祭其始祖, 今又推其始祖所 已自大段闊遠,難 自 出 而祀之, 盡 其

而立四廟。

陳氏 祖 所自出,以其祖配之,而立四 而立 廟爲始受命而王者,於理或然。 也。」玄成以禘爲祭天,固不足信,以 命而王,祭天以其祖配,不爲立 有 而王者,不必備事七世,故立四廟,止 已爲七廟。 曰:「此句上有脱簡,當曰『諸侯及其 而 ,而《周禮》「守祧八人」,自姜嫄之外,亦 四廟。」 己,其上親盡,不祭可也。」 祥道曰: 德》已言「七世之廟」。 是始受命而王者不唯立四 「韋玄成曰: 愚謂:商自湯始王,而《咸 『王者禘 周 廟。 自武王始 蓋始受命 廟, 言始 劉 大祖 一於高 親盡 氏 其 立 廟 受 敞 四 祖

諸侯五廟,自大祖外,又立親廟四也。明矣。此必言諸侯之禮,劉氏之説得之。

庶子王亦如之。

耳。 鄭氏 道 如陳氏、陸氏之説,則國統中絶而庶子別 言「立七廟」,不當承「立四廟」之文 立,其立廟亦 之』也。」 祖、禰當别立廟祀之,故曰『庶子王亦 若漢光武復有天下,既立七廟,則其 世,中更衰亂,統序既 其不忘本也。」 其祭天立廟亦如世子之立也。」 廢祖、考之祭乎? 「慈母與妾母 曰:「庶子爲王 愚謂:鄭注謂「世子不得立而 "「世子有廢疾不可立,而庶子立, 劉 如世子」,果爾,則 不世祭 氏敞曰:「此一句當 陸氏佃曰:「此言王者後 ,雖有正統七廟,其可輙 於是自立四廟,所以 也」之下,脱誤 絶,其子孫有起者 に庶子 陳氏祥 也。 承 Ě 庶子 在 後 前 加 文 著

當闕所疑。 服,而此文承之。大約此篇簡策多爛脱, 廟祭亦非庶子王之所主也。劉氏不以此 適子主其廟祭。 庶,非爲王朝卿大夫,則出封爲諸侯,自當 起爲王,三代時固未嘗有此。 自當别立 有廟。若人繼正統者爲祖父之庶,則自有 句承「立四廟」之文,獨爲得之,而謂當 慈母與妾母不世祭也」之下,則恐亦未必 疑此上當有言庶子爲君,爲其母之 是其四廟固無待庶子王然後立,而其 昆弟爲卿大夫、諸侯,以主其廟 若入繼者爲祖父之適,則 且天子之支 承

别子爲祖,繼別爲宗。

先君。繼别爲宗者,别子之世長子,爲其 後世爲始祖也。 鄭氏曰:「别子爲祖者,諸侯之庶子,别爲 (人爲宗,所謂百世不遷之宗也。) 謂之别子者,公子不得禰 孔氏

> 宗,言其百世不遷,宗之者衆也。 遷之大宗。」 之世世長子,恒繼别子,與族人爲百世不 夫,立此别子爲始祖。 適,故稱 曰:「别子者, 别子。 謂諸侯適子之弟,别於正 愚謂:繼别之宗,謂之大 爲祖者,别子子孫 繼別爲宗,謂 爲 别子 卿

者也。 繼禰者爲小宗。有五世而遷之宗,其繼高祖

者、與親兄弟爲宗。族人一身、凡事四宗、 或有繼祖者,與同堂兄弟爲宗,或有繼禰 爲宗,或有繼曾祖者,與再從兄弟爲宗, 長子,爲其昆弟爲宗也。謂之小宗者,以 鄭氏曰:「繼禰者爲小宗,謂别子庶子之 後,族人衆多,或有繼高祖者,與三從兄弟 禰,皆至五世則遷。」 四:或繼高祖,或繼曾祖,或繼祖,或繼 其將遷也。 五世而遷,謂小宗也。小宗有 孔氏曰:「别子之

高祖 出於高祖之父者,不復宗之矣。宗至於繼 别子庶子之子,一世爲繼禰之宗,二世爲 子之庶子。 宗,以其五世則遷,宗之者少也。 唯云『繼高祖』也。」 之宗,其實是繼高祖者之子,但記文要略 則合遷徙,不得與族人爲宗。 上從高祖,下至玄孫之子。 始,據初爲元,故特云『繼禰』也。 高祖之宗,至五世則爲繼高祖之父,而同 繼祖之宗,三世爲繼曾祖之宗,四世爲繼 大宗 而止,又一世則遷,故曰「有五世而遷 爲 五. 繼禰者,即别子庶子之子也。 也 小 宗 愚謂: 雖 四 此玄孫之子, 繼禰者爲小 此五世合遷 初 皆 禰,即别 五世,謂 繼 禰 爲

宗所以尊祖、禰也。是故祖遷於上,宗易於下。尊祖故敬宗,敬

之宗,其繼高祖者也」。

此言小宗之所以遷也。祖遷於上,謂高祖

親 高祖之父者不復宗之也。 世則遷也。 繼高祖之父者亦不爲宗,此小宗之所以五 祖、禰由之而祭焉爾。高祖之父不祭,故 人莫不宗事焉。蓋以支子不祭,而我之 皆祭之所及者也,故其宗子之主祭者,族 謂小宗至五世爲繼高祖之父,則其同出於 之父,親盡於上而不 而爲之節文,故立五宗以糾序族人,使之 有孝弟之心,親睦之道。先王因其有是道 疎 有以相附,赴告有以 ○陳氏祥道 復祭也。 曰:「人生而莫不 蓋自高祖以下, 相 通 ,然後恩義 宗易於下,

庶子不祭祖者,明其宗也不失,而人倫歸厚。」

宗也」。祖,以自有繼祖之宗主祖之祭,故曰「明其祖,以自有繼祖之宗主祖之祭,故曰「明其庶子不祭祖,此謂祖之庶也。祖庶不祭

庶子不爲長子斬,不繼祖與禰故也。《釋文》:

鄭氏 斬。 爲 禰皆指謂庶子之祖、禰,鄭氏之説,於經意 説 謂 祖與禰」、《喪服》傳又云「不繼祖」者,鄭氏 爲 重者也。 子服斬衰三年,蓋以正體於上,又所將 禰 子,以其當爲 曰:「不繼祖與禰,兩舉之者,明父之重 其長子爲不繼祖,合而言之也。」 周曰:「不繼祖與禰,謂庶子身不繼禰,故 言不繼祖、禰,則長子不必五世。」 尤協 亦通,但玩記、傳並據庶子立文,則祖 繼禰之適,則將傳重矣。 ,於子則祖也。」 容祖 蓋庶子不祭,無傳重之義故也。 也。 、禰共廟」者是也。 「尊先祖之正體,不二其統 若身是庶子,則不得爲長子服 馬季 禰 後 ·長注《喪服》,謂「五世之 也。 愚謂:《喪服》父爲 其所繼者,於父則 記乃言「不繼 譙氏、劉氏之 劉氏 譙氏 然 也。 身 長 長 智 傳

耳。 也。 也。 年,誠當如敖氏之説,然欲以是推凡爲庶 爲長子三年』者,其誤矣乎?」 禰者也,而其服乃若是,則所謂『庶子不得 亦三年,與大夫同矣。 公之昆弟,不繼祖 弟爲其庶子,服與大夫同,則爲其適子服 者也。○敖氏繼公曰:「『殤小功』章云: 承二重爲長子斬」,皆非 而無重可傳者,又在孔氏所言「四條」之外 後是也。 正,庶子爲後是也。 適,父乃爲之服斬」,孔氏 『大夫、公之昆弟,爲庶子之長殤。』公之昆 「禮,爲後者有四條皆不爲斬:有 殤小功」章推之,則公之昆弟爲其長子三 有正 四者皆期,唯正 愚謂:庶子不爲長子斬,此乃正 有傳重 體而不傳重,適子有廢 而 非 有正 體又傳重者乃極 正體,庶 也。 又引庾氏 而不體,適孫 〇孔 孫 疾 愚謂: 爲 不 體 氏 謂一已 立是 曰 後 而 服 是 爲 不

禮記卷三十二

所以爲之三年與? 乃繼别之宗子,與尋常庶子之子不同,此雖上無所承,而身爲後世之大祖,則其子

庶子不祭殤與無後者,殤與無後者從祖祔食。 禮焉。」 鄭氏 殤與 祭之禮,而云「庶子不祭殤 人而 喪也,其服必玄。」此殤之除服之祭也 祭。」此殤之祔祭也。《小記》曰:「除殤之 其吉祭特牲。」鄭云:「卒哭成事之後曰 無後,謂成人而無後者也。 祖,無所食之也。 其神依祖 二祭則止。 無 無後者亦然。 曰:「此二者,當從祖 後者 而食,此即殤之祭也。 愚謂:殤,謂未成人而死者也 《曾子問》:「宗子爲殤而 既 袝於祖 共其牲物,而宗子主其 殤與無後者 ,

自後祭祖之時,則 袝 與 殤唯祔與除服 食而 無 無 後者」,蓋 殤與無後 已,不祭 四 時吉 死 成 吉

> 也。 者從 祖 祭」,故以不祭殤專爲父庶,不祭無後 與無後者皆不得祭之矣。鄭氏謂 後者皆不得祭矣。 殤者,父之庶也。 後者,祭於宗子之家。」○鄭氏 殤與無後者矣。《曾子問》曰 庶,其説非是。 祖 愚謂:己爲父庶,則己子之殤 祔 食,而 庶子不祭宗 説詳《曾子問》。 己爲祖庶,則昆弟之殤 不祭無後者,祖之庶 廟 一,风 日 則 「庶殤不 「不祭 殤 不 與無 得祭 與 無

庶子不祭禰者,明其宗也。

子不祭祖,明其宗也。」文意重複,似是衍 祭其四小宗所主之祖、禰也。其《小記》則 祭,明其宗也,此《大傳》文。直謂非大宗 祭,明其宗也,此《大傳》文。直謂非大宗 是,明其宗也,此《大傳》文。直謂非大宗 此謂父之庶子也。父庶不祭禰,以有繼禰 此謂父之庶子也。父庶不祭禰,以有繼禰

禰適 字。 自立 雖 謂祖之適也。下正,謂禰之適也。 俱爲適士。 言祖? 而言「不祭祖」,故知是宗子、庶子 適,明有所宗也。 凡正體在乎上者,謂下正,猶爲庶也。」疏 以爲本也,禰則不祭矣。言不祭祖者,主 五宗悉然。]今姑存之,然恐不如《大傳》語 立祖廟祭之,而己是祖庶,雖俱爲適士,得 適子烝、嘗,庶子獨不祭者,正是推本崇 云:『庶子、適子,俱是人子,並宜供養,而 謂宗子、庶子俱爲適士得立祖、禰廟者也。 庶人亦然。」於『不祭祖』則曰:『明其尊宗 『謂宗子、庶子俱爲下士,得立禰廟 簡 禰廟,而不得立祖廟祭之也。 而 ,而於祖猶爲庶,故禰適謂之庶 而鄭氏曲爲之説,於「不祭禰」則曰 事反該悉也。」 適士得立祖、禰二廟。宗子得 父庶即不得祭父,何假 愚謂:上言「不祭 雖正爲 正體 也 也。 雖

者也。親親、尊尊、長長、男女之有别,人道之大親親、尊尊、長長、男女之有别,人道之大

之『旁治昆弟』,此章所謂『旁殺之親』也。 尊尊,謂親而又尊者,《大傳》謂己『下治子、孫』,此章所謂『下殺之親』也。 長長,谓親而又尊者,《大傳》謂之『上治宮,謂親而非尊非長者,《大傳》謂鄭氏曰:「言服之所以降殺。」 吴氏澄鄭氏曰:「言服之所以降殺。」 吴氏澄

男女之有 君之服謂 皆據治親 服」也。」 親」、《大傳》之『服術』所謂『名服』、『出入 姓之女往爲他姓婦者,是謂『内治夫婦之 該乎其中矣。 尊尊之服 一節義同。不及君之服者、蓋此及《大傳》 莂 雖但主於一家而言,而君之服已 ,而但言其服之以恩制者也。 之方喪,乃準乎父之服而起,則 愚謂:此與《大傳》「服術有六」 分,謂他 姓之女來爲本姓婦 ~",本 然

也服。從服者,所從亡則已。屬從者,所從雖没

從服 母之君母,二是妾子從君母服君母之黨。 空服之者也。 黨,三是夫從妻服妻之黨。徒從本非親 屬從,謂有親屬而服之者也。 是妻從夫服夫之黨,二是子從母服母之 ,謂徒從者也。 其服 有二:一 徒,空也 ,謂非親 是子從母服 其服 有三: 屬 而

君,皆與此所言「從服」無與。此所謂「徒

主言治親之服,則臣服

君之黨,妻服夫之

妾猶 屬 己。 君 所從雖没猶服。 長子、祖父母」也。君没之後,其長子則新 不同,説見於後。若臣從君而服君之黨 君」,則所從亡不服者。 也。《大傳》疏言「徒從」内有「妻爲夫之 從新君而服也,皆不可謂「所從亡則已」 君没之後,新 君也,其妻則固小君也,其父母、祖父母, 則《喪服》「齊衰」章云「爲君之父、母、妻、 而服君之黨。此四徒之中,唯女君雖没, 母,三是妾子爲君母之黨,四是臣從君 是妾服女君之黨,二是子從母服 ,故所從亡則不服。 服女君之黨,其餘三徒,所從 愚謂:妾服女君之黨,與從服之義 ·君承重,皆爲之三年,則臣亦 〇孔氏曰:「徒從有四: 屬從 但此與《大傳》皆 本有 親屬,故 於母之 八亡則

從」,唯謂子服母之君母,妾子服君母之黨

而已,皆所從亡則已者也。

「爲,于僞反,下「爲妻」同。」妾從女君而出,則不爲女君之子服。《釋文》:

子同。《釋文》:「適,丁曆反。」世子不降妻之父母,其爲妻也,與大夫之適

者,明大夫以上雖尊,猶爲適婦爲主。」本所以正見父在爲妻不杖,於大夫適子懷妻之父母,爲妻故,親之也。爲妻亦齊以大夫之適子同」,據《喪服》之成文也。至言表不杖者,君爲之主,子不得伸也。主言之以母,爲妻故,親之也。爲妻亦齊鄭氏曰:「世子,天子、諸侯之適子也。不

愚謂:君、大夫皆不降適婦之服,故其子處謂:君、大夫皆不降適婦之法不降其正尊亦不降其妻,蓋尊厭之法,於正體皆不厭也。妻之父母,從服也。公子厭於君,爲妻,與大夫之適子同,故於其妻之父母, 服不降。《喪服》「緦麻」章云「妻之父母」, ,與大夫之適子同,故於其妻之父母」, 不顯大夫以上之服。以此記推之,則雖大 不顯大夫以上之服。以此記推之,則雖大 不顯大夫以上之服。以此記推之,則雖大 不顯大夫以上之服。以此記推之,則雖大 有一體,妻之父母乃妻之正尊, 以然者,夫婦一體,妻之父母乃妻之正尊, 以然者,夫婦一體,妻之父母乃妻之正尊,

其尸服以士服。 父爲士,子爲天子、諸侯,則祭以天子、諸侯,

祭祀之法。言父爲士,子爲天子、諸侯,舉嫌於卑之。」 愚謂:此謂父賤而子貴者尸服士服,父本無爵,子不敢以己爵加之,鄭氏曰:「祭以天子、諸侯,養以子道也。

適 爵 極 所以 命 賤 者上之所施於下,故以己爵 極貴者,以 卑其父也 概 其餘 也。 衣服隨 加其父, 爵 命,

士服。 父爲天子、諸侯,子爲士,祭以士,其尸服以

士,不 祖。 此亦舉 服。 其 族之賢 滅,而其子不得封,别封其族之賢者以繼 者,祀其先君以禮卒者,尸服天子、諸侯之 者,不必封其子爲王者後,及所立爲諸侯 天子之子,當封爲王者後,以祀其受命之 祭此廢滅之天子、諸侯,尸以士服,而所封 先世,諸侯見廢,而其子不得立,别 父以罪誅,尸服以 云『爲士』,則擇其宗之賢者若 如 敢僭用尊者衣物。」 ·極尊極卑者以 遂 者以繼其先君,則廢滅之君之子, 無所 封立,則尸 士服,不成爲君 概之也。 也、祭也、皆 愚謂: 鄭氏 、天子見 微子 立其 曰: 也 如

> 服也。 聖人而不惑也。」 將 固 不 諸侯之服宜矣,至於以禮卒者之君,而亦 比有之。 秦以降,而後興替之不常,貴賤之懸殊,比 曰:「此所言固當時所絶無 之祭宗 卒者之上服也。 立之諸侯,祭其先君以禮卒者, · 得 來之人情事物不能違焉,所以百世以俟 不可以有天子、諸侯之服也。 服 天子、諸侯廢滅,其尸不得服天子、 其服者,則以其子之爲士,士之廟 廟,雖先 先王制禮,以 君以禮卒者,其尸亦 若遂. 無所封立 該括古今之變,而 而僅有,自周、 ,則其子孫 其 ○應氏鏞 户 ,得用 服

婦當喪 期,音朞,下文皆同。」 練而反則遂之。《釋文》:「爲,于僞反,下「不爲」同 則三年,既 而 出 練 ,則除之。 圃 出 可則已"· 爲父母 未 練 喪,未 加 反則期,既 練 而出

鄭氏曰:「當喪,當舅姑之喪也。出,除喪

既 也。 者,喪事即遠,已除之喪,無復服之理也。 除,隨兄弟故也。」 服三年之受,而夫命反之,則猶遂三年乃 隨兄弟之節,兄弟小祥之後無變服節 除,則不復反服。所以然者,若反本服,須 也,若父母喪已小祥,而女被出,期喪已 更隆於父母也。 祥,則隨兄弟服三年之受,以既絶夫族,情 期,若父母喪未小祥而被出,值兄弟之小 夫命己反,則還夫家,至小祥而除,依期服 女遂止也。未練而反則期者,喪未小祥 母喪,未練而 夫遣出,恩情既離,故出即除服也。 練而 族 既練而反則遂之者,己隨兄弟小祥, 也。 當喪 反則遂之者,練後祥前無除服之節 而 孔氏曰: 出則三年者,女出嫁,爲父母 出者,謂正當舅姑之喪,被 既練而出則已者,已,止 愚謂: 既練 此 明婦 人遭喪出 而 出則已 爲父 故 而 人

除喪也

故也。

月之喪,一時也。 七月之喪,三時也。五月之喪,三時也。三月之喪,三時也。斯之喪,二年也。九月、再期之喪,三年也。期之喪,二年也。九月、

故期而祭,禮也。期而除喪,道也。祭不爲鄭氏曰:「言喪之節應歲時之氣。」中殤皆爲之大功,長殤九月,中殤七月。七月之喪,大功殤服也。成人期喪,其長、

除也。 禮,謂舉祭禮以存親。 謂:期而祭者,謂 鄭氏曰:「此謂練祭也。 子除首經,婦人除要帶,祥 惻之情益衰,衰則宜除,不相爲也。」 亡至今而 而行大祥之祭也。 [夫禮則有不忍忘其親之心,順乎 期,期則宜祭。 期而行小祥之祭,再期 期而 道,謂 除喪者,謂練 禮,正月存親,親 期,天道一變,哀 而總除衰杖也。 順天道 以 Щ 男 愚

道 悖者也 過 所主,而不 ,故送死 不可過。 則 有不 敢過於哀之意。 有已,復生有節 相爲也。 不忍忘,故有終身之憂,不 然親 固不可忘,而 二者之義,各 ,又並行而不 相 敢 哀 有

而除喪。三年而后葬者必再祭,其祭之間不同時,句。

易奠, 鄭氏 者 既 以 謂:上言「祭不爲除喪」,此又言除 時 異月也 葬者也。 葬 也。 ,謂宜於祔之明月而練,於練之明月而 無祭也。 必異月者,以 而 曰:「再祭、練、祥也。間不同 雖 必 而 閱再期,而練、祥之祭不得行,故 練、祥爲吉祭,未葬則不得以 再 既袝,明月 除喪者,祥則除,不禫。」 三年而后葬,謂 爲練、祥也。 (葬與練) 練 而 其祭之間不同 、祥本異歲,宜 祭,又明月祥 以 事 故 喪不 久 時 不得 虞 時 可 異 當 愚 而

> 之,而不必中月與。 而遽服吉服者哉 禫」,非也。 其當橝 及禫者、蓋三年而葬、或尚在禫月之前 也。 之義,而必 也。三年而后葬者,服已將除,固 不除,至是而於練除首經,於祥總除 必異月也。 練、祥之祭本異歲,雖喪已三年,而其祭亦 祥,其祭之中間間 既練、祥,則亦當有禫,蓋即 無疑,故不必 爲練、祥,則以 服之變除有漸,豈有甫畢祥祭 而 除喪者,久而不葬者 隔 所以僅言「再祭」而 言言 也。 服 而 不 必 鄭 미 因 於祥後 氏 同 祭 無 謂 . 時 , 其 衰杖 脯 存 不不 ''; 則 爲 親 除 喪

朋友虞、祔而已。《釋文》:「爲,于僞反,下同。」大功者主人之喪,有三年者則必爲之再祭,

則小功、緦麻爲之練可也。」 孔氏曰:有三年者,謂妻若子幼少,大功爲之再祭,鄭氏曰:「謂死者之從父昆弟來爲喪主。

也。 則各依服月數而止。 九月之期。 功,則不當至期,當云「至大功」。 若死者但有大功,則大功主者至期,既惟大 主者爲之至練。 但爲之虞、祔也。 不歆非類,當虞、祔否?』曰: 兄弟之喪,雖疏亦虞之。」謂無三年及期者 大功爲之祥及練,小功、緦麻爲之練,朋友 若 而慮生者不能久其事,故以 祭之耳。』」 愛,固當安之袝之,然後義備,但後日不當 袝,謂主幼而爲虞、祔也。 若都無主族,神 也。」〇田氏瓊曰:「劉德議問:『朋友虞〉 親重者爲之遠祭,親輕者爲之近祭。 祔,以死者祔於祖也。 往 小功、總麻至袝。 若又無大功, 拊 應氏鏞曰:「爲死者無主後, 孤 之義, 期喪無練,此「練」字當作「期」。 若死者有期親 故《雜記》云: 『凡主 則 雖 或期讀如字,謂大功 親 過 朋友恩舊 於 疎爲之節。 『虞,安 ,則大功 厚 而 故 神 親 無

士妾有子而爲之緦,無子則已。傷也。」

功。 非也。 子而爲之緦矣。○鄭氏注《喪服》謂「士妾 當厭降矣。妾以姪、娣爲貴、《士昏 期。大夫不服其妾,故其子厭降而爲大 賤,不足殊」,而以貴臣、貴妾爲大夫之服 庶母,貴臣、貴妾」,則士妾之貴者,不必有 謂妾之賤者也。 者可知也。 爲之緦,則有子而爲之緦者,其爲非姪、娣 云:「雖無娣,媵先。」姪、娣爲貴妾,士皆 若大夫爲貴妾有服,則妾子爲其母不 士爲妾之有子者緦,故其子得伸 《喪服》「緦麻」章云「士 禮 爲

否。《釋文》:「税,皇他活反,徐他外反,下同。」生不及祖父母、諸父、昆弟而父税喪,己則

異邦而生己,己不及此親存時歸見之,今鄭氏曰:「謂子生於外者也。父以他故居

其 其服者必不敢不致其情矣。 者矣。夫唯不以不能及之情制服,而後服 接,喪又已遠,勉而服之,情必有所不能及 而非徒以其服而已。今此諸親,恩既不 父母也,諸父也,昆弟也,此皆期服而不税 税喪者,喪與服不相當之言。」 當其時則服。 己則否者,不責非時之恩於人所不能 蓋先王之制服,必使情足以 服 年月已過 税讀如『無禮則税』之稅。 乃聞之,父爲之服 愚謂:祖 稱其文, 也。

下節明期喪有不税,此節明緦、小功有税, 際,則不稅」下,鄭氏云、「宜承,父稅喪,己則否」。」 展而在總、小功者,謂本齊衰、大功之親, 下,鄭氏云、「宜承,父稅喪,己則否」。」 上爲親,小功以下爲疏,親者稅,疏者否。 上爲親,小功以下爲疏,親者稅,疏者否。 上爲親,小功者則稅之。舊在「君已除喪而后聞

相對爲義,所以明稅喪之變也。

則不税。《釋文》:「爲,于僞反。」爲君之父、母、妻、長子,君已除喪而后聞喪,

無稅法矣,始非也。然則「妻」蓋衍字與。無稅法矣,始非也。然則「妻」蓋衍字與。書之父母、則,然君之父、母、長子,從服也。君之父母服期也。爲君之父、母、妻、長子,如君之服也。君爲矣,必不君之服也。爲君之父、母、妻、長子,以他故久留。」 愚謂:君之父母,此鄭氏曰:「臣之恩輕也。謂卿大夫出聘鄭氏曰:「臣之恩輕也。謂卿大夫出聘

君服之,非税義也。」 愚謂"近臣在君人、宰、史也。」 孔氏曰"「君服而近臣從者。近臣,閽、寺之屬也。其餘,群介、行數氏曰"「謂君出,朝覲不時,反而不知喪近臣,君服斯服矣。其餘從而服,不從而税。

不從而稅,謂君限外聞喪,君稅則不從而從而服,謂君限內聞喪,君服則從而服也。側,故不計聞喪早晚,君服則服。其餘則

君雖未知喪,臣服已。

税也。

服也。凡從服者悉然。」 电,君雖未知,在國之臣自如尋常依限著也。」 孔氏曰:「此謂君出而國内有親鄭氏曰:「臣服者,●所從雖在外,自若服

禮記卷三十二終

「臣」、《禮記注疏》作「從」。

0

九三一

禮記卷三十三

國史館纂脩孫希旦集解賜進士及第翰林院編脩

喪服小記第十五之二

鄭氏曰:「哀益衰,敬彌多也。虞於寢,祔虞,杖不入於室。祔,杖不升於堂。

於祖廟。」

《釋文》:「不爲,于僞反,下「爲君」同。」爲君母後者,君母卒,則不爲君母之黨服。

曰:「爲君母後,謂無適立庶子爲後也。鄭氏曰:「徒從也,所從亡則已。」 孔氏

適,故特明之。」 愚謂:《喪服》傳曰:妾子於君母之黨悉徒從,嫌爲後者同於

黨服 黨服 爲君母後,宜與爲人後之禮不殊。 子如子。」子於母黨,不以母没不服,則爲 衍文與。 可以君母没而不服矣。 不爲其母之黨服,則當爲君母之黨服,不 不二統,而亦不可 者,爲其外祖父母、從母舅無服。」夫外親 亦不二統。」《喪服》記曰:「庶子爲父後 徒從矣。《服問》曰:「母出則爲 爲君母後,則其於君母之黨,乃屬從 人後者,於母黨必不以母没不服矣。 爲人後者,爲其妻之父、母、昆弟,昆弟之 母死 ,則不爲繼母之黨服。」鄭云:「外 則爲其母之黨服。 以 無 然則此「不」字,其 統 也。 庶子爲後, 爲 繼 其 母之 母之 蓋既 庶子 而 親 非

聲。去,起呂反,下「去杖」同。」経殺,五分而去一。杖大如絰。《釋文》:「殺,去

者小。 以爲齊衰之絰。 絰,五服之首絰也。 五服之絰,重者大,輕 麻絰大三寸六百二十五分寸之三百有 之七十六,五分去一,以爲緦麻之絰。緦 小功之絰。小功絰大四寸百二十五分寸 五寸二十五分寸之十九,五分去一,以爲 之大也。 謂斬衰之苴杖,齊衰之削杖,各如其首絰 一,五分去一,以爲大功之絰。 杖,斬衰、齊衰之杖也。 斬衰苴絰,大搹 齊衰絰大七寸五分寸之 圍九寸,五分去 杖大如絰, 大功経大

妾爲君之長子,與女君同。

孔氏曰:「女君爲 外,其餘悉與女君同。 長子三年。」 鄭氏曰:「不敢以恩輕輕服君之正統。」 正 統傳 重之義,係於女君 愚謂: 妾之服自爲 [長子三年,妾亦 唯爲君之長子之 而 其私 不係 爲 女君 於 親

妾,故特明之。

除

喪者先重者,易服

者易輕者。

絰也。 哭,男子變麻服葛,婦人則變首絰,不變要 除喪,謂練時 哭,遭齊衰之喪,輕者包,重者特。 亦然。 以明新喪之爲輕; 絰不變也。 婦人則以齊衰之首絰變斬衰之葛絰,而 哭已變麻服葛,又遭齊衰之喪,男子則以 重喪之舊服 除其所重 **經。至練,而男子除葛絰,婦人除麻帶,各** 絰也。凡絰,男子重首,婦人重要。 之爲重也。 齊衰之要絰變斬衰之葛帶,而首絰不變; 《 間 易服者易輕者,謂若先遭斬衰,卒 也。 傳》曰:「斬衰之喪,既虞、卒 蓋二喪兼服,而變其輕者,所 若齊衰既虞而遭大功之喪者 也。 也。 易服,謂以輕喪之新服,易 輕,謂男子要經,婦人首 重,謂男子首絰,婦 留其重者 ,所以表舊 既卒 人要 喪 要

之。」是也。小功以下無變。喪、既虞、卒哭,遭大功之喪,麻葛兼服

反,徐扶亦反。」無事不辟廟門,哭皆於其次。《釋文》:「辟,婢亦

晝 也。 弔,入門即 殯宫門也。 則入即位。」 廟,殯宫。 鄭氏曰:「無事不辟廟門,鬼神尚幽 時之哭,則皆於倚廬之中也。 夜無 次,謂倚廬。 時。」 哭皆於其次,無時哭 位,則 鬼神尚幽暗,若朝夕哭,及受 孔氏曰:「辟,開也。 暫開之,若無 朝夕哭入門,若晝夜無 凡葬前哭, 事 也。 剘 廟門, 暗 不開 有事 也

《釋文》:「一本無「知姓」二字。」稱名,婦人書姓與伯仲,如不知姓,則書氏。復與書銘,自天子達於士,其辭一也。男子

其上也。其辭一者,謂復之辭與銘之辭復,招魂也。書銘,謂爲銘旌而書死者於

與伯 半 同 喪禮》:「爲銘,各以其物,亡 曰 夫人,亦以字配姓與。 銘曰「天子之柩」。諸侯曰「某甫復」,書 夫、士之禮。 之柩」,復亦 曰: 『某氏某之柩。』。」是也。婦人書姓 銘曰「某甫之柩」。 「叔姬復」。如不知姓,則書氏,曰「某氏 叔姬之柩」也。其復則亦曰「伯 幅、經末、長終幅、廣三寸、書名於 也。 「某復」,是稱名也。 旧仲,謂 男子稱名,謂復 書銘也。 曰「某氏 若天子則曰「天子復」, 王后則曰「王后」。 如曰「伯 復」也。 銘 也。 亦 \sim 書名。 則 土 此 姬之柩」, 一喪禮 以緇 皆謂 姬 復 で, 長 》復 書 大 末

麻同,麻同皆兼服之。斬衰之葛與齊衰之麻同,齊衰之葛與大功之

俱七寸五分寸之一,帶五寸二十五分寸之鄭氏曰:「斬衰之葛,齊衰之麻,其経之大

十九。 同,故兼服之,而首絰與要帶仍得爲五分 麻絰帶也。 虞、卒哭受服之葛絰帶也。麻,謂始喪之 葛,帶下服之麻。婦人則經下服之麻,固 去一之差也。 視其首絰五分而去一,今此麻、葛之絰、帶 服」之文,主於男子。」 自帶其故帶也,所謂易服易輕者也。 之,謂服麻又服葛也。男子則絰上服之 分寸之七十六。皆者,皆上二事也。 五寸二十五分寸之十九,帶四寸百二十五 齊衰之葛,大功之麻,其絰之大俱 麻同皆兼服之者。 愚謂:葛,謂既 凡要帶必 兼服 『兼

報葬者報虞,三月而后卒哭。《釋文》:「報,依注 音赴,芳付反。」

祭,待哀殺也。」 鄭氏曰:「報讀爲『赴疾』之赴。 而葬也。 既葬即虞。 孔氏曰:「安神宜急,而 虞,安神也。 謂不 卒哭之 待期

> 父母之喪偕、先葬者不虞、祔、待後事。 則每日朝夕哭猶在殯宮,但不奠耳 奪哀不忍急也。」 愚謂:既虞而未卒哭,

其葬

服斬衰。

事反服 袝、卒哭之祭也。 父喪既葬而虞、祔、卒哭畢,乃爲母行虞、 也。後事,謂葬父之事也。 父喪未葬,則不敢爲母行安神適祖之祭 則虞、祔各以其服矣。及練、祥皆然。卒 葬父皆服斬衰也。 葬事。其虞也,先重而後輕。』待後事 後重。』又曰:『反葬奠,而後辭於殯,遂脩 鄭氏曰:「偕,俱也。謂同月若同日死也。 重,不葬不敢變服 如此也。 先葬者,母也。 重。」 其葬服斬衰者,喪之隆哀宜從 愚謂: 先葬者不虞、祔者, 《曾子問》曰:『葬先輕 其葬服斬衰者,言葬母 也。 ○鄭氏曰:「假令父死 言『其葬服斬衰』, 待後事者,待 而

則當以 後葬父。 曰: 其説,以至於二月、三月,則是有 謂父死在前月之末,母死在後月之初,雖 母之前月 愚謂: 葬有定月,父母之喪偕,以同月死, 在 未 云隔月,而相去祗數日,則仍當先葬母,而 云「父死在前月,而同月葬,猶服斬衰」,此 二月、三月,但是未葬之間 前 葬者矣,有是禮 「前月, 月, 同月葬,故先輕而後重。若父死在 此於情事固當有之,而 圃 ,則固當先葬父而後葬母矣。 謂 同 月 母 死前 葬, 乎? 猶 之月 服 也。 斬 ,皆是前月。」 衰。」 或 孔 五月而 疏乃申 月, 孔 鄭 尚 或 氏

大夫不主士之喪。

○鄭氏以此爲祖不厭孫,非也。大夫爲衆近,而祖之尊遠也。諸侯庶子之子亦然。 降其昆弟,孫則不隨祖而降其父,父之尊 大夫厭其庶子,降爲大功,其衆子隨父而 大夫除其庶子,其孫不降其父。

> 乎 ? 功,此 降,非所謂不厭 生者也。 子大功, 《喪服》言「厭」者,皆謂: 以尊厭降其庶孫 此以尊厭降其衆子 大夫降其庶 孫也 也。 子,其子 何謂 也 厭死 不從 祖不厭 爲 者 庶 ··•, 非 祖 孫 厭 孫 而 小

有爲大夫者,尊不得主之也。」爲主。」 孔氏曰:「士死無主後,其親屬鄭氏曰:「士之喪雖無主,不敢攝大夫以

爲』、「爲母之」、「爲妻禫」、「爲庶母」、「爲祖庶母」皆同。」 爲慈母之父母無服。《釋文》:「爲,于僞反,下「其妻 服。 之父母 之父母 親則非因母,尊則非君母,故不服其父母 命爲母子,本非骨肉,故不爲慈母之父母 鄭氏曰:「恩不能及。」 服,以 服 愚謂:母之父母,從服也。 以以 尊統之 親屬之而從焉者也。 而 從焉者 孔氏 也。 日: 爲 爲 「父雖 慈母 君母 因 母

夫爲人後者,其妻爲舅姑大功**。**

善。」」 鄭氏 税。 服 曰: 期 之,亦猶《喪服》「齊衰不杖」章「爲 之本生父母乃亦稱舅姑者,據其本親言 母,則其妻當謂夫所後者爲舅姑,而 識,豈不從夫服也? 熊氏 否。假令夫之伯叔在他國而死,其婦 等服大功。 也。』今案:夫爲本生父母期,故 又恩義不相接,猶臣從君 家方昏者,不服本舅姑,以婦本是路人來, 爲其父母」之義也。 本舅姑大功。若子出時未昏,至所爲後 ,嫌其妻或據 人生不及祖之徒而皆不責非時之恩 日 賀云: 『此謂子出時已昏,故此婦還 愚謂: 「以不貳隆。」一作「降」,非。 是從夫而服,不論 夫爲 所後者之親 爲人後者爲 人後,謂所後者 而服,不從君 云:『然賀義 疏 以 識舅姑 貧 服 人其父 人後者 妻降 其 於夫 爲 雖 孔 舅 母 父 未 賏 而 不 氏

士袝於大夫則易牲姑,故特明之。

爲祖服 牢。」 袝者? 鄭氏 易牲而祔於女君也。」 而 將於是祭焉,不祔於是而安祔乎? 孫乃祖之正體,祖遞遷於上,則祖之廟,士 所言「無士可祔」者亦該焉。《雜記 適爲士,而祔於祖之爲大夫者也。 而孔氏 大夫」者,謂無士可袝,猶 於大夫而已。蓋大夫雖尊,與天子、諸侯 於大夫之尊,然而無士可祔, 義決也。 ·士不袝於大夫。」此謂祖庶爲士者耳。 有異也。 [日:「不敢以卑牲祭尊者也。 孔氏曰:「賤不祔貴,而云『士祔於 · 斬,祖爲之服期,不聞大夫之爲士 禮本人情,雖經記未明言,而 若庶孫既卑,固不可以 豈有於其死而卑遠之,使不得 愚謂:此主謂祖 如妾無妾祖姑 則亦唯有 士之卑祔 大夫少 **∀**⊟: 適孫 可 以 滴 祔

之絶宗者固不同也。

繼父不 財 居之義 後,同 釋不 異 鄭 而 皆 以 不 乃 亦 繼父齊衰三月,而此釋其同居、不同居之 之夫也。《喪服》同居繼父齊衰期,不 同 此 · 得 居 主 也 爲 氏 祭 謂之不同居。 愚 異財 其 同 同居之義也,言必嘗同 謂 其 謂之繼父,不爲 異居,則三月。 日 財 居 祖 事 也 喪者也。 繼父不同居也者,必嘗同 丽 繼父者,子隨母嫁 ,故同居,今異居,及繼父有子, 禰 也 也。 録 祭其祖、禰 者,必嘗同 無主,謂無 ",爲同 恩服深淺也。 同 無後 繼父若本 財, 居。 未嘗同 與 謂 之服 ,爲同居」,此 居。 大功以上之親 有主後者 此子共貨 無 - 未嘗 也。 見同 居 一, 而 子 居,則不服。」 皆無主 也 而後異居, 謂 「皆 同居 財 爲 |居」,此 母 財 皆 後 則 異 同 無 所 同 也。 期 居。 可 同 主 則 居 嫁

> 已也。 而其喪一 蓋 禰 後者 禰 後之甚可憫,乃爲之齊衰期,若其恩雖厚 或雖無子,而 祭 至,則不得終其同 父初無大功之親,與此子同 八其祖 則 也。 繼父本非骨肉,必其恩之甚厚,又無主 爲 是同居矣。 不 異 備此三者,然後 禰,築宫 至於無主,則爲之齊衰三月 居,此又釋 有大功以 廟 而其後繼父或自有子, 居,而謂之不 而 不 使 上之親自 同 爲 此 同 居之義 子 財 居 自祭 加 也。 同 祭 他國 也 居 其 其 有 祖 也 祖 而 M È 纀

哭朋友者於門外之右,南面。

外。 鄭氏 在中 也。 哭於門外而在西,避内喪朝夕哭門外之位 凡 庭、於門外則在西、所以爲親疎內外 티 : 於非 愚 「變於有服之親 謂:門外之右,寢門外 骨肉之喪而哭之者,於門 也。 門 外 之西也。 内 寢門

之别也。南面者,哭而不爲位之禮也。凡

哭而不爲位者,主人南面,弔者北面。

祔葬者不筮宅。

祖,若祔廟然。不筮者,以其昭穆有一定葬之法,始祖居中,以昭穆爲左右,孫從其祔葬,謂葬於祖之旁也。宅,墓兆也。族

「亡,如字,又音無。」 亡則中一以上而祔,祔必以其昭穆。《釋文》: 大夫者。 其妻祔於諸祖姑,妾祔於妾祖姑,士、大夫不得祔於諸侯,祔於諸祖父之爲士、

之,謂祖貴,宜自卑遠之也。諸祖父爲士、大夫者。不得祔於諸侯,卑别也。既卒失,各就其先君爲祖者兄弟之廟而祔之。哭,各就其先君爲祖者兄弟之廟而祔之。既卒,以曰:「士、大夫,謂公子、公孫之爲士、鄭氏曰:「士、大夫,謂公子、公孫之爲士、

袝必 祭」,則妾無廟,今乃云祔及高祖者,當爲 祖而 之始死,其神無所依則不安,故爲之祔焉 寢而祔之也。 壇袝之。」 則中一以上而祔者,亡,無也,中,間也,若 祔於妾祖姑,言妾死亦祔夫祖之妾也。亡 諸侯之貴絶宗,故大夫、士不得袝也。 袝祖. 夫祖無妾,則又間曾祖而祔高祖之妾也 祔於大夫」,而大夫不得易牲祔於諸侯者, 族之屬不爲諸侯者也。 **祔於諸祖姑也。若祖無兄弟可祔,亦祔宗** 是夫之諸祖父兄弟爲士、大夫者之妻也。 大夫者,謂祖之兄弟也。既不得祔祖,當 夫既不得祔祖,故妻亦不得祔於祖姑,而 祔 以其昭穆者,解所以祖無妾,不袝曾 之兄弟亦爲大夫、士 高祖之義也。 愚謂: 妾無 凡無廟者,祭皆於寢。 〇人 下文云『妾母不世 然上云『士易牲而 廟 者也。 而 得袝者,祭於 諸 祖 姑

則其 使其託 説者,其孰能與於斯? 王制禮之精意,非通幽 事 不祔,祭可以别所,而祔必於其祖 歸葬者,皆是也。 女子未嫁 復特祭者,如妾之無子者,殤與無後者,女 所祔皆非其所祭也。且有但祔而已,而不 也。 (所袝 唯天子、諸侯及宗子自祖適以上, 於祖以安。 而死者,●出 之廟即祭之之所,此外祔 然可以不祭,而不可 故祔者,所以畢送死之 明之故而知死生之 而 歸者,未 爾見 此先 廟 其 以 丽

於士。
諸侯不得祔於天子、天子、諸侯、大夫可以祔

季之廟也。天子、諸侯、大夫可以祔於士, 於天子,如周公薨於周,則不可祔於王 於天子,此謂始封君及封君之子也。不得 於天子,此謂始封君及封君之子也。不得 ,以司:「天子、諸侯、大夫可以祔於士,

> 大夫、士者,皆可祔也。 古爲諸侯、大夫者,皆可祔也。諸侯之子 有爲諸侯、大夫者,皆可祔也。諸侯之子 子若孫爲諸侯,不得祔於祖,其祖之昆弟 子若孫爲諸侯,不得祔於祖,其祖之昆弟 此謂士、庶特起居尊位者也。可以祔於

爲母之君母,母卒則不服。

君母,徒從也。母之妾母,屬從也。則不服。爲母之妾母,母卒猶服也。母之所從亡則已。」 愚謂:爲母之君母,母卒鄭氏曰:「母之君母,外祖適母,徒從也,

宗子母在爲妻禫。

不禫。若父没母存,則爲妻得杖又得禫。「賀瑒云:『父在,適子爲妻不杖,不杖則鄭氏曰:「宗子之妻尊也。」 孔氏曰:

子,其餘適、庶母在,爲妻並不得禫也。 然。』賀循云:『宗子母在 凡適子皆然。 服,以示其不敢盡同於母之意,而非厭降之 之厭其妻而特明其不橝乎? 妻之喪,雖天子、諸侯不降,亦何嫌於宗子 謂:此條二賀氏之説不同,而後説爲是。 與父在爲母悉同,故母在則不禫,微殺其 人尊微,不奪正服,並 嫌宗子尊厭 一厭其 爲妻禫,則非 餘哀。」」 其妻,故 蓋爲妻之服, 特 婦 宗 愚 云

有不杖,謂適子父在母没爲妻也。適子父子爲母,庶子在父之室爲其母,皆是也。禫禫,禫有不杖」之説。杖有不禫,若出妻之夫爲之申禫,五宗悉然。賀循又有「杖有不子之妻,與宗子上承宗廟,下統族人,故其

爲慈母後者,爲庶母可也,爲祖庶母可也。

在爲妻不杖,而母没得申禫也。

按"「爲」字舊並于僞反,今當如字。

可命 或但 子者也。祖庶母,祖妾之有子者也。 母後」者也。 之終其身,死則喪之三年。」此所謂「爲 子。」命子曰:『女以爲母。』若是,則 《喪服》傳曰:「慈母者何也? 之幼少而無母者,不能不資乎撫育,而己 子,即與祖妾之有子者爲子亦可也。 爲子亦可也,非但可與父妾之有子者爲 與父妾之無子者爲子,即與父妾之有子者 欲廣慈母之義,故言爲慈母後者,非但 子」云爾,非立後之義也。庶母,父妾之有 者,妾子之無母者,父命妾曰:"女以 此因《喪服》慈母如母一條而欲廣其義也。 盡 事之變也 爲 有有子之妾,或無妾而 母子以撫育之,所以通禮之窮,而 爲慈母後者,猶云「爲慈母之 但 有父妾,皆 妾之無子 記者 蓋子 生 可 慈 養

謂也。宗子母在爲妻禫者,舅没則姑老,宗

『則爲其母』、『子爲妻』皆同。」爲父、母、妻、長子禪。《釋文》:「爲,于僞反,下文

慈母與妾母,不世祭也。鄭氏曰:「目所爲禫者也。」

於寢。 世祭也。」 愚謂:大夫、士之妾母蓋祭 生其祭。於子祭,於孫止。」鄭引此明不得 主其祭。於子祭,於孫止。」鄭引此明不得 主其祭。於子祭,於孫止。」鄭引此明不得 於孫止。」」 孔氏曰:「《穀梁》隱五 鄭氏曰:「以其非正。《春秋傳》曰:『於

「冠,古亂反。」 丈夫冠而不爲殤,婦人笄而不爲殤。《釋文》:

而笄,未許嫁與丈夫同。」 鄭氏曰:「不爲殤,言成人也。婦人許嫁

爲殤後者,以其服服之。

爲人父之道,以本親之服服之。」 孔氏鄭氏曰:「言『爲後』者,據承之也。殤無

不服。 未練 蓋爲後者於殤之父,其父子之義定於來後 乃不服殤以兄弟之服,而以 追服矣。」 後如有母亡,而猶在三年之内,則宜接其 服服之」者、蓋在未後之先、不復追服、不 子,則應服殤以兄弟之服,而云『以本親之 殤者爲子,以其殤無父義故也。 之日,而殤之亡在先也。 未後之前者,亦宜終其本服之日月。 責人以非時之恩。 者,據己承其處爲言也。 人爲後大宗,以殤之父爲父,而不得後此 曰 餘服,不可以吉居凶。 「爲殤後者 而來後,則三年。 愚謂:爲後者以 謂 推此時本親兄弟亡在 大宗子 若出三年,則不復 已練 所後如 既爲 爲 其服服之者, 殤之父爲父, 殤 丽 而 殤者父作 曰『爲後』 來 有母亡, 死,而 後,則 唯所 族

久而不葬者,唯主喪者不除,其餘以麻終月

數者,除喪則已。

爲正 也。 葛,仍猶服麻,各至服限竟而除也。 者悉不除也。其餘,謂期以下至緦也。以 葬,謂有事故,不得依月葬者,則三年服皆 者長服 經葬故也。 則已者,謂月數足而除喪,不待主人葬除 麻終月數者,主人既未葬,故諸親 父、妻爲夫、臣爲君、孫爲祖得爲喪主,四 不得祥除也。 不葬者喪不變也。」 鄭氏曰:「其餘,謂旁親也。 不得同以卑主尊,無緣以卑之未葬而使尊 `君所主夫人妻、大子、適婦。 ·及其葬也,反服其服」,雖緦亦然,以 然此皆藏之,至葬則反服之,故下云 耳,餘親以麻終月數除矣。」庾云: 衰 経 盧云: 『子孫皆不除,以主喪 也。 云『唯主喪者』,欲廣説子爲 是知「主喪不除,無爲下 孔氏 曰:「久而 以麻終月數, 以尊主卑, 不 其未 除喪 · 得 不 變

> 尤重者言之耳。 也。 俟葬而後除與。經言「主喪者不除」,據其 正尊,以「缟冠玄武,子姓之冠」推之,或亦 子爲父母,則雖非主喪而不除者也。 内,未可以卑者之服概之。 除,此主謂子爲父母,適孫受重爲祖 也。」盧氏云『子孫皆不除』,蕭望之又云 之爲父,臣之爲君,妻之爲夫,此之不除 『獨謂子』,皆未善也。」 愚謂:主喪者不 流」之義,唯於承重之身爲其祖、曾。若子 然爲長子服斬,亦宜在主喪不除之 若臣爲君,衆 祖 父母 爲

齊衰三月,與大功同者繩屨。

等,而 煮 杖期者麻屨,三月者繩 愚謂: 鄭氏曰:「雖尊卑異,於恩有 齊衰三月輕於齊期,大功亦輕於齊期, 其屨有三:三年 繩 屨,繩 麻 屨 也。 ·與杖期者疏屨,不 屨。 齊衰之服 大功亦 可同 也。」 繩 爲四 屨,

其差次略相似,故其屨同。

后杖拜送賓。告具而后去杖。筮日、筮尸,有司告事畢,而練,筮日、筮尸、視濯,皆要絰、杖、繩屨,有司練,

鄭氏 筮也。 也。 服 司,執事者也。」 尸,視濯具,則豫服小祥之服,以臨此三事 唯有要経,而病尚深,故猶有杖,屢是末 後杖拜送賓」,不言「視濯」者,蓋自此至祭 拜送於門外,此云「筮日、筮尸,告事畢 先去之。筮日、筮尸、視濯皆有賓,事畢皆 即位於堂下,練祭,杖不入於門,故於視濯 去杖。」視濯去杖,敬祭事也。 也。不言『衰』與『冠』者,亦同小祥矣。 ,變爲繩 曰:「臨 《喪大記》曰:「聽 孔氏曰:「喪至小祥,男子除首經 麻。 事去杖,敬也。 將小祥前,筮祭日,筮 愚謂: 筮而 卜有事於尸, 濯 視濯,主人 去杖,敬蓍 ,謂溉祭器 方,而 有 祭 則

大祥吉服而筮尸。

庶子在父之室,則爲其母不禫。 服也。 去絰、杖、繩屨,故不云:『杖、絰、屨』。」 唯云『筮尸』者,從小祥可知也。 日豫服大祥之服,以 事,不以凶臨吉也。」 鄭氏曰:「凡變除者,必服其吉服 大祥縞冠朝服,今將欲祥,亦於前 臨 孔氏曰:「吉服,朝 筮 日、筮尸、視濯 大祥則并 以 即 祭

禫,如下言「則猶杖」也。禫爲服外微奪之「此謂不命之士父子同宫者也。若異宫則鄭氏曰:「妾子父在厭也。」 孔氏曰:

死者無服,非父尊之所厭,而子自屈於父 也? 耳。 推之可見矣。 者,若公子不服妻之父母是也。 於是。有父之所服,未嘗以尊厭之,而子 謂死者爲尊者所厭而不得伸也。 故,或降之或絶之者,則其子亦降之絶之, 蓋子與父同有服,而父於所爲服者以尊 厭之説也。「齊衰杖期」章「父在爲母」傳 自屈於父者,若父在爲母期是也。 曰:「何以 庶昆弟爲母、妻、昆弟」傳曰:「何以大功 之者自抑謂之屈。《喪服》「大功」章「公之 服》有厭有屈" 所爲服者見厭 厭其妾也。 先君餘尊之所厭不得過大功也。」此 愚謂: 士爲妾之有子者緦,是未嘗 期也? 不禫者,爲近父屈也。 屈也。」此屈之説 謂之厭,服 其餘以此 屈則異 有父於 ○≪喪 也。

庶子不以杖即位。

不以杖即位,避正主也。 謂: 喪不二主,適子爲喪主者杖,則 孔氏 鄭氏曰:「下適子也。位,朝夕哭位。」 至中門外而去之,以下於適子也。」 曰:「適子得執杖至阼階哭位 一,庶子 庶子 愚

父在,庶子爲妻,以杖即 父不主庶子之喪,則孫以杖即位可也 厭也。 杖」云「姑不厭婦」,皆非也。喪之杖、不 厭孫,則於適子之子又何以反厭之? 杖,以杖即位、不以杖即位,皆不由於厭不 爲喪主,故得以 亦喪不二主也。父不主庶子之喪,則其子 父主適子之喪而杖,則其子不以杖即位 「祖不厭孫,孫得伸也」,又注「姑在爲夫 若謂庶子之子得以杖即位爲祖不 杖即位。 位可 ○鄭注 此 條云

喪主也。父不主庶婦之喪,則其子自主

父主適婦之喪,適子爲妻不杖,爲其疑於

也。

之,故得以杖即位。

諸侯弔於異國之臣,則其君爲主。

代其臣之子爲主。」 「諸侯無親弔異國臣之禮,若來在此國,遇 「諸侯無親弔異國臣之禮,若來在此國,遇 敢當主,中庭北面哭,不拜。」 孔氏曰: 鄭氏曰:「君爲主,弔臣,恩爲己也,子不

免。主人未喪服,則君亦不錫衰。諸侯弔,必皮弁錫衰。所弔雖已葬,主人必

之服 鄭氏曰:「必免者,尊人君,爲之變也。 喪服,未成服也。既殯成服。」 **弔弁無飾耳。不言「君弔」而曰「諸侯弔」** 之弁絰,弁而加環絰。」上言「皮弁」而下但 師》:「王之皮弁,會五采玉璂,象邸。 弁錫衰,諸侯弔其卿大夫,及大夫自相 言「弁」,蒙上之辭也,則其爲一物可知,但 也。皮弁即 弁 經 也。 《 周 愚謂:皮 禮 未 王 弁 弔

同也。 也。 將葬,既啟而免,既葬變葛則不 者,蒙上「弔異國之臣」,見與弔其臣之服 始死以至卒哭,卒哭乃不免。 者,著諸侯弔無内外皆如此。]〇孔氏曰: 氏佃曰:「凡諸侯弔,皆皮弁錫衰,言『必』 則皮弁襲裘也。 言之也。 功以上皆免,此但言「主人」者,舉其 成服之前也。下文云「親者皆免」,則自大 時括髮,此但兔而不括髮,又所以異 雖已葬,主人必免者,尊人君,特爲之變 輕,輕服爲免之節,自始死至殯,殯後不復 免,至葬啟殯之後而免,以至卒哭如始死。」 凡五服,大功以上爲重,重服爲免之節,自 愚謂: 免者,未成服之飾也。成服以後, 已葬必免,則葬前可知。 凡喪,小斂而免,至成服 未喪服,謂未成服也。 若未小斂,則吉服 小功以下爲 主人未成服 君不錫衰 免。 則不 (於未 所弔 重者 免; 陸

「重服爲免之節,自始死至卒哭」,非是。啟殯以前,悉無免法,親疎皆然。孔氏謂

養有疾者不喪服,遂以主其喪。《釋文》:「養,羊

尚反。」

鄭氏曰:「不喪服,求生主吉,惡其凶也。 遂以主其喪,謂養者有親也,死則當爲之 主。其爲主之服,如素無喪服。」 孔氏 曰:「如素無喪服者,養時既去其服,今疾 者身死,己爲之主,還與素無服同也。」 愚謂:養疾者必玄端,喪無服玄端之法, 愚謂:養疾者必玄端,喪無服玄端之法, 上之親,故有喪服而爲之養疾,及死而遂 上之親,故有喪服,求生主吉,惡其凶也。 爲之主喪也。

不得爲主,其有親來爲主者,素有喪服與鄭氏曰:「人,來也。謂養者無親於死者,非養者入主人之喪,則不易己之喪服。

有服 凶爲嫌也。 己來主其喪也。 謂疾者無子,或子幼而養者無服,及死 若新死重,則仍服死者新服。」 當服,則皆三日成也。」 素無喪服者異。素無服、素有服,爲死者 重 ,而新死者輕,則 及三日,則爲之成服 不易喪服者,已死則不以 成服 孔氏 而 曰:「若本 愚謂:此 反前 服。 圃

養尊者必易服,養卑者否。

《之喪,虞、卒哭,其夫若子主之。 祔則紀妣爲祖姑,而女君之稱則通乎其上也。

主之。婦之喪、虞、卒哭、其夫若子主之。祔則舅

焉。」 可知。 事,而不主其祭也 哭祭婦,非舅 鄭氏曰:「婦,謂凡適婦、庶婦 婦之喪,虞、卒哭,其夫若子主之,則練、祥 自祔至於練、祥,皆使其子主之。」此主 然則舅主適婦之喪,唯主其拜賓之 愚謂:《雜記》云:「主妾之喪,則 事也。 袝於祖 廟,尊者宜 也。 虞、卒 滴 主

士不攝大夫,士攝大夫唯宗子。

而爲主。

通。蓋大夫、士貴賤殊,故士死無主,不敢謂:宗子,大宗子也。鄭氏、吴氏之説皆唯宗子尊,可以士而攝大夫之喪也。」 愚咤亲子尊,可以强之。」 吴氏澄曰:爲主。宗子尊,可以攝之。」 吴氏澄曰:爲主。宗子尊,可以攝之。」 吴氏澄曰:

重人未除喪,有兄弟自他國至,則主人不免 為之主。唯大宗子尊,故爲士而死,可攝 所既云「大夫不主士之喪」,而又記此,則 前既云「大夫不主士之喪」,而又記此,則 此條之義當如吴氏之説也。攝,謂爲主者 不在而代爲之拜賓也。《雜記》曰:「士之 子爲大夫,其父母弗能主也,使其子主之。 無子則爲之置後。」大夫之無子者必置後, 則無事乎攝人以主其喪矣。宗子亦然。 主人未除喪,有兄弟自他國至,則主人不免

喪,「主人之待之也,無變於服」,則其不免

不待言也。

盡納之可也。《釋文》:「省,所領反。」陳器之道,多陳之而省納之可也,省陳之而

既少,盡納於擴可也。」 鄭故也。主人所作明器,依禮有限,陳之 灣。」 孔氏曰:「朋友賓客贈遺明器,多 陳之以爲榮,而不可盡納壙中,以納有常 陳之以爲榮,而不可盡納壙中,以納有常 以爲榮,而不可盡納壙中,以納有常 以爲榮,而不可盡納壙中,以納爲常 以爲榮,而不可盡納壙中,以納爲常

而後至墓。」 「兄弟先之墓,骨肉之親,不由主人乃致哀戚,故先哭於宫骨肉,自然相親,不由主人,故先往之墓。」 以此。宫,故殯宫也。」 八氏曰:「兄弟

母」、「爲夫杖」同。」 《釋文》:「爲,于僞反,下「爲出父不爲衆子次於外。《釋文》:「爲,于僞反,下「爲出

曰:「長子則次於外。」鄭氏曰:「於庶子略,自若居寢。」

孔氏

與諸侯爲兄弟者服斬。

者、蓋各以其本服之月數服之,而其始服 諸侯爲兄弟者服斬」,蓋謂出在他國者也 該親也。卿大夫爲君服斬不疑,此言「與 謂族親也。 親,不敢以輕服服之。言『諸侯』者,明雖 則自當爲其君服斬三年,而得爲諸侯服斬 諸侯之兄弟在 服斬」,皆言「兄弟」而不言「昆弟」者,以疏 此篇言「奔兄弟之喪」,「與諸侯爲兄弟者 弟。」《喪服》經傳凡所言「兄弟」者皆然 鄭氏曰:「謂卿大夫以下也。 在異國,猶 來爲三年也。」 《喪服》傳曰:「小功以下爲兄 他國、若仕爲他國大夫、士, 愚謂:兄弟 與尊者爲

則皆 服 非 也。 斬 除之,夫死亦如之」,鄭氏謂「女服 月、五月而除乎? 娶女有吉日而女死,壻齊衰而弔,既葬而 "; 亦 衰 臣 爲君 以 可以既 蓋與尊者爲親,不敢以 有不至三年者與。 斬 斬 衰 ·葬而除,則亦何不可以期與九 衰三年之服也 猶 如爲宗子皆服 曰:《曾子問 輕服服之, 然則斬衰之 ~齊衰 斬衰」。 之義 丽

本或作「不絶本」,非也。詘,丘勿反。」《釋文》:「澡,本又作「藻」,音早。一本無「麻」字。不絶,下殤小功,帶澡麻不絶本,詘而反以報之。

也。」 鄭氏 下殤小 之親 其本,屈而上至要,中合而糾之,明親 帶澡治牡 ·其経、帶,澡率治麻爲之。 曰:「報猶 功,本 愚謂: 麻爲之也。《喪服》於齊衰、大 齊衰之親 此言下殤小功之帶之重 合也。 下殤小功,本 也。 帶澡 麻者 帶 , 齊 不 了, 其 也。 重 絶 衰

> 也。 以上麻不斷本,小功以下斷之。 也。 以下澡之。 特言「澡麻」,蓋大功以上麻絰 功、小功皆言「牡麻帶、絰」,而 爲殤而降者,則其帶皆不散矣。 成人大功以上之喪,未成服之前散 後合而糾之也。 功雖輕於大功之殤,而重於餘殤,故其帶既 功,則散其屈者,絞其垂者。至本服大功之 而絞之。大功殤,雖成服不絞帶。 雖首絰 本者,麻之根也。 謂成服之時,屈所垂散麻上至於要,然 無本,而其帶猶不絶本 獨於殤小功言「澡」,以見上下 帶以散爲 麻以有本爲重,大功 重,以絞爲輕 「殤小 不澡 也。 下殤小功 蓋 帶,成 下殤小 下 報,合 小小功 ·功」章 殤 服 小

也。親者,謂舅所生。」 愚謂:大夫、士鄭氏曰:「謂舅之母死,而又有繼母二人婦袝於祖姑,祖姑有三人,則祔於親者。 如雖輕於大功之殤,而重於餘殤,故其帶既

繼娶並祔之禮,於此可以見之。

稍於其妻,則以大夫牲。 於其妻,則不易牲。妻卒而后夫爲大夫,而 其妻,爲大夫而卒,而后其夫不爲大夫,而祔

祭故也。 祭故也。 祭故也。 祭故也。 祭故也。 祭故也。 三「不易牲」,以見與士祔於 八夫者不同也。無廟者不祔,始封君亦然。 八夫者不同也。無廟者不祔,始封君亦然。 八夫者不同也。無廟者不祔,始封君亦然。 八夫者不同也。無廟者不祔,始封君亦然。 八夫者不同也。無廟者不祔,始封君亦然。 八夫者不同也。無廟者不祔,始封君亦然。 八夫者不同也。無廟者不祔,始封君亦然。

人杖。

婦人不爲主而杖者,姑在爲夫杖。 鄭氏曰:「適子正體於上,當祭祀也。」

杖,即位於阼階之上則輯杖與。 則爲夫雖杖,其禮當有所降矣。其房中則婦猶杖者,斬衰無不杖也。然母既爲主,父主適婦之喪,子不杖。母主適子之喪,

母爲長子削杖。爲,于僞反,下文「爲父母」同。

杖,各如其爲己之服以服之也。 服 爲長子斬衰則苴杖,母爲長子齊衰則 杖,斬衰之杖也。 鄭氏曰: 不可不可 以重於子爲己也。」 「嫌服男子當竹杖也。 削杖,齊衰之杖 母爲長子 愚 也。 謂 ": 苴 削 父

女子子在室爲父母,其主喪者不杖,則子一

童子不杖。」〇此三節明婦人應杖之節。正杖也。」 孔氏曰:「若主喪者杖,則此謂長女也。許嫁及二十而笄爲成人,成人昆弟,使同姓爲攝主,不杖,則子一人杖,鄭氏曰:「女子子在室,亦童子也。無男

特明之。」 愚謂"虞、卒哭則免,已卒哭知。嫌虞與卒哭棺柩已掩,不復著免,故也。」 孔氏曰:「葬時棺柩已啟,著免可鄭氏曰:「棺柩已藏,嫌恩輕可以不免總、小功,虞、卒哭則免。

變葛,乃不免也。

布髽也。既不垂其髮,又以布而不以麻, 結爲紒如婦人矣。是葬時之免,即婦人之 衰以下免,啟後則雖主人亦免。《士喪禮》 成服之前同。 謂: 喪自既啟以後,卒哭以前,其服與未 鄭氏曰:「有故不得疾虞,雖主人皆冠,不 「如小斂,則子免而從柩。」是行於道路,雖 以葬時行於道路宜稍 啟殯,「丈夫髽」。 可久無飾也。 然未成服時,主人括髮,齊 皆免,自主人至緦麻。」 蓋雖丈夫亦不垂其髮而 飾 也。 《曾子問》: 愚

虞,卒哭則免,如不報虞則除之。《釋文》:「爲,爲兄弟,既除喪已,及其葬也,反服其服,報初喪,主人亦免也。

于僞反,「爲之小功」同。」

報虞,則於卒哭而除之。 異也。不報虞則除之,喪本已除故也。如哭則免,言皆與常禮同,不以已除喪而有哭則免,言皆與常禮同,不以已除喪而有哭則免,以以此,既疾喪已,謂久而不葬,而以麻終爲兄弟,既除喪已,謂久而不葬,而以麻終

《釋文》:「比,必利反。」遠葬者,比反哭者皆冠,及郊而后免,反哭。

反哭於廟。」
 吳之時,乃皆著冠。至郊而后去冠著免,曰:「郊野之外,不可無飾,故葬訖臨欲反曰:「郊野之外,不可無飾,故葬訖臨欲反鄭氏曰:「遠葬,墓在四郊之外。」 孔氏

或爲「弔」。」 異國之君免也,親者皆免。鄭注:「異國之君免,君弔,雖不當免時也,主人必免,不散麻。雖

功以上也。」 孔氏曰:「凡大斂之前著變,貶於大斂之前既啟之後也。親者,大鄭氏曰:「不散麻者,自若絞垂,爲人君

也。 當免時,必爲之著免。不散麻者,貶於大 前亦免,大功以上亦散麻。 當免時,謂成服以至啟前,既葬卒哭以後 己君來弔,親者皆免可知也。」 主人之免,敬異國君也。 君同,主人爲之著免,大功以上親者皆從 斂之前及既啟之後。 麻,糾其 免,大功以上散麻,大斂以後著冠,不散 ○自「緦小功」至此,記著免之節。 垂也。 至將 葬 雖他國君來,與己國 ,啟殯之後已葬 異國之君尚然, 若君弔,雖不 愚謂:不 之

除殤之喪者,其祭也必玄。

者,以玄、黄相對之色,故知釋禫之服若玄財與朝服純吉同,故知黄裳也。知不玄裳故知玄端、玄冠也。知黄裳者,若其素裳,如玄端、玄冠也。知黄裳者,若其素裳,如玄明,不朝服,未純吉也。於成人爲鄭氏曰:「殤無變,文不縟。玄冠、玄端、

除成喪者,其祭也朝服縞冠。《釋文》:「朝,直 也。」 變除禮多,不足據,説見《玉藻》及《間傳》。 黄裳爲釋禫之服,乃據《變除禮》而言,然 服吉服以除其喪。又鄭氏以玄冠、玄端 吉祭之服也。 殤文不縟,無變除之漸,故 陸氏之説是也。凡言「玄」者,皆謂冠及 也,以陰幽思也。 鄭氏謂『玄端、黄裳』,非是。據齊之以玄 裳,即與上士吉服玄端同也,非釋禫服 衣、裳俱玄者也。 陸氏佃 曰:「言『必玄』,則裳亦玄。 玄冠、玄衣、玄裳,此士 齊玄而養。」 愚謂:

遥反。」

也。 鄭 即 服,不括髮。 序東,既踊畢,襲帶経于東序東。 作階東而踊,襲,謂掩所袒之衣,東方,謂東 降、踊,襲經于東方者,袒謂堂上去衣 與明日又明日之朝、夕而五哭。三袒者,始 者,始至訖夕反位哭,乃出就次,一哭也 位拜賓成踊』是也。出門,哭止者,出殯宮 之時,賓來弔者則拜之,《奔喪禮》所謂『反 則括髮而加 不括髮者,初時括髮,至又哭以後至於成 宫堂上。不笄纚者,奔喪異於初死也。 曰:「此論奔喪之法。括髮於堂上者,於殯 至袒,與明日又明日之朝而三也。」 孔氏 ,位於阼階之東而更踊,父母 母 氏 不括 『即位』以下,於父母同也。 日 ,髮,以 凡 絰,母則不括髮而著免。 袒於堂上,降、踊,與父同。 奔喪, 至成 謂 服 道遠 已殯乃來 而 同也。 已,貶 奔母之喪 三日五哭 、、降堂 於此 加 於 袒 也 父 絰 父

> 三袒。 降自西階,即位於阼階下而踊也。 若未殯前來,與在家同。」 哭,與明日又 下之東序東也。 久,奔喪禮殺,故三日五哭,異於在家也。 袒者,初至袒,明 之門就於廬,故哭者止。 下之位也。 ·升堂」二字,蓋傳寫之誤也。 在家之時,始死哭踊無節,今聞喪已 孔疏 明日朝、夕之哭爲五哭。 即位,自東序東反即阼階 「襲帶経于東序東」,上有 日朝袒,又明日朝袒,爲 五哭者,初來 愚謂:降、踊, 東方,堂

適婦不爲舅後者,則姑爲之小功 子,舅姑於婦,將不傳重於適,及所傳重者 鄭氏曰:「謂夫有廢疾他故,若 不受重者。 小功,庶婦之服也。 死 凡父母於

而

無

禮 記卷三十三終

非適、服之皆如庶子、庶婦也。」

禮記卷三十四

國史館纂脩孫希旦集解賜進士及第翰林院編脩

大傳第十六《別録》屬《通論》。

字,爲省録之義。

《爾雅》省即訓善,息靖反,無煩改字。」〇今按:省,讀如

趙氏匡曰:「不王不禘,明諸侯不得有也。 相之廟,猶謂未盡其追遠尊先之意,故又 祖之廟,猶謂未盡其追遠尊先之意,故又 此祭不兼群廟之主,爲其疏遠而不敢褻狎 此祭不兼群廟之主,爲其疏遠而不敢褻狎 此祭不兼群廟之主,爲其疏遠而不敢褻狎 也。諸侯五廟,唯大廟百世不遷。言『及』 也。諸侯五廟,唯大廟百世不遷。言『及』

九五五

矣。」 澴 於圜 褅 北 自出 僞 生 論 鄭玄注《祭法》云:『禘,謂配祭昊天上帝 勢相連,皆説宗廟之事,不得謂之祭天。 者,逆上之意,言逆 始 祭,追祭始祖所自出 謂爲郊之最大者,故爲此説耳。《祭法》所 不言『袷』也。 四 祖 隅 書 帝靈威仰也。」此文出自讖緯,哀、平 丘 種 禘、郊祖宗,謂六廟之外,永世不絶者 哉 一之帝居西 [丘。』蓋見《祭法》説『禘』,文在郊上, 南 也 耳 所 ? 向之位 始封之君 愚 疑 而 禘之所及最遠,故先言之,豈 謂 鄭氏又云:『祖之所自出,謂 也。 鄭 氏 南 丽 祖 省,謂 不言『袷』者,四時皆祭,故 隅 配 一,始祖 通之於經 ,謂之大祖。 食 東向之位,而 上及 於始祖之廟,始祖 也。 有 也。 功見省記 高 得 一, 其 祖 天 子 姓之祖 也。 諸侯 爲 始祖 大 誣 據此 也。 公不褅, ,謂之 褅 蠧 居 東 之 間 關 所 其 感 有 體 干

袓 得合食,與諸侯大祫之禮同,故言「及其 合祭。 意。 其君 矣。 祖」,以見大祖 皆有大祖之廟,其祫祭當於大祖之廟,而 之而不常舉者也。大夫、士之爲宗子者 蓋大夫、士之袷,亦如諸侯之大祫 故曰「干祫」。 合食高祖以下。 曰:「祭以特牲,殷以 大袷,然後得合祭高 祭高祖以下,然每 唯得祭其 ·大祖」者,若言及其大祖,嫌大祖 以下爾。 所省 袷本諸侯以上之禮,而大夫、士用之, 有大事,省於其君者,謂 唯有大功而爲 録 大 蓋其 也。 祖 大夫三廟,士 而外其得與於合食者,唯高 八禮僅 此乃言「及高 而 干者,自下而 時 於大 但犆 如諸 少牢。」殷祭即給也 祖 其君之所省録,命之 以 祖 祭 侯之時袷而已。 下也。《左傳 以 有大 上 進 祖 祖 廟,雖並 則不 取 ·, 而 ,間歲行 功 以 而 乎上 · 得 下並 不 不 而 言 得 得 爲 祭

宗也。 然則雖 此篇首言祭法,末言宗法,皆本此傳之義 祖之所自出 則知尊祖矣。 焉?」都邑之士則知尊禰矣,大夫及學士 其父母」,傳曰:「爲人後者孰後? 後大 也。 之所及,以盡 光,德薄流卑,故其差降如此。 言天子以下祭祀所及之不同。 大宗者,尊之統也。 禽獸知母 ○《喪服》「齊衰不杖」章「爲人後者爲 曷爲後大宗? 大宗者,尊之統也。 曰「干袷」,而 而不知父。 ,尊者尊統上,卑者尊統下。 諸侯及其大祖,天子及其始 |其報本追遠之意,則上 大宗者,收族者也。」 不嫌於亡等矣。 野人曰: 『父母何算 然因 蓋德 其 下 厚 此 分 流 節

豆、籩,逡奔走,追王大王亶父、王季歷、文王帝,祈於社,設奠於牧室,遂率天下諸侯執牧之野,武王之大事也。 既事而退,柴於上

而推

廣之者也

況反。亶,丁但反。父,音甫。」昌,不以卑臨尊也。《釋文》:「逡,息俊反。追王,于

祭宗廟也。《武成》曰:「丁未,祀于周廟, 也。 也。 越三日庚戌,柴望。」蓋臣子無 謂武王克紂之後,歸至於豐,而率諸侯以 謂於牧野之室而奠遷主也。逡、書》作 於牧野祭天地先祖,而 曰「祈」者,因告而 事而退,謂既克紂而退也。柴、祈、奠,謂 武王所以伐暴救民,尤戎事之大者也。 事也。不以卑臨尊,不用諸侯之號臨天子 先祖者,行主也。逡,疾也。 牧室,牧野之室也。古者郊 鄭氏曰:「柴、祈、奠,告天 駿」,疾也。 奔走,謂 柴,燔柴也。 愚謂: 戎 事 社,社主也。 有祈也。 爲大事,而牧野之事 有事於 以克紂之事告之 設奠於牧室, 地及先 關 疾奔走,言勸 爾中 皆 爵君父之 此告社 有 也。 祖 館 也。 此 焉 既 而

哉?《武成》曰:『大王肇基王迹,王季 父,❷其尊孰大於是,曷爲待追王 曰 皆出於周公,故繫而言之,其實追王在武 武之德,追王大王、王季。」蓋以周之禮制 戍之柴無疑也。《中庸》曰:「周公成文、 與大王、王季皆稱王,則三王之追王在庚 考,●至庚戌柴望之後,大告武成,而文王 稱 義 勤 治之事於人道爲尤重 而首以祭祀之法與追王之禮言之者,以上 王時也。此篇言聖人之治天下自人道始, 命。』蓋三王皆肇基之主,所以 丽 王 非 "「謂『不以卑臨尊』,此出於漢儒之説, 天而誄之義 ,而以三王之功德告於天而追王之,亦 故武 家,我文考文王 追王之本意也。三王乃武王之祖、 王 歸 於豐,既 也。《牧誓》稱文王爲文 祀宗廟 |克成厥勳,誕 也。 〇吕氏祖謙 ,復行祭天 追王之 而 膺 後 天 文 尊 之

> 繆,音木。别,彼列反,下至『其庶姓别』並同。」 義,人道竭矣。《釋文》:「禰,本或作「祢」,年禮 旁治昆弟,合族以食,序以昭繆,别之以禮 上治祖、禰,尊尊也。 爾,祖孫、父子之間,其尊卑豈以爵位哉 謂「不以卑臨尊」,則后稷爲始祖,猶諸侯 成,與前代不同,所謂禮以義起者也。 也。」 而始於周。 愚謂: 蓋周之王業,實由三王積累而 追王之禮,夏、 下治子、孫,親親 商之所未有, 也。 反 若 ?

所以 以别 也。 也。竭,盡也。」 愚謂:治,謂立爲法制, 鄭氏曰:「治猶正也。 上治 其親疎厚薄之宜也。 合族以食,謂聚合族人而與之飲食, 也。 親親 由 下 繆讀爲穆,聲之誤 而殺,所以 尊尊自上而 下治 殺,

「三王」、《集説》作「太王與文王」。

^{] 「}牧誓」,據《尚書注疏》,當作「武成」。

也。 中所言,皆所 也。此又備言聖人之治人道有此四者,篇 即下文所謂「男女有别」也。 義 以辨其等之異,皆旁治之事 言祭祀之法,追王之禮,皆上治祖、禰之事 昆弟,即下文所謂「長長」。 人道之大,竭 (大宗伯》 [以飲 ,謂以禮義治男女而使之有别也。 合族以食 盡 以 ,以聯其情之同 發明 於是四者而 食之禮 此 義 親宗族兄弟」,是 也 也。 無遺也。 别之以禮義, 竭,盡也。 ,别以昭穆, 别之以禮 旁治 上文

焉 : 聖人 彌反,徐孚夷反。 無 能,五曰存愛。 聽,體 南 不 · 贍者。 南 面 寧反。 曰治親,二曰報功,三曰舉賢 面 而 而 與,音預。 治天下,必自 五者 聽 繆,音謬,本或作『謬』。」 五者一得於天下,民無不 天 下,所且先者 贍,本又作『儋』,食艷反。 物紕繆,民莫得其 人道始矣。 五 了; 四 《釋文》: 民 不 紕,兀 曰 Ė, 聖 使 與

爲民 道别 所謂 此。 給。 者。 也。 仁民,仁民 親爲先。蓋取 皆親 乎民 民不 而失其道也。 封 之不同,合而言之,祖禰、子孫、昆弟、男女 且先者,言未暇及其他,而 一得,猶言盡 功 事 也。 無 · 與 報 然治天下以五者爲先,而 存愛,以愛人之事 臣」也。賢,謂 功,功臣也。 而言之,則有親親 事 不贍 之所 功、 也。 、者五者,雖皆所 尊之親之長之别之,皆所以治親 而愛物,苟於人 舉賢、使能、存 治親 ,財皆足以 從 得 蓋五 人以身,脩身以道 出、故: 也 即 報功,若《賚》之詩言「大 者 有 無 治人道之事 其 雖未及乎民事,而 德者。能,謂 自養。 存於心而不忘也 以爲 不足,力皆足以 、尊尊、長長、男女 得 道 愛 失 且 有 民 者 之 以 五者又 紕繆,乖 所 而 皆 係 此 也 未 爲 1無其· 親 乎 猶 盡 先 以以 有 親 民 蓋 未 也。 本 則 治 實 自 而 如 及

號,異器械,别衣服,此其所得與民立權、度、量,考文章,改正朔,易服免矣。此二句乃一篇之大旨。

色、殊

徽

變革者

列反。」○鄭注:「徽,或作『禕』。」

也。《釋文》:「量,音亮。正,音征。

徽、諱韋反。

别,彼

馬 也。 鄭氏曰: 殊 半,殷鷄鳴,夏平旦,是改朔也。 初。 文章,國之禮法也。正,謂年始。朔,謂月 者,言始有天下必造此物 號,旌旗之名也。 禮樂之器。 白,夏大麾,各有别也。 斛也。文章,禮法也。服色,車馬 也。 周子、殷丑,夏寅,是改正 衣服,吉凶之制也。」 也。 易之,謂各隨所尚赤、白、黑也。 「權,稱也。度,丈尺也。 徽號,旌 械、謂戎路、革路、兵甲之屬 器械,禮樂之器及兵甲 旗 也。 器,謂楊豆、房俎 也。考,校也。 周 孔氏曰:「立 大赤,殷大 也。 服色,車 也。徽 量,斗 周 夜

以 名 也。」 謂 犅是也。 受泰。」注云:「物之始,其色尚黑,以平日 也。 祭牲所用之牲色,若夏玄牡,殷白牡,周騂 乘,若夏乘驪,殷乘翰,周乘騵是也。 之事也。 緯・稽耀嘉》云:「夏以十三月爲正,息卦 者,公徒也。」蓋用兵之法,以旌旗待晝事 赤,以夜半爲朔。] 是三代改正 爲朔。」「殷以十二月爲正,息卦受臨 「周以十一月爲正,息卦受復。」「其色尚 云:「物之牙,其色尚白,以鷄鳴 三代之法不同也。文章,謂禮樂制度。 檀弓》疏 號名、《周禮 號待 愚謂:言「立權、度、量」,則此三者 陳氏 服如「服牛乘馬」之服,謂戎 徽,謂旌旗,若《周禮》九旗。 引《春 夜 7样道 事, ·大司馬》「仲夏,舍」、「辨 曰 : 秋 則 緯 徽 「《左傳》 號 元 者 命包》、《樂 一朔,易 徽 曰:『揚徽 幟 爲 之號 服 汽注 事所 朔。」 色

所能與 重也。 冔 。 易,無非所以奉天命而順人心,固非私意 末,隨時變革,所以明下文不可變革者之 衣,周玄衣之類是也。 追,殷章甫,周委貌。 號名之用」,是也。 養老之衣,則虞深衣,夏燕衣,殷縞 〇輔氏廣曰:「聖人之治,有所更 别衣服,若冠則夏 此節言數度文爲之 弁則周弁,夏收 毋 殷

也。 長長也,男女有别,此其不可得與民變革者 其不可得變革者則有矣。 《釋文》:「長長,並丁丈反。别,彼列反。」 親親 也,尊尊也

也

不可變,所以必當先也。 言人道之當先,此又言人道之不變,唯其 者有改制之名,無變道之實」,是也。 言「殷因於夏禮,周因於殷禮」,董子言「王 四者乃人道之大,故不可得而變革。 上文 孔子

同 .姓從宗,合族屬。 異姓主名,治際會。 名

著而男女有别

謂:同姓從宗,合族屬者,若宗子祭則 子行,則主婦名。治,正也。 際會,昏禮交接之會也。著,明也。母、婦 鄭 之事,相交際而會合也。 之名,以治際會之事也。 之女,於己本無親屬,故繫其夫而定母、婦 名著,則男女尊卑異等不相淫 名,以正昏姻、交接、會合之事。 母、婦之名,夫若爲父行,則主母名, 姓之女來爲己姓之妻者。 屬,謂合聚族人同時而食也。異姓,謂他 姓,父族也。從宗,謂從大、小宗也。 之名不明,則人倫亂也。」 人皆侍是也。 異姓,謂來嫁者也,主於母與 氏 曰:「合,合之宗子之家,序 異姓主名,治際會者,異 若《特牲禮》宗婦 際會,謂於吉凶 繫夫之親,主爲 主此母、婦之 孔氏曰:「同 婦之名 亂。 母、婦之 昭 穆 夫若 合族 耳。 也。 姓 族 愚

蓋 在 以 不至於離。 外北 同 房 別之,則不至於亂 中,《 [姓族屬漸衆,懼其離,有宗以統之,則 面 土 是 異姓男女相聚,懼其亂,有名 一喪禮 也 鄭氏專以昏禮言,非是 **>** 婦人俠牀東 面,衆婦 人

耳。 鄭氏曰:「言母、 昆弟 之,明非己倫,以厚别也。」 妻所 節本《儀禮・喪服傳》之文,言婦人爲夫之 行列也。 母焉則尊之,婦焉則卑之。 以不 無服之義。 異姓婦人來嫁己族,唯繫其夫以 爲母、婦之名也。 此篇引之,則以明昆 婦無 昭穆, 道,謂昭 於此 愚謂:此一 尊 統 之卑 於 穆之 弟之 夫

道 婦。」是後世稱於兄妻猶但稱爲嫂,不 也。 我,而非有父道,則其妻不可謂之母, 爲 者、子、孫與祖、禰相對、能事祖、禰、則子、 事 蓋 治之,以其無尊卑之分,而尤嚴其别也。 治之,昆弟之妻,其際會又以不爲之名者 母矣,而可乎? 言其不可也。人治,言治 之。言若稱弟之妻爲婦,則是嫂亦可謂之 母,而於弟妻則稱爲婦,故記者緣 幼於我,而非有子道,則其妻不可謂之婦 節,申言旁治昆弟之事。不言下治子、孫 人道也。 而 尊卑。 ,而其名謂之婦。 其名謂之母,其夫爲子道,則其妻有婦 ,此上二節,申言男女有别之事,此下二 人道有四:篇首二節,言上治祖、禰之 《爾雅》曰:「兄之妻曰 姟,弟之妻 蓋尊屬卑屬之妻,其際會主名以 故其 夫爲父道 昆弟昭穆同,兄長於 則其妻有母道, 類 ·稱 以 弟 曉 爲 日

孫之治在其中矣。

所例反。」

「世親屬竭矣。《釋文》:「免,音問。殺,色界反,徐八世親屬竭矣。《釋文》:「免,音問。殺,色界反,徐四世而緦,服之窮也。 五世袒免,殺同姓也。

減 謂 世 鄭 謂 者爲族兄弟,相 不 日 至己爲四世,凡旁親承 從兄 承 Ė 以 氏 服 殺 共 外,親 至 弟 承 高 曰 同 袒 喪服》「族曾祖、族祖 祖 弟 高 姓 高 愚謂: 免, 爲 也。 祖 服 大 袓 盡 四 緦麻 ,下至己兄弟,同承高祖之後 之父者也,服 功,再從兄 同 世共高祖,五世高 無屬 緦 六世,共承 四 姓 報 麻 是服 世 名。」 服 一, 是 而 緦 丽 己, 也。 高祖之後者爲之服 緦者,由 弟 盡 也。 孔 高 一於此 故 袒 小 父母、族父母、 窮猶終也。 氏 爲親兄弟期 祖之祖者 免 굸 功,三從兄弟 曰 祖昆弟,六 也。 而 高 無 親 一四世 祖 五 正 屬 之子 世, 服, 也, 五. 竭

> 袒 袒 也 殺 不 服 者幾希矣,故 族,以在九族之 免,則 其 得 免,則相 之殺,至緦 爲同 恩誼,但 五世而别族,則親屬 猶有未盡竭 族, 弔 L 爲 之 袒 麻 曰 而 但同 内 「親屬竭矣」。 圃 已,蓋其異於途人之泛然 終也。 也。 姓 者焉。 免 丽 릲 五. 而 固竭矣。 世 同 無 至六世 高祖之親 服 同 在 也 姓 九族之外, 既 然 并不爲 竭, 疏,故 謂之 相 爲

乎?《釋文》:「單,音丹。」 其庶姓别於上,而戚單於下,昏姻可以通

言周 之所以别 無服 鄭氏 不 五 之子,姓别於高祖 世 同 ,各爲氏族也 家 以 曰:「昏姻可 解「戚單於下」。 五 後 世 可 以 孔 以 氏 後, 通 昏 曰:「作記之人,見殷人 以通 庶 解 「 故將 姓,世 戚 姓 「庶姓别於上」。 乎,問 别 親 殷 異 所 也 於 法 由 之也。 以問於周 上,與高祖 生。」又明姓 單 Ŧi. -, 盡也 玄孫 世 而

親盡 通與 疑可通昏,故據 之父者,親 之父以爲族也。戚單於下,謂同出於高祖 之父者,别有所繫以爲族,而 於上,謂高祖之父,親盡於上,其出於 皆係於高祖以爲姓,所謂族也。 人轉廣遠,分姓衆多,故曰『庶姓』。 爲宗,不相尊敬也。 戚 一,高祖之姓衆多,故曰 單 不。」 ,雖是周家。 於下, 謂 盎 愚謂: 而 四 而問之。 不相爲服也。 從 昏姻可以通乎,問其可 兒 庶姓,謂共高 庶,衆也。 弟恩親 「庶姓」。 盡 不復繫高 姓别戚單, 於下 高祖 祖之親 庶姓别 正姓唯 · , 各自 以外 姓别 高 祖 祖

也。始祖爲正姓,高祖爲庶姓。繫之弗鄭氏曰:「周之禮,所建者長也。姓,正姓戸計反。别,皇如字,舊彼列反。綴,丁衛反。食,音嗣。」而昏姻不通者,周道然也。《釋文》:「繫,音計,又數之以姓而弗别,綴之以食而弗殊,雖百世

也。 姓本之始祖,其所從來遠,宗繫之别子,其 與國家相爲終始者,何謂 分封列國,所謂「殷民六族,殷民七族,懷 宗,五世而昏姻可通」、《王制》及《小記》疏 姓九宗,職官五正」,此皆殷之世家大族, 王,爾祖其從與享之。」可知殷之臣其有 恐不然。 之嚴矣。 族人以飲食之禮而不殊異,雖相去百世 而祭於大烝者,爲其後世之太祖矣。 也,則自殷以上,男女别姓之禮固 而有世、繫連繫之以本姓而不分别,連綴 者據周法答問也。 别,若今宗室屬 而昏姻不 掌定繫、世,辨昭穆。」」 愚謂。百世而昏姻不通者,周道 盤庚告其臣曰:「兹予大享于先 然孔氏謂「殷不繫姓,無 通。 周道然者,言周道異於殷 籍 周法雖庶姓别異於上, 也 無繼别之宗乎? 周 孔 禮 氏 曰: 小史》: 繼别之 不 「此記 周 如 初 功 則 周 然

夷姓曰 賜也。 族。 公孫。 胙之土而命之氏,諸侯以字爲謚,因以爲 也。故《左傳》:『天子建德,因生以賜姓 姓賜氏,諸侯但賜氏,不得賜姓,降於天子 所從來近。 以氏,若同姓公之子曰公子,公子之子曰 姓曰姬。」是天子賜姓也。諸侯賜卿大夫 故鄭《駁異義》云:『炎帝姓姜,大皞之所 以所封之土命爲氏,舜後姓嬀而氏曰陳。」 子因諸侯先祖所生,賜之曰姓,杜預云: 公,故以王父字爲氏。若適夫人之子,則 『若舜生嬀汭,賜姓曰嬀。 心遂 五十伯仲爲氏,若魯之仲孫、季孫是也。 官有世功、則有官族、邑亦如之。」天 公孫之子,其親已遠,不得上連於 !姜,賜禹姓曰姒,賜契姓曰子,賜稷 黄帝姓姬,炎帝之所賜也。 不辨宗也。 殷之昏姻,雖辨姓之禮未嚴 〇孔 氏曰 封舜之後於陳 「天子賜 堯賜伯 氏

若庶子妾子,則以二十字爲氏,若展氏、臧 帝姓姬。周姓姬本於黄帝,齊姓姜本於炎 氏。」又曰:「始祖爲正姓,若炎帝姓姜,黄 魯之三桓,慶父、叔牙、季友之後,及鄭之 帝,宋姓子本於契是也。 七穆子游、子國之後爲游氏、國氏之等。」 足也。 愚謂:姓氏之别有三: 若異姓,則以父祖官及食邑爲 高祖爲庶姓,若 一曰姓,始祖所

未

氏,别子之孫所受,若魯之三桓,鄭之七 篇所謂「繫之以姓而弗别」,是也。二曰 者,諸侯所受於天子,氏者,大夫所受於諸 者也,此篇所謂「庶姓别於上」,是也。 者,繫於高 祖,繼别爲宗」,是也。三曰族,出於高 穆,亦百世不别者也,此篇所謂「别子爲 受,若殷之子,周之姬,百世不别者也,此 公甫氏,孟氏之别出 祖 以 爲稱,若魯季氏之别 爲子服氏,五世 則别 出 祖 姓 爲

服術有六: 曰 出入,五曰長幼,六曰從服 侯 族」,是也。 亦 稱 氏亦曰族,《左傳》「無駭卒,羽父請謚 "; 而 曰氏、《春秋》書「姜氏」「子氏」,是也。 而 不必 族 則 有 凡大夫、士皆可係其高祖 曰親親,二曰尊尊,三曰名,四 族亦曰姓,此言「庶姓」,是也 所 受 也。 然通 而言之,則姓 以 與 爲

術 之而有隆殺也。 也。出入,謂己族之女有出有入,而 主母、婦之名而爲之服也。 正尊之服。 之正服,從於人而服者也。 幼,謂旁親屬卑者之服也。 人,適人日 世母、叔母何以亦期也? 猶 「從母,何以 道 也。 点。 親親,謂正卑之服。 名,謂異姓之女來嫁於己族, 小功也? 長,謂旁親 未適人及反而在室者 《喪服》傳曰 以名加 以名服· 蓋親親者所以 屬尊者之服 從服 ,謂非己 尊尊,謂 心。」又 心。」是 服 : 因

> 己。 下 若出入,則女子子爲親親之服,姑、姊妹 以 道之四者而起 尊尊長幼之義。 是服雖有六,莫不由乎人 從母,妻之從夫,兼服其旁尊,亦皆不出乎 長幼之服,而特其在 爲男女之别,長幼 治子孫,尊尊 從服,則夫之從妻,但服其正尊,子之 也 者所以上治祖、 者 家與適人之不同而 所以旁治昆 禰,名者所 弟也。 爲

服,有從無服而有服,有從重而輕,有從輕從服有六:有屬從,有徒從,有從有服而無

而

重。

妻爲其皇姑。」鄭氏説皆《服問》文,説見本篇。而輕,夫爲妻之父母。從輕而重,公子之而有服,公子之妻爲公子之外兄弟。從重有服而無服,公子為其妻之父母。從無服屬從、徒從,説見《小記》。 鄭氏曰:「從

愚謂:從服有六,實不外乎屬從、徒從而

已。其下四者,皆屬從之别者也。此上二

節,言服制不外乎人道也。

率祖,順而下之至于禰,名曰重。一輕一重,自仁率親,等而上之至于祖,名曰輕。自義

其義然也。《釋文》:「上,時掌反。」

制。 親 謂 自 此 下之,而爲祖期,爲父母三年,而其 乎義則服 其服漸殺,故曰 則 祖 無非天理所當然,非以私意爲隆殺也。 隆,故曰重。 服 猶從也。 ,等而上之,而爲祖期,爲曾祖三月,而 又以服之上殺,明上治祖、禰之義也。 尊 、禰皆尊尊之服,然父則尊、親並極,祖 之隆 雖 從乎仁則服隆於三年,而其事 極 一殺也。 殺於三月,而其事循乎祖,順 而恩 率,循也。 重者,仁之厚也。 稍遠矣。 輕。 仁主於恩厚,義主於斷 輕者,義之制也。 親,謂父也。 此服之輕重所以 輕 輕 服 循 重, 重 蓋 從 轉 平 而

不同也。

位也。鄭氏讀「族人」以下十一字爲句。石梁王氏讀君有合族之道,族人不得以其戚戚君,句。

·君」字爲句,「位也」爲句,今從之。

謂: 列也,所以尊君别嫌 不得以父兄子弟之親自戚於君。 以立,爲下文發其端也 之位不同也。以明人君絶宗,而宗法之所 族人不敢以其戚戚君,位尊尊義也。」 輔氏廣曰:「君有合族之道,親 族,謂設族食燕飲,有合會族 鄭氏曰:「君恩可以下施,而族人皆臣也 之恩,而族人則不敢以其戚戚君,以 此言君雖有綴姓合食之道,以 也。」 孔氏曰:「合 人之道。」 位 親仁也。 篤親族 尊卑 愚 ぬ

士词。」年,不繼祖也。《釋文》:「爲,于僞反,下「爲其年,不繼祖也。《釋文》:「爲,于僞反,下「爲其庶子不祭,明其宗也。庶子不得爲長子三

鄭 宗則不得祭適子之爲祖者,●非小宗則各 祭,此宗法之所以重也 謂:庶子不得祭祖、禰, 不得祭其四小宗所立之祖、禰也。」❷ 能 相序。」 氏 曰:「族人上不戚君,下又辟宗, 朱子曰:「庶子不祭,謂 而祖、禰由適子而 非 乃 大 後 愚

别子爲祖,繼别爲宗,繼禰者爲小宗。 氏 者,父之適也,兄弟尊之,謂之小宗。」 鄭氏曰:「别子,謂公子若始來在此國者, 子、適孫繼世 也,族人尊之,謂之大宗,是宗子也。 後世以爲祖 别於在本國不來者也。 君之親 言爲後世之太祖也。 禰先君,别於正適,故稱别子也。 爲祖者, (曰:「别子,謂諸侯之庶子。諸侯之適 ,或是異姓始來,亦謂之别子, 也。 爲君,而第二子以下悉不得 繼别爲宗,别子之世 始來在此國,此謂 繼别爲宗,謂别子 繼禰 以其 非 孔 適

> 之。 告於宗後」是也 在故國者,而不得自立宗,《曲禮》所謂「反 此國而爲大夫,固當爲其後世之大祖,與 此國者言之。蓋公子之重視大夫,若始來 子,鄭氏欲廣言立大宗之法,故并始 「公子有宗道」,則别子本主謂諸侯之庶 兄弟皆宗之,謂之小宗,以本親之服 繼禰者爲小宗,謂父之適子上繼於禰,諸 族者、皆爲之服齊衰三月、母、妻亦然。 之適子世繼别子爲大宗也。 公子同也。其不爲大夫者,仍宗其宗子之 愚謂:上言「族人不得戚君」,下言 族人與之絶 來 服 在

遷者,别子之後也。宗其繼别子之所自出有百世不遷之宗,有五世則遷之宗。百世不

[「]適」、《集説》、《禮記義疏》作「别」。

[「]立」、《集説》、《禮記義疏》作「主」。

誤耳。」
 尊祖故敬宗,敬宗尊祖之義也。朱君:「之所自出」四字疑符,注中亦無此文,至作疏時方遷者也。尊祖故敬宗,敬宗尊祖之義也。朱者,百世不遷者也。宗其繼高祖者,五世則

孔氏 子也。 鄭氏曰:「繼別子者,別子之世適也。 宗,何以前文先言『繼禰者爲小宗』,鄭解 子子弟之子也。 高祖者,亦小宗也。 也。 世則遷之宗,謂小宗也。經言繼高祖爲小 曾祖亦有也。 禰者爲小宗」,因别子而言也。小宗四: 下,則從别子言之。別子子者,別子之適 此意先言『繼禰者』,承上『繼别爲大宗』之 弟則是禰,其長子則是小宗,故云『繼 曰:「百世不遷之宗,謂大宗也。五 是繼禰,與親兄弟爲宗。 弟之子者,别子適子之弟所 則小宗四,與大宗凡五。」 以高祖與禰皆有繼者,則 先言『繼禰者』,據别 二是繼祖, 生子 繼

有小宗而無大宗者,有大宗而無小宗者,有弟爲宗。四是繼高祖,與三從兄弟爲宗:弟爲宗。四是繼高祖,與三從兄弟爲宗:與同堂兄弟爲宗。三是繼曾祖,與再從兄與同堂兄弟爲宗。三是繼曾祖,與再從兄

宗。 弟一人爲宗領公子,禮如小宗,是有 宗,不可無人主領。 子身是公子,上不得宗君,下未爲後 君之子,今君昆弟。」 鄭氏曰:「公子有此三事也。 子,更不立庶昆弟爲宗,是有大宗而 亦無他公子來宗己,是莫之宗也。公子有 而無大宗。君有適昆弟,使之爲宗以 此 三事,他人無也。」 公子唯一,無他公子可爲宗,是無宗, 君無適昆弟,遣 愚謂: 孔氏曰:「諸侯之 上言立宗之 公子, 領公 小宗 世之 謂 無 庶昆 先

無宗亦莫之宗者,公子是也。

近宗之權

过。

義已盡,此下二節,又言公子立宗之法,乃

者、宗其士、大夫之適者、公子之宗道 公子有宗道。公子之公,爲其士、大夫之庶 宗。 無宗 宗,則當公子之身未有宗道,而有宗道者 此解上文「有大宗而無小宗」。 九月,其母則小君也,爲其妻齊衰三月。 文之義。所宗者適,則如大宗死爲之齊衰 之宗,使之宗之,是公子之宗道也。 鄭氏曰:「公子不得宗君,君命適昆弟爲 也 事,而此獨以宗適言之者,蓋宗適者其正 則以有公命爲宗之法也。 此解上文「有小宗而無大宗」。公子唯己而已,則 如小宗死爲之大功九月,其母、妻則 立宗之權也。 ,無適乃宗庶耳。然宗子本以主祖、禰 亦莫之宗也。」此 愚謂:公子,即别子 無適子而宗 解上文「無 上言公子有三 也。 宗 繼别 也。 無服。 (庶,則 亦莫之 此解本 爲

之祭,故爲族人之所宗,若公子之爲宗,則但有收族之責,而無尊祖之義。蓋君既絶宗,兄弟不可以無統,故權時立之如此。至公子之適子,則各自主其父之祭,以爲在之方之適子,則各自主其父之祭,以爲姓從宗,合族屬」而申言之,以明旁治昆弟姓從宗,合族屬」而申言之,以明旁治昆弟之義也。

「施」,同以豉反。」 絕族無移服,親者屬也。《釋文》:「移,或本或作

爲服。 疏。 兄弟,族屬既絶, 服不延移及之。親者 鄭氏曰:「絶族無移服,族昆弟之子不相 移服者,族兄弟緦麻,族兄弟之子及四 親者 孔氏曰:「在旁而 屬,有親者,服各以 及 日 移。 其 絶 屬 族 從 親 無

義,此篇引之,則主於本宗之服,以明人道文,所以釋「出妻之子爲外祖父母無服」之謂:此二句本《喪服》傳所引「《傳》曰」之屬者,謂有親者各以屬而爲之服也。」 愚

下之至于禰,是故人道親親也。自仁率親,等而上之至于祖,自義率祖,順而

親親之義也

之,以明人道之所尤重也。
則又以屬於禰者爲最隆,故於此歸本而言道雖有四者,而不外於親親,而親親之義,道雖有四者,而不外於親親,而親親之義,是節引《喪服》傳以旁治明親親之義。此

安故財用足,財用 姓,愛百姓故刑 故宗廟嚴,宗廟 親親故尊祖,尊祖故敬宗,敬宗故收族,收族 刑 俗刑 然 ※後樂。 罰中 嚴 足故百志成,百志成故禮 故 ,刑罰中 重 《詩》云:「不顯不承 社 一稷,重 故庶民安,庶民 社 一稷故 愛 百

斁,音亦。」 無数於人斯。」此之謂也。《釋文》:「中,丁仲反。

禮**,**和 宗矣。 成 功 洽,庶民之所以 體恤其臣矣。 臣 稷,而效忠於上者篤矣。百姓,百官也 社 侍,而宗廟嚴矣。 親 心 祖者,親之所尊也。 切督責之政,而刑罰中矣。 子而收族矣。 能 也。 稷相爲休戚者也,故宗 爲 ,財用之所以足也。 親尊祖 重社 心 可以廣樂,百志之所以 收,聚 制之於上之謂 而 稷而效忠於君,則君 , 則 遞 也。 推 必敬其主祖 君臣交相忠愛,則 收 安也。 之以 族,則宗子祭而 卿 敬宗,則族 大夫之宗廟 能親親,則必以親之 至 禮,行之於下之謂 財用 一於無 庶 禰 民安 刑罰 爾嚴 足則富 窮 成 人皆祗 之祭者 亦愛百 而 則 也。 而 無事 中 與與 尊祖矣。 族 樂 必 可 而 重社 事宗 刑 乎操 姓 君 人 以 事 和 圃 。皆 亦 備 勸 氣 丽 之 敬

也。 《詩》、《大雅 也。 俗。 不善之萌,莫不自化於閨門之内,而猶 中,父兄治之,一族之間,宗子治之。 者,不忍以刑窮天下之民也,是故一家之 之而刑繁矣,衆治之而刑措矣。古之王 不足、無不贍者,用此道也。 此、則其始雖若無與於民,而其終至於無 於親親。先王治天下必以 治者約矣。 不帥教者,然後歸之士師。 曰:「人君之於天下,不能以獨治也,獨 下之人莫不有以親其親,而 人也。蓋治天下必始於人道,而人道不外 不顯,豈不顯 引《詩》以明禮俗成而樂,則無厭斁於 禮 白 志 俗 成 刑 然後原父子之親,立君臣之義 則 然 也。 化行 清廟》之篇。 後 不承,豈不承也。 上下和 俗 美, 治親爲先,使天 禮俗之所 樂 然則人君 ○顧 其效至於如 承,尊奉 丽 不 氏 斁,厭 厭 其有 之所 炎 以 也。 有 治 武 刑

通財 别之。 貧」者,而財用有不足乎? 弟」,而 收族之法行,而歲時有合食之恩,吉凶 矣。夫子有言:『不患貧而患不均。』夫 獨、廢、疾者皆有 『睦』曰『恤』,不待王政之施,而矜、寡、孤、 富。貧者至於有不能自存,而富者常恐 也。」又曰:「民之所以不安,以其 俗之醇,科條之簡,有自來矣。《詩》曰: 刑清,天下之宗子各治其族,以 然,刑罰焉得而 以 之有求,而多爲吝嗇之計,於是乎有 治,罔攸兼于庶獄,而民自不犯於有司,風 『君之宗之。』吾是以知宗子之次於君 權之。 之義。 悉其 鄉三物之所興者,六行之條, 意論 本俗 聰明,致其忠愛以 輕 不 重 所養矣。 六安萬民,三曰『聯兄 中乎? 之序 ,慎測 是故宗法立 至於《葛藟》之 此所謂『均無 淺深之量以 盡之。 輔 有 人君之 争心 貧 惟 人 有 有 道 而 夫

禮記卷三十四終

九七四

禮記卷三十五

者。」不

得

階主。

《釋文》:「見,賢遍反,下文並同

聞始見君子者,

辭曰:

某固

願聞名於將命

聞

,如字,徐音問。」

國史館纂脩孫希旦集解賜進士及第翰林院編脩

少儀第十七《别録》屬《制度》。○《釋文》:「少,詩照反。」

鄭、孔所謂「細小威儀」者,其義亦未嘗不選、八氏曰:「此篇雜明細小威儀。」 陸氏佃品,以爲細小威儀,非也。」 愚謂:此篇固定。」 朱子曰:「此篇言少者事長之節,一時,一個其禮皆於少時學之,所謂「見小節, 人民曰:「此篇雜明細小威儀。」 陸氏佃犯氏曰:「此篇雜明細小威儀。」 陸氏佃

達也。 固一。 以名 如故 階是階級,人升階必上進也。 故云『固』。 云『固』者,欲明主人不即見己,己乃再辭, 某,客名也。再辭曰『固』。不云『初辭』而 儀,而云『傳聞舊説』也。 見君子者,作記之人謙退,不敢自專制其 賓之辭不得指斥主人。」 鄭氏曰:「君子,卿大夫若有異德者。 『某願聞名於將命者』耳。 也。 聞於將命者」,謙遠之也。 奉命,傳辭出人。 將 將猶奉也。 命,謂傳辭 若初辭則不云『固』也,當唯云 出 即君子之門而云『願 人者。 階,上進者。 聞名,謂名得通 孔氏曰:「聞 辭,客之辭 主,謂主人。 階,進 重 則 也 也。 固 言 云 始

見君子,降等之客也。不得階主,降於敵也。」 愚謂:始見,謂執贄相見者也。始命』者,客宜卑退,故其辭不得進斥主人客實願見主人,而云『願以己名聞於傳

敵者,曰「某固願見」。

者之禮也。

「聞名」,蓋雖不執贄,而其辭則與始見同此又承前「見君子」而言。罕見情疏,故曰

故

云『願聽事於將命者』。」

朝夕於將命者」。也。亟,數也。亟見情親,故其辭曰「某願

瞽曰「聞名」。

適有喪者曰「比」,童子曰「聽事」。 鄭氏 不敢 者」。 見。」 **「**見」。」 皆是比 給其事也。 往皆是助事,故云『比』,謂比方其年力以 相見,此明凶禮相 聽事於將命者』。」 聞名於將命者」,其目無所見,故不云『願 鄭氏曰:「瞽,無目也。 與成 曰:「適,之也。 比,猶比方,俱給事。 方其 愚謂:此亦始見與罕見之辭 孔氏曰:「不問見貴賤,並云『願 人比方,但來聽主人以事 若五十從反哭,四十待盈坎, 事。 童子未 見也。 孔氏曰:「前明吉禮 曰『某願比 成人,往適 以 喪不主相見,凡 無 童子曰『某 目,辭不 於將 ,見使, 他喪, 願 命 稱

愚謂:比於

服 方年力」之説,非是。 將 命 ,聽事不麻。」 謂 來與將命者同 《玉藻》:「童子無緦 [執事 爾。 孔氏『比

適公、卿之喪,則曰「聽役於司徒」。 之。 謂:公,謂大國之孤也。 適貴者喪,不敢云『比』,但聽主人見役也。 來也。」 鄭氏曰:「喪憂戚,無賓主之禮,皆爲執 徒、《聘禮》謂之宰,以其兼宰之事也,故大 有宰、有司 宰,有司馬,有司士。宰即司徒也。天子 庶,屬其六引而治其政令。』又《檀弓》云: 司徒主國之事,公、卿之喪,皆率其屬掌 夫之宰亦謂之司徒也。 『公、卿亦有司 「孟獻子之喪,司徒旅歸四布。」《隱義》云 故《司 孔氏曰: `徒,諸侯大夫皆兼官,諸侯之司 `徒職》云:『大喪、率六鄉之衆 徒官 「前明往敵者喪家,此 以 掌 司徒主公、卿之家 《少牢禮》大夫有 喪事』也。」 事 愚

> 宰夫 其事,疏説 卿大夫之喪也。 徒職》「大喪,屬其六引」,此謂王之喪,非 事,故適公、卿之喪曰「聽役於司徒」。 「與職喪率官有司而治之」,司徒不掌 非是。 《周禮》「三公六卿之喪」, **一司**

禮,此下明吉凶送遺之禮,此明送吉也。 贈,送也。」 鄭氏曰:「適他,行朝 孔氏曰:「前明吉凶相見之 會也。 資 猶 用 也

他,本亦作「他」。從,才用反。」

資於有司」。

敵者曰「贈從者」。《釋文》:「它,音

君將適他,臣如致金玉貨貝於君,

則

曰

致馬

路費,君體尊備物,不敢言以 君 馬資於有司,言己物菲薄,不堪充用,但致 左右從行者』也。」 物送敵者,亦不敢言贈送敵者,當言『贈於 『此物充君馬資』。 朝會出往他國,臣若奉獻 有司,謂主典君物者。 愚謂:貨,布也。 財 物贈君,故云 物 ,以充君 致

者」,言己物菲薄,不足以給敵者之用,但 於有司以給馬之芻秣而已。 敵者 百 贈 從

以送從行之人而已。

臣致襚於君,則曰「致廢衣於賈人」。 襚」。《釋文》:「襚,音遂。賈,音價,徐音估。」 敵者曰

獻 : 鄭氏曰:「言廢衣,不必其以斂也。 服 吉,此明送凶。 襚者,以衣送死人之稱,言 藏之。』有賈八人。」 知物善惡者。 《周禮•玉府》: 『掌凡王之 吉凶衣服,其下無賈。《玉府》掌王之燕衣 者無謙,故云『襚』。」 衣物,不敢云與君,故云『致賈人』也。 充廢置不用之例也。 賈人識物貴賤,主君 遂彼生時之意也。 襚」,但云『致廢衣』,言不敢必充君斂,但 ,有賈八人。 金玉、兵器、文織、良貨賄之物,受而 今致襚者言「致廢衣於賈 若臣以衣襚君,不得 愚謂:司服掌王之 孔氏曰:「前明 賈人, 敵 言 送

> 之賈人,以充燕衣服之數而已。 人」,蓋以己之襚不足爲禮衣,但 致於玉府

親者兄弟不以襚進。

鄭氏 進。 弟之親者,謂大功以上也。 謂:凡族親皆謂之兄弟。親者兄弟,言兄 也。 孔氏 不將命,小功以下及同姓等皆將命。」 之將命也。若非親者相襚,則擯者傳辭 若親者,直將進陳之,不須執以將 曰 案《士喪禮》,大功以上同體之親 曰:「此明親 :「不執將 者相襚之法。 命也,以 即陳 而已。」 進,謂執 襚 將 愚 命

臣爲君喪,納貨貝於君,則曰「納甸於有司」。 野所出,合獻入於君之有司也。 君,故與賈人,貨貝供喪用,故付有司。」 鄭氏曰:「甸,謂田野之物。」 納,人也。 甸,田也。 臣受君地,此 孔氏 衣是送 物 曰: 田

愚 謂 致貨貝於君,謂 致賻 也

九七八

之異。 伐 鄭 賵 建大白以即戎。」」 兵 賻 者,馬既 者之意,欲供駕魂車 有圭,若大夫、士亦有幣。 亦用馬,用馬則并有幣以將之。 人告,出告『須』,馬入設,賓奉幣。 士喪禮》下篇: 與其幣」者,嫌 | 賻馬。 者,或國家自有也。」 田 氏 車,革路也。 馬 與其 獵之服,非盛 曰:「賵 以馬送死曰賵。賵,副也,言副 人,則圭與幣可知。 諸侯之喪,鄰國有以大白兵 幣不入廟門,以 馬 雖爲死者來,陳之於外,戰 入 「賓賵者將 馬 者也。 廟門,以其 雖 也。 孔氏曰:「此論賵、賻 不入,幣 以馬 愚謂:諸侯 《周禮》:『革路 其 賵 命,擯 主於生人 賻用貨貝,或 馬 助 猶 主 賻馬特言 不言其 生者營 當 於 者出 擯者先 入也 死 致 車 也 者。 請 赗 幣 喪 亡 而

受也

革路既卑,故不入廟門。 也。 侯賵物多,若皆入,則庭之廣不足以容,而 者亦然。大白兵車,言兵車之上 貝之屬,是賻物不入廟門也。 面 曰:「若賻,入告,主人出門左,西面,賓 一將命。 賓從。」 是 賵 大白 主人拜,賓坐委之。」此所委蓋 兵車,赗 馬與其幣人 也,而 亦不 入廟門者,諸 其用 廟 門也。 建大白 馬 爲 膊 東 貨 又

賻者既致命,坐委之,擯者舉之,主人無親

鄭氏 記 受之儀。 舉之,舉 屨,升自西階,西 哀戚,賻物悉不得拜受,故使擯者舉之而 》:『含者委于殯東南 舉之,謂幣之屬· 曰:「喪者非尸柩之事,則不 ·以東。」 吉時饋物,主人皆自拜受。 面 孔氏 坐 也。 取 曰:「此明 、璧、降 字 宰 知舉以 夫 自 朝 東者 服 膊 西 親也。 喪主 階 者 即 雜 以 喪 授

也。 賵,則雖君命不升堂,蓋爲其時柩在堂下, 致命,此謂在殯或既葬以後。 東。」後襚者賵者並然,若賻則擯者不升堂 其幣」之文也 賵 篇曰:「賓賻,東面將命,坐委之,宰由主 也。 北面致命。」是葬時君賵亦不升堂。 賵玄纁束,馬兩,賓奉幣,由馬西當前輅, 不可居堂上以臨死者。 命,則坐委之,而主人之擯者舉之。 貝以將命,用馬、幣,則執幣以將命,既將 人之北,東面舉之。」 賻者用貨貝,則執貨 云「若賻則擯者不升堂」,其義猶未爲晰 喪荒,受其含襚幣玉之事。」《士喪禮》下 、賻皆然,獨言「賻」者,蒙上文「賻馬與 擯者,主人之宰也。《周禮·小宰》: 愚謂 :《雜記》諸侯致賵 故《士喪禮》:「公 ,上介升堂 若葬時 孔疏 此禮 致

受立授立,不坐,性之直者,則有之矣。

之也。 之直者則有之,則固不可以爲禮而安 授也。授立不坐,爲煩人之坐而受也。性 授也。授立不坐,爲煩人之坐而受也。性 授也。授立不坐,爲煩人之坐而

始人而辭,曰「辭矣」。即席,曰「可矣」。 謝賓之節。 孔氏曰:「始入而辭者,謂始入門主人辭 也。始入則告之辭,至就席則止其辭。」 鄭氏曰:「可猶止也。 矣者,賓主既皆就席,告之以可坐也。 愚謂: 此謂以禮相見,而席於堂者也。 矣』者,擯者告之,言既即席不須辭 即席,謂賓主升堂,各就席而立也。 此不言者,『始人』之文包入門、登階也 讓賓令先入也。 曰『辭矣』者,擯者告主人辭, 至階時亦應告主人讓登 謂擯者爲賓主之節 也。」 日司司 可

九七九

反,本又作「脱」。長,丁丈反。」在,則否。《釋文》:「闔,初臘反,❶又音合。説,吐活

鄭氏 也。 者在 者,亦唯推年長 若尊卑相敵之人,相與排闔入室,雖 則屨 者皆説屨户外也 長 ,在則否者,謂若先有尊長在内, 此謂 凡 1内,後來之衆皆説屨於户外。」 説 曰:「雖衆敵,猶有所尊 席 於户外,唯尊者一人說屢於席側。 燕見 於堂 一,則屨説於堂下,席於室 而席於室者也。 一人説屨於户内也。 也。 闔,户 有尊 則後人 有尊 無 扇 尊 愚 長

問品味,曰:「子亟食於某乎?」問道藝,

曰 也。 所食、所習、所善,及 鄭氏曰:「不斥人,謙也。道,三德三行 ·乎』,乎者,謙退之辭,是不正指斥人所能 「子習於某乎? 藝,謂六藝。」 子善於某乎?」 孔氏 其問 日:「雖 之,猶 先 疑 而 知 其 稱

> 言也 物。 謂 : 也。 不當問矣。 德,行謂六行,道藝謂六藝,此鄉大夫之三 考其德行道藝,而興賢者能者。」德謂六 道藝,謂六藝也。 道藝人容有能否,故須問。 道 難 故稱『習』,藝易故稱 或稱「習」,或稱「善」,博異 《周禮 鄉大夫》: 若德 行 則 愚

爲「不苟訾」之訾,音紫。器。《釋文》:「度,大洛反。訾,子斯反。」○今按:訾當讀不疑在躬,不度民械,不願於大家,不訾重

思。 貴廣大之家,謂 鄭氏曰:「躬,身也。 疑也。械,兵器也。大,謂富之廣 大,不可願效之,非分而 重猶 寶也。」 卿 大夫之家 孔氏 不服行所不知,使身 願,必有亂心也 日 : 也。 「大家, 也。 見)被富 謂富

愚謂: 所宜 近 願乎外,不可以妄慕富貴也。訾,毀也。 己也。不願於大家者,君子素位而行,不 者,謂不欲量物之貴賤,亦避不審也。」 重器,人所實貴,若指其瑕纇而訾毀之,非 兵械,非常之器,不度之者,恐人以非心疑 「衣服 之强弱,且嫌不審也。 子曰:「不計度民家之器物,爲不欲校 之,則憎疾己貧賤,生淫亂濫惡也。」 重器,珍寶之物。 見之不可思玩,若思玩 人之所樂也。 『不訾之身』,皆此義。此言『不訾重器 ·訾相其質』、《漢書》云『爲無訾省』,又云 ·無訾金玉成器」,字義同此。 乎忮。 一,若疑於其義而服之,則亂於禮也。 附在我身。」不疑在躬者,衣服各有 在躬,謂 〇此 節通戒爲人之法。 願大家,近於求。 冠服之屬也。 訾,猶計度也。 《國語》云 《左傳》: 訾重器 孔疏蒙 下 人 朱

膺擖。《釋文》:「氾,芳劍反。拚,弗運反,又作「攮」。氾埽曰埽,埽席前曰拚。拚席不以鬣,執箕上「即席」,專以賓主之禮言,非是。

鬣,力輙反。擖,以涉反,徐音葉。」

滌蕩。 己,實帚于箕。」此謂: 帚。」此謂 也。 洒掃室堂及庭,每日之常,非必爲有賓客 此節亦蒙前「即席」,以賓客來言之,非是。 者,當持其舌自嚮胸前。」 箕是去穢物之具,賤者執之,不可持嚮尊 拚。 也。 以舌自鄉。」 地帚也。 鄭氏曰:「鬣,謂帚也。 《弟子 鬣,謂埽地 膺,親也。 内外俱埽謂之埽,止埽席前謂之 膺,人之胸前。 初 職》云:「執箕膺揲 往 糞 孔氏曰:「拚是除穢,埽是 擖,舌也。 帚也。) 時 糞畢將去時也。 也。 埽席上,不得用埽 帚 又 云: 恒埽 擖,箕之舌也。 持箕將去糞者 愚謂:孔 地,不潔清 以以 厥 中有 是初 葉 疏以 適

九八二

往及糞畢時,執箕皆膺擖也。

不貳問。

卜筮。下句方言「問卜筮」,則此「問」不謂則令人難爲答也。○注疏以問爲問卜筮,則令人難爲答也。○注疏以問爲問卜筮,貳,猶貳心之義。問宜專向一人,若貳問,

則否。《釋文》:「與,音餘。」問卜、筮,曰:「義與,志與?」義則可問,志

鄭氏 謂 以 氏 比,子服惠伯曰:『忠信之事則可,不然則 義則當質於神,以審其從違。 否。』又曰:『《易》不可以占險。』」 義自斷,而其吉凶 (僥幸。 【廣曰: 義與、志與者,將問而先審度於己也。 日 「問卜、筮必義而後可,不可行 「義,正事 《左傳》南蒯將叛,筮 一不必問矣。 也。 志、私意 若志則當以 圃 也。」 遇坤 之 險 愚 輔

尊長於己踰等,不敢問其年。

命,無賓主之禮。」 然。」 孔氏曰:「私燕而見,不使擯者將然。」 孔氏曰:「私燕而見,不使擯者將燕見不將命。《釋文》:「見,賢徧反,下「請見」同。」

遇於道,見則面,不請所之。

所之,亦爲煩長者之答己。

鄭氏曰:「亦不敢故煩動也。事,朝夕喪俟事,不犆弔。《釋文》:「特,本亦作「犆」,音特。」

哭時。」

也。《釋文》:「罢,本又作「蒉」,所甲反。」侍坐,弗使不執琴瑟,不畫地,手無容,不翣

翣也。此皆端慤所 者之法也。 琴瑟,則爲之可。」 四者皆侍坐之法。 容,不弄手也。 鄭氏曰:「端慤所以爲敬也。尊長若使彈 不畫地,不無故 翣,扇也。 以 孔氏曰:「此卑侍尊 爲 雖 畫 暑亦不敢 地 愚謂: 也 手 無 此 摇

寢,則坐而將命。

夜反。」 传授則擁矢。《釋文》:「射,食時則則然矢,侍投則擁矢。《釋文》:「射,食

鄭氏曰:「約矢,不敢與之拾取也。擁矢,

勝則洗 《釋文》:「勝,詩證反。 此謂侍尊者射及投壺,而與尊者爲耦也 孔氏 不敢釋置於地,但手並抱之也。」 矢,投壺箭也。 者侍射,則不敢更拾 又進取一矢,如是更進,各得四箭。 於中庭,倚箭於楅上,上耦前取一矢,下耦 委於前,一一取之以投。 箭,故云『約矢』。 不敢釋於地也。投,投壺也。 而 曰:「矢,箭也。 以請。 客亦如之。不角,不擢馬。 擢,直角反。」 投壺禮亦賓主各四 投,投壺 進取,但一 凡射必計耦,先設 若卑者侍投,則 也。 投壺坐。」 擁,抱. 時並 愚謂: [矢,從 若卑 取四 也 楅

之。 飲之。 鄭氏曰:「洗而以請,洗爵請行觴,不敢 酬之爵。 勝則洗而以請者,若敵射及投壺竟,勝者 角,謂觥,罰爵 客射,若投壺不勝,主人亦洗 擢,去也,謂 也。 徹 於尊者與客,如獻 也。」 孔氏 日 而 す 請

使飲。 其席 擢 若不勝,則主人亦洗而請,如卑侍尊之法, 愚 馬,至三馬而 用角,但用如常獻酬之爵也。 雖得二馬,不敢徹尊者馬足成己勝也。」 武,射者所尚也。 所以優賓也。 而 一酌彼 調 去去 馬爲三馬,以足成己勝。 朋得二馬,一朋得 若卑 ·堂揖 前 行酒,然後乃行 酌 也 兕觥」,是也。 《鄉射禮》若「賓主人大夫不勝,執 勝 而請之,不敢奠爵於豐上而揖尊者 酒 , 徹 者得勝,則 不 置豐上 ·勝者 也。 ::成勝。 而以請者,謂洗爵酌 不角者,罰爵用 ,升堂,北面 投壺立籌爲 凡投壺,每 豐在 飲尊者及客,則不敢 一馬,二馬之朋,徹取 但頻勝三馬難得,若 也。 不敢直酌,當先洗 西階上 客亦如之者,客 若卑者之朋, 取豐上爵 一勝輙 馬,馬 不擢馬者, 角、《詩》云 西楹之西 酒 有 立 威 爵 飲

> 爵者取 洗而 得擢 馬從二馬,請主人亦如之」,則與客投壺者 故亦名爲角,而非「四升曰角」之角也。然 也。 兼尊者與客言之,非是。 於尊者,而不施於客也。 與投壺之禮然與? 鄉射、大射罰爵皆用觶,此 有此器,不用於正禮。」蓋觥以兕角爲之, 爵 也。 馬矣。 以請」一事,若不角、不擢 注 一疏云: 一疏説未 解降 此云「客亦如之」,唯謂「勝則 洗 が觥 晰。 升, 是觚、觶、角、散之外别 實之以授于 《毛詩》傳: 《投壺禮》請賓云「一 孔疏於下二事 用角者、豈燕射 馬,則唯 「兕觥,罰 席前」, 施 是

執君之乘車則坐。《釋文》:「乘,繩證反。」

愚謂:此謂初乘車驅之五步而立之時也。守空車則坐,示君不在車,車不行也。」坐,示不行也。」 孔氏曰:「凡御則立,今鄭氏曰:「執,執轡,謂守之也,君不在中。

坐,跪也。爲君子御者始乘則式,爲君御

者始乘則坐,皆所以爲敬也。

反。幦,徐音霓。」綏升,執轡然後步。《釋文》:「拖,徒可反,又他佐綏升,執轡然後步。《釋文》:「拖,徒可反,又他佐僕者右帶劍,負良綏,申之面,拖諸幦,以散

删。 者右帶 君綏 猶 也。 也。 於前 鄭 則妨君 右 僕,御者也。 背 氏 擲也 ·腋下, 取 覆苓 也。 君,面向 帶劍之法在左,右手抽之便也。 負良綏,申之面者,君由後升,僕者在 曰:「面,前也。幦,覆苓也。 君 一,亦引 ,故右帶也。 劍者,御在中,君在左,若左帶劍 申綏之末於面前。 綏 負之,由左肩上入右腋下, 上也。 由 也。 右帶 左腋 步,行也。」 幦, 自 良,善也。 劍者,帶之於腰 下加左 「君由後升」以下十三字當 車覆闌。 肩 拖 上,繞背入 諸幦者,拖 善綏、君綏 孔 綏申於 氏 良綏, 今御 右 申之 曰 邊 面

車。 車也。 前,而 授 僕登車 時 當右帶,綏欲授人,自當負之以升,又當升 君,使君 於右腋之中,以 環處自左腋下過前後各上至背,則合 當是以索爲環,兩頭 君』,『取綏而拖諸幦』,誤矣。 下 轡然後步者,步,行也,既 上,君升則還 ∭ 此條非 良 無人授己,故但取散綏以升,乃僕之通 .後行車也。行車五步而立待君,君 ,帶劍負綏,而擲綏末於幦 綏 此疏乃言『君 擲末於車前幦 及僕以散綏升之後,君方出 不得執 而 專 得 升 爲 以 君也。」 君 身向後,復以 兩 君綏、故執 御 申於前,而自車 手 之事。 **執** 由後升,僕者在 上也 相屬,故負者得以 之 朱子 而 副 升車 蓋劍妨左人,自 升 覆 散綏,副 綏 曰:「僕 上,君固 一時 也。」又曰 一, 執 而 又按綏制 如 下 升 環 擲於幦 策 也 車 綏 未 處 丽 在 丽 出 分 ', 背 也 : 授 如 就 就 出 車 轡 執 則

疑是疏 升,其綏在 義 繞之於背以挽君乃有力,故於未升時預 又君升則僕當向 僕之通法,注、疏承上文專以御君言之,於 君升授綏之法,而負之以升也。 此節固 左右闌,君由 背君向前」,而「 向前」十三字,則其文義亦自通曉 亦 無害。 注、疏皆誤。」 文有誤 右。 至疏謂 左升, 脱,若删 僕必負綏者,君升授綏,必 申 [君,而以綏授君,疏乃謂 負綏在車上,則非是。 良綏在 **綏於面」,尤不** 愚謂 去「君 左;僕右 綏蓋繫於車 由 後 也。 升」至 可 由 曉 擬 之 爲 右

罷,音皮。」〇按:朱子「罷」如字,今從之。罷。《釋文》:「見,賢遍反。朝,直遥反,後「朝廷」皆同。請見不請退。朝廷曰退,燕遊曰歸,師役曰

鄭 朝 主於家也 廷 氏 曰 日 退 「請見不請退者,去止不 ,近君爲進 罷之言罷勞也。」 也 燕遊 日 孔 歸 敢 氏 自 曰: 禮 由

> 衆也。 還,則 曰 之中,欲退散之時,稱曰 軍罷休就舍』之罷 曰:「按《易》曰『或鼓或罷』,與《史記》『將 朝」,俱是對進爲言也。在燕及遊 故曰『退』。 於尊者,故不敢請退。 卑者於尊者,有請見之理,既 作日 『歸」,以燕遊禮褻,主於歸家。 稱曰「退」,以 興,散師 役,徒役也。 《論語》『子退朝』,『冉子 役曰 亦同。」 近君爲進 罷 罷,休也 朝廷之中,若欲散 罷 勞。」 愚謂:師,兵 ,還私遠君 見,退 凡用師役, 退還,稱 於師 朱 必 退 子 役 由

莫,音暮。」問日之蚤莫,雖請退可也。《釋文》:「還,音旋。問日之蚤莫,雖請退可也。《釋文》:「還,音旋,侍坐於君子,君子欠伸,運笏,澤劍首,還屨,

運 鄭氏 澤,謂 孔氏曰:「志倦則欠,體疲則伸。 曰:「以 玩 弄也 此皆解倦之狀。 金 器 弄之易生 伸 頻 汗澤。」 運,動 伸 也

也。 則雖請退可也,所以體尊者之意也 文而言,請見雖不請退,若君子有此 之意,故侍者請 以下諸事 内,是屨恒在側,故得自還轉之也。 劍首 ,則生光澤。 謂君子摇 ,皆是君子體 動於笏。 退可 逻, 也。」 轉也。 倦欲起、或欲 澤,謂 愚謂:此承 尊者脱 光澤。 欠伸 倒 玩 屨 息 户 弄

知

也。

反。 罪也。《釋文》:「量,音亮。乞,如字,又音氣。 事 人,爲人從事者亦然。 君者量 遠,于萬反。 圃 后人,不入而 然,故上無怨而 后量。凡乞假 爲,于僞 下遠 於

借,求請 後始商量成否。 意堪合與否,而後 曰:「凡臣之事君,欲請爲其事,先商量 鄭氏曰:「量,量其事意合成否。」 亦 事人,亦須先商量事意成否,故曰 猶 如 非但 此 入而請之,不先 事 事 ,君如此,凡乞貸假 君 如此 ,則下不 (人請: 孔氏 然 事

> 然唯結上下,不結『乞假』『從事』者,略 忤上,故 E 無 怨。 上不責下,故 下遠罪。 口

不窺密,不旁狎,不道舊故,不戲色。

類也。 鄭 也。 此四者,皆非恭敬長厚之道,故戒之。 憎惡,如陳勝賓客言勝故情,爲勝 曰:「旁,泛及 故舊,言知識之過失,損友也。」 私也。不旁狎,妄相服習,終或争訟。 氏曰:「密,隱曲 舊事既非今日所急,或揚人宿過 戲色,謂嬉笑悔慢之容。」 也。 處。 泛與 不窺密,嫌 人狎習,不 朱 愚謂 所 伺 恭 殺之 以 人之 子 取 敬 道

之,謂 反。 無讇 爲人臣下者,有諫而無訕 讇,敕檢反。 ,諫而無驕,怠則張而相之,廢則埽 之社 稷之役。《釋文》:「訕 相,息亮反。 更,音庚。」 ,有亡而無疾,頌 ,所諫反, 而 所 更 丽

鄭 氏曰:「亡,去也。 疾,惡也。 頌

當美而 謗毁。 之。 謂 而憎惡 謗毁 因 順 驕慢 若從己諫 怠,惰也。 社稷之臣 而更創立新政也。 也。」 以惡 其 也。 美 君政若已 也。 君 也。 爲 頌之,而不得虚妄以惡爲美也。 諫若不 也。」 也。 君政 美,横求 君 有 孔氏曰:「訕, ,則不得因言行謀用,恃知而 相,助 驕 過,臣 頌,美盛德之形容也。 ·聽,當出 廢壞,無可 (怠惰) 謂 也。 言 · 見容· 事君如上所言 1行謀 ··; 則 當諫之,而 廢,政教壞 也。 竟亡去,不得 臣 謂道君之過惡及 從, 張助,則 當當 君 , 恃知 張 有 起 不 盛 亂,不 而 ,則可爲 當 得 而 德 慢 埽 强 助 向 E, 也 君 可 蕩 成 留 生 人

皆疾也。人來往所之,當有宿漸,不可卒鄭氏曰:「報,讀爲『赴疾』之赴。拔、赴,《釋文》:「拔,蒲末反,王本作「校」,古孝反。報,音赴。」毋拔來,毋報往,毋瀆神,毋循枉,毋測未至。

測 往則輕躁,瀆神則不敬,循枉則耻過作非, 至,孔子所謂「逆詐億不信」也。 謂『其進鋭者其退速』也。」 言人見有箇好事,火急歡喜要做,這樣人 文勢,猶云其就 不正,不可復遵 也 不耐久,少間心懶意闌,則速去之矣。 未至則不誠 朱子曰:「來、往,只是向背之意。 瀆, 謂 數 而 行 不 義 以自 敬。 若熱,則其去義若渴。 伸。 毋 循 測,意度 枉 愚 謂: 謂 拔來、報 前 二句 測 也。 日之 所 未

文》:「説,如字,又始鋭反。」〇鄭注:「説,或爲「伸」。」 士依於德,游於藝。 鄭 謂 六日九數。 德,三日孝德。藝,六藝也:一日 日六樂,三日 氏曰: 鴻殺之意所宜也。《考工記》曰:「薄厚 「德,三德也: 法、謂規矩、尺寸之數也 五射,四日 工依於法,游於説。 五 曰 御 至德,二曰敏 五 日 五禮,二 六 書, 説 《釋

説以知其所以然。 藝以該其末,依於法以循其所當然,游於有説。」」 愚謂:依於德以立其本,游於之所震動,清濁之所由出,侈弇之所由興,

反。」〇今按: 皆字,亦當音紫。 毋訾衣服成器,毋身質言語。《釋文》:「訾,子斯

等衣服成器,皆所謂「不苟訾」也。 之,或有所誤也。」 愚謂:毋訾重器,毋即疑事毋質之意。」 愚謂:毋訾衣服成成器,與不訾重器之意同。毋身質言語,成器,與不訾重器之意同。毋身質言語,

爲騑,芳菲反。」○今按:「美」字「皇」字,皆當如字。濟,子禮反。齊齊皇皇,齊如字,皇音往,徐于況反。匪,讀鸞和之美,肅肅雍雍。《釋文》:「美音儀,出注。祭祀之美,齊齊皇皇。 車馬之美,匪匪翼翼。言語之美,穆穆皇皇。 朝廷之美,濟濟翔翔。

翼、皆是馬之嚴正之狀。 舒之貌。 儀也。 祀,心有所繫往,故『齊齊皇皇』。 皇,皆美大之貌。濟濟翔翔,威儀 文,其『賓客之容』,則此『言語穆穆皇皇』, 雍,和貌。」 容,暨暨詻詻」,是《玉藻》文也。 是也。彼注「喪紀之容,纍纍顛顛,軍旅之 之容」、『朝廷之容」、『車馬之容』,皆引此 氏》云『教國子六儀,一曰祭祀之容」,容即 容,二曰賓客之容,三曰朝廷之容,四曰喪 誤也。《周禮》教國子六儀:『一曰祭祀之 紀之容,五曰軍旅之容,六曰車馬之容。」」 皇,讀如『歸往』之往。 鄭氏曰: 孔氏曰:「知美皆當爲『儀』者,以《保 故知美皆當爲『儀』。鄭彼注『祭祀 皇讀爲『歸往』之往,謂孝 匪 愚 讀爲『四 謂:鄭氏引此文以解《保 美皆當爲「儀」字之 牡 騑 肅肅,敬貌。 騑 穆 騑騑 厚 齊 子 重 穆皇 齊皇 翼 祭 寬

其 穆穆 也。 也。 氏 匪 當 而弗得」之意,言祭時求 聲之美。 四者,言其容之美。 匪 「則不 》,義 和 ,舒散貌。 齊齊,謹慤。 濟濟,齊 固 · 當 静不吴敖也。 無 破「美」爲「儀」以 害,然此 也。 翼翼,嚴正 皇皇,猶「皇皇然如 翔 所言與六儀 鸞和肅 皇皇,顯明不 ?翔,猶 神 貌。 而 從《保氏》也 蹌 如 肅雍雍,言 車 蹌,軒 弗 不 馬」以 得 有 蹇 悉 也。 求 舉 躓 相

問 能 幼,長則曰「能耕矣」,幼則曰「能負薪」、「未 矣」,幼則曰「能御」、「未能御」。 長幼,長則曰「能從樂人之事矣」,幼則曰「能 正於樂人」、「未能正於樂人」。 國 負 (薪」。《釋文》: 君之子長幼,長 「長,丁丈反。・樂,音岳。」 則 日 能 從社稷之事 問士之子長 問大夫之子

生十年曰幼,二十曰弱。」御,御車也。成長,謂已冠。幼,謂未冠。《曲禮》曰:「人

謂成 父,故對之者其辭卑。」 問,故對之者其辭文。 農夫一人」,是也,故以耕與負薪爲言。 《勺》,成童舞《象》,學小舞也。 夏》, 童學射: 應氏鏞曰:「《曲禮》之問,乃他人旁自 其父身,此問其子者,記人之意異耳。」 者民年二十而受田、能負薪、未能負薪、亦 童以 之子以此爲言。 子以六藝,御與樂皆六藝之事,故君大夫 (漢書・食貨志》「士工商受田 童 下 學大 御 也。 上下與? 舞 能從樂人之事,二十而舞《大 能 也。 御,成童 士禄薄,其子或别受田 〇孔氏曰: 能 正於樂 以上。 此 則 人問其子於 人, 十 五 未 保氏 曲 能 口 . 禮 御 乃當 教 \equiv 古 相 問 國 舞 成

文》:「筴,音策。」
執玉、執龜筴不趨,堂上不趨,城上不趨。《釋

鄭氏曰:「於重器,於近尊,於迫狹,無容

也。行張足曰趨。」

引手曰肅,跪而引手曰肅拜。《左傳》郤至「三肅使者」,肅非拜也。立而也。凡拜必跪,介者不拜,以其不能跪也。問並見《曲禮》。○鄭氏謂「軍中肅拜」,非武車不式,介者不拜。

『唯』。」 爲喪主,則不手拜。鄭注:「雖,或爲拜,肅拜。爲喪主,則不手拜。鄭注:「雖,或爲婦人吉事,雖有君賜,肅拜。爲尸坐,則不手

謂: 也。 尸,爲祖姑之尸也。《士虞禮》曰:『男,男 見 尸。女,女尸。』爲喪主不手拜者,爲夫與 鄭氏曰:「肅拜,拜低頭也。 拜爲正,故雖受君賜亦然。《士昏禮》婦 長子當稽顙也,其餘亦手拜而 ,「拜扱地」,鄭云:「扱地,手至地也。」 婦人以肅拜爲正,凶事乃手拜耳。 肅拜,跪引手 而下之也。 手拜,手至 己。 已。 婦人 以 爲 地 廟 肅 愚

> 婦 其虞、祔、卒哭之祭,服尚未除,乃不手拜 賜 婦 重則稽顙 丽 爲尸,則祖姑之尸也。 拜之空首也。 於手拜者,首不至手也。 而坐也。 人吉拜皆肅拜,重則扱地,喪拜用手拜, 肅拜者,尸以象神,故不用己之喪拜也。 亦當扱地。 人之扱 手拜,手至地而以首至手,即九 地,猶男子之稽首,則婦 婦人以手拜 蓋扱地 乃肅拜之重者,其異 婦人爲祖姑大功, 爲尸坐,謂爲尸 爲喪拜。 人 介拜君

葛絰而麻帶。

束。婦人質,少變,於喪之帶,有除而鄭氏曰:「謂既虞卒哭也。帶所以自結

取俎、進俎不坐。

無變。」

氏曰:「俎有足、立而進取便、故不坐。鄭氏曰:「以其有足、亦柄尺之類。」 孔

云"「柄尺不跪。」此係傳 管子書 弟子職》云『進柄尺』, 寫 脱 誤。 謂 爵、 按《弟子職 豆 之

執

屬

也。

虚 鄭氏 操存其心者,苟能如此,則可以無患乎惰 常心,不以在外者變也。」 慢邪辟之干矣。 大賓,使民如承大祭」之義同。 形容主敬全體之功,與《論 如執盈,入虚如有人。 曰:「重慎。」 輔氏 廣曰:「敬謹 語》「出 愚謂: 人之所以 門 此二句 如 見 有

凡祭,於室中、堂上無跣,燕則有之。 跣,悉典反。」 《釋文》:

悉然也。 乃升堂。」 祭所尊在室,燕所尊在堂。 爲歡也。 鄭氏曰:「祭不跣者,主敬 天子、諸侯祭,有事尸於堂之禮。 跳,脱屨 孔 氏 터 : 也。 凡 士祭在室,大夫祭 祭,自天子至 也。 將燕,降説屨 燕則 有跣 +

> 有跣。 無跣。 而飲酒 屨 有之者,謂堂上有跣 屨,故云 『凡祭,於室中、堂上無跣』。 祭禮主敬,非唯室中不脱屨,堂上亦不 在 室,儐尸在堂,天子、諸侯 而升堂安坐 燕主歡樂,徹俎之後,坐而飲 乃脱屨,祭主嚴敬,始終皆不坐,故 ,相親之心也。」 也。 燕禮 則有室有堂 主歡,故脱 愚謂: 酒 燕則 坐 脱

未嘗不食新。

僕於君子,君子升、下則授綏,始乘則式,君 子下行,然後還立。《釋文》:「還,音旋。」 食新。 別有薦新之禮。既薦新,則可以食之矣。 傳》:「不食新矣。」秋時黍稷始熟,嘗祭用 謂: 鄭氏 以饋熟、未嘗則未 嘗,秋祭也。 曰:「嘗, 此謂大夫、士之禮、人君時祭之外, 謂 薦 蕉宗 食新, 新 廟 物 食新穀也。 於寢 ,故人子不忍先 廟。 [《]左 愚

乘貮 僕 行 車 則 跪,爲君子御,始乘則式,敬有隆殺也 式以待之,所以爲敬也。爲君御 凡僕人之禮,必授 者,升時則授綏以升,下時則授綏以下也 不受耳。始乘則式,謂君子未 曰 公於君子,謂 車則式,佐車則否。 就旁側也。立、駐車也。君子既下而 非降等之僕,有不必式者與。 ,然後還車 「賓之乘車,在大門外西方,北面立。」 爲 而立,以 尊者御也。 人綏,但非降等之僕則 俟君子。 升、下則授綏 出 《公食禮 還,謂 時,御 ,始乘則 者 轉 然

祀 副 鄭 車 乘君之乘車,不 氏 尚敬,乘副車者必式。 則否,所謂 曰 不式也。」 貳,戎獵 曰:「貳車、佐車、皆 之副 武武 愚謂: 車不式」也 敢 曰 曠 「佐。」 左,左必式」也。 乘貳 副 戎獵尚武,乘 車 孔氏 車 也。 則 式,所謂 日 朝祀之 朝 佐 副

乘。《釋文》:「乘,繩證反,下文「除乘車」同。」貳車者,諸侯七乘,上大夫五乘,下大夫三

鄭 **貳車皆一** 其大夫二乘。 七乘,其大夫五乘。子男之卿貳車三乘, 宜 從車二乘。」昏禮攝盛,貳車二乘,則常禮 侯伯之大夫也。《士昏禮》曰:「乘墨車, 其君二等以下,及其大夫、士亦如之。」此 又《大行人》云:「凡諸侯之卿,其禮各下 乘」,侯伯「貳車七乘」,子男「貳車五 伯之禮也。 命之數。」 九乘,侯伯七乘,子男五乘,卿大夫各如其 上大夫五乘,侯伯之卿也。 典命》言「車服各如其 氏日 一乘也。 : 一此 乘與。 《周禮 愚謂:貳車,諸侯七乘,據侯 以此差之,則公之孤、卿 蓋 士卑,五等之國 殷制 鄭 •大行人》上公「貳 氏 也。 以 命 《 周 此 數」,而 爲 下大夫三乘, 禮》貳 殷 略爲 禮 此 , 蓋 節, 車,公 乘」。 軍九 以

準矣。 故 狗攝服」,則非 尊卑爲差等,非能 如其 大 殊其名耳。 大夫有貳 侯、伯之卿三命,子、男之卿二命,而服同 三章,公、侯、伯之大夫再命,子、男之大夫 二乘」,疏以 一命,而服同一章,則車服不可盡以 疑 夫 英非 (命數,至其卿大夫,則但視其命數之 五. 舊説謂士無貳車。《士昏禮》「從 乘 車,士有陪乘。 周禮也。 ,下大夫 謂士無貳車,非也。 爲攝盛,然《士喪禮》「貳 攝盛始有貳車矣。《國 盡 然唯五等諸侯車 如其命之數也。 乘」,皆 陪乘即貳車也 與 (命數) 不合, 文車白 命數 ·服各 語 車

服劍、乘馬弗賈。《釋文》:「賈,音嫁。」有貳車者之乘馬、服車不齒,觀君子之衣服、

者之物,非敬也。」 孔氏曰:「齒,論其年服車,所乘車也。車有新舊。弗賈,平尊鄭氏曰:「不齒,尊有爵者之物,廣敬也。

酒、執脩以將命,亦曰「乘壺酒、束脩、一犬」。 其以乘壺酒、束脩、一犬賜人。 若獻 也。 鄭氏 數多少 擯者矣,食犬賤也 下云「守犬、田犬則授擯者」,則食犬不授 亦曰 陳列重者於門外,而執輕者進以奉命也。 於尊者曰 曰清,不沸曰糟。 四壺酒亦曰乘壺。 或無脩者,牽犬以致命也。 四壺也。 『乘壺酒、束脩、一犬』者,謂將命之辭 曰:「陳重者,執輕者,便也。 0 愚謂:犬與酒、脯並獻者,食犬也。 獻。 酒,謂清也,糟也。 賈,評其賈數貴賤。」 孔氏曰:「四馬曰乘,故 陳,列也。 束脩,十脡脯 酒重脯. 於卑者曰賜, 不言『陳犬』, 也。 三輕,故 乘壺, 則陳

其以鼎肉,則執以將命。

孔氏曰:「此謂無脯犬而有酒肉者,陳酒鄭氏曰:「鼎肉,謂牲體已解可升於鼎。」

而執肉以將命也。」

其禽加 名。 之。《釋文》:「緤,息列反。 犬則執緤,守犬、田犬則授擯者,既受乃問犬 孔 雙,委其餘於面」,非陳於門外也。 酒 牛則執約,馬 、執脩以將命,其所陳亦不在門外矣。 氏 於一 曰: 愚謂:《聘禮》記 雙,則執一雙以將命,委其餘。 「二隻日 則執勒,皆右之,臣則 雙。 守,手又反,又如字。 委其餘,陳 曰「凡獻 禽,執 然則 紖,音 於 左 門 陳

廚。 臣 盧 守犬、田犬問名,畜養者當呼之名,謂若韓 鄭氏曰:「緤、紖、靮,皆所以繫制之者。 曰"「犬有三種"一曰守犬,守禦宅舍。 二日 一,謂 、宋鵲之屬。 田犬,田 田 囚 犬、守犬有名,食犬無名。 俘。 獵 左之,異於衆物。」 所用。 右之者,執之宜 三曰食犬,以充庖 由便也。 皆右之 孔 氏

勒,丁曆反。」

奉,芳勇反。」 本又作「脱」,又作「説」,同吐活反。 以將命,無以前之,則袒橐奉胄。《釋文》:「稅 車則説緩,執以將命。 甲,若有以前之,則執 馴 者,謂 者,則食犬不授擯者,蓋以授庖人之屬與。 手當制之也。」 者、臣虜或起惡慮、故以左手操其右袂、右 拜受,又自以授擯者也。 之」,是也。 之,右手防禦,故《曲禮》云『效犬者 善無無 以右手牽之。 口 臣,征 防禦,若充食之犬,則 愚謂:授擯者,謂主人既 伐 此謂 所 獲民 袒,音但。囊,音羔。 守犬、田犬授擯 田 大、守 虜 也。 大畜 左 左之 左 手 牽

鄭氏曰:「甲,鎧也。 策、綏、故陳車馬 出兜鍪以致命。」 也。櫜,弢鎧衣也。 有他物以前之,則陳甲而 而説綏 孔氏曰:「獻車馬者執 胄,兜鍪也。 有以前之, 執執 執 他 以 將 物 輕者以 命。 謂他摯幣 袒其衣, 甲若 將

九九六

者執胃」,是也。」則開甲橐出胄,奉以將命、《曲禮》曰『獻甲則開甲橐出胄,奉以將命、《曲禮》曰『獻甲命。袒,開也。橐,弢鎧衣也。若無他物,

器則執蓋。

則陳底執蓋以將命,蓋輕便也。」鄭氏曰:「謂有表裏。」 孔氏曰:「凡器,

武反。」 弓則以左手屈韣執拊。《釋文》:「韣,音獨。 拊,芳

執之,而右手執簫。」 鄭氏曰:「韣,弓衣也。左手屈衣,并於拊

「煩」。」(鄭注:「夫或爲「櫝,音讀。夫,音扶。襪,如遥反。」(鄭注:「夫或爲劍則啟櫝,蓋襲之,加夫襓與劍焉。《釋文》:

郤合於函底之下,加衣於函中,而以劍置 孔氏曰:「蓋,劍 襓,劍衣也,加劍於衣上。夫,發語 鄭氏曰: 「櫝,謂 劍 函之蓋 函 也。 也。 襲,卻合之。 開 函 聲。」 丽 以 夫 蓋

《内則》云:『炮,取豚,編萑以苴之。』是苞 也。 氏曰:「案《既夕禮》云:『葦苞長三尺。』 執上,上陽也。 鄭氏曰:「苞苴、謂編束菅葦 蓐有著者謂之茵。 《既夕》云: 『茵著用 苴是編萑葦以裹魚及肉也。 也。● 茵,著蓐也。 故《禹貢》云:『厥包橘柚。』《孔叢子》云: ·我於《木瓜》之惠,見苞苴之禮行。」是也。 籥,如笛三孔。 右手執下,下陰也。」 皆,十六物也。 穎,警枕 亦兼容他物, 也。 以 裹 筴,蓍 左手 魚 孔 肉

❶ 「菅」、《禮記注疏》作「萑」。

所執 者櫝 之」,似謂用兩手在 手,以左手在上而執之,以右手在下而 是乃得以 執其下端。 之有上下者,則以左手執其上端,以 者櫝也,筴也,籥也,此十六物,其執之皆 也,几也,類也,杖也,琴也,瑟也,戈有 書也、脩也、苞苴也、弓也、茵也、席也、枕 者 警發之義,故爲警枕。 茶。」荼謂茅秀也。 尚左手也。 左手承拊」,則 義非是。 兩不同者,蓋籥有大小。」 ,案漢禮器知之、《詩箋》或云『籥六孔』, 爲 ,謂戈有刃 尊。 《曲禮》言「遺人弓者,右手執簫・ 尊處授主人也。 其無上下者,則亦但以左手之 尚左手,以左手爲尊也。 蓋授受之法,主人在 執物尚左手之法見矣。 而 用 『枕』外别言『穎』,穎是 一處而上下捧持之,其 函盛之者也。 云『籥,如笛三孔』 愚謂: 戈有刃 孔氏謂 左 笏也 小必 尚 右手 蓋 戈 左 如 承 物 刃

> 刃授人者,以其有櫝故也。 刃在上,其授人宜辟刃,此乃尚左手而

以

又七亦反。 則 刀,卻刃授穎,削授拊。 辟 辟 其鋒末,而 僻,非是。 以正 鄭氏 從 向 執 穎,其事 之在手,禾之秀穗,枕之警動,皆謂之爲 授人,則 仰其刃,以刀鐶授之。 其鋒末 人也。 上可 有刃而無櫝者之法也。 刃。《釋文》:「穎,役頂反。 鄉人也。」 曰:「穎,鐶也。 辟,匹亦反。」〇今按:辟,當音避 知也。 雖異,大意同也。」 以 辟猶 ·, 而 以刀授人,卻其刃向下,又卻 以 把授之。 鐶 以 授穎、授拊, 卻也。 其把授之。 授之也。 孔氏 穎,是警發之義。 凡有刺 鄭氏 拊,謂把。 曰:「授人以 削, 削,音笑。 以 辟刃,不以其 即是 解 謂曲 不言 削 刃者 爲「偏僻」之 愚謂:此 授 辞 刀。 刺,七賜反 二 卻 辟 人,亦卻 以 刃。 刀,卻 刃,不 以 刃, 授 辟 削 刀

至此,明獻遺執物之法。
物尚左手之法異也。○自「其以乘壺酒」辟刃而授穎、授把,則是以末授人,與他執辟刃而授穎、授把,則是以末授人,與他執非獨刀、削如此,凡有刺刃者以授人,其法非獨刀、削如此,凡有刺刃者以授人,其法

至此,明獻遺執物之法。

鄭氏曰:「不以刃向國也。」乘兵車,出先刃,入後刃。

軍尚左:

,卒尚右。

陰主殺。卒之行伍,以右爲上,示有之策,左將軍爲上,貴不敗績。右,陰也,鄭氏曰:「左,陽也,陽主生。將軍有廟勝

軍旅思險,隱情以虞。《釋文》:「翮,況矩反。」賓客主恭,祭祀主敬,喪事主哀,會同主詡,

死志。」

隱,意也,思也。虞,度也。當思念己情之勇,若齊國佐。險阻,出奇覆諼之處也。鄭氏曰:「恭在貌,敬在心。詡,謂敏而有

謂臨事 所能 謂: 虞者,度彼之情,使敵不能欺。 陵」也。 詡萬物。」會同主詡,子産所謂 謂 祀以誠感格,故以内心之敬爲主。 交際以禮相 好謀 詡,發皇之意。 以度彼之將然否。」 而懼,慮敗不慮勝也。隱情以 圃 隱情者,隱己之情,使敵不能測 成,且 示,故以容貌之恭爲 兵 事 《禮器》曰: 露 則 不神 輔 「國不競亦 也。」 「德發揚 氏 主。 廣 思險, 曰 虞, 愚 祭

字又作「嚼」,子笑反,又在笑反。」「飯,煩晚反。歠,昌悦反。亟,紀力反。數,色角反。噍,歠,小飯而亟之,數噍,毋爲口容。《釋文》:燕侍食於君子,則先飯而後已,毋放飯,毋流

後已,若勸飽然。小飯,謂小口而飯,備噦容,弄口。」 孔氏曰:「先飯,若嘗食然。也。小飯而亟之,備噦噎若見問也。口鄭氏曰:「先飯後已,所以勸也。亟,疾

曀 噍 也。 容也。」 數數 亟,速也。 《嚼之。 無爲 速咽之,備見問 口容,無 得 弄 也。 П 以 數

客自徹,辭焉則止。

爲

客爵居左,其飲居右。 右。《釋文》:「僎,音遵。」○鄭注:「酢,或爲「作」,僎或爲 相者。主人興,辭於客,然後客坐。」此通 言燕食之法,不與上「侍食於君子」相蒙。 (曲禮》曰:「卒食,客自前跪,執 介爵、酢爵、僎爵皆居 飯 \ 齊以授

人爲 僎爵,皆飲爵也。介,賓之輔也。 鄭氏曰:「客爵,謂主人所酬 不 酢主人也。 飲酒禮》介爵及主人受酢之爵及僎 優賓耳。 明奠置之所,故記者明之。」 、卿大夫來觀禮者。」 賓不舉,奠于薦東。 古文《禮》僎作『遵』。 孔氏曰: 賓之爵也,以 介爵、 愚謂:此 遵,謂鄉 酢,所以 公爵,皆 酢爵、 鄉

記 居 亦 于西階上,東面,以南爲右。 主人席于阼階上,西面,以北爲右。 賓酢主人之爵。僎爵,主人獻僎之爵也。 西」,是也。介爵,主人獻介之爵。酢爵, 于薦西」,又「一人升,舉觶于賓,奠觶于薦 及一人舉觶之爵也。 右者、《鄉飲酒禮》主人獻賓,「賓受爵,奠 不舉,此二爵則賓飲之,故曰「其飲」。 西爲右,東爲左。 明鄉飲酒禮奠爵之法也。 唯賓有之,故謂酬爵爲 曰 奠于薦東」,是也。 鄉飲酒禮》主人酬賓,「奠于薦西」,賓取 以 右,孔疏專指爲一人舉觶于賓之爵,然 曰:「凡奠者于左,將舉于右。」〇其飲 客爵者,《鄉 西爲右。 三爵皆飲,故居右。《鄉飲 飲 酒禮》自 其飲,謂主人獻賓之爵 賓席于牖間,南向,以 酬爵,賓奠于薦東而 客爵 介以下無 主人酬賓之爵 僎席于賓東 也。 居 、酬爵 左 居

介無 賓 賓轉奠于薦東耳。 賓奠之而不舉。 怬 ,既失鄭氏之意, 而 幡 遺 與《鄉飲酒禮》相違,其失甚矣。 ,唯賓有之,此乃主人所以優賓 正 爵皆指 爵 也。 獻 然主人 又注 爵,不應賓爵乃專言 且謂 孔疏 以酬 「薦東即 (酬賓,本奠薦西, 以奠于薦東爲優 爵爲優賓,蓋 爲主人 故 所 以 旅

注音冔,況甫反,徐況紆反。」
文》:「濡,音儒。腴,以朱反。鰭,音祁。膴,舊火吳反,依玄濡魚者進尾,冬右腴,夏右鰭,祭膴。《釋

孔 美,故進魚使嚮右,以 夏 右鰭 腹 也 下 氏 時 氏 陽 也。 日 ,氣在上。 乾魚進首,辦之由前,理易 氣 「濡,溼也。 「濡 冬右腴,氣在下。 上在 魚進尾, 辦之由 一魚脊。 膴,大臠,謂刳魚腹也 冬時陽氣 凡陽氣 右手取之便也。祭 鰭,脊也。 [後,鯁 所在之處肥 析 下在 也。 肉 魚 易離 腴, 腹 夏

牲》

少牢禮》尸舉魚皆振祭,是也。

振祭,

食乃祭之、《公食禮》「魚不祭」,賓不食魚

是也。 俎。 首 則 禮簡,魚亦與牲同 牢》及《公食禮》是也。若與牲同俎 賓尸之魚皆横載 載牲之法而横載、《少牢禮》祝俎及《少牢》 載,俎既横設,魚則隨 五 進尾進首之理。故《少牢》:『魚 膴 祭祀及饗食正禮 取以祭先 (少牢》賓尸,司士載魚,皆加膴祭於其上, 一,濡 一,而 者 生人進鬐,鬼神 魚進 謂 俎縮載。』《公食大夫禮 若用於食, 愚謂: 刳魚腹下爲大臠,此 也。 尾。 此謂尋常燕食所進 魚之縮載者,正法 魚 也。 ,是也。 則但振祭而無膴祭、特 俎而並 用 進 於飲 腴 若祭祀魚 俎而從於人爲横,無 此所言是私燕 横載者,魚縮 横 酒 載 處肥 , 則 ·>: 『魚 則 在 有 魚 美,故 俎 用 乾 也,《 膴 , 則 體,非 一,皆縮 魚進 鮒 七 從 載 少 縮 + 刳

范,音犯。」

故也。

反,下「以齊」同。」 凡齊,執之以右,居之於左。《釋文》:「齊,才細

梅調和正之,於事便也。」 鹽梅於右手,居處羹食於左手,以右手鹽 那氏曰:「凡齊,謂以鹽梅齊和之法,執 或氏曰:「凡齊,謂以鹽梅齊和之法,執 或 與氏曰:「齊,謂食羹醬飲有齊和者也。」

贊幣自左,詔辭自右。

受爵,祭左右軌、范,乃飲。《釋文》:「軌,媿美反。酌尸之僕,如君之僕。其在車,則左執轡,右

馭》: 也。 范聲同 而 異,而其實一也。 馭》言「祭兩軹」,此言「祭左右軌」,所據雖 爲車轍,祭酒 軌爲車轍, 軹爲轂末, 二者不同。 助己不傾危也。 受爵,則祭酒於車左右軌及前范,爲其神 鄭 車上矣。 《大馭》云: 「及犯軷,王自左馭 爵祭酒也。 **軷祭,如酌酒與君僕之禮,以尸之尊似君** 爲尸御車,將欲祭軷,酌酒與尸之僕,令爲 與軹於車同爲轊頭 軌與軹於車同 氏 曰「其」曰「則」,則酌僕與僕之祭不獨在 尸位在左,僕立於右,故左執轡,右受 [『]祭 曰:「當其爲尸則尊。 ",謂軾 兩 軌,謂轂末。范,謂式前。 軹,祭軌,當作「軓」。 兩帜,則下及於軌矣。《大 前也。」 爲轊頭」者,蓋兩轊之下 祭畢,乃自飲。」 然此言在車祭酒之禮 也。 孔氏曰:「尸之僕 軌亦當作「軓」。 周 乃飲。」 禮 愚謂: 而注謂 大 即 軌 與

此與。 馭 似,經典或相亂 也。 也。 僕而僕祭之,至登車,又酌僕而僕祭之如 以《大馭》與此文參觀之,蓋下祝時 酌僕,僕左執轡,右祭兩 之庇軹」,是也。 是輢之植者、衡者、《考工記》「參分較圍, 及《考工記》「軓前十尺,而策半之」,是也。 去一以爲軹圍」,是也。 祭兩帜」,及《考工記》「五分其轂之長,去 軹」字從車旁只,音旨。 范」,並音犯,車式前也。《大馭》「祭軓」, 以爲賢,去三以爲軹」,又「弓長六尺,謂 下 · 大馭》「祭軓」之軓,當從 ,祝,登,受轡,犯 此之「祭兩軌」,及《中庸》「車同 朝」字從車旁凡,字亦作「軺」,又作 「軌」字從車旁九,音媿美反,車轍 ,而先儒 但「軌」「軓」二字,形體 軷,遂驅之。 亦有誤解者。 一是轂末、《大馭》 此字有二義: 軹,祭軓,乃飲。」 「軓」,而經書 及祭 `軌 是 己酌 《周 相

《周禮》中言「軹」者非一,如「立當車軹,五 名 斬。 以斬易軹也。今姑述其説以俟考焉。 之庇軹」,未必皆故書爲「斬」者,似未可 分其轂之長,去三以爲軹」,「弓長六尺,謂 子春改斬爲軹,遂與輢之直者衡者同 讀斬爲『簪笄』之笄。」東原戴氏云:「轂 字與「牡」字爲韻、當從九,而毛傳云:「由 典傳寫之誤也。《詩》「濟盈不濡軌」,「軌 爲 注之誤也。 反,謂車轊頭。」依傳意直音犯。 輈以上爲軌。」《釋文》云: ·軹」爲「斬」,杜子春云:「斬當 車之中,二名混淆。」其説甚爲有理。 「軌」,故杜子春云:「軌當 轂末出輪外,似笄出髮外也。 又案《大馭》「祭兩 「軌,舊龜 爲 此先 作 軹」,故 **軋。**」此 ... 儒 名 。 杜 但 經 末 或 書 傳 美

凡羞 有俎 者 ,則於俎内祭。

鄭氏

曰:「俎於人爲横,不得祭於間

也。

1020

孔 氏 曰:「羞 在 豆 則於豆 間 祭, 在 俎 則

於俎 内 而 俎横於人前,故不得祭 於 俎

外 及 兩 俎間 也。」

君子不食圂腴。《釋文》:「圂,與豢同,音患。」

鄭氏 曰 「圂,犬豕之屬。 腴,有似 人 穢。

孔氏曰:「圂腴,豬犬腸也。 豬犬 八食穀

也。 米,其腹與人相似,故君子避其腴,謂 故俎闕 也。」 愚謂:羊牛之腸胃 湯陽胃

用爲俎 實,而豕則不用,故記者釋之。

小子走而不趨,舉爵則坐祭立飲。

鄭氏 主參預禮,但給役使,故宜驅走,不得 俱備禮容也。」 曰 「小子,弟子也,卑,不得與賓 孔氏曰:「弟子不得與賓 趨 翔

爲容。 若得酒、舉爵時則坐祭、祭竟 而 立

之,小子坐祭立飲,是禮不備 飲之也。」 走而不趨,是容不備。 愚謂:成人有趨翔之容,小子 成人舉爵坐祭遂飲

> 凡洗 必 盤。

牛羊之肺,離 鄭氏 (日:「先盥乃洗爵、先自 而 不 提 心。 《釋文》:「提,丁禮 潔 也。

旁,不絶其中央少許,食時則絶之以祭也 少者,使易絶以 鄭氏曰:「提猶 絕也。 祭耳。」 愚謂: 割 離 其 四

○肺有二:一爲祭肺,亦曰 刌肺,《特牲

篇「侑俎切肺一」,是也。 記「刌肺三」,是也。 亦曰 切 一爲舉 (肺,≪) 肺 少牢》下 ",亦曰

離肺、《特牲》記「離肺一」,是也。亦曰嚌

肺, 少牢》下篇「羊肉涪 嚌肺一」,是 也。

祭肺爲祭而設,舉肺 二肺,生人唯有舉 肺 爲 食而設。 有祭 肺,則舉肺但 祭祀兼 有

振祭 《鄉飲酒禮》「弗繚,右 而已。 無 祭 肺 則 於舉 絶 末 以 肺 祭」,是也。 絕末以祭,

飲酒 賓尸禮有祭肺,而舉肺 ,其有舉肺者正也,其有祭肺,乃以 亦絶祭者,賓尸乃

凡羞有消者不以齊。《釋文》、「消,起及反。」

湇,大羹也。齊,謂鹽梅之齊和也。 大羹

不和

根不淨,末萎乾,故擇者必絶其二處。」鄭氏曰:「爲有萎乾。」 孔氏曰:「葱薤

羞首者,進喙,祭耳。《釋文》:「喙,許穢反。」 進喙 也。」 膳羞 而義 鄭氏曰:「耳出見也。」 孔氏曰:「羞,亦 殺饌而言也。 「凡羞有湇者不以齊」,此二「羞」字皆總指 不同。 以向尊者。 也。 愚謂"羞,進也。此篇言羞者五, 喙,口 「凡羞有俎者,則於俎内祭」, 「未步爵,不嘗羞」,此專謂 也。 尊者若祭,先取牲耳祭之 若膳羞有 牲 頭者,則

祭,與魚之祭膴同。是。祭耳,謂羞之者先割耳以供尊者之皆當爲「進」字之義。此疏以羞爲膳羞,非庶羞也。「羞濡魚」,「羞首」,此二「羞」字

尊者以酌者之左爲上尊。

西面 也。 鄭氏 上,則酌者不得背公,自當東面 之左尊而實以玄酒也。若燕禮,則設 蓋言設尊之人,方其設時,即 酒。』而鄭注云:『設尊者北面,西曰左。』 即此所 酒》云:『玄酒在 之左也。 在西,酌酒者向北,以西爲左,上尊在酌者 左則 凡尊必上玄酒,尊於房户之間。 曰:「尊者,設尊者也。 右尊也。」 而左玄酒,南上,公乃 謂 〇朱子曰:「設尊之法、鄉飲 『尊者以 西。』《鄉射》云:『左玄 愚謂: 酌者之左爲 上尊,玄酒 即 酌者鄉尊,其 預 以酌,而上 位 上尊』者 度 於 酌 作階 尊者 玄酒 之尊 酒人

尊乃 爲 反。 飲、 左爲上尊也。 于房户間者,其設尊皆如此。又《特牲禮》 所言不獨爲鄉飲、鄉射,凡賓主體敵,而 反謂酌者西 相反耳。經泛言「尊」者,所該者廣,非專 甒于房户之間」,則祭祀設尊亦以酌者之 尊于户東,玄酒在西」、《少牢》「司宫尊兩 一禮也。 鄉射言則可,以爲爲燕禮言則 鄭注既不明,而庾、孔皆引《燕禮》而 在 其 (右矣。 面,其辟戾甚矣。」 唯君燕其臣則面尊,而與此 故此 經所 云, 愚謂: 以 爲 正 與 爲 此 尊 之 鄉

尊壺者面其鼻。

皆 其鼻,謂設尊或傍於壁,或傍於楹,而其鼻 謂:尊壺,亦謂設 鄭氏曰:「鼻在 此特言「尊壺」,則尊之有鼻者唯壺 在 好而, 向人也。 面中,言鄉人也。」 壺 孔疏云:「尊鼻宜 也。 上泛言「尊者」, 與。 前尊 面 愚

> 也。 是。 者,故 背公,則尊不得向公矣。 尊鼻之向外也。若謂尊之鼻向君,則 尊,謂君之面向尊也。 之西」,則尊傍於楹 之語,而 《燕禮》「公在阼階上」,而「尊于東楹 蓋尊面必與酌者相對 面 專以 其鼻。」此 此 爲燕禮之尊耳。 誤解《玉藻》「唯 而 尊壺者面 鼻乃西向 ,燕禮酌者不得 非 其鼻,謂 君 唯 面 君 向 公 非 面

「機,其記反。醮,子笑反。折,之設反。」飲酒者、機者、醮者,有折俎不坐。《釋

廷,●又何享焉? 其飲酒也。」乃飲酒。齊侯欲享公,子家曰:●「朝夕立於其曰機。」 愚謂:飲酒,即燕禮也。《左傳》鄭氏曰:「折俎尊,徹之乃坐也。已沐飲

[「]子家」、《左傳》作「子家子」。

[「]廷」、《左傳》作「朝」。

酒之事 醮 折 禮 醮 其 不 氏 酒 初 用 父文伯飲南宫敬叔 俎」,乃皆 告于賓。 主人請徹俎 坐 坐。 至 謂 有 俎 此 爲 》、《鄉射》皆云: 醴 《左傳》季氏 醴 一,折 則 「醮爲 折俎時則 冠 三醮乃有折俎,而於初 云「醮」者,蓋冠禮於冠者有醴有醮 蓋酌 也 曰 爲 、牲體 禮饗賓也。 坐。 賓北 醴,用 、酌始冠者」,非 醮 《燕禮 。』《燕禮》「司正請徹俎 始冠者之禮,皆 醴 爲 與折俎之有無,皆無 是 賓 面 不坐,折俎尊也。 俎 酒 学性皆 有 坐取 用壹獻之禮,贊冠者 飲大 請 也。 則 酒」,是飲酒之類多矣。 折 冠禮,醴賓以 日 俎 俎 坐於賓,賓辭 三事 夫酒」、《國語 用 醮,其 時 也 以 狗 不 降 無 禮末皆坐,其 、醮、再醮 坐 冠 是 於 酬 膳宰徹 禮 也。 其 故《鄉 賓 酢 一、公許, 坐 每 禮 亦 以 獻之 ○鄭 無 時 加 而 同 然 俎 公 飲 爲 皆 飲 亦 明

謂 也。 也。 禮》有折俎者皆不坐,獨言『機、 亦有 因 醮不 禮》亦徹 卑,故不得 酒 俎,則不得坐也 故 後,有旅 介, 飲酒目之」,非也。 〇孔 之輕者,故《曾子問》謂之「饗」。 「醮焉 包機、醮也。 疏又云「折俎尊,機醮 至其末, **贊者皆** 不敢 醮禮 敢坐」,亦非 疏又云「庶子冠于房户之前,冠者受 疏 冠者受酌,本無坐法,雖 謂 俎 坐也。 膰 ,是冠禮 而《冠義》云「醮於客位」,則適子 「飲酒者即下『機者、醮者』, 與, 乃坐 坐」,亦 則 無筭 徹 則 非 ,故曰「有 也。 俎 爵 是名 疏 初 非 此平列三事,不得 而 又 因機、醮禮 不 而贊者皆與 庶子冠於房户之間 也。 雖 坐 굸 以醴與醮 曰 而 **《鄉** 醮 折 飲酒。 鄉 醴 俎者不 飲 飲 丽 亦 卑不 醮 實爲燕禮 於飲 酒》、《燕 酒 然 分適、庶 壹獻 若未 不 坐 得 非所 小 以 總 《燕 焉。 坐 飲 以 徹 之 事

牛與羊魚之腥

聶

而切之爲膾。

麋鹿爲菹,

《燕禮》無折俎之時亦坐,豈獨禨、醮乎?俎亦坐,故特明之」,亦非也。《鄉飲酒》、者,以禨、醮無折俎之時則得坐,嫌畏有折

未步爵,不嘗羞。

之。 之。 《燕禮》「公坐,取賓所媵觶興,唯公所賜, 是設羞在無算爵之先。 之」,是也。《鄉飲酒禮》「乃羞,無算爵」, 乃就席,坐行之」,又曰「執散爵者乃酌 卒爵。」 射》獻後薦賓、皆先祭脯醢、嚌肺、乃飲 謂無筭爵之時。羞,庶羞,行爵之後始嘗 鄭氏曰:「步,行也。」 未步爵之時雖已設羞,而不得輙嘗也。 酒設,若爵未行而先嘗羞,是貪食矣。 故《鄉飲酒》、《鄉射》、《燕禮》、《大 若正羞脯醢折俎,未飲 愚謂: 旅酬無筭爵之爵謂之行。 然設羞本爲案酒 孔氏曰:「羞本爲 酒之前則 此 行 嘗

> 局句,「實之醯以柔之」爲句。 學文》:「聶,之涉反。解,音獻。屬,俱倫反。辟,音璧, 以補麥反,徐扶益反。宛,於阮反。脾,毗支反。菹,莊居 又補麥反,徐扶益反。宛,於阮反。脾,毗支反。莊,音璧, 以養之。 與,皆聶而切之,切葱若薤,實之醯以柔之。 與,皆聶而切之,切葱若薤,實之醯以柔之。

尸則坐。《釋文》:「燔音煩。」 其有折俎者,取祭,反之,不坐,燔亦如之。 菹』以下,已於《内則》具釋之。」 牒爲大臠,而後細切之爲膾也。 也。 腥氣也。」 報切之、則成膾。軒、辟雞、宛脾、皆菹 鄭氏曰:「聶之言牒也。先藿葉切之,復 其作之法,以醯與葷菜淹之,殺 孔氏曰:「聶 而切之者,謂 『麋鹿 肉 爲 先 及 類

絶祭,左手嚌之,興,加于俎,坐帨手。」尸《鄉射》曰:『賓奠爵于薦西,興,取肺,坐,鄭氏曰:「亦爲柄尺之類也。燔,炙也。

耳。 祭時坐耳。 俎 于菹 執 則 在 肺,祭畢反此所,祭於俎,皆立而 俎 爵 坐 了, 右 户,户 若尸尊,雖折俎,取祭、反之皆坐也。」 ,故取祭、反之亦皆不坐。 俎既有足柄尺之類,故就 豆。豆豆 尊 兼 也。 取 燔,謂燔肉。 肝 孔氏 《少牢 擩 于俎 曰:「折俎 饋 鹽 《食禮》 雖非 振 祭, 謂 折骨,其 日 此謂賓 俎 嚌之, 爲之,唯 折 取 戸 所 骨 肉 客 祭 於 加 左

故鄭以 之稱 以 長以燔從」。 人獻尸,「賓長以肝從」,主婦獻尸 丽 周 燔亦如之」,所謂「燔」,實兼 燔 肉燔也。《詩・楚茨》疏。 愚謂:燔,所 禮 ¨; 以 爲炙者,蓋燔是火燒之名,炙者遠 炙解燔,欲明燔 量人》: ·難熟者近火,易熟者遠之,故肝炙 肝,炙肝。 以從獻者也。 制 其從獻 燔,謂燔肉也。 中兼有燔、炙也。 燔、炙實亦通名。 之燔 《特牲禮》主 燔、炙而言, 脯。」此云 , 「兄弟 火 鄭

> 之事。 飲 同義。一 取 者,蓋祭肺 尸 ○自「凡羞有俎者」至此,雜明燕飲及膳羞 取祭肺 則折 也。 酒有折俎者不坐同 然則 俎高,坐而 則折俎尊,故取祭反之不坐,與 亦坐,鄭氏獨引《少牢禮》「取肝」 佐食取 取祭、反之不 以 取反不 泛授尸 義,唯尸 , 而燔則尸所自 便,與 坐,其 ,尊則 (柄尺 義 有二: 坐也。 不坐

亦作「冈」,又作「誷」,亡兩反。」
衣服在躬,而不知其名,爲罔。《釋文》:「罔,本

也。」 無 鄭氏曰:「罔,猶罔罔, 不知也。 名,人莫不知,然不知其所以名之義 德,若著之而不知其名義,則是 曰:「衣服文章,所以表 知 而 愚謂:名者,義之所寓也。 何 以 附 在我身者而昧之,此非昏罔 人之德,亦 無知貌。」 無 衣服之 知 勸 7,猶之 孔氏 之人 慕

然。《釋文》:「道,音導。」〇石經「而」下有「有」字。其未有燭而後至者,則以在者告。道瞽亦

在斯。」」 在斯。」 告 之 曰:『某 在 斯,某 也。』皆 坐,子 告 之 曰:『某 在 斯,某 見,及階,子曰:『階也。』及席,子曰:『席 鄭氏曰:「爲其不見,意欲知之也。 師冕

遥反。」 後以授人。《釋文》:「燋,側角反,又子約反,或音在人飲酒,爲獻主者,執燭抱燋,客作而辭,然

又抱未爇之燋,其愛客有加而無已也。」未爇曰燋。」 應氏鏞曰:「執已然之燭,示不倦也。言『獻主者』,容君使宰夫也。鄭氏曰:「爲宵言也。主人親執燭,敬賓,

執燭,不讓、不辭、不歌。

顯。今既夜暮,所以殺於三事。」「禮,賓主有讓,及更相辭謝,又各歌詩相鄭氏曰:「以燭繼晝,禮殺。」 孔氏曰:

對。《釋文》:「辟,匹亦反,徐孚益反。 咡,而志反。」洗、盥、執食飲者勿氣。有問焉,則辟咡而

長者之手足及食飲,辟咡而對,亦當 長。但如孔氏説,則勿氣當爲不敢以 洗、盥爲洗足、盥手。 者。」 愚謂:鄭氏總以「不敢歆臭」解此 孔氏曰: 鄭氏曰: 氣及尊長及其食飲,其義乃備耳 則以洗、盥爲盥手、洗爵而酌酒,孔 時,尊長有問,則辟口 不得鼻嗅尊長 長盥手。 爲尊長洗、盥及執尊長食飲,則 「示不敢歆臭也。 「洗,謂爲尊長洗足。 食飲。 以下文觀之,疏義似 而對,不使口氣及尊 若洗、盥、執食飲之 口 旁曰 盤,謂爲尊 唱。 氏 公氣觸 爲恐 以則以

1027

袝、練曰告。 爲人祭曰致福,爲己祭而致膳於君子曰膳.

言『致福』,申其辭也。自祭言『膳」,謙也。鄭氏曰:「此皆致祭祀之餘於君子。攝主

0

袝、

稽首。 五. 之南,南面再拜稽 凡膳告於君子,主人展之,以授使者于阼 犆,大得反。 又奴到反。 箇,少牢則以羊左肩七箇,犆豕則以 笛。 可見。 《釋文》: 其禮,大牢則 《説文》讀若儒,《字林》人於反。 「臂,本又作「辟」,以 首送。 以 牛左肩、臂、 反命,主人 豉 反。 箇,古賀反。 臑 臑折 **豕**左 又 ,奴報反 再 一肩 九 拜 階

祭也。 鄭氏曰:「折,斷分之也。 孔 氏 (曰:「展,省視也。 羊豕不言臂、臑,因牛序之可知。」 皆用左者,右 敬君子,故主人 以

> 《少牢》不賓尸禮,主人俎用臂,主婦 之,至蹄爲九段也。 者。 無 臑,唯肩不見所用,是留肩以致膳,而致 臂、臑,前脛三體之名。九箇者,折每體爲 殷祭及上大夫練、祥,得用大牢也。 愚謂: 此臣致膳於君,有大牢者,蓋 肩,故用左肩也。 反,必下堂而受命』,是也。 三段也。 人牲體尚右,右以祭,所以 少牢者唯羊,並用上牲,不 亦當在阼階南,南面也。《曲禮》云『使者 自省視多 臂、臑也。 使從君子處還 少牢特豕唯言「肩」,唯有肩也。 少 備 《特牲禮》作俎用臂,而肩、 具, 九箇者,取肩自上斷 而 反,主人亦再拜稽首 臂、臑 阼 階 謂 南稽 獻 必 大牢者唯牛, 備 左也 肩脚 首 饌 拜 也。 也。」 大夫 俎 送 周 用 使 臑 膳 折 貴 周

⁰ 練」、《禮記注疏》作「祥」。

俎,臂以爲阼俎,臑以爲主婦俎,然則《少可知也。《少牢》賓尸之禮,羊左肩以爲侑不見所用,然《少牢》致膳無臑,則《特牲》

牢》賓尸禮不致膳與。

作「嘗」。秣、音末。」〇今按:「靡」字當讀爲糜。
皮反。幾、其衣反。組、音祖。縢、大登反。常、如字、本亦鏤、君子不履絲屨、馬不常秣。《釋文》:「靡、亡國家靡敝、則車不雕幾、甲不組縢、食器不刻國家靡敝、則車不雕幾、甲不組縢、食器不刻

帶也。 亦鎧飾 不雕 敝,則改往脩來。 謂彫敝。 幾,附纏爲沂鄂也。 鄭氏曰:「靡 紟 物 靡 帶其甲。 幾,不 散彫敝,古字 也。」 《詩》云:『公徒三萬,貝 由造作侈靡、賦稅煩急、財物彫 雕 甲不 畫漆 ·敝,赋 孔氏曰:「靡,謂侈靡。 組騰 或可『靡』爲『糜』, 飾 通 税 用。 組騰,以 以爲沂鄂也。 ,不用組以爲飾及給 亟 幾,謂 也。 組 雕,畫 、冑朱 飾 沂 鄂。 之及約 騰,謂 綅。」 謂 敝, 也。 車 財

> 帶也。 用也。 爲 值災變,而財物 已。秣,以粟食馬也。 祀賓客之器不可貶,所貶者常食之器 組甲三百」是也。 之。」 組縢,謂以 不履絲屨,謂 愚謂 靡散耗 靡讀 組綴甲、《左傳》楚子重 食器,常食之器也。 約、繶、純之屬 爲 馬有時當秣,特不 (糜,是· 敝,則當貶損 也。 國 不 以 家 以 絲 丽 祭 足 漕

禮記卷三十五終

常秣耳。

徐所穆反。

聞,音問。」

禮記卷三十六

賜 國 進 士 館纂脩 一及第翰: 孫希旦 林 院 一集解 編 脩

學記第十八《別録》屬《通論》。

義。」 《中庸》、《大學》,唯《學記》、《樂記》最 道授受之次序,與其得失興廢之所由,蓋 鄭氏曰:「名《學記》者,以其記人教學之 兼大、小學言之。」〇程子曰: 朱子曰:「此篇言古者學校教人傳 「《禮記》除

賢體遠,足以 化民成俗,其必由學乎? 發慮憲,求善良,足以謏聞,不足以動衆。 近道。」 動衆,未足以化民。 《釋文》:「謏,思了反 君子如欲 就

而能就賢體遠,亦可謂有志於治矣。

然苟

教學可以化民

,使成美俗。」

愚

謂:

人君

唯

未有開導誘掖之方也,故未足以化民。

親遠,足以聳動衆聽,使知貴德而尊士,然

效不足以致大譽。遠,謂疎遠之士。下賢

法式 鄭氏 聲聞,恩未被物,故不足以動衆也。就賢 之道在方策。」 就,謂躬下之。 體遠,恩被於外,故足以動衆。 善良之士以自輔,此是人身小善,故 言人起發謀慮,必擬 仁義未備,故未足以化民也。」 動衆,謂聳動衆聽。 也。 曰 : 「憲,法也。 求,謂招 體猶親也。 孔氏曰: 來也。 度於法式,又能 守常法,用中才,其 言發計慮當擬度於 謏之言小也。 「聞,聲聞 所學者,聖人 識見猶淺 朱子曰: 小有 招求

學,則明德以新民,而可以化民成俗矣。未知學,則所以化民者無其本也。唯由

[說]音悦,下《兑命》]放此。」 老建國君民,教學爲先。《兑命》曰:「念終者建國君民,教學爲先。《兑命》曰:「念終

也。」 子學焉,外則有大學、庠、序之官。 兑當爲 鄭氏曰:「教學,謂内則設師保以教,使國 而使 非 學,以大學之道教人而使學之也。古之王 作《説命》三篇。典,經也。言學之不舍業 者既盡乎脩己治人之道,又以爲化民成俗 大夫者,莫非聖賢之徒,而民莫不蒙其澤 『説』,字之誤也。高宗夢傅説,求而得之, 一人之所能獨爲,故立爲學校以教人, 人而不學,雖有美質,不可恃也。 人莫不由乎學。 愚謂:玉之質美矣,然不琢則不成 故其進而爲公、卿、 教

而不舍也。

知困。 能自 丈反,又其良反。長,丁兩反。學學,上胡孝反,下如字。」 學不知其善也。 曰:「學學半。」其此之謂乎!《釋文》:「强,其 雖有嘉肴,弗食不知其旨也。 問之不能答,用之不能行者多矣。」 吕氏 學者之病,正在不知困爾。自以爲知,而 自强,脩業不敢倦。學學半,言學人乃益 鄭氏曰:「旨,美也。 之不足,而何敢自是哉!」 未嘗學耳。 大臨曰:「人皆病學者自以爲是,但恐其 己之學半。」 教則見己道之所未達。 强 知不足,然後能自反也,知困,然後 也。 故 使其果用力於學,則必將自進 張子曰:「困者,益之基也 曰:教學相 是故學然後知不足,教然後 學則覩己行之所短 自反,求諸己也 長 雖有至道,弗 也。 《兑命》

《釋文》:「塾,音孰,一音育。術,音遂,出注。」古之教者,家有塾,黨有庠,術有序,國有學。

千五 塾。 外。」 側之堂謂之塾。 仕 共 鄭氏曰:「術當爲『遂」,聲之誤也。 師。 時,朝夕出入,恒就教於塾,故云『家有 塾者、《周禮》百里之内,二十五家爲閭,同 也。 庠,學名也。 也。』黨有庠者,黨謂 左師,教里中之子弟以道藝、孝悌、仁義 五百家爲遂。 焉而已者,歸教於閭里,朝夕坐於門,門 一巷,巷首有門,門邊有塾。民在家之 術有序者,術,遂也。 里中之老有道德者爲里右師,其次爲 百家爲遂。 《白虎通》云:『古之教民,百里皆 孔氏曰:「此明立學之所在。 於黨中立學,教間中所升者 序,亦學名。於遂中立學, 《周禮》五百家爲黨,萬一 黨屬於鄉,遂在遠郊之 《周禮》五 《周禮》萬二千 百家 古者 家有 也。 有

主人拜迎賓于庠門之外。」注云:『庠,鄉 學也。』則鄉學曰庠。此云『黨有庠』者,是 州、黨之學」,則黨學曰序。《鄉飲酒》云: 《周禮》遂官各降鄉官一等,則遂之學亦降 但立時王之學也。 所都及諸侯國 夏、殷禮、非周法。」義或然也。」 此文違,其義非也。庾氏云:『黨有庠,謂 學以下皆爲序也。 六鄉以內,州學以下皆爲庠,六遂之內,縣 鄉之所居黨,爲鄉學之庠,不别立序。 教黨中所升者也。 遂大夫同,則遂之學其名與州序同 鄉一等矣。 道曰:「州曰序,《記》言『遂有序』,何也 顧氏炎武曰:「術有序,《水經注》引此 降鄉一等而 中也。 皇氏云『遂學曰庠』,與 鄭注《州長職》云『序, 國有學者 天子立四代學,諸侯 謂之州長,其 。 國 謂 陳氏祥 可 天子 也。」 凡

作『遂有序』。《月令》『審端經術』,注:

也。」 黨有序,鄉有庠,則六遂之中,里側有 鄙之屬有序也。 里十爲術,術十爲州」,術音遂,此古遂、術 並作『遂』。《管子・度地》篇『百家爲里, 伯使術來聘』、《公羊傳》、《漢書・五行 縣鄙有 二字通用之證。 ·術,《周禮》作遂。』《春秋》文公十二年『秦 愚謂: 序,遂有庠。 遂有序者,言六遂之中,縣 六鄉之中,閭側有塾,州、 陳可大改『術』爲『州』,非 此於鄉但言「黨」,於 塾, 志

比 者説 不反,謂之大成。夫然後足以化民易俗,近 學取友,謂之小成。 年視敬業樂群,五年視博習親 曰 比 年入學,中年考校: ,毗志反。 服,而遠者懷之。 蛾子 中,徐丁仲反。 時術之。」其此之謂乎。《釋文》: 九年 樂,五孝反,又音嶽,下『不能 此大學之道也。 一年視離 知 類 通 師 達、强 經辨志 ,七年視 《記》 立 論 而

遂但言「術」,略舉而互見之也。

樂學」同。説,音悦。蛾,魚綺反,本或作「蟻」。」

安也。 中猶 鄭氏 物醜 講論 曰: 術蚍 離 敬,則學之篤 事 向 遲敏,氣有昏明,豈有齊也。 可 離經,離析經之章句 不惑也。 也 經 與 「蚍蜉所爲,謂銜土也。」 (立也。 ° 蜉之所爲,其功乃復成大垤。」 · 斷 類是也。 其學,而 間 曰:「比年入學,學者每歲來入學也。 也。 蛾,蚍蜉也。 句 知類,知 絶 學至於立,則自能不息以至於 不反,不違失師道。 間歲 取 也。 而 九年者,言其大略。 友必端 信其道也。 事 則考學者之德行道 辨志 蚍蜉之子,微蟲耳, 義 也。 之比 也。 ,謂别其 事 强立而不反, 論 也。 知 師 學 類 張子曰 志意所 丽 懷,來也, 强 通 取 至於 人性有 立,臨 達 友,能 孔 藝。 趣 比 親 氏 時

「志」、《禮記注疏》作「心」。

0

0

六

非。 謂: 俗也 騐。 不反 類通 敬 也。 樂 精專,次第該 者,樂於取益 能 法,逐節之中,先觀其學業之淺深,徐察 志行之虚實,讀者宜深味之,乃見進學之 心 鄭注、張説 所趨 兼 群 論 學,則 了; 知 敬業、博習,所以 敬業者,專心致志以事其業也 達,聞一 杰 取友者,知人而 親 而 陳氏 向 此 也。 師 止有定而物不能 教 , 如 言『易俗』,易其污俗也。」 深造 ,所以集其 者 皆是也。 澔曰:「前言『成俗』,成其美 論學者,知言而 知十 遍 以 爲善、爲 口 以道 也。 輔 以 其仁也。 無 而 能識 ,而所得於己者深矣。 親師者,道同德合 辨志者,自能分别 益 專 恨 利 觸 矣。」 其業於己也。 於人也。 類貫 移也 ,爲君子、爲 人之賢 博習者,積 能 通 蓋考校 否也。 論學之是 也。 朱 至能 子 强 樂群 小 日 愛 其 之 立 累 取 知 人 其

易俗 焉。」 至,而 也。 謂: 也。 者深,而 也。 考校』,則此 蹴之所能 爲學之功,由始學以 矣,然時時學術 圃 經者,窮理之始,至於知類通達 友 欲不能奪,行之成也。 行之端,至於强立不反,則意誠 解矣。 河,則 《周 此中年考校者,學校中考察之期 己德既 精 丽 中 鄭 孔 禮 粗 有 近遠莫不歸之,則其德化 所被者 氏 術,學 幾,然爲之以 氏 **** 定 無不貫,知之成 日 明,然後推 中 曰 : 識 车 一年大 廣, 蚍 也。 [《周禮 而 考校 鄭引《周 蜉之所爲則能 非謏 所 至於大成 比 蚍蜉之子其爲 見於 (漸,而 此 以 二者, 非 聞 一》三歲 及民,以 周)皆明 也。 `禮》『三年 動 人 禮 興 亦 衆 者 い 雖若 辨志者, ,則物格 也。」 大 明 心 賢 者之 無 明 成 正 能 德 比 之化 不 之 矣。 大垤 一,而 力微)所 之期 所 之 大 乃 可至 非 也 比 考 及 愚 得 民 事 物 力 知 離

二者各爲一事,初不相悖。

學,胡孝反。」〇今按"觀爲觀示之義,當音古亂反。 三,官其始也。人學鼓篋,孫其業也。夏、楚三,官其始也。人學鼓篋,孫其業也。夏、楚一大學,官先事,士先志。」其此之謂乎。《釋不躐等也。此七者,教之大倫也。《記》曰:「凡學,官先事,士先志。」其此之謂乎。《釋下觀而弗語,存其心也。幼者聽而弗問,學不躐等也。此七者,教之大倫也。《記》曰:「凡學,官先事,士先志。」其此之謂乎。《釋下學始教:皮弁祭菜,示敬道也。《宵雅》肄大學始教:皮弁祭菜,示敬道也。《宵雅》肄大學始教:皮弁祭菜,示敬道也。《宵雅》肄

發篋出所治經業也。孫,猶恭順也。夏,禮先聖先師也。菜,謂芹藻之屬。宵之言相勞苦之詩,爲始學者習之,所以勸之以相勞苦之詩,爲始學者習之,所以勸之以相勞苦之詩,爲始學者習之,所以勸之以之言,謂《鹿相勞苦之詩,爲始學者習之,所以勸之以鄭氏曰:「皮弁,天子之朝朝服也。祭菜,鄭氏曰:「皮弁,天子之朝朝服也。祭菜,

急切之也。 學者經義,或君親 者既至,發其筐篋以出其書也。 天子使有司服皮弁祭,先聖先師以蘋藻之 氏曰:「熊氏云:『始教,謂始立學教 學者之志意。 卜禘祭不視學,欲優游縱閒學者之志,不 云:『用樂者以鼓徵學士。』視學,謂考試 士人學之時,大胥之官先擊鼓以召之,學 素,示學者以謙敬之道。 人學鼓篋,謂學 菜也。』示敬道者,服皮弁,祭菜蔬,並是質 七也。官,居官者也。士,學士也。」 孔 之長穉倫理也。自『大學始教』至此,其義 悱,然後啟發也。 也。天子、諸侯既祭乃視學考校,以 收 槄 也。 ,謂收斂整齊之。威,威儀 楚,荆也。二者所以撲撻犯禮者。 時觀而弗語,謂教者時時 時觀而弗語,使之憤憤悱 學不躐等,學,教也,教 往,或命有司爲之。未 也。 故《大胥》 褅 游 暇

學,教 擴充其 憤,口 也。 聖先 覺,使之遜心於學業之中,而不至於外馳 者,故以入官之道示之於入學之始,所以 學者,既興器用幣,然後釋菜」,是也。先 等差也。」 不得輙問,教此學者,令其謙退,不得踰越 君之所以燕樂其臣,而臣之所以服事 習《小雅• 以示學者尊敬道德,使知所以仰慕而興 以所學之端緒。 人學發篋,必 而 《詩》者,學者之所弦 師 釋菜於先聖先師、《文王世子》「始立 也,躐,踰越也 悱 不 ,乃先世 志意,使知 悱 丁 鹿鳴》之三篇。 寧告語,欲學者存其心, 朱子曰:「觀,示也。謂示之 然後啟 擊鼓以警告之,所以提撕 有道德者。 語,告也。」 學之當爲用於國家 之也。 ,幼者但聽長者解説, 誦,始入學者先 蓋 學 皮弁祭菜,所 以 愚謂:始 不躐等者 此三篇皆 心憤 於君 也。 警 起 立

焉。 《小胥》云「巡舞列而撻其怠慢者 方 循序而進,而 之於内,待其自有所得而後告之也。年 學,得之也易,則其守之不固,故時時 其志意,而使之不至於迫蹙也。 考視則在夏祭之後,所以寬其期,以優 禘者,夏祭之名。言卜禘者,禘必先卜也。 刑」,所以收攝學者威儀, 也。 雖未及乎講貫服習之事,然振 長者諮問,而 長幼,則學有淺深,故其進而受教於師,使 以至於九年視知類通達也。 視學,謂考學者之業,即一年視離經辨志, 而不輙語以發之,所以使學者存其心 整齊嚴 是設教之大倫也。 夏、楚二 肅之意,從容涵養之益,皆在是 不可 物, 幼者從旁聽之,所以教之使 即《虞書》所 踰越等級也。 大倫,猶言大義 而不至於惰慢。 入學在 謂「扑 凡人之於 興鼓舞之 此七者 」,是也。 春,而 以 作教 觀 求 有 示 游

也。 先,一以尚其志爲先。 所學,理雖 官,已仕 同 者。 而分則異,故一以 士,未仕者。 引此者,以證上文 盡 官 其 與 事 士之 爲

刀反。 如字。 自爲一 大學之教也,時教必有正業,退息必有居學。 居學」爲句,今從之。「依」字當從張子讀爲「聲依永」之依 「衣」。 又音洛,又五教反。●離,力智反。」○鄭注:「依,或爲 時敏,厥脩乃來。」其此之謂乎。《釋文》:「操,七 以雖離師輔而不反也。 然,故安其學而親其師,樂其友而信其道,是 故君子之於學也,藏焉脩焉,息焉游焉。 不學雜服,不能安禮。 不學操縵,不能安弦。 七者皆士先志之事也。 縵,末但反。依,於豈反。興,虚應反。樂其,音嶽. 句、陸氏、朱子讀「時教必有正業」爲句、「退息必有 雜,或爲『雅』。」〇舊讀「時」字「居」字句絶,「學」字 不學博依,不能安詩。 不興其藝,不能樂學。 《兑命》曰:「敬孫務 夫

鄭氏曰:「操縵,雜弄也。博依,廣譬喻

如破、騶虞、和鸞、動必相應也。 對、投壺、沃盥細碎之事。 之依永者也。 息。 歆也 用雖小,但施於簡策,然莫不出於學。故 御亦必合於禮樂之文,如 「弦琴瑟之屬,若不先學操調雜弄,則手指 也。 人有倦時,又用此 如琴瑟笙磬,古人皆能之以 不便,故不能安弦也。」 時而疾,其所脩之業乃來。」 孫業也。 懷抱之。脩,習也。 游、謂閒暇無事之爲游。 雜服,冕服 藝,謂禮、樂、射、御、書、數。 敏,疾 服,事也。 也。 皮弁之屬。 以游其志,所以使樂學 息,謂作勞休止之爲 厥,其也。 張子曰:「依,聲 不失其馳,舍矢 藝,禮樂之文, 雜服,灑埽、 中制節。 興之言喜也 敬孫,敬道 書、數,其 孔 學者 氏 藏,謂 日 務及 射、 應

0

[「]教」、《禮記注疏》、《釋文》作「孝」。

之正也,然不學乎此,則於手指不便習,而 私燕之所服,若深衣之屬也。 依。 之所學也。依,當如張子讀爲「聲依永」之 依、興藝、藏、脩、息、游之類,所以學者能 也 也,然不學乎此,則於節奏不嫻熟,而不能 不能以安於琴瑟之弦矣。 安其學而信其道。」 息之所學也,若操縵、博依是也。」 朱子 教之所教也,若春誦夏弦,春秋 義,唯其敏而已。] 言『居業』,蓋常時所習,如下文操縵、博 曰:「時教,如春夏《禮》《樂》,秋冬《詩》 〈樂》,冬夏教以《詩》《書》是也。 、書》之類。居學,謂居其所學,如《易》之 安於《詩》矣。雜服,非禮之重也,然不 博依,謂雜 孫其志於仁 曲 則得仁,孫其 可歌詠 陸氏佃曰: 愚謂:居學,謂私 博依,非詩之正 者 也。 志於義則 操縵,非 教以《禮 「正業,時 居學,退 雜服 消謂 樂 居 得

心虚 養。 禮矣。 立 外則樂乎師友之相成,至於學之大成而 心,而有左右逢原之樂,身習於事,而 《禮》也,皆正學 艱難煩苦之迹。是故内則信乎己之所得, 有所脩,息焉必有所游,無在 而私居也。 藏,謂入學受業也。脩,脩正業也。 趣,則不能安於正業而生其翫樂之心也。 以偏廢者,故不游之於雜藝以發其歡欣之 緩,然二者之爲,理相通而事相資,有不 所學也。正業於人至切,而居學若在 也,博依也,雜服也,所謂藝也,皆退息之 學乎此 不返也。 而有近裏切己之功,時敏則其業勤 其求之也博,其人之也深。 樂學,謂樂正學也。 ,則於儀 游,謂游心於居學也。 敬孫、《書》作「孫志」。孫則其 文不素習,而 而時教之所學也。 弦也、《詩》也、 而非義理之 不 能以 藏焉 理 息,退 操縵 一浹於 安於 而 强 無 必 可 可

有日新不已之益,故其所脩之道來而不

世也

反。」○鄭注:「呻,或爲「慕」。訊,或爲「訾」。」 今之教者,呻其佔畢,多其訊言,及于數進,今之教者,呻其佔畢,多其訊言,及于數進,今之教者,呻其佔畢,多其訊言,及于數進,今之教者,呻其佔畢,多其訊言,及于數進,

爲之説不用其誠。材,道也。教人不盡其學。訊猶問也。言今之師自不曉經之義,但吟誦其所視簡之文,多其難問也。言及住吟誦其所視簡之文,多其難問也。言及本。訊猶問也。言今之師自不曉經之義,鄭氏曰:「呻,吟也。佔,視也。簡謂之鄭氏曰:「呻,吟也。佔,視也。簡謂之

也。一 以我爲隱』之意。」 其學,謂以學爲幽隱而難知,如曰『二三子 爲,但以其不由於誠,則不盡其材,若勉率 隙,刃投餘地,無全牛矣。人之材足以有 之。聖人之明,直若庖丁之解牛,皆知其 必盡人之材,乃不誤人,觀可及處,然後告 知,非求其本也。注疏法象之説恐非。隱 曰:「數,謂形名度數,欲以是窮學者之未 而爲之,則豈有由其誠者哉?」 顧安,不由誠,皆是施之妄也。教人至難, 之又告之,徒使人生此節目,不盡其材,不 速,疾也。學不心解,則忘之易。刑猶成 教者言非,則學者失問也。隱,不稱揚也。 材,謂師 張子曰:「人未安之又進之,未喻 有所隱也。 愚謂: 施之也悖,求之也佛, 進,謂進學也。 朱子

「親」、《禮記注疏》、《釋文》作「新」。

0

矣。 矣。 之以 誠。 進 與强、 繁,稱乎度數,而不究乎義理之本,則 使人、教人,皆謂 不盡 成 疾其師,徒苦其難而不知其益也。 求之也亦佛,是以 以其所未至,則其使人也不出於愛人之誠 卒業,而 人也不足以盡人之材,而使之有 也 丽 其材,則教者之施之也悖,而學者之 悖、佛、皆謂不順其道也。 呻其所視之簡畢,而徒務乎口 其所不知,進 材,學者之材也。 立不反者相去遠矣。 不顧其安,謂 無自得之實,故其去之必速,則其 師之施教 其學幽隱不明,而 而不顧其 不量其材之所能受也 多其訊 也。 此教之所 (安,而 不由其誠 誠,教者之 問 ; 而 所成 雖勉 耳 欲 之粗 以 至 强 其 務 不 强 於 就 教 之 窮

時,不陵節 大學之法: 而施之謂孫,相 於 未 發 之 謂 豫,當 觀 而善之謂 其 可 之 摩。 謂

> 「靡」,莫波反,徐忘髲反。」 此四者,教之所由興也。《釋文》:「摩,本又作

日: 學,時之謂也。中人以 得其 觀 鄭氏 賜,而子貢自知其弗如,摩之謂也 以下不可以語上,孫之謂也。 適當其可告之時也。 自然,豫之謂也。 人之能而於己有益 「禁於未發,謂豫爲之防。 助 曰:「未發,謂 也。」 愚謂: 八歲 情 少成若 相觀而善謂之摩,謂 -,如以 上可以 欲 入小學,十五 未 兩物相摩而 天 性 生。」 夫子以 當其 語上,中人 習貫 可 回 朱 大 若 方 各

獨學 勤苦而難成。 證 文》:「扞,胡半反。 燕 發然後禁,則 反。 辟 廢 而 過,姑卧反。 其 無 學。 友, 汗格 則孤 雜施 格,胡客反,又户隔反。 壞,音怪,徐胡拜反。 此六者 而 陋 而不 不勝。 而 , 教 寡 孫,則壞 聞 之所 時過 燕 燕,音鷰。 由 勝,音升,又升 亂 朋 然後學,則 廢 逆 而 也 其 不 脩。 師 《釋

成也。 學時 也。 孫, 鄭氏 愚 私 是 偏 小 强 欲 後乃禁教, 可人之貌。 謂 私 漏 前 才苦其大業,並是壞 褻之談,無益 則 褻之友,如損 無 已過,則 時 陋 曰:「格讀 加地 小 燕辟, 宗寡有 施教雜 朋 孔氏曰:「扞,謂 過 上言教之所 者 友 然 凍則堅强難 則 扞格 不達,大者 後 如 心情放蕩,雖勤苦四 所 則 扞 亂越節,則大才輕其小業, (學,則 有疑無 如『凍洛』之洛。 於學,而反有 所 聞 ┆拒 不勝,謂教不 謂 者三友之類。 也。」 堅 曲 强 思 群 亂 興 可諮問 担打 人。 ,教之不復 放 難 居 不可脩 有 朱子曰:「燕 也。 識 , 終日 情欲既發, 四, 也。 所害 ,而學識 學者 ·能勝 雜 此言教之 ·,言不 治也 格,謂 扞, 體 燕辟,謂 也。」 施 一終無 入也。 所 堅不 其 圃 · 及 獨 朋 孤 而 堅 惑 情 不

反。

易,以豉反。」

牽,强 謂 而 後可以爲人師也。 君子既知教之所由興,又知教之所 弗抑 善喻矣。《釋文》:「道,音導。 其能 若 僻 之失 所 而 豆 向 由 而 而弗抑,開而 加 學 不 勤 其 則易,開 廢 以私 自覺矣,教有不廢者哉 於學,而雖有美質,亦將漸 之勤者,或猶 有六者,蓋發然後禁,四者固 方,而學之無 褻之朋,私褻之談 而弗達則 弗達。 故君子之教喻也 能 其 思。 奮 助,然其天資之高 道 强,沈其良反,徐其兩 一發以 而 和 弗 易 , 則 固 牽 有所成就。 由廢, 以 一,道而 則 移 思 和 無望 爲 口 强 弗 然 教

有所. 也。 角。 强之使有所勉,而 鄭氏曰:「道,示之以道塗也。 (向,而: 牽 思而得之則深。」 謂 牽 弗牽之使從,則 ·倡。 弗抑之使退,則 方 孔氏 氏 慤 人 有樂學之心。 曰 曰 開,爲 : 「喻猶 「道之使 人無難 發 曉 頭

學者 者,心之莫同也。 則多,或失則 教也者,長善而救其失者也。《釋文》:「長,丁丈 如此。 之反也。 則人有自得之益。」 能 蓋 故道之而 耐 也,故迎其機以道之,開其端不遽達其意 患而易矣。易者,勤苦之反也。 之病 人將思而 有四失,教者必知之。 君子 若相觀而善,則存乎朋友之益焉。 唯知學之所由廢興,故其教喻之善 教唯其時也,故强之而無屈 開之使有所入, 無牽引之煩 [寡,或失則易,或失則止。 得之矣。 知其心,然後能救其失也 愚謂: 思者,壞亂之反 丽 和 人之學也,或失 丽 矣。 教唯 弗達之使 和 教唯其孫 者 其 豫 , 扞 此四 抑之 也 也 知 格

鄭氏 止 才多者。 謂 好思不問者。」 「失於多,謂· 失於易,謂 才少者。 好 張子曰:「爲 問問 不 · 識者。 失於寡 人人則 失於 謂

> 看於所知,止者欲其勉於所行。 智,好高則寡,不察則易,畏難則止。」 是則多,謂多學而識,而未能貫通,若 若曾皙。失則寡,謂志意高遠,而略於事爲, 若曾皙。失則寡,謂志意高遠,而略於事爲, 若所取裁,若子路。 是則多,謂多學而識,而未能貫通,若 是則多,謂多學而識,而未能貫通,若 是則多,謂多學而識,而未能貫通,若 是則多,謂多學而識,而未能貫通,若 是則多,謂多學而識,而未能貫通,若 是則多,謂多學而識,而未能貫通,若 是則多,謂多學而識,而未能貫通,若

矣。《釋文》:「教如字,一本作「學」,胡孝反。」言也約而達,微而臧,罕譬而喻,可謂繼志善歌者使人繼其聲,善教者使人繼其志。其

之。 達,微而臧,罕譬而喻,皆不務多言而使人 究其説,使人有所玩索而自得之也。 朱子曰:「繼聲、繼志,皆謂微發其端而不 而 至約不煩,而能使人通之, 自得之意。」 能 約、微、罕譬、皆教者之不 使人善之;雖 吴氏澄曰:「教者之言,雖 少有所譬,而 雖 至微不 能使 ·盡言 人曉 約 也。

達、臧、喻,學者之能自得也。如此,可謂

能

[使人繼其志者矣。]

喻。 烏路反,又如字。」○石經此上有「其」字。 爲君也,是故 長,能爲長然後能爲君。 君子知至學之難易,而 三王、四代唯其 能 博 喻然後能 擇 師 、師。」此之謂 不 爲師,能爲 可 知 不 故師也者,所以 其美惡,然後 慎 乎。 也。 師 《釋文》: 《 記 》 然 後 能 日 能 悪, 學 爲 博

資質材性之美惡也。」 張子曰:「知學者至於學之難易,又 夏,而又曰『雍也 人難 以教人,則能爲君以治人。能爲師者,其 四代之禮樂以教 以治國、平天下之事。 三代之時,凡民之俊秀皆人大學,而教之 mj 得 王,無 , 故 不可不擇也。」 異道矣。 可使南 顔淵,五至三無以告子 其繫《易》也,以九二 孔子之於弟子也, 朱子曰:「能爲 面』,然則内 顧氏炎武 一一里, 知 曰 其 師

> 爲重 難其人,故擇之不可不慎也。 爲師,然後能 之」,是也。長與君,皆有教民之責,故 博喻,謂因學者之材質而告之,而廣博 易,謂學者入道之深淺次第。 者,所以學爲君也』。」 三王,并虞爲四代。唯其師者,唯以 正之屬。 喻,不拘一 之材質不同,無失者爲美,有失者爲惡也 「見龍在田,利見大人」爲君德,故曰『師 也。 《周禮》所謂「使民 途也。 爲長、能爲君也。 長,謂鄉大夫、州長、黨 愚謂: 興賢,出使 夏、商、周 美惡,謂人 能爲 至學之難 擇 師 師 爲 者 能 譬 也

尊師 臣也。 二:當其爲尸, 然後民知敬學。 凡學之道 也 大學之禮,雖詔於天子無北面 一、嚴師 則弗臣 爲 是故君之所不臣於其 難。 也。 師嚴 當其 然後道 爲 尊,道 師 一所以 臣 則弗 者 尊

乎 ? 尊師 鄭氏 而立。 輔氏 常師徒之教,則師東面,弟子 冕」、《大戴禮》無此文,鄭所加也。」奉書而入,負屏 端冕,師尚父亦端冕,孔疏云:「師尚父亦端 『在丹書。 師尚父而問焉,曰:『昔黄帝、顓頊之道存 孔子不可也。 難 賓位,師尚父在主位,此王庭之位。 尚父西面道書之言。」 蓋後人因鄭注增之,非孔所見也。 「南字亦鄭所加。」今按:今《大戴禮》與鄭氏所引悉同, 先王之道不北面。」王行西折而 ,非心悦誠服,致敬盡禮,如七十子之於 重道 廣曰:「嚴師 曰 意亦忽不可得見與?』師尚父曰: 王下堂,南 「嚴,尊敬也。 ,不使處臣 王欲聞之,則齊矣。]王齊三日, 師所以傳道,師嚴然後道尊, 爲難,言盡 面而立。 位 也。 韶於天子無北 皇氏侃曰:「王在 東 武王踐 師尚父曰: ,西面 嚴 面 師 丽 南,疏云: 也。」 立。 之道爲 阼, 若尋 面 師 召

> 容反。 解。 從輔氏讀爲脱。 爲「春」,式容反。」○鄭注:「從,或爲「松」。」○今按:説,當 學之道也。《釋文》:「説,音悦。 容,然後盡其聲。 以 師 木,先其易者,後其節目,及其久也,相 善學者師逸而功倍,又從而庸之。 勤 小者則小鳴,叩之以大者則大鳴,待其從 嚴師也。 道未嘗不尊也,因其尊而尊之,則在乎人之 不善問者反此。善待問者如撞鐘,叩之 而功半,又從而怨之。 師嚴道尊,然後民皆興起於學。」 從容,當讀如《中庸》「從容中道」,從,七 不善答問者反此。 撞,丈江反,從依注 善問 者如攻堅 不善學者 此皆進 説 以

人。從,讀如『富父春戈』之春。春容,謂其道有功於己。● 善問者先易後難,以漸鄭氏曰:「從,隨也。庸,功也。功之,愛

急迫

,從容間

歇

而後其餘聲乃盡,若

離脱

而解

也。

從容,義如「從容中道」,「從

和

鐘

雖叩之而

無

不鳴

然必

潼

之

節。」説

當讀

(為脱。

相説

以解,謂

彼

此

相

以 者既去,然後堅者可脱 問然後 聲之餘韻從容而將盡者也。 重撞擊也。 `解」。 而 朱子曰:「注説非 止 音悦恐非,悦則以學者言矣。 復問,乃極説之,如撞鐘之成 也。」 始者 一聲而已,學者既 輔 氏廣曰:「治木者,柔 而 解矣,故曰『相説 . 是。 言必盡 從容,正 開 答 其 以 端端 所 謂

處。 之,謂歸功於師也。 撞之,未有能 同,然必待叩者之從容,然後盡其聲,若亟 小,以楹擊之,則其聲大。聲之大小雖 後譬觀之不然。 説 卦》曰:「其於木也,爲 盡其聲者也。」 撞鐘,以莛擊之,則其聲 節目,木之堅而難 愚 謂 堅 攻 功 木

> 地 容則無沈潛詳審之意,而不足以爲領受之 者,於學者之問 盡告者矣。 後盡發其旨意,若急迫問之,則教者 大叩大鳴,然必問者不急迫,從容閒 急迫叩之,則鐘聲有 故 也 非其於學者有所靳也,蓋 無不答,若鐘之小叩小 不 能盡 者矣。 善待問 限,然 非從 有 鳴,

可也。《釋文》:「語,魚據反。舍,音捨,又如字。」力不能問,然後語之。語之而不知,雖舍之記問之學,不足以爲人師,必也其聽語乎。

鄭氏 謂: 謂 所未能 時爲學者論之。 心,而所知有限,故不足以爲 之,須後。」 小叩小 聽語 日: 問。 ,謂聽學者之問,而因 「記問,謂豫 ·鳴,大叩大鳴」是也。 聽語,必 朱子曰: 此或時師不 待 誦 「記問之學,無得於 其 雜 問問 難、雜説,至 乃 心解,或學者 人師。」 而 説之。 此唯學有 語之,所 愚 舍 講

後也。《論語》:「不憤不啟,不悱不發。舉以發之。語之而不知,則又當舍之,以俟其之者。蓋其心有憤悱,而力不能問,然後語語,雖因乎學者之問,而亦有不待其問而語。

者,一本作「始駕馬者」。」
者,可以有志於學矣。《釋文》:「治,音也。始駕
始駕馬者反之,車在馬前。君子察於此三
始駕馬者反之,車在馬前。君子察於此三
一隅不以三隅反,則不復也。」即此義也。

則即事易。君子仍讀先王之道,則爲來事合,有似於爲裘。良弓之子,必學爲箕者,仍見其家撓角幹也。撓角幹者,其材宜仍見其家撓角幹也。撓角幹者,其材宜好。與氏曰:「良治之子,必學爲裘者,仍見其鄭氏曰:「良治之子,必學爲裘者,仍見其

學取 也。 非 子弟仍能學爲裘袍,補續獸皮,片片相合, 鐵,使之柔合,以補治破器,使之完好,故 不惑 也,此三者非皆生而能之,由於見聞習熟 裘也,良弓之子之能爲箕也,馬之能駕 有志於學矣。」 習而後駕之,不復驚也。 前,而繫駒於後,使此駒日日見車之行,慣 車,若忽駕之,必當驚奔,今以大馬牽車於 之,車在馬前」。所以 本駕在車前,今將馬子繫隨車後,故曰『反 始學駕車之時。反之者,駕馬之法,大馬 和以成弓,故其子弟亦觀其父兄世業,仍 以至完全也。 積世善冶之家,其子弟見父兄鋾鑄 柳和 日所成。 軟,撓之成箕也。 孔 氏 君子察此三事之由 善爲弓之家,使角幹撓屈調 曰 愚謂:良冶之子之能 良,善也。 然者,此駒 三事皆須積習, 始駕,謂馬子 冶,謂 則可 未 曾 鑄 重 以 駕 爲 金 冶

而不已,豈有不能至之理哉。故察於此而而馴而致之也。然則君子之於道,苟時習

可以有志於學矣。

反。」〇鄭注:「醜,或爲「計」。」

展,五服弗得不親。《釋文》:「當,丁浪反。治,直吏學無當於五官,五官弗得不治。師無當於五學無當於五官,五官弗得不治。師無當於五聲,五聲,一之學者,比物醜類。鼓無當於五聲,五聲

者也。

之親。」 成。」 以醜 醜猶比也。 鄭氏曰:「比物醜類,以事 學當尊師之意,以上三事引起下一事也。 類」一句,與下文義 當屬上章,仍有闕文。」 文,是也。 類,謂 朱子曰:「比物醜類,此句詳文義 孔氏曰:「古之學者,比方其 自「鼓無當於五聲」以下,則言 當猶主也。五服,斬衰至緦麻 以同類之事相比方,則學易 不相屬,朱子以爲 愚謂:「比 相況而 爲之。 物 有 醜 事 闕

此師之所以無當於五服,而實爲在三之一而所以親之非其道者。人倫賴師而後明,理,則或有不知其當親者,或有知其當親,夫五服之親,骨肉也。然非有師以講明其

大時不齊。察於此四者,可以有志於本矣。 君子曰:「大德不官,大道不器,大信不約 《釋文》:「約,徐於妙反,沈於略反。 爲諸 卉自生,而薺麥自死,秋冬草木自死,而薺 時 謂若『胥命于蒲』,無盟 聖人之道,不如器施於一物。 鄭氏曰:「大德不官,謂君也。 大德者不但能專一官之事,如《荀子》所謂 不器爲諸器之本,不約爲諸約之本,不齊 麥自生,故云『不齊』。不官爲諸官之本, 以生,或時以 齊之本。」 殺。」 朱子曰:「大德不官,言 孔氏 約。 齊,如字。」 大時不齊,或 曰:「春夏花 大信不約, 大道不器

器。 嘗 不及 待 者謂之器」也。大信不約,謂至誠感物,不 之事也。 之所得而言,道則指其自然之本體 不官 謂天之四時寒暑錯行,未嘗齊一,而卒未 德不官,言聖人之德盛大,不但偏 地 乎學之末者也。 德者,務乎學之本者也。 不親」,而兼及於五色、五聲之屬 成 三者,猶上章言「師無當於五服,五 精 有 有 四 而 於道者兼 [時,不言而 《易》所謂「形而上者謂之道,形而 先,事成而後。 所違 五帝,盟會不及三王」也。 所要約,而 ,以明學必務本之意,而兼 大道不器,言大道之體不 也。 物 此引君子之言,本主於大德 信 物 人無不信之,若所謂「誓告 德成而上,藝成 者也。」 也也 得其本者可以該末, 大信 才效一 愚謂 不約 大時不齊, 也。 及於其下 官者 丽 服 偏 德以 治一 也。 謂 下,行 蓋 弗 主 如 專 官 下 天 大 得 大

> 亦豈足以化民而成俗哉 役於一長一技之末,雖終其身從事 以之平。此學之所以可貴也。不然,而役 明德以新民,而家以之齊,國以之治,天下 於學,而學必有 而 逐 於末者不足以 志 於本。 達 本。 大學之道,使 故君子必 ·於學, 有 人

於僞反。」也。此之謂務本。《釋文》:「原,本又作「源」。委,也。此之謂務本。《釋文》:「原,本又作「源」。委,三王之祭川也,皆先河而後海,或源也,或委

外,源之與委。」此 也。 先之,或是委故後之。 子曰:「所以 鄭氏曰:「源,泉所出 之意,源、委即指河、海,非謂河、海外别有 源則河,委則海。」此又一 孔 氏 愚謂: 曰:「源則 先河 疏引皇氏之説云: 後海者,以 河 一説也。 也,委則 也。 疏有二説,此説是 委,流 説 又引或解 也。 其或是 海 所聚 也。 詳 河 也。」 源 經文 海 云: 之 故

禮記卷三十六終本。故三王之祭川,必先河而後海,而君子之爲學,亦必先本而後末也。子之爲學,亦必先本而後末也。

禮記卷三十七

國史館纂脩孫希旦集解賜進士及第翰林院編脩

樂記第十九之一《别録》屬《樂記》。

聲律世爲樂官,頗能記其鏗鏘鼓舞,而不 曹律世爲樂官,頗能記其鏗鏘鼓舞,而不 「周衰禮廢,其樂先微,以音律爲節,又爲 「周衰禮廢,其樂先微,以音律爲節,又爲 「周衰禮廢,其樂先微,以音律爲節,又爲 「周衰禮廢,其樂先微,以音律爲節,又爲 鄭、衛所亂,故無遺法。漢興,制氏以雅樂 鄭、衛所亂,故無遺法。漢興,制氏以雅樂 鄭、衛所亂,故無遺法。漢興,制氏以雅樂

録》,更載所入《樂記》十一篇,又載餘十二

記》四十九篇,《樂記》第十九,則《樂記》十 《竇公》第二十三』,是也。按《别録》,《禮 《季札》第十八、《樂道》第十九、《樂義》第 第十五、《樂穆》第十六、《説律》第十七、 篇之名,按劉向《别録》云:『《奏樂》第十 猶在,二十四卷《記》,無所録也。 今《樂記》斷取十一篇,餘有十二篇,其名 爲謁者,數言其義,獻二十四卷。 内史丞王度傳之,以授常山王禹,成帝 生采《周官》及諸子言樂事者爲《樂記》,其 能言其義。 書,得二十三篇,與禹不同,著於《别録 二十、《昭本》第二十一、《昭頌》第二十二, 二,《樂器》第十三,《樂作》第十四,《意始》 篇入《禮記》,在劉向前 武帝時,河間獻王好古,與諸 矣。 至向爲《别 其十一 劉 向 校 時

之理終未嘗亡,苟能本其和樂莊敬者以 孫尼子所作,未知何據。 孔皆不言作者之人,惟《史記正義》以爲公 篇 漸復也。 子所謂「今樂猶古樂」者,而其用或亦可以 可見之施用,遂爲簡上之空言矣。然而 傳,而其言義理者,雖賴有是篇之存,而 言義理而不及器數。 也,獨其義理之精有未易知者,故此篇專 大學莫不以此爲教。其器數人人之所習 以器數爲用。古者樂爲六藝之一,小學、 身,而推其同和同節者以治一世,則 ,總爲二十三篇也。」 自古樂散亡,器數 樂以義理爲本 愚謂 此篇 鄭 孟 治 樂 矣 不

然也。 凡音之起,由人心生也。 旄,謂之樂。《釋文》:「應、「應對」之應,篇內同。 變,變成方謂之音。 感於物而動,故形於聲。 比音而樂之,及干戚、羽 人心之動,物使之 聲相應故生 比

曰: 曰: 出曰 勢,而其同者以類相 凡宣於口者皆是也。 之歌曲也。」 專一,誰能聽之?」方,猶文章也。干,盾 宫應,然不足樂,是以變之使雜也。《易》 鄭氏曰:「宫、商、角、徵、羽雜比曰 章 揚高下,五聲備具,猶五色之交錯而成文 又有他聲之雜焉,而變生矣。變之極 也,止一聲而已。然既形則有不能自已之 牛尾也,文舞所執。」 也、戚、斧也、武舞所執。 人心不能無感,感不能無形於聲。 ,則成爲歌曲而謂之音矣。 『若以水濟水、誰能食之? 若琴瑟之 『同聲相應,同氣 聲。 形猶見也。 愚謂:此言樂之所由起也 應。 聲之别有五,其始形 樂之器,彈其宫則衆 孔氏曰:「音,即今 相求。』《春秋傳 有同必有異,故 羽,翟羽,旄,旄 然猶未足以 聲,謂 一音,單 而 抑

爲 而謂之樂也 戚、 樂 也 羽旄象其 比 次 歌 (舞蹈 曲 以爲舞,則聲容畢 而 以 樂器 奏之, 又 Ļ 以

散。 也。 洛。 樂者,音之所由生也,其本在人心之感 者,其聲直以廉。 感者,其聲嘽以緩。其喜心感者,其聲 反,徐在堯反,沈子堯反。殺,色界反,徐所列反。 六者非性也,感於物而 嘽,昌善反。粗,采都反,又才古反。」 是故其哀心感者,其聲噍以殺。 其怒心感者,其聲粗 其愛心感者,其聲和以柔。 后動。《釋文》:「噍,子遥 一以厲。 其 敬 其樂、 其樂,音 發以 於物 心 感 心

踧也 慤 鄭氏曰: 曰:「此聲皆據人心感於物而口爲聲,是 哀,順其心則喜,逆其心則怒,於所畏 人聲也。 百 :「凡人之情,得所欲則樂,喪所欲 嘽,寬綽貌。 皇氏云『樂聲』,失之矣。」 「言人聲在所見,非有常也。 發猶揚 也。 方氏 孔 噍, 則 萴 氏

急而 敬 形於聲者如此。 得其所欲,故形於聲者如此。 嘽則寬 而 直則無委曲,廉則有圭角,蓋心有所畏,故 無留遺,散則四暢而無鬱積,蓋順其心,故 發爲聲者由於政,所以申首節言「聲」之 皆承首節 爲聲,由聲而爲音,由音而 發者是也。」 動,乃情也,非性也。 未安,今略爲改定如此 心有所悦,故形於聲者如此。」方氏元文多 形於聲者如此。 而至著,有是三者之次。 了於所 不隆,蓋心喪其所欲,故形於聲者如此。 凌物,蓋逆其心,故形於聲者如 綽 悦 而有餘,緩則 而遞申之。此二節言人之感而 則 愛。 愚謂: 粗則 和則不乖,柔則 噍 則 陳氏澔曰:「六者之 壯猛以奮發,厲 首節言人心之感 性則喜怒哀樂之未 、舒徐 竭 自此以下六節 丽 爲樂。 丽 無 發則宣出 澤,殺 不 迫,蓋 致順,蓋 其自 則 則減 此 心 而 而

義。所謂聲,皆指人聲而言也。

也。《釋文》:「道,音導。行,下孟反。治,直吏反。」樂、刑、政,其極一也,所以同民心而出治道以和其聲,政以一其行,刑以防其姦。禮、是故先王慎所以感之者。故禮以道其志,樂

者之聲也。 以道其志」。樂以養其心,而發於聲者乃 禮以示其所履,而所志因有定向,故曰 禮 之輔者也。 其理而後和,故道以禮而後可和以樂也 政者,所以布禮樂之具,而刑又所以爲政 和,故曰「樂以 民之心而出治平之道也 則所發中其節,而皆不害其 六者之心,人之所不能無,惟感之得其道 哀、樂、愛、敬之心也。同,謂同歸於和也 、樂、刑、政,其事雖異,然其歸 感人心固以樂爲主,然萬物得 極猶歸也。 和 其聲」。 民心,即喜、怒、 聲,即上所言六 爲 和 皆所以同 矣 。 禮 故

> 句,「其政和」爲一句。 文》:「「治世之音」絶句。 政和。亂世之音怨以怒,其政乖。 聲成文,謂之音。 凡音者,生人心者也。 反,又音笥。」○今按:樂,當音洛,「治世之音安以樂」爲一 哀以思,其民困。 「以樂其政和」爲一句,下「亂世」「亡國」各放此。 「安」絶句,樂音岳,「以樂」二字爲句。 下四句放此 聲音之道,與政通矣。《釋 是故治世之音安以樂,其 安以樂,音洛,絶句。 情動於中,故形於聲, 崔讀上句依雷,下 亡國之音 雷讀上 思,息吏

國,謂將亡之國也。 和平而人心安樂也。 鄭氏曰:「言八音和否隨政 而 曰:「治平之世,其音安静而和樂,由其 不言『世』者,以國將亡 而愁思,由其民困苦而人心哀思也。 政』者,言國將滅無復有政 恚怒,由其政 乖 解而 亡國之時,其音 禍亂之世,其音怨憾 無復繼世也。 人心怨怒 也。 也。」 也。 愚謂: 悲哀 孔 國 政 氏 亡

謡之類,而猶未及乎樂也。申首節言「音」之義。所謂音,皆謂民俗歌此節言人心之感而成爲音者由於政,所以

反,後放此。 怙,徐昌廉反。 懘,昌制反,又昌紙反。」 宫爲君,商爲 五者不亂,則無怙懘之音矣。《釋文》:「徵,張里 清者卑。 「五者君、臣、民、事、物也。凡聲濁者尊, 濁中,民之象也。』解者云:『宫濁而羽清, 絲多聲重者爲尊,宫絃最大,用八十一絲, 居中央,總四方,君之象也。」又:『五音以 此乃言音之比而爲樂者也。 爲民者,鄭注《月令》云:『角屬木,以其清 故宮爲君。』商爲臣者,鄭注《月令》云: 云:『商七十二絲,次宫,如臣之次君。』角 「宮爲君者,鄭注《月令》云:『宮屬土,土 商屬金,以其濁次宫,臣之象也。」解者 怗懘,敝敗不和貌。 」 臣,角爲民,徵爲事,羽爲 孔氏曰: 鄭氏曰: 物。

羽,羽數四十八。 分,九九八十一,是爲宫聲之數。三分損 F 聲之響無敝 民、事、物五者各得其所,不相壞亂,則五 本,本生於黄鐘之律,其 故處最末。]敝敗,謂不和之貌。 事之象也。』羽爲物者,鄭注《月令》云: 乃後有物。事勝於物而劣於民,所以徵爲 『徵五十四絲,是微清。事由民造,爲先事 比君、臣爲劣,比事、物爲優,故角清濁中, 角六十四絲,居宮、羽之中,半清半濁。 爲民之象也。』徵爲事者,鄭注《月令》云: 羽 「羽屬水,以其最清,物之象也。」解者云: 「徵屬火,以其微清,事之象也。」解者云: 以下生徵,徵數五十四。徵三分益一 生商,商數七十二。 最 清,用四十八絲 敗 《矣。」 羽三分益一以上生角 商三分損一以下生 而爲物,物劣於事 劉 長九寸,每寸九 氏 若君、臣、 五聲 以 民

聲固 道 過 爲臣 皆 絲,其聲清,有民而 故 五聲 數不行,故聲 角 次降殺。 而 水,弦用四十八絲,爲最少而聲至清,有 弦用六十四絲,聲半清半濁,居五聲之中, 宫屬土,弦八十一絲爲最多,而聲至濁,於 八音所以克諧 一絲,聲次濁,故次於君 一,與政 數 次於臣 事 可爲宫。 後 者,則不用 本於黄鐘爲宫,然還相 用物、故爲物。 獨尊,故 六十四 而 不 如相通 其有臣過 可上於君,角民、徵事、羽物各以 丽 宫必爲君而不可下於臣,商必 爲 , 必 止 爲君象。 角之數三分之不 吅 民。 正律,●而以半聲應之,此 於五。 君、 無 一君,民過臣,事過民,物 後有事,故爲事。 徴屬 相 此其大小之次也。 臣 奪 商屬 此其相生之次也。 而爲 民、 倫 火,弦用五 也。 事 爲宫,則其餘 金,弦用七十 臣。 盡 物 然聲音之 角屬木, 一 算 五者各 十四四 羽屬 了, 其 五. 事

> 節則以政之得而感爲樂者言之也。 敗 得 而樂」之義而申之,而言樂之通於政。 也。 其 理 而 愚謂: 不 亂 則聲音和諧 此下三節,承首節 丽 無 怗 比比 懘 此 音 敝

亂則 則危,其財匱。 宫亂則荒,其君驕。 反。」〇石經官作「臣」。 如 此,則國之滅亡無日矣。 憂,其民 怨。 五者皆亂,迭相陵,謂 徵 亂 商 則 亂 哀,其 則 陂,其官 《釋文》:「陂,彼 事 勤 壞。 之慢。 羽 亂 角

聲欹 音應 音亂 聲放散,由 曰 鄭氏曰:「君、臣、民、事、物其道亂 :「五音敝敗,各 而 斜而不正,由其臣不治於官故也。 則 亂。 其聲憂愁,由 其君 荒,散也。 [驕溢] 有 故 所 政 也。 陂,傾也。」 电。 虐其民怨故 商音亂 宫音亂 則 孔 則 則 角 其 其 其 氏

● 「律」、《禮記大全》作「聲」。

肺也。 徵 也。 其聲防以約,其和清以静,動肝 其和情以柔,動脾也。 勞故也。 事,事者君子之功,既當急就之,其事當 明君之號令,其聲散以明,其 『宮爲君,君者當寬大容衆,故聲宏以舒, 者和」,注云:『彈羽角應,彈宫徵應,是其 不返,是謂悲,亡國之樂也。」又云『音相 云:『若宮唱而商應,●是爲善,太平之樂。 虚 流亡,故其聲貶以疾,其 重,其民 和樂。」以此言之,相生、應即爲和,不以相 角從宫,是謂哀,衰國之樂。羽從宫,往而 音 , 其和 斷 羽爲物,物者不有委聚,故其聲散 亂 角爲民,民者當約儉不奢僭差,故 ,則其聲哀苦,由徭役不休,其 貧乏故也。 羽音亂,則其聲傾危,由 以散,動腎也。」《動聲 《樂緯 商爲臣,臣者當發 和平以功,動 動聲儀》云: 和 温以斷,動 也。徵爲 其 儀》又 君 事 以 心 牛 久 賦 勤

> 於慢矣。 生、 聲、慢聲。」四者由輕而重,則聲之失莫甚 相陵侮而爲慢者,亡國之音也。 所亂者,亂世之音也。五者皆亂,至於 大司樂》:「凡建國,禁其淫聲、過聲、 政之失而應於樂音者言之也。 應即 爲亂也。」 愚謂: 此二節,又以 五者偏 《周禮 凶 迭 有

音下。」
上行私而不可止也。《釋文》:「比,毗志反。濮,上行私而不可止也。《釋文》:「比,毗志反。濮,潔上之音,亡國之音也,其政散,其民流,誣鄭、衛之音,亂世之音也,比於慢矣。桑間、

聞而寫之,爲晉平公鼓之。事見《史記·樂之樂,已而自沈於濮水。後師涓過焉,夜音於此之水出也。昔殷紂使師延作靡靡鄭氏曰:「濮水之上,地有桑間者,亡國之

0

[「]應」、《禮記注疏》作「和」。

書》。 語》説 止也。」 民自流亡也。誣上行私而不可止者,君既 荒散也。 樂,是亡國之音。 婦 婦人者十九,故鄭聲淫。」今按:《鄭詩》説 淫過矣。 煩手淫聲,謂之鄭聲,言煩手躑躅之聲使 上 遽至於慢也。慢者,亡國之音,若桑間、濮 失政,在下則誣罔於上,行其私意,不可禁 速煩志,並是亂世之音,雖亂而未滅亡,故 曰 會,謳歌相感,故云「鄭聲淫」。《左傳》説, 云『比於慢』。濮水之上、桑林之間所得之 一是也。 人者九篇,《異義》云『十九』,誤也。」 一比 桑間,在 ,鄭國之爲俗,有溱、洧之水,男女聚 猶 其民流者,流謂流亡,君既荒散, 許君謹按:《鄭詩》二十一篇 愚謂: 比,近也。近於慢,猶未 ○孔氏曰:「《異義》云:『《論 同 ·濮陽南。 也 其政散者,謂君之政教 鄭音好濫 誣,罔也。」 淫志,衛音促 孔氏 説

文侯》篇。

與? 張子曰 慢。」 性情如此,其聲音亦然,故聞其樂使人解 詩,與毛傳不同,豈非 此者。今朱子《集傳》於《鄭詩》多以 人者十九」,疑齊、魯、韓三家《詩》説 九」,據《毛詩》而言,許慎言「《鄭詩》説 其人氣輕浮。 地肥饒,不費耕耨,故其人心怠惰。 然《鄭詩》不可以爲鄭聲,説見後《魏 : 愚謂: 孔氏謂「《鄭詩》説 「鄭、衛地濱大河,沙 其地 平下,故其質氣弱。 即 由慎 地 説發其端 土薄 婦 其 人 人者 爲 有 其 淫 如

者不可與言樂,知樂則幾於禮矣。禮樂皆當備矣。是故不知聲者不可與言音,不知音審聲以知音,審音以知樂,審樂以知政,而治知樂者,衆庶是也。唯君子爲能知樂。是故知聲而不知音者,食獸是也。知音而不凡音者,生於人心者也。樂者,通倫理者也。

得,謂之有德。德者,得也。

氏慤 克諧 所觀 也。 倫理 鄭、衛之音,齊宣王好世俗之樂,此衆庶之 樂。若瓠巴鼓瑟 失,則能正君、臣、民、事、物之禮 鄭氏曰:「倫 樂則幾於禮矣。 馬 有所識者 爲聲耳,不 於身者能之,又非僅知之而 知音者也。孔子在齊之所聞,季札聘魯之 仰 禮樂之爲用雖異,而理則 Ē. ,謂其通於君、臣、民、事、物五者之理 秣,此禽獸之知聲者也。 曰 自第二節以下,承首節「聲」「音」「樂」 ,則君子之知樂者也。」 樂。 「凡耳 ,則能知音。 知其宫、商之變也。 幾,近也。 類也。 有所聞者,皆能 禮樂皆得 ,游魚出聽,伯牙鼓琴,六 理,分也 通於道者,則能 聽樂而 則惟實體其理 已,故謂 愚謂 相 魏文侯 也。」 知 八 音 知聲。 禽獸 通 政之得 ~, 故 樂通 之有 並 知此 方 知 好 心 知 作

同。

和

,胡卧反。

好,呼報反。

惡,烏路反,又並如字。

後

『好惡』二字相連者皆放此。」

也。《清廟》之瑟,朱弦而 大羹不和,有遺味者矣。 有遺音者矣。大饗之禮,尚玄酒而 是故樂之隆,非極 章,本樂之所 歸重於知樂,以起下章之義也。 三者之義 ጢ 遞申之,至此則合 亩 [生也。 音也。 是故先王之制 疏越,壹倡 食饗之禮,非致味 而結之, 〇右第一 俎腥 而三歎 禮 魚 樂 而

聲濁。 饗, 祫祭先王。 鄭氏 謂 倡,發歌句 大羹,肉湇,不調以鹽菜。 作樂歌《清 曰:「隆,盛 越、瑟底孔也、畫疏 也。 廟》也。 以腥 三歎 也。 魚 ,三人從歎之耳。 極, 朱弦,練朱 爲俎 窮 遺猶餘 實,不臑熟之。 之使聲遲 也。 《 清 弦 也。 練 廟 也 大 平. 則

惡而反人道之正也。《釋文》:「食,音嗣,下「食饗

也,非以極口腹耳目之欲也,將以教民

平好

玄酒 弦,謂 之正 齊之上也。腥,生也。 非要妙之響。 四 倡 腹耳目,將以教民均平好惡,而反歸 其貴在於德,念之不忘也。 歎之,是人不愛樂,雖然,有遺餘之音,以 通 好惡,教之使知 越,是非 遺餘之味,以其有德質素,其味 而 廟》之瑟,謂歌《清 底孔 兼載腥 人,二瑟」、《燕禮》、《大射》「工六人,四 而三人和 、腥魚、大羹,是非極口腹也。 此皆質素之食,人所不欲也,雖然,有 也 練朱絲爲弦,練則聲濁 ,使聲遲。 極 魚 耳目也。 也。」 朱子 也。 初發首一倡之時,唯有三人 好惡也。」 大羹,肉滑,不以 i E 聲濁又遲,是質素之聲, 廟》之詩所彈之瑟。 愚謂: 先 王 「一倡三歎,謂 俎腥 制禮樂,不 《鄉飲酒禮》「工 孔氏 尚玄酒,在 魚,俎有三牲 也。 日 可重也。 疏越,疏 9.9 朱弦 「: 「≪清 菜 人道 爲 一 人 口 疏 和 五 朱

音也。 味也。 酒、腥 也。 音。 也。 也。 故食饗未嘗 酒在東。薦牲則 歌《清廟》,以發明先 終,故樂未嘗不極音,而其隆者,則在於升 琴,惟天子宗廟之祭乃有之與。 當有四人,以一人發歌句,而三人應和 瑟」,皆歌工二人。 有琴。此言「瑟」而不言「琴」,然則 而載之於俎也。 人道 《虞書》言「搏拊琴瑟以 禮 人之好惡之出於本 俎腥魚,謂朝踐薦血腥之時, 魚 樂 食饗之禮,設尊則以玄酒在西,醴 在 ,以反先代質素之本,而 在 本 於 無 於示德,故不 反 不 古 . 致 不 正,惟 樂以升歌爲始,合舞爲 以薦腥在先,饋熟在後。 故 味, 若諸侯大饗之禮,歌 王之德,而 不 丽 其 其 極 然者,亦 · 極 隆 味 徇 詠」,則 音 者則 於 而 好 有 面 不 不 無不平, 致 惡 餘 有 在 在 在 魚 升 升 於致 一於玄 於 餘 猶 於 圃 歌 亦 歌 味 失 於 之 極 腥 極 用 并 工

感人無 事。 也。 人生而 亂之道 者苦怯 也。 化物也。 内,知誘於外,不能反躬,天理滅矣。 之欲 皆知貴德反古之意,則不至徇於耳目口 惟 於是 物至知知 其 是故强者脅弱,衆者暴寡,知者詐愚,勇 也。《釋文》:「決,音逸。 徇 ,疾病不養,老幼孤獨不得其所,此 窮,而人之好惡無節,則是物 静,天之性也。 ,而好惡自此平,人道之正可以 有悖 於耳 人化物也者,滅天理 ,然後好惡形焉。 目 逆詐僞之心,有 П 腹 之欲 感於物而 而 知者,音智。」 失之。 淫 而 好惡無節於 動,性之欲 泆 窮 作 Ĺ 今使 夫物 至 反矣。 \欲者 亂 而 腹 大 之 Ž 人 人

謂 以 動 妙,人之所生而 朱子曰:「人生而静,天之性也,感於物 生,其 ^,性之欲 性 也。 未感也,純 然人有是性即有是形,有是形即 也 何 有 者 也 粹至善,萬理具焉,所 也。 ? 曰 : 蓋人受天地之中 此言性 情之 而

覺其 流,而 性也。 則人 庶乎 欲 哉 此 節,唯其不自覺知, 者,其動也。 焉,何也? 性之欲者出 有 立,是以天則不明於内 躬,天理滅矣,何也? 之者,心之感。 之動處爲言,而性在其中也。 所以 即即 是 其 心, 欲 所 所謂 此 性之所以 好惡無節於内, 낈 流濫 熾 可 而不 然者, 制 盛 節 情也。 焉 曰 : 矣。 放逸而 一, 而 所以 能 明天理人欲之機,間 ,而善惡於是乎分矣。 好之惡之者,情也 無感於物,感於物而 而 失也。 上言性、情之别,此 天 不 好惡 反躬以求之,則其 物至知 理 能 不自知也。 無 如 滅 所涵 ,外物又從而誘之, 曰:此言情之所 而有 知誘於外,不能 好惡本 是,而唯 息,尚 知然後 養,而大 自然之節者, 物至 · 有 何 苟能 情 好 自 難 不容息 一而 是 動,則 一本不 性之 之 「然之 指 流也 於此 形 知 惡 徇, 有 反 焉 知 以 情 形

而

静

以

F

求,則

去?

愚謂:

上文言先

而

流

於情者

亂之所由

而

反

人

道之

無

窮,然亦是

若是自

有

,下『知』字

1061

之深,難覺

而

之勇,

圃

致

爾。」又曰:「人生而静以 其制之不力也,而反窮之,則人之所以 唯恐其存之不至也,而反滅之。 物,人之所以爲貴也,而反化於物。 滅者,雖化物窮欲,至於此極,苟能 人者,至是盡矣。然天理秉彝,終非 (流之甚而不反者言之也。 天理之本然者初未嘗滅也。 一,即是· 百倍之功,則不足以復 而人之好惡無節,則是 人化物也者,滅天理而 我也,而至於無節。 易昧 ,而外誘不能奪矣。 自審,念念不忘,則 曰:上言情之所以流,此則 人物 ,難反而易流,非厲 未生 時 上不容説。 , 只 可謂之理 好惡之節 人欲 夫物 八天 理 宰 但習染 窮 反 物 天理 ·制萬 人生 其 躬 可 入欲 知 唯 至 初 恐 耻 以 殄 爲 而 之 益 言之。 説 得其 起,此禮樂之所以 正,此節又以人之好惡本於性 王之制禮樂,所以教人平好惡 主宰,如 自家好惡無節 是用。」又曰:「物之誘人固 矣,如孟子言『性善』與『四端』是也。」又 過即其發見之端言之,而性之理固 本體,原未嘗離,亦未嘗雜,要人就上 體矣,此程子所謂『在 以 説性時,便已不是性,纔謂之性,便是 曰:「物至知知,上[知]字是體 後,此理已 性不得,此程子所謂『在 本體耳。 蓋人之好惡之失,乃大 何被 誘) 墮 性不 ,所以被物誘去。

天之所以與

以

其

者也,何也?

處

唯

其

反

分躬

感人無

窮,

在

形

人日

性」也。

然性之

面

見

氣中,不全是性

之本

人生

天日

命也

口

'形容,善言性者,不

可默識

人化物也。

明,存養自

固

是故先王之制禮樂,人爲之節。 衰 麻 火火泣

不可不作也

所以 反。 道 刑以防之。 正 昏姻 備 交接也。 别,彼列反,下文皆同。」 節 冠笄 矣。《釋文》:「衰,七雷反。安樂,音洛。冠,古亂 喪紀也 ,所以别男女也。 禮、樂、刑、政,四達而不悖,則王 禮節民心,樂和民聲,政以行之, 鐘鼓干戚,所 射鄉 以 食饗,所 和安樂也 以

世之音安以樂」也。 射、鄉飲酒也。」 鄭氏曰:「言爲作法度以遏其欲。 以一其行,爲之刑 者,樂之所以和民聲也。 和,而使之發於聲者皆安樂也。和安樂 於天下之人皆爲之節。 飲酒也。人之好惡無節,先王之制禮樂, 人脩道之教,人道之所以正,而大亂之所 正交接者,禮之所以節民心也。 而冠,女許嫁而笄,成人之禮。 以 愚謂:射、鄉,鄉射、鄉 和安樂者,言導之於 防其姦。 安樂者,所謂「治 節喪紀 此四者,聖 又爲之政 射、鄉,大 ,别男女, 男二十

樂者爲同,禮者爲異。同則相親,異則相敬。 《史記正義》分篇之説,皆本於皇氏,雖未 同。 《别録》乃二十三篇之舊次,而《禮記》則取 有以知其必然,然别無可考證,今姑從之。 明説,孔疏亦言「仔細不可的知」,疏中及 篇確然可見者之外,其餘分篇,鄭氏原 分」,則自《魏文侯》、《賓牟賈》、《師乙》三 而於目録見其意也。 之舊次爲未善,又以經文次第不欲輙更, 三篇,皆以年代次之,則其意似以《禮記 氏注《禮記》一依經文,而目録之次又不 記》,而褚少孫又自以其意升降之也。 以入《禮》者之所更定,《樂書》本取諸《禮 右《樂本》篇第一。〇十一篇之次,《禮記 以 與劉向《别録》、《史記・樂書》皆不同。 息也。 觀其於《賓牟賈》、《師乙》、《魏文侯》 〇右第二章,本樂之所由作 又鄭謂「十一篇略有 也 無 鄭

敕,本亦作「飾」,音式。 著,張慮反。」 爵舉賢,則政均矣。 事 樂勝則流,禮勝 如此,則民治行矣。《釋文》: 下和矣。 也 禮 義 好惡著 立,則貴 削離。 ,則賢不肖别矣。 賤 仁以愛之,義以正之。 答矣。 合情飾貌者,禮樂之 「勝,治證反。❶ 樂文同,則 刑禁暴, 上

之用。 和也。 和於内 也。 禮樂,欲其並 鄭氏曰:「同,謂協好惡。異,謂别貴賤。 之,而得裁制之宜,又所以爲禮、樂、刑、爵 樂言「文」,見其有以相接,而上下之所以 檢於外,所以救其流之失。」 義」,見其有以相辨,而貴賤之所以等也。 和以統同,序以辨異。樂勝則流,過於同 禮勝則離,過於異也。 仁以愛之,而 好惡者,刑 ',所以 救其離之失。 行彬彬然。」 爵 之本。 有惻怛之實,義以 刑爵者,好惡 飾貌者、禮之 合情者,樂之 陳 愚謂:禮言 氏 澔 曰 : īF.

> 不治也。 相 序尤有不可紊者,故《樂記》一篇,每以禮 過者,即禮也。 者,即樂也。 陽,仁之與義,其理同出於一原,其用 而實以相 之本者也。民治行者,言以此治民而民無 而不離。樂所以 配 而言之。 〇右第一章,言禮樂之爲用 濟也。 禮所以 且萬物得其理而後和,其 蓋禮之與樂,若陰之與 和禮,而禮之從容不 節樂,而 樂之節 制 相 · 迫 不 須

矣。合父子之親,明長幼之序,以敬四海之鱼外作,故文。大樂必易,大禮必簡。樂至則無怨,禮至則不争。揖讓而治天下者,禮則無怨,禮至則不争。揖讓而治天下者,禮樂由中出,禮自外作。樂由中出,故静。禮

「治」、《釋文》作「始」。

0

内,天子如此,則禮行矣。《釋文》:「易,以豉反。

争,「争鬭」之争。 用也。」 禮由 樂以統同,舉其心之和順者達之而已,故 敬在貌。 鄭氏曰: 腥 在 樂由中出 級,必因其在外者而制之,故曰「自外作」。 大饗然。 則 樂之大者必易,一倡三嘆而有遺音,而不 曰「由中出」。 正 八治而 當 魚 乎幼眇之音也。 由 .外作,故必極乎度數之詳,而其事文。 反 中出者,固非求之於外,而由外作者, 而 上下和也。 而求之於中矣。 有遺味,而不在乎儀物之繁也。然 「樂由中出,和在心。禮自外作, 至猶達: ,故無事乎品節之煩,而其意静。 愚謂:禮樂之本,皆在於心。然 文猶動也。 長,丁丈反。 禮以辨異,其親疎貴賤之品 也,行也。實,協也。 禮至則不争者,上下辨 禮之大者必簡,玄酒、 易、簡,若於《清廟》、 樂至則無怨者,神 試,

> 用 序,使民長幼有序。 乎其本。 同,而其治天下之功一也。 不争之事也。 無怨之事也。「合父子之親」以下,禮至則 褻也。「暴民不作」至「天子不怒」,樂至則 四海之内皆粲然有文以相接,相敬而無相 合父子之親,使民父子有親。 自治矣。天子不怒者,言無可怒之事也。 丽 民 如此則第相與揖讓以行禮樂,而天下 志定也。 無怨不争者,禮樂之所以達 必易必簡者,禮樂之所以立 〇右第二章,言禮樂之作不 以敬四海之内者,使 明長幼之 乎其

有鬼神。如此,則四海之内合敬同愛矣。物不失,節故祀天祭地。明則有禮樂,幽則大樂與天地同和,大禮與天地同節。和故百

物有功,報焉。禮樂,教人者。鬼神,助天數。百物不失,不失其性。祀天祭地,成鄭氏曰:「同和同節,言順天地之氣與其

禮者,殊事合敬者也。 神者,天地之功用,自然之和 ,聖人之功用,同 而不遺,禮樂體事 成物者也。」 幽,同運並 而合於敬 與天 生,各保其性也。 與天 成,本其功於天地而報之也。 地同 地 行 ,無不得其和而同於愛也 同 故 故 其 其 愚謂 節。 和 能使四 和 樂者,異文合愛者也 丽 同 無不在,二者一明 百物不 天地有自然之和, 天地 節者也。 祀天祭地者,萬 海之内無 有 節 ·失者 自然之節 也。 鬼神 百 禮樂 不 · 得 體 物 鬼 乎時 情則同。 功 相沿也。 也。 以

得

和

以

而

大禮

而

大樂

地

物

得節以

也 鄭氏曰:「沿,猶 損 於夏禮,所損 ° O 益 可 禮 知 器》 也。」 益 曰 事 可 因 『堯授舜,舜授禹,湯 知 述 與 也。 也。 時 並 孔子 周 爲 因 於殷 ·曰:『殷 事 在 禮 其 所 因 放 時

禮樂之情同,故明

王

以

相

沿也。

故事與時

其

節

物

者

並,名與功偕。

鄭注:「沿,或作『緣』。」

代之治· 《夏》、《濩》、《武》,隨乎功以立 因時以制禮,象功以作樂,而皆有以成一 情者其本,末可變而本不可變,故明王 事異,而敬之情則同。樂之文殊,而愛之 武》,各因其得天下之功。」 桀,武王伐紂,時也。』名與功偕,爲名在 之於禮樂,因 韶》,禹作《大夏》,湯作《大濩》,武王作《大 也 偕猶俱也。 起 禮樂之文與事者其末,而 事與時並者,禮有質文損益,視 事 其情之不可變者以爲本,故 名與功 堯作《大章》,舜作《大 偕 者,樂有《 名也。 愚謂: 愛敬之 韶 禮之 明 王 以 其

仰,綴兆舒疾,樂之文也。 故鐘鼓管磬,羽籥干戚,樂之器 簠簋俎豆,制 也。 屈 度文 伸俯

⁰ 爲」、《禮 記注疏》作「舉」。

「綴遠」「綴短」皆同。上,時掌反。還,音旋。」述、作之謂也。《釋文》:「綴,丁劣反,徐丁衛反,下述。作者之謂聖,述者之謂明。明、聖者,也。故知禮樂之情者能作,識禮樂之文者能章,禮之器也。升降上下,周還裼襲,禮之文

是也。 未逮 之而 之所寓也。其文易識,其情難知。 禮樂之文,所謂「殊事異文」者也。 外營域也。 之情也。 武、周公是也。 則得其本以達其末,而化裁變通,其文 鄭氏曰:「綴,謂酇,舞者之位也。 失, 故能 也,而於其已然之迹,亦可以守之而 出 〇右 ,故能作。 述。 第三章,言禮樂之本在乎愛敬 述, 作者之謂聖,禹、湯、文、 述者之謂明,游、夏、季札 謂 識其文則於其本猶 訓其義 也。」 器則 愚 知其 兆,其 謂 有所 由 情 文

樂者,天地之和也。

禮者,天地之序也。

和

故百 後能 以 地 制 興禮樂也 物皆化, 過 制則 序故 亂 , 過 群 作則暴。 物皆别。 樂由天 明於天地 作, 禮

育也。」 故動 明 和,如陽過 肅,則物之成者復壞 則,質之爲也。 乎質之具於地者而制,故 物皆别。樂者,法乎氣之行於天者而作, 序,陰之静而成物者也,質具 者也,氣行而不乖 之所本而言也。天地之和,陽之動 天地同節」,以成功之所合而言也 劉氏曰:「前言『大樂與天地同和,大禮 「樂者天地之和,禮者天地之序」, 乎天地之和與序,然後能興禮 而 屬 陽。 愚謂 而 亢 聲音,氣之爲也。 ": 禮 過制 ,則物之生者 ,故百物皆化。 以節行,非所以爲 則失其序,如陰過 ,故亂。 静 而有秩,故群 過 丽 反 作 樂 傷 屬 禮者,法 :則失其 天 陰。 以 以 故暴。 而 /

費化 地之 效 此 生 儀 而 物 法 與

以禮 之和 以爲 陰 樂以道 也 爲 則 天地又各有所專屬焉。 而 一,然過 陽 與陽,立 樂之動 和,而反至於暴矣。 與 專屬地者,蓋天地各有自然之和、序, 理,而實則相通也。 禮 和,非 剛屬乎天,陰與柔屬 制 者天地之序」,下又以樂專屬天, 丽 地之道曰柔與剛,而分而言之, 則 [屬乎陽,禮之静而屬乎陰,於 旃 不 足以爲節,而 议 爲 暴也,然過作則 猶之立天之道曰 上言「樂者天地 乎地,雖若各 反至於亂 不足 矣。

文》:「邪,字又作「耶」,同似嗟反。」

社稷,事乎山川鬼神,則此所與民同也。《釋若夫禮樂之施於金石,越於聲音,用於宗廟中正無邪,禮之質也。莊敬恭順,禮之制也。論倫無患,樂之情也。欣喜歡愛,樂之官也。

也。質猶本也。」 愚謂:論倫無患者,言鄭氏曰:「倫猶類也。患,害也。官猶事

其 質、制徧化天下之人,而與民同之也。 言,聖人制禮樂之本也。樂之官,禮之制, 悖 於禮樂既達,而施而 以其著於事者言,聖人用禮樂之實也。 右第四章,言禮樂之作本於天地而達於 害也。 心之和 樂之情,禮之質,以其根於心者 順,足以 論説樂之倫 用之,又欲以情、官、 理,而 不相 至

民也。

右《樂論》篇第二。

放此。」 乎。 亨而祀,非達禮也。 其治辯者其禮具。 又作「辨」,音遍。 及夫敦樂而無憂,禮 王異世,不相襲禮。 王者功成作樂,治定制禮,其功大者其樂備 《釋文》:「王,如字,徐于況反。 亨,沈普衡反,徐許兩反。 干戚之舞,非備樂也。 備而 樂極則憂,禮粗則偏矣。 五帝殊時,不相沿樂,三 不偏者,其唯大聖 治,直 夫,音扶,下皆 更反。 辯,本 孰

玄酒 儀物者 也。 徧 鄭 則 其樂而不至於憂,禮節 粗 嘗相沿,禮之事,三王不必相襲,以其非 之舞非 臭也。』不相沿樂,不相襲禮,言其有損 故 至於憂矣。 樂之本故也。 而致飾於聲容之盛,則反害於和樂之正而 樂」,於三王言「禮」,互文也。樂失其本, 一,則 氏 也 惟 1、腥魚 ,三獻爓,一 ,非大聖其孰能之? 其情足以 曰 不根於忠信之實而失之偏矣。 達,具也。 ,禮之末也,故孰亨而祀 備樂,而朱弦、疏越有遺音者矣。 愚謂:聲容者,樂之末也,故干、戚 功主於王業,治主於教民。 有遺味者矣。 禮失其本,而 帝王皆有禮樂,於五 稱之,而能 獻孰,至敬不饗味而貴氣 《郊特牲》曰:『郊 詳 樂之文,五帝未 與天地同 備而不至於偏 〇右第一章,言 徒務乎儀 非 達禮 其和節 (血,大 敦厚 一帝言 物之 而 辯 :禮 益

> 惟 聖人 能 作 禮 樂 也

明備 地。 息,合同而化,而樂興焉。 之近,又其靳反。惇,音純,本又作「敦」。」 者敦和,率神而從天。 秋斂冬藏,義也。 天高地下,萬物散殊,而禮 故聖人作樂以應天,制禮以配 ,天地官矣。《釋文》:「長,丁丈反。 仁近於樂,義 禮者别宜,居鬼 春作夏長,仁 制行 矣。 近 於禮 地 近,「附近 流而 禮樂 而 也 樂 從

樂。 不息 天地 別宜者辨其體之異。率神者,氣之流 流 天地定位,萬物錯陳,此天地自然之禮也 而 陰之肅 無間,此天地自然之樂也。 不易,主乎鬼之屈也。 而不息,而闔闢 循 秋斂冬藏者,天地成物之義也。 生物之仁也。仁者陽之施,故近於 ,故近於禮。 乎神之伸也。 不窮,合同 敦和者厚其 居鬼 率神則屬乎陽而 者, 春作夏長者、 而 化 體之 氣之同, ,而渾淪 一定

從天 也。 天地 那天,却無自然之理。 牲、三犧以奉五味』云云,都是做這箇去合 極好 聖人法天地以作禮樂,而禮樂又能爲功 而 庸》,必子思之辭。《左傳》云『爲六畜、五 法乎陰以爲成物之義也。 天地官,言天地 應天,法乎陽以爲生物之仁,制禮以配 散 樂興焉」,皆是自然合當如此。」 殊 居 居 ,非孟子以 ,此聖人所以贊化育而上下同流者 其職,猶《中庸》之言「天地位」也。 〇朱子曰:「『天高地下』一段,意 而禮制行矣,流而不息,合同而化 鬼 則屬 乎 下 陰 所能 丽 如云『天高地下,萬 從 作。 地 其文似《 聖人作樂以 地 中 思 於 蓋

天尊 則 則 動 禮 性 静 地 命不 者天地之别 有常,小大殊矣。 卑,君臣定矣。 ·同矣。 也。 在天成象,在地 《釋文》:「卑,如字,又音婢。」 卑高已陳,貴賤位矣。 方以類聚,物以 成形,如此 群

> 臣也。 也。 見於天地者,乃天地自然之别 稟之性命不同也。 從,物以群分,而飛潛動植之各異,由 物以形言。 澤之卑高,即 鄭 象,在地 各有其常,即自然之小大也。 陽爲大,陰爲小。 申言天高 氏 禮有君臣,而天 日 卑謂澤,高 : 而 地 卑 Ш 方以 下,萬物散殊 高 自然之貴賤也。 川人 謂 類聚,而 禮有 謂 、物之成形,凡此皆禮之 在天而 山 尊 Ш 澤 地 小大,而陽動陰 也。 卑,即 禮有貴賤,而 **前** 剛 日月星辰之成 柔 《易》之義 禮 也 方以道言 燥 自然之君 制 愚 濕之相 行 謂 之義 其所 以 Ш 此

> > 1069

以 子兮反。 鼓之以雷霆,奮之以風 和 地氣上齊,天氣下降,陰陽相摩,天地 也 日月,而百化興焉。 《釋文》:「上,時掌反。 摩,本又作「磨」,末何反。 雨 如 齊,注讀爲躋,又作『隮』: 此,則樂者,天地之 ,動之以四 蕩,本又作「盪」,同大 時,煖之 相

儻反。 霆,音廷,又音挺。 煖,徐許爰反,沈況遠反。」

生也。」 也。 化,而樂興焉之義也。 鄭 和 凡此皆樂之見於天地者,乃天地自然之 鼓之、奮之、動之、煖之,皆指萬物 交於天,則天 言其氣 下降,則陰陽相 氏 也 蕩猶 曰 ,謂之陰陽。 愚謂:此申言流而不息,合同 動 齊讀 也。 .地相蕩矣。煖,《易》作「烜」。 (爲躋。 摩矣。天下交於地,地上 奮,迅也。 陰之氣上升,陽之氣 言其體,謂之天地 躋,升 百化,百物 也。 摩 而 猶 言。 而 化 迫

情 化 不時 也 則 不 生,男女無 辨則 亂 升,天 地之

不可以 鄭氏曰:「辨,別也。 樂,而禮樂之在人者,乃所以贊天地之化 物,禮失則害人。」 無 禮樂也。 蓋 愚謂 升,成也。樂失 天 地 雖 此 有 又言 自 然 在 之禮 則 人 者 害

> 害物而致亂者,乃天地之情也。 育 故禮樂之不興,雖人事之所爲 瀆,故既亂 故萬物不生。 也。 故 無 興作。 ※樂則 無禮則男女無別 氣 蓋禮樂與 化 不 時, 天 而 ?,而其足以 地 至 ,而至於相 相 於乖沴, 感 通

反,或蒲河反。」 乎鬼神,窮高極遠而測深厚。《釋文》: 及夫禮樂之極乎天而蟠乎地,行乎陰陽 「蟠,步丹 而

通

蟠 間。 樂取 厚,山 神 極 乎陰陽。 於地,則其間無所不之。」 孔氏曰:「 鄭氏曰: 乎地。 高 遠 天之三光,皆應禮 天降膏露,是極乎天。 象於天地 川 也。 也。 「蟠猶委 用之祭祀,百神 日月歲時無易,百穀 地之山川,皆應禮 言禮樂之道,上至於天,下委 力,功德 也。 又能 樂 高遠,三辰 俱 圃 遍 明, 地出 至 滿 一,是通 用成,是 樂而 三乎天 是 醴泉,是 禮 也。 地 出 樂 乎 禮 瑞 窮 鬼 行 之 深

通。」 愚謂:此言聖人作禮樂之功效,所有是 理即 有是 氣。 一氣之和,無所不應,是測深厚也。」 朱子曰:「此以理言,

謂

「禮樂明備,而天地官」者也。

音泰。」 聖 不 樂著大始,而禮 ·動者 人 曰 地 「禮樂」云。《釋文》:「樂著,直略反。 也,一 動一 居成物。 静者,天地之間也。 著不息者天也,著 故 大,

居也。 地 静,故質之有定而爲物之已成者,禮之所 止也。」 生。著不息,著不動,著猶明白也,息猶休 鄭氏曰:「著之言處也。大始,百物之始 之禮樂如此,故聖人之治天下,亦必曰「禮 以始物而 而爲物之大始者,樂之所著也。 之静也。 著不息者,天之動也。 成物者,自然之禮樂也。 愚謂:樂者陽之動,故氣之方出 動 一静,充周 乎天地之間, 著不動者, 禮者陰之 惟天地

地有自然之禮樂,聖人法而制之,又能爲樂」云。云者,語辭也。○右第二章,言天

功於天地也。

昔者舜作五弦之琴以歌南風,夔始制樂以賞今其名篇之義已不可盡考知,亦無以質其得失也。按十一篇之名,《别録》及《史記正義》與孔疏間有不同。右《樂禮》篇第三。《史記正義》作《禮樂》。○今

諸侯。 昔者舜作五弦之琴以歌南風,夔始制樂以

盛 故天子之爲樂也,以賞諸侯之有德者也。 王氏肅曰:「《尸子》及《家語》云:『舜 而教尊,五穀時孰,然後賞之以樂。故其 諸侯以樂,前此無有也 舜,或五弦始舜也。」 琴』,今云『舜作』者,特用琴歌南 財兮。」」」 吾民之愠兮。 五弦之琴,其辭曰:「南風之薰兮,可以 孔氏曰:「案《世本》,『神農作 南風之時兮,可以阜吾民之 ,而夔始制之。<u>」</u> 陳氏 祥道曰: 風 始自 賞 德 彈

行也。《釋文》:「舞行,戶剛反。其行,下孟反。」行綴短。故觀其舞,知其德。聞其謚,知其治民勞者,其舞行綴遠。其治民逸者,其舞

○右第一章。也。民逸則德盛,酇相去近,舞人多也。」鄭氏曰:「民勞則德薄,酇相去遠,舞人少

也。《夏》,大也。殷、周之樂盡矣。《 韶》,繼《大章》,章之也。《咸池》,備矣。《韶》,繼

《大 磬》。 明也。《周禮》闕之。或作《大卷》。《咸 鄭氏曰:「《大章》,堯樂名也。言堯德章 之言紹也,言舜能紹堯之德。《周禮》曰 咸,皆也。 池》,黄帝所作樂名也,堯增脩而用之。 《周禮》曰《大咸》,《韶》,舜樂名也。 《周禮》曰《大濩》、《大武》。盡,言盡人事 《周禮》曰《大夏》。 《夏》,禹樂名也,言禹能 池之言施也,言德之無不 殷、周之樂, 大堯、 施 《 韶 》 也。

族類。 門大卷》爲黄帝樂、《咸池》爲堯樂也。《樂 均刑法以儀民,言其德無所不施。] 是《雲 物,以明民共財,其德如雲之出,民得以有 章》」,與《周禮》「《雲門大卷》」相當,則《大 禮·大司樂》皆言歷代樂名。 故知《大卷》當《大章》。」 愚謂:此與《周 咸》』之上,此《大章》』在《咸池》』之上 門》之號。《周禮》『《雲門大卷》』在『《大 章》是也。 之樂,堯不增脩者,則别立其名,則此《大 《咸池》是也。《周禮》謂之《大咸》。 樂,至堯更增改脩治而用之,則《世本》名 也。」 云:「黄帝曰《雲門大卷》。 章》即《雲門大卷》無疑也。 『黄帝 《大咸》、《咸池》,堯樂也。 孔氏 口《咸 至周謂之《大卷》,更加以《雲 曰:「按《樂緯》及《禮樂志 池》。』《咸池》雖黄帝之 黄帝能正名百 鄭氏《周禮注 此言《大 堯能 黄 帝 殫

《大章》」,而《莊子》亦言「黄帝張《咸池》於 樂,《咸池》爲黄帝樂,又以其於先後之序不 洞庭之野」,故鄭於此注又以《大章》爲堯 緯》及《禮樂志》云「黄帝曰《咸池》,堯曰

帝不相沿樂,舜、禹、湯、武皆自作一代之 合,則謂「黄帝之樂,堯增脩而用之」。 夫五

乎 ? 立名,何以堯用黄帝之樂乃别爲之名乎? 周用六代之樂,於先代之樂未嘗别爲

樂,何以堯不作樂而但脩黄帝之樂而用之

聞 高帝又改舜《招舞》曰《文始舞》,三代時未 秦人事不師古,始改周舞曰《五行舞》,至漢 有是也。 《大章》爲黄帝樂,《咸池》爲堯

緯書繆妄,莊生寓言,而《漢志》之言即本 之緯書,均未可據也。 〇右第二章。

樂,以《周禮》六樂之序斷之,無可疑者。

天地之道,寒暑 教者、民之寒暑也、教不時則傷世。 不 時 則 疾,風 雨不節 事者,民 則 饑

之風雨也,事不節則無功。

鄭氏 則傷世,故 曰:「教,謂樂 必 有樂 以教 也。」 民。 愚謂. 事不

節

則

無

教

不

時

矣。《釋文》:「行,下孟反。」 然則先王之爲樂也,以法治也,善則行象德

功,故必有禮以節事。

事也。 德,民之行順君之德也。」 鄭氏曰:「以法治,以樂爲治之法。 教不時則傷 (世),而言先王以樂教民之 愚謂:此承上 行

象

之所以備酒禍也。故酒食者,所以合歡 禮,賓主百拜,終日飲酒 之流生禍也。 夫豢豕爲酒,非以爲禍也,而獄訟益繁,則酒 鄭氏 善酗 言豢豕作酒,本以饗祀養賢,而 ,以致獄訟。 「以穀 是故先王因 食犬 壹獻,士飲 豕 而不得醉焉,此先 曰 爲酒 豢。 酒 禮 爲,作也。 之禮。 小人飲之 壹獻之 也。 白

卿大夫略爲一節,但三獻,則天子、諸侯之 拜 則無功」,而言先王以禮節民之事也。 **籩、豆於幕下」。**」 行人》云上公『九獻』,侯伯『七獻』,子男 獨以備酒禍言之者,略舉以見其餘也。 之不可以無節如此。 則酒食至於興訟,有禮則酒食可以合歡,事 侯享之,有 士同壹獻。故昭六年: 『季孫宿如晉,晉 『五獻』,並依命數。 五獻者,故昭元年鄭伯享趙孟,「具五獻之 得貺不過三獻。」」但春秋亂世,或有大夫 了, 以 喻 多。」 加籩。 孔氏曰 武子退,使行人告曰: 愚謂:此承上「事 其 臣 然禮之節民非一事, : 「凡獻數,按《大 介則孤同子男, 無禮 不節

文》:「綴,知劣反。」
文》:「綴,知劣反。」
樂者,所以象德也。禮者,所以綴淫也。《釋

民象君之德,禮所以綴止民之淫亂。此承鄭氏曰:「綴猶止也。」 愚謂:樂所以使

上二節以起下文也。

「易」字。
「易」字。
「多」字。

謂:此結言先王以禮節民之事。

國子。」 愚謂:此結言先王以樂教人之鄭氏曰:「著,立也。謂立司樂以下,使教

事也。○右第三章。

右《樂施》篇第四。

亂。 諫反。易,以豉反。賁,依注讀爲憤,扶粉反。肉,而救反。 民肅 好,呼報反。 反,又色例反。 慈愛、流辟、邪散、狄成、滌濫之音作而民 之音作而民剛 節之音作 噍殺之音作而 夫民有血氣 『潤」。」○今按:志微、《漢書》作「纖微」,當從之。 《釋文》:「知,音智。應,於甑反,篇内同。殺,色界 起物 敬、寬裕、肉好、順成、和 辟,匹亦反。 丽 圃 思,息吏反,又音斯。 民 動 心知之性,而無哀樂喜怒之常 毅,廉直、勁正、莊誠之音作 康樂、粗厲、猛起、奮末、廣 ,然後心術形焉。 民思憂,嘽諧、慢易、繁文、簡 狄,他歷反。」○鄭注:「肉,或爲 慢,本又作「嫚」,❶莫 動之音作 是故志微、 而 貧 淫 民 而

《鄭風》,而曰:『其細已甚,民弗堪也。』簡形猶見也。志微,意細也。吴公子札聽鄭氏曰:「言在所以感之也。術,所由也。

貌。 速疾 章之意,論樂能感人也。身爲本,手足 憤。 周道」,字雖異,與此『狄』同。 末,故云『奮末,動使四支』。《詩》云『踧踧 而還燔木。 於人,猶如雨出 聲善惡,本由民心而生,合成爲樂,又下感 孔氏曰:「此言人心不同,隨感而變。 濫,僭差也。 節 氣狡憤』。 滌滌山川」,皆物之形狀,故云『往來疾 ,少易也。 奮末,動 憤,怒氣充實也。 而止。」 狄成、滌濫,言樂之曲折,疾速而成 肉,肥也。 故此篇之首,論人能興樂,此 此皆民心無常之徵也。」❷ 陳氏祥道曰:「肉倍好者 於山 一而還 狄滌 使四支也。 《春秋傳》曰:『血 雨 往 山,火出於木 來 《詩》又云 疾 賁讀 貌 也 樂 爲 爲

[「]嫚」、《釋文》作「僈」。

[「]徴」、《禮記注疏》作「傚」。

音廣大 章繁。 也。」 環。 剛猛 諧 也。 璧,好倍肉者瑗,肉好 濫侵僭,如以水洗物,而浸漬侵濫,無分際 之一終。狄成,言其一終甚長,淫泆之意 如 邪散者,淫邪 之圓轉 微」,是也。 節奏逖遠,所謂 動者,以 水之滌蕩放濫,往而不返也。 和也。 陳氏澔曰:「狄與逖同,遠也。 0 滌,洗也。 肉好之音, 豈其音旋 簡節, 而 而 愚謂:志微、《漢書 奮末,謂樂之終奮迅。 和 潤澤也。 憤怒也。 而 慢,疏也。 纖微,謂樂音纖 動 而 節奏簡也。猛 散亂 也。 濫,侵僭也。 流流 順成者,以順而成。 肉好,以璧之肉好喻 湎 流辟者,流宕而偏辟。 易,平 如 以忘本」也。 狄成,言樂之一成, 而 ,旋而不可窮 樂志》作 不可 起,謂樂之始 也。 細而 言其音之泛 廣賁,謂 微 纖微、噍 繁文,文 成者,樂 窮邪?」 滌濫 眇 也。 和 音 樂 者

之也。 爲 感 言六者之音,與第一篇同,但 此感民,則民之心亦應之而喜矣。 辟、邪散、逖成、滌濫之音,出於喜者也,以 以此感民,則民之心亦應之而愛矣。 寬裕、肉好、順成、和動之音,出於愛者也, 之而樂矣。粗厲、猛起、奮末、廣賁之音, 廣賁爲樂音。 爲樂音。 也,以此感民,則民之心亦應之而敬矣。 而怒矣。 出於怒者也,以此感民,則民之心亦應之 音,出乎樂者也,以此感民,則民之心亦應 亦應之而哀矣。 殺之音,出於哀者也,以此感民,則民之心 樂音。 而 爲聲,此則言樂音之感人而人心 〇孔氏以志微爲君之志意,噍 廉直、勁正、莊誠之音,出於敬者 嘽諧、嫚易爲君德,繁文、簡節 粗 厲 廉直、勁正爲君德,莊誠爲 爲人君氣性,猛起、奮末、 嘽諧、慢易、繁文、簡節之 一被言 人心 此 流 之 殺 應 所

樂音。 樂音 樂音。 作 以 聲言亦明矣。 言,則上下衡決,不成文理。 德,然以「志」言音,義又不合,當從《漢志》 以廉」,則此云「嘽緩」「粗厲」「廉直」,皆指 句「志微」二字,推類以 其聲嘽以緩」,「其聲粗以厲」,「其聲直 「纖微」爲是。 解「志微」,則於「志微」二字原不指君 皆上 寬裕 流 辟 論 爲君德、肉好、順成、 爲 鄭氏引《左傳》「其細已甚」 君德 君 志,邪 ,下論樂音。 言其餘。 散、狄成 且 滌 首篇 然如 蓋 和 因 動 濫 其 首 爲 云 爲

大之稱,比終始之序,以象事行,使親疏、貴學等,廣其節奏,省其文采,以繩德厚,律小孫於外,皆安其位而不相奪也。然後立之不密,剛氣不怒,柔氣不懾,四暢交於中,而生氣之和,道五常之行,使之陽而不散,陰而是故先王本之情性,稽之度數,制之禮義,合

反。比,毗志反。長,丁丈反。見,賢徧反。」觀其深矣。」《釋文》:「道,音導。行,下孟反。稱,尺證賤、長幼、男女之理皆形見於樂,故曰:「樂

子: 之。 之類也。終始,謂始於宫,終於羽。 夏》、《大濩》、《大武》。』小大,謂高聲、正聲 子:興、道、諷、誦、言、語。 度也。 《周禮・大司樂》: 『以樂語 等,差也,各用其才之差學之。 陰陽氣也。五常,五行也。密之言閉也。 之極,而作樂之本也。 義,貴賤隆殺,清濁高下,各有其義也。 事行,謂宮爲君,商爲臣。」 理渾然,其發而 情性,先王一己之情性也。 先王之性,天 度數、十二律上生下生、損益之數也。 舞《雲門大卷》、《大咸》、《大磬》、《大 省猶審也。 爲情者無 文采,謂節奏合也。 鄭氏曰:「生氣 不中節,此中和 以樂舞 陳 廣,謂 氏 澔 以象 教 教 曰 增習 禮 生 國 國

發見於外矣。於是宫君、商臣、角民、徵 密,道人心五常之行,使剛氣不至於怒, 其陽之動而不至於散,陰之静而不至於 比 之相雜以成文采也。 若十三舞《勺》,成童舞《象》之類,是也。 學之政,大胥掌學士之版,是也。立之等, 之教以化民成俗也。 事、羽物皆安其位而不相奪倫,然後推樂 柔,四者各得其中而和暢焉,則交於中而 柔氣不至於懾。 厚」之厚。以繩德厚,謂檢約其固有之善, 采,省察其音曲,使五聲相和相應,若五色 廣其節奏者,增益學者之所習也。 仁、義、禮、智、信之德也。 氣之和, 而使之成德也。 ,以次序聯合之也。 宫音至大,羽音至 造化 絪緼之妙 天地之陰陽,人心之剛 律,以法度整齊之也。 立之學,若樂師掌國 厚,如《書》『惟民生 也。 合生氣之和,使 五常之行 省其文

是言,而記者引以爲證。」
起曰:『樂之所觀,其義深奥矣。』蓋古有之所行也。人倫之理,皆可於樂而見之,之所行也。人倫之理,皆可於樂而見之,以之使各得其序,以此法象而寓其事小,律之使各得其稱,始於黄鐘,終於仲

豉反。 平和之德。 石經「滅」上無「而」字。 本,廣則容姦,狹則思欲,感條暢之氣,而滅 而不莊,樂而不安,慢易以犯節,流 生物不遂,世亂則禮慝而樂淫。 土敝則草木不長,水 湎,綿鮮反。 是以君子賤之也。 和,胡卧反。」〇今按: 煩則 魚鼈 不大, 《釋文》:「易,以 是故其聲哀 和,當讀平聲。 湎 氣 以 衰則 忘

暢之善氣,使失其所。」 孔氏曰:「土衰緩也。狹,謂聲急也。感,動也。動人條鄭氏曰:「遂猶成也。慝,穢也。廣,謂聲

禮記卷三十七終

其節奏狹,狹則迫切而思嗜欲。感條暢之 故其節奏廣,廣則寬博而容姦邪,犯節故 故慢易以犯節,不安故流湎以忘本,忘本 過,故其聲嘽諧、慢易,太緩而不安。 過,故其聲纖微、噍殺,太急而不莊。 得其理而後和,禮既慝則樂亦淫矣。 條,遠也。暢,舒也。感條暢之氣,謂感動 此以上三事喻下一事也。 亂,上下無序,男女無别,故禮慝而樂淫。 敝,故草木不長。水煩擾,故魚鼈不大。 無以道五常之行。 氣,則無以合生氣之和。 人心長遠舒暢之善氣也。」 陰陽之氣衰,故生物不得遂成。 右《樂言》篇第五。《史記正義》作「言樂」。 此皆淫樂之害也。 滅平和之德,則 感,感動 愚謂: 世道衰 不莊 樂之 哀之 萬物 也。

禮記卷三十八

賜 國 史 進 館 士 纂 及 第 脩 孫 翰 希旦 林 院 |集解 編 脩

樂記第十九之二

興焉。 焉。 物之理各以 凡姦聲感人而 作 是 者 相 孔氏曰:「姦聲感動於人,而逆氣來應,二 合而 也。 相 正聲感人而 也。 倡 正 聲感人,是倡也。 成象,和 而 和 類相動 聲 成 有 感 逆氣應之,逆氣成象而 (象,淫樂遂興,紂作 應 動 順氣應之,順氣成象而 , 回 樂遂興,若周室太平,頌聲 也。 於人,而順 邪 《釋文》:「分,扶問反。」 曲直各歸其分, 氣應之,是和也。 氣來應,二者 靡靡之樂 淫 樂興 而 和 樂 萬

> 心 慢、邪辟之氣不設於身體,使耳、 聲、亂色不留聰明,淫樂、慝 是故君子反情以和其志,比類以 知、百體皆由順正以行其義。《釋文》:「其行 也。」 善 惡歸惡分,是萬物之情理各以類自相感動 曲之與直,各歸其善惡之分限,善歸善分, 回 謂 倡 辟,匹亦反。知,音智。」○石經淫樂作「淫聲」。 則 乖違。 善 愚 謂:姦聲、正聲,皆謂 和 邪,謂 惡 倡 則 邪 惡 僻 和 禮 乖 是 不 違、邪僻,及 倡 成其行,姦 接 目、鼻、口 人聲 心術,惰 和 有 也。

下孟反。 其志 情懼其流也,反之則所發者不過其 其存於中者也。 其接於外者也。 心、脩身之事也。 去其惡而從其善,則其行成矣。 和 矣。 行懼其失也,比擬善惡之類 惰慢之氣自内出 淫樂、慝禮 姦聲、亂色不留聰明, 不 接 此二者正 心 邪辟之 (節, 而 祈 防

小大之體莫不順而不逆,正而不邪,而所其養矣。君子之反情、比類如此,故能使氣自外人,而皆不設於身體,則内外皆得

羽旄,從以簫管,奮至德之光,動四氣之和,然後發以聲音,而文以琴瑟,動以干戚,飾以不皆合於義也。此言聖人作樂之本也。

以著萬物之理。《釋文》:「著,張慮反。」

之和 和 皆堂下之樂也。 干戚武舞,故言「動」。 以琴瑟合於歌詠而文飾之,堂上之樂也。 歌《清廟》,發德也」,是也。 發以聲音,謂升歌也。《仲尼燕居》云「升 光輝,樂以象之,而至德之光奮矣。 飾」。 ,於樂,而萬物之理著矣。 四四 矣。 從,隨也。 [時之和氣也,樂以合之,而 親 疏、貴賤、男女、長幼之理皆形 聖人之至德著於外而 簫管輕,故言「從」。 羽旄文舞,故言 文以琴瑟,謂 四 四 氣 此 Ž 氣 有

百度得數而有常,小大相成,終始相生,倡和象風雨,五色成文而不亂,八風從律而不姦,是故清明象天,廣大象地,終始象四時,周還

清濁,迭相爲經。《釋文》:「還,音旋。」

東北 聲相生 南 絲音生於 音生於震 曰 八風者,八方之風:東方曰明庶風,東南 不亂者、君、臣、民、事、物之各安其位也。 之有序。周還,言其循環而不窮。樂以 季札言地之「無不載」也。 清明,言其聲之無所淆雜 日 皦如」也。 .間 清明風,南方曰景風 金音生於兑 闔 方曰條風。樂之八音,應乎八風:竹 風 而成音節,猶五 ,西北曰不周風,北 離 圃 屬 廣大,言其體之無不包載,猶 而屬 東,木音生於巽而 而 南,土音生於坤 屬 西,石音生於乾 西西 色相次 終始,言其先 ,猶《論語》之言 南 方曰 曰 凉風 丽 屬東南 廣莫風 成文章 而 一,西方 屬 而 西 Ŧ. 後

爲 爲 然相 中吕 也。 曰 : 常數 至於羽之四十八絲,黄鐘之九寸,以至於 百 屬 西 制。」是聲雖 應鐘之四寸二十七分寸之二十,莫不得其 氣,克諧 東 常法,所 和 度得數而 北 北。 也。 律 生而不相廢也。 , 革 ,五音始於宫,終於角,雖有終有始, 終始相生者,十二律始於黄鐘,終於 琴瑟尚宫,鐘尚羽,石尚角,匏竹利 .或倡 短 音生於坎 圃 者 從律而不姦,謂 宫聲最大,羽聲最小。 謂 無 有大 爲 或和,或濁或清,更迭用之以 有常者,若宫之八十一絲,以 奪倫 ·旋相爲宫」也 (濁,長者爲清。 有小,然相 行而屬 也。 先發者爲倡,後應者 北,匏音生於 百 八音 度,言其多 成 而 經,常也。 應八風之 《國 不 相 艮 語》 也。 戾 丽

道,則惑而不樂。

得其欲。 故曰:「樂者,樂也。」君子樂得其道,小人樂 倫 類清美也。 而言之也。 而言之也。 ··, 類 也。 以道制欲 樂行倫清,言樂達於天下, 耳目 移風 「聰明' 易俗、天下皆寧、 則樂 血 而 氣 不 和平,就 亂。 以 合 欲 而 世 身 倫

鄭氏 子、小人所樂不同。 也 起 以道制欲之事,故能使人各得其所樂,以 不足以爲樂矣。 樂得其欲,而至於忘道 自制其欲,故得其所樂而不至於亂。 下 文之所言也 曰:「道, 愚謂:樂者,人之所歡 謂仁 言此以明先王之作樂,正 君子樂得其道, 義 一則適 也。 足以 繁也 欲, 謂 爲惑 小人 邪 丽 然 能 丽 君 僻

行而民鄉方,可以觀德矣。《釋文》:「鄉,許是故君子反情以和其志,廣樂以成其教,樂

故樂行而倫清

耳

自

聰明,血氣和平,移風易

,天下皆寧。

己之德以教人也。 文。〇右第一章,言聖人之作樂,皆本於 第三節「樂行倫清」之義。 此一節,總結上 教、結次節之義。方、道也。民知鄉方、結 以成其行」者,省文可知也。 反情以和其志,結首節之義。 廣樂以 不言「比類 成 其

聲也。 文》:「詩言其志,一本無『言』字。」 順 器從之。 絲、竹,樂之器也。 德者,性之端也。 積 中, 舞,動其容也。 而英華發外,唯樂不可以爲僞。《釋 是故情深而文明,氣盛而化神,和 樂者,德之華也。 詩,言其志也。 三者本於心,然後樂 歌,詠其 金、石、

見,而象之爲樂。 端,猶《孟子》言「四端」之端。 而發而爲德。 無 以 成樂。 德者,性之端緒也。 金、石、絲、竹、樂之器也。 樂者,德之光華也。 性在於中, 德不可 非

禮記卷三十八

僞。 也。 也。 也。 暢。 言德爲作樂之本也。 通乎鬼神,窮高遠,測深厚,而 八風從律而不姦也。 哀樂之中節。 者,而後樂器從而播之。 則在乎心之德也。 詩 也,歌也,舞也,三者合而爲樂,而 文明而: 文明者,文采著明,五色成文而不亂 〇右第二章,承上章「可以觀德」,而 有是德 情深而 氣盛者,德也,和順之積 !然後有是樂,故樂不可以 化神者,樂也,英華之發 氣盛者,謂陰陽剛柔之交 德具於心,發 化神者,行乎陰陽, 情深者,謂 無所不至 丽 外者 穴中者 喜怒 其 爲三 爲 本

其飾。 隱,獨樂其志,不厭其道,備舉其道,不 以著往,復亂以飭歸,奮疾而不拔,極幽 奏、聲之飾也。君子動其本,樂其象,然後治 樂者,心之動也。聲者,樂之象也。 是故先鼓以警戒,三步以見方,再始 文采節 私其 而

反。 欲。 拔,步葛反,又皮八反。獨樂,皇音洛,庾音岳。 好善,小人以 大焉。」《釋文》:「見,賢遍反。 以聽過,本或作「以聖過」,如字。」 是故情見 \聽過 而 義 <u>Ż</u>, 故曰:「生民之道,樂爲 樂終 著,張慮反。復,音伏。 而德尊, 君 好,呼報 子 以

成而 三事。 也。 之象也。 折則太質素,故以文采節奏而飾之使美 形象也。 象也者,樂本無體,由聲而 曰:「樂者,心之動也者,心動而見聲,聲 必先三舉足,以見其舞之漸也。」 作樂,先擊鼓以警戒衆也。 鄭氏曰:「文采,樂之威儀也。 ,以明此三者之義。」 爲樂,樂由 動 自此 其 文采節奏,聲之飾也者,聲無曲 治其飾,則亦聲之飾也。 本,則心之動也。 以下,記者引周之《大武》之 心 動 而成也。 愚謂: 先鼓以警 見,是聲爲樂之 三步,謂將舞, 樂其 聲者,樂之 先鼓,謂將 象,則樂 此結上 孔氏

之被於民也。此則周、召之治,以文止武 其道者,樂其德之備 之情,而著見而不隱也。 病不得衆,恐不 欲及時事,有奮發迅速之象,而不至於大 欲之事。 深、《大武》之樂,唱歎淫液,以發明其幽 疾而失其節也。 急疾也。 其歸,所謂「六成復綴以崇天子」也。 者,舞者之終,從末表復於第一表,以 成之初,又再始舉足,以著其所往,所謂 之初作,先三舉足,以示其所往之方,所謂 所謂「備戒之已久」也。 三步以 戒者、《大武》將舞之先,擊鼓以警戒其衆, 再成而滅商」也。 「始而北出」也。 再始以著往者,舞者於二 奮疾 備舉其道,不私其欲 而 逮事,臨事 極幽 不拔者,武舞發揚蹈 亂,終也。 於己也。 而不隱者,言武王之 獨樂其志,不厭 而懼,情意 欲,謂 復亂以 者,廣其化 見方者,舞 可 飭 厲 願 幽

尊也。 之過。 幽」爲歌者,其義亦爲未安耳。 於張覇僞《泰誓》之説而不可信,而以「極 之,其説是也。 疏自「先鼓以警戒」以下,皆以《大武》言 之情見, 章,又言樂所以 王除喪,觀兵孟津,二年乃復伐紂」,則出 Ш 周 道四達也。 (成復綴以崇天子,而見武 「故曰」以下,又引古語以 君子樂得其道,故聽之而 小人樂得其欲,故聽之而 圃 弔 伐 惟其解「再始著往」,謂 爲德之象也 乙之義 情見而 立 也 義立者,武王 樂 成 宝生其好 結之。 王之德 〇右第三 知其情 而 一愛民 德 武武 注 之 欲 善 尊

也。 樂也者,施 生,而禮反其所自始。 也。」 《釋文》:「施,始豉反。」〇石經無「而」字。 氏 曰:「言樂出 孔 也。 ,氏曰 禮也者,報也。 :「言作樂之時,衆庶 而不反,而 樂章德,禮報情、反始 樂,樂其 禮 有 皆 往 所自 聽 來

樂是 禮有報 禮 初 其實一也。」 謂之『報情』,以子孫言之,則謂之『反始』, 孫,子孫則反報其 有恩於己,己則報其情, 先祖既爲始於子 求其報。 稷爲始祖,即追祭后稷,報其王業之由,是 者,王者制禮,追反其所自始。 施處立名,無報反之義也。 樂、歡樂其己之所由生。 自生者,又廣明上『樂者,施也』,言王者作 往來,受人禮 之,而無反報之意,但有恩施 由武功而生王業,即以《武》爲樂名, 始有 反其所自始,亦如樂由中出,禮自外 和 這 也。 氣 意 禮報情、反始者,言行禮者,他 中間直出 樂章德者,樂是章明其德,不 思,外面 事,必當報之也。 朱子曰:「樂,樂其所自生, (初始。 ,無所待於外。 一却做 若武王,民樂其 以人意言之,則 一箇節 禮反其所 而已。 樂,樂 若周 禮却是 文抵當 由 禮 自始 以受 其 尚 所

〇六八

與『樂其所自生』,用字不同耳。」
與『樂其所自生』,用字不同耳。」
,
明自成。』説得亦好,只是『樂其所自成』,
外,便是章著其内之意。● 横渠説:『樂則
外,便是章著其内之意。● 横渠説:『樂則
撰,因他本有這意思。故下文云『樂章德,
撰,因他本有這意思。故下文云『樂章德,

作「旒」,音流。緣,悦絹反。」
牛羊之群,則所以贈諸侯也。《釋文》:「流,本又之旌也。青黑緣者,天子之寶龜也。從之以所謂大輅者,天子之車也。龍旂九旒,天子

禮。」 報。 也 鄭氏曰:「贈諸侯、謂來朝將去、報之以 樂施,以樂施之恩,其事易知,記者略之 來朝天子,天子以此等之物報之。 此 大輅,謂上公及同姓侯伯則金輅,異 明禮報之事。 孔氏曰:「前明樂者爲施,禮者爲 諸侯奉其土 不覆 地 所 明 有

> 也。 闕文耳。 牛羊,非一也。」 上文似不相蒙,疑係他篇錯簡,否則或有 非爲之也。 千歲之龜青髯。」則龜之緣乃其本質自然 青純」,何休云:「純,緣也。 羊之群者,天子既與大輅之屬,又隨從以 寶龜之甲,並以青黑爲之緣也。 若侯、伯則七旒,子男則五旒。 總謂之大輅也。 姓象路,四衛革輅,蕃國木輅,受於天子, 孔氏以此合於上章,今考其文義,與 〇右第四章 牛羊之群,饔餼所陳之牲牢 龍旂九旒,據上公言之, 愚謂:《公羊傳》曰「龜 謂緣甲頗也 青黑緣者, 從之以牛

右《樂象》篇第六。《史記・樂書》移「樂也者,施

也」以下於《樂施》章之末。

樂也者,情之不可變者也。禮也者,理之不

❶ 「意」,四庫本《朱子語類》作「德」。

可易者也。樂統同,禮辨異。禮樂之説,管

乎人情矣。

禮矣。 也。 以 是 易」,若其可易,則非理之當,而不足以 禮、樂以統同、辨異,則懽然有恩以 有所分别,故辨異。 可變,則非情之和,而不足以爲樂矣。 本乎中節之情,故曰「情之不可變」,若其 鄭氏曰:「統同,同合和也。 粲然有文以相别,天下之人情,皆管攝於 由外作,而合乎萬事之理,故曰「理之不 治人情也 而不能外也。 管猶包裹。」● 情欲其無所乖戾,故統同。 ○右第一章,言禮、樂可 人情萬變不窮,然有 愚謂: 樂由 辨異,異尊卑 中出,而 理貴 相 愛, 禮 乎 爲 可

神,而凝是精粗之體,領父子君臣之節。《釋禮樂偩天地之情,達神明之德,降興上下之窮本知變,樂之情也。著誠去僞,禮之經也。

文》:「去,起吕反。偩,音負。」

必簡, 出也。 言。 禮之經。天地之情,以其發見者言。 偩天 著誠去僞則本立,而其文由之而出,故爲 静,性術之變」也。 樂本心而起也。 鄭氏曰:「偩,猶依象也。 與天地同其用也。 地之情者、言依象天地之情,同 丽 神,言禮樂用之祭祀,可以感格鬼神,若 知其發爲聲音動静之變,則情之發皆中節 領,猶理治也。」 無不和,故爲樂之情。 達神明之德,言通於神明之德,必易 而與天地同其體 凝,成也。 變,即後篇所謂「聲音 愚謂: 極其和順之本於心,而 精粗,謂萬物大小也。 神明之德,以其存主者 也。 窮,極 禮以忠信爲本, 降,下也。 降興上下之 也。 .和同 本,謂 興猶 節 動 而

「裹」、《禮記注疏》、《集説》并作「也」。

0

尅彼。 夜之循環,陰陽之闔闢,周流貫通 之,則樂只是一箇周流底物,禮則 於禮樂之中也。 領,猶統會也。 道與器合,而精粗之體皆凝聚 凝 相 對,著誠與去僞也。 是樂之本。樂之本,便是禮之誠。 而 有向背明 ·對說。」 上之道。 如《中庸》「至道不凝」之凝。 禮》言「天神 樂則相生相長,其變無窮。 ·暗,所以《樂記》内外、同異,只管 粗者 言君臣父子之節,皆統 皆降, 〇朱子曰:「禮之誠,便 ,形而下之器。 禮則 地 相 祇皆 刑 相 出 於是 精者 一, 而 禮樂者, 尅 若細分 樂如 兩 是 禮 以 箇 也。 , 形 也 則 書 會 此 相

伏,毛者孕鬻,胎生者不殰,而 區 是故大人舉禮樂,則天地將爲昭焉。 合,陰陽 一萌達,羽翼 相 得,煦 奮 角觡 **嫗覆育萬物,然後** 生 · 螫 一蟲 卵生者不殈 昭 蘇 ,羽者嫗 草木茂 天地

> **殈,呼闃反,范音溢,徐况逼反,一音况狄反。」** 古伯反。伏,扶又反。鬻,音育,徐又扶袁反。殰,音獨。甫反。區,依注音句,古侯反,徐丘于反,一音烏侯反。觡,一讀依字音欣。煦,許具反,徐況甫反。嫗,於具反,徐於則樂之道歸焉耳。《釋文》:「訢,依注音熹,許其反,則樂之道歸焉耳。《釋文》:「訢,依注音熹,許其反,

是陰陽 之,天煦覆 也。 者、謂走獸之屬悉皆生養也。 翼奮者,謂飛鳥之屬皆得奮動 故云『茂』。 謂之天地,言氣謂之陰 人語有殈者。」 也。 體 鄭氏 氣蒸 曰 鬻,生也。 曰: 蟄蟲以發出爲曉,更息 嫗。 相 動,天氣 「訢讀爲熹,熹猶蒸也。 ·得也。 屈 而地嫗育也。 區萌據其新生,故云『達』。 生 内敗曰 孔氏曰:「天地訢合、言 曰 下降 天以氣煦之, 區 ',地氣 一, 無 殰。 陽。 草木據其成 鰓 殈,裂也,今齊 上升也。 天地 曰 日 也。 蘇。 觡 地 鳌 動作,則 氣 蟲 以 角 孕 昭 日 言體 昭 觡 形 ', 任 體 煦 蘇 羽 嫗 曉 生

伏,謂 第二章,言禮樂之功,非徒可以治人情,而 也。」 體 孕鬻,謂走獸之屬以氣孕鬻而繁息也。 者,言蟄伏之蟲皆得昭 此聖人致中和 和 造化自然之功用,然非聖人作樂以感召 道使然,故云『樂之道歸焉耳』。 不殈裂也。 有不得遂其 生者不殰,謂不殰敗也。 可 而生,人心調和,故樂音純善,協律吕之 氣 調調 以 徧 ,則天地之氣且不免於乖診,而 飛 陰陽之氣,二氣既調,故萬物 愚謂:二氣絪緼 及乎天地之間也 鳥 之屬皆得 所以 生矣,故以 而位天育物之效也。 致此諸物各順 體 伏 曉蘇息也。 此爲樂之道歸焉。 而發育萬物者,固 卵生者不殈 丽 生子也。 其性,由樂 樂由 羽者嫗 〇右 萬物 得 毛者 人心 言 胎 其 所

敷。上,如字,或時掌反。行,下孟反。」

節也,故童者舞之。鋪筵席,陳尊俎,列籩樂者,非謂黄鐘、大吕、弦歌、干揚也,樂之末

人。 後可 成而後。是故先王有上有下,有先有後,然 之。 宗廟之禮,故後尸。 豆,以升降爲禮者,禮之末節 樂師辨乎聲詩,故北 以有制於天下也。《釋文》: 是故德成而上,藝成而下,行成而先,事 商祝 面 辨 而 乎喪禮,故 弦。 也,故有 鋪 , 普胡反, 又音 宗祝 司掌 後 辨 主 平

但 以爲 也。 行,三行也。 此言知本者尊,知末者卑。 也。 鄭氏曰:「言禮樂之本,在人君也。● 窮本知變,禮本著誠去僞。 知樂之末節,故北 後,謂位 治法。」 弦,謂鼓琴瑟也。 在下也。 藝,才技也。 孔氏 7日:「 面而鼓弦。 後尸,居後贊禮 尊卑備 樂 先,謂位在上 辨猶 師 德,三德也 ",乃可 辨 宗,謂宗 曉聲詩, 别 也,正 制作 儀

^{● 「}在」、《禮記注疏》作「由」。

子也。 戚也。 夏祝。 皆使商祝,設奠,皆使夏祝。 成 則德成矣。 皆言其位處卑也。 祝者,但 相之禮,故在尸後。 禮》之喪祝,習商禮者爲商祝,習夏禮者爲 弦也。《士喪禮》有商祝、夏祝。 祭祀登歌。」北 師》:「大祭祀, 也,事成則役於事者爾。本末具舉,精粗 藝也,藝成則局於藝者爾。 貫,然後 則 藝成 祝 干、揚,皆舞者之所執。 樂師、大師、小師也。 此獨言「商祝」者,以其主襲、斂之 一辨曉 矣。」 大祝。 可 在身謂之藝,所爲謂之事,事 以 死 面 帥瞽登歌。」《 制 喪 |而弦 輔 宗、祝 禮 德在内而 擯相之禮 氏 作 商祝,謂習商禮 謂 廣 .樂。] 但 在堂上北 曰:「德成,非遺 辨曉於宗 蓋二祝皆《周 行成 行在外,行成 , 故後主 矛 《周禮 童者 愚 師》: 凡襲、斂, 了, 非 謂 面 · 大 一大 廢事 謂國 廟 而 而鼓 爲 詔

得其本也。○右第三章,言禮樂貴也。藝,六藝也。○右第三章,言禮樂貴事,與主人相隨也。德,六德也。行,六行

在《樂化》篇第七。《史記·樂書》第四。 在《樂化》篇第七。《史記·樂書》第四。 在《樂化》篇第七。《史記·樂書》第四。 在《樂化》篇第七。《史記·樂書》第四。

服皆用

Œ

幅

门, 故

曰「端」。

古樂用於祭祀

道古,脩身及家,平均天下,此古樂之發也 武,治亂 廣,弦匏笙簧,會守拊鼓,始奏以文,復亂 子夏對曰:「今夫古樂,進旅 以 相,訊 疾以雅。 君子 退 於是語 旅, 和 1,於是 正 以 以

復,音伏。相,息亮反,徐思章反。訊,音信。」《釋文》:「夫,音扶,下同。廣,如字,舊古曠反。拊,音撫。

也。 武,謂 慤 也。 兩 口 舞畢,擊金鐃而退。 《周禮•笙師》 『掌春 狀如漆筩,中有椎。」 者,以韋爲之,裝之以穅,穅一名相,因以 職》曰:『大祭祀,帥瞽登歌,令奏擊拊。 鄭氏曰:「旅猶俱也。 牘、應、雅」,鄭司農云: 『雅狀如漆筩而 名焉。今齊人或謂穅爲相。 下管播 也 紐疏 ,大二圍,長五尺六寸,以羊 曰:「語,即《大司樂》所謂 始奏樂之時,先擊鼓也。 言衆皆待擊鼓乃作。 金 畫。」並 和 樂器,令奏鼓 也。 正 以 相,即 立以漢 廣,無姦聲也。 い時 拊也,亦以節樂。 制 孔氏曰:「文,謂鼓 俱進俱退,言其齊 **朄。**』文,謂 鼓 度而. 《周禮 知。 武,金鐃也。 雅,亦樂器, 會,合也,皆 『樂語』也。 幸 鞔之,有 · 大師 方氏 也。 拊 弇

拊,則凡令歌皆先擊拊,合舞之時,堂上 《大武》以象武功也。 《大師》登歌,先擊拊以令之,是堂上之樂 之亂。」彼謂合樂爲亂,此謂合舞爲 亂,樂之終也。 謂樂始作之時,升歌《清廟》以明文德也 是堂下之樂必待鼓而後作也。 必待拊而後作也。下管,先鼓朄以令之, 葉,所以鼓 正治合舞之時,擊拊以令之也。 合樂、合舞皆在樂之終也。 笙,以匏爲體,而植管於其中。 簧,管中金 謂琴瑟,堂上之樂也。 進旅退者,舞也。 者,言古以剴今」,蓋謂是矣。」 道古,道古之事。 動 加 復亂以武,謂樂終合舞,舞 出聲者也。 和正 鄭氏釋《大司樂》曰 《論語》曰:「《關 以廣者、聲也。 笙,堂下之樂也。 治亂 守猶待也 始奏以文 愚謂: 以相 登歌 亂。 謂 弦, 雎》 道 亦 蓋

歌詩以合之,故擊拊以令之也。

訊

猶

〇七四

時,狀如獼猴,間雜男子婦人,言似獼猴男 時,及有俳優雜戲,侏儒短小之人,舞 也。 貪溺,不可禁止,不能始奏以文,復亂 及優、侏儒,獶雜子女者,言作樂之 頻戲之 以

有父子尊卑之禮也。樂終不可以道古者 女無别也。不知父子,言樂之雜亂,不知 言作樂既終,盡皆邪僻,不可以 追道於古

異矣。 也。」 而又有俳優、侏儒之戲,雜男女, 愚謂:進俯退俯,則 與進 退齊一者

其 與和 亂 聲之失如此 尊卑,蓋其舞之失 正 以廣者異矣。 如此。 而又沈溺而不止,蓋 姦聲 以 濫 一,則

卑。」 獼猴 竊 也。 也。 溺 孔氏曰:「新樂者,謂今世所作淫 言 而 舞 不止,聲淫亂,無以治之。 者 如 獼 猴 戲,亂男女之尊

字亦作「猱」。」○鄭注:「獶,或爲「優」。」

鄭氏曰:「俯猶曲也,言不齊一也。

濫,濫

文》:「俯,本又作「府」。侏,音朱。 傳,音儒。 獶,乃刀反,

及優、侏儒,獶雜子女,不知父子。

樂終,不

今夫新樂,進俯退俯,姦聲以濫,溺而不止,

也。」蓋合語之事,與樂相成,故并言之。

也。

《文王世子》曰:「既歌

而語,以成之

説父子、君臣、長幼之道,并道古昔之事

語

,謂樂終合語也。

道古者,合語之時,論

以上三句,承「和正

以

節之,所謂

奮

疾而不拔」也。

也

訊

族以

雅

可以語,不可以道古。

此新樂之發也。

⁰ 「止」、《禮 記 注疏》作「正」。

近」之近,徐如字。」與音相近而不同。」《釋文》:「好,呼報反。近,「附與音相近而不同。」《釋文》:「好,呼報反。近,「附今君之所問者樂也,所好者音也。夫樂者,

聲亂,是不同也。」 樂與音相近也。樂則德正聲和,音則心邪 「古樂有音聲律呂,今樂亦有音聲律呂,是 一之類皆爲音,應律乃爲樂。」 孔氏曰: 之類皆爲音,應律乃爲樂。」 孔氏曰:

天地 作而無妖祥,此之謂大當。然後聖人作爲父 子君臣以爲紀綱,紀綱既正,天下大定,天下 文侯曰:「敢問 既受帝 此大邦,克順 德音,其德克明。 此之謂德音,德音之謂樂。《詩》云:『莫其 大定,然後正六律,和五聲,弦歌《詩》、《頌》。 順而四時當,民有德而五穀昌,疾 祉 施施 克 于 何如?」子夏對 俾。 孫子。」此之謂也。 克明克類,克長克君。王 俾 于文王,其 曰:「夫古者 (德靡 《釋文》: 疢 悔 不

反。」○今按:二「俾」字皆當作「比」,上音必履反,下音毗此,于放反。❶ 俾,依注音比,必履反,徐扶志反。施,以豉「當,丁浪反。疢,敕覲反。莫,亡伯反。長,竹丈反。王

志反。

應和 疾疢。 也。」 教 鄭氏曰:「此有德之音,所謂樂也。 言『亳有祥』。」 人有敘,昆弟有親, 爲妻綱。 嘉》云:『三綱,謂君爲臣綱,父爲子綱,夫 曰 曰 比。 順。 誨 不倦 曰 物各得其所,故無妖祥。 莫,照臨 施,延也。」 俾當爲『比』,聲之誤也。 陳氏 六紀,謂諸父有善,諸舅有義,族 曰長,慶賞刑威曰 澔 四方曰明,勤 日: 愚謂: 師 孔氏曰:「《禮緯含文 祥 長 時 亦妖 有尊,朋 和 1君,慈 施 年豐、故民無 也。 無私 擇善從 大當,言 含書 友有 和 日 德正 徧 序 \tilde{z} 服

❶ 「放」、《釋文》作「況」。

子也。 音也。 義也。 《詩》,謂《風》、《雅》也。 天 後 條 君 養 德尤無所悔,故能受上帝之福,而延及孫 之德也。 正,天下大定,則禮達於天下矣。 民之事 地之間 制樂,周子 理之詳,綱 臣以爲紀綱 《詩》自「克順克比」以上,皆言王 引《詩》以 比于,至于也。 也 無 不 以 ,制禮以教民也。紀以 既養,然後教之,作爲 得 所謂「禮先而樂後」也。 總其 其 證德音之説,斷章之 當 禮節之大。 也。 德音,謂道德之聲 至于文王,而 此 以 上 禮 言 紀 達然 治其 綱 父子 聖 其 季 既 人

祀弗用也。《釋文》:「燕,於見反。趨,音促。數音速。喬志。此四者,皆淫於色而害於德,是以祭志,宋音燕女溺志,衛音趨數煩志,齊音敖辟溺音何從出也?」子夏對曰:「鄭音好濫淫今君之所好者,其溺音乎。」文侯曰:「敢問

r喬1。l 敖,字又作『傲』,同吾告反。辟,匹亦反。喬,音驕,本或作

誤也。 鄭氏 也。」 更有促速,齊音亦女色之外,加 又此四者皆淫於色,而經唯云『衛音趨數 樂音好濫 氏曰:「濫,竊也,謂男女相 煩志,齊音敖辟驕志」者,衛音淫泆之外, 竊,燕女,燕安己之妻妾而已,所以别也。 志驕逸也。 使人意志煩勞也。 女子,使人意志没溺也。 也,即前『溺而不止』是也。 姦聲也。 而爲别音者。 日 煩,勞也。祭祀者不用淫樂。」 愚謂:淫志者,樂音好濫 「言四國皆出此 相 燕,安也。 鄭音好濫,宋音燕女,其 偷 竊,是淫邪之志也。 濫竊,非己儔匹,别相 齊音敖狠辟 趨數,讀爲促速 溺音。 衛音既促又速, 言宋音所安唯 偷竊。 越,使人意 濫 一,則 以 言鄭國 溺,没 濫 ,聲之 敖辟 有淫 争是 竊 孔 淫

邪之志,聽之亦能生人淫邪之志也。下三 先儒皆以《鄭詩》爲鄭聲,然此言 列 列於三百篇之中,而初未嘗用也,亦豈相 其詩則美者同用於雅樂,而其淫者則 鄭、衛哉? 皆用於樂,而不妨與其用者並列也,何獨 而二之,則鄭、衛之聲自爲當時之俗樂,而 無以處《淇澳》、《緇衣》等篇,若離詩與聲 露》等篇,《豳風》則自《東山》以下,亦未必 變者不用,《二南》則如《野有死 有不用於樂者,如《大、小雅》則正者用 故以淫聲概鄭、衛之《風》,反

者放此。

鏖》、《行

m

之所歌也。若鄭、衛之聲,則别爲當 頌》,並肄於樂官。 是也。周樂十五國之《風》與《南》《雅》《三 國之樂,雖不用於祭祀賓客之正樂,然至 詩,則鄭、衛之聲固不係於其《詩》矣。 溺音有鄭、宋、齊、衛四者,而宋初未嘗有 之雅樂也。三百篇之詩,固有用於樂者的 矣,然如《淇澳》《緇衣》等篇,未嘗不可用 篇用之何等之鬼神,何等之賓客,是固然 俗樂,雖亦必有歌曲,然其所歌,必非十五 禁其淫聲、過聲、凶聲、慢聲。」若十五國之 無算樂皆用之,《周禮》所謂「燕樂」「縵樂」 國風》之詩也。朱子疑《桑中》、《溱洧》等 鄭風》、《衛風》,即鄭、衛之淫聲,周樂豈 蓋《國風》、《雅》、《頌》,皆雅 《大司樂》:「凡建國, 時之 樂 也。 《詩》云:『肅雍和鳴,先祖是聽。』夫肅肅,敬 妨哉。 也。 鄭氏曰:「言古樂敬且和,故無 溺音無所 『肅』『雍』一字,而引之二字者,長言之也。 詩》云『有洸有潰』,毛公傳曰『洸洸,武 雍雍,和也。 潰潰,怒也」,即其例也。」 施。」 夫敬以和,何事 顧氏炎武曰:「《詩》本

當有之?

一〇七七

愚謂:何

雖並

(事而)

不用,

不行

孔易」之意也。事不行者,言無事而不成,以起下文「誘民

《詩》作「牖」。《釋文》:「易,以豉反。」〇按:誘,爲之,上行之則民從之。《詩》云:『誘民孔爲人君者,謹其所好惡而已矣。君好之則臣

大雅·板》之篇。

民無不從,然後作樂以道其和也。《詩・民甚易,故聖人有和敬之德,以之化民而民甚易,故聖人有和敬之德,以之化民而民甚易,故聖人有和敬之德,以之化民而所好惡,進之於善無難。」 愚謂:人君化

「鞉、音桃。 控、苦江反。 揭、苦瞎反。 壎、許袁反。篪、直也、所以示後世有尊卑長幼之序也。《釋文》:成、с、狄以舞之。 此所以祭先王之廟也、所成、定、狄以舞之。 此所以祭先王之廟也、所成、с、狄以舞之。 此所以祭先王之廟也、所然後聖人作爲鞉、鼓、控、楊、壎、篪、此六者、然後聖人作爲鞉、鼓、控、楊、壎、篪,此六者、

或爲「簨虡」。」 支反。和,如字,徐胡卧反。長,丁丈反。」○鄭注:「燻篪

之也。」 楬 旅酬也。 也。戚,斧也。狄,羽也。 聲』,注云:『一聲,無宫商清濁。』是質素 革也。 控、楬,木也。《周語》云『革、木一 鄭氏曰:「六者爲本,以其聲質也。 卿、大夫、士也。樂在宗廟之中,君臣 主人主婦 四器之和,文武之舞,並可於宗廟之中奏 四者祭祀所不用。 又用干、戚、旄、狄以舞動之,鄭、宋、齊、衛 華美之音以贊和之,使文質相雜。干,楯 也。既用質素爲本,然後用鐘、磬、竽、瑟 楬、燻、篪,其聲質素,是道德之音也。 ,謂柷、敔也。」 也。 酳,尸食畢而 愚謂:獻,謂祭祀獻尸 官序貴賤,謂廟 此六者爲道德之音,及 孔氏 酳 曰:「鞉、鼓、椌、 聲既文質備足, 之也。 中助 倬。 酢, 祭之 上下 尸酢 椌、

長幼之理,皆形見於樂,故可以示後世尊若《詩》言「奉璋峩峩,髦士攸宜」也。尊卑同聽之,莫不和敬,故官序貴賤各得其宜,

古曠反。」子聽鐘聲,則思武臣。《釋文》:「號,胡到反。横,子聽鐘聲,則思武臣。《釋文》:「號,胡到反。横,鐘聲鏗,鏗以立號,號以立横,横以立武。 君

卑長幼之序也。

鄭氏 立也。 也,謂 放此 言 愚謂 鐘既含號令立武,故聽之而思武臣也。」 軍 鏗然堅剛,故可以興立號令,號令威嚴,則 鐘 土 |勇敢而壯氣充滿,壯氣充滿則武事 聲堅剛,故 曰:「號,號令所以警衆也。 氣作充滿也。」 鏗以立號,鏗屬聲言,立號屬人言。 君子,謂識樂之情者。 可法之以立號令。下 孔氏曰:「鐘聲鏗 聞聲達事 横,充 可

石聲磬,磬以立辨,辨以致死。君子聽磬聲

外,故聞其聲而思其事也。」 也。辨,謂分明於節義。」 孔氏曰:「石 響輕清,叩之其聲罄罄然分明。辨,别也。 能分辨於節義,則不愛其死。死封疆之臣 能分辨於節義,則不愛其死。死封疆之臣 。辨,謂分明於節義。」 孔氏曰:「石

之聲,則思志義之臣。 終聲哀,哀以立廉,廉以立志。君子聽琴瑟

其志。 怨,有介然不苟之意,故聞之使人立廉隅, 故聞之而思其事。」 立廉隅,不越其分也。不越分,故能自立 謂哀怨。 鄭氏曰:「廉,廉隅 而同於人,哀則其心斂而貞於己。絲聲哀 思志義之臣者,絲聲含志不可犯, 絲聲婉妙,故哀 也。 愚謂: 樂則其意舒 怨。 孔 氏 哀怨,故能 曰:「哀,

廉隅立則志節成矣。

「最」。」○按:濫字,方氏讀如字,今從之。會,户外反,又古外反。畜,敕六反。」○鄭注:「聚,或爲篇管之聲,則思畜聚之臣。《釋文》:「濫,力敢反。」(學濫,濫以立會,會以聚衆。君子聽竽笙

意。」 也。 聚 行之義,故聞之使人立會,謂會聚其 竹兼有也。」 竹聲之中者,笙以 聚之臣者,亦聞其聲而思其 鄭氏曰:「濫之意猶擥聚也。」 竹聲擥然有積聚之意,故能立會。 也。《易》曰:「君子以容民畜衆。」 會聚其民人,則其民無不聚矣。 愚謂: 笙、竽之聲繁會, 方氏 (匏爲 慤曰:「濫,汎濫 體、插竹於匏、匏 事 也。 有汎 孔氏曰: 笙,在 思畜 畜 人民 濫 旁 之 亦

謹,呼端反,又音喧。將,子亮反。帥,本又作「率」,同所類鼓鼙之聲,則思將帥之臣。《釋文》:「鼙,步西反。鼓鼙之聲謹,讙以立動,動以進衆。君子聽

反。」〇鄭注:「讙,或爲「歡」。 動,或爲「勳」。」

能進衆,故聞其聲而思其事也。」作,故能進發其衆也。思將帥之臣者,鼓曰:「鼓鼙之聲讙囂,故使人意動作,以動鄭氏曰:「聞讙囂,則人意動作。」 孔氏

庚反。」
合之也。」《釋文》:「鎗、七羊反、又叱衡反、●徐敕君子之聽音、非聽其鏗鎗而已也、彼亦有所

四方,四維之音,所感皆應,與四方同。 告君矣。 侯之失,而其言婉而不迫如此,亦 何至於聽之而欲倦乎? 聞其聲則思其人。如此則將欣悦之不暇, 子所欲得者賢才也,而樂聲有以合之,故 鄭氏曰:「以聲合成己之志。」 〇孔氏曰:「崔氏云: 蓋子夏以此 『八性 愚謂: 可 規文 謂 屬 水 善 君

❶ 「叱」、《釋文》作「七」。

虚,體例不等,上下混雜,記人之意,不應問,土音屬金。金生水,石不可屬於水,故間,土音屬金。金生水,石不可屬於水,故間,土音屬金。金生水,石不可屬於水,故是土,土不當於方。土生金,土處金火之生土,,執同竹音。木生火,木音同絲。火生木,匏同竹音。木生火,木音同絲。火

心也。

不得其衆也。」《釋文》:「牟,亡侯反。坐,才卧反,又不得其衆也。」《釋文》:「牟,亡侯反。坐,才卧反,又「夫《武》之備戒之已久,何也?」對曰:「病賓牟賈侍坐於孔子,孔子與之言及樂,曰:右《魏文侯》篇第八。《史記·樂書》第九。

如此。

八音唯論五者,以五器有此五事

匏與土、木無此象,故《記》不言。」

也。」 孔氏曰:「賓牟姓,賈名。」 愚衆。病猶憂也。以不得衆心爲憂,憂其難鄭氏曰:「《武》,謂周舞也。備戒,擊鼓警

乃作也。病不得其衆者,憂未能得士衆之作,先擊鼓以戒警其衆,擊鼓甚久,而後舞謂:已,太也。備戒之已久,謂《武》之將

也。」《釋文》:「液音亦。」「咏歎之,淫液之,何也?」對曰:「恐不逮事

矣。恐不逮事者,謂武王恐諸侯後至,不 也。 及用師之事,故致其長吟歎慕之意也。 乃未舞之先所歌也,其戒備之久亦可見 六成,而《左傳》言《武》有七篇,則其首篇 先鼓備戒之時,歌者之聲如此也。《武》舞 舞者在下,歌者在上,而其節奏相應,此謂 謂長言而唱歎。 謂之《武》,蓋奏《大武》之所歌也。 以奏之、《周頌·桓》、《賽》諸篇、《左傳》皆 鄭氏曰:「咏歎、淫液,歌遲之也。 事,戎事也。」 淫液,謂流連而羨慕也。 愚謂:凡舞必歌《詩 逮,及 咏歎.

見矣。 司主以至仁伐不仁,而曰「病不得其衆」, 武王以至仁伐不仁,而曰「病不得其衆」, 武王以至仁伐不仁,而曰「病不得其衆」, 武王以至仁伐不仁,而曰「病不得其衆」, 武王以至仁伐不仁,而曰「病不得其衆」, 武王以至仁伐不仁,而曰「病不得其衆」,

事也。」「發揚蹈厲之已蚤,何也?」對曰:「及時

蚤」。 也。 揚 孔氏曰:「發 故初舞即致其勇決之意也。 已蚤」。 蹈 今《大武》於初作之時 地 而 愚謂:用兵之時,其發揚蹈厲宜 及時事者,言欲及 猛 厲 揚 也 蹈 厲,初舞之時 初 舞 則然,故云『已 己 詩 而 如 , 手 此 行討伐, · 故言 足 發

坐也。」《釋文》:「憲,依注音軒。」「《武》坐,致右憲左,何也?」對曰:「非《武》

《武》坐也 足皆致於地,今乃致其右而軒其左,則非 也。 謂: 之誤 時,舞者之坐致右膝於地,而軒起 鄭氏曰:「致,謂膝 非《武》坐者,《武》亂皆坐,坐則當 也。」 《武》坐致右軒左,謂《武》舞五成之 孔 氏 至 曰:「軒,起 地 也。 憲 讀 也。」 爲軒 其 左 兩 足 愚

若吾子之言,是也。」《釋文》:「葨,直良反。」 之志荒矣。」子曰:「唯。 子曰:「若非《武》音,則何音也?」對 有司失其傳也。 聲淫及商,何也?」對曰:「非《武》音 若非 有司 丘 之聞 失其 諸萇 傳,則武 以弘,亦 曰 : 也。」 王

商,商聲也。商聲主殺伐,此承「《武》坐,其傳,而時人妄説也。」 愚謂:淫,過也。鄭氏曰:「有司,典樂者也。言典樂者失

説也。 伐之聲,則與勝殷遏劉之意異矣。 者,應辭也。吾子之言,謂賈所答五者之 然則武王之志荒亂,而有意於黷武矣。 其傳者,言有司傳授之誤而失其本也。 則戎商已克,偃武脩文之時,而乃過有殺 用兵之時,宜有殺伐之聲,至《武》舞之亂 致右憲左]而 《武》坐之非。此皆誤也。此孔子五問,賈 賈言有三是兩非。以下言「發揚蹈厲,太 也。 孔子應即正之,不應俟賈再問而後告之 言,是也」,是賈所答皆是矣。 五答,而孔子曰「某聞諸萇弘,亦若吾子之 言「《武》亂皆坐,周、召之治」,而謂賈言非 公之志」,而謂賈言「及時事」之非。 是也」者,所以深然賈之言也。○孔疏謂 發揚蹈厲 萇弘,●周大夫。 問,則亦謂《武》亂有此聲也。 固爲欲及時事,而所 既曰「唯」,復曰 若有二非, 有司失 以下 以欲 唯 不

召之治也。此皆因賈言而發其未盡之義,固非致右憲左,而所以皆坐,則所以象周、及時事者,則太公之志也。《武》亂皆坐,

非非之也。

也?」《釋文》:「遲,直詩反,徐直尼反。」已久,則既聞命矣。敢問遲之遲而又久,何賓牟賈起,免席而請曰:「夫《武》之備戒之

鄭氏以遲之遲專指久立於綴,非也。觀下也。賈所言,又自以其所疑者問之也。○ 然而後終,故重言以見其意也。賈既聞孔久而後終,故重言以見其意也。賈既聞孔久而後終,故重言以見其意也。賈既聞孔子是可之方者,舉其始問者以該其餘也。 聞命,謂聞孔子是賈之言

❶ 「弘」,原作「宏」,避諱字,今改正,下同此徑改,不另

而非惟專指一事矣。之,則遲之遲而又久,乃通言一舞之始終,文歷言「《武》舞」,而以「《武》之遲久」結

治,直吏反。」
若知,下「且女」同。大,音泰。召,音邵。志也。《武》亂皆坐,周、召之治也。《釋文》:志也。《武》亂皆坐,周、召之治也。《釋文》:

也。 謂 武王持盾正立待諸侯也。」 鄭氏曰:「居,猶安坐也。 也。 句總包下文之所言,與篇末《武》之遲久, 動,天子威重之容也。大公總率士卒,發 以下,歷言象成之事也。 不亦宜乎」二句相爲首尾。「總干而山立」 象所成之功。 《武》舞初起,武王持盾 總干,持盾也。 「夫樂,象成者也」,此一 山立、猶正立也。 總,持也。干,盾 成,謂已成之事 愚謂:象成, 正立,不震不

> 義也。 《武》 屬者、《武》 舞至五成,而分周公左,召公以文止 在,於此時舞者皆坐,象周公、召公以文止 在、於此時舞者皆坐,象周公、召公以文止 在、於此時舞者皆坐,象周公、召公以文止 。《武》舞至五成,而分周公左,召公 。皆坐,舞者皆

子」屬下「夾振之」爲句、非是。今從王肅讀、「天子」上屬。 綴,丁劣反,又丁衛反,下同。」○按注疏讀「以祟」句絶,「天 右,六成復綴,以崇天子。《釋文》:「夫,音扶 南,四成而南國是疆,五成而分周公左,召公 且夫《武》,始而北出,再成而滅商,三成 成者,舞之一終也。《武》舞爲六表,而東 大會諸侯也。 西之第二表,象武王始出伐紂,至孟 自北而南。始而北出者,自西之第一表至 西列之。其在西者,自南而北,其在東者, 「北出」。再成而滅商者,自西之第二表至 紂都朝歌 在周之東北 ,故曰 津而 而

也。 服於周者也。 迭出 之第一表,象周公、召公既成治功,而歸其 綴,以崇天子者,自東之第三表復歸於西 既定,而周公、召公分陝而治也。 六成 者,自東之第二表至東之第三表,象天 之未服者也。 第一表至東之第二表,象旋師而因定南 國,謂青、兖二州之諸侯,在紂都之南,未 西之第三表,象武王渡河至牧野 綴 之説,謂《武》舞立四表,自南 功於天子,以尊崇之,若《王制》言「考禮 而 正刑、一德,以尊於天子」也。 孔疏用熊氏 南 表,象武王既克商而旋師 推 三成而 之,則熊氏 人,而無立表往反之法。今以六成復 ,以爲六成。 南者,自西之第三表至東之第 四成而南國是疆者,自東之 五成而分周公左、召公右 爲是,但其言唯立四表者, 皇氏則謂六成乃舞者 南 而北,又自 向也。南 丽 克 更 下 復 北 國 商

事蚤濟也。久立於綴,以待諸侯之至也。《釋夾振之而駟伐,盛威於中國也。分夾而進,象成之事。此一節統論一舞之始終也。

文》:「分,扶問反。」

部分也。 刺 伐,謂舞者象牧野之戰,兩司 日: 申言再成滅商之事也。振,謂 卒,又振鐸夾之而使之進也。 武於中國、《書》言「我武惟揚」,是也。 兩旁,振鐸以作之,而士卒以戈矛 每奏四伐,一擊 鄭氏曰:「駟當爲『四』。《武》舞,戰象也。 「今日之事,不過四伐五伐。」」 周禮·大司馬 也。 「司馬振鐸,車徒皆作。」 夾振之而 盛威於中國者,牧野之戰,盛大威 分夾而進,謂舞者象將帥部分士 職》曰:「兩司 一刺爲一伐。《牧誓》曰: `馬夾士卒之 馬 濟,濟河也。 振 振鐸 愚謂:此 四四 、鐸。」又 [度擊 也。 四

王將 言再 也。 丽 事 伐,此乃逆言之。蓋滅商之功,成於四伐, 故先言之,而逆溯以及其前也。 戊午,王次于河 蚤 再成時始立於綴,次乃渡河,次乃四 紅紅也。 濟河時,待諸侯之至而 成將發時,久立於綴 濟 者,言所以分夾 久立於綴,以待諸侯之至者, 朔,群后以 而 而 進 ,欲其急濟河 俱發、《書》言 未即舞,象武 師畢 會」,是

且 祝,封帝舜之後於陳。 未及下車而封黄帝之後於薊,封帝堯之後於 公與周同姓。」按黄帝姓姬,君奭蓋其後也。 庶士倍禄。《釋文》:「反,依注音及。 子之囚,使之行商容而復其位。 於杞,投殷之後於宋,封王子比干之墓,釋箕 薊者滅絶,而更封燕乎? 縣是也,即燕國之都也。 女獨未聞牧野之語乎? 武王克殷反商, 疑不能明也。 孔安國、司馬遷及鄭皆云:『邵 下車而 封夏后氏之後 而皇甫 薊,音計,今涿郡 庶民 或黄帝之後封 謐以邵公 /弛政,

> 《家語》作「使人」。政,當音征。 爲「續」。祝,或爲「鑄」。」○今按:反,如字。使之,當從人也。」鄭云:「商禮樂之官也。」復,音伏。」○鄭注:「薊,或从,之六反。行,下孟反。商容,如字,孔安國云:「殷之賢爲文王庶子,記傳更無所出,又《左傳》富辰之言亦無燕也。

也。 紂時 子視商禮樂之官,賢者所 者微子也,後周公更封 文,故云『商善禮容之官』也。」 容。』是善禮樂者謂之容也。 封。封比干墓,崇賢也。 之辭也。 鄭氏曰: 云:『式商容間。』則商容人名。 「古樂於旅也語,説此樂之義。 〈漢書・儒林傳》云:『孝文時,徐生善爲 |薄者 弛政,去其紂時苛政 時武 「封,謂故 也。」 王封紂子武庚於殷 孔 無 氏 土 7日:「、 地 而大之。 行猶視也。 也。 者也。 處皆令反 容爲禮 倍禄,復其 《武成》篇 牧野之語 鄭不見古 張子曰: 投 墟 積 舉 使箕 所 其 土 樂。 爲 徙 徙 葬不

如禮,故使人加封於其墓,以致尊崇

《左傳》「初,臧宣叔娶於鑄」,杜預云:「今 言,皆其 政、《書》所謂 庚未叛之先,微子行遯未出,武王未得 封微子於宋以繼之,故因謂殷爲宋耳。 謂封紂子武庚於殷墟也。其後武庚被誅, 濟北蛇丘縣,鑄所治也。」投殷之後於宋, 祝,漢之祝阿縣,屬平原。 語《武》也。」 帝、堯、舜之後,所謂三恪也。 封夏、殷之 封其後,故不曰「封」而曰「投」也。 封之也。投猶棄也。商本天子,今以諸侯 事 也。 「反商政,政 愚謂: 薊,漢之薊 反商, 由 祝或爲「鑄」, 「舊」。 縣,屬廣陽。 謂 反 紂之虐 下文所 封黄 武 而

> 之也。 也。 之意也。 其征役以休息之。 《周禮·均人》「掌均地政」之政。 釋箕子之囚,復商容之位。」政讀 商容,商賢臣。 使人,謂使畢公也。 倍禄,厚其禄糈以優養 《史記》云:「使畢公 行, 弛政,弛 爲征,如 謂 行 視

徐其偃反。橐,音羔。」 徐其偃反。橐,音羔。」 徐其偃反。橐,音羔。」 徐其偃反。橐,音羔。」 徐其偃反。橐,音羔。」 徐其偃反。橐,音羔。」 徐其偃反。橐,音羔。」 徐其偃反。橐,音羔。」 徐其偃反。橐,音羔。」

甲之衣曰櫜。鍵櫜,言閉藏兵甲也。《詩》能以武服兵也。建讀爲鍵,字之誤也。兵鎧也。衅,『釁』字也。包干戈以虎皮,明鄭氏曰:「散,放也。桃林在華山旁。甲,

不可卒行,故既下車乃封之也。封比干之

墓者,葬之丘封,貴賤有等,比干以誅死,

故未下車而封之。

封二代之禮重,故封之

後,所謂二代也。 三恪之世遠,求之宜急,

商之非

也

載者, 武也。 物也。 熊氏 氏 也。 人。』《周 天下兵戈也。 曰 攘之祭名也。包之以虎皮者,凡兵甲之 駕重車,馬所 藏器,故知不復用兵也。」 故云『名之曰鍵橐』也。天下見武王放牛 下二節言武王之脩文,又所以深明聲淫及 衣,皆用虎皮爲之,取其威猛之意,《詩》言 及兵戈,悉橐韜之,置於武庫,而鍵閉之, 虎韔鏤膺」,是也。 日 『載橐弓矢。』《春秋傳》曰: 鍵,籥牡也。 云: 『凡載兵之法,皆刃向外。 刃向國,不與常同也。」虎皮,武猛之 倒 虎皮包裹兵器,示武王威猛能 將帥之士使爲諸侯,以報賞其 禮》曰: 載干戈者,倒載 以駕兵車也。 或以虎皮有文,欲見以 『櫜之欲 橐,兵甲之橐也。 此節言武王之偃武, 、 其 約 而 愚謂: 牛所以 衅與釁同,磔 還鎬京 也 垂 今倒 言鎧 文止 包制 櫜 也。 功 孔 而

遥反。」 也。 者,天下之大教 知所以臣。 革之射息 散 反。翳,側由反。 軍 祀乎明堂,而民知孝。 圃 郊射,左射《貍首》,右射《騶虞》,而 也。 耕藉、然後諸 搢,音進。 裨冕 也。 搢笏,而虎賁之士 《釋文》: 賁,音奔。説,吐活反。 侯知所 朝覲,然後諸 「射、食亦反、沈食夜 以 敬。 説 朝,直 五 侯 劍 貫

爲節· 郊。 也。 衣而 也。 鄭氏曰:「郊射,爲射宫於郊也。左,東學 西學,在西郊。天子於西學中習射,歌《騶 於射宫,在郊學之中也。 曰:「此論克商之後脩文教也。 賁,憤怒也。 也。 右,西學也。《貍首》、《騶虞》,所以歌 諸侯射於東學、歌《貍首》詩也。 冠冕也。 貫革,射穿甲革也。 裨衣,衮之屬 耕藉,藉田 左,東學也 也。 也。 裨冕,衣 郊射,射 搢 一,在 孔 右是 猶 東 氏 裨 插

冕,人廟之服也。 别物,但取甲鎧張之而射,唯穿多重爲善, 射,所謂 虞》詩也。貫,穿也。革,甲鎧也。貫革之 《孝經》以爲周公者,以周之禮樂,皆周公 堂而民知孝,謂祀上帝於明堂,而以文王 諸侯還其本國而爲教。」 覲四,耕藉五。 大教者:郊射一,裨冕二,祀乎明堂三,朝 臣之道。王自耕藉田 文,故皆説劍也。 奔走有力,如虎之在軍。説劍者,既並習 此既習禮射於學,故貫革之射止息也。 謂爲『貫革』、《春秋》養由基射七札,是也。 之所贊成也。 配之也。 而知其敬,亦還國而耕也。五者,天下之 軍射也。 祀文王以配上帝,始於武王,而 如追王大王、王季,亦在武 此五者大益於天下,故使 搢笏,插笏也。 軍中不習於儀容,又無 六服更朝,故諸侯知爲 以供粢盛,故諸 愚謂: 祀乎明 虎賁,言 侯見 裨

「孝」,耕藉兼有外神,故言「敬」,其實亦互主於孝,事神主於敬,明堂主於嚴父,故言王時,而《中庸》亦以爲周公之事也。 事先

文爾。

計反。」 也。《釋文》:「食,音嗣。 更,古衡反。 大,音泰。弟,大也。《釋文》:「食,音嗣。 更,古衡反。 大,音泰。弟,大饋,執爵而酳,冕而總干,所以教諸侯之弟食三老、五更於大學,天子袒而割牲,執醬而

「宰夫自東房授醯醬,公設之」,今天子養大學曰東膠。」 孔氏曰:「天子養三老、五更,親袒衣而割牲,親執醬而饋之,親執爵而酳口,親自著冕手執干戚而舞也。此處當爲驚冕。養老,饗、射之類。」 愚處當爲驚冕。養老,饗、射之類。」 愚處當,主人必親置其醬,故《公食大夫禮》於大學也。執醬而饋者,醬為食之主,凡於一學曰東膠。」 孔氏曰:「天子養三老、和野氏曰:「冕而總干,親在舞位也。周名鄭氏曰:「冕而總干,親在舞位也。周名鄭氏曰:「冕而總干,親在舞位也。周名

爵,以供老、更食畢 老 總干。 天子親執爵而酳者,敬老、更之至,與尋常 于稻西。」是公食禮酒漿不親執。今養老, 飲,與其豐以進,賓捝手興受,宰夫設其豐 執豐,進設于豆東。」又云:「宰夫執觶漿 祀之禮,人君袒而割牲,及親在舞位,冕而 舞,所謂「朱干玉戚,以 禮同也。 食禮異也。 教」之上。《韓詩外傳》云:「廢軍而郊射, 朝覲,然後諸 王之不復用兵 左射《貍首》,右射《騶虞》,然後天下知武 飲酒,實于鱓,加于豐。 心亦然也 ,,天子執醬而饋,執爵而酳,所以教諸侯 今養老亦然,尊敬老、更,與祭祀之 此疑當在上節「五者、天下之大 執 冕 侯 爵 也。 而總干,謂服冕而執干以 知 而酳者, 所以敬。 酳 祀乎明堂,而民知孝。 口 舞《大武》」也。 也。 天子親執酒漿之 宰夫右執觶,左 《公食禮》: 坐三老於大 祭

藉也。《韓詩外傳》止言四教者,以不及耕之,則「散軍郊射」,「裨、冕、搚笏」,當屬於上節,與「不復用兵」同爲一事,所以教天下之禮讓也,與教孝、教臣、教敬、教悌而下之禮讓也,與教孝、教臣、教敬、刘悌而

則易、直、子、諒之心油然生矣。易、直、子、君子曰:禮樂不可斯須去身。致樂以治心,

右《賓牟賈》篇第九。《史記・樂書》第十。

若此則周道四達、禮樂交通、則夫《武》之遲

久,不亦宜乎!」《釋文》:「夫,音扶。」

威。《釋文》:「易,以豉反。子、諒,子如字,徐將吏反。」以治心者也。致禮以治躬則莊敬,莊敬則嚴則神。天則不言而信,神則不怒而威,致樂諒之心生則樂,樂則安,安則久,久則天,天

○朱子云:「子、諒,當從《韓詩外傳》作慈、良。」今從之。

其 安於此 也。 之失其莊敬也。 也。 器,有時而離,而禮樂之理,則無時而可 斯須之失其和樂。 則樂矣。 鄭氏曰:「善心生則寡於利欲,寡於利欲 善心也。 不怒而見威如神也。」 和樂者爲樂,其莊 致者,極 久則體 天則: 而 志明行成,不言而見信如天也 樂者,樂於此而不厭也。安者, 不 神 性自然,而 遷 至之謂。致樂以治心者,無 妙不 也。 易、直、慈、良之心,人之 致禮以 ·測,而 久者,久於 敬者 無作爲之勞,故 愚謂: 無擬議之迹,故 治身者,無斯 爲 禮。 人之身心, 此而不息 禮樂之 E 須 去

> 身。 之以樂也。」 者實爲之主,故聖門之教,立之以禮,而成 以和之於中。 於天且神者何也? 秀曰:「禮之治躬,止於嚴威,不若樂之至 故不怒而人自畏。 氣質,消融其渣滓,故禮以順之於外,而樂 曰「神」。 嚴威,言其儀象之接於物。 自然,故不言而人自信。 此表裏交養之功,而養於中 莊敬,言其敬德之具於 樂之於人,能變化其 ○真氏德 不測

斯須,暫時也。此言禮樂之所以不可斯須貌斯須不莊不敬,而易慢之心入之矣。 外心中斯須不和不樂,而鄙詐之心入之矣。外

去也。

顔色而: 焉。 也。 故樂也者,動於内者也。 樂極 故德煇動於内,而民莫不承 弗 和 與 争也,望其 禮極 順,内 容貌 和 禮也者,動於外者 而 外 而 順 民 聽。 則 不 生易慢 民 理 膽 其

煇,音輝。錯,本亦作「措」,同七路反。」而錯之天下無難矣。」《釋文》:「争,「争鬭」之争。外,而民莫不承順。故曰:「致禮樂之道,舉外,而民莫不承順。故曰:「致禮樂之道,舉

文。 之反,其義一也。 禮得其報則樂,樂得其反則安。 銷,樂盈 故禮主其減,樂主其盈。 樂也者,動於内者也。 以 用 樂曰「極和」,而禮不曰「極敬」者,蓋 者自然敬信, 爲外之節文,故曰「發於外」。 之和樂,故曰「動於内」。 章,言人以禮樂治身心,則可 内外互養,而根心生色,睟面盎背,故見之 樂盈 從容不迫者也。 和 爲貴,禮之順即敬之根於心,而 丽 丽 不反 反,以 則 而莫不順聽 《釋文》:「減,胡斬反,又古斬反。 反 放,故禮 德煇見於外,而本乎内 爲文。 禮也者,動於外者也。 禮減 理具於内,而 有報 禮 也。 而進,以進 以 減 禮之報,樂 丽 禮樂交錯 化民也。 〇右第一 而 樂有 不 進 禮 行之 貝 爲 著 之

按"報,如字。報,依注讀曰褒,保毛反。則樂樂,上音洛,下音岳。」〇今

抑止也。 倦略,故銷。 故主其盈。 樂動於内而發於己者,以欣喜歡愛爲和 不能止也。 盈 鄭氏曰: 報者因物而報。 見於節,必至於流宕,故放。 減而不進,則有見於嚴,無見於和,必至 不止,故以反爲美,和而濟之以 爲美,嚴而用之以和也。 而接於人者,以撙節退讓爲敬,故主其減。 其義,知其吉凶之歸。」 進」而下變言「報」者,蓋進者由己而進, ,人所歡也。 「禮主其減,人所倦也。 文猶美也,善也。放,淫於聲 減則恐其煩苦而易倦,故以 報讀曰褒,猶進也。 樂盈而不反,則有見於和 進 言「進」,猶有勉强易倦之 ,謂自勉强 盈則恐其流宕 愚謂: 也。 於禮 節 禮動 得,謂 反,謂 樂 也。 主 於外 無 進 其 於 禮 丽 曉 樂 自

二章,承上章而言禮樂之用,又當有以救財有以止乎其節,故安。樂則不至於銷,其報,則有以達我之情,故樂。樂得其反,其報,則有以達我之情,故樂。樂得其反,其報,則有以達我之情,故樂。樂得其反,

術之變,盡於此矣。 於聲音,形於動静,人之道也。聲音動静,性夫樂者,樂也,人情之所不能免也。樂必發

音導。

肉,如又反。」

其偏也。

過。」 也。 能 體,是人情所歡樂也。 詠 者,免猶止退 鄭氏曰:「免,猶自止也。 人道,人之所爲 自 歌之是也。 抑 性術,言此 退也。 孔氏曰:「樂者,樂也,言樂之爲 也,歡樂動心,是人情之所不 形 樂必發於聲音,則嗟歎之, 出 於動 **「於性。** 静, 人情之所不能 則不知手之舞 盡於此,不可 免

> 不耐無 是先王立樂之方也。《釋文》:「耐,古能字。 動人之善心而已矣,不使放 聲以道之,使其聲足樂而 故人不耐無樂,樂不耐無形。形而不爲道, 而不息,使其曲直、繁瘠、廉肉、節奏足以感 變動。 之,足之蹈之是也。内心歡樂,發見聲音 變動,竭盡於此而不可過也。」 動静,是人道自然之常。 亂。 口爲聲音,貌 先王耻其亂,故制《雅》、《頌》之 爲動静,人性道 不流,使其文足論 術謂道路。 心邪氣得接焉。 遊路之 變謂 以道

鄭 也。 直 足以談論義理而不止息也。 使人愛樂不至 孔氏曰:「《雅》、《頌》之聲,作之有節, ,聲之曲折也。 氏曰:「流,謂淫 節奏,闋作進止所應也。方,道也。」 一流 蕩 放也。 繁瘠、廉肉,聲之鴻殺 也。 文,謂樂之篇章 文,篇辭 曲,謂聲音迴 也。 曲

隨分而 作止。 如此 曲 省 曲 語 以律吕、貌得其敬、心得其和、故放心邪氣 好」之肉同,謂聲之圓轉,廉之反對也 故足以論説而不息也。 不得接於性情矣。」 豆或直 ,論説其義也。 丽 直 已。 作則奏之,止則節之。 言聲音之或 廉,謂 作,以會其宜,足以感動人之善心, ,或繁或瘠,或廉或肉,或節或奏, 謂 聲音放直。 既節之以《雅》、《頌》,又調之 廉 稜。 《雅》、《頌》之義理深遠 肉 愚謂: ,謂肥 繁,謂繁多。 肉,與「寬裕、肉 滿。 論,謂樂終合 節 奏 瘠 言謂 謂

克諧相 事也。 止 鄭 焉,則審中聲以定和者,亦審乎宫聲而已, 也。 皆非所謂和也。 踰宫,高不過羽,若下踰於宫,高 淫聲,慆堙 以降,五降之後,不容彈矣。 日 於樂器,以飾 和 此所以謂之一也。 始,其四聲者皆由此 金、革、土、匏之屬也。 代氏曰: 也。 :「宫最大而沈濁,羽最細而輕清,商之 ,而以之上下相生,以 然五 應和。」 《左傳》云:「先王之樂,所 故有五節,遲速本末以相及,中聲 聲皆爲 審一,審其人聲也。 心耳,乃忘平和。」蓋 其節奏也。 故審中聲者,所以定其 愚謂:一者,謂 中 ·聲,而宫聲乃中聲之 比,合也。 而 以成文,五聲 生,而爲宫聲之用 爲五聲 ○朱子《聲律辨》 於是有煩 ·, 而 比 審一 五聲下不 中聲之所 物, 過於羽, 又比 以 以定 節 八音 謂 合 和 手 百 雜

和敬。

在

族長鄉里之中,長幼同聽之則

莫不

是故樂在宗廟之中,君臣上下同聽之則莫不

和

順

和

親

故樂者,審一以定和,比物以飾

節

節

在閨門之内,父子兄弟同聽之則莫不

也。

是先王立樂之方也。《釋文》:「長,丁丈反。

奏合以成文,所以合和父子君臣

附

親

萬

其别 不可以 焉。 屬於陰 日 宫,而 也。 之,又有變徵以居焉,亦非五聲之所取 當五音之中,而 用,陰陽際會之中,所以 徵,爲徵,爲 宫 後屬於陽 然世之論中聲者,不以角而 變宫而止 大次宫,徵之細次羽,而 **「**,因其 凡聲,陽也,自下 然自其聲之始和 蓋以其正當衆聲,和與未和,用與未 又十有二,以 極 上下相 爲宫,於是就其兩間 而未暢,故不可用。 每 細 耳。 而 變 而 一羽,爲變宫,而皆以爲宫之用 始和,故即其始而用之以 輕 生,以極乎五聲二變之用 而 自是以 清者爲應鐘。 非衆聲之會,且以七均 益 其 上,則爲 ·者推 最 上,則又過乎輕清 而上,未及其半,則 、爲盛。 開居 大而 而上之,亦至 商 上而及半,然 而細分之,則 以 四者之中焉。 沈濁者爲 爲角 及其旋相 若角 宫,何也? 爲 則), 則 爲 黄 於 論 雖 爲 丽 īE. 變

諸律半聲過乎輕清,始之外而中之上也 賤者 用 盡 者又無所受以爲本律之宫也。」 著夫五聲之實,不得黄鐘之正 而 審音之難,不在於聲而在於律,不在於宫 半聲之外過乎 乎其外,以取諸律半聲之管,然後 宫聲常不越乎十二之中,而 朱子此辨,所以 之上,而不可以爲樂者也。 少過也。 之始,中之中也。 之甚,而不可以爲樂矣。 而 在於黄鐘。 寫 亦然。 調 而 其 西 成 所 Ш 應鐘之宫,始之終而中已盡也 也。 謂 若諸半聲以 蔡 黄 蓋不 氏 黄鐘之與餘律,其所 輕清之甚,則又外之外,上 鐘 發明中聲之義者最 亦 十律之宫,始之次而 日 ·以十二律節之,則無 聲 上,則又過乎輕 而 「律者,致 蓋黄鐘之宫,始 른 四聲者或 由是言之,則 一,則 雖 八十一律 有 愚 中 以 七 均 爲 謂: 和 時 爲 詳 Ż 以 中 清 貴 備 出

樂者,天地之命,中和之紀,人情之所不能免 兆,要其節奏,行列得正焉,進退得齊焉。 干戚,習其俯仰詘伸,容貌得莊焉。行其 故聽其《雅》、《頌》之聲,志意得廣焉。 先王之所以飾怒也。故先王之喜怒,皆得其 也。《釋文》:「詘,丘勿反。要,一遥反。行列,户剛反。」 夫樂者,先王之所以飾喜也。 静者也。天地之命,以其本於性者而言。 謂 樂,因人情所不能自已者而導之於和也。 發於聲音者也。 總要之名也。」 域也,舞者進退所至也。 鄭氏曰:「綴,表也,所以 各有條理也。 中和之紀,以其發爲情者而言。 審 以定和」者可識矣。 〇右第三章,言先王之立 「干戚」至「節奏」,形於動 愚謂:《雅》、《頌》之聲, 表行 要猶會也。 軍旅鈇鉞者, 列 紀,言其 也。 執其 紀, 兆, 故 綴

王之道,禮樂可謂盛矣。《釋文》:「鈇,方夫反,又儕焉。喜則天下和之,怒則暴亂者畏之。先

音甫。」

鄭氏 四章,言禮樂之化之盛也 下奠不和且畏焉,其道豈不盛乎。 之喜怒,非禮樂不足以達之,禮樂達 則飾之以軍旅鈇鉞,而天下莫不畏。先王 喜則飾之以羽旄干戚,而天下莫不和,怒 之喜怒,惟義理之所在,而己不與焉。 類也。《左傳》曰:「喜怒以類者鮮。」先王 謂:軍旅所以征討,鈇鉞所以刑 則非作好。 言『軍』者,對喜而言怒故也。喜合於樂, 方氏慤曰:「軍旅鈇鉞,軍禮也。五禮特 怒節之以禮樂,則兆民和從而畏敬之。」 曰:「儕猶輩類。天子之於天下,喜 怒合於禮,則非作惡。」 殺。 〇右第 而天 儕猶 故 愚

也, 也。 子 執焉。《釋文》:「贛,音貢。請,七穎反,徐音情。」 贛 何足以問 見 如 賜 師 者宜 乙而 所宜。 何 問焉,曰 歌 也?」師乙曰: 請 誦 : 「賜聞聲歌各有宜 其 所聞,而吾子自 「乙,賤 工

焉。 遺聲也」之下。 者,宜歌《齊》。 夫歌者,直己而陳德也,動 肆直而慈愛愛者,宜歌《商》。 歌《小雅》。正直而静,廉 達 寬而静,柔而正者,宜歌《頌》。 上,「愛者宜歌商」」宜 爲『哀』。』〇自「寬而静」至「慈愛」四十九字,舊在「五帝之 而 天地應焉,四時 而信者,宜歌《大雅》。 鄭氏曰:「子贛,孔子弟子。 乙,名。 曰:「子贛欲令師乙觀 《釋文》:「好,呼報反。 聲歌 鄭氏云: 各有宜 承 此 「此文换簡失其次、「寬而静 和焉,星辰 下行,讀云『肆直而慈愛者宜 斷,丁亂反。]○鄭注:「愛或 一,氣 恭儉 己氣性宜聽 而謙者,宜歌《風 順 性 理焉,萬 廣大而 而好禮者,宜 温 也 師,樂官 良 而 何歌 静,疏 物 孔 能 宜 也 育 己 斷 氏 在

愛者」,此叠衍「愛」字。商」之上,正如鄭氏之説,今移正。又《樂書》云「肆直而慈商」。」今考《史記・樂書》,「寬而静」至「慈愛」在「者宜歌

雅》。 《小雅》。 子之《雅》。」 中正者,《頌》之德 其德狹劣,故宜歌諸侯之《風》,未能 變,廉約自守,謙恭卑退,不能好禮自 恭 謂 盡,故不能歌《頌》。 宏厚,若性寬静柔正者,乃能歌之。志意 柔,謂和柔。正,謂 廣大而安静, 疏朗通 孔氏曰: 頌》。 儉好禮 以約自處。 但廣大而不寬,疏 廣大而安静, 疏 「寬,謂 正直而不能包容,静退即 而守分,不能廣大疏達,故 好禮而 愚謂:寬宏而安静,和 德量寬大。 也,故 恭,謂以禮自持。儉, 正直。《頌》,成功德澤 達 動,不越法也。 朗 達 而 通 德 丽 誠 達 如 不柔,包容未 静,謂、 信,宜歌《大 而 此 誠信者, 者 不知機 安静 宜歌 性既 柔 聽天 宜 處 歌 丽

者宜 恭儉而 也。 見利 則 明乎商之音者,臨事 歌 齊 以 齊别 論 德性之所近者也。 下一,而 必 〈齊 》。 大雅》之德 能 商聲歌 有 其德性 與。 以 國 歌《小雅》。 丽 斷 陳 有 所歌之詩。 國 皆因 .風》之德也,故德如此 好禮者、《小雅》之德也,故德 讓 其 事 列之也。 直 所 [風》、《雅》、《頌》,此以《詩》而 ,故宜 温 歌 己 之而謂之商,以齊聲歌之而 辭 之所近者也。 也 之詩 而 則 其德性之所 良 ,故德如 陳 非 而能 歌 正直 《淮南子》云「甯 漂德,謂. 矣。 天地萬物,皆我 今三百篇之詩。 商 商聲、齊聲,此以 ·而屢 斷 而安静 或三百篇之詩 \approx 此者 直己 則能 然商聲、齊聲,亦 、 斷, 肆直 近, 明 一之所 宜 乎齊之音者, 1, 廉潔 讓 者宜歌《風》。 M 歌《大雅 利,故宜 歌 戚商 而 行 一體,故 以 是 丽 慈愛, 合之 聲 謂 如 商 亦 謙 歌 論 而 歌 此 用 而 讓 與 車 其 之 可

> 非 事 齊人識之,故謂之《齊》。 識之,故謂之《商》。《齊》者,三代之遺 面 故《商》者,五帝之遺聲也,商之遺聲也,商 屢 歌者動 歌孰能保此? 鄭注云"「「商之遺聲也」,衍字。」 而 物皆與之相應,蓋 屢斷。 斷,勇也。 己之志氣, 明乎齊之音者,見利 見利而讓,義也。 莫非德之所感也 而 天 明乎商之音者, 地、 四 時、星辰、 而讓。 有勇. ?有義 聲也 臨 事 臨 人 萬

故歌 倨中 也。 鄭 也。 不 商聲、齊聲申言之者,豈非 國 頌》學者之所常弦誦,而二者之聲,或有 矩 者 能 氏 風》、《雅》、《 保猶安也,知也。」 見利 ,句中鈎 盡識者與? ,上如抗,下 曰 : 而讓 「屢,數 ,纍纍乎端 以 頌》與商 如隊 也。 其温 保,謂保其德性之美也 曲 數 良能 2聲、齊 如 斷 如 愚謂:上 (國 貫 斷 折 事 珠。 也。 "; 止 聲 風》、《雅 以 如桑木, 《釋文》: 其 此 節 斷 歷 肆 獨 猶 晢 以 決

追反。」仰反。句,紀具反。鈎,古候反。纍,本又作「累」,力仰反。句,紀具反。鈎,古候反。纍,本又作「累」,力「上,時掌反。隊,直媿反。稟,古老反。倨,音据。中,丁

濁。 落。 鈎。 鄭氏曰:「言歌聲之著,動人心之審。」 而 慤 感動人心,端正其狀,如貫於珠。」 句中鈎,言歌聲大曲,感動人心,如中當於 似方折。 者、言歌聲上響,感動人意,如似抗舉。 孔氏曰:「此論歌聲感動人心。 言音聲邪曲,●感動人意,如中 如隊者,言音聲下響,感動人意,如似 人意,如似枯稾之木止而不動。 定也。 曲如折者,言音聲迴曲,感動人意,如 曲、言其回旋而齊也。 纍纍乎端如貫珠者,言歌聲纍纍然, 「抗,言聲之發揚。 倨則 止如稾木者,言音聲止静,感動 不動,不動者方之體,故中 隊,言聲之重 止,言其闋後 ·當於 倨中矩 上如抗 方氏 矩。 下 隊

> 者也。 所以直己陳德,而 繫而不絕也。此節形容歌聲之妙如此,此 矩。 曲,小折謂之倨,大折謂之句,纍纍者相 者聲回,止者聲絶。」 方氏、郝氏皆以歌聲言,是也。 七者,歌之法也。上者聲高,下者聲卑,曲 纍纍乎,言其聲相繫屬。 兩端相貫而各有成也。」 句則不直,不直者曲之體,故 可以感動天地萬 愚謂:上下七句, 端如貫 郝氏敬曰:「此 回轉謂之 珠 言其 中鈎。 物

之也。」《釋文》:「說,音悦。」
之。嗟歎之不足,故不知手之舞之,足之蹈之。嗟歎之不足,故不知手之舞之,及之蹈之。 長言之不足,故嗟歎之。

鄭氏曰:「長言之,引其聲也。嗟歎,和續

「邪」、《禮記注疏》作「雅」。

0

之也。 《虞書》言「歌永言」是也。歌之歎和流連 言、嗟歎之不能自已,此所以抑揚高下,而 足,故長言之,長言之不足」,始云『嗟歎』 同者、《詩序》是屬文之體,略言之;此委 而爲舞,而性術之變盡矣。 足,而至於手之舞之,足之蹈之,則又由歌 有上文所言七者之聲也。至於嗟歎之不 淫液之」是也。此言歌之所由生,出於長 者,謂之嗟歎、《賓牟賈》篇所謂「詠歎之, 之矣。」 愚謂:歌之引聲者,謂之長言, 曲説歌之狀,其言備具,『故言之,言之不 云『咏歌』,此先云『長言』,後云『嗟歎』,不 孔氏曰:「《詩序》先云『嗟歎』,後 不知手之舞之,足之蹈之,歡之至

《子貢問樂》。

篇蓋皆有之。

先儒合十一篇爲一篇,而删

古書篇題皆在篇末,此十一

此篇題之名。

去其每篇末篇題之名,獨此失於删去,故

右《師乙》篇第十一。 尚存耳。

禮記卷三十八終

國史館纂 賜 進士及第翰林 脩 孫 希 旦 院 編脩 集 解

雜 記上第二十之一《别録》屬《喪服》。

也。 《大記》相似者,又有非喪事而 也。 以其所記者雜,故曰《雜記 、喪服小記》者,以其所記之瑣 此篇所記,有與《小記》相似者,有與 《喪大記》者,以其所記之繁重而名之 亦記之者, (碎而 名之

諸 道,則升其乘車之左轂,以其綏復。《釋文》. 乘,繩證反,下同。 侯行而死於館 綏,依注音緌,耳隹反,下同。」 ,則其復如於其國。 如於

鄭氏曰:「館,主國所致舍。 復,招魂復魄

禮記卷三十九

《周禮·夏采》「以乘車建綏復于四 有。」 也。 也。 升屋 轂在 升 也。 於生」,失其義矣。 惟建綏故 此死於道,則升車而以綏復,以生時在 旌 車象宫室南鄉,復者北 之旒縿,至郊皆斂之,而但 之舍復者、廬宿供待衆賓、非死 車左轂,象在家升屋東榮 車 ~旗 東 如 此車以南面爲正,則左 之 左 招 於其 也。 用 愚謂:《聘禮》及郊「斂旜」,蓋 轂 旄 孔氏曰:「乘 也。 褒衣 ,象升屋 也。 (國,主 鄭氏謂「去其旒而用之,異 也。 去其旒 國館賓,予使有之,得 東榮。 如於道 在道升乘 車,其 鄉 圃 而 也 用 綏當爲『緌』, 道 (所自 復 在 . 載 之, 車 上廬 ,則車之左 不 東 其 丽 乘之 異 者 於 也 綏, 復,乘 **涇宿也。** 於 「郊」。 所 廬 故 生 道 旗 車 車 宿 升

其輤有 裧 ,緇布裳帷,素錦 以 爲 屋 而 《釋

「輤 ,千見反。 裧,昌占反。 緇裳帷,本或作「緇布 帷

裳 輤 此 於 輤 櫬 未 飾 而 於大夫云「舉自阼階」,則此經主謂未大 此承上言「復」之文,又下云「不毀牆」,又 布」於「裧」與「裳帷」之間,明二者皆緇 車 有 爲之也。 潤 常相也 詳 養 取 用 蓋 飾之總名。 帷,在輤之内而周 屬於輔 歸者明矣。 也。 於櫬 赤。」 新 亦 如 死在塗載尸之車飾也。 也。 此 屋,幄也。 且 鄭 蒨,染赤色者也。 圃 愚謂: 古人器服之飾,其 氏 而其禮則有異 四垂者爲談,周於四旁者爲 大夫用力 若既大斂,載 若分而言之,則 曰 : 遣車之障 四合象宫室,故曰 於尸者爲屋。 布 輤 亦 取 日 名於櫬 也。 裳帷用 柩 亦 輤 蓋於上者爲 而 輔者. 曰 , 則 法象皆 ○輤之義 歸 輤 非 與 了, 其 言「緇 「載尸 緇 則 有 屋 蒨 不 則 斂 車 取 非 布

> 苟。 之内外。 下,其於法象逆矣,必無是理 天地之定位,否則玄表 凡飾 若輤用 用玄纁者 赤裳帷 必玄 而 用 E 纁 緇 裹 丽 也 則 以以 纁 纁 下 象 陰 而 以 玄 陽 象

9

於廟門外。 至於廟門,不毀牆,遂入,適所殯,唯輤 毀牆。 牆也。 鄭 升堂而遂 於户内畢,乃奉尸 入自闕,則毀牆。 不入於室而 廟門,殯宮之門也。 氏 曰: 唯 輔 不毀牆,以未大斂也。 所殯,謂堂 《釋文》:「説,吐奪反,本亦作「脱」,下 「去輤 爲 説 後 於廟門 出 ガ 入 也 以尸歸者入自門,則 侇於堂。 上 言「遂入,適所殯」,明 廟門,以 毁牆,毀殯宫門 也 輔者. 外 0 ,, 明 死 車 尸 於家者,小斂 其 朩 凡 自外來,則 入自 以 易 也 柩 有 之西 歸 爲説 同。 不 宫 者

0 「帷裳」、《釋文》作「裳帷」。

室也。」

復。如於館死,則其復如於家。大夫、士死於道,則升其乘車之左轂,以其綏

屋而以上服復也。 愚謂:如於家,謂升冕,士以爵弁服。」 愚謂:如於家,謂升鄭氏曰:「綏亦緌也。大夫復於家,以玄

如字,今從之。 如字,今從之。 如字,今從之。 「輪,讀爲幹,或作「樽」。」○按「輪」字,戴氏升適所殯。《釋文》:「輪,依注作『輇』,市專反,又市轉車,入自門,至於阼階下而説車,舉自阼階,大夫以布爲輤而行,至於家而説輤,載以輪

乎。 輲 鄭氏曰:「布,白布不染也。 日 俱用白布,無所别也。 蜃 『有輻 讀 車,天子以載柩。 蜃、輇聲相近,其制同 爲輇,或作 **輇崇蓋半乘車之輪。**」 日輪, 博』。 無輻 日輇。』《周禮》又有 至門,亦説輤乃入。 許氏《説文 不言『裳帷』, 戴氏 震 解 日 字》

車。 也。 **阼階**, 尸人之禮然也。 尸侇於堂之禮也。諸侯及士亦然,獨於大 舉,謂説車而以人舉之,象在家者男女奉 輪之名。」 鄭以爲即輇,亦非 日 西階下而説輲車,諸侯則載以輴車,大夫、 夫言之,舉中以見上下也。 及裧旁之裳帷,中之屋,皆以白布爲之也。 如 士 至於家而説輤,亦至廟門外而説之也。 載以輲車」,明不易以輁軸也。於諸侯言 蜃 不毀牆」,於大夫言「人自門」,互相明也。 牀 則載以輁軸,而皆升自西階也。 車即輲車、「蜃」乃假借字、「輲」其本字 鄭注《既夕禮》云:『蜃車之暈,其狀 「凡在路載柩 輲車,四 央有轅,前後出 愚謂: [輪迫 ,天子以下至士皆用 地而 也。 以布爲輤,謂上之輤 若柩則入自闕,至 輲者車之名, 輇者 行,其輪無 ,設前後輅。 入自門,舉自 輻 〇孔氏 然 蜃

注《周 狀 用輁 不用 行 有 愚 夕禮》云:『軸狀如轉轔 士殯不用 似於蜃 地安,而無傾敗之患也 四 如長牀,穿桯前後,著金而關軸焉。」」 周,下 周 軸 **| 輇爲輪,天子、諸侯殯皆用之。** 禮 在道載柩載尸,皆以 了; 下 ,因取名焉。」輔車 輔。 輴 則前 有四輪,又輪用全木,承載穩, 遂師》云:『 有四 其朝廟,大夫以上用輔,士 後有 周 、 輁 軸 軸 四 ,以軽爲輪。」鄭 刻 輪輪 則 制 兩 輪車,以其上 無。 與 迫 頭爲軹。 蜃 地 鄭注《既 車 丽 大夫、 同,但 行, 輁 有 又

輤,葦席以爲屋,蒲席以爲裳 緇布 柩 席也 之。屋以葦席,裳帷以蒲席,葦席精 士之輤,其内之屋,外之裳帷,皆 故 也。 ,大夫裧與裳帷同以布,則士之裧與 **一葬無** 不言「談」者,諸侯談與裳 褚 ,此乃有 屋 者 ·; 亦 以 帷 以 於蒲 席 同 未 爲 以 有

裳帷同以蒲席可知也。

丈反。」○鄭注:「訃,或皆作「赴」。」 長子,曰:「君之臣某之某死。」《釋文》:「長,丁凡訃於其君,曰:「君之臣某死。」《釋文》:「長,丁

鄭氏曰:「訃,至也。臣死,其子使人至君然則君亦當使人弔之矣。 然則君亦當使人弔之矣。 然則君亦當使人弔之矣。 然則君亦當使人弔之矣。 然則君亦當使人弔之矣。 然則君亦當使人弔之矣。 然則君亦當使人弔之矣。 然則君亦當使人弔之矣。 然則君亦當使人弔之矣。

子』同。適,丁歷反。」

鄰國書之曰「卒」,一以爲謙己,一以爲尊也。」 孔氏曰:「不敢指斥鄰國君身,故於執事」,不言者,略也。」 愚謂:諸侯之於執事」,不言者,略也。」 愚謂:諸侯之以執事」,不言者,略也。」 人子,皆當云『告

於執事」是也。

君,一以别外内之辭,義各有所當也。

也。實當爲『至』,此讀周、秦之人聲之誤鄭氏曰:「適,讀爲『匹敵』之敵,謂爵同者

禄』。」 愚謂:實當爲「告」,上文云「敢告云『某死』。赴大夫,其辭得申,故云『某不也。」 孔氏曰:「尊敬他君,不敢申辭,故

於士,亦曰「吾子之外私某死」。
死」。 訃於大夫,曰「吾子之外私某死」。 訃「某死」。 訃於他國之君,曰「君之外臣某士訃於同國大夫,曰「某死」。 訃於士,亦曰

1123

那点,但於他君稱「外臣」,於大夫、士言「外死」,但於他君稱「外臣」,於大夫、士配, 是爵者之位,而此《記》亦有大夫、士死,赴 於他國君、大夫、士之辭,則大夫以吉凶慶 所謂「人臣無私交」者,初非絶不往來之 所謂「人臣無私交」者,初非绝不往來之 所謂「人臣無私交」者,初非绝不往來之 問也。

大夫次於公館以終喪,士練而歸,士次於公

館。大夫居廬,士居堊室。

氏 其親 喪,大夫俟練,士卒哭而歸。」此謂異姓之 爲居次重輕之差也。 館,但大夫居廬,士居堊室,又以恩之深淺 廬,士居堊室,言未練之前,士亦次於公 於公館以終喪,士練而歸,此以恩之淺深 家,亦爲喪次於寢門外以 公館 爲家,若君喪而悉聚一國之大夫、士於君 不惟貴賤 君有服者也。《周禮・宮正》:「大喪,别 以終喪,士練而歸,謂 大夫、士,與君 爲居次久暫之差也。 公所者爲公館,别於在家之次也。 以 練 疎貴賤之居。」可見臣爲君居喪之次, ,謂喪次在公所者也。 有不同,其親疎亦不同矣。 歸之士爲邑宰,非也。 無服者也。 《喪大記》曰:「公之 士次於公館,大夫居 同姓之大夫、士,與 居,故謂 大夫次於公館 士練 人君以國 丽 大夫次 次之在 歸 ○鄭 於其

> 次以居喪爾。 亦以居喪爾。 亦以居喪爾。 亦以居喪爾。 亦以居喪爾。 大夫、士之宰邑者,其於君 大夫、士之宰邑者,其於君 大夫、士之宰邑者,其於君 大夫、士之宰邑者,其於君 大夫、士之宰邑者,其於君

服如士服。《釋文》:「爲其,于僞反。」如士服,士爲其父、母、兄弟之爲大夫者之喪大夫爲其父、母、兄弟之未爲大夫者之喪服

序端。」《曾子問》曰:「共殯服,則子麻、弁 也。」 故知 者也。己卑,又不敢服尊者之服。」 孔氏 鄭氏曰:「大夫雖尊,不以其 兄弟,嫌若踰之也。 盡考,然其見於《禮》者,略 曰:「大夫適子雖未爲士,猶服大夫之服 喪大記》曰: 此士爲父、母、兄弟服士服,是庶子 愚謂"大夫之喪服異於士者,不可 「君將大斂,子弁絰即位于 士,謂大夫庶子爲士 可 服 推 服 而 父、母、 得也。

沽

¨, 則

於士者也。 弁,袂侈之而 尺二寸,袂圜殺爲尺二寸,大夫 亦必侈袂矣。 服弁,蓋用喪冠之升數,而如弁之制 衰,此未成服 殯,弁絰而 絰。]則其於父母 士始死,笄、纚、深衣,至小斂 士之異也。 雜記》曰: **弁服。」大夫弔既弁** 疏衰、菲 「大夫與殯 司服》:「凡弔事,弁絰服。 所謂 至成服,大夫則 疏衰,則大夫弁絰 「凡弁絰,其衰侈袂。」則 「端、衰無等」者,未嘗有大夫、 大夫爲不爲大夫者之服,皆如 屨。」此人君之禮 至其升數之多 不圜殺,此成服以後之服異 以前之服 士喪之首服以冠,其衰 弁絰,大夫與他 之殯弁經必矣。 絰 異於 至大 一則喪亦 寡,鍛治之功 公士者 斂 加素 也。 亦疏 而 八則首 服 凡喪事, 也。 冠 弁 **《雜** 人君 人 弁矣。 爲之。 経、 一,斂後 衰 殯 服 服 衣二 《周 與。 記 以 弁 弁 疏 將 升乎。 其爲 爲父服 服,亦 服 下 士 蓋 士 剆 服 服 以

服

官

括

髪以

曰 :

衰以三升爲正 之間,謂 大夫。」」此平仲之謙也。 其老曰:「非大夫之禮 帶,杖,菅屨,食粥,居倚廬 傳》曰:『齊晏桓子卒,晏嬰麤衰斬,苴絰 禮》逸,與士異者,未得而備 鷩冕」之義也。 之齊衰爲 與大夫爲 嫌 母五升 所以 猶《司 惟大 士: 臣 縷如三升半而 服 一服耳。 爲父、母、兄弟 施於死者,故不可以 父服 大 以 縷 其母與兄弟 君 `服》「享先王則衮冕、享先 加 之斬衰爲 ,微細焉則屬於麤 É 異者,有麤衰斬、枕草矣。 ○鄭氏 四升,爲兄弟六升縷而 麤衰斬 一乃能備 三升,不緝 也。」曰:「惟卿 ,亦以 其父,以 者,其縷 或異,故 曰 : 言己非大夫,故 儀 ,寢苫、枕草。 聞也。 《大夫 勉 · 踰於死 盡 臣從 人爲 也。 飾 在齊、斬 特 也。 《春秋 明之。 然則 (喪服 高 君 公則 者之 以 Ŧī. 斬

達禮 也。」 乎? 之服 衰、枕草爲士爲父之異於大夫者,又謂「麤 言時人所行大夫之禮,惟卿乃得行之,己 之失禮,故遜 之,故其老怪 明文,可謂枕塊爲大夫禮,而枕草爲士禮 未爲卿,不得行此禮也。 鄭乃以晏嬰之麤 鄭所云「縷如三升半 然實主士禮言之。其言五服之精麤,曰 衰在齊、斬」之間,而并以推士爲母及兄弟 術》篇曰:「服有麤衰、齊衰、大紅、細紅、 之告滕文公曰:「齊、疏之服。」《新書 而 斬衰三升,三升有半,齊衰四升」,安有如 四升」、「縷如六升而五升」者乎? 也。 ,臆説甚矣。 《喪服》一經,雖兼有大夫以上之禮, 愚 謂 當時大夫行禮者少,惟晏嬰服 辭以答之曰「惟卿爲大夫」, 而問之。晏子不欲顯言他 晏嬰爲 寢苫、枕塊、《士喪》記之 而三升」,「縷如 其父之服 乃 喪 · 六 孟子 <u>Ŧ</u>. 父之 升 人

> 衰也。 麤衰,即 對齊衰而言 緦 麻。」 蓋 斬衰,初非齊、斬之間別有所謂麤 對 大功 ,則斬衰爲尤麤。 以 下 而 言 則 晏嬰所服之 齊 衰 爲

而適子主喪,故一視乎死者之爵,而不以服,謂爲其父母之服也。服以施於死者,大夫之適子,服大夫之服。

「則爲之」同。」
其位與未爲大夫者齒。《釋文》:「則爲,于僞反,下其位與未爲大夫者齒。《釋文》:「則爲,于僞反,下大夫之庶子爲大夫,則爲其父母服大夫服,

長之義並行而不悖如此。 萬大夫者,大夫猶不敢先之,貴貴長為大夫者齒,則不但下於適子,雖他庶子為於士,不可不宗適。」 愚謂:其位與未數氏曰:「雖庶子,得服其服,尚德也。使

大夫者服士服之義也。

其子之尊卑。

此即大夫爲其父母之不爲

主之,無子則爲之置後。士之子爲大夫,則其父母弗能主也,使其子

以子之禮主其喪也。然則大夫之無子者, 其父弗能主者,非以大夫之尊卑其父,乃 其父弗能主者,非以大夫之尊卑其父,乃 主,謂爲主而拜賓也。大夫之子雖爲 主,謂爲主而拜賓也。士之子爲大夫,則

喪屨,緇布冠不蕤,占者皮弁。大夫卜宅與葬日,有司麻衣、布衰、布帶,因

雖非大宗,而得立後矣。

冠本 也。 鄭氏 而縓緣者也。 弁,則純吉之尤 冠之禮異也。 麻衣,大祥所服,以十五升白布 無蕤,特言之者,嫌因事變服,或與始 [日:「此服非純吉,亦非 布,謂十五升吉布也。 用大祥之衣,又用吉布爲衰 者 也。」 愚謂: 純 凶也。 宅,葬 緇布 ·爲之 皮 地

服也。 卜者也。 宗人命龜,卜人作龜」,則眂 見《周禮・太卜》注。 有涖 敢以 宜使親者,故以 人,陳龜、貞龜者亦卜人。此「有司」,乃涖 燋,先奠龜,西首」,是貞龜也。 先奠龜于西塾上,南首」,是陳龜也。又云「卜人抱龜 無服者,故以公有司 凡喪中因事而變服者,唯其屢無變也。 矣。大夫之貴臣爲其君菅屨,衆臣繩 及帶,又用太古之齊冠,則於喪服皆變之 人陳龜、貞龜、作龜。 鏘鳴按:《士喪禮》云「卜人 有司,乃大夫之臣,本爲其君服斬者,爲不 士喪禮》「族長涖卜」,宗人命龜 凶服臨鬼神,故其服 卜、陳龜 占者乃公有司,故吉服。 命龜 、 貞 、作龜、於接鬼神尤親,宜使 私 下文云「大夫之喪」,「小 臣。 龜、眂高、命 涖 **企** ト。 貞龜,謂正龜於卜位也 如此。 喪禮》「族長涖 贊主人出 高者亦小宗 龜、作 眂 ト之事, 皮弁,吉 高,卜 龜 屨, 此

夫斬衰,故變服猶不純吉也 功以下之親,故變服 1 吉服 」,此不 純 用 純吉。 吉 服 者 大夫之臣 族 長 蓋 一爲大 士 期

文》:「朝,直遥反。」如筮,則史練冠、長衣以筮,占者朝服。《釋如筮,則史練冠、長衣以筮,占者朝服。《釋

鄭氏曰:「練冠、長衣,純凶服 凶 變服者也。涖卜之有司吉服而不純,此 服之中衣也。 筮事者也。 之禮宅必用筮 用筮,或一卜一筮。《士喪禮》筮宅而 或卜或筮,隨人所用也。 純吉服也。」 凶,故脱喪衰,而即 日,蓋於卜、筮各舉其 史」與上涖卜之「有司」,皆本服 服 而稍變,蓋卜重而筮輕,故服之不同 練冠,小祥之冠也。長衣,喪 愚謂: 中衣上有喪衰,今以不敢純 ,日必用 以中衣爲外服 曰「如筮」者,宅與 一以見其禮,非 卜也。 或俱用卜,或 史,家臣主 也。 斬 也。 而 朝服 因 謂 則 事 此 俱 士 ١ 目

弁,亦以筮輕於卜故也。如此。占者,亦公有司也。朝服降於皮

而讀書。《釋文》:「慶,音薦,本又作「薦」。」大夫之喪,既薦馬,薦馬者哭踊,出,乃包奠,

也。」 嫌大夫之尊與士異,故特記之,明與士同 禮》『薦馬,馬出』之後,包奠『讀賵』,記者 送死賵物之書也。讀,謂省録也。《既 奠牲下體,包裹之以送死者也。 三也。此謂第三薦馬之時。 馬,二也。明日將行,設遣奠之時又薦馬 訖,乃薦馬,一也。 馬有三時: 讀赗。こ 鄭氏曰:「嫌與士異,記之也。《既夕禮 曰:"包牲取下體。」又曰:"主人之史請 士喪禮》下篇云:「薦馬,圉 愚謂: 孔氏曰:「案《士喪禮》下篇 柩初出至祖 薦馬者,謂圉 至日側祖奠之時 廟,設遷祖 人夾牽之,御 人與御者也。 包奠者,取遣 書,謂 一之奠 又薦 夕 凡 薦

出也。薦馬者哭踊,出,乃包奠,而讀書,人不致其哀,故薦馬者雖賤亦哭,成踊乃者執策立於馬後,哭,成踊,右還出。」喪無

龜。《釋文》:「相,悉亮反。」 大夫之喪,大宗人相,小宗人命龜,卜人作

謂包奠讀書,以薦馬者之出爲節也

也。 灼之以出兆。」 鄭氏曰:「謂卜葬及日也。 宗伯上、中、下士之屬,自以尊卑分爲大 其禮。」」 布是也。 並是其君之職,來爲喪事,如司徒旅歸 爲之。○賈氏公彦曰:「士命龜有二,命 以告卜人也。其出命以命宗人,則涖卜者 雖私臣亦以名之。此大小二宗並公臣,乃 ,非大宗伯、小宗伯之官也。 命龜 一告以 故《肆師》云:『凡卿大夫之喪相 愚謂:凡相禮事者皆曰宗人, 所問 皇氏侃曰:「大小一 事 也。 作龜 相,相主人禮 命龜,述命 謂 揚 一宗, 四 火

> 即 《少牢》云:『史執筮,受命於主人。主人 即席,西面坐命龜」。卜云『不述命』,猶有 申之曰述。不述者,士禮略。]及卜葬 艱」,筮人許諾,不述命」,注云:『既 與前同,述前辭 又述命曰『假爾大筮有常,孝孫某』以下, 伯某,以某妃配某氏,尚饗。」史曰「諾」。」 西 某甫,考降,無有近悔」。許諾,不述命,還 云, 涖卜『命曰「哀子某, 來日某卜葬其 爲其父某甫筮宅,度兹幽宅兆基,無有後 筮有一。《士喪禮》命筮者『命曰「哀子某, 曰:「孝孫某,來日丁亥,用薦歲事於皇祖 。大夫以上,命筮辭有二,命龜辭有三。 ŀ 面 應氏 命龜。 亦述命,是命龜 鏞曰:「大小宗及卜人皆春官,而 是士命龜辭有二,命筮 议 命筮。大夫筮既 有三,命筮有二也」。 述命, 命 有 父 日 而

> > 1129

以贊大夫之喪。大夫之喪,力有不能

具,皆仰之於公,又俾有司贊 其 (事,所 謂

體群臣一者,此類是也。」

復、諸侯以襃衣、冕服、爵弁服

玄衮赤舄。」韓以侯而賜衮衣,則襃衣之法 天子所褒賜之衣,或用其本服,或加賜於 之衣也。襃猶進也。」 三。襃衣,亦始命爲諸侯,及朝覲見加 鄭氏曰:「冕服者,上公五,侯伯四,子男 衮冕,侯伯則鷩冕,子男則毳冕也。 可見矣。 冕服者,五等諸侯之上服:公則 本服之外。 《韓奕》之詩曰:「王錫韓侯・ 愚謂: 褒衣者,謂 諸侯 賜

爵弁服,祭服之下,而乃用以復者,重其爲 復之衣三: 褒衣一,冕服二,爵弁三也

此言諸侯之復,自褒衣至爵弁服而止,皮 始見天子之服也。 《士喪禮》復用爵弁服

夫人税衣、揄狄、狄税素沙。《釋文》:「稅,他唤

弁服以下,復皆不用也。

反,下文放此。 揄,音遥。」

上可知,故略言之。 者,蓋二衣之間,又科用一衣也。以其蒙 三、則夫人亦然。此但言「揄狄」「税衣」 以素沙白穀爲裏。」 愚謂:諸侯復之衣 人也。狄税素沙,言從揄狄下至税衣,皆 孔氏曰: 「復用税衣上至揄 狄,謂侯伯 夫

人狄、税素沙」下,脱爛失處。」今移正 反。」〇此節舊在「復,諸侯以褎衣」之上,鄭云:「當在「夫 其餘如士。《釋文》:「鞠,九六反,又曲六反。 内子以鞠衣、褒衣,素沙。下大夫以襢衣。 襢 一、張戰

下,子男夫人自闕狄而下,卿妻自鞠衣而 之妻。襢、《周禮》作『展』。王后之服六, 鄭氏曰:「内子,卿之適妻也。《春秋傳》 唯上公夫人亦有褘衣,侯伯夫人自揄狄而 子,而己下之。」是也。 曰: 『晉趙姬請逆叔隗於狄,趙衰以爲 下大夫,謂下大夫 内

禪,以 襃衣者,始爲命婦見,加賜之衣也。 服 與税衣,如有襃衣,則亦用襃衣與襢衣也。 之衣皆二: 内子以鞠衣與襃衣,如無 皆得兼用褖衣也。 復用褖衣。 婦人禮衣皆有裏,陽奇陰偶之義也。 者,明與男子之衣異也。男子禮衣皆禪, 之褒衣也。 之服,則其妻亦視夫之所加者服之,而謂 裹衣者,夫榮於朝,妻貴於室,其夫受加賜 如士之妻,則亦用税衣。」 素沙,若今紗縠之帛也。 下,大夫妻自展衣 然則卿與下大夫復之衣亦二:卿以希冕 衣,則以鞠衣與税衣也。大夫之妻用襢衣 與 爵 素紗裏之,如今桂、袍、襈 · 弁服,下大夫以玄冕服與爵弁服, 夫人、内子之服 其餘如士,謂内子與大夫之妻 内子與下大夫之妻,復 而下,士妻税 六服皆袍 愚謂: 内子有 特言「素沙」 衣 重繒矣。 而 制 其 餘 士妻 린 褎

自禕衣以下,而復之衣皆四也。此差而上之,則天子自十二章以下,王后一,卿大夫復之衣二,諸侯復之衣三。以其有褒衣者,則皆去爵弁服也。士復之衣

復西上。

鄭氏曰:「北面而西上,陽長左也。」 愚野氏曰:「北面而西上,陽長左也。」 愚知氏曰:「北面而西上,謂衣之尊者在西也。《士喪禮》復「以爵弁」,而「復者一人,諸侯三人,天子四人也。孔疏謂「復之人如命數然」,非是。案《周禮》天子之禮,不可刻」、《祭僕》「復于小廟」、《熱僕》「復于小寢、大寢」,而夏采惟下士四人,聽僕》「復下士二人,而得每處復一大廟,以乘車建緩復下士二人,而得每處復一人,說候三人,天子四人也。孔疏謂「復之下出二人,而得每處復一人,說候三人,不是一人,剛大夫二人,正得每處復一人,說候三人,而得每處復有四人者,蓋當使下士二人,而得每處復有四人者,蓋當使下士二人,而得每處復有四人者,蓋當使他官攝職以佐之也。

大夫不揄絞屬於池下。《釋文》:「絞,户交反。屬,

音 燭,下「條屬」同。」

大夫 屬 鄭 『士』,亦爛 者名振容,惟人君得用之,《喪大記》於大 之、《喪大記》於士言「揄絞」是也。 者,有在池下者。 夫言「不振容」是也 而 氏 猶 畫 繋 去振 翟雉焉,名曰振容,又有銅 日 也 「揄,揄翟 容,士 脱。」 人君之柳,其池繫 一去魚。 在池上者,士以 也。 愚謂: 采青黄之間 此無『人君』 揄 絞 絞繒 魚在其間。 有 在池 在 上皆 於下 日 池 絞。 及 下 用 上

弟,無昆弟則從其昭穆。 大夫附於士。 〈釋文》:「附,依注作「祔」,音同,下並同。」 士不附於大夫,附於大夫之昆 雖王父母在亦然。

者 自 敢 鄭氏曰:「附讀皆爲祔。大夫祔於士,不 也。」 以 卑,别於尊者也。 己尊自殊於其祖也。 孔氏曰: 「從其昭穆,謂祔於高 大夫之昆弟 士不 祔於大夫, 謂 爲 +

> 弟爲士者。」 祖 袝,則袝於高祖也 言之耳。説已見《喪服 者,大夫祔於士,士不祔於大夫,皆爲 昆弟前死,則祔於王父之昆弟,無昆弟 在亦然者,王父母尚在無可祔,若王父有 爲 士者,若高祖爲大夫,則 愚謂: 凡祖 小記》。 適 無 袝 雖王父母 不 於 附 高 於祖 祖 祖 口 庶 昆

之妃。 穆之妾。 婦附於其夫之所附之妃,無妃則亦從其昭 妾附於妾祖姑,無妾祖姑則亦從其昭 穆

於高 祖 所祔之妃 婦袝於祖姑,言「袝於夫所袝之妃」者,容 姑爲大夫而祔於從祖 祖姑 也 尚在也,從其昭穆之妃中一而 姑 也。 無妃,謂

袝

夫

男子附於王父則配,女子附於王母則 鄭氏 王父也。 曰: 配配 有事於尊者可以及卑,有事於卑 ,謂并祭王母。 不配 , 則 不 不祭 配

故特明之。 故特明之。 故特明之。 故特明之。 就是,不言『以某妃配某氏』耳。女子,謂未 以子,正父親,女孫之祔,嫌當祭及王父, 以其妃配某氏』耳。女子,謂未 是,不言『以某妃配某氏』耳。女子,謂未 是,不言『以某妃配某氏』耳。女子,謂未 是,不言『以某妃配某氏』耳。女子,謂未

公子附於公子。

君薨,太子號稱「子」,待猶君也。鄭注:「待,或大夫、士不敢祔於諸侯也。

爲「侍」。」

不易。有三年之練冠,則以大功之麻易之,唯杖、屢

其餘皆易也。屨不易者,練與大功俱用繩除首絰,要絰葛,又不如大功之麻重也。鄭氏曰:「謂既練而遭大功之喪者也。練

愚謂: 升。 耳。」 『易』與『不易」,因其餘有易者連言之。」 無可 衰也 葛絰 之練冠」,則大功固 變七升、八升之練衰宜矣。 其升數之多寡也。 之末,而大功新喪爲重,故得變前服,不計 九升,則是大功之服,有輕於既練之服 反服三年之功衰,因 之冠得以變之,則大功八升、九升之衰得 冠,或八升,或九升,而 '易也。 大功初喪降服七升,正服 而悉得易三年之練衰者,蓋練爲 ,要帶也,悉易也。 父喪既練,衰七升,母喪既練,衰八 孔 氏 曰:「杖、屨不易,其餘 大功無杖,亦無可易,而 《服問》曰「小功不 變練冠矣。三年之練 其故葛帶,經 大功十升、十一升 然練之首経除 大功既葬,則 八升,義服 冠 期之 變喪 三年 也 云 者

有父母之喪尚功衰,而附兄弟之殤,則練冠

「衰,七雷反。」附於殤,稱「陽童某甫」,不名神也。《釋文》:

正服 合 立 得通。案《服問》大功親,長、中殤變三年 不可袝於大夫,當袝 皇氏云:『小功兄弟爲士,從祖爲大夫,士 曾祖適孫,其小功兄弟身及父是庶人,不 殤,則是祖之兄弟之後,所以 功,成人小功,其長殤緦麻。 以 死,己明年因喪而 易服。兄爲殤,謂 鄭氏曰: 以下之殤也。 之衰,此之謂功衰。兄弟之殤,謂大 者,故祔小功兄弟長殤於己祖 下之殤。 祖 變三年之練,此著練冠,故知 廟,則曾祖適孫爲之祔於從 「斬衰、齊衰之喪,練皆受以大功 若成人合服大功,其長殤 大功親以下之殤輕, 附之不 冠。」 同 於大功親 年者也。兄十九而 孔氏曰:「大功 得袝者,己是 小功兄弟長 以 廟。」 下從祖 大 祖 義亦 功 功親 小 親 爲

謂「周人以諱事神」也。 謂「周人以諱事神」也。 謂「周人以諱事神」也。 一之葛,得易首經、要帶,不得易服,故此衲 之葛,得易首經、要帶,不得易服,故此衲 之葛,得易首經、要帶,不得易服,故此衲 之葛,得易首經、要帶,不得易服,故此衲

始麻,散帶絰。凡異居,始聞兄弟之喪,唯以哭對可也。其

帶經,謂大功以 鄭氏 凡喪,小 之時,散 爲禮也。 散也。」 垂 斂而 「唯以哭對,惻怛之痛,不以言辭 其始麻,散帶經,與居家同 一要帶。 麻。」 愚 上兄弟,其初聞喪始服 謂 若小功以下服 孔氏曰:「其始麻,散 其始麻,散帶絰者 麻,則: 也 糾 麻

帶也。 喪來至猶散帶者,以見尸柩故也」,則其説 氏云「《奔喪禮》聞喪則襲、経,至即絞帶, 成服。 時爲之,初無聞 尤不可曉。 不散帶者,彼謂奔喪來遲,不見尸柩,此 麻,散帶,其爲不得即 凡聞喪即奔者,其服皆深衣,此聞喪 襲、経、絞帶不散者,彼謂有事未得奔喪, 首以 謂 此「麻,散帶経」,特謂在外初聞喪之服,疏 故不散麻,此即奔喪,故散麻。」其説非也。 得奔喪者,聞喪即襲、絰、絞帶,亦三日而 於外者,其始帶散麻,至三日成服 至家而 始服麻之時,其要經散之而 絰 〇孔氏云:「案《奔喪禮》聞 此聞 襲、絰、絞帶,三日而成服 也。 《奔喪禮》襲、絰、絞帶,皆於一 医喪即 《奔喪禮》,凡 喪襲、絰,至而絞帶之事。 服麻,乃不得奔喪 奔喪者明矣。 聞 喪 不 即 糾 奔 聞 乃 面 又孔 喪者 ? 絞其 即 喪 成 喪不 Щ 奔 加 服 即 加

主人皆成之、親者終其麻帶絰之日數。未服麻而奔喪、及主人之未成絰也、疏者與乃謂「至家猶散麻」、不知於何見之。

服 以上也。 服之前也。 之未成經,謂至在主人小斂加麻之後,成 此 其 時加麻,即與主人同時成服矣,何得云「終 麻,若至在主人未小斂之前,則與主人 絰 用主人三日成服之期也。 至家之日加 日成服也。 間間 麻。 **「麻帶絰之日數」乎?** ,爲未小斂之前」,非也。 E喪即· 成經,謂成服而絞要經也。 疏者與主人皆成之,謂與主人同 疏者,小功以下。 奔者也。 親者終其麻帶絰之日數,謂以 麻散帶,至三日而後 聞喪即奔,故在外不 喪至小斂而 ○疏謂「未 親者,大功 成 及主人 服,不 同 成 加

之,其殯、祭不於正室。 主妾之喪,則自祔,至於練、祥,皆使其子主

> 孔氏 夫,妾子爲母大功,無練、祥之祭也 當使子主之也。祭、虞、祔、練、祥之祭也。 哭,其夫若子主之,祔則舅主之。」此主妾 爲其母,十一 室,則殯、祭皆於側室也。 祭皆於正室。 正室,夫之正寢也。適妻死於正室,則殯、 之喪,其練、祥既使子主之,則虞與卒哭亦 則祭妾而已。《小記》曰:「婦之喪,虞、卒 所生,故其袝 之者,蓋妾祖姑非父之所生,即世叔父之 於妾祖姑,其祭不於廟而於寢,然必自祔 適,故殯與 『謂女君死,攝女君也。 曰 : 祭不在 妾賤,得 月而練,十三月而祥。 不可以不親之,至於練、祥, 妾雖 正室。」 攝女君,其死猶 自主之者,崔 雖攝女君,猶下正 此謂士禮 愚謂: 氏 在側 妾祔 궁

君不撫僕、妾。

鄭氏曰:「略於賤也。」 愚謂:撫,撫其

尸也。 也。 賤,君不撫其尸也。 爲之賜,大斂 斂,或小斂而往,則皆撫之,於士及諸妻, 則於諸妻與士同。 往,爲之賜,大斂焉。」君於世婦與大夫同 斂焉,爲之賜,則小斂焉。 也。」《喪大記》又曰:「君於大夫、世婦,大 大夫,撫内命婦」,鄭氏云:「内命婦,世婦 婦,有妻,有妾」,是也。 妾,賤妾。 僕,謂宫中臣僕,内小臣、閻寺之屬 而往,則亦撫之。惟僕、妾 《曲禮》「諸侯有夫人,有世 君於大夫、世婦,或大 《喪大記》曰「君撫 於士、既殯而

女君之黨,其服乃與女君同,則非從服也。 鄭氏曰:「妾於女君之黨,舊説以爲從服,然 愚謂:妾服女君之黨,舊説以爲從服,然 人君之黨服。《釋文》:「爲,于僞反。」 女君死,則妾爲女君之黨服,攝女君則不爲

> 服 後,則女君而在,必無敢以賤妨貴、少陵長 以深嚴適庶之分,以明女君之尊不替於身 以自外。女君雖没,猶使妾爲其黨服 服者也。今乃壹使與女君同服者,於女君 之所服,妾亦服之,而輕重有不同者。 蓋妾有爲女君之娣者,不待從女君,而 衆妾,而後内政 君之黨服,又所以明攝女君之尊有以殊於 者矣。攝女君,所以統内政也,故不爲女 妬忌,而於妾則又示以統於女君,而不 則欲其於妾皆聯以同生之誼,而不致生其 非女君之姪、娣者,女君之所服,妾則皆無 固與女君同矣。 出於一也。 有爲女君之姪者,女君 有 敢 其

喪者之鄉而哭』者,盧云:『謂降服大功哭。大功,望門而哭。』此云『大功以上,見聞兄弟之喪,大功以上,見處者之鄉而哭。

功也。明其不待及門而哭爾,未必專爲降服大也。」」 愚謂:云「見喪者之鄉而哭」,以

於墓。 適兄弟之送葬者弗及,遇主人於道,則遂之

《釋文》:「與,音預。」

凡主兄弟之喪,雖疏亦虞之。鄭氏曰:「言骨肉之恩,不待主人也。」

朋友相爲,亦虞、祔也。」之練祭可也。」今此疏者亦虞,謂無服者,《小記》云『大功者,主人之喪,有三年者,則必爲之再祭』,鄭注云:『小功、緦麻,爲則必爲之再祭』,鄭注云:『小功、悉麻,爲鄭氏曰:「喪事虞、祔乃畢。」 孔氏曰:

凡 ,喪服. 鄭氏 而内無哭者,雖有弔者不哭。 將軍文子之喪,既除喪,而后越人來弔, 曰: 未畢,有弔者,則爲位而哭,拜踊 愚謂: 「客始來,主人不 喪服未畢 ,謂禫以 可以殺禮 《檀弓》: 前也 橝 待

服。」 也。」 爲與朋友同矣。《喪服》記云:「朋友麻。」 當事則弁經。 鄭氏 夫與殯亦弁經,皮弁而加葛經也。《服問》 大夫之哭大夫弁経,皮弁而 曰:「公爲卿大夫,錫衰以 夫相爲,有僚友之恩,非徒弔之而已也。 弁、錫衰爲弔服,不言「弔」而言「哭」者,大 服之前,與殯之時,首加弁経,身著當時之 首加弁経。 此謂成服以後、大夫往哭大夫、身著錫衰、 曰:「弁經者,大夫錫衰 愚謂:弁,皮弁也。諸侯大夫以皮 孔 氏曰:「大夫之哭大夫弁経者, 大夫與殯亦弁經者,此謂未成 大夫相爲亦然。」是大夫相 居,出 加麻絰也。 相 亦如之, 弔 之服

弔服: 未成 則 之爲士,若士爲大夫,皆不弁絰矣,不弁絰 之哭大夫弁絰,大夫 非相哭,雖錫衰以居,而不弁絰矣。 與殯亦葛絰矣。 素冠加絰也。 朋友弔於未成服之前亦葛経,蓋 葛絰,而朋友麻,則大夫相 服者皆吉服 大夫之哭大夫弁経,則其 ()麻不加於采也,則 與殯亦弁經,則 爲 亦 大夫 大夫 弔 麻 大 於 夫 絰

大夫有私喪之葛,則於其兄弟之輕喪則

弁絰

也。 鄭氏 大夫 如 也。 臨兄弟。」 士服,此爲其兄弟弁絰,謂尊同者也。 (曰:「私喪,妻子之喪也。 大夫降焉, 弔服而往,不 服 無緦服,故 大夫爲父母兄弟之不爲大夫者之服 弁 絰 也。 愚謂:葛,謂 (雖尊 凡 喪 河不服 服未除,於兄弟之 既葬變麻 ,但於往哭而 以私喪 輕喪,緦麻 之末 服 葛

弟之輕喪,蓋亦爲服其本服之麻與。喪,雖輕,必服其服以哭之。此大夫哭兄

爲長子杖,則其子不以杖即位。

喪不貳主也。

爲妻,父母在,不杖,不稽顙。《釋文》:「稽,徐

音啟。」

又不得拜賓而稽顙也。也。父主適婦之喪,故其子避之而不杖,也。爲妻,父在不杖,不稽顙,謂適子爲妻下文别言「母在不稽顙」,則此「母」衍字

母在不稽顙。稽顙者,其贈也拜。

顙也。 父没 在 賓 稽顙也。 不稽顙,謂父既拜賓 爲 ,但不敢爲稽顙之拜也。 母母 母悉同,故母在則微殺其禮 父没母在,則妻之喪己當爲主 在,則己主妻喪而得杖,而 然此「不稽顙」與上節不同,父在 ,則己不敢拜賓 蓋妻之服 以以 亦 示其 而 與父 加 不 拜 得

贈 所同 意。 之厚恩不敢 於人之以物贈己則爲稽顙之拜。 不 敢 也拜者,言母在而爲妻或有稽顙者,惟 也。 上 盡 節 同 專 於 以輕禮待之,則此外弔者皆不 ,謂賻襚之屬也。 屬適子之禮 母 之意, 與 母 此 在 禮 爲 稽 則 妻 適 顙者,其 蓋 不 一於人 庶 禫 之 同

稽

類也

右縫。 乃云「依注讀作緣,音所銜反」,●未詳其説。 彼列反。 喪冠條屬,以别吉凶。 鄭氏 之不服,皆爲尊諸侯也。 不敢自援,一則尊其新君 **,鄭氏讀爲「澡麻帶、絰」之澡,音當爲早,而《釋文》** 縫,音逢,又扶用反。」繰,依注音緣,所銜反。○ 小功以下左,總冠繰纓。《釋文》:「别,徐 曰:「其君尊卑異也。」 三年之練冠,亦條屬 而不 則 敢自貶。 尊其舊君 愚謂: 豈陸氏本不 二者 丽

同耶? 然以義言之,作「澡」爲是。

也。」 **纓惟一條屬於固冠之布,亦若緇布冠之青** 結於右,喪冠之纓,則縫屬於右而上結 組纓屬於缺也。 條,約冠而固之,若緇布冠之缺 蕤」,則喪冠自大祥以前無武,蓋别 之以下端向上,而結於武之左邊以 者,以纓之上端縫屬於武之右邊也。 者,以一條繩 鄭氏曰: 而交結於頤下。下文云「委武玄縞 事其布以 讀爲『澡麻帶、絰』之澡,聲之誤也。 愚謂: 吉冠有武,其纓左右各 「别吉凶者,吉冠不條屬 爲纓。」 爲纓,而又屬於武也。 緇布冠之纓,屬於左而上 敖氏繼公曰: 項然。 也。 以 其屬 條 布 而 右 固 謂 於 後 屬 其 冠 縫 有

文。
■「依註」至「衡反」,此是孫氏綜合《釋文》「緣纓,依註爲

孔

氏

日

「緦麻於朝服十五升之内抽去其

縷,其纓又 上, 纓皆不澡也。 精矣,以緦喪輕故也。 亦與冠同,而又澡治之。 以下皆用其冠之布爲之,總冠之纓,其 條屬而左縫之,稍用吉冠之制也。 左,所以反吉也。 澡」。 喪冠之纓,惟斬衰用麻繩 (有事: ,其布,布、 小功以下服輕,其纓雖 然則喪冠自小功以 縷 緦冠既 兼治,則 有 繰當作 自 事 其 齊 · 其 布 布 衰

大功以上散帶。

成服乃絞。」
小功以下帶皆絞之,大功以上散帶垂,至小功以下帶皆絞之,大功以上散帶垂,至孔氏曰:「小斂之後,主人襲、絰於序東,

文》: 朝服 鄭氏 六百縷而 「朝,直遥反,後「朝服」放此。 + 曰:「緦精 五. 升,去其 疏也。 麄 又無事 半 與 而 朝 緦, 服 其 去,起吕反。」 同。 布,不灰焉 加 灰錫 去其半,則 也。 《釋

> 在 鍛 半,以 衰、錫衰輕重之別 錫衰則成布之後,加灰鍛治,而其縷則 布之後,不復加灰鍛治,故曰「無事其布」。 皆有事者也。 灰」,一 其 灰,謂用灰鍛治之也。《喪服》記曰:「有 爲大夫、士疑衰。」是錫衰重於緦衰也。 服》:「王爲三公六卿錫衰,爲諸侯總衰, 加 事其縷,無事 治之,則曰『錫』,言錫然滑易也。 ·内也。 治,故 、縷曰錫。」《喪服》記言「有事」,此云「加 灰,不治布也。」 七升半爲之。 也。 臼「無事 無 蓋朝服用吉布十五升,布、 事 其 總衰用朝服縷數之半,而成 · 其 布曰緦。 其縷」。 布者, 哀在 取緦以爲布,又 愚 謂 有 無 事 事其縷者,哀 外 《 周 其 也。 布, 禮 緦 此 無 衰 加 緦 加 不 縷 事 司 灰

禮記卷三十九終

衣」。

冕服,謂

其次於襃者也。

先路

與寒

禮記卷四十

國史館纂脩孫希旦集解賜進士及第翰林院編脩

雜記上第二十之二

襚。《釋文》:「襚,音遂。」諸侯相襚,以後路與冕服,先路與襃衣不以

後路。 鄭氏曰:「不以己之正者施於人,以彼 後次路也。 以爲正也。」 服 愚謂:諸侯各以路之上者爲先路,同 金路,異姓則象路也。 其次於先路者皆爲 也。 鄭氏以爲貳車,非是。 以 其爲天子之所褒賜,故曰「褒 冕服,謂上冕之後次冕也 孔氏曰:「後路,謂 襃衣,亦 上 一路之 姓 冕 則 不

鄭氏曰:「言車多少各如所包遣奠牲體之作「鄣」,音同。」

《釋文》:「遭,弃戰反,下「遣車」「遣奠」皆放此。

章,本或

遣車視牢具,疏布輤,四面有章,置於四隅。

衣,皆所受於天子者,故不以襚

數也。 謂之一个。《周禮·大司馬》「喪祭奉 隅,椁中之四隅。」 其蓋也。 少牢,包三个。大夫以上,乃有遣車。 大牢,包七个。大夫亦大牢,包五个。 全體三,折分八十一个,分爲九包,每 取臂、臑,後脛折取骼。」天子四牲,每 《士喪禮》「苞牲,取下體」,鄭云:「前脛 牲」,鄭云:「王喪之以馬祭者,蓋 也。」是天子遣奠,大牢之外兼有馬牲也。 遺奠,天子大牢,包九个。 四面皆有章蔽,以隱翳牢肉。 愚謂:每牲體一段, 諸 遣 詔 包九 侯 牲 輤 奠 四 亦 折 馬 士

四面設障蔽,所以避塵土之污也。 也五个,而遣車七乘。大夫遣奠亦大牢,每也不,而遣車七乘。大夫遣奠亦大牢,每也五个,而遣車七乘。大夫遣奠亦大牢,每也五个,而遣車七乘。大夫遣奠亦大牢,每包五个,而遣車九乘。諸侯遣奠大牢,每牲各

醢,死者豈嘗食之耶?

《釋文》:「粻,陟良反。」載粻,有子曰:「非禮也。喪奠脯、醢而已。」

食糧,故喪奠無黍、稷。果爾,則牲牢、脯、矣,不當又載於遺車也。鄭氏以爲死者不黍、稷,而黍、稷、麥别盛於筲,則固有粻

祭稱「孝子」「孝孫」,喪稱「哀子」「哀孫」。 鄭氏曰:「各以其義稱也。」 適孫主祖父母之喪者也。 子」,至祔乃稱「孝子」。 「哀」。」 虞以前之祭也。 申孝子之心,故祝辭云『孝』。 喪,凶祭,自 同之於吉祭也。兼言「孫」者,容父先没而 易喪祭,猶未忍遽稱「孝」,至祔祭於廟,始 「祭,吉祭也。自卒哭以後之祭也。 愚謂:《士虞禮》卒哭猶稱「哀 喪則哀慕未申,故 蓋卒哭雖以吉祭 孔氏曰: 吉則 稱

端衰、喪車、皆無等。

乘之車,貴賤同,孝子於親一也。衣衰言鄭氏曰:「喪車,惡車也。喪者衣衰,及所

正也。 不同。 端,而玄端之袂圜殺,與朝服以 其親情如一也。」 愚謂:禮服自玄端以 至士 也。 其布之升數及齊、斬之制也。 其袂亦侈,不與玄端同也。 之制亦然,故謂之端衰。 故曰『端衰』也。 爲正,喪衣亦如之,而綴六寸之衰於心前, 上,衣之長與幅廣相等,故謂之端。 天子喪車五乘,而《士喪禮》「主人乘惡車, 三升,爲母皆齊衰四升,是端 制 等,等差也。 若大夫以上,其喪衰與朝服等同制 者,玄端吉時常服, 孔氏曰:「端衰,謂喪服上衣。 喪衰與玄端同制者,惟士之喪衰爲 吉時玄端服,身與袂同以二尺二寸 度同,無貴賤等差之别,以孝子於 喪車,孝子所乘之惡車 喪之衣衰及惡車,天子 然吉時禮 喪之衣 端衰無等, 爲父皆斬衰 衰無等也。 上侈袂者 衰 服 當 喪衰 端, 謂 皆 如

大白冠、緇布之冠,皆不蕤。 委武玄、縞而后車無等也。 白狗襖,蒲蔽」,與天子始喪之車同,是喪

蕤。《釋文》:「縞,古老反,又古報反。」

者也。 質 其纓亦與古異,而有垂餘之緌也。 祥之冠也。 故皆無蕤。水之下曰委,足之下曰武。 謂:蕤者,冠纓之結於頤下而垂餘以 曰 鄭氏曰:「大白冠、大古之布冠也。 亦無蕤。 在冠下,故以名焉。 項以固冠,其纓惟一條,屬於武而上結之, (無飾。 武。玄,玄冠也。 大白冠、緇布冠皆無武 玄冠、縞冠皆有武,與古冠異,故 委武,冠卷也。 喪冠無武,與古制同,故其纓 玄冠,吉冠。 縞,縞冠 秦人曰委,齊人 也。」 加 縞冠,大 别 不蕤 爲 爲 卷 缺 飾 愚

公,冠而祭於己。士弁而親迎,然則士弁而大夫冕而祭於公,弁而祭於己。士弁而祭於

祭於己可也。《釋文》:「迎,魚敬反。」

服。 己之事 爾。 故須依班 鄭氏曰:「弁,爵弁也。冠,玄冠也。 欲 弁袷祭。 祭,以朝服祫祭。 之差等,爵弁之下爲皮弁,皮弁之下爲 祭禮盛也。 己,其干袷之禮與。大夫干袷服爵弁,殷 而祭於己」,與《少牢》異,故知是孤。 公,助君祭也。 一時之極,故許其攝盛。祭祀常所供養, 《儀禮 少牢禮》朝服,皆特祭也。 許 皮弁純白,不用於祭祀。 士以 可 ,攝盛服爾,非常也。」 也者、緣類、欲許之也。 ·少牢》大夫自祭用玄冠,此云『弁 進朝服 爵 序。」 然則士之干祫蓋朝服與。 弁也。 大夫爵弁而祭於己 而上,即 愚謂: 大夫以朝服 若如鄭氏之説 《特牲禮》玄端, 爲 大夫弁而祭於 爵 士以玄端 分,故 特祭,以 孔氏 親迎 ·, 則],唯孤 親迎 曰 祭於 大夫 雖 服 者 爵 特 朝 亦

長,直亮反。刊,苦干反。」長,直亮反。刊,苦干反。」「鬯,本亦作「暢」。椈,弓六反。枇,音匕,本亦作「牝」。尽。畢用桑,長三尺,刊其柄與末。《釋文》:尺。畢用桑,長三尺,刊其柄與末。《釋文》:人。

之, 枇 也。」 「杵」, 喪祭故也。 棘心是也。 以枇升入於鼎,從鼎以 枇 枇 鄭氏曰:「白、杵,所以擣鬱也。 師 桑,喪祭也。 臼桐杵,爲柏香,桐潔白,於神爲宜。 用 ,所以載牲體者。此謂 棘。 大大 亦謂 亦宜 孔氏曰:「梧 渳 畢,所 然。」 喪 以 畢以助主人舉肉。 吉時 吉祭枇用棘、《特牲禮》枇 事 鬯 以助 之所 亦用棘畢,末頭 則 愚 築 一, 桐 主 謂 用 内内。」《 **枇載之於俎** 人 也。 者 此言「暢臼」及 喪祭 載 者。 擣 鬯人》: 周 用桑者 鬱鬯 也。 椈,柏也 禮 亦刊 刊 吉祭 從 猶 用 「, 亦 肆 用 削 削 用 鑊 柏

喪之大渳,共其釁鬯。」

帶,上音律,下音帶,本亦作「帶」。」率帶,諸侯大夫皆五采,士二采。《釋文》:「率

謂 服,皆與生時 大帶,死則用以襲尸,故於此言之。 者以朱、白、蒼,此二采,其朱、白與。 鞞、琫」之率,以采飾物之名也。 玄端爲税衣,以 此謂大帶之飾也。 「此襲尸之大帶,異於生」,非。 無異,何獨於帶而異之? 其在 率,讀如《左傳》「藻率 内也。 若其在外 凡飾三采 士襲 鄭氏 生時 之 變

偏反。 爲「覵」字,音古辨反。」折,之設反。」○按「見」字,當音賢衡,依注作「桁」,户剛反,徐户庚反。見音「間厠」之間,棺物、依注作「桁」,户剛反,徐户庚反。見音「間厠」之間,棺實者,稻醴也。甕、甒、筲、衡,實見間,而后醴者,稻醴也。甕、甒、筲、衡,實見間,而后

鄭

氏

曰

「此謂葬

時

藏

物

也。

衡當

爲

者五 器、鬼器。 也。 有黍醴、稻醴、粱醴,故言此醴是稻醴 是士禮略,實明器耳。 則見内是用器、役器,見外是明器也。 席。案《既夕禮》『藏器於旁,加見』, 以 盛醯、醢,甒盛醴、酒,筲盛 内二者之間,而後以折加於椁上,以承抗 謂棺外之飾。《既夕禮》注云: 者,稻醴也者,言此醴是稻米所爲 間,藏於見 言葬時藏器之法。 云:『器,用器、役器也。』《既夕禮》又云 『藏苞、筲於旁』,注云:『於旁,在見外。』 ·桁』,所以庪甕、 大木爲桁,所以庪舉甕、甒之屬也。 ,無簣。」實此甕、甒、筲、衡於見外、椁 方鑿連木爲之,蓋如牀而縮者三,横 人器實,鬼器虚。」 外、椁内也。」 甒之屬,聲之誤也。 醴,即所盛於甕者。 大夫以上,兼有人 黍、稷。 孔氏 「折 愚 日 謂 也。 衡者, **猶**庪 實見 一醴 也。 見, 注 此 此 獲

法者非矣。

藏器既畢,乃可加折,故曰「而後折人」。之内,而帷荒在外露見,故因謂之見也。草爲之。見,謂棺飾帷荒之屬。棺在帷荒甕實一觳,甒實五斗。筲,畚屬,以竹或菅

重,既虞而埋之。《釋文》:「重,直龍反。」

凡婦人,從其夫之爵位。 埋重在祖廟門外也。

尊卑。」 愚謂:觀此,則謂婦人有受命之鄭氏曰:「婦人無專制,生禮死事,以夫爲

小斂、大斂、啟,皆辯拜。《釋文》:「辯,音徧。」

朝夕哭不帷,無柩者不帷。

室,●堂無事焉,遂去帷。」無柩者不帷,謂既葬也。棺柩已去,神在殯、肂也。既事則施其层,鬼神尚幽闇也。鄭氏曰:「朝夕哭不帷,緣孝子之心欲見

面而踊,出待,反而后奠。君若載而后弔之,則主人東面而拜,門右北

使奠。」 孔氏曰:「謂君來弔臣之葬,臣君即位車東,出待,不必君留也。君反之鄭氏曰:「主人拜踊於賓位,不敢迫君也。

^{●「}神」上、《禮記注疏》有「鬼」字。

送也。 右在 東。 東面 喪 門待君,君來則出門拜迎,君去則出 拜者,君既弔,位於車東,故主人在車西 故云『君若載 廟門也。 奠,謂設祖奠也。」 奠,告柩知之也。 子反還喪所也。 留,故孝子先出待君。 反,謂君使人命孝 而哭踊 弓》:「君於大夫之喪,將葬,弔於宫,將 啟之前,君有故不得弔,而 朝 「若」者,明其爲非弔禮之常也。《檀 若門内出,右在西。此據車出家,故 廟 西,孝子拜君竟,立近門内西邊,北 而拜也。 爲禮也。 ,柩已下堂,載在柩 君弔事畢便應去,不敢必君之久 右,西邊也。 而后弔之」。 門右北 出待者,孝子踊畢,先 而后奠者,凡君來,必設 或云: 此在廟載柩 愚謂: 面 若門外來,則右在 而踊者,門,謂祖 則主人東面 車,而君弔之, 此謂士之喪未 至 是始弔 門拜 車 也。 時 出 丽 面

禮然也。 門右,門東也。 下 奠,乃反奠。」此亦云「出待,反而後奠」,故 者、《喪大記》云:「大夫、士既殯而君往 弔,故有引車之禮。此乃君始來弔,弔非 彼謂大夫之喪,君始死己來弔,至葬又特 出,命引之,三步則止。 退,不云「命奠」。此必命之奠,亦始弔之 奠,是也。 於柩,左右不據柩言也。 即位於門右北面,自如常法耳。 下,柩東迫狹,故變位受禮柩西之中庭,其 南中庭,即位於門右 知爲士禮。 大夫則奠可也,士則出俟于門外,命之反 因葬,故不云「引車」也。 西面,故主人在柩西中庭東面 《檀弓》君弔於葬,「命引之」,乃 柩既在堂下,則君即位於阼階 凡君弔,主人受禮於阼階 北 如是者三,乃退。」 画。 知非弔大夫之喪 奠,或説以 此以 此非 丽 君在 拜也。 有 祖

反。」〇鄭注:「玄冕,或爲「玄冠」,或爲「玄端」。」襲婦服。」《釋文》:「稅,他喚反。神,字又作「紳」,而占一,皮弁一,爵弁一,玄冕一。 曾子曰:「不子羔之襲也,繭衣裳與稅衣、纁袡爲一,素端子

時 表」。 此 鄭氏曰:「繭衣裳者,若今大襴也。 黑,即玄端也。 服表之,乃成一稱,故《喪大記》曰「袍必 而 謂:此襲衣凡 玄冕又大夫服,未聞子羔曷爲襲之。」 之緣,非也。 衣,若玄端而 繭,緼爲袍,表之以税衣,乃爲一稱。稅 連,若婦人之税衣也。 所以 著 |襲其服,非襲其冠,曾子譏襲婦服 禮服内有中衣,襲時内有袍、繭,外有皮 以綿纊者也。 税衣、纁袡、所以表繭衣也。 唯婦 連衣裳者也。 五稱:繭衣裳者,衣裳相 謂之税 人纁袡。 繭衣裳乃褻衣,必以禮 衣者 大夫而以纁爲 禮以冠名服, 連衣裳者,生 ,以其衣裳 税衣色 而已。 纊爲 愚 相 有 連

禮然也。不襲婦服者,纁袡,婦人嫁時之 子譏之。以此推之,則用 其玄端服連衣裳爲之,如中衣之制,遂并 服也。蓋大夫、士中衣用纁緣,子羔之襲, 子羔未嘗爲大夫,玄冕其襃衣與。襲衣不 稱,爵弁爲第四稱,玄冕爲第五稱。 玄端、素端。」此爲第二稱也。皮弁爲第三 端,制若玄端,而用素爲之,蓋凶札祈禱致 襲禮然也。 連衣裳爲之,而不當用緣也 用中衣之緣,與婦人嫁時 用偶數,有褒衣則復加一衣以合奇數,蓋 此襲衣五稱,而又有玄冕,則大夫之禮也 喪禮》襲衣三稱: 制爲之,衣裳相連,以 弁服之屬,而玄端服在其間,故如中衣之 齊之服也。 《周禮 纁,絳色也。 爵弁服、皮弁服、褖衣 司服》曰:「其 服 之服 衣 袡 而兼二,蓋 以 猶 相似 表袍者,雖 緣也。 〈齊服 案《士 门故曾 士之 有

本亦作「觀」,音同。」
家也。《釋文》:「爲,于僞反,又如字。使,色吏反。館,宮與公所爲也。私館者,自卿、大夫以下之爲君使而死,公館復,私館不復。公館者,公爲

公七踊,大夫五踊,婦人居間。説見《曾子問》。

士三踊,婦人

皆居間

主之間也。 者、踊必拾、主人踊、婦人踊、賓乃踊。」 三日而殯,士二日而殯。士小斂之朝不 鄭氏曰:「公,君也。 者,三爲九而謂爲一也。」 死,及動尸、舉柩,哭踊無數。 孔氏曰:「居間,謂婦人與丈夫更踊,居賓 踊,君、大夫大斂之朝乃不踊。 踊,君、大夫、士一也。 君五日而殯,大夫 『五』『三』者,謂爲禮有節之踊。 皆者,皆於貴賤婦人也。 始死及小斂、大斂 愚謂:諸侯五 婦 今云『七』 每踊三 人居間 親始 而

> 日皆數死日明矣。 皆踊爲三也。 殯,始死踊,小斂、大斂之朝不踊,至斂 以小斂、大斂時又踊爲五。士亦三日而 踊 日 而殯,當九踊也。 爲 丽 七。 殯,五日爲五踊,加以小斂、大斂時又 大夫三日而 以此差而上之,則天子七 觀此踊數,則君、大夫殯 殯,三日爲三踊,加 日 時

大帶於上。《釋文》:「卷,音衮。」裳一,爵弁二,玄冕一,褒衣一,朱緑帶,申加公襲:卷衣一,玄端一,朝服一,素積一,纁

者,皮弁之服,公視朔之服也。纁裳一者, 在内者,公身貴,故以上服親身也。玄端 在内者,公身貴,故以上服親身也。玄端 一者,燕居之服,玄端、朱裳也。朝服一 一者,燕居之服,玄端、朱裳也。朝服 一者,燕居之服,玄端、朱裳也。朝服 一者,共二稱與。」 孔氏曰:「公襲以上服最 以上服親 以上服親身也。玄端 衣之在内外也。

大帶於上,言重

帶者,以襲有玄端服也。

數,五等之君

亦 同

也。

斂之衣,君同以

所謂「雜帶」,燕居之所用也。 者皆加焉,天子蓋十二稱與。《喪大記》大 之衣數,士三稱,大夫五,諸侯七,有襃 稱,有襃衣,故加二稱而爲九也。然則 通謂五等之君,此不當獨爲異義。卷 踊」,下文「公、大夫、士一也」,「公升」, 冕服之裳也,鷩、毳中間任取 弁二者,此始命之服,示之重本,故二 ,據上公言之,若侯伯則鷩冕,子男則 褒衣一者,所加賜之衣最在上,華君 愚謂:公,君也。上文「公七 一加大帶於雜帶之上,順 百稱,則襲、斂所用之衣 ○凡生人之衣,最内爲 九稱,則公襲本 朱緑帶者,《玉 申,重也。 兼用燕居之 服 也。 申加 明 其 衣 衣 皆 襲 七 通 爵 毳 者,明雖有變,必備此二帶也。」 蓋大夫以上之襲皆如此與。 曰:「朱緑帶者,襲衣之帶,既非革帶,又 於革帶也。 於生也。 則袍、褶之外,衮衣之内,又當有中衣矣。 制也。公襲衮最在内,不爲連衣裳之制, 羔之襲,繭衣裳與椽衣、纁袡爲一」,即此 非大帶,衹是衣之小帶。」 「朱緑帶者,襲衣之帶,飾之雜以朱緑,異 爲中衣之制,則不復用中衣。 外有褖衣、皮弁、爵弁三稱,而褖衣連衣裳 用裘、葛耳。《士喪禮》襲衣内有明衣裳, 所用與生時悉同,但四時皆用袍、褶,而不 玄端、皮弁、冕服之屬也。襲衣衣之於身, 之屬,又其外有中衣,又其外乃有禮 衣,其外則冬有裘,夏有葛,春秋 此帶亦以素爲之。 革帶以繫載,必言『重加大帶』 愚謂: 申,重也,重 ○鄭氏曰: 上文言 子

冕也。

此襲有襃衣而

賜也。」

也。

有

袍

褶

衣,若

孔

辟,大夫素帶,辟垂」,及此篇所言「率帶 帶之帶,即生時之大帶,朱緑帶即生時之 用 藻》「雜帶,君朱緑,大夫玄華」,及此 君、大夫五 大 帶 襲固 生」,至此節又言「朱緑帶」,則謂 緑」之説已不可通,則云「襲尸之大帶異 君、大夫五采,士二采」,則「君大帶飾 「天子素帶,朱裏,終辟」,而諸侯「素帶 加大帶於上」, 朱緑帶」者,雜帶也。 君之大帶以朱緑爲飾」,至此篇言「率帶, 《此小帶,異於生」,其説支離無據 也 喪禮》襲 當當 而 有 且 襲尸 生時大帶、雜帶不一 革 采,士二采」者,大帶也。 帶矣。 夫有大帶 有 皆用之,初未嘗 ,則所 **靺**幹 然此「朱緑帶」,言「申 加者實朱 ,靺鞈必 ·, 又 鄭氏解《玉藻》,謂 有 雜 (繋於革帶,則 緑帶,而 帶。 異於 時並 襲 生 施 玉 所言 蓋率 衣 以朱 也。 , 而 藻 玉 别 於 革

> 上。 其 帶之下,故鞸繫於革帶, 則襲時亦不得加大帶於革帶之上矣。 所 若革帶則生時與大帶 繋 則 同 處 故 襲 時 而其下 加 並用,而繫於大 大 帶 與紳相 於 雜 帶之

小斂環経,公、大夫、士一也。

弓》。 氏謂 絰者。 《士喪禮》:「苴絰,大搹,要絰小焉。 服 絰,舊説所謂 盡同者,而環絰則皆以小斂畢 衰、杖、屨之屬,君、大夫、士變服之節 東。」是也。公、大夫、士一者,蓋 東方,卒斂,主人即位拜賓,襲、絰 小斂奉尸侇于堂畢,乃 環經,謂 之環經混之? 經記 「環絰爲 小 以絰環加於首也。 斂 初無言小斂時主人加 環 「弔服之環経」也。 一股之纏経」,非 絰 謂環加苴經 降 而 小斂環 東 時也 也。 , 豈 襲、 環経説見《檀 弔 他 服 可 絰 絰 于序 之 股之 服 饌于 以 有 ○鄭 如 不

公視大斂,公升,商祝鋪席,乃斂。

文》:「廣,古曠反。長,直亮反。」魯人之贈也,三玄二纁,廣尺,長終幅。《釋

制幣,玄纁束,今魯人雖三玄二纁,而用廣失也。贈,謂以物送亡人於椁中也。贈用『贈用制幣,玄纁束。』」 孔氏曰:「記魯鄭氏曰:「言失之也。《士喪禮》下篇曰:

如禮也。

尺,長終幅,不復丈八尺,則失禮也。」
思,長終幅,不復丈八尺,則失禮也。
是制,以,長終幅,不復丈八尺,則失禮也。是制,以,長終幅,不復丈八尺,則失禮也。是制,是,長終幅,不復丈八尺,則失禮也。」
是,長終幅,不復丈八尺,則失禮也。」
思,長終幅,不復丈八尺,則失禮也。」
是,長終幅,不復丈八尺,則失禮也。」
是,

鄭 也 明諸侯相弔、含、襚、賵之禮。此明弔 字,脱。」 迎也。降反位者,出反門外位。無『出 薨稱『子某』,使人知適嗣 淑,言君痛之甚,使某弔。 言擯者,喪無接賓也。淑,善也。 謂主人傳命者也。 南、北面 立 進。』又案《士喪禮》『賓有襚,擯者入告,出 事亦稱『擯』,故《喪大記》云: 『君弔,擯者 又《大宗伯》:『朝覲、會同,則爲上相。』 亦云『相』,故《司儀》云:『每門止一相。』 丽 於阼階下。 氏 言『相』。 』,是也。 門西,謂主國大門之西。其介在其東 日 西上,以其凶事異於吉也。 賓 孔氏曰:「自此 此對文耳,若通而言之,吉事 孤,謂嗣子也。 立門外 受命,受主人命以出也。 喪無接賓,故不言『擯』 了**,** 不 當 也。 稱其君名者,君 以下終於篇末, 門。 某爲嗣子之 須矣,不出 主 孤 如何不 相者, 西 面 禮 不 凶

也。 也。」 名。 西面,在阼階下西面,主人之位也。 以此爲異於吉,然鄭説實無所 弔之使,在主國門 東南,北面者,下賓也。西上者,統於賓 者即位于門西,東面者,客禮也。 禮》賓東面、《大射》賓北面觀之可 位,以客禮者東面,以臣禮者北面。 『子』,對殯之辭也。 階,拜之』,明升亦阼階也。 **弔者升由** 主人升堂西面者,從阼階升也。 云『孤某』而稱『子』者,今有事於殯,故稱 聘禮》注謂 云『須矣』者,異於吉禮,不出 必 西於門,不敢當門也。 愚謂: 弔者,謂上客也 稱 西階 嗣 子 「聘賓北嚮,介西 故也。 名者 外之位 若對賓,則 欲 又下文『孤 使 皆如 使 子拜稽顙,不 蓋凡諸侯聘、 者 據 面」,故 凡門外之 知 也 此。 稱『孤某』 知者 介在 見。 降 適 以《燕 迎 鄭氏 嗣 主 孔 如 以以 也。 何 其 阼 之 孤 疏

鄭氏曰:「含玉爲璧制,其分寸大小未聞

字明矣。 下含者、襚者、賵者皆言「出」,則此脱「出」 者降,不言「子降」者,子不降,待後事 大夫、士相弔,則賓主行禮於堂下也。 其臣,則弔者升堂,主人受禮於中庭。 須矣,肅賓之辭也。升堂而弔者,諸侯之 未葬之禮也。 稱之辭也。 不淑,弔辭 然也。 兩君相弔,則賓主皆升堂。 也。 下文云「既葬蒲席」,知 若已葬,但稱「孤」也。 孤某者,諸侯在 喪未葬自 此 君弔 孤某 本 也。 弔 若 據 《春秋》有既葬,『歸含、賵、襚』,無譏焉。

禮

文》:「含,本又作「啥」,《説文》作「琀」,同胡闍反。」 自西 葬蒲席。 子拜稽顙。 告,出曰:「孤某須矣。」含者入,升堂致命, 含者執璧將命,曰:「寡君使某含。」相者人 階,西面 降,出反位。宰夫朝服,即喪屨,升 含者坐委于殯東 坐 取 璧,降自 西階,以東。 南,有葦席,既

謂: 喪屨。 辭 此璧以含也。 在 諸侯五日而殯,鄰國弔、含之使,鮮有以殯 也。若子男三介,則賵、含皆以上介與。 則此含者、襚者當是副介、末介。」 玉皆碎之,此致璧擬爲含用耳,非謂即用 前至者,其含與襚蓋亦但致其禮而已。 次介二人爲含者、襚者,據上公、侯伯之禮 介」,弔使亦然。此上客弔,上介賵,又以 麻,故著朝服,以 即,就也。 言『夫』,衍字。 此明含禮。 亦 殯東而稍南,凡含、襚之物南上,以柩南 《聘義》「上公七介,侯伯五介,子男三 曰「寡君使某含」。 此弔者既是上客,又賵者是上介, 以 宰夫朝服者,宰,謂 東,藏於内 此璧蓋 朝服者,吉服也。執玉不 仍 在喪,不可純吉,故即 亦五 凡奠于殯東南者 也。」 一寸以 下,致命之 孔氏 上卿也。 愚

三八

而弔使乃至也。既葬稍吉,故用蒲席,蒲或國中有事故,始死未得即遣使,故既葬喪禮,皆始死遣使來弔,葬時又遣使會葬,故設席以受之。既葬蒲席者,凡諸侯相於首也。有葦席者,含、襚之物不可委於地,

壁,仍於殯之東南,以柩本在此故也。宰,他禮之異,則葬後含、襚、賵,其委襚衣、圭席,士葦席」。但言「既葬蒲席」,而不别言席精於葦席也。《喪大記》大斂,「大夫蒲

受于廟。此宰取璧乃朝服者,彼代主國君也。案《聘禮》,遭喪則使大夫練冠、長衣襚、幣、玉之事。」朝服,玄冠、緇衣、素裳小宰也。《周禮・小宰》:「喪荒,受其含、

者亦朝服與。屨爲服末,凡喪中因事而變弔,故宰取璧朝服也。宰取璧朝服,則含受禮,故練冠、長衣,此主孤自服衰経受

服

者,惟其屢無變也。○孔氏云:「此遭

鄭氏曰:「委衣于殯東,亦於席上所委璧

遥反。」

後。《聘禮》有賈人,故知授襚者以服者, 則含重而 服」,故於此略之。 之北,順其上下。 上下 受處不同,則陳於璧北亦重者在 於中庭,朝服受於西階,玄端受於堂。既 服重者,使執以入,爵弁受於内霤,皮弁受 是賈人也。 上,故曰『順其上下』,謂上者在前,下者在 賵者稱『執圭』,則此襚者當稱『執衣』,不 者亦西面者,亦襚者委衣時。」 孔氏曰 謂:含、襚、赗之辭 云者,文不 『大路、襃衣不以襚』,此外無文。」 此明襚禮也。 相 也。 襚 ,衣數無文,據此,其服 襚輕。 襚衣東西委之,南領西上,孔氏 · 備也。 襚者西面,舉者亦西面 上文含者稱『執璧』,下文 所委殯東,西面,南頭 授襚者以服者賈 經文先『含』而後『襚』, 以下文云『襚者執冕 同,獨 於襚言之,以見 有五 南。 也。 人。 凡諸 其 爲 舉 愚 又

者非。

乘,繩證反。

朝,竹由反。1〇今按:

孤某當有「某

字,陸本非是。

○鄭注:「使,或爲「史」。」

拜稽 文》:「賵,芳鳳反。 中庭,北輈,執圭將命。客使自下由路西,子 人告,反命曰:「孤某須矣。」陳乘黄、大路 上介賵,執圭將命,曰:「寡君使某賵。」相者 謂「重者在南 六人。」不言其服者,不變服也 欲於事敏也。 「宰夫,下大夫四人,上士八人,中士十有 類,坐 一委放 孤須矣,從此盡篇末,皆無「某」字,有 非 宰夫,宰之屬也。 殯 東 也。 南隅,宰 受服 以次 舉 《周禮》: 以東。《釋 而近者, 於

之下。 也。 者人,設乘黄於大路之西,客入則致 鄭氏曰:「自,率也。 西,在殯宫中庭。 大路,謂 孔氏曰:「此明赗 《覲禮》曰:『路下四亞之。』客給 車 也。 喪禮 陳 下,謂馬 四黄之馬於大路之 車馬以屬主人,故 禮。 也 乘黄,謂 馬 在 命 使 馬 路

幣,圭以馬」,犬馬不上於堂,故執圭以 物 賵 路 彼爲死者而設於鬼神之位。 亞之』注云:「亞之,次車而東。」是車在 爲 路 鬛 後爲次也。 西,統於賓 設,賓奉幣。」是士禮賓賵亦玄纁、兩馬也。 先路不以襚,此曰「大路」者,尊 命 賵者將命,擯者出請,入告。 曰 士喪禮》:「公賵玄纁束,馬兩。」又:「賓 朝 湾面 [「皆布乘黄、朱」,是也。 大路,賵車 **禮重於含、襚也。** 以 ,故馬之爲庭實者皆以黄、康王之誥 也。 在 轅 助 東 設 北嚮 乘黄,四 葬,先含、次襚、次賵,以 統 ,則路在馬西 心。《既夕禮》車 於 也。」 執圭將命者,《小行人》「合六 主 人 馬 也。 黄 愚謂: 賵 賵在含、襚之後者,赗 色也。 ,故《覲禮》『路下 若尋 常吉禮 议 北 以西爲上者, 出告須,馬入 周 记輈者 上介賵者, 人黄 喪事之先 其名 ,謂大 馬 車 也。 也 將 蕃 四 馬

也。 貝 玉 也。 車以東爲上者,爾時柩在堂下,車直東榮 下之物則統於主人而東上也。 孤 車 此 前「朝服」可知也。 席上,而在璧之南也。 者,客使先設車竟,乃率馬設於路 統於柩也。 夫之禮蓋 曰 「上介執圭將命」, 曰 公羊傳》云: 亦 諸 襚,故前文云『諸侯相襚以後路」,是也 襚。』《穀梁》云:『乘 在堂下,堂上之物則統 然。 坐委於殯東南隅者,圭 日含,錢財日 凡喪自 侯 禮 玄纁 馬 有 未祖 在 言「執 乘 『車馬 黄 路西者 束、四 以前,陳車 大 賻。」散 圭將命」,於車 與客使設馬之節 路 曰 〇 孔 馬 「, 此 馬 賵 與。 宰不言其 執 日 貨 於柩 時 而言之,車馬亦 氏曰:「隱 圭 賵,衣衾 皆 北 尊於璧,委於 柩 財 將 北 輈 在 而 曰 命 (服者, 向,故 西 堂 者,向 賻 然 馬 西。言 八衣被 夕禮 上,主 上 日襚 之間 元 相 則 一,堂 年 因 當 此 内 大

含且

賵』,二傳

但

譏

知天子於諸

侯

相

敵也。

之,賵爲後。

此《雜記》兩諸侯相敵,明天子於二王後亦 後。』鄭知天子於二王後含、襚、賵者,爲約 賵之。天子於二王之後,含爲先,襚 諸侯。諸侯於士,如天子於諸侯臣,襚之 **賵奠。所知,則賵而不奠。』此諸侯相於既** 夕》有『贈』。贈施於死,必及葬節,此未必 有馬,故《少儀》云:『賻馬不入廟門。』《既 知諸侯亦然者,約《雜記》文。 是加厚,非常故也。 諸侯相於,如天子於二王 案《釋廢疾》云: 『天子於諸 《既夕》有『奠』。 含賵者,約文五年『榮叔 諸侯於卿大夫,如天子於 故《既夕禮》云:『兄弟, 厚則有賻。』雖有貨 兼禮,不譏其數是也 此無奠者 故《宰夫》 則次 了, 亦 鄭 者也。 五月而 賻焉。 亦然。 禮 晉之强大,而自僖公以前,其事無書於册 莊、閔之世所書者,皆東諸侯之事也。 則無同盟之事也。 同在方岳之下者也,故《左傳》曰:「諸侯 之常禮也。其有甥舅昏姻之好者,則又有 愚謂:孔氏所言含、襚、賵、賻、奠禮數之 者,更無所尊,明尊此卿大夫如諸侯也。 鄭知天子於諸侯臣襚之赗之者,約《士 差,皆是也。 『王使榮叔歸含且賵』,以外推此可知。』 歸惠公仲子之賵」,又約魯夫人成風之喪 凡此,於其妻亦如其夫。 》諸侯於士有襚 鄭知諸侯於卿大夫如天子於諸 葬,同盟至。」先王之世,非同方岳 蓋古者諸侯弔、聘之所及者,皆其 至贈,則會葬時之禮,非行於弔時 有喪相弔、含、襚、賵者,邦交 有賵,明天子於諸 以《春秋》考之,隱、桓、 知者,約『宰咺來

侯,含之賵之。

疏,故無奠。

以奠主於親者。

當葬時也。

注

\(\frac{1}{2}\)

丁其

間

加

恩

侯

臣

喪

侯

此

無

膊

賻

以

推,亦 薄,但 備禮 興,邦交日繁,於是赴告交馳於四國 臣,當 禮 禮或亦不能備,故有如秦於魯成風之喪僅 不相及,蓋先王之舊制如此。 仲子僅有賵,成風有含、賵,此或周衰 所有者責之也。若天子於諸侯,則如 至諸侯之於天子,必當備含、襚、賵、賻之 不當相弔、襚,故其禮止於如此而已足也。 有襚、徐於邾宣公僅有含者、蓋以舊制 疎 其卿、大夫、士亦當如 喪禮》有襚有賵,卿大夫宜更有含,天子於 賤,其喪固不敢上赴於天王,而天王於 ,故《春秋》「武氏子來求賻」,蓋以禮之 ,蓋晉在并,魯在兖,赴告、聘、弔之使 ,大約同姓、異姓、庶姓其恩禮 如諸侯之於士」者,則非是。 蓋 大略得之,惟其言「天子於諸侯之 其詳不可考耳。 此。 諸侯於其臣,則《士 鄭《釋廢疾》所 自霸者既 當當 一,而 陪 有 不能 惠公 臣 厚 本 其 原

坐取之,降自西階。《釋文》:「鄉,許亮反。」之。宰舉璧與圭,宰夫舉襚,升自西階,西面凡將命,鄉殯將命,子拜稽顙,西面而坐委

然也。 降,宜統於君,此主孤自阼階,宰與宰夫乃 荒,受其含、襚、幣、玉之事。」又《宰夫》: 謂:子拜稽顙,西面而坐委之者,言於子 鄭氏曰:「凡者,説不見者也。 自西階者,含、襚之物皆在西,由便也 宰夫主之。 圭璧重,故宰舉之。 凡臣之升 拜稽顙之時,而西面 圭」,則上『宰夫朝服』 衍 『夫』字。」 則將命立於殯之西 「凡禮事,贊小宰比官府之具。」襚衣輕,故 宰,小宰也。 南。 《周禮·小宰》:「喪 委之,亦若避子之拜 此言『宰舉璧與 鄉殯將命, 愚

賵者出,反位于門外。

鄭氏曰:「乃著言『門外』,明禮畢將更有

襚、賵,奉君命而行者,其禮畢於此也。事。」 愚謂:鄭氏云「禮畢」者,弔、含、

東上。 티 : 命曰 使一介老某相執綍。」相者反命,曰:「孤某 音界,舊古賀反。 于門外,拜稽 自阼階,拜之,升,哭,與客拾踊 從。」客立于門西,介立于其左,東上。孤 視賓客,是以敢固辭。 吾子之復位。」客對曰:「寡君命使臣某毋 辭。」宗人反命曰:「孤敢固辭吾子之辱。 位。」客對曰: 須矣。] 臨者入門右,介者皆從之,立于其左, 上客臨,曰:「寡君有宗廟之事,不得承事 孤 **;敢辭吾子之辱。請吾子之復位。]客對** 「寡君命,某毋敢視賓客,敢辭。」宗人反 :「孤敢 宗人納賓,升,受命于君。 類。 相,息亮反。 固辭吾子之辱。 「寡君命某毋敢視賓客,敢 《釋文》:「臨,如字,徐力鴆反。介, 固辭不獲命,敢不 **綍**,音弗。『寡君命』絶句 請吾子之復 降, 曰: 客出,送 敬 請 降 敢 固

一句,陸氏「命」字絶句,非是。下放此。使,色吏反。」○今按:「寡君命某毋敢視賓客」爲

享,故 禮。」 《曲禮》云『七十使於四方,稱老夫』之類 弔所以慰主人,臨則使者自致其哀。 私 耳。 也 介,猶一个也。 事皆奉君命而 鄭氏曰:「上客,弔者也。 客乃諸侯之卿也。 前四禮皆奉君命而行,如《聘禮》之聘與 客,謝其厚意。 入視喪所不足而給助之,謙 『使臣』,爲恭也。爲恭者,將從其命。 覿,故在門東。」 門右、門東也。人門右者、人闌東 人門右,不自同於賓客。 在 孔氏曰:「云『一介老某』者,則若 門西。 行,臨 老,所謂 此臨 不迎而 相 則使者之私禮也 是私禮,若《聘禮》之 執 愚 謂: 於縛,謂 「寡君之老」,則此 送,喪 臨,視也。 也,其 臨,人 賓三辭 助執其 無接 實 (哭也。 上四 賓 喪 爲哭 言欲 丽 拜 而 之 稱

也。 臣 故客升堂致命,主人亦升堂而拜之。 者,變於吉也。 西,不言「出而復入」者,文略也。 從闑西以入,而立於門西。 從主人之辭,亦當如 幣入門左,介皆入門左,西上。」此弔者既 受,賓禮辭。 擯者辭,賓出。 馬,二人贊,入門右,北面奠幣,再拜稽首 牽馬以從,出門,西 東」也。 自與客升之後,未嘗降矣。 介立于賓右而 禮 一、故不 一,其位 孤降 東上者,統於主人也。 按《聘禮》:「賓覿,奉束錦 敢以賓客自居,所謂「私 自阼階,則升亦自阼階矣。 在門 聽命,牽馬右之人設。 西上,此介立于賓左而 擯者坐取幣出,有司二人 於此言「孤降自阼階 西,故主人必降階而 面 私覿之禮,出 于東塾南。 此但客立于門 以非 弔爲君行禮 爲其 《聘禮 擯 門 事 居 喪 治者請 拜之 臨爲 東上 總 」, 則 賓奉 自 而 君 復 乘 闑 行

也。」 能。 爲一 也。 稱 者、若於古禮、士也、若於文、襄,則大夫 使卿,則會葬亦必使卿。 襄之霸,君喪,大夫弔,卿會葬。 十年云: 『君之喪,士弔,大夫會葬。』文、 其去則送之。○孔氏曰:「案《左傳》昭三 外,送於大門之外也。 之位而設朝奠,即奠然後客出。 之後,主人當降即阼階下位,客當復門西 者,亦諸侯之弔禮然 之禮,升降不 人避之而由阼階,有爲爲之也。 踊」下即言「客出」者,文略也。 國之喪而頻使二卿於外,則勢有所不 然會葬之使,例尊於弔,若諸 然則此弔 介老」,則其非士決矣。 愚謂:此言「一介老」,則諸侯之卿 由 者蓋 **阼階**,此以客由 攝 也。 卿 凡喪禮不 以行 然諸侯三卿,若 若未葬,則 治者與。 而子大叔言 西階 此於「哭」 升堂哭踊 迎賓,於 此上客 送于門 侯相 ,故主 然自 (哭踊 弔

之耳。 使士也。 於大國使大夫攝卿,敵國使大夫,小國則 有大小,則其相弔之禮,容有隆殺。 所言「先王之制」,不必皆可據。 且諸侯國 先王之制,士弔,卿會葬」者,凡《左傳》中 但子大叔對晉人,特舉其殺者言 或弔

文與。

其國有君喪,不敢受弔。

鄭氏曰:「辟其傷痛己之親如君。」 者言之。 服斬,無弔人之法,故疏惟以「他國來弔」 不私於親也。」 他國賓來弔也。 曰:「國有君喪,而臣又有親喪,則不敢受 以義斷恩,哀痛主於君 愚謂: 國有君喪,其臣皆 孔 氏

皮冰反,本或作「憑」。」 馮之踊,夫人東面坐馮之,興踊。《釋文》:「馮 外宗房中南面,小臣鋪席,商祝鋪絞、紟、衾: 士盤于盤北,舉遷 尸于斂上。 卒斂,宰告,子

> 鄭氏 愚 謂 曰: 「此《喪大記》脱字,重著於此。」 此與《喪大記》小異,蓋上有脱

專道 士喪有與天子同者三: 其終夜燎,及乘人, 而行。《釋文》:「燎,力召反,又力弔反。 乘,繩

證反。」

爲葬具,爲事嚴急,亦非窮日夜之力不可, 孔疏專以啟後言之,然未殯之前,設燎亦 避之。」 故必終夜設燎也。 藏,既啟,柩已露,須備非常,而治殯、斂, 于中庭,厥明滅燎」,是也。 終夜也。故《士喪禮》小斂之後,「宵爲燎 事爲重,故與天子同。」 用馬也。專道而行,喪在路不避人也。三 須光明,故竟夜燎也。乘人,謂人引車不 鄭氏曰:「乘人,謂使人引車也。 孔氏曰:「終夜燎,謂柩遷之夜 柩車駕馬,或有傾覆奔 愚謂:終夜燎, 蓋始死柩未 專道,人

禮記卷四十終

兼隆

焉,故服其除服,以

明

哀之至此

而

除

也。

若母喪未没而有父喪,亦如之。

〇孔

賜進士及第翰 國 史館纂脩 孫希旦集解 林 院 編 脩

雜記下第二十一之一

服 有父之喪,如未没喪而母死,其除父之喪也, 其除服,卒事,反喪服

服。」 鄭氏 也。 服 禫則必服父除喪之服,以明遭母喪以後, 後,大祥前,未竟之時也。」 小祥後遭母喪,則應服母之服,而爲父祥、 雖 卒事,既祭。反喪服,反後死者之 主於新死者,而於舊喪之哀亦未嘗不 曰:「没,竟也。 孔氏曰:「未没喪者,謂父喪 除服,謂祥祭之服 愚謂:父喪 心小祥

> 謂 服其祥服也。 氏曰:「若母喪未葬而值父二祥,則不得 未葬爲凶,故不忍凶時行吉禮也。」 母喪未葬,則練、祥之祭不行,既葬而 所以爾者,二祥之祭爲吉, 愚

喪服。 昆弟之喪也,皆服其除喪之服,卒事,反 雖諸父昆弟之喪,如當父母之喪,其除諸父

祭,而亦服其服也

中,小功、緦麻則不除,殤長、中乃除。」 鄭氏曰:「雖有親之大喪,猶爲輕服者除, 孔氏曰:「言此諸親,自始死至除喪,皆在 骨肉之恩也。 『當』者,期、大功之喪,或終始皆在三年之 唯君之喪不 除 私 服。 言

0 反」、《禮記注疏》作「服」。

禮記卷四十

之也。 喪,而 謂:此謂 者,庾氏云:『蓋以 足明前之重,而前文言『母喪得爲父變除 父母服内,亦爲 練服。 輕喪之除,則必服 練而釋服 一時而 服,於親喪既練 有期喪,則變服期服,於期喪卒哭而 期已爲之祭而除服。 既葬,大功變既練,既於三年之喪而 除父母之喪也,服父母之服。 父昆弟之服亦當然。 諸父昆弟」,然喪服大功以上爲親 亦未嘗不兼 除,謂卒哭變麻服葛,及於主人之 若既 並 一時 也。 有此二喪,則當爲重喪服,而當 練 若諸父昆弟無三年者 丽 而 服 而 並遭期與三年之喪者也。 有期 有馬 除 其服,以明哀雖 反期服,於期服 變除事大故 服 蓋三年之喪,齊 若父母之喪既 喪,則爲期喪 ,故以 也。 然但 除喪之服 也。」 此 舉 雖 隆 除 服 此 ,則至 , 則 但 葬 於 並 衰 反 輕 , 其 愚 從 重 而 表 重 爲 戀 反

如三年之喪,則既潁,其練、祥皆行。《釋文》:年之喪,雖既練,不爲小功、緦變服,故不定,則必於三年之喪而並爲之除矣。三之服,則必於三年之喪而並爲之除矣。三

類,口迥反,徐孔穎反,沈苦頂反。」

不得并稱「父」也。 又喪父母,疏云:依禮,父在不爲長子三年,今云「先 喪,今又喪長子者。其先有長子之服,今 者變除而練、祥祭也。此主謂先有父母之 鄭氏曰:「言今之喪既服顥,乃爲前 服潁 有長子之服,今又喪父母」者,誤也。 祥祭,皆舉行之。 喪既虞、卒哭,合變麻服葛,無葛之鄉, 去麻則服額。」 喪練、祥皆行。 喪』者,已練、祥矣。 也。 後喪既穎之後,其 若後喪既殯,得爲前 其禮 孔氏 庾氏云:『後 額,草名。 亦 日 然。 「既潁者 然則言『未没 當云「今又喪母」 前 喪 喪既 無葛之鄉 須 「, 謂 練祭、 三年 則 後

母之練、祥亦皆行也。」 以 有 衰三年」章云『父卒則爲母』,是也。 祔。』若先有父 前文『父死爲母三年』也。 母喪,而後父卒,母喪雖期,父喪既顏, 喪 而 後 母死 故《喪服》『齊 練 祥 若先 亦 然

也。《釋文》:「附,義作「祔」,出注。」王父死未練、祥,而孫又死,猶是附於王父

袓 廟之道,易檐可也,改塗可也。」則練 袝 爾。 練』足矣,兼言『祥』者,案文二年《穀梁 丽 鄭氏曰:「未練、祥,嫌未給 云: 『作主壞廟有時日,於練焉壞 由 禮 與高 在 孫 用也。 ,孫死祔祖。 **上練前。** 死,則 王父既袝,則孫可祔焉。 祖之廟 孫亦得用是禮袝於祖 附皆當作『祔』。」 若祔後未練則得祔,直云『未 ,改塗易檐,以 今此明若祖 高 祭 猶當爲[由]。 喪雖 祖 孔氏 序 也。 L 入 於 太 於 未 廟 時 三祥 曰 昭 傳》 壞 壞 穆

父。 祖 焉。 於寢祭王父而祔其孫與。 在 未入廟,皆疑於孫之無可祔,嫌當 遷,未祥而孫死 毁其廟,至除喪乃奉新死者 廟,大夫、士雖無洽 天子、諸侯則於練後給祭之時 卒哭而祔,祔畢還祭於寢,至練而後壞廟 祖廟之中 是練 王父未練,孫得祔於祖,其孫就王父所祔 於昭穆爾。 是祥後袷也,故云『未練、祥』,嫌未袷祭序 祖 也。 而 廟 今 祖 祔於高祖之禮,故言「猶是祔), 其 時遷廟 猶,如字,言猶祔於王父而不祔 袝於王父者,王父練¹ 祖 一未練 而祔祭王父焉。」 傳 兼言『祥』者,恐未給故也。然 ,又三年喪畢,給於太祖 而 ,則高祖 高 孫 祖 ,亦於練後將 死 廟,新 |雖或已遷,而 則 高 、祥祭於寢,蓋 死者 祖 人 愚 之廟 廟 以 大祥 謂 人祖 如 次 圃 之廟 於王 於高 吉祭 遷其 王 尚 :時遷 祖 喪既 廟 父 尚 未

服即位,如始即位之禮。 有殯,聞外喪,哭之他室。入奠,卒奠出,改

爲位。 鄭氏 即 改己 也。 之朝,著己重喪之服, 之,明所哭者爲新喪也。 謂: 位 卒奠出者,卒終己奠 位 日他室之位。 外喪, 室,側室也。 位 西 之時,如昨 [在阼階下,若哭外喪於此,則有哭殯之 若哭於殯宫,嫌是哭殯,故於别 就 曰 面 重喪服,著新死未成服之服 喪,謂 謂 後日之哭,朝入奠於其 他室,如始哭之時。」 ,今乃哭於 「哭之他室,明所哭者異也 兄弟喪 哭同 兄 日 如始即 弟 ·· 始 在遠者也。 姓有服之喪,宜於阼階 、别室者,殯宫朝 聞 不 而 同 位之禮 喪 出。 人奠殯宫及下室。 國 即 人奠者,謂 者之喪 位 改服 之時。」 ,謂今日 他室, 、殯,既 孔氏 が即位 而即 少哭之 也。 哭之 室哭 别 曰 乃更 明 即 昨 哭 目 室 他 愚

> 同。 外,哭而歸。 則使人告,告者反而后哭。《釋文》:「與,音預,下 是與祭也。 大夫、士將與祭於公,既視濯而父母死,則猶 弓》曰: 嫌 無側室,哭於門内之右。 日又哭之禮也。 濯,大角反。它,音他。」 也。 「人奠,卒奠出」以下, 「有殯,聞遠兄弟之喪,哭於側 次於異宫,既祭,釋服,出公門 其它如奔喪之禮。 凡哭者,三日 同國則往哭之。」 圃 如 聞 未 畢。 喪之明 視濯 《檀 室

鄭氏曰:「猶亦當作『由』。 告於君而 將 可 亦當如字。 前夕,既視滌濯祭器及甑、甗之屬 專己於君命也 可以吉與凶同處也。 與 以 君 中 輟,故雖父母死而 祭,而父母 使人攝之矣。 祭事始於視濯,既視濯,則 疾病 愚謂 使者反而後哭,不 將 今乃猶與於視 猶與 死, 既視濯 次於異宫,不 則 、祭也。 固 ,謂祭之 當 也。 然 以 猶 敢

者,蓋謂猝然遇疾,若魯叔弓涖事而卒

者也。

禮。如同宫,則次于異宫。卒事,出公門,釋服而后歸。其它如奔喪之如諸父、昆弟、姑、姊妹之喪,則既宿則與祭,

致齊之時,既受宿戒也。」 差緩也。」 孔氏曰:「宿,謂祭前三日將鄭氏曰:「宿則與祭,出門乃解祭服,皆爲

卿、大夫、士皆下之。尸必式,必有前驅。」公宫以待事,禮也。」孔子曰:「尸弁冕而出,有齊衰内喪,則如之何?」孔子曰:「出舍乎曾子問曰:「卿大夫將爲尸於公,受宿矣,而

等,執事者亦散等。雖虞、附亦然。宫,則雖臣妾,葬而后祭。祭,主人之升降散父母之喪,將祭而昆弟死,既殯而祭。如同

説見《曾子問》。

鄭氏曰:「將祭,謂練、祥也。言若同宫,

輕 殯宫也。 階,是一也。」 越二等,左右足各一發而升堂。』散等、栗 不過二等』,注云:『其始升猶聚足連步, 柩即去者,則亦祭,不待三月也。』祭,猶謂 不可以相干,其虞、祔則得爲之矣。 死於宫中者,則爲之三月不舉祭。] 庾氏 祭者,吉凶不相干。 儀。」 主人,適子。 喪,當在殯宫,而在異宫者,疾病或歸者。 級聚足,喪祭則栗階。 二祥祭。 云:『小祥之祭,已涉於吉,尸柩至凶,故 東宫,有西宫,有南宫,有北宫。 則是昆弟異宫也。 以明重也。 孔氏曰:「若同宫,雖臣妾,葬而 如 散,栗也。 同宫,則雖臣 散等,栗階,爲新喪,略威 臣妾且然,兄弟可知。 愚謂:同宫,謂 古者昆弟異居同 等,階也。 故《喪服》傳云:『有 《燕禮》記云『栗階 妾葬而 吉祭則 新 有父母之 後祭,舉 死者 財,有 若喪 在 涉

賓、兄弟皆飲之可

也。

《釋文》:

「嚌,才

細

反。

之事。 而 雖 主人至昆弟虞、祔 兄弟虞、祔。 葬而祭,則葬畢當先爲父母練、祥,然後 輟虞、祔之祭,故《小記》有「既葬不赴虞」 既殯而祭,既葬而 者,謂爲父母將虞、祔而有兄弟死,亦如 階,爲新有兄弟之喪故也。 母二祥,其禮皆然也。 人之升降散等,謂兄弟既殯、既葬,而爲父 有在父母之殯宫而死者矣。若本非同宫, 亦散等」,亦非 在 ·祭,非徒疾病而歸者爲異宫也。 以 一喪次 上,父子皆異宫,則不命之士,兄弟固 庾氏謂「虞、祔得爲」,非也。 而死,自當還殯於其寢,亦既殯 孔氏 也。 祭也。 云「雖虞、祔亦然者,謂 而 行父母二祥祭,執事 二祥吉祭,不當 殯宫有死者 雖虞、祔 祭,主 若既 亦然), 則 爲 此 栗

七内反,徐蒼快反。」 受尸酢」,其義非也。」 禮》主人、主婦獻尸受酢,皆卒爵。 知小祥之祭,旅酬之前皆爲之也。 啐之,以其差輕故也。 則嚌之也。 主人獻賓長,賓長酢主人,主人受賓長 口。 鄭氏曰:「嚌、啐,皆嘗也。 重,雖在喪亦卒爵。皇氏云『主人之酢,爲 ·虞不致爵,小祥不旅酬,大祥無無算爵。」 孔氏曰:「主人之酢也嚌之者,謂 衆賓、兄弟祭,末受獻之時則 鄭注《曾子問》云: 嚌至齒,啐 神惠爲 《士虞

酢

至

凡侍祭喪者,告賓祭薦而不食。 鄭氏 賓既 也。 日 「侍,謂相於喪祭禮者。 祭而食之。 曰:「薦,脯、醢 吉祭,相者告賓祭薦,賓祭竟而 喪 祭 也。 賓 不 吉祭告賓祭薦, ·食。」 薦,謂 食之。 脯、醢 孔 氏

衆賓、兄弟則皆啐之。

大祥,主人啐之,衆

自諸

侯達諸

士,小祥之祭,主人之酢

也

齊之,

稱

其末,則服爲虚。」

本稱末也。

外不稱其内,則色爲僞。

本不

喪禮不主飲食,主人獻賓之時,賓受獻,主

人設薦,相者告賓,但祭其薦而不食,謂

練、祥祭也,其虞、祔不獻寶也。」

下。顏色稱其情,戚容稱其服。」《釋文》:「稱,一子貢問喪。子曰:「敬爲上,哀次之,瘠爲一

尺證反。」

者也。 足以稱乎其情,備乎服之重,而見於戚容 所未至者也。 謂:敬者,哀、禮之兼盡,而附身、附棺 鄭氏曰:「問喪,問居父母之喪也。」 稱内也。 慤曰:「顔色在乎面目,顔色稱其情,以外 者足以稱乎其服,此能哀之實也。 無所悔者也。 哀者無不瘠,瘠則勉爲瘠,而情有 戚容兼乎四體 哀則感有餘,而禮或有 極乎情之哀,而見於顔色者 ,戚容稱其 (服,以 方氏 未盡 愚

乎書策矣。」 子曰:「兄弟之喪,則存

鄭氏曰:「輕者如禮行之,末有加也。

斬之喪,哀容之體,經不能載矣。」

君子不奪人之喪,亦不可奪喪也。

孔氏曰:「不奪人喪,恕也。不奪己喪,孝

也。」 愚謂:此上有闕文。

文》:「少,詩照反。解,佳買反。●期,音基。」月不解,期悲哀,三年憂,東夷之子也。」《釋孔子曰:「少連、大連善居喪,三日不怠,三

屬。期悲哀者,謂練以前常悲哀,朝哭、夕物死。不怠,謂水漿不人口之屬。三月不何也。解,倦也。」 孔氏曰:「三日,親之鄭氏曰:「言其生於夷狄而知禮也。怠,

❶ 「買」、《釋文》作「賣」。

見,賢遍反。」也,不入門。《釋文》:「堊,烏各反,字亦作「惡」,同。中,不與人坐焉。在堊室之中,非時見乎母三年之喪,言而不語,對而不問。廬、堊室之

『斬衰唯而不對,齊衰對而不言』,是也。」在堊室之中,以時事見乎母,乃入門,則居
在堊室之中,以時事見乎母,乃入門,則居
方夫、士言而後行事者,故得自言己事,而
不得爲人講説也。對而不問,謂有問者得
不得爲人講説也。對而不問,謂有問者得
不得爲人講説也。對而不問,謂有問者得
不得爲人講説也。對而不問,謂有問者得
不得爲人講説也。對而不問,謂有問者得
不得爲人講説也。對而不問,謂有問者得
不得爲人講説也。對而不問,謂有問者得
一本語,謂

人俱,皆爲其狎處忘哀也。 愚謂: 三年之喪,立不群,行不旅,坐不與

疏衰皆居堊室,不廬。廬,嚴者也。

視兄弟。長、中、下殤服輕,上從本服,視 或戚輕重,各視所正之親。妻居廬而杖, 也。」 孔氏曰:「此等之親,服雖有異,其 也。」 孔氏曰:「此等之親,服雖有異,其 成人。《釋文》:「長,丁丈反。」

親喪外除,兄弟之喪内除。

其成人也。」

而内亦除也。」
則外雖除而未内除,服輕者則不惟外除,曰:「内除、外除,皆謂日月已竟,服重者兄弟之喪,自期以下之喪也。 黄氏幹

鄭氏曰:「小君服輕,亦内除也。發諸顔

色,謂醲美酒食,使人醉飽。」

弔死 是 此 免喪之外,行於道 也。 而 后 而問疾,顏色戚容必有以 《釋文》:「瞿,九遇反。」 可以服三年之喪,其餘則直道)路,見似目瞿 異於人也。 , 聞 名 而 心 行之 瞿 如

鄭氏 親者。 但 以 瞿 死、問疾」者,以弔死、問疾是哀痛之處,身 異於無喪之人,餘行 又除喪,戚容應甚 心,故直云『心瞿』。 「目瞿」,聞名應云『耳瞿」,而云『心瞿』者 志 !耳狀難明,因心至重,惻隱之慘,本瞿於 下直道 然驚貌。 若 日 名,與親 此 「惻隱之心能 而行,盡自 其餘期喪以下,則直道而 蓋親 同。」 喪 也。」 外除,故雖免喪而 得 顔色戚容,必有以殊 皆應如 孔氏 也。 如是,則 愚謂: 似, 曰:「見似云 是,獨云『弔 其餘 謂 瞿者,瞿 容 行之, 貌 齊 哀 似 衰

祥,主人之除也,於夕爲期,朝服。祥因服既除而哀亦與之俱除可也。

其

故

服。《釋文》:「朝,直遥反,及下「武叔朝」皆同。」

明 《間傳》曰:「大祥素縞、麻衣,禫而綅。」祥 端,而祥、禫之祭乃服 吉時 縞 以上之祥祭,其服蓋與此同,其首服 祭縞冠、朝服,則禫祭綅冠、玄端與。 服之,既祭則服 服 朝服之衣、裳,其冠則縞冠 夕 鄭氏曰: 爲 日 而 》之禮云『玄衣、黄裳』,則 也,朝服素裳,與喪服之色相似,故祥祭 黄裳者,未大吉也。 朝服玄冠、緇布衣、素裳,大祥朝服 期,《 如弁之制爲之與。 圃 祥 「爲期,爲祭期 特性 祭亦 朝服。」 禮》「請 麻衣以居,其冠 朝 期 也。 服 ○鄭氏 愚謂:凡祭皆前 既祭 日 也。 者,玄端,純吉 羹飪」,是也。 朝 是禫 乃 服 士祭 服 無變也。 、爲期, 祭玄冠 潭服. 「《釋 則用 服 大夫 玄 用 至

常也。 者也。 愚謂: 也。 朝 也。 **牲禮》主人祭玄端,除喪吉祭,當用平時吉** 衣,但其緣異耳。 冠、深衣以居,以既祥縞冠、麻衣推之可知 至於吉祭而除者也。說詳《玉藻》。 素縞、麻衣,此自祥祭服之,以至於禫而除 冠、朝服,五也。既祭玄端而居,六也。」 祥訖素縞、麻衣,二也。 至吉,其服有六:祥祭朝服、縞冠,一也。 祭之服也。 變除禮》,而《變除禮》實未足據也。 服 橝訖朝服、綅冠,四也。 深衣者,燕居之所常服 、緩冠,踰 而居,復平常也。」 注疏所言大祥後變除之服,皆本於 **禫而玄端、綅冠,此自禫祭服之,以** 既祭則朝玄端,夕深衣,復其 月吉祭,乃玄冠、 至吉祭玄冠、玄端。 **禫祭玄冠、黄裳,**三 孔氏曰:「從祥 也。 踰月吉祭,玄 朝服 既禫則纖 麻衣即 大祥 既 《 特 深 祭

> 反服。」 子 陸氏佃曰:「此言親喪既祥,有他喪未除 游 曰 : 既 祥, 雖 不 當 縞 者 必 縞 然後

也。更成踊者,新其事也。於士,士至也。鄭氏曰:「尊大夫來,至則拜之,不待事已改成踊。

,謂大、小斂之屬。」

孔氏曰:「當袒

至者。 踊 此謂大夫、士於主人於斂畢,既即 者,謂踊竟襲初袒之衣也。 謂斂竟 在主人即位之先,則於降、即位時皆先拜 後拜之,不改成踊,爲已成乎踊也。 阼階下之位也。 改成踊者,爲初尚未成 則知鄉者止 拜之」,故知是斂已竟,袒、踊時也。 大夫弔,當事 也。 大夫尊,不待成禮而 時 踊以三者,三爲成。 也 踊拜大夫時未 而至則辭焉」,此 絶 踊,止 踊 也。 襲。」 此云『乃襲』, 拜之。 士卑,成禮 云『絶踊 《檀弓》云 位而後 愚謂 反,反 若至 乃 襲 平 而 而

事、附與虞異矣。下大夫虞以犆牲,與士鄭氏曰:「卒哭成事、附言『皆』,則卒哭成不大夫之虞也犆牲,卒哭成事、附皆少牢。上大夫之虞也少牢,卒哭成事、附皆大牢。

之,乃即

位而

踊也

之義。」 也。 則隆於下大夫也。 牲,與士同,而卒哭與袝皆少牢,則隆 異,則與虞祭同特牲也。 常吉祭同。《士虞》記不言卒哭、祔用 事」,故卒哭謂之成事。 卒哭用大牢」,明虞與卒哭不同,微破先儒 是一事。 虞、卒哭,他用剛日」,先儒以三虞、卒哭同 虞禮同與。」 成事、附皆少牢,依平時吉祭禮也 大,並加一等,故皆大牢也。下大夫吉 事,言成吉事也。 『遺奠加』者,略可知也。《士虞禮》云『三 用少牢,今虞祭降一等,用 少牢,虞依常禮 上大夫虞用少牢,卒哭與袝用大牢, 鄭因 愚謂: 卒哭之祝辭曰「哀薦成 孔氏曰:「上大夫平常吉祭 此經云『上大夫虞用少牢, 用 附,附 上大夫之虞,下大夫之 少 牢 士虞用特牲,與平 也。 廟也 下大夫虞用犆 犆 卒哭謂 性 也 此二祭皆 於士 性之 卒哭 不云 之成 祭

五八

則上、下大夫遣奠皆大牢矣。練、祥之牲,炎,亦視其宜以爲之等而已。士遣奠進用大夫之虞降於吉祭一等而用犆牲,或隆或大夫之虞降於吉祭一等而用犆牲,或隆或大夫之虞降於吉祭一等而用犆牲,或隆或

「祝,之六反,徐之又反。稱,昌升反,徐尺證反。」曰「某」,卜葬其兄弟曰「伯子某」。《釋文》:祝稱卜葬、虞,子孫曰「哀」,夫曰「乃」,兄弟

蓋各與其卒哭與袝同與。

氏曰 孫某 鄭氏曰:「祝稱卜葬、虞者,卜葬、卜虞,祝 稱主人之辭也。 主人之辭也。 妻某氏』。兄弟相爲卜,稱名而已。」 并言『葬、虞』也。」 一:「此謂 卜葬其祖某甫』。 卜葬擇日,而 云『葬、虞』者,虞用葬日,故 孫,謂爲祖後者,稱曰『哀 愚謂:此謂卜葬日命 夫曰『乃某卜葬其 卜人祝龜 所 孔 稱

> 甫」。 者也。 屬也。 某」,謂所稱死者之辭也。 子某」,舉一端以發其凡 則曰「季子某」。上言「兄弟」,下但言「伯 相爲,直稱名而已。卜葬其兄弟曰 龜之辭。 曰 哀」三句,謂所稱主喪者之辭也。 「哀子某」,「哀孫某」,夫曰「乃某」,兄弟 若仲、叔,亦各因而稱之,卜葬其弟 其辭曰「弟某來日某卜葬其伯 <u>~</u> 士喪禮》卜葬、祝無事焉。 告神謂之祝、非謂大祝、小祝之 也。 伯子,謂其居長 「子孫 「伯子 子孫 子某

叔,魯大夫叔孫州仇也。輪人,作車輪之鄭氏曰:「記庶人失禮所由始也。叔孫武職。五本反。●輠,胡罪反,又胡瓦反,又胡管反。」報。在本員賤皆杖。叔孫武叔朝,見輪人以其杖古者貴賤皆杖。叔孫武叔朝,見輪人以其杖

❶ 「本」,據《禮記注疏》、《釋文》當作「木」。

愚謂 官。」 以之關轂 以邊坐,大功不以服勤,杖所以服至尊,乃 之服以責其情,而使之企而及也。 爵者設,而其後乃推而用之庶人,蓋 而非 病故資杖以扶之。此惟脩飾之君子能之, 無爵而杖者何? 作輪之人以杖關穿車轂中而迴轉其輪 可 孔 《喪服》傳 被諸愚不肖之人也。 氏 而輠輪,則其鄙褻甚矣。 曰:「關,穿也。 曰:「杖者何? 擔主也。」蓋哀深故 輠,迴也。 故杖本爲有 齊衰不 故自是 爵 一亦予 病 也 謂 冒者何也?

晚反。」 鑿巾以飯,公羊賈爲之也。《釋文》:「飯,扶

有爵者始杖,而庶人不復杖也。

面之巾短,不逮於口,不必鑿而可以飯也。蓋大夫以上之禮也。士飯不鑿巾者,士覆「布巾環幅不鑿。」言「不鑿」,則當有鑿者,飯,以米、貝實死者口中也。《士喪禮》:

也。 也。 飯。 人不親而直使他人執其事者乎? 大宰助之,猶士親含而宰洗柶建于米以從 大夫以上巾長 上,賓爲飯,則有鑿巾」,非也。 「大喪,贊含玉」,贊謂助王也。 然則王猶親含矣。 公羊賈鑿巾以飯,以士而僭大夫之禮 ○鄭氏謂「士親飯 逮於口下,故必鑿之乃可 ,必發其巾,大夫以 飯含之事,豈有主 《大宰職》 王親含而

鄭氏曰:「言設冒者,爲其形,人將惡之不設冒則形,是以襲而后設冒也。

沐浴。 上。 若不設冒,則尸象形見,爲人所惡,是以襲 曰 : 也。 而設冒也。 「冒所以 皇氏云『大斂脱冒』,未之聞 襲而設冒,言『后』,衍字耳。」 自既襲以後以至小斂,雖已著衣, 至小斂之時,則以衣總覆於冒 (揜蓋 芦形。 未襲之前,事須 也。」 孔氏 愚

斂,

所以揜形也。

自襲以至小

子曰:「吾子不見大饗乎? 歸 裹,音果。 卷三牲之俎歸于賓館,父母 而 爲哀也。 或問於曾子曰 ,如字,徐音匱。」 裹其餘與? 謂 冒,故言「襲而后設冒」,「后」非衍字也。 與,音餘。 子不見大饗乎?」《釋文》:「遣,弃戰反。 襲以 前,沐浴衣尸,雖 君子既食則裹其餘乎?」曾 「夫既遣而 夫,音扶。 卷,紀轉反,又厥挽反。 包其餘 而賓客之,所以 夫大饗,既饗 形 而 猶既 未 可 設 食

鄭氏曰:「言遣既奠而又包之,是與食於 遺奠事畢,包裹遺奠之餘以去,猶如 親之去也。」 也。言父母家之主,今賓客之,是孝 是乎,言傷廉也。 他家,不應裹其餘食以去,既設遣奠,亦不 食於他家,食畢而裹其餘相似。 人已,而裹其餘將 孔氏曰: 去何 既饗歸賓俎 「或人言喪禮 異與? 所以 君 子 君子 食於 厚 子 既 甯 生 哀 人 之 設 爲

> 與,音餘。」 非爲人喪,問與? 則初無傷於廉也。 館,乃主人之所以待賓,而非賓之所自取, 饗,諸侯相饗也。 其餘,則 應包餘而去。」 賓客同,是乃人子之所以致其哀也。 返,其奠餘之物,乃俟主人而送之,正與待 包其餘,是不以 子不見大饗乎」,所以深曉或人也 傷於廉,非君子之道 君子之道處其 賜與?《釋文》:「爲,于僞反。 愚謂: 大饗卷三牲之俎歸於賓 父母家之主,今長往不 或人謂 。今既遣 親 既 食 也 再言 丽 丽 裹 大

鄭氏曰: 問,遺也。 而賜與之與? 豈非爲人之有喪而問遺之與? 語接上之辭,故鄭云『滅脱』。 非是爲人喪而問之與? 「此上滅脱,未聞其首云何。 久 無事 平敵則問,卑下則賜。」 曰問。」 人喪而賜之與? 孔氏曰:「此 與,語助也 人之有喪 言

君,尚右手耳。説詳《檀弓上》。 華一後稽顙也。吉拜,頓首之拜也。其異謂、母、長子也。其實杖期以上,皆爲喪謂、母、長子也。其實杖期以上,皆爲喪,以一,此論身有喪拜謝之禮。三年之喪, 三年之喪,以其喪拜。非三年之喪,以吉拜。

暫反。《釋文》:「遺,於季反,下文同。必三,如字,又息善人衰經而受之。如君命,則不敢辭,受而三年之喪,如或遺之酒肉,則受之,必三辭。

食之,則食之矣。不辟粱肉,若有酒醴則傷食內,猶不得飲酒。故《喪大記》云:得食肉,猶不得飲酒。故《喪大記》云:得食肉,猶不得飲酒。故《喪大記》云:為於廟,貴君之禮。」 孔氏曰:「衰絰而薦於廟,貴君之禮。」 孔氏曰:「衰絰而

死者。受而薦之,榮君賜也。 萬,謂薦於之」,又明不爲受賜變喪服也。薦,謂薦於也。在喪,衰絰不離身。特言「衰絰以受也。在喪,衰絰不離身。特言「衰絰以受政。至難,至其不可辭而後受之也。於受」。 愚謂:喪不食肉、飲酒,故遺之酒辭。」 愚謂:喪不食肉、飲酒,故遺之酒

受問遺之法。○自「非爲人喪」至此、明在喪人。」 愚謂:從父兄弟、大功之服也。言然「可」也者、略許之辭、則不若不遺人之此、則期喪以上、既卒哭不遺人可知矣。」 愚謂:從父兄弟、大功之服也。言受問遺之法。

鄭氏曰:「言其痛之惻怛有淺深也。」 愚文》:「縣,音玄。期,音基,下同。剡,徐以漸反。」縣子曰:「三年之喪如斬,期之喪如剡。」《釋

有服 三年之喪,雖功衰不弔,自諸侯達諸士。 鄭氏 謂 自 也。 衰」。 賀瑒云: 服,謂有 哭 在 衰,而依彼親之服 有五屬之親死 於往弔哭,乃服其服。』皇氏云:『此文 則蹔服其服,事畢反服故服也。」庾氏云 此 八也。」」 [有五服之親喪而往哭之,則不著己功 而 「功衰」之下,而實通初喪。假令初 謂小功以下之親 剡 自諸侯達諸士,貴賤 將往哭之,則服其 曰:「功衰,既 衰雖 重喪,小祥後衰,與大功同,故曰『功 削 五 『新死者服輕,不爲制服,往哭之 一服之親 也 外輕,而痛猶內重,故不得弔 愚謂 ,則亦蹔服五 斬 之痛 三年爲父,既練衰七升, 以 喪。 服 練 ,始聞喪不爲制服 服 深 功衰雖不弔人,若 之服 之,申骨肉之情也。 ,剡之痛 而 同 往。 服之服 也。」 然 也。 淺 孔 如 喪 了, 至 雖 彼 有 氏 如

旁期 然。 謂 如免 緦必往。」皇氏謂「實通初喪」,是也。 大功 之喪而弔哭,不亦虚 練,不群立,不旅行。 大功 與 始 是也。《服問》曰:「小功不易喪之練冠, 之,賀氏、庾氏謂「惟據小功以下輕喪」,亦 之麻,變三年既練之葛。此僅服其服 往哭之。 人,若有五服之親喪,則服新死者之服 「『三年之喪弔乎?』孔子曰:『三年之)鄭氏 所 封 降 不臣 《檀弓》曰:「有殯,聞遠兄弟之喪, 服大功 同, ,惟尊同乃服。 君不臣諸父、昆 ,則経其總、小功之経,因其初葛帶。**」** 曰:「諸侯服 此雖承「功衰」而言,其實未練 故 也。」 曰 同 「功衰」。 ,爲母既練 孔氏曰:「所不 弟。」 非尊 新死者之服 君子禮以飾情,三 乎?」功衰雖 《曾子問 同, 衰八升 愚 雖所不 謂 臣 丽 諸 與 一者,謂 往哭, 不弔 曰 正 侯 丽 哭 亦 邨 絶 年 服 而

「自諸侯達諸士」,惟據功衰不弔而言,「如服也。若遥哭諸侯,則不得云「往哭」。此

「當在「練則弔」上。」
「當在「練則弔」、《釋文》:「禫,大感反。」〇自「十五月而긷。、練則弔。《釋文》:「禫,大感反。」〇自「十五月而期之喪,十一月而練,十三月而祥,十五月而有服」以下,特謂大夫、士之禮耳。

除。 年,以父在 此謂父在爲母及爲妻之服 則凡齊衰十一月皆可 衰,可以弔人者,以父在,故輕於出 鄭氏曰:「此謂父在爲母也。 在 非三年,亦本有三年之義,以不敢 喪,而叔向謂其有三年之喪。 而 降。 爲 若無三年者,則亦於十三月而除惟 ,母及爲妻,則有練有祥有禫, 凡期之喪至十三月,於主人 一而降。 周景王有后與大子之 以出 矣。」 也。 是妻之喪雖 父在爲母功 爲母本三 之練 同 愚謂 也。然 與三年 於母 父 而

> 祥有禫 同矣。 喪之期近也 亦祥後二月而禫,仿三年之禫而制之也。 二月也。 除,此練後尚有祥、禫,故視三年練祭 之喪同,以其本由三年而 三年之喪練不弔,此練則弔者,爲其去除 而禫者,三年之喪,祥、禫中間一月,故此 而除,此亦於大祥而除衰、杖也。 十一月而練者,以期喪皆十三月 '則其變除之服'亦悉 十三月而祥者,凡期喪以 降 也。 與 既 齊 十五 有 衰 十三月 三年 減 練 其 月 有

「而」字。 既葬,大功弔,哭而退,不聽事焉。 石經無

既葬,可以弔人也。 之屬 鄭氏曰:「聽猶 大功既葬弔人,哭畢即 ,爲其忘己哀也。 愚謂. 待也。 既 葬,大功弔者,謂大 哭 退,不待主人襲、斂 丽 事,謂襲、斂、執綍 退,不聽事者,言 孔 氏 曰: 「 期 功

練 弔 亦然。」

期之喪 功衰弔,待事,不執事。 「大功衰弔」,庾云:「有大字非。」**」** 未葬, 弔於鄉 人,哭而 《釋文》: 退,不 「功衰弔,本又作 聽 事 焉。

者。」 也。 此 執 功既葬而 鄭氏曰: 期 事 喪未 然則凡姑、姊妹之大功皆如此,而大 擯相 孔氏曰:「期喪既葬,受以大功衰。 「謂爲姑、姊妹無主,殯不在己族 一干,專爲本族之服矣。 葬 也。一 即弔者,蓋以殯 愚謂: 大功既葬乃弔, 줆 在 己]族故

小功、緦,執事不與於禮。《釋文》:「與,音預。」

小功服 鄭氏 耳。 同 異 《曾子問》云: 曰: 也 輕 ,故未葬便可弔人,不論鄉 亦 禮, 爲 饋奠也。」 彼 擯相,但 『説衰與奠,非禮 不得 孔氏 助 曰 : 彼 也 忽、 人之 饋 奠 以

相趨也,出宫而退。 相揖也,哀次而退。 相

擯

相

可也。』是擯相輕而饋奠重也。」

虞、附而 也 退。 《釋文》:「封,彼騐反,又如字。」 退。 相見 退。 朋 友

問

既

封

而

也,反

哭

而

會於他· 死者 恩轉 門而 名而 鄭氏 也。」 執 知 微深,故柩出至大門外哀次 生死同殷,故至主人虞、祔 至葬竟,孝子反哭至家 曰:「相趨,謂與孝子本不相識,但相 相趨,謂相 而言之,皆謂之弔也。 死者 摰 相見 日 相 退。 深,故至窆竟而 來會趨喪也。 愚謂: 傷。 也。 識 「此弔者恩厚薄、去遲速之節 相揖,謂經會他處相揖者也。 也。 其禮亦當 聞姓名,來會喪事也。 相問, 今注云『弔」,則知 知生者弔,知死者傷,若通 附,皆當作『祔』。」 営相 情既輕 有弔。 退。 而退。 惠 此所言「相趨」之 相見、恩轉厚、故 遺 ,故柩出 而 禮,知生者弔, 而 也 退也。 朋友情重, 退。 是 相 相 弔 廟之宫 相問, 見,當 「揖,當 生人 然與 聞 孔 也。 氏 恩 姓

謂 等,蓋皆 営相 聚會 與死 而趨就,若《檀弓》「趨 者恩誼淺深之異也。 丽 相 就 趨, 子

服伯子於門右」是也。 丽 相 與爲禮,若陳司敗揖巫馬期 相揖,謂嘗相 是 也。 聚 會

弔,非從主人也,四十者執綍。 從反哭,四十者待盈坎。《釋文》:「坎,口敢反。」〇 鄉人五十者

鄭注:「坎,或爲「壙」。」

隨也。成人二十以上至四十丁壯時,非鄉 鄭氏曰:「言弔者,必助主人之事。 從猶 者亦從孝子反也。 滿其坎。 五十始衰,故窆竟孝子反哭,老 人,同鄉之人也。 人則少長皆反,優遠也。」 盈坎者,謂窆竟以土 四十强壯,故待土滿坎 孔氏曰:「 盈 鄉

喪 食雖惡,必充 飢。 飢 丽 廢 事,非禮也 飽

弔喪之節

反,優饒遠者。」〇「從三年之喪」至此

明明

而反也。

若非鄉人,則無問少長皆從主人

死。《釋文》:「視,如字,徐市志反。爲,于僞反。」 十不致毁,六十不毁,七十飲酒食肉,皆爲疑 正,不知哀,君子病之。 而 忘哀,亦 非 禮 也。 視 故有疾飲酒食肉,五 不 明, 聽 不 聰,行 不

鄭氏曰:「疑猶恐也。」 志瞀則不知哀。 不明,耳瞶則聽不聰,肢體憊則行不正,心 病其不知禮也 四者皆哀毀之過也。病 愚謂: 目昏則視

文》:「人食之,音嗣。」 人,人食之,其黨也食之,非其黨弗食也。 有服,人召之食,不往。 大功以下,既葬適

謂

愚謂 於人無數也。」 往則不可。 鄭氏曰:「往而見食,則可食也。爲 非 食 親 也 而 期、三年之喪,既葬適人,雖其黨不 《喪大記》曰:「既葬,若君食之則 「輙食、則無復限數,必至忘哀。」 黨猶親也。 孔氏 日 非 親而食 「親族不多,若 , 則 食 食 而

一一六六

皆不食矣。食之,大夫、父之友食之則食之。」則外此

也。』蓋人有所不能,亦不可强也。」也、《喪大記》曰:『不能食粥,羹之以菜可截。」 吕氏大臨曰:「不能食食,鹽、酪可鄭氏曰:「功衰,齊、斬之末也。 酪,酢

君子謂之無子。」《釋文》:「瘍,音羊。創,初良反。」酒食肉。 毀瘠爲病,君子弗爲也。 毀而死,孔子曰:「身有瘍則浴,首有創則沐,病則飲

雖惡,必充飢」至此,明居喪毀瘠節制鄭氏曰:「毀而死,是不重親。」〇自「喪食

炬,古鄧反。」 非從柩與反哭,無免於堩。《釋文》:「兔,音問。

著免。」 葬遠反哭,在路則著冠,及郊而後 不得免於道路也。 飾、故孝子送柩、反哭、於道得兔、非此 去時也。 反哭,葬竟還時也。 堩,道路。」 免,所以代冠,人於道路,不可以 鄭氏曰:「言喪服出人,非此二事皆冠也。 孔氏曰:「從柩,謂送葬從柩 此謂葬近而反哭者,若 道路不可 無 飾。 反 無 則

凡喪,小功以上,非虞、附、練、祥無沐浴。 與氏曰:「言小功以上,各在其服限如此。 無、祥不主大功、小功也。《士虞禮》『 以下櫛可也。』又《士虞禮》云『明日,以其 班祔,沐浴,櫛』,注云:『唯三年之喪不櫛,期 以下櫛可也。』又《士虞禮》云『明日,以其 ,大夫以上亦然。」 愚謂: 虞、祔、練、 禮,大夫以上亦然。」 愚謂: 虞、祔、練、 ,不櫛』,鄭注云:『唯三年之喪不櫛,期 ,不櫛」,鄭注云:『唯三年之喪不櫛,期 ,以其 ,不櫛,八功以上,非虞、附、練、祥無沐浴。 ,

不在於飾也。總麻恩輕,雖沐浴可也。

之喪,不辟涕泣而見人。《釋文》:「辟,音避。」小功,請見人可也。大功不以執摯。唯父母疏衰之喪,既葬,人請見之則見,不請見人。

之禮,賓主以擊相授,此「執擊」,謂受賓擊 喪,豈謂執贄相 氏謂『見人爲執贄相見』。 若然,父母之 者,謂與人尋常相見,不論執摯之事,而皇 葬』之下,則小功亦謂既葬也。 大功不可也。此『小功』 文承 『 疏衰』 『 既 見己,亦可以見之也。不辟涕泣,至哀無 鄭氏曰:「言重喪不行求見人爾。 人來求 摯也。大功如此,則疏衰可知 飾也。」 可見,若人執贄見己,則己不可見之而執 而執之也。大功之喪,若尋常人來見己則 孔氏曰:「小功請見人可也,則 見乎?」 愚謂:凡相見 凡言『見』

三年之喪,祥而從政。期之喪,卒哭而從政。

而從政。《釋文》:「期,音基。」九月之喪,既葬而從政。小功、緦之喪,既殯

政者正也,期而從政者權也。「三年之喪,期不使。」蓋三年之喪,祥而從從政,謂出而從國家之政也。《禮運》曰:

妹,子與父同諱。 一學時號,安得常聲乎,所謂『哭不偯』。」 一母啼號,安得常聲乎,所謂『哭不偯』。」 一母啼號,安得常聲乎,所謂『哭不偯』。」 一母啼號,安得常聲乎,所謂『哭不偯』。」 一時嬰兒失其母焉,何常聲之有!」 一時嬰兒失其母焉,何常聲之有!」

父爲之諱,故子亦同於父而諱之。父之兄母於己爲曾祖父母,正服小功,不合諱,以也。爲王父母以下之親諱,謂士也。天也。爲王父母以下之親諱,謂士也。天鄭氏曰:「卒哭而諱,自此而鬼神事之,尊鄭氏曰:「卒哭而諱,自此而鬼神事之,尊

父,故爲其祖諱。 叔父及姑,若不逮事父者,皆不諱也。 父同諱,則父母可知。父之王父母、世父、 父之祖諱也。不言父之父母者,王父母與 王父母。」此又諱及曾祖者,蓋父逮 父母,則諱王父母。不逮事父母,則不 父同爲之諱也。」 於己爲姑,在家正服期,出嫁大功,是已與 以父爲之諱,故己從父而諱。父之姊妹 姑,在家正服小功,出嫁緦麻,皆不合諱 是從祖,正服小功,父之姑,於己爲從祖 父與子同 弟,於己爲叔伯,正服期,父亦爲之期,是 有諱也。父之世父、叔父,於己 己又逮事其父,故又爲 愚謂:《曲禮》:「逮事 事其 . 諱

妻爲其親諱,夫於其側亦不舉也。孝子問鄭氏曰:「母爲其親諱,子孫於宮中不言。從祖昆弟同名,則諱。

也。」 昆弟乃小功之親,雖與母、妻之諱同,其恩 爲之諱,於己爲大功,亦不諱。若從 弟,視從父昆弟又疎,乃反諱之,何 也。從父昆弟,父報服期,然卑屬也,父不 之,出宫則不諱矣。上文「子與父同諱」, 諱。 且親之有諱不諱,爲恩之有淺深也 母之諱,在宮則諱之,妻之諱,在其側則諱 諱之。不但宮中、旁側,其餘處皆爲之諱 弟,父服小功,不爲之諱,己又不得從父而 名心瞿,凡不言人諱者,亦爲其相感動也。 雖盡曾祖之親,然皆父之尊長 之諱,於己緦親也,皆不在應諱之限。 親 昆弟在其中,於父輕,不爲諱。 子與父同諱,則子可盡曾祖之親也。 同名重,則諱之。」 孔氏曰:「從祖昆 若母、妻諱與從祖昆弟名相 愚謂:母之諱,於己小功親也,妻 與母、妻之 與其 重累,則 (兄弟 社祖昆 從祖 從祖 ·郭 ?

此文有誤脱耳。注疏之説,蓋未必然。非因而加隆也。何以遂當爲之諱耶? 疑

三,息暫反。」〇鄭注:「雖,或爲「唯」。」 哭踊三者三,乃出。《釋文》:「冠,古亂反,下同。 以喪冠者,雖三年之喪可也。既冠於次,入

之中。 愚謂 也。」 鄭氏曰:「言『雖』者,明齊衰以 則齊衰、大功 用 可也者,冠爲嘉禮,而三年之服尤重,疑 於成服之日,就喪次而冠之。 見之然。 入於殯宫也。 (嘉禮之時,故曰「雖三年之喪可也」。 也。 非其冠月,待變除、卒哭而冠。 若齊衰以下,加冠於次舍之處。」 以喪冠者,謂既及冠年而遭喪,則 孔氏曰:「冠於次者,謂加冠於廬次 此三年之喪以喪冠者之禮也。 始遭喪以其冠月,則喪服 得因喪 人哭踊三者三,乃出,蓋若 而冠可知矣。 雖三年之喪 下皆 次,廬 入者, 因 可 然 菲 以 冠

> 禮 若冠年在遭喪之明年,則因變除 用吉禮而冠矣。 除受服乃可冠矣。」 正月遭喪,則二月不得因喪而冠,必待變 朝夕哭,乃入即位也。 齊、斬之服有此,若大功、小功,則喪末可 年,至明年受服乃及冠年者則然。 初無限以二月之法。 云「屨,夏用葛,冬皮屨」,則冬夏皆可冠 固當以成服之日或變除之節,然《士冠》記 正》二月『綏多士女』,是冠用二月。 亦如之。 其非三年之喪,則冠畢至明 因變除 愚謂: 〇孔氏曰: 而冠 因喪而冠者, ,喪在 而 然亦 「《**夏** 冠,其 假 惟 **令** 小 日

可。《釋文》:「取,七住反,又如字。」功,既卒哭,可以冠、取妻。下殤之小功則不末,可以冠子,可以嫁子,可以取婦。己雖小大功之末,可以冠子,可以嫁子。父小功之

鄭氏曰:「此皆謂可用吉禮之時。父大功

卒哭而 取 互而 可取 爲一節,而皆謂之末也。昏禮攝盛,視 以卒哭、練、祥爲變除之大節。 九月,小功五月,皆以卒哭後爲末。 之大功,理不得冠、取矣。」 嫁子,小功之末非但得冠子、嫁子,復可取 而 丽 於己家,故大功之末可以冠子、嫁子,而 爲重,而嫁子 喪,自卒哭以至除喪,其間別無變除,故 婦也。下殤之小功不可冠、取,若長、中殤 云身不云『父』,小功之末,云『父』不云身, 婦。 後可爲昏禮。」 可以 ,且不可冠,以其本齊衰之親也,則 婦也。 .相通。是於身大功之末,可以冠子、 取妻。 己大功卒哭而可以冠子,小功卒哭 可 以 下殤小功之末,非但不 冠 ,則禮 下殤小功、齊衰之親,除喪 子、 成於壻家,取 嫁子,小 孔氏 曰:「大功之末, 功卒 愚謂: 婦則 奥 期、 而 八齊衰 功之 미 大功 蓋 禮 可 取 喪 成 Ŀ 以

待喪末用吉禮而冠也。説詳《曾子問》。相言禮冠者,蓋因喪冠爲不欲以未成人之用吉禮冠者,蓋因喪冠爲不欲以未成人之明矣。此又言大功、小功之喪,至喪末乃雖三年之喪可也」,則齊衰以下得因喪冠雖三年之喪可也」,則齊衰以下得因喪冠之末不可冠、取明矣。然上言「以喪冠者,

禮記卷四十一終

賜進士及第翰林院 國 史館纂脩孫 希旦集解 編 脩

雜記下第二十一之二

凡弁経,其衰侈袂。 尺二寸,與玄端服同。大夫以上之弔衰, 之弔衰,袂二尺二寸,圜殺之至袪而爲一 其袂不圜殺,故曰「侈袂」。○鄭氏曰: 弁絰,大夫以上之弔服也。 端、素端』,注云:『變「素服」言「素端」者, 「侈猶大也。 而益之,則袂侈三尺三寸。」 |士則其衰不侈。故《周禮・司服》『有玄 袂之小者二尺二寸,大者半 侈,大也。士 孔氏曰:

端。 端冕而受丹書、《大戴禮・哀公問》「端衣、 《儀禮》作「錫衣」,此從敖氏繼公説,讀錫爲緣。 主人 禮》:「主人朝服,主婦緣衣侈袂。」鏘鳴按: 明異制。 《左傳》「晏子端委立於虎門」,則朝服亦名 以玄端爲祭服,其喪衰與玄端同制,是玄 尺有二寸,袪尺二寸。」此士之喪衰也。士 名爲端衰。《喪服》記言喪衰之制 益其袂爲三尺三寸」者,必不然矣。 與冕服皆侈袂,而其制皆端,則謂「侈袂爲 置之,端冕而祀之」,是冕服亦名端。 玄裳,冕而乘輅」,韓非曰「築社者騰獗而 知,朝服侈袂,則弁、冕之服亦侈袂可知。 之朝服,與緣衣相當,緣衣侈袂,則朝服可 稱端。」 衣帶下尺,衽二尺有五寸,袂屬幅。 魏文侯端冕而聽古樂、《大戴禮》武王 大夫以上侈之」。 明士不侈,故 愚謂:注、疏之説非 也。《少牢 喪衰 朝服 衣二

禮記卷四十二

不圜 服以 端 爲一尺二寸。 以燕居,故殺其袂者,所 故其衣皆侈袂、與士異也。 弁服亦然。 之制,大夫則喪衰、弔服,其首服皆以弁, 一殺,不殺則袂侈矣。 上,皆用於朝祭,故其袂二尺二寸而 衣與袂皆二尺二寸,而 士之喪衰及弔衰皆用玄端服 蓋玄端服自天子以下 以 雖士之朝服、爵 便 其袂則園 事 也。 ·皆用 自 殺之 朝

絶樂者,服輕也。

預。閩,音問,又如字。辟,音避,一音婢亦反。」至,辟琴瑟。小功至,不絶樂。《釋文》:「與,音不舉樂。妻有服,不舉樂於其側。大功將父有服,宮中子不與於樂。母有服,聲聞焉,

衰以下之服也。若重服,則期後猶有子姓以助哀也。」 崔氏靈恩曰:「父有服,齊見之,不得觀也。大功將至,辟琴瑟,亦所命士以上,父子異宫。不與於樂,謂出行鄭氏曰:「宫中子,與父同宫者也。禮,由

道也。大功且然,則重者可知。小功至不而爲之辟琴瑟,君子不奪人之喪,忠恕之至,謂他人有大功之喪者也。己於其將至之冠,自當不得與於樂。」 愚謂:大功將

則前後家,東西家。 姑、姊妹,其夫死,而夫黨無兄弟,使夫之族 曰:主之而附於夫之黨。 人主喪。妻之黨,雖親弗主。 爲里。 亦斯義也。 **弔於異國之臣**,則其君爲主。 尹,閭胥、里宰之屬。 得夫之姓類。里尹主之,喪無無主也。 妻之黨而使夫之族人,婦人外成,主必宜 夫黨無兄弟,無緦之親也。 鄭氏曰:「此謂姑、姊妹無子,寡而死 里 一尹,其禄如庶人在官者。』諸侯 或曰『主之者,謂妻之黨自主 無有 《王度記》曰:『百户 鄭注:「里,或爲「士」。」 則 里尹主之。 其主喪,不使 夫若無族矣, 里尹主之, 也。 或 里

爲里。 之」,非也。夫之黨,其祖姑也。」 之黨,蓋不得已而通禮之窮也。 東西家,則妻之黨可以主之,而還袝於夫 或人之説,以爲夫若無族,而又無前後家 者如此其至也。「或曰主之」者,記者又引 虞、祔之事。 主,蓋哀其顛連無告,而爲之治其殯、葬、 其喪者也。 里尹於民爲親,故無主則 者,謂其所與居者皆妻之黨,而無可 群萃州處,而乃有死而無前後家、東西家 **閻置一胥**,中士也。 曰:「《周禮》六鄉之内,二十五家爲 里置一宰,下士也。」 愚謂: 古者吏之於民,其所以 六遂之内,二十五家 孔氏 用恩 以主 四民 閶

於采者,采者不麻,謂弁經者必服弔服是紳,大帶也。喪以要經代大帶也。麻不加鄭氏曰:「吉凶不相干也。麻,謂經也。麻者不紳,執玉不麻,麻不加於采。

也。 上也。」 也。 帶配之也。 得以凶服,若行聘、享大事,則吉服。 案《聘禮》已國君薨,至於主國,『衰而出』, 加於采,謂首服玄冠,則不加麻絰,身服玄 玉則不得服首經、麻帶也。 采者,謂弁絰之屬,不得加於玄衣、纁裳之 云:『其聘、享之時,自若吉也。』麻不加於 之事,執玉得服衰絰者,彼謂受主君小禮, 注云:『於是可以凶服將事。』似行聘、享 者,謂平常手執玉行禮,不得服衰麻 紳,言著要絰者不得著大帶也。 宰朝服」「取璧」,皆不服経、帶也。 遭喪,大夫練冠,長衣以受。」上篇致含, 麻」兼謂経、帶也。 謂首著麻絰,則身著麻帶,不得以大 采,玄纁之衣。」 愚謂"麻者不紳,此麻謂首 執玉不麻,麻不加於采,此 執玉不麻,謂喪中執 孔氏曰:「麻者不 故《聘禮》: 執玉不麻 故鄭 麻不 也 絰

惟 猶玄冠、緇衣也。 小斂加武、帶、絰,其 ", 則不 朋友則至成服而易以 加 麻帶也。 以是知弔 (時主人· 麻不加於采,而 麻 未 経皆葛 成服,弔者 絰 弔 也 者

國禁哭則止,朝夕之奠,即位自因也。

鄭氏 朝夕奠。 $\overrightarrow{\Box}$ 「禁哭,謂大祭祀時。 自因,自用故事。」 雖 不哭,猶

童子哭不偯,不踊不杖,不菲不廬。《釋文》: **偯,於豈反,《説文》作「悠」。** 當室,則備此經中五事。 則杖。」 鄭氏曰:「未成人者,不能備禮也。 重言也。」 十五以上。若世子生則杖,故《曾子問》云 室,則免而杖矣」。 『子衰、杖』,成子禮是也。皇氏云:『童子 孔氏曰:「案《問喪》云,童子『當 愚謂: 偯,哭之餘聲也。 戴德云: 童子當室 屏,本又作『菲』,扶味反。**」** 特云「杖」者,舉 當室 一,謂

> 矣。 **偯也。** 然。 《喪服》傳曰 湻至者,或亦非年之所能限也。 居廬,則非孩提所能,雖世子亦必待 爲喪主始生即杖,不獨世子也。至於踊 抱之。既使人抱之,則必當爲之執杖,是 大記》曰「喪有無後,無無主」,主幼則使人 葬以後,則成人哭有曲折餘聲,惟童子不 不偯,所謂「嬰兒中路失其母」是也。 不像」者,彼謂始死之時,雖成人哭父母亦 喪,雖成人哭亦不偯矣。 大約十五以上,則五者備有,而 皇氏謂「杖則備此五事」者,亦未 童子當室則杖,以其爲喪主也。 「杖者」,所以「擔主也」。《喪 而此 云「童子哭 天性 ?稍長 若既 必 與

孔子曰:「伯母、叔母疏衰,踊不絶地。 哉,由文矣哉。」 姊妹之大功,踊絶於地。 如知 ,此者,由文矣

鄭氏曰:「伯母、叔母,義也。 姑、姊妹,骨

傳》曰:「大功之哭,三折而偯。」則父母之

《間

矣哉』。若夫徒文具而無至誠惻怛之實,知此者,則凡於禮知由於内矣,故曰『由文不至。姑、姊妹之大功,文不至而情至。肉也。」 陸氏佃曰:「疏衰、大功,文也。

^{亮反。」}相。由右相,泄柳之徒爲之也。《釋文》:「相,息泄柳之母死,相者由左。泄柳死,其徒由右

失是矣。」

能又復失禮也。 離公時賢人也。相,相主人之禮。」 心之母死,擅者尚知由左,至泄柳死,其 謂:詔辭自右,以代尊者出命也。相禮與 謂:詔辭自右,以代尊者出命也。相禮與 謂:詔辭自右,以代尊者出命也。相禮與 謂:紹辭自右,以代尊者出命也。相禮與 謂:紹辭自右,以代尊者出命也。相禮與 之,擅者失禮由右,而子游正之也。 是子 於之先,擅者失禮由右,而子游正之也。 是子

> 「飯,扶晚反。」 天子飯九貝,諸侯七,大夫五,士三。《釋文》:

物,故言之,非謂當時實含用珠玉也。」 大夫而以珠玉爲含者。以珠玉是所含之 貝。此等皆非周禮,並夏、殷之法。《左 含,通而言之,含亦謂之飯也。《周 愚謂:飯,含也。 年『齊陳子行,命其徒具含玉』,此等皆是 傳》成十七年子叔聲伯夢食瓊瑰,哀十一 飯以珠,含以璧,大夫、士飯以珠, 共飯玉、含玉。』 是周禮天子飯、含用玉。 含用玉。」 鄭氏曰:「此謂夏時禮也。 命其徒具含玉」、《士喪禮》「實貝三」,不用 玉」,上篇諸侯致含以璧,《左傳》「陳子行, 玉府》「共含玉」、《典瑞》「大喪,共飯玉、含 案《禮》戴説,天子飯以珠,含以玉,諸 孔氏曰:「《典瑞》云:『大喪, 對文則米日 周禮,天子飯 飯,貝玉 含以 禮 曰

爾,鄭氏以爲夏禮,無所據也。此但言「貝」者,據上下之所通用者言其差玉,則大夫以上含用貝、玉,土惟用貝也。

士三虞,大夫五,諸侯七。五月而卒哭。諸侯五月而葬,七月而卒哭。士三月而葬,是月也卒哭。大夫三月而葬,

葬罷即卒哭。天子至士,葬即反虞者,以遠。士職卑位下,禮數未申,故三月而葬,哭異月者,以其位尊,念親情深,於時長即反虞。」 孔氏曰:「大夫以上,葬與卒鄭氏曰:「尊卑,恩之差也。天子至士,葬

事者也。其次如此也。《釋文》:「臨,如字,徐力諸侯使人弔,其次含、襚、賵、臨,皆同日而畢

其不忍一日末有所歸,尊卑皆然。」

飯、含,其次致襚以襲、斂,其次致賵物以諸侯於鄰國之喪,先行弔禮,其次致璧以

鴆反。」

國之禮則襚、賵 葬,故文五年「王使召伯來會葬」,會葬則 帛、乘馬以將之」,亦始死即致賵 年成風之喪,「天王使榮叔歸含且賵」,而 畢事者,蓋同國之禮,襚、赗異時各致,異 死有致襚,葬時有致賵,此含、襚、賵同日 自臨,故曰「其次如此 助 當致贈也 之禮也。 「子高之喪,孔氏之使者未至,冉子攝 〈葬,皆以喪事之所用爲先後,末則弔使 雖賵、襚並施,至葬時別遣 一時並施。 也」。 故《春秋》文五 案《士喪禮》始 ",皆異 人 會 國 束

殯不舉樂。《釋文》:「比,必利反。爲,于僞反。」大夫,比葬不食肉,比卒哭不舉樂。爲士,比卿大夫疾,君問之無算。士壹問之。君於卿

問之無算。或可《喪大記》云『三問』者,君之』,此云『無算』,謂有師、保恩舊之親,故孔氏曰:「《喪大記》『君於大夫疾,三問

縣。爲士,比殯不舉樂,則但去樂也。 問之者,或親往,或使人也。無算,謂無一 定之數也。《喪大記》「君於大夫疾,三問 定之數也。《喪大記》「君於大夫疾,三問 定之數也。《喪大記》「君於大夫疾,三問 定之數也。《喪大記》「君於大夫疾,三問 問之者,或親往,或使人也。無算,謂無一 則之而已。於士,但一問之而已。 《大司樂》:「諸侯薨,令去樂。大臣死,令 是之數也。於士,但一問之而已。 《大司樂》:「諸侯薨,令去樂。 長孫,三問 是之數也。無算,謂無一

以慎反。」

立古各四人,御柩以茅。《釋文》:「葆,音保。引,夫之喪,其升正柩也,執引者三百人,執鐸者,大之喪,其升正柩也,執引者三百人,執鐸者,大之喪,其升正柩也,、以引者三百人,四綍皆銜枚,司馬升正柩,諸侯執綍五百人,四綍皆銜枚,司馬

之。御柩者,居前道止之。● 大夫、士皆於廟也。廟中曰『綍』,在塗曰『引』,互言鄭氏曰:「升正柩者,謂將葬朝於祖,正柩

羽葆。 也。 諸侯執綍之人,出於三鄉、三遂也。 之節也。」 葆居柩前,御行於道,示指揮於路爲進止 軸」、『升自西階、正柩于兩楹間』、是也。 其時柩北首,故《既夕禮》云『遷于祖,用 六綍。]天子執綍之人,出於六鄉、六遂,則 用役,則帥其民而至,遂治之。」《遂人》: 右各八人,夾柩以號令於衆也。 匠人,工 皆銜枚者,謂執綍之人口皆 於祖廟,柩升廟之西階,正於 「大喪,帥六遂之役而致之。及葬,帥而屬 二綍。」 羽葆者,以鳥羽注於柄 司馬,夏官,主武,故執金鐸率衆,左 葆,謂蓋 孔氏曰:「升正 愚謂:《周禮 也。 執蓋物 柩者,謂 鄉師》:「大喪 御 頭 銜枚,止諠囂 如 柩 兩 蓋,謂 , 謂 楹之間。 將葬朝 諸侯 執 之 羽

❶「止」、《禮記注疏》作「正」。

喪》記 六遂, 與匠 也。 與。《周禮 政令也。 之間胥、里宰,平時則屬於地官,而掌間 匶,出宫乃代。」又《鄉師》:「大喪,執纛以 羽葆於柩前以指揮,爲柩行抑揚左右之節 里之政教,有事則屬 司 人,諸侯 御 教大閲 馬, 鄉、 匶 ,匠師之所職,而鄉師 師 7,及出 **!**繣結! 周 謂 丽 云: 御匶 禮 兩 遂, 五 執 兩 匠人,匠師,蓋冬官之考也。 官而 項 綍者千人矣。 司 ·大司馬》注云:「枚如箸,銜 百 司馬 遂、 而治役。」是王 而 中,軍 喪祝》:「及朝 馬也。」《周 人,大夫三百人,則士百人 執綍五百人,則天子六鄉 匠 代 振鐸。」兩 以 納 法止語,爲相疑惑也。 於司馬 鄉 車 師 統 于 禮 執綍者,天子千 一喪朝 與 領六鄉,徒役是 階 司 御 , 而 匠 間 馬,即 大 扇,以 匶 師 主 司 一, 及 也。 是 一徒役之 鄉、遂 馬 葬 喪祝 柩 \sim 御 土 執 車

> 茅,蓋此類也。 茅爲之,亦所以指 也。 亦然。 其所 助,不可以徒役之法治之也。 枚」者,大夫執引之人或出於朋友、鄉黨之 綍,不言者,從上差之可 柩之法,朝廟 引」,互相備,以見所用之人數,及執鐸 謂之引。 主,故以 朝 廟 此不 於諸侯言「執綍」,於大夫言「執 屬 於輔 言 此二人御匶 與在 士御柩以 喪 軸 麾也。 塗時 祝」及「 謂之綍,在塗屬於柩 並 功布 知也。 《左傳》楚軍 鄉 同 諸侯之禮 也。 師」者,文 茅,編 不言「 大夫二 緝 蓋 前 白 銜 御 略 車

也。 孔子曰:□ 祀其先人,豚肩不揜豆,賢大夫也,而 節 於檢反,本亦作「揜」。 面 君子上不僭上,下不偪下。」《釋文》: 藻棁,賢大夫也 「管仲鏤 偪,音逼,本又作『損』。」 簋 而 而難 朱 紘,旅樹 爲 上也 而 反坫 晏平仲 難爲下 Ш

説見《禮器》及《郊特牲》。

鄭氏曰:「難

爲上,言其僭天子、諸侯。難爲下,言其偪

士、庶人。」

喪,則君夫人歸。鄭注:「踰封,或爲「越疆」。」婦人非三年之喪,不踰封而弔。如三年之

期,而云『三年』者,據本親言之也。」
奔者也。 孔氏曰:「女子出適,爲父母喪,則君夫人尚歸,又以明父母之喪無不喪,則雖兄弟之喪不奔也。如三年之婦人無境外之事,故非三年之喪,不踰封

音暉。」〇鄭注:「闖門,或爲「帷門」。」

咋。其他如奔喪禮然。《釋文》:「闖,音章,劉昌宗諸侯然。夫人至,入自闖門,升自側階,君在夫人其歸也,以諸侯之弔禮,其待之也,若待

宫中之門曰闈門,爲相通者也。側階,旁門,升自側階,女子子不自同於女賓也。待之若諸侯然,謂主國所致禮。入自闈鄭氏曰:「以諸侯之弔禮,謂其行道車服。

階也。 階下之位,明不爲變位,以其非賓客也。 之兩階,皆變於吉時也。 門,則不入大門,升自側階,則不升路 升自側階,自東房而 西有階,其北 參个。」側階,北階也。側,特也。堂南,東 **闈與大門」。《考工記》曰:「闈門,容小扃** 門,宫旁小門也。 他,謂哭、踊、髽、麻。」 惟 東方有之,故曰「側階 《左傳》齊「子我屬 出於堂也。 君在阼,謂在阼 愚謂 入白闈 寢 徒 閳 前 攻

嫂不撫叔,叔不撫嫂。

鄭氏曰:「遠别也。」

均而倍焉,君子耻之。《釋文》:「其行,下孟反。」 子耻之。 言無其行,君子耻之。 子有五耻:居其位無其言,君子耻之。 之、患弗得學也。既學之、患弗能 君子有三患: 未之聞, 患弗 地有餘而民不足,君子耻之。 既得之而又失之,君 得 聞 行 也。 也 有其 既 聞 君

孔 則無 由己 用 足以 足以 不足 爲 養,使民逃散 足以 五 其位 患 蓋鄙夫之心在乎固其位,君子之心在 之,患失之。』此乃言『既得之,又失之』。 鄙 以立其事 耻 氏 也。 學之事: 民衆,彼此 夫事 保 不 副 낈 懷其民。 皆從政之事: 以 曰 其言。 習 其 能 稱其位。 勢不足以 德不足以 君,其未得之,患不得之, 「地邑民 禄。 也。 其 勸課督率也。」 弗得聞則無以 事 均等, 放土 衆寡均 地有餘 〇方氏慤曰:「孔子嘗謂 既得之而又失之,則 弗 稱 固 有其言無其行 居 能 居其位 其位而失之者,君子所 其 地 而他人功績倍多於己, ,必參相 行 位 而倍焉,則才力不足 有餘 而 則 民不足,則恩惠 而失之者,鄙 無 知其理,弗得學 無其言 而 愚謂:三患皆 以 得,今不能 民 體 ,則猷爲不 不足。 ,則謀 其 计德不 實也 既 宇稱 夫 役 得 謨 所 不 撫

> 孔子曰:「凶年則乘駑馬,祀以下牲。」 六種 牢,凶 戎馬、 也。一 鄭氏 耻 降用特豕。 馬,負重致遠所乘。 而 當失而失之,君子固 耻者,謂己之職業不 駑馬也。 天子、諸侯及天子大夫常祭用大 不失,君子尤不能 也。 最下者。 曰:「自貶 年降用少牢。 齊馬、道馬、 此 孔氏曰:「《校人》馬六 所 士常祭特豕 以 爲 下牲,少 損, 異。」 田馬, 亦 以 脩 凶年 未嘗以 諸侯大夫常祭少牢, 取 而 ,降用特豚。 牢若特豕、特豚 易 日安也。 見褫奪也。 愚 此 人君 爲 謂 五 供 耻 也。 路 自 種: 君子、 貶 所 而 駑馬 乘,駑 種 損 之所 當 如此 乘

| 喪禮》於是乎書。| 恤由之喪,哀公使孺悲之孔子學士喪禮、《士

之類,皆爲下牲也

鄭氏曰:「時人轉而僭上,士之喪禮已廢

一張一弛,文武之道也。」《釋文》:「樂,音洛。」

弛,文武弗能也。 弛而不張,文武弗爲也。
『百日之蜡,一日之澤,非爾所知也。 張而不
『一國之人皆若狂,賜未知其樂也。」子曰:
『一國之人皆若狂,賜未知其樂也。」子曰:
矣,孔子以教孺悲,國人乃復書而存之。」

怪之。 飲初 子貢以禮儀有序,乃是可樂,今酣飲號呶 非女所知,言其義大。」 也。今一日使之飲酒燕樂,是君之恩澤。 休息之,言民皆勤稼穡,有百日之勞,喻久 時,民無不醉者如狂矣。曰『未知其樂』, 以禮屬民而飲酒于序,以正齒位。於是 物而索饗之也。國索鬼神而祭祀,則黨正 鄭氏曰:「蜡也者,索也,歲十二月合聚萬 人皆若狂 Ē 蜡之祭,主先嗇 毖 ,則非歡樂,故曰『未知其樂』也。 位,及飲末醉,無不如狂者 而祭司嗇,勞農 孔氏曰:「蜡祭 也 以

蜡祭飲酒逮乎民,故恩惠浹洽 賓賢能之禮專於士,故節之以禮而不過。 祭飲酒,至於一國之人皆若狂 之以道,化之以理,則文武治民之道也。」 爲治也。 苦,則民有驕逸之志,民若如此,文武不能 設,則失其往來之體,喻民久休息而不勞 民:弓張而不落弦,則絶其弓力,喻民久 張,謂張弦。 之澤」也。 ○愚謂:鄉飲酒之禮,安燕而不亂,而 亦不能使人之得所也。弓久落弦而不張 勞而不息 **恣其醉如狂,是由於君之恩澤,故云『一日** 喻久,其實是一年之勞苦也。今日歡休, 孔子言蜡而飲,是報民一年之勞苦,故云 『百日之蜡』也。 弓一張一弛,喻民勞逸相參,調 ,則亦損民之力,縱令文武之治 其義深遠,故曰『非爾所知』也。 弛,謂落弦。孔子以弓喻 言『百日』者,舉其全數, ·,何 ,而醉飽有 也?

所不禁也。

爲之也。 七月日至,可以有事於祖。」七月而禘,獻子玉獻子曰:「正月日至,可以有事於上帝。

事也。 耕而 郊,不從。 孟獻子曰:「郊祀后稷,以祈農 孔氏曰:「《左傳》襄公七年『夏四月,三卜 疏 事於祖。」七月而禘,獻子爲之也。] 此 至,可以 天用周之三月。而《禮記》云: 『「正月 獻子之時不書『七月禘』也?」《左傳》襄七年 月禘者。烝、嘗過則書,禘過亦宜書,何以 月而禘,獻子爲之,則當獻子之時,應有七 禮記》俱稱獻子,二文不同,必有一謬。 禮記》後人所録、《左傳》當得其真。 卜郊,宜其不從也。」」據獻子此言,郊 愚謂: 是故啟蟄而郊,郊而 有事於上帝。 魯無夏至禘,亦無冬至郊,魯 七月日至,可以 ト耕。● 若七 今既 與 日 有

郊皆以孟春正月。此《記》所言,其誤

無疑。

夫人之不命於天子,自魯昭公始也。 《玉藻》曰「唯世婦命於奠繭,其他則皆從 謂: 獨昭公夫人書「孟子卒」,定公夫人書 其夫人乎? 氏卒」。 秋》於魯適夫人之喪皆書「夫人某氏薨」, 男子」,未有既命其夫又命其妻者也。 夫之爵位,夫榮於朝,則妻貴於室 有王命也,因昭公娶吴女附會之耳。」 下久矣。❷ 郝氏敬曰:「魯昭公之世,王命不行於天 郝氏之説似矣,而未盡 蓋當時不以夫人之禮治其喪,故 諸侯繼世自立且 諸侯之不娶同姓者,未必皆 也。婦人從其 不由天子,況 矣。 《春 姒 故 愚

「天下」、《禮記義疏》作「諸侯」。

[「]卜」、《春秋左傳注疏》作「後」。

而不知夫人本無受命之法也。 世子怠慢之罪。讀者不察,遂以爲二夫人 是,而所娶者乃吴女,遂以爲昭公取同姓, 是,而所娶者乃吴女,遂以爲昭公取同姓, 是子,故其書之如此。又以昭在定 是子,故其書之如此。又以昭在定

反,下「爲夫」「爲之服」同。」外宗爲君、夫人,猶内宗也。《釋文》:「爲,于僞

祭,佐王后薦玉豆,眂 故曰「外宗」。 外宗,宗婦也。 爲 婦 與《周禮》外宗之所職者相合,則外宗即宗 外坐」,主婦「致爵于主人,宗婦贊豆」,皆 **叠則費。** 「宗婦執盎從」、《特牲禮》「宗婦執兩籩,户 们的矣。 天子服 凡王后之獻亦如之」。《祭統》云 斬,「夫人猶外宗之爲君也」。 内宗,宗女也。 《 周 以其自 禮 豆、籩,王后以樂羞 他族來嫁 外宗》:「宗廟之 《服問》曰,諸 於宗 内, 侯 此

服。 以諸 也。 服之月數,而服則皆以齊衰也。 本有 之爲天子,乃從服也,從服不累從,故但爲 言「外宗爲君」,猶内宗臣爲君服斬,其妻 正 故君之姑、姊妹嫁於國内大夫爲妻,是其 爲國君。」 母,皆是也。 君服斬,夫人齊衰,不敢以其親 天子服而不服王后。内、外宗於君、夫人, 外宗之於君,皆服齊衰期也。 從服齊衰。是諸侯夫人之於天子,與内 而嫁於諸臣者,從爲夫之君,嫁於庶人,從 曰:「外宗、内宗,皆謂嫁於國 也。 外宗,謂姑、姊妹之女,舅之女及從 1服者 侯不内娶。 其爲君皆齊衰期 舅之女及從母 也,故不但爲君服 孔氏曰:「古者大夫不外娶, 内宗,五屬之女也。 諸侯雖曰 ?,其爲夫人則各依本 在國中者 外取,舅之女及 中者 然諸侯夫人 而并爲夫人 ,非正也, 服 服 0 其無服 .也。爲 鄭 至 尊 氏

亦然 爲五屬之女,及言内宗無服而嫁者之服 從母元在他國,不得來嫁與己國卿大夫爲 禮》有饗他邦送者之禮,則卿大夫亦非不 至大夫不外娶,雖《公羊》之説,然《士昏 與諸侯爲兄弟者服斬,特主男子言之耳。 降服齊衰不杖期,雖諸侯之女子子適人者 婦人不貳斬,故女子子適人者,爲其父母 屬,及謂「内、外宗皆爲君服斬」,則非是。 皆是也。至其以外宗爲姑、姊妹之女之 妻,以大夫不外娶。」 可外娶矣。 也。 豈有内、外宗乃爲君服斬乎? 愚謂: 鄭氏以 内宗

夫再,亦相弔之道也。 ^{廐焚,}孔子拜鄉人爲火來者。拜之,士壹,大

伯職》曰:「以弔禮哀禍災。」」鄭氏曰:「言『拜之』者,爲其來弔己。《宗

孔子曰:「管仲遇盜,取二人焉,上以爲公

時掌反。辟,匹亦反。」也,自管仲始也,有君命焉爾也。」《釋文》:「上,死,桓公使爲之服。 宦於大夫者之爲之服臣,曰:『其所與遊,辟也。可人也。』管仲臣,曰:『其所與遊,辟也。可人也。』管仲

鄭氏曰:「管仲言此人可也,但居惡人之地。善桓公不忘賢者之舉。宦猶仕也。善桓公不忘賢者之舉。宦猶仕也。善桓公不忘賢者之舉。宦猶仕也。善桓公不忘賢者之舉。宦猶仕也。时,被至於爲盜耳。使爲之於公也。辟,称辟也。言二人才本可用,特所與遊者非其人,故至於爲盜耳。使爲之服者,定爲行,故至於爲盜耳。使爲之服者,使爲服,故至於爲盜耳。使爲之服者,使爲水。

過而舉君之諱則起。與君之諱同則稱字。

新。與君之諱同,謂諸臣之名也。」鄭氏曰:「舉,言也。起立者,失言而變自

内亂不與焉,外患弗辟也。《釋文》:「與,音預

難。」 國内篡弒。不與,言不可從於爲亂。 圍滅。弗避,謂見危授命。 慶,蘧伯玉之於孫、甯是也。 威劫利誘,而毅然不回,若晏子之於崔 也。若力能討則討之。」 仲』,《傳》 當死之也。 鄭氏曰:「謂卿大夫也。 力不能討,不與 孔氏曰:「内亂不與,謂力不能討 曰:『君子辟内 《春秋》魯『公子友如陳葬 而已。至於鄰國 同僚將爲亂,己 愚謂: 内亂 外患,謂國見 難 而 爲寇,則 不 蓋雖 辟 謂 原 外

《贊大行》曰:「《贊大行》者,書説《大行人》之 男五寸,博三寸,厚半寸,剡上,左右各寸半, 里五寸,博三寸,厚半寸,剡上,左右各寸半, 學氏曰:「《贊大行》者,書説《大行人》之 專反。」

也。 伯『皆三采三就』,謂一采爲一就,故『三采 等諸侯皆一采爲一就。《典瑞》云公、侯、 蒼」,是一采爲二等,相間而爲六等也。五 等:朱、白、蒼,朱、白、蒼。』按今《聘禮》記無重 朱、白、蒼也。 六等, 六行也。 畫上三色, 《周禮》有《大行人》篇。 《贊》者失之矣。」 「朱、白、蒼」字、蓋轉寫失去。 云:『朝天子,圭與繅皆九寸。 每色爲二行,是三采六等。 五等諸侯, 圭、璧俱 大行》。 剡,殺也,殺上左右角各寸半也。 朱、白、蒼畫之再行也。子男執璧,作此 三就」,其實采别二就,三采則六等也。 有書論説《大行人》之禮,其篇名謂之《贊 典瑞》又云子男『二采再就』,二采,謂朱、 藻,謂以韋衣木以藉玉者。三采, 孔氏曰:「贊,明也 以玉爲之,故曰『玉 作此《記》之前,别 既重云『朱、白、 案《聘禮》記 繅三采六

一八五

同。 亦一 琮,繅皆二采一就,以頫、聘。』此謂卿大夫 緑 謂:公、侯、伯執圭,子、男執璧,此乃俱蒙 其廣,則玉三寸,而繅蓋一尺許也。」 每采唯一等,是二采共一就也,與諸侯不 則 中央而止。其殺之度,從上端之中央至兩 上端之一寸半,斜嚮上削之,各至上端之 「圭」言之者,文不具也。 「博三寸」以下, 揜其上者也。 明圭之制也。剡上,左右各寸半者,距圭 二就,五采則十等也。」 敖氏繼公曰: 云「繅皆玄纁」,則以帛爲之明矣。舊説謂 繅以帛爲之,表玄裹纁,所以藉玉,而又 ,從上端至下,皆一寸半也。《聘禮》記 四等也。 也。二采故二就,其實采别二就,二采 采爲一就。五采,故五就,其實采别 其天子,則《典瑞》云『繅五采五就』, 《典瑞》又云:『瑑圭、璋、璧、 圭與繅皆九寸,其長同。 愚 若

白、蒼、黄、玄,而二采者以朱、白也。白、蒼,用五行相克之次,則五采者以朱、藻皆以二等爲一就也。此三采者以朱、皆三采三就」。而此云「三采六等」,則凡「以韋衣木」者非。《典瑞》言公、侯、伯「繅

鄭氏曰:「子之食奚當者,問其先世始仕公之下執事也。」《釋文》:「當,如字,舊丁浪反。」

就音式。到,苦圭反。」 就商則釁之,其禮:祝、宗人、宰夫、雍人皆 一世。記此者,以其對辭得禮。 也。記此者,以其對辭得禮。 也。記此者,以其對辭得禮。

❶ 「其」,據《禮記注疏》當作「甚」。

八乃降

皇氏

굸

「舉羊

謂

縣

升

東

西之中

而

南

面

刲

割

其羊,使血

流于前,

間

而

升也。」中屋南

面者,謂當屋

棟之上,

抗

舉

其

羊升於屋

由

屋東西之中,兩階之

衣。

雍人舉羊

护

屋

百自中

者,

熊氏

云:

「謂

素裳,其祝、宗人等入廟之時,則爵弁、緇

是拭羊在廟門之外。玄服,謂朝服緇衣、

行,入廟門。』既云『拭羊,乃行,入廟

門。

廟。」君曰:「諾。」遂入。雍人

八拭羊。

乃

夫、雍人皆玄服。

宗人曰:「

請

命以

釁某

君玄服立於寢門

内,南鄉。

祝、宗人、

室

大戴禮

釁廟》篇云:

『成廟,則釁以羊。

士服,純衣,謂絲衣,則玄衣、纁裳

也

鄭

氏

曰

廟

新

成

必釁之,尊

而

神之也

於君

日

『請命以釁某

廟。』君

居上者,宰夫

也。

宰夫,攝

也。

拭,静也。

自,由也。」

孔氏曰

爵

饔也。 朝服 孔氏 也。 祈 服 掌割亨之事。』《大戴禮》云:「君玄服立於 掌侯禳禱祠之祝號。 亦是「釁」,互相 毛牲是「幾」,此用毛牲曰「釁」,明下 而 下文「門、夾室用鷄」曰「衈」,此不曰 衣」,非也。 據《大戴 者,敬其 服。」玄服,即純 寢門内,南向。 祝、宗人、宰夫、雍人皆玄 测,则 福 色緇,不可謂之玄衣。且此言「爵弁、 .謂「廟門外朝服緇衣,入廟乃爵弁、純 宰夫,於諸侯司徒之屬也。雍人,内 「釁」者,下文用羽牲曰「衈」,明此 祥 此四官皆諸侯之士也。 《周禮 禮》,請 事 珥者弭禍災 也。 凡言「玄衣」「玄服」,皆祭服。 衣也。 命時已玄服,則亦已爵 備 内饔》:「凡宗廟之祭祀, 不服冕者,釁廟禮輕也。 也。 ,釁者欲其消釁咎 宗人掌禮,宗伯之屬 爵弁、純衣,士之祭 祝,小祝 君亦玄衣 也。 小祝 ·用雞 幾 弁。 也 用

> 夫攝主 乎 ? 純 之中也 自兩階間東西之中。中屋,當屋極上東西 神又次之,雍人掌割牲又次之也。 在庭之中,所以識陰陽,引日景也。 於碑南、蓋參分庭一在南也。 衣」於「拭羊」之上,可謂 祝之,以辭告神也。 |最在東,宗人掌禮事次之,祝掌告 碑,以 「入廟」 東上者,宰 石 乃爵 自中, 爲之, 北 面

室而立 屋下。 事畢,乃皆退。《釋文》:「衈,如志反。 門、夾室皆用雞,先門而後夾室。 堂之兩旁,故曰「夾室」。 雞 減於廟室,故釁不用羊也。 孔氏曰:「門,廟門也。夾室,東西箱也。 室,夾室又卑於門也。」 ,凡用三雞,故曰『皆』也。 ,門則有司當門, 割雞,門當門,夾室中室。 北面。 愚謂: 門當門,謂 門與夾室各一 既事,宗人告 **先**門 鄉,許亮反。」 東 有司皆鄉 其衈皆于 西 而 在門 箱 後夾 夾

,實出於《大戴禮

・釁

廟》篇。

彼云「門

似

欲以補記之所未及。然此記

所

朝,直遥反。」

衈。

疏乃謂羊亦有屋下之衈,雞

亦有

屋

上.

門内

朝

服

既反命,乃退。《釋文》:

雞

,於屋下割之,門當門,夾室中室而

謂之

羊,升屋而刲之,而謂之釁。

門、夾室

用

割

雞使

心血流。

愚謂:

據記文,則廟

用

禮 則似 以 釁,記中實無此義也。 此亦於屋下爲之,未必升屋 云:「《小戴禮》『割雞屋 「衈,謂將刲割牲以釁,先滅耳旁毛薦之」, 重,故在屋上,衈之禮輕,故於屋下。 屋下之衈矣。蓋釁、衈自爲二禮。 屋下割雞 衈 ,郟室割 雞,有司 ・司約》云:「若有訟者,則珥而辟藏。」 ,滅耳旁毛」之説,本無所據,而先**衈** 先 衈 别 後釁,故 當門北 雞 無屋上之釁,而廟 於室中」,可 疏 面 , 雍人割雞屋下, 當 家 上」。」然《小戴記 盧辨《大戴禮 申其説 見門、夾室即在 也。 如 亦 此。 鄭 釁之禮 未 氏云 必 《周 注 後 然 有

夫也。

〇鄭氏

曰:「衈,謂將刲割牲以釁,

禮略也。

有司,宰夫、宗人與祝也。

有司

室之中,亦南

面也。

衈

不於屋上者,與

之

鄉室、當門,皆北面東上。

告事畢,告於宰

先滅耳旁毛薦之。」

孔氏

日 :

「其衈皆於

屋下者,謂未刲割羊與雞之時,先滅耳

旁

毛以

薦神,廟則

在

.廟之屋下,門與夾室則

在門、夾室之屋下,

衈訖然後升屋

丽

釁

門當門,夾室中室者,謂衈訖爲釁之時,門

則當門屋之上中,夾室則當夾室上之中,

内南

面

而當門之中也。

夾室中室,謂在

夾

南鄉于 反命于君曰:「 實無此語,蓋南北朝講師相傳之説耳。 釁某 廟事畢。」反命于寢,君

鄭氏曰: 「君朝服者,不 至 廟 也。」 愚

謂 玄衣 此 君朝服者,不至廟」,故疏謂《大戴禮》之 反命, 内 闁 ',則請 爲朝服 内 君朝服者,事 路寢 命 非也 時 門 内 也 亦 然。 畢禮殺 始請 反 命 命 也。 君 時君南鄉於 亦玄衣. 鄭氏謂

豚。《釋文》:「親,音加。」 道也。凡宗廟之器,其名者成,則釁之以豭路寢成,則考之而不釁。釁屋者,交神明之

樂之義 之也。 鄭氏 成 成 宗廟名 血 曰『晉獻文子成室,諸大夫發焉』,是也 「落,謂與賓客燕會,以酒食澆落之,即 則 塗之也。 ,則釁之以豭豚,而齊宣王以牛釁鐘者 不釁 考之者,設盛食以落之爾。 也。 器,謂尊、彝之屬 「路寢,生人所居。 也。 器之名者,成則釁之,殺 不 · 及 廟,故不 愚謂:宗廟之器,名者 甪 不釁者,不神 羊。 孔 若 《檀弓》 氏 1細者 豭 曰 豚 歡

戰國人君奢侈耳。

寡君 行。 有司 敏,不能從而事社稷、宗廟,使使臣某敢告於 諸 反,下「使臣」「使者」同。 執事。」主人對 鄭氏 侯 敢不敬須以俟命。」有司 至,以夫人入,使者將 亦官受之。《釋文》:「比,必利反。 出夫人,夫人比 曰:「行道以夫人之禮者,棄妻致命 曰:「寡君固前辭『不教』矣: Ш 至于 ,武景反、《字林》又音猛。」 其 (國,以 命 官陳器 曰 : 夫 使者,色束 Ш 寡 人 一,主人 之禮 君 不

法也。」 齎。 也。 賓 謂 其家乃義絶,不用此爲始。 納采,主人曰「某之子惷愚,又弗能教」,是 命。」器皿 入致 納 敬須以俟命者,謂不敢嫁以俟後命, 采 孔氏 時 命 愚謂:前辭「不教」者、《士昏禮》 ,其本所齎物 也。 如 曰:「云『官』者,明付受悉如 初,主 此 辭 賓 人卒辭 在門外,擯者傳焉。 也。 曰 : 律,棄妻畀 前辭『不教』, 取 不 所 聽

主之官,今其官各以所典者陳之,主人亦辭「不教」矣,敢不敬須以俟命,此即主人之醉。鄭氏謂「别有『敢不聽命』之語」,之卒辭。鄭氏謂「别有『敢不聽命』之語」,以之心,蔡人嫁之」,齊侯伐蔡。寡君固前進其反之也。《左傳》齊桓公歸蔡姬,「未冀其反之也。《左傳》齊桓公歸蔡姬,「未

使有司各以其官受之也

恭。辟,音避。」 恭。辟,音避。」 恭。即,去使人致之曰:「某不敏,不能從而共之子不肖,不敢辟誅,敢不敬須以俟命。」使之子不肖,不敢辟誅,敢不敬須以俟命。」使之子不肖,不敢辟誅,敢不敬須以俟命。」使秦盛,使某也敢告於侍者。」主人對曰:「某妻出,夫使人致之曰:「某不敏,不能從而共

出也。唯國君不稱兄。姑、姊妹見棄,亦也。棄妻者,父兄在則稱之,命當由尊者鄭氏曰:「肖,似也。言不如人。誅猶罰

舅之辭則曰「某之子不敏」,兄則曰「某之曰「某之姑、某之姊若妹不肖」。」 愚謂:

弟不敏」,餘與夫之辭同

《釋文》:「少,詩召反。食我,音嗣。飧,音孫。」吾飧,作而辭曰:『疏食也不敢以傷吾子。』」以禮。吾祭,作而辭曰:『疏食不足祭也。』孔子曰:「吾食於少施氏而飽,少施氏食我

遭者少,故孔子於少施氏而善之。 人解以『疏』。」則少施氏之所以待孔子者, 「客祭,主人辭曰:『不足祭也。』客飧,主 人辭以『疏』。」則少施氏之所以待孔子者, 了禮之所當然,而非有所過也。但時人知 乃禮之所當然,而非有所過也。。 以商氏,魯

納幣一束,東五兩,兩五尋。

東,貴成數。兩兩合其卷,是謂五兩。八鄭氏曰:「納幣,謂昏禮納徵也。十箇爲

卷矣。 尺曰 同 幣一東」。東五兩,五兩即五匹也。謂之 兩頭各卷至中央,每卷二丈,則每匹爲兩 謂:納幣用帛,以五兩并而束之,故曰『納 人用緇, 兩者,指其卷數言之也。 十尺,今謂之匹,猶匹偶之云與。] 也 凡用帛爲禮者、皆以束。 士以上用玄緇,而其爲一束則 兩五尋,則每卷二丈也,合之四 帛長四十尺,從 納幣,庶 愚

「見,賢徧反。」 北上。是見已。見諸父各就其寢。《釋文》: 婦見舅姑,兄弟、姑、姊妹皆立于堂下,西面,

舅姑之堂下,東邊西鄉,以北爲上,近堂爲曰:「兄弟、姑、姊妹皆立于堂下,皆立於諸父,旁尊也,亦爲見時不來。」 孔氏者,兄弟以下在位,是爲已見,不復特見。鄭氏曰:「婦來爲供養也。其見主於尊

尊也。舅姑在堂上,婦自南門人,從兄弟、姑、姊妹前度,即爲相見,不復更就其室見之。諸父,夫之叔伯也。既是旁尊,故婦明日各往其寢而見之。」 愚謂: 姑亦旁尊也,其尊與舅姑敵,不當立於舅姑之堂下,此不當有「姑」字,蓋經中多連言「姑、姊妹」者,遂誤衍耳。兄弟、姊妹立於舅姑之堂,此不當有「姑」字,蓋經中多連言「姑、姊妹」者,遂誤衍耳。兄弟、姊妹立於舅姑弟在姊妹之前也。其見諸父,蓋在明日舅姑醴婦之後與。

禮。燕則鬈首。《釋文》:「鬈,音權,又居阮反。」女雖未許嫁,年二十而笄,禮之,婦人執其

則主婦及女賓爲笄禮,主婦爲之著笄,女育鬌、紒也。」 孔氏曰:「十五許嫁而笄,許嫁之笄。既笄之後去之,鬈首,猶若女許以成之。言『婦人執其禮』,明非鄭氏曰:「雖未許嫁,年二十亦爲成人矣。

賓以 謂分髮爲鬌、紒、未笄者之法也。 榮,女行著聞,然後采擇加焉,故未許嫁者 笄後恒笄,未許嫁者雖行笄禮,而在家燕 於其笄貶其禮,亦所以媿勵之也。 執其禮,而不以女賓。蓋婦人以得所從爲 之冠,使賓爲之加冠,又爲之酌醴以禮之。 既笄而以醴禮之也。 成人之年,故雖未許嫁亦笄也。 則笄矣。未許嫁,則二十而笄,以二十乃 者處之。」 禮 女賓執之。若未許嫁之笄,則使家之婦 人,若兄弟之妻,及世叔母之屬也。 爲鬌、紒也。 尋常在家燕居,則去其笄而鬈首,謂分髮 女子許嫁而笄,其加笄及醴之之禮,亦使 ,無主婦、女賓,不備儀 醴禮之。 愚謂:女子十五而許嫁,許嫁 此既未許嫁,雖已笄,猶爲少 未許嫁 婦人,謂在家之婦 而笄, 也。 則 既笄之後 婦 禮之,謂 許嫁者 人執 男子 其

居則去其笄而鬈首,仍爲少者處之,亦所

以貶於許嫁者也。

允反。紃,音巡,徐辭均反。〕

一一尺,會去上五,不至下五寸。純以素,
一一尺,下廣二尺,上廣一尺,會去上五,

以 以爵章六寸者,謂會縫之下,轉之兩邊,紕 去鞸上畔廣五寸,謂會上下廣五寸也。 諸縫中,若今時像 純、紕所不至者五寸,與會去上同。 也。 與紕同。 鄭氏曰:「會,謂領上縫也。 三尺,與紳齊也。下廣上狹,象天地數也 會去上五寸者,會,謂鞸之領縫 爵 章倒攝之,兩廂各三寸也。不至下五 紕六寸者,中 在旁曰紕,在下曰純。素,生帛 也。」 執之,表裹各三寸也。 孔氏曰:「韠長 領之所用,蓋 也。 此 紃 紕 縫 施

禮記卷四十二終

賜進士及第翰 國 史館纂脩 孫希旦集解 林院 編脩

喪大記第二十二之一《别録》屬《喪服》。

孔氏曰:「按鄭《目録》云:『名曰《喪大 兼有君、大夫、士之禮,所記廣大,故曰《喪 記,專記《士喪禮》之所未備者也。 其委曲詳備繁多。』」 殯、葬之事。』劉元云:『《記》謂之大者,言 記》者,以其記人君以下始死、小斂、大斂、 愚謂:《士喪禮》有 此所記

大記》。

疾病,外内皆埽

《士喪禮》正作「墉」。

庭及堂,正家之常道。今於此又皆埽者, 繼公曰:「埽者,爲將有事也。」 肅外内以謹變,致潔敬以慎終也。」

去,起吕反。」 君、大夫徹縣,士去琴瑟。《釋文》:「縣,音玄。

士。 鄭氏曰:「凡樂縣,●天子宫縣,諸侯軒縣, 大夫判縣,士特縣。去琴瑟者,不命之 愚謂:爲將死不用,且妨於喪事

寢東首於北牖下。《釋文》:「首,手又反。」〇鄭注: 而琴瑟其所常御,故言「去琴瑟」。

「北牖下,或爲「北墉下」。」今按:室北無牖,作「墉」爲是。

牖下。」 鄭氏曰: 之,東首,加朝服。』東方生長,故東首鄉 「謂君來視之時也。 孔氏曰:「《論語》:『疾,君視 病者恒居北

0 縣」、《禮記注疏》作「器」。

鄭

氏曰:

「疾困

曰

病。」

應氏鏞

日

「埽

禮記卷四十三

九五五

也。大夫、士賜樂者乃有縣、士賜樂者少、

廢牀,徹褻衣,加新衣,體一人。 生氣。 東首 牖户 暫移 此 當北面視之。其説非是,故孔疏駮正之。 其東首雖同,而當遷於南牖下矣。 病時或異平時,故特明之。至君視之,則 子寢必東首」,所以受生氣也。 又室南近 愚謂"疾者居正寢北墉下也。《玉藻》「君 ,爲君來視之時,則是臣處北 南 於北墉下者 而 疾者恒 光 牖 明、北則深静、於寢處爲宜 下,東首,令君得南面視之。」 在北牖 ,平時寢處之常也。 下,若君來視之, 墉下,君乃 鄭氏 嫌 以 疾 是 則

易之者,爲其不可服故衣以死也。衣云一也。」 敖氏繼公曰:「褻衣,死衣也。必偿,手足也。四人持之,爲其不能自屈伸矣,互言之也。加朝服者,明其終於正也。庶其生氣反。徹褻衣,則所加者新朝服然氏曰:「廢,去也。人始生在地,去牀,

死。 足,至綴足用 而持手者猶二人也 明矣。自此以至於沐浴之前,皆用 衣、裘、葛、袍、繭、絅、褶之屬也。 識之而返也。 絕者,魂之散也,故使人持衣而復,欲 降於地。 此略之。」 愚謂:人之魂魄聚則生,散則 者、爲其後有襲、斂等事、皆用上衣、故於 『褻』,見其非上 「褻」,下言「新」,互見之也。 而以尸就地,冀魄之依之而還也。 魂陽而魄陰,人死則魂升於天, 上衣者,朝服玄端之類。 始死體僵者,魄之散也,故 燕几,則御者一人坐持其足, 廢牀與復,同 衣。 然則新者 然則非朝服 亦非 義 不加 既 人持手 也。 上 魂之 而 廢 丽 上 言 褻 氣 牀 魄 衣

男女改服。

人深衣。又《士喪》記注曰:『主人深鄭氏曰:「爲賓客來問病,亦朝服也。庶

古曠反。

者,易之而已。」《問喪》曰:「親死,笄、纚,而深衣也。《檀弓》曰:「始死,羔裘、玄冠衣,婦人斬衰者去笄而深衣,齊衰者骨笄衣。」」 愚謂:男女改服者,男子笄、纚深

主人啼,兄弟哭」之節也。衽,深衣之衽一徒跣,扱上衽,交手哭。」此即下文「始卒,

而至此第扱其衽,則深衣爲改服所服無疑也。始死云「扱上衽」,則前此已服深衣,

端,婦人則纚、笄、總、玄綃衣。此皆吉服,也。蓋疾時養者玄端,非養或朝服或玄

衣在吉凶之間,故總服之。 其所以改服非可施於始死,而由吉趨凶,必有其漸,深

也。《士喪》記注以爲深衣者雖得之,而以者,固非爲賓客來問疾,而其服亦非朝服

屬纊以俟絶氣。《釋文》:「屬,音燭。纊,音曠,一音爲但主人服此,則亦未爲得也。

之上以爲候。」 愚謂:復以氣絶爲節,氣鄭氏曰:「纊,今之新綿,易動揺,置口鼻

之手。 男子不死於婦人之手,婦人不死於男子

絶然後遷尸於牀而復。

不以婦人也。者,謂所使持四體屬纊之人,皆以男子而謂:死,謂氣絶也。男子不死於婦人之手鄭氏曰:「君子重終,爲其相褻。」 愚

寢。《釋文》:「適,丁歷反。」 未命則死於下室,遷尸于寢,士之妻皆死于君夫人卒於路寢,大夫世婦卒於適寢,内子

「諸侯夫人、大夫妻及士之妻卒,皆於夫之妻。下室,其燕處也。」 熊氏安生曰:夫謂之適寢,士或謂之適室。内子,卿之善,其尊者所不燕焉。君謂之路寢,大鄭氏曰:「言死者必皆於正處也。寢、室

大夫世 未命者. 也。 謂 寢 妻 死,皆與 遷於夫正寢之牖下,既遷尸乃復也。 尸」,遷而後行復事。 年五十乃假祖 IF. 於疾 夫之位,君夫人則天子、諸侯弔焉,大夫**、** 適 子未命者既死而遷尸,則凡卒於夫寢者皆 婦人之寢褻之,故其死必皆於夫寢 士之妻則君夫 也。 其 也。 寢。」 室,《 关 次病 《士喪禮》既卒,「設牀笫當牖」而 (未受爵 凡婦人從其夫之爵位 ·婦,謂大夫之世 士喪禮》有明文,則大夫以上亦從 如此,則世婦可知。 而 曰路寢,曰適寢,曰寢,皆其夫之正 、夫同處。 愚 已 遷矣。 謂 廟而命之。下室,謂妻之寢 命於太廟也。 人、卿大夫弔焉 熊氏之説 君夫人,謂君之夫人也 不言男子死處者 遷尸於寢,由下室而 婦 也。 是 蓋喪事有卿大 君於卿大夫 也。 一,内子未命 内子,卿之 皆 凡 不可於 也。 ·,死於 妻之 内子 遷 内

也。 同。 氏 固 大斂焉,夫人於世婦,大斂焉」,是也。 授人杖」,士「於大夫世婦之命如大夫」,是 寢」,復,「世婦以襢衣」,内子「爲世婦之命 婦,有指大夫之適妻者,「大夫世婦卒於適 亦 謂:天子之次婦曰三夫人,諸侯之適 可 例,不得兼言君之世 氏似以此「世婦」爲兼言君之世婦,非也。 世婦、諸妻皆疏食水飲,君於大夫、世婦, 世婦杖,夫人、世婦在其次則杖,夫人、 曰夫人,諸侯之次婦曰 「君夫人」、「大夫世婦」與下「士之妻」 一 知。 曰:「此變『命婦』言『世婦』者,明 曰世婦,皆以其尊相 無適寢之稱,而世婦之喪,君所不主,其 世婦以君 有指諸侯之次婦者,「君之喪,五日授 惟婦人之禮未顯,故特言之。 下寢之上爲適寢。」 婦 當也。 世婦,大夫之適 也。 且君之下室, 此篇所 麦亦 言 尊 妻 卑 世 愚 鄭

復,有林麓則虞人設階,無林麓則狄人設階。 夫以玄赬,世婦以襢 小臣復,復者朝服。 衣,皆升自東榮,中屋履危,北面三號,卷衣 賤者。 也。 也。 設黼扆、綴衣」,此其事皆與樂官無與,疑 階」、又言「狄人出壺」、《書・顧命》云「狄 階之事習也。 謂人君之禮也。 屋者。虞人,主林麓之官。狄人,樂吏之 鄭氏曰:「復,招魂復魄也。 赴告不及於鄰國,其治喪蓋即於其寢耳。 冬官别有狄人,非《祭統》所言也。大夫、 吏,蓋據《祭統》而言。 然此篇言「狄人設 士之復,其設階蓋私臣隸子弟之屬爲之。 狄人,蓋冬官之屬。 使虞人設階者,以其常升山陵,於設 階,梯也,簨虡之類。」 無林麓,謂其地與林 有林麓,謂其地與林麓近 君以 衣,士以爵弁,士妻以税 卷,夫人以屈狄,大 鄭氏以 階,所乘以升 狄人 愚謂:此 麓遠 (爲樂

號,户高反。卷衣,❷居勉反,徐紀阮反。」貞反。❶ 襢,知彦反。税,他亂反。榮,如字,劉昌宗音營。直遥反。以卷,本又作「衮」,同古本反。屈,音闕。赬,赤投于前,司服受之,降自西北榮。《釋文》:「朝,

也。 所以 衣。 其夫人用揄狄,子男以毳,其夫人乃用屈 以卷,謂上公也。夫人以屈狄,互言耳。 鄭氏曰:「小臣,君之近臣也。 號,若云『皋某復』也。 司服以篋待衣於堂 也。天子、諸侯言『東霤』。危,棟上也。 夫自玄冕而下』之服也。 狄矣。赬,赤也。玄衣、赤裳,所謂『卿大 上公以衮,則夫人用褘衣, 榮,屋翼。升東榮者,謂卿、大夫、士 復用死者之祭服,以其求於神也。 事君之衣也。 用 朝 服而 其世婦亦以 而侯伯以鷩 朝服 復之者,敬 而復, 君

[「]赤」、《釋文》作「勑」。

[「]卷」、《釋文》作「捲」。

屋,大 弁者 故用 植。 狄者 魂來 前 棟 中屋者,當屋東西之中央。 屋 直 得服之。 其衣,非用其冠。 税衣,六衣之下也,士妻 君以卷者,謂上公自卷冕而下。夫人以屈 復之人服 玄赬者,大夫用玄冕、玄衣、纁裳,故曰『玄 翼。 |頭,以其體下於屋,在屋兩頭似翼,故名 上高危之處也。 以復。 依 ,六冕以衣名冠,爵弁以冠名服,此用 ,謂子男之夫人自屈狄以下。 三號者,一號於上冀神在天而來,一 世婦,大夫妻也。世婦上服惟襢衣, ,夫以下不得四注,但南北二注 升自東榮者,復者升東翼而上也 孔 之、則大夫、士以下悉用 榮,屋翼 朝服,奉事君之魂神,故 氏 君之世婦亦襢 曰 : 小 也。 復者北面 臣, 天子、諸侯四 君之親近。 衣也。 履危 ,求諸陰之義 近 者,履屋 士以 大夫以 朝 臣 冀君 而 注 服 也 爲 爲 爵

> 旁徧呼之,有蘇活者,豈復之遺意與。」 降,不以虚反也。降因取西北匪,若云 西北 降自 愚謂:小臣復,謂諸侯之禮也。 風俗,民有暴死,使數 室凶,不可居也。』 之所也。 故自幽陰而下也。 地之間 上求,既不得,不忍虚從所求不得之道還 屋前投下,司服之官以篋待衣於堂前也。 皋,長聲也。三招魂竟,卷斂所復之衣,從 號於下冀神在 復、當亦私臣之親近者爲之,而其 **厞爲便也。** 西北榮者,初復是求生,故升東榮而 而來 故鄭注《士 也。 地 必取7 每號輙 而 不正 來, 高氏閌曰:「今淮南 喪禮》 西北雁者,亦用 人升其居 一號於中冀神在天 西而西北者,因取 Z: 『皋某復矣。』 曰:『不 屋及於路 若大夫、 服 由 幽 此 前 陰

下,於夫人言子男之「屈狄」,舉下以見其

朝服也。

於君言上公之「卷」,舉上以

見其

則升 與 ? 《爾雅》:「一染謂之縓,再染謂之頳,三染 也。 皆所以互相備也。 以相變爲敬也。 皆於東西霤也。 不便於升降也。 謂之纁。」此於大夫不言「玄纁」,而曰「玄 之屬。蓋以其聯職其事,故皆得謂之小臣 言「升自東榮」,末言「司服受之」,錯舉之, 之,亦諸侯之禮也。 頳」,豈冕服之纁裳,其色亦有淺深之差 上也。不言「卿」與「内子」者,文不具也。 大祖」及四郊、《祭僕》「復於小廟」、《隸僕》 復於小寢、大寢」,此小臣蓋即祭僕、隸僕 人,又有辭賓下拜者,請媵爵者,皆小 《周禮》小臣四 亦自東南榮,蓋東西榮之中皆偏 三號者,禮成於三也。降自西北榮, 若人君四注之屋,則升降 升自東南,降自西北,禮 司服,春官之屬。 按《周禮・夏采》「復於 人,而《燕禮》小臣 此始言「小臣復」,中 司服受 相 高

> 皆用此禮也。 皆用此禮也。 皆用此禮也。 也。則知小臣之名,通於祭僕之屬矣。天也。則知小臣之名,通於祭僕之屬矣。 於寝、廟。然自人君四郊之外,其復 大祖、庫門、四郊,士惟復於寢、卿大夫當 大祖、庫門、四郊,士惟復於寢、卿大夫當 大祖、庫門、四郊,士惟復於寢、卿大夫當 大祖、庫門、四郊,士惟復於寢、卿大夫當 大祖、庫門、四郊,士惟復於寢、卿大夫當 大祖、庫門、四郊,士惟復於寢、卿大夫當 大祖、庫門、四郊,士惟復於寢、卿大夫當 大祖、庫門、四郊,土惟復於寢、卿大夫當

其乘車之左轂而復。《釋文》:「乘,繩證反。」其爲賓,則公館復,私館不復。其在野,則升

説見《曾子問》及《雜記》。

於義相反。《士喪禮》云:『以衣衣尸,浴糞其生也,若以其衣襲、斂,是用生施死,鄭氏曰:「不以衣尸,謂不以襲也。復者,

之衣。」 鄭氏曰:「袡,嫁 時 上服,而 非婦人復,不以袡。《釋文》:「袡,而廉反。」

事

鬼

神

而去之。」

凡復,男子稱名,婦人稱字。

復」,而諸侯夫人亦稱字與。侯曰某甫復。」以此推之,王后宜曰「王后大夫、士也。《曲禮》:「天子曰天子復,諸鄭氏曰:「婦人不以名行。」 愚謂:此謂

唯哭先復,復而後行死事。

可以爲死事。」 鄭氏曰:「氣絶則哭,哭而復,復而不蘇,

《問喪》曰:「親始死,笄、纚,徒跣,扱上曰哭。」 愚謂:始卒,謂復前氣絶時也。嗚咽不能哭,如嬰兒失母,故啼也。有聲嗚咽不能哭,如嬰兒失母,故啼也。有聲,能勿啼乎?」 孔氏曰:「孝子哀痛,

謂

期喪以下者。

若死者之妻亦啼踊者,主

子也。兄弟,期喪以下之親也。婦人,亦

衽,交手哭。」謂此時也。主人,適子及衆

人、兄弟、婦人皆踊也。

方。外命婦率外宗哭于堂上,北面。人坐于西方。内命婦、姑、姊妹、子姓立于西立于東方。有司、庶士哭于堂下,北面。夫既正尸,子坐于東方。卿、大夫、父、兄、子姓

南首之法也。子,世子也。坐於東方,爲 尸者,始廢牀時猶東首,至是始卒,始正其 初喪,主人以下之位也。 位,故皆堂上,北面。」 疏於内命婦,故在户外。婦人無堂下之 牀」,人君則當以帷障之也。 婦,卿大夫之妻爲外命婦。」 姓,謂衆子孫,姓之言生也。 鄭氏曰:「正尸,謂遷尸牖下,南首也。 主人後,女子立於夫人後。 「夫人坐於西方者,亦近尸,故《士喪禮 『婦人俠牀,東面』。 但士禮略,但言『俠 遷尸牖下謂之正 愚謂:此言人君 外命婦、外宗 其男子立於 世婦爲内 孔氏 日 子

之别,在

室外者以堂上、堂下爲男女之别

疏之位

· 而

在

室内者

以尸西、尸東爲

男女

當户

牖

間

而

西

上也。

此以室之内外别親

君無服

者,則不與於君喪也。

哭於堂上,

外宗不皆爲外命婦也。

若卿大夫之妻爲

婦

也。

既言「外命婦」,又言「外宗」者,以

卿大夫之妻爲君有服者也。外宗,同宗之

姓、謂女子子也、而諸子婦之屬亦該焉。

立於西方者,立於夫人之後也。

外命婦

適婦爲女主。

内命婦,世婦以下也。

夫人坐於西方,爲女主也。

若無夫人,則

下,當兩階

間

圃

西

上也。

北面,向尸

也。

士、《燕禮》所謂「士旅食」者也。哭於堂

也。

有司,三等之士也。

庶士,謂未命之

之親亦該焉。

立於東方者,立於主人

之後

子姓,謂衆子及諸孫也,而大功以上卑幼

喪主

也。

父、兄,大功以上尊長之親

也。

法也。」 世子 或當 君 於父、兄矣。然喪事以服之精粗爲序,子 文言「君將大斂,卿大夫 服 姓之上者,國事先君臣也。 下之分不可以不正,亦治喪馭繁整雜之大 也。 也。 也。 姓則序服之精粗 方者,卿大夫則序尊卑而北上,父、兄、子 姓乃衆子,未可以卿大夫先之。 疑立於東 西」,而「父、兄在堂下北面」,則卿大夫親 堂上、堂下之位,非特男女、内外、親疏、上 位 而不服父、兄、子姓,以此。」 主 在 尊,不可不正定世子之位,卿大夫等 於堂下、堂上者不言「立」,不嫌不立 於東方、西方者不言「哭」,不嫌不 ○楊氏信曰:「始死哭位,必辨室中、 喪 户外東方,遥繼主人之後」,非也。 陸氏佃曰:「卿大夫序父、兄、子 而坐,而衆子立於其後,則尊卑 丽 南 上與。 (即位) 諸侯爲卿大夫 〇孔疏謂「人 於堂廉、楹 愚謂:下 哭

之位固不患其不定矣。堂上爲婦人之位, 之位固不患其不定矣。堂上爲婦人之位, 之位固不患其不定矣。堂上爲婦人之位, 之位固不患其不定矣。堂上爲婦人之位, 之位固不患其不定矣。堂上爲婦人之位, 之位固不患其不定矣。堂上爲婦人之位, 之位固不患其不定矣。堂上爲婦人之位, 之位固不患其不定矣。堂上爲婦人之位, 之位固不患其不定矣。堂上爲婦人之位,

坐,卑者立。」 孔氏曰:「大夫之喪,不顯一子姓,姑、姊妹、子姓也。 凡此哭者,尊者有命夫、命婦則坐,無則皆立。 大夫之喪,主人坐于東方,主婦坐于西方,其

同也。

夫、命婦在焉,則得常坐,與主人、主婦

故餘人亦許其坐,而不以坐爲常。

若命

喪,未小斂,爲君命出。士之喪,於大夫,不君之喪,未小斂,爲寄公、國賓出。大夫之,以哭尸于室者,主人二手承衾而哭。

喪,及下文士喪可知也。」

愚謂: 君尊於

父、兄、子姓及姑、姊妹哭位者,約上文君

當斂則出。《釋文》:「爲,于僞反,下皆同。」

右,北面」,是也。 弔,主人迎於寢門外,見賓不哭,先 則不出,故《士喪禮》未襲之前,『君使 出 相偪,尚爲大夫出,若未小斂之前,爲大夫 斂」,謂去小斂近也。 斂」,謂去小斂遠也。 於寢門外,以此言之,則世子於天子之命, 哭,不逆於門外」,是也。 當斂,其來非斂時。」 鄭氏 士於君命,亦皆然也。君與大夫云『未小 出者,或至庭,或至門。 及國賓,士出迎大夫,皆至庭,故下文云 小斂之前,主人出迎賓之節。世子迎寄公 『降自西階』,又云『士於大夫親弔,則與之 可 知也。 티 : 「父母始死悲哀,非所尊不出 未襲之前,唯爲君命出,其餘 君使退,主人哭拜送於 士於大夫,雖於小斂 士於大夫云『不當 國賓 孔氏曰:「此謂 大夫於君命,迎 (,聘大夫。 人 也 門 不 人 未

出至 喪不迎賓,惟臣於君命則迎於寢門之外。 深,且喪事急遽,故非 出至庭而拜之也。大夫之喪,爲君命出, 者明矣。 失禮,然猶不敢至喪所,則此「國賓」非聘 衛人逆之,婦人哭於門内。」此已是春秋時 公卒,晉三子自役弔焉,哭於大門之外。 不得私致弔於他國君 諸侯來賓者也 謂諸侯失地而寄寓於諸侯者也。 有致弔之禮,蓋使者奉命出聘,未復命則 於牖前」,是也。 謂斂後,正斂時不出也。」 外門外。 君使而 『士喪當袒,大夫至,絶踊 門而迎之也。 拜之,非 君爲寄公、國賓出,士爲大夫出 於時賓有大夫,則特拜之,因送 《聘禮》遭主國君喪,不言 謂 《周禮・司几筵》「筵國 特出 蓋 也。 所尊 父 迎賓也。 母母 《左傳》:「衛穆 敬 初 愚謂:寄公, 則 而拜之。』亦 死,哀痛方 不出也。 國賓,謂 《雜記 賓

二〇五

吏反。」 親弔則與之哭,不逆於門外。《釋文》:「使,色 外,使者升堂致命,主人拜于下。 君拜寄公、國賓于位。 凡主人之出 一也,徒跣,扱衽,拊心,降自西階 大夫於君命迎于寢門 士於大夫

門西 於始 **弔士也。與之哭,既拜之,即位西階,東面** 位 鄭氏曰:「拜寄公、國賓於位者,於庭鄉其 哭」,是也。若諸侯,則群臣之位,始死之 國之異爵者門西,少進」,士西方東面。 喪禮》「有賓則拜之」,鄭氏云「其位如朝夕 卿大夫在主人之南,諸公門東,少進,他 其 位 一; 北 死以 ,皆北面。 拜之。此時寄公位在門西,國賓位 愚謂:《士喪禮》朝夕哭弔賓之位, 與 面。 後 朝 夕哭同 至殯以前,皆不見弔賓之位。 士於大夫親弔,謂大夫身來 小斂之後,寄公東面 ,故不别見之。 故《士 國 而 在 賓

時 位,士禮門西,北面,少進之位,於諸侯則 東,北面,少進之位,於諸侯則當爲寄公之 主人之南,南面,士西方東面。 經之所陳者是也。 親 而尊者在室,疏而卑者在堂下,即上 既小斂,則卿大夫皆在 而士

門外。 中庭。 耳。 寢門外,見賓不哭,先入門右,北面。 臣於君之弔,皆即位於門右,北面,受弔於 當爲國賓之位。 則與之哭者,大夫西面於阼階下之南,主 人哭,拜稽顙成踊。 人,升自西階,主人進中庭,弔者致命,主 而 北面,但始死之時,鄰國弔使亦未能 拜之也。主人拜於下,拜於中庭也。 君拜寄公、國賓於位者,南 若鄰國卿大夫來弔者,則當在門西, 大夫於君命亦然。 故士喪始死,君使人弔,主人迎於 自始死以至於朝夕哭皆 賓出,主人拜送於外 士於大夫親弔、 向 就 即至 一禮門 其 凡 位

氏云"「大夫特來,則 人即西階下位,與之俱東面 北面。」此據《檀弓》 而哭也。 〇鄭

曾子北面而弔」爲説,不知曾子北面乃弔

夫人爲寄公夫人出,命婦爲夫人之命出,士

於不爲位者之禮,非可以決弔位之正

妻不當斂則爲命婦 出

室也。 時 外 以 西,東面。」 夫人、命婦位在堂上、北面、小斂之後、尸 顙 在衆婦人之西,而皆西上,其拜之皆於户 嚮之也。 故所爲出者亦同也。」 鄭氏曰: 於庭。 南總 婦人無堂下之位,而尸在室中,宜北 尸在室,主婦在 寄公夫人、命婦位在堂上,北面者 而 「出,拜之於堂上也。 蓋寄公夫人在外命婦之西,命婦 拜之也。 〇孔氏謂 孔氏曰:「婦人尊卑與夫同 尸西,東面,不得在 命婦爲夫人之命,拜稽 「出爲出房」,非也。 愚謂:出,謂出於 此時寄公 房 此 面

> 斂,主人馮之踊,主婦亦如之。主人袒,説 小斂,主人即位于户内,主婦東面,乃斂。 非也。· 則主婦亦然,約下夫人弔之禮可見也。 也。又謂「命婦爲夫人之命,不下堂」,亦 未斂之前,主人爲君命亦拜於庭, 卒

俱三日也。 侯禮也。 鄭氏曰:「士既殯説髦,此云『小斂』,蓋 士之既殯,諸侯之小斂,於死 婦人之髽,帶麻於房中,則 者 西 諸

活反,徐他外反。」

髦,括髮以麻,婦人髽,帶麻于房中。

《釋文》:

「馮,皮冰反,本或作「憑」,後皆同。説,本又作「税」,同他

也。 已竟而髻髮、袒,此未括髮先袒 袒,今方有事 内,故主人在户内稍東,西面曏。小斂不 房也。天子、諸侯有左右房。」 「初時尸在牖下,主人在尸東,今小斂 髦,幼時翦髮爲之,至年長 ·, 故 袒 衣 也。 《士喪禮 或 或 孔氏 則 垂 》馮 君 在户 曰 禮 兩

二〇八

帶也。 邊 親没不髦,是也。 説 對男子括髮 但未説髦耳。婦人髽者,婦人髽亦用麻, 説髦訖 説者,人君禮也。 説之也。 侯之禮,皆著言「君」「夫人」,此但言「主 及帶麻於西房也。」 有東西房,男子既括髮於東房,故婦人髽 斬衰婦人亦苴絰也。 人之帶牡麻,結本在房。] 此齊衰婦人,若 衣、衾斂尸也。 人」「主婦」,則謂上下之達禮也。 左髦,母死説 ,明人子事親 謂婦人要絰也。 小斂之時,主人即位於户内西面 而括髮用麻也。 按鄭注『士既殯説髦』,今小斂而 也。 衣少謂之小斂,衣多謂之 右髦,二親並死則並説之, 恒有孺子之義也。 帶麻於房中者,帶麻,麻 今小斂竟,喪事已成,故 括髮以麻者,人君 此經兼明諸侯之禮, 愚謂:此篇凡言諸 《士喪禮》云:『婦 士小斂後亦括髮, 斂,謂以 若父死 小斂

於主婦 以爲 禮》居喪之禮,「皆如其國之故,謹脩其 堂 禮》「衆主人免於房」,此爲東房,故知婦人 也 露紒 髮,而以麻約之,謂之括髮,衆主人則用 主 髮」,或先言「袒」,由文便爾。 髽,去纚 髮乃袒,自首及身,事之次也。 死笄、纚而未有他服,至是主人乃散垂其 髦,禮俗不同,記者各據所聞言之。 袖扱於右腋之下也。凡禮事皆左袒,主人 而謂之免。 而審行之」,謂此類是也。 有事於尸乃袒,小斂之袒,爲將奉尸侇於 也。 婦 也。 即位於户内東面。 西房,是也。 帶麻,加要帶與麻絰也。 《士喪禮》「既殯説 言「東面」,互見之也。袒者,袒左 婦人之髽,猶男子之括髮與免 蓋始變飾爲成服之漸 知房 爲 於主人言「户内」, 括髮以麻者,初 西房者、《士喪 髦」,此小斂 房中, 或先言「括 也。 注 \Rightarrow 説 疏 括 布 法 曲 而

之髽在室,其帶在房,二事相連爲之,故先帶,饌於東方,故降階即位後乃加之,婦人尚未加経,而婦人已帶麻者,蓋男子之經人髽於室」,此不言者,文略也。此時男子之經之帶、麻宜在西房也。又《士喪禮》云「婦

勇反。夷,本或作「侇」,同音移,一本作「奉尸于堂」。」徹帷,男女奉尸夷于堂,降拜。《釋文》:「奉,芳

於男子也

孝敬之心也。 文。 帷。 也。一 鄭氏曰:「夷之言尸也。於遷尸,主人、主 子下堂拜賓也。」 陳於堂,而孝子、男女親屬並扶捧之,以極 婦以下從而奉之,孝敬之心。降拜,拜實 士禮耳,諸侯及大夫賓出乃徹帷,事見下 夷,陳也。 至小斂,衣尸畢有飾,故除帷也。 孔氏曰:「初死,恐人惡之,故 降,下也。 小斂竟,相者舉尸將出户 愚謂: 既陳於堂,則孝 此與上節相承, 此 有

奉尸夷于堂,正尸於兩楹之間也。此爲士禮,則上節不專爲諸侯禮亦明矣。

文》:「氾,芳劒反。」
内子、士妻特拜命婦、氾拜衆賓於堂上。《釋大旁三拜。 夫人亦拜寄公夫人於堂上,大夫君拜寄公、國賓,大夫、士拜卿大夫於位,於

故特拜 也。 特拜,於士妻亦旅拜。 也。 也。 賤,故旅拜也。大夫内子,謂大夫之内子 於卿大夫則各就其位而拜之。 之所拜者惟寄公、國賓也。大夫、士拜賓 後拜賓之法也。 君拜寄公、國賓者,言君 拜士與其妻皆旅之。」 鄭氏曰:「衆賓,謂士妻也。尊者皆特拜, 大夫、士之妻拜賓於堂上,於命 氾,廣也。 命婦,卿大夫之妻也。 也 於士則鄉其方而三拜之。 氾拜,謂人 然大夫、士於士旁 愚 雖多,但一拜之 謂:此言小斂 衆賓,謂 卿大夫尊, 婦 士妻 士 亦

免,乃奠。《釋文》:「免,音問。」 主人即位,襲、帶、絰、踊。 讀 少進」之位準之也。大夫、士之喪,命婦之 弱,但有奇拜 方東面」者準之也。夫人拜寄公夫人北 當在西房户外之西,可以《士喪禮》「士西 位當在阼階上主婦之北,可以《士喪 在堂上尸東,西面,以《士喪禮》「諸公門東 天子「有喪拜焉」,則其餘諸侯皆不拜也。 惟先代之後則拜。《左傳》宋「於周爲客」, 喪無拜大夫、士之禮,天子於諸侯亦不拜, 君拜寄公、國賓,又拜大夫、士,非是。 面,皆既拜乃東即阼階上之位也。 面,大夫内子、士妻拜命婦東面,拜衆賓西 ·卿大夫在主人南」者準之也。 拜,此拜衆賓不言「旁三拜」者,婦人質 「君拜寄公、國賓、大夫、士」爲句,謂嗣 也。 小斂之後,寄公夫人當 母之喪,即位而 衆賓之位 〇 孔 禮》 君 疏

> 鄭氏 《士喪禮》不同者,亦禮 皆父母同也。 惟於此著言爲「母」之異,則上文所言之禮 改而免,殺於爲父之禮也。説詳《小記》。 小斂奠。」 此據人君爲尊,故曰『尊卑相變」。 先踊乃襲、経,此先襲、経乃踊者,士禮卑, 踊,尊卑相變也。」 初在堂上時亦括髮,至降即阼階下位,則 曰:「即位, 作階下位 愚謂:此亦上下之達禮,與 孔氏曰:《士喪禮 俗 異耳。母之喪, 也。 襲、絰乃 奠,謂

謂吉冠之卷。主人既素冠、素弁,故弔者也。」 孔氏曰:「加武者,賀氏云:『武,冠之卷也。加武者,明不改冠,亦不免知,此數則改襲而加武與帶、絰矣。武,吉鄭氏曰:「始死,弔者朝服、裼裘,如吉時

有

恩。 皆玄冠、朝服、襲裘而已。若士大斂之時, 若兩大夫不假朋友之恩,皆朝服、襲裘加 之時,君於臣,大夫於士,士於朋友之恩, 帶、絰,弔者之服皆然,非 武,熊氏謂「加絰於武」,是也。 耳。」拾,更也,謂主人先踊 麻不加於采,小斂之後,弔者猶玄冠、朝服 絰者,以弔絰加於冠之武,而要又著帶也。 踊,三者三,是與主人更踊。」 總言絰、帶,以 素 於玄冠之上。若大夫、士無朋友之恩, 加帶、経,以此知弔経乃葛経也。加武, 朋友之恩者,及兩大夫相爲,并君於大 ,謂有朋友之恩,以経加於武,連言帶 無帶,惟経而已。熊氏云:『加武,帶、 説見《檀弓》。 **弁於武。」帶**, 朋友之恩也。 〇熊氏安生曰:「小斂 謂 要帶。 - 專爲 ", 婦 絰,謂首絰 無朋友之恩 人踊,弔者 有朋友之 加武、帶、 愚謂: 加

而

絰

則

加

與殯亦弁絰。」是大夫相弔皆以皮弁,與諸 喪服但不錫衰,則未喪服已皮弁可 弁、錫衰。 主人未喪服,則君不錫衰。」未 皆未是。凡弔於小斂之後、未成服之前 又《雜記》云:「大夫之哭大夫弁絰,大夫 於大夫以皮弁服,《小記》:「諸侯弔,必皮 子之哭諸侯,爵弁絰、紂衣」,是也。 者,天子於諸侯以爵弁、紂衣,《檀弓》「天 未成服之前弔服也。」 於士尚皮弁,則君於卿大夫亦皮弁。此皆 故《服問》云『公爲卿大夫錫衰,若當 服、襲裘,無弁絰也。故《士喪禮》云『君於 弁経』,不云『士』,則士雖當事不弁絰。 士、大夫,士自相於無朋友恩者,則亦皮弁 士視大斂」,注云『皮弁服、襲裘無経』也。 大夫 夫,皆皮弁服、襲裘加弁絰。 與 、殯亦. 弁経』,殯則 愚謂:熊氏 大 斂 故《雜記》云 也。 知也。 諸侯 之説 事則 君於 君

絰 服 相爲,及士爲朋友,則既成服之後,皆爲之 服之前,弔者皆葛絰,若君爲大夫,及大夫 首及腰皆加帶、絰,則上下同 皆玄冠 侯 而已。 同 麻,若非朋友,則既成服之後,弔者亦葛 也 、朝服也。 若君大夫於士,及士自相 若其服皆襲而 也。 不裼 凡 弔, 未 ", 其 成 則

士代哭不以官。《釋文》:「縣,音玄。」 馬縣之,乃官代哭。 大夫官代哭,不縣壺。君喪,虞人出木、角,狄人出壺,雍人出鼎,司

之。 也。 其罷倦,既小斂可 鄭氏曰:「代,更也。未殯,哭不絶聲,爲 官,自以親疏哭也。」 漏水之器也。冬漏以 此挈壺氏 木,給爨 大夫不縣壺,下君也。 竈。 乙所掌 角,以 以 ,也,屬 爲漏刻分時 火爨鼎,沸而後 孔氏曰:「虞人,主 爲 司 嘝 馬,司 士代哭不以 水斗。 馬 丽 更哭 涖 壺 縣 沃

> 哭者。」」 《夏官·挈壺氏》云:『凡喪,縣壺以代之。縣漏分時,均其官屬,使更代而哭。 之。縣漏分時,均其官屬,使更代而哭。 以,以,故此鼎煖水,用木爨

燭。士堂上一燭,下一燭。 君堂上二燭,下二燭。大夫堂上一燭,下二

祭饌。」 燭。」 燎,至曉滅燎, 鄭氏曰:「燭,所以照饌 孔氏曰:「有 而日光未 喪 則 明, 也。 於 故 中 滅燎 須 庭 燭 終 以 夜 丽 照 設 設

賓出,徹帷。鄭注:「徹,或爲「廢」。」

推。· 愚胃:比上烹す说文。 鄭氏曰:「君與大夫之禮也。 士卒斂即徹

諸婦南鄉。《釋文》:「鄉,許亮反。」哭尸于堂上,主人在東方,由外來者在西方,唯。」 愚謂:此上蓋有脱文。

鄭氏曰:「由外來,謂奔喪者也。無奔喪

南也。」 出 東鄉,今既有奔喪者,故移辟之而 方,欲見異於在家者也。 如室中若有新奔喪從外來者,則居尸西 在堂時,主人位在 人猶東面 尸東,婦人位在尸 孔氏 婦人位本在 曰:「小斂後尸 近 北 西 西。 鄉 方

寢門外見人,不哭。婦人迎客、送客不下堂,下堂不哭。 男子出

出門,若有君命則出門,亦不哭也。」至庭,稽顙而不哭也。男子於敵者來弔不於敵者不下堂。若君夫人弔,則主婦下堂出門見人,謂迎賓也。」 孔氏曰:「婦人出門見人,謂迎賓也。」 孔氏曰:「婦人鄉氏曰:「婦人所有事自堂及房,男子所

抱之,人爲之拜。爲後者不在,則有爵者辭,主,則女主拜男賓于阼階下。子幼,則以衰其無女主,則男主拜女賓于寢門內。其無男

七雷反。人爲,于僞反。竟,音境。」殯、葬可也。喪有無後,無無主。《釋文》:「衰,無爵者人爲之拜。在竟内則俟之,在竟外則

也。」 也。 拜男賓,不得已而通禮之窮也。 賓,無女主則男主拜女賓,無男主則女 别 男賓之位在阼階下西面,則拜男賓於阼階 在堂上,則拜女賓於寢門内者,北面也。 有爵,攝主爲之辭 鄭氏曰:「拜者,皆拜賓於位 法 以别於正主之禮,且欲 寢門内,男主拜賓於庭,今乃於阼階下,所 下者,南面也。 曰「五十爵命爲大夫」。 也。 則 大夫至五十,則君假祖 難其 愚謂: 喪禮男主拜男賓,女主 有爵者,謂死者及其爲後者爲大夫 爲大夫而未 女主拜賓於堂上,今乃於 於賓,不敢當 爵者,亦以是稱之 相遠,以謹男女之 大夫有受爵命之 廟而命之,故 也。 女賓之位 |尊者 爲後 拜 者 女 禮

1231

不 在 禮 主而 攝 喪有無後,無無主,人之嗣續有時而乏,而 殯、葬可者,殯、葬有常期,不可久稽也。 者、蓋或庶子、或期親以下、推一人親者攝 據大夫而言也。 大夫」也。 可闕 拜賓也。 ,未得拜賓也。 凡曰「有爵」者, 也 無爵者,謂士也。 在竟内 辭,告也。 有爵者辭 曰「命夫、命婦」者, 則俟之,在 謂告賓以主人 ,所謂「士不 人爲之拜 竟 外 則 皆

執之。 輯之。 聽卜、有事於尸則 君之喪,三日,子、夫人杖,五日既殯 反,下『去杖』皆同。」 杖,於大夫所則杖。 夫、世婦杖。 子、大夫寢門之外杖,寢門之内 夫人、世婦在其次則杖,即位則使人 子有王命則 法杖。 《釋文》: 去杖,國君之命則輯杖 大夫於君 「輯,側立反。去,起吕 所 ·授大 則 輯

鄭氏曰:「三日者,死之後三日也。爲君

五

日

而

'殯',殯而成服'則無不杖者矣。

下也。」 敬卜及尸也。」 婦 特來,不與子相隨也。 也。 斂也。 去杖,尊王命也。 則大夫輯,子輯則大夫去杖也。 是人君禮大也。寢門之内輯之者 君,謂子也。於大夫所杖,俱爲君杖,不相 主婦、室老皆杖,今君喪,親疏杖不同日 杖,謂與之俱即寢門外位 杖,下成君,不敢敵之也。 世婦次於房中 杖 也。 (執杖,不敢自持也。子 不同 凡喪祭,虞 士及諸妻,爲君皆杖,不言者,諸侯 斂之,謂舉之不以拄 日,人君禮大,可 孔氏曰:「大夫之喪既殯,主人、 ·,即位堂上,堂上近尸殯,使 而 愚謂: 聽卜、有事於尸則去杖 有尸。 若與子相隨,子杖 世婦,謂諸侯之次 以 大夫 也,獨 於國君之命輯 見 ト、ト葬、ト日 地 親 也。 八於君 有王 疏 焉 1,謂大 也 夫人、 則杖。 一命則 所

房與。 可知 貴臣以杖即位,則諸侯之卿大夫以杖即位 也。 杖即位,所以正適、庶之分,大夫於君不嫌 之内輯杖,謂與君俱即位時也。 以入寢門也。 之長杖。」大夫寢門之内輯杖,則士之杖不 位」,則大夫之貴臣以杖即位 夫寢門之外杖,謂 五日,大夫、世 矣。 喪服》傳大夫之喪、「衆臣杖 故《檀弓》曰:「公之喪,諸達 「婦杖」,則其餘可 諸妻之杖,蓋不以出於 自在 其 次 也。 也。 知也。 大夫 庶子不以 大夫之 デ 以 寢 官官 大 門 即

杖。《釋文》:「爲,于僞反。」
杖。内子爲夫人之命去杖,爲世婦之命授人皆杖。大夫有君命則去杖,大夫之命則輯

子,而云『大夫』者,通實大夫有父母之喪鄭氏曰:「大夫有君命去杖,此指大夫之

亦然。 皆杖,而獨言「室老」者,以衆臣賤而略之, 舉『内子』則命婦可知,文相互也,欲見卿 婦命弔,則使人執杖以自隨也。 人有命弔己,皆爲之去杖也。若有君之世 曰 : 也 謂大夫之世婦。 若於君之世婦之命,其禮 亦猶君之喪不言「授士杖」之義也。 喪與大夫同。」 夫之喪」,不舉『命婦』而舉『内子』卿妻者, 「内子,卿妻也。 授人杖,與 愚謂:大夫之臣爲大夫 使人執之同 有夫及長子喪, 也。」 經云『大 世婦, 君夫 孔氏

婦之命如大夫。皆杖。於君命、夫人之命如大夫,於大夫、世士之喪,二日而殯,三日之朝,主人杖,婦人

死者亦得三日也。婦人皆杖,謂主婦,容之禮,死與往日,生與來日,此『二日』,於鄭氏曰:「士二日而殯者,下大夫也。士

是母子子在室者。」 孔氏曰:「前天大之喪云『主人、主婦』,此士之喪直云子及女子子在室者也。」 愚謂:上言「主君及女子子在室者也。」 恐問:上言「主己」,此一之喪云。」 孔氏曰:「前見也。

子皆杖,不以即位。

並不得以杖即位,宜在寢門之外去之。」杖同。」 孔氏曰:「君、大夫、士之庶子,鄭氏曰:「子,凡庶子也。不以即位,與去

綴,竹劣反,又竹衛反。」

大夫、士哭殯則杖,哭柩則輯杖。

前,則未杖也。」 愚謂:大夫、士哭殯則也。大夫、士之子於父,父也,尊近,哭殯也。 大夫、士之子於父,父也,君可以杖。天子、諸侯之子於父,父也,君可以杖。天子、諸侯之子於父,父也,君明以杖。天子、諸侯之子於父,父也,尊近,哭殯鄭氏曰:「哭殯,謂既塗也。哭柩,謂啟後

去杖矣。 大夫、士哭柩輯杖,則人君

《釋文》:「幠,荒胡反。去,起呂反。楔,息結反。● 柶,音齒用角柶,缀足用燕几,君、大夫、士一也。此死,遷尸于牀,幠用斂衾,去死衣,小臣楔始死,遷尸于牀,幠用斂衾,去死衣,小臣楔方子。斷,丁管反。」

斂衾者,將擬大斂之衾被也。既用斂衾覆來,病時所加新衣及復衣也。去之以俟沐衣,病時所加新衣及復衣也。去之以俟沐衣,病時所加新衣及復衣也。去之以俟沐欢,病時所加新衣及復衣也。去之以俟沐爽氏曰:「牀,謂所設牀第當牖者也。《士鄭氏曰:「牀,謂所設牀第當牖者也。《士

❶「息」、《釋文》作「桑」。

北

牖

下」,明不病不恒居北牖下也。」

愚

牖

取鄉明之義。

故鄭前

注『病者

恒居

之處。若晝日常居則當户,故《玉藻》云:

君子之居恒當户。」若病時亦當户,在北

云:『爲人子者,居不主奧。』是尊者常居

設之几蓋有異也。 長 使人持之。 所用之几也。綴之者,横設於兩足之上, 先覆以衾而後去衣,重形也。 平之所常處也。 近,其衾當陳之,而大斂之衾尚未用也。 大斂二衾,必用大斂衾覆尸者,以小斂時 者,亦欲於尊處正尸,猶奉尸侇於堂,及朝 廟正柩皆在兩楹間之義,非以 席於此,異於常法也。始死,設牀第當牖 「衽於奧」者,以奧爲尊處,重昏禮,故特布 主奥」,以此也。 盤饋舅姑皆席於奧。《曲禮》言「人子居不 人子朝夕供養父母則席於奧,故《昏禮》婦 首。」居不常在奥,則寢亦不常在奧也。 謂:《玉藻》:「君子之居恒當户,寢必 僅容兩足,可以拘之也。 特言「燕几」,則燕几與禮席所 孔氏説非是。 奥非寢處之所,而《昏禮》 必用燕几綴足者,取其 兩楹間 燕几 小斂一衾, 7,燕私 爲生 惟 東

戾。

於足,令几腳南

出,以拘尸足兩邊,不令辟

首,几脛在南以拘足。]如鄭此言,則側几

几,校在南,御者坐持之」,鄭注云:『尸南

卧之處。故《士昏禮》同牢在奧。又云『御

所以死後必遷當牖南首者,以生平寢

衽於奧,媵衽良席在東,北止」。

又《曲禮

爲尸

將著履

,恐足辟戾,亦使小臣用燕几

按《既夕禮》云『綴足用

燕

拘綴之令直也。

臣以

柶拄張尸齒令開也。

綴足用燕几者,

寸,兩頭屈曲。

爲將含,恐口閉急,故使小

浴故也。

楔,拄

也

柶,以

角爲之,長六

之、故除去死時所加新衣及復衣、爲尸將

它日。 必反。 管籥之人,又古亂反,掌管舍之人也。 水 御 管人汲,不説繘 作『綌』,去逆反。挋,音震。」 喪,則内御者抗衾 者人 用用 盆、沃水 抗,苦浪反。枓,音主,又音斗。 小臣 浴,小 一爪足。 用 臣 科,浴用 四 屈之,盡階 而浴。《釋文》:「管人,如字,掌 人抗衾。 浴餘水棄于坎。 絺 巾,挋用 不升堂,授御者。 御者二人浴,浴 説,吐活反。 絺 ,勑其反,❶一本 浴衣,如 其 母 繘,均 之

牆下 中。 水。 也。 以 節 促於事,故不説去此索,但縈屈 鄭氏曰:「抗衾者,蔽上,重形也。 盆 ,明浴時 爪足,斷 盛浴水也。 」,故知 不説繘,屈之者,繘,汲水瓶 盡 知西 階不 也。 從 階 升堂者,水從西階 足爪 西 者 管人,主館舍者。 [階] 沃水用枓者 以以 也。」 丽 金士 升 也。 喪禮》『爲 孔氏 ,以枓酌盆水 浴水用盆者, , 而 日 執之於手 索也, 汲,謂 垼 升 此 挋 盡 于 ", 拭 西 汲 不 遽

> 者 主 者,尸浴竟而小臣翦其足爪也。 也。 之。』《士喪禮》云『浴衣於篋』,注云『已 甸人所掘,於 于坎者,浴盆餘 所衣之衣,以布爲之,其制如今通裁」, 也 用 沃 浴衣拭尸 綌」,是也。』挋用浴衣者,挋,拭也,用 絺下綌,故《玉藻》云「浴用二巾,上 氏云:『此蓋人君 郊野之官。 絺 P 内外宜别,故 0 它日,謂平生尋常之日 巾者,絺 土 熊氏云 喪禮》云: 肉 令燥 2階間 其母 是 : 水棄之於坎中。 角 『用盤於牀下承浴 細葛,除垢爲易,故用之 也。 與大夫禮,或可 取 浴浴 之喪,則内御抗 内御舉衾也。 土 賀氏 爲 1 竈 二,皆用 也。 之坎。 云: " 浴餘 小 内御 坎者,是 以 臣 ·水。]浴 大 綌 甸 布 夫 水 而 爪 絺 生 , 婦 熊 浴 棄 足 是 作 時 下 上

❶ 「反」,原誤作「及」,今據北大本、《禮記注疏》改

耳。」 屬 《士喪》記曰「甸人築坅坎」,是也。 禮》曰:「司宫設罍水于洗東,有枓。」如它 也。 而不 四 浴水汲 五日具浴。」汲水不 水焉。《聘禮》曰:「管人爲客,三日具沐, 之人謂之管人者,言其主舍中之管鑰也 四事也。 日者,如生時之常法,謂「浴水用盆」以下 舍必有井,是管人之所主,故使共沐浴之 人,亦管人汲,事事 而 也。 、之餘,恐人見而憎惡之也。 人,舉衾四隅各一 浴,言抗 科, 鄭水器, 長柄, 沃盥用之。《少牢 至於形也。 御者,於諸侯則御僕也。抗,舉也。 而用之,不煮也。 愚謂: 此言浴尸之事 弃沐浴餘水於坎,而甸 衾 及浴 二人浴者,左右各一人 者皆用内御者也。 ·説繘而遂以授御者,則 一人也。 如 前,唯浴用 小臣,蓋大僕之 舉衾,令可 也 内御者抗衾 人築之, 主館 人不 蓋以浴 《周 舍 浴 同

> 伯》: 禮 子之喪、鬯人共秬鬯、肆師涖築鬻、鬱人共 惟 渳,設斗,共其釁鬯。」《大祝》:「始崩,以 之,與諸侯以下異矣。 肆器,大祝主其渳,小祝贊之,而小宗伯涖 肆鬯渳尸。」《小祝》:「大喪,贊渳。」是天 喪之渳,共其肆器。」《鬯人》:「大喪之大 諸侯以下浴皆用 用水而已,此云「管人汲」,又曰「小臣抗 「大喪,大渳以鬯, 而浴」,又云「浴用絺巾」,據諸侯而言,則 此,則餘事皆與上同也。 ·女御》:「大喪,掌沐浴。」母喪之異者 「王崩大肆, 水 則築 鬻。」《鬱人》:「大 以 也。 秬 鬯 《周禮 按《士喪禮》浴 渳。」《肆 師

廟之西北厞薪,用爨之。管人授御者沐,乃人出重鬲。管人受沐,乃煑之。甸人取所徹大夫沐稷,士沐粱。甸人爲垼于西牆下,陶管人汲,授御者,御者差沐于堂上。君沐粱,

孝反。」 門扉 翦須。 沐。 役。重,直龍反。鬲,音歷。 也。 沐 濡 用 盤、本或作『槃』、步干反。 濯 瓦 棄于坎。 盤 挋 用 《釋文》:「差,七何反。 巾 ** F** 如 它 濡,奴亂反。 日 小 臣 濯,直 垼,音 爪 手

士也。 《士喪禮》沐稻,此云『士沐粱』,蓋天子之 沐也。 鄭氏 稷,士沐粱者,皆謂用其米取 氏 布 瓦 之官爲垼於西牆下,土垼塹 瓦器之官也。 垼竈以煑沐汁。 甸人爲垼於西牆下者,謂將沐 幂 日 瓶,受三升,以沐米爲粥,實於瓶, 曰 : 此 浴沃用 ·繫以篾縣之,覆以葦席。 以差率而上之,天子沐黍與。」 「差,淅也,淅 節明沐也。 重鬲 枓,沐於盤 陶 人出重鬲者,陶 謂 飯米,取其 縣重之罌也。 君沐 中,文相 竈 之時 汁 梁,大夫沐 甸 Щ 管人受 人具 潘 人,作 沐 , 甸 變 以 以 也。 也 人 疏 是 此 孔 爲

沐用 沐也。 并棄之其坎。」按《既夕禮》云: 中。』鄭注《士喪禮》云:『巾、櫛、浴衣,亦 濯,謂不淨之汁也。 濯棄于坎者,皇氏 與浴俱有枓有盤,浴云「枓」,沐云「盤」,是 汁竟,而管人又取以升階,授堂上御者使 者,浴竟而翦手爪,又治須,象平生也。 如它日,事 文相變也 無復用,故取之也。 處薪」。 竈鬲中煑之也。 不上堂,而就御者受淅汁,下往西牆 沐 云『厞是屋簷』。 乃煑之者, 瓦盤者,盤貯沐汁,就中而沐也。 乃沐者,御者受沐,乃 取此薪 事亦如平生也。 **担用** 淅於 而用者,示主人已死,此 熊氏謂『西北隅屋外 謂正寢爲廟,神之也。 巾者,用巾拭髮及面 云:『濡 《堂上 言所濡 管人授御者沐者, 管 謂 小臣爪手翦須 濯汁 人亦 爲 煩 「掘 尸 潤其 ,棄於坎 升 沐 ,於垼 坎南 厞 盡 也。 也。 濡 沐 煑 堂 舊 隱 階

重 《士喪禮》云:「祝淅米於堂,南面,用 氏 淨, 也。 用以 也。 以 浴汁皆棄於坎 順 厞 用不同也。 此云「御者差沐」者,蓋祝淅 堂」者,從上可 易檐之意 爲薪者,爲此室死者不復居,亦毀廟改塗、 鬲」者,此鬲暫用煑潘,既則以盛鬻而縣於 備淅 ,廣尺,輪二尺,深三尺,南其壤。』沐汁、 ?,謂殯宫西北隅之檐也。 也。 公彦云:「當是 淅米而 《士喪禮》沐稻,此「士沐粱」,禮俗 飯 則 米也。 沪,又 廟,殯宫也。 取 也。 其乾 取其潘, 煑之以 甸 八也。」 以 知也。 不言「不説繘」及「盡階不 人,有司主田 用 久 其餘 此 甸師之屬。」《周禮 丽 爨 垼 者,一 厞,蔽也。 易於然 愚謂: 差,淅· **鬻鬻而縣** 甸人徹取 1野者。 沐尸,其米則 也。 也,謂差摩之 管人汲,汲水 而 則爲 御 廟之西北 於重 甸 者佐之 日 》甸 人,賈 其 此 盆。」 重 也。 升 潔 厞 所

> 降因取 掌「帥 之爾。 身,事之次也。此先浴後沐,記者由便言 以下也。按《士喪禮》先沐後浴,蓋自 者,蒙前可知 沐言「盤」,互相備 酌之,以盤承之。 垼及取薪皆使供其事也。 承潘也。 不正西而西北者,因取 士喪禮》云: 其徒以薪蒸役外内饔之事」,故此 〇前「復者降自 沐浴之潘水,皆 也。 示不 於浴言「盆」言「枓」, ·由前 也。 如它日者 西北 沐巾亦用絺,不言 降,不以 西 以盆 沐用瓦 榮」,孔 北 謂 盛 **那爲便** 沐 虚 之,以 2盤,用 ,疏云: 用 反 首 瓦 也。 也。 及 盤 於 枓 以 爲

此節孔

疏

云:「甸人爲竈竟,又取復魄人

所徹正

寢西北

罪薪

,以然竈煑沐汁。」

謂

前

云「降自西北榮」,不云「取厞」,此

| 四人取所

徹

廟之西北厍薪」,不云「取

取 侯 薪 也 未 復 嘗 者 魺 詗 其 西 取 復者,臆説甚矣。 所 廟、寢皆復,練始壞廟 疏 特 北那乎? 薪 徹 以前 "**,** 而 廟 之 徹 後 西 廟 「西北」二字偶合,遂以 北 之 厞 西 薪 且士惟復於寢,諸 北 厞 ,豈有復時即 則 者 是 實 復 即 者 甸 降 徹 取 人 時

君設 士併 今從之。 始死遷尸于牀」之上,鄭氏云:「宜承『濡濯弃于坎』下。」 造,七到反。 大 瓦盤, 盤 ,造冰焉。 併,步頂反。 無冰。 設牀,襢第,有 檀,之善反。」〇此連下節,舊 大夫設夷盤,造冰焉。 枕。 《釋文》: 在

内冰盤 席。 尺,赤中, 焉 鄭氏曰:「造猶内也。 秋涼 水耳。 禮 产。自仲· 中 而止。 夷盤 漢禮大盤廣 ,乃設牀於其上,不施 春之後, 小 士不用冰,以瓦爲盤 焉。 尸 八尺,長丈二,深三 《周禮》天子夷盤。 檀第,袒 既襲,既 簣 席 也 小 而 ·斂,先 一,併 , 謂 遷 以 無 尸

尸也。 既浴 沐浴 禮 同之。」 牀設於南 露其第,使浴水得以下流 也。」此盤皆即浴時承水者,而因内冰焉 得用冰,故《士喪禮》:「有冰,用 則大盤、夷盤皆 小,故併兩盤 夫謂之夷盤,散文則大盤 秋用冰之時,則君、大夫皆内冰於盤,以 言沐浴設牀,或謂 士喪 有枕」者,嫌: 浴於中 以 凌人》「大喪,共夷盤冰」,是也。 丽 禮 夷亦 設 後 雷,飯 愚謂: 牀 牖 ,則專用以 君 大也。 也 賜 下,尚 而 襢 冰 第 於牖下。」此云「設牀、 用之。 有 沐 檀,露 亦 並 漆 有莞 沐浴即於含牀 對文則君謂之大盤,大 浴之時,若值 用 去枕 盛 飾 夷 於士特言「瓦盤 也,謂 冰 矣。 簟。 盤 也。 也。 亦 通 謂 士有君賜 《坊記》云: 於盤 《士喪禮》不 去簟席 然 設牀 夷盤 則 仲 夷盤 也。 其 春 謂 然含 土 而 至 制 了, 亦 周 宜 襢 襢 爲 寒 口 仲

斂,乃内冰盤中,設牀於其上而遷尸。」「此事在沐浴之後。」又謂:「尸既襲,既小常」,則沐浴與含别牀明矣。○鄭氏謂:「

也。 也。 皆與浴時同,但其牀皆有簟席而不檀,下 之故。既浴之後,遷尸含、襲,以至小斂之 言設盤内冰於含、襲之前、《士喪禮》「有 日而 後,奉尸侇於堂,其内冰於盤而設牀其上, 禮用冰者,皆於沐浴時即用之,不待襲、斂 冰,用夷盤可也」,亦言於沐浴之前。 孔氏曰:「既襲,謂大夫也。既小斂,謂士 設牀,襢第,欲使浴水下流,非爲用冰 設冰、在襲、斂之前也。」 皆是死之明日。 。若天子、諸侯,亦三 愚謂:此 是喪

此言用床之事。《坊記》曰「浴於中霤,飯席,君、大夫、士一也。《釋文》:「含,胡暗反。」含一床,襲一床,遷尸于堂又一床,皆有枕

文所言是也。

襲牀與遷尸于堂之牀亦然。然則此時雖以,禮第」,此沐浴之牀設於中霤者也。設枕」,此始死正尸之牀,既沐浴,則又遷設枕」,此始死正尸之牀,既沐浴,則又遷於其上而含焉,故謂之含牀。襲牀在含於其上而含焉,故謂之含牀。襲牀在含於旗下」,則浴與含别牀明矣。上言「設於牖下」,則浴與含别牀明矣。上言「設

青寶。莫,音暮。疏食,音嗣,下同。」 君之喪,子、大夫、公子、衆士食粥,納財,朝一溢米, 莫一溢米,食之無算。士疏食水飲,食之無 算。,《釋文》:「粥,之育反,又音育。溢,音逸,劉昌宗又 等。 夫人、世婦、諸妻皆疏食水飲,食之無 章。 美人、世婦、諸妻皆疏食水飲,食之無 育。 美,音暮。疏食,音嗣,下同。」

於粟米之法,一溢爲米一升二十四分升之鄭氏曰:「納財,謂食穀也。二十兩曰溢。

用冰,其牀不襢第矣。

也。 則一百九十二兩,則一升爲十九兩有奇。 升重十兩,二十兩則米二升。説《左傳》者 合,則二十四銖合重一兩。 鐘之律」,其實『一龠,重十二銖』。 合龠爲 或粥或飯,作之無時,當須預納其米,故云 此 銖,計一十九兩有奇爲一升,則總有 不能頓食,隨須則食,故云『無算』。疏,麤 六十銖八絫,以成四百八十銖,唯有十九 云『百二十斤爲石』,則一斗十二斤,爲兩 `財,謂泉、穀。」言『納財』者,以一日之中 納財』。 大略而 溢 兩爲二十四銖,則二十兩爲四百 故《大宰》云『以九賦斂財賄』,注 一米,或 諸妻,御 絫在,是爲米 古秤有二法。 言之。 粥 送也。 或飯。」 食之無算者,居喪困病, 一升二十四分升之一。 同言『無算』,則是皆 按《律曆志》云『黄 孔 氏 十合爲一升, 日 「財 八十 謂 四

食, 也。 也。 飲,異姓之士也。食之無算,哀痛不能多 衆士食粥,謂君 與疏食水飲,皆謂三日不食之後也。 然則大夫、士常食、蓋以粺與鑿與。 鑿二十四,侍御二十一。」言粟五升爲糲米 法》云:「粟率五十,糲米三十,粺二十七, 粟一石舂米六斗爲糲。 掬」,一升也。」 倫、葛洪皆云:『滿手曰溢。』」 陸氏《喪服》釋文曰:王肅、劉逵、袁準、孔 婦人質弱,恐食粥傷性,故亦 三升,以下漸細。 「太僕見馬遺財足」之財。疏,謂糲米也。 但不爲粥,亦不過朝一溢米,莫一溢米 「《小爾雅》「一手之盛謂之溢 水飲、言但飲水而已、無漿酪之屬 食, 飯也 士 有服之親也。 侍御者,蓋人君之所食。 愚謂:財,讀如《漢書》 賤 病 輕 《九章·粟米之 故 疏 疏食 食水 士疏 敖氏繼公 ,兩手曰 水 飲 食粥 食水 也。 也。 飲。 食水飲,妻妾疏食水飲。士亦如之。 大夫之喪,主人、室老、子姓皆食粥,衆士疏

水飲。」 氏謂 臣。 西 之,鄭氏止以「子」與「妻妾」言之者,蓋鄭 (曰:「室老,其貴臣也。 士無臣 士亦如之者,如其子食粥,妻妾疏 面,東上,私 愚謂:子姓,衆子也。 一故也。 臣 《特牲》記「公有司門 門東、北面、西上」, 衆士,所 士 亦 謂 如 衆 食

貴臣也,其餘則衆臣也。其貴臣食粥,衆臣明矣。《士冠禮》《士喪禮》有宰,此士之《喪服》記「士爲庶母、貴臣、貴妾」,則士有

之,君、大夫、士一也。練而食菜果,祥而既葬,主人疏食水飲,不食菜果,婦人亦如

臣疏食水飲,亦皆如大夫之禮也

亦也。 鄭氏曰:「果,瓜桃之屬。」 孔氏曰:「既 鄭氏曰:「果,瓜桃之屬。」 孔氏曰:「既 亦也。

管反。乾,音干。」○鄭注:「篹,或作「箅」。」酒。《釋文》:「篹,本又作「匴」,又作「箅」,悉緩反,又蘸醬。 始食肉者先食乾肉,始飲酒者先飲醴、食粥於盛,不盥。 食於篹者盥。 食菜以醯、

鄭 也。 之,故盥也。 祥而飲酒也。」 氏云: 『此據病而不能食者,練而食醯、醬, 以食乾肉矣。食菜用醯、醬,於情爲安。」熊 氏云:『記者所聞之異。大祥既鼓琴,亦可 肉,先飲醴酒者,皆以其味差薄故也 每日常食之器也。禮食乃以簋。先食乾 大祥有醢、醬,禫而飲醴酒」,二文不同。 庾 之下,謂祥後也。 歌粥不用手,故不盥。飯盛於篡,以手取 氏 歠 曰 者不 盛 盥,手飯者盥。」 『食肉』『飲酒』,文承『既祥』 謂 今時 然《間傳》曰『父母之喪, 愚謂:食於篡,此吉、凶 杯 杅 也。 孔 篹 氏 竹 曰 筥

並于偽反。與,音預。」○樂,音洛,下同。 食肉飲酒,不與人樂之。《釋文》:「期,音基。爲,父在,爲母爲妻,九月之喪,食飲猶期之喪也。月既葬,食肉飲酒。期,終喪不食肉,不飲酒。期之喪,三不食,食疏食,水飲,不食菜果。三期之喪,三不食,食疏食,水飲,不食菜果。三

> 同也。 鄭氏 不同。 義服明矣。蓋期之正服,如爲祖父母,爲 則此云「疏食水飲,不食菜果」者,非專指 義服也。其正服則二日不食。故《間傳》 日 不食」,各據其一端言之,或亦禮俗之有不 世叔父,爲兄弟,爲兄弟之子,其輕重亦自 云:『齊衰二日不食。』」 「叔母、世母食肉飲酒」,此即旁期之義服 "「期之喪,三不食,謂大夫、士旁期之 日 故此云「三不食」、《間傳》云「二日 「食肉飲酒 亦謂既葬。」 愚謂:下文言 孔氏

主、宗子,食肉飲酒。《釋文》、「比,必利反。」葬,食肉飲酒,不與人樂之。叔母、世母、故五月、三月之喪,壹不食,再不食可也。比

夫、君也。」 孔氏曰:「壹不食、謂緦麻。也。故主、謂舊君也。言『故主』者、容大鄭氏曰:「叔母、世母食肉飲酒、義服恩輕

也。 能食粥、羹之以菜、謂未葬之前。有疾、飲 唯衰麻在身,言其居處飲食,與吉時 羹之以菜」,凡疏食者,必有菜羹也。 愚謂:不能 食粥,則當疏 食, 加 不 同

葬,食肉飲酒,謂自成服以至於葬,得食

肉

麻再不食,義服

小功壹不食。」

愚謂

比

再不食,謂小功。併言之者,容殤降之緦

既葬,若君食之則食之,大夫、父之友食之則 文》:「君食之,友食之,食並音嗣。辟,音避。」 食之矣。不辟粱肉,若有酒、醴 則 辭。《釋

動人之志氣,爲其散哀心也。 違尊者之命也。 以下,既葬,適人,人食之,其黨也食之,非 顔色亦不可。」 愚謂:《雜記》曰:「大功 鄭氏曰:「尊者之前,可以食美也。 惟尊者之命則不敢辭。不辟粱肉,亦爲重 其黨不食也。」則三年之喪不食於人矣。 有酒、醴則辭者,酒、醴能 變於

歸私家則自如,其或可也。」

不可强説。

禮記卷四十三終

爲之節制可乎?」朱子曰:「《禮經》無文, 未葬之前,可以通行何如? 飲酒」之文,注云『義服恩輕」,不知自死至 「《喪大記》有『叔母、世母、故主、宗子食肉 酒,亦謂成服後,葬前也。 飲酒也。叔母、世母、故主、宗子食肉飲 服既不輕,而飲酒居處,獨不 竊意在喪次則當如本服之制, 〇葉味 但一人向隅 道 問: 酒食肉,謂既葬之後也。

滿堂不樂。

可也。 不能 鄭氏 也。 食粥,羹之以菜可也。有疾,食肉飲酒 五十不成喪,七十唯衰麻在身。 所不能備,謂不致毁、不散送之屬也。 有疾食肉飲酒者,爲其氣微。 曰:「性不能食粥者,可食 飯、菜羹 成猶備

三八

禮記卷四十四

國史館纂脩孫希旦集解賜進士及第翰林院編脩

喪大記第二十二之二

蒲席,士以葦席。小斂於户内,大斂於阼。君以簟席,大夫以

莞上簟」,謂小斂席也。 鄭 君,上席以蒲。若吉禮祭祀,則蒲在莞下。 下莞上簟』、《士喪》經云『布席於户内,下 有莞,則知君及大夫皆有莞也。 初」,是士初死至大斂用席,皆同也。 氏 曰:「簟,細 孔氏曰:「按《士喪》記『設牀當牖 葦席 也。 大斂云『布 三者下皆 但大夫辟 席 士尚 有 如

> 鄭注:「或曰「縮者二」。」 預云:「衣單、複具曰稱。」後放此。 序東,大夫、士陳衣于房中,皆西領,北上, 絞、給不在列。《釋文》:「絞、户交反。 縞衾,士緇衾,皆一,衣十有九稱。 小斂,布絞,縮者 也。 者,士 席、紛 故《司· 此葦席之麤於蒲席者也,士斂之所用 帷。」此葦席之精於蒲席者也,君斂之所用 記》曰:「士輤,葦席以爲屋,蒲席以 士之葦席亦謂之簟也。但葦席有二。《雜 「竹葦曰簟。」《士喪禮》:「下莞上簟。」是 又《雜記》曰:「有葦席,既葬蒲 卑不 純」,與此異也。 几筵》『諸侯祭祀席蒲筵、繢純, 嫌 也。 一,横者三。君錦衾,大夫 愚 士以 謂 約,其鴆反,後同。」○ 葦席,與 《詩箋》云: 稱,尺證 君陳衣于 爲裳 (君同 反,杜 也。 席。」 加莞

也。衣十有九稱,法天地之終數也。絞、鄭氏曰:「絞,既斂所用束堅之者。縮,從

終不 横三縮一」,先横 先言者在下,後言者在上。在上者先斂, 之絞辟之矣。辟者,謂用全幅布爲之,而 絞束之。」 賈氏公彦曰:「絞直言幅數, 舉尸於衣上,屈衣裹,又屈衾裹之,然後以 序東,堂上東夾前也。 縞,生絹也。 縮者在下,横者在上也。《士喪禮》曰「絞 在下者後斂。 析其末爲二也。凡斂之絞、紟、衾、衣,皆 不言長短者,人有長短不定,取足 横者之上,舒衾於絞上,衣布於衾上,然後 無約,因絞 「緇衾,頹裹無紞。」然則凡衾皆複爲之也。 以布爲絞,從者一幅,横者三幅。從者在 在 列 愚謂:大斂之絞言「不辟」,則小斂 以其 不在 緇,緇布也。《士 此云「縮者一,横者三」,則 不成稱,不連 列見之也。」 後 縮,蓋 小斂之衣,雖尊卑 禮 數 俗不 喪禮》曰 孔氏 也。 同 小斂 日 也 而

> 矣。 君、大夫、士小斂、大斂及襚所用之衣,并 氏曰:「此以下至『絺、綌、紵不人』,廣明 同。 《士喪禮》「陳衣於房,南領,西上」,與此不 所陳之處。」 喪禮》之所言也。 絞、給不在列,則衾在列 於序東,故西領,北上,皆統於尸。若大 夫、士陳衣於房中,則不當北上,皆如《士 也。序東、房中,皆在尸東,故皆西領。 東序,衣多也。 同 用十九稱,而 小斂在户内,陳衣當統於尸。君陳衣 衾得在列者,以其複爲之故也。 大夫、士陳於東房,衣少 陳衣多寡不同。 君陳衣於 〇 孔

如朝服。絞一幅爲三,不辟。終五幅,無紞。士陳衣于序東,三十稱,西領,南上。絞、終上。大夫陳衣于序東,五十稱,西領,南上。於、於大夫、士一也。君陳衣于庭,百稱,北領,西大斂,布絞,縮者三,横者五,布終,二衾,君、

服者, 鄭氏曰: 之絞,一幅三析用之,以爲堅之急也。 氏曰:「紟,禪被也。大斂二衾,其所用與 時禪被有識,死者去之,異於生也。」 以組類爲之,綴之領側,若今被識矣。 絞,廣終幅,析其末,以爲堅之强也。 者,由西階取之便也。大夫、士小斂衣少, 是大斂時 禮》『幠用斂衾』,注:『大斂所用之衾。』一 小斂同。 數,喪禮略上下。 之便也。」 統於尸,故北上,大斂衣多,故南上,亦取 謂布精粗。 「二衾者,或覆之,或薦之。 此衾,一是始死覆尸者,故《士喪 復制。北領者,尸在堂也。 賈氏公彦曰:「大斂衣 大夫及五等諸侯各同 朝服十五升。 小 不依 西上 大斂 ,斂之 如 紞, 生 孔 朝 命

> 節,則天子宜百二十稱。 大斂衾不言其所用之異,則與 斂用二衾者,大斂衣多,宜用二衾裹之也。 不同,亦禮俗異也。序東西領南上,房中 庭,蓋在阼階下之東,故北領,西上。此云 不必止於此也。 十稱、三十稱,皆據用以斂者言之,其陳 東,皆爲大斂之衣多於小斂也。 百稱、五 斂之絞,擘其末。 南領西上,亦皆統於尸 喪禮》「大斂陳衣於房,南領,西上」,與此 「大夫、士皆陳衣於序東,西領,南上」,《士 愚謂:君陳衣於庭,大夫、士陳衣於序 大斂時尸在阼,君陳衣於 大斂之絞,用 也。 小斂惟一衾,大 辟,擘也。 小斂同也。」 幅布 小

鄭氏曰:「不倒,尊祭服也。 斂耂小斂之衣,祭服不倒。《釋文》:「倒,丁爲三而用之,而不復擘也。

斂者要方,散

老反。」

衣有倒。」

受之不以即陳。《釋文》:「襚,音遂。」〇「君無襚」爲君無襚。大夫、士畢主人之祭服,親戚之衣,

熊氏以「君無襚大夫士」爲句,非是。

同也。 以上之襚,則襚 謂大功以上之親也。不以即陳,謂主人不 小 委於尸東,而主人之人以之即陳,若大 使人陳之也。 而後以襚衣繼之,主人先自盡 亦陳襚衣 君無襚,言君之小斂不用襚衣也。《士喪 人陳之,蓋 命,以即陳」,與此不同者,蓋襚者之衣皆 斂兼用 》襲衣「庶襚繼陳,不用」,蓋君之小斂, 襚 而不用也。 與《 衣 《士喪禮》云「親者襚,不將 ,然必 士 **!**者自以即陳,而主人 喪禮》文似異 先盡 畢,盡也。大夫、士 用主人之祭服, 也。 (而義 親戚, 不使 實 功

君、大夫、士祭服無算。君褶衣、褶衾,大夫、小斂,君、大夫、士皆用複衣、複衾。大斂,

士猶小斂也。《釋文》:「複,音福。褶,音牒。」

鄭氏 也。」 疏,取其中者而 然用袍、褶 袍、褶與裘、葛皆褻衣也。 小斂,猶用複衣、複衾 著者,爲其太厚,不便於斂也。 著者謂之褶。 티 : 愚謂:有著者謂之複,有表 「褶,袷也。 而不用裘、葛,爲裘太厚,葛太 君大斂衣多,故衣、衾之有 用之也。 也。 君 衣 襲斂兼用 複衣,即 尚 多 大夫、士猶 裹 去 、褻衣, 袍 也。 其 而 著 無

文》:「禪,音單。」● 袍必有表,不禪,衣必有裳,謂之一稱。《

必表而出之」,亦爲其褻也。」 愚謂:袍,纁袡爲一」,是也。《論語》『當暑袗締絡,也。《雜記》曰『子羔之襲,繭衣裳與税衣、蚁,與氏曰:「袍,褻衣,必有以表之乃成稱

● 「單」、《釋文》作「升」。

也。 袍。 同。 謂之稱。袍乃長襦,故必以有裳之衣若椽 裳,釋所以袍必有表之義也。衣、裳具,乃 有著之衣也。 曰:「襚者以褶,則必有裳。」必有裳,即必 衣,與《玉藻》「禪曰絅」之義異 若公,則襲及大、小斂皆不用褻衣。《雜 喪禮》大斂「散衣」,是亦有袍。若大夫襲 有表之謂。袍、褶皆褻衣,故用之之法同。 衣者爲之表,乃謂之一稱也。《士喪禮 亦有袍、《雜記》「子羔之襲,繭衣裳」,是 ○孔氏曰:「熊氏云:『褻衣所用,尊卑不 「褖衣」,注云:「褖,所以表袍者。」是襲有 緣衣以下袍、繭之屬。」是小斂有袍。《士 季康子之母死,陳褻衣,敬姜命徹之」。 《士喪禮》小斂,云「散衣次」,注云: 斂則必用正服,不用褻衣,故《檀弓》 士襲用褻衣,故《士喪禮》「陳襲事」有 而曰「不禪」者,謂不專用一 也。 衣必 有

可知。」」 愚謂:敬姜命徹褻衣,所用衣之褻服不當陳於序東,使賓客見之耳,非謂不可用以斂也。上文「小斂,君、大夫、士皆用複衣」,大斂,「君褶衣」。大夫、士士,劍複衣,褶衣即褻衣也,則君、大夫、士士、小斂複衣,褶衣即褻衣也,則君、大夫、士士、小劍複衣,褶衣即褻衣也,則君、大夫、士士、小劍複衣,褶衣即褻衣矣。人君襲無褻衣,所用衣少也。大、小劍用褻衣,所用衣少也。大、小劍用褻衣,所用衣少也。大、小劍用褻衣,所用衣

西階。《釋文》:「箧,古協反。」● 凡陳衣者實之篋,取衣者亦以篋,升降者自

升降皆由西階。曰篋。鬼神之位在西,衣是死者所用,故取衣,謂取之於所陳之處而用之也。隋方

凡陳衣不詘,非列采不入,締、給、紵不入。

^{● 「}古」、《釋文》作「苦」。

《釋文》:「詘,丘勿反。 紵,直呂反。」

紵。 二 也。 鄭氏 正色也 色或用爲褻服矣,惟陳之而用以斂者必以 絺、綌不以人,則袍、褶固陳之矣。《論語 是紵布。此褻衣,故不入陳也。」 列采,謂雜色也。 紅紫不以爲褻服」,則紅紫而外,其他間 īĒ 《周禮•典枲》注曰: 『白而疏細 色之服 孔氏曰:「列采,謂五方正 「不詘 也。 門,謂舒 絺、綌、紵,當暑之褻衣 絺是細葛,綌是粗葛,紵 而不卷也。 愚謂: 色。 列采, 非 曰

凡斂者袒,遷尸者襲。

侇於堂,六也。 遷於襲牀,四也。 大、小斂也。 遷尸有八: 始死遷於牖下, 鄭氏曰:「袒者,於事便也。」 也。 遷於浴牀,二也。 大斂遷尸,七也。遷尸於 小斂遷尸,五也。 遷於含牀,三也。 愚謂:斂, 奉尸

> 斂。《釋文》:「胥,依注作「祝」,之六反。」 胥侍之,衆胥是斂。 君之喪,大胥是斂,衆胥佐之。大夫之喪,大 遷尸事少,故襲。若主人奉尸,皆袒也。 棺,八也。袒者,於事便也,斂事多,故袒。 士之喪,胥爲侍,士是

也。 官主斂事、大祝贊之。」是天子之斂、事官 爲之。」又《大祝》「大喪贊斂」,疏云:「冬 也。《周禮·小宗伯》大喪,「帥執事 大喪贊斂。喪祝,卿大夫之喪掌斂。《士 君之喪,大祝 之屬主斂,大祝贊之,而小宗伯涖之也。 大斂、小斂」,鄭云:「親斂者,蓋事官之屬 小斂皆商祝布衣,鄭氏謂「胥當爲祝」,是 喪禮》商祝主斂。」 鄭氏曰:「胥,樂官也,不掌喪事。 「祝」,字之誤也。 衆祝,小祝、喪祝也。 主斂,衆祝佐之,降於天子 侍猶臨也。 愚謂:《士喪禮》大、 其涖 大祝之職 者蓋 胥當爲 亦小 而涖

降於大夫也。士,謂喪祝之胥徒也。又降於君也。士之喪,祝爲侍,士是斂,又宗伯與。大夫之喪,大祝侍之,衆祝是斂,

《釋文》:「紐,女九反,舊而慎反。」小斂、大斂,祭服不倒,皆左衽,結絞不紐。

鄭氏曰:「左衽,衽鄉左,反生時也。」 之,欲其束之堅急也。 約之,大、小斂之絞不綴紐,直取兩端交結 衽在右而鄉左,謂之左衽也。 之衽在左而鄉右,謂之右衽。 氏曰:「前已言『小斂,祭服不倒』,此又言 大、小斂之絞也。 ·小斂」者,爲下諸事出也。」 生時大帶綴紐,而 愚謂: 結絞, 大、小斂之 謂結 用 生時 孔 組

之壹不食。凡斂者六人。《釋文》:「與,音預。」○斂者既斂必哭,士與其執事則斂,斂焉則爲

士與其執事則斂者,言喪祝之士與執是人

鄭注:「執,或爲「槸」。

故用六人。」
故用六人。」
故用六人。」
故用六人。」
故用六人。」

故用六人。」

故用六人。」

故用六人。」

故用六人。」

故用六人。」

以夷衾。裁猶制也。」 孔氏曰:「冒作兩殺,冒之下帬,韜足上行者也。小斂又覆鄭氏曰:「冒者,既襲所以韜尸,重形也。

覆用: 故别制夷衾以覆尸,至大斂而去之也。夷 也。長與手齊者,人之長短不一,皆以齊 衾質、殺之裁猶冒者,夷衾之制如衾,其上 於手爲度也。 則錦冒者玄錦,黼殺者皆纁帛而畫以黼文 冒、黼殺亦以帛爲之,士之緇冒、赬殺亦以 下所用繒色及長 布爲之也。 之衾,大夫以縞,士以緇布,則大夫之玄 之在下者向足而 在上者上下方正,故曰質。殺,削也。冒 緇冒,皆指其質而言也。質,正也。 愚謂: 冒者,質、殺之總名。 囊,上者曰質,下者曰殺。 合一邊,餘一邊不縫,安帶綴以結之。」 既夕禮》:「幠用夷衾。」蓋夷衾乃殯時所 大斂之衾,既小斂,則大斂之衾須陳 緇冒、赬殺,所以象天地之色, 自小斂以往用夷衾者,始死 漸削,故 短 之度,則與冒 日殺。 縫合一頭,又縫 錦冒、玄冒、 大、小斂 同 冒之 也。

之皮弁,會五采,玉璂,象邸, 鄭氏謂「大夫之喪,亦弁経」,是也。 弁而素。 鄭氏曰: 如爵弁而素」,則 大夫之喪,子亦弁経。」 「子弁経者、未成服 非也。 《 弁 玉 (師)||云:「王 也。 笄。 弁 愚 王之 弁謂 如 謂 爵

者也。 者,以大斂在阼階上也。 廉棱之上也。 斂乃服之,而小斂猶素冠也。《士喪禮》小 子免而從柩。」則是君大夫之弁經,至大 向尸也。 人君至大斂則素弁而加經,此禮之異於士 斂後「袒,括髮,襲、絰於序東」,以至成服 叔小斂投冠。《曾子問》:「『君出疆,以三 時所 曰:『其殯服,則子弁絰、疏衰,如小斂,則 年之戒,以椑從。 則其爲父母弁絰必矣。 弁皆皮弁也。 大夫與殯弁絰。」大夫與他人殯尚弁絰 爲環絰。 加之苴絰,大鬲者也。《雜記》云: 序端,東序之南頭也。 加 堂廉,南北節也。 加 楹西,東楹之西也。 環經。」 此言「弁経」,則其経爲小斂 若其絰 君薨,其人如之何?」子 是凡言 則 《檀弓》:「叔孫武 堂廉,堂之南畔 有弔服之弁絰 楹西,東西節 「弁経」者 即位於序端 北面, 「, 其

宗婦也。 子遠辟喪主也。 在堂下北 之位,父、兄、子姓同在東方,大斂時父兄 以賤不得升堂,故在阼階下北面也。 斂,君與卿大夫升堂,而父、兄之爲士者, 也。 **阼階下西面,卿大夫、父、兄繼而南。** 其不爲卿大夫者也。 大夫者,自在卿大夫之位。 以下者,舉尊長以該卑幼也。父兄若爲 卿大夫之位觀之,則大斂之處,蓋在 東楹之西者,不敢迫近斂處也。 **阼階上之南**,乃得 也。 東上」者,蒙上可知也。 直 東上,統於君也。父兄,謂旁親 西楹之南矣。 必立於堂廉上者,斂於阼階上,必直 房中南面者,在西房中而南面 面,則子姓 命婦,内命婦也。 北面 其西直西序,則爲 亦 小斂之後,主人即位 然。 而鄉之也。必立於 人君初喪,室中 堂下北面,謂 人君尊,故衆 以此 外宗, 及大 殯所 作階 白期 子與 卿

宜。」鋪絞、約、衾、衣者,先鋪絞,次約,次人之位,宜統於夫人也。不言「姑、姊妹、子」者,以命婦之位見之也。商祝,喪祝之婦」者,以命婦之位見之也。商祝,喪祝之婦」者,以命婦之位見之也。不言「好、姊妹、子此。 知在西房者,此時夫人在尸西,外宗也。知在西房者,此時夫人在尸西,外宗

人也。人也。是人,薨君之夫以身就尸而馮依之也。夫人,薨君之夫者,致其潔也。盤,所以承盥水也。馮,謂以絞束之也。士,喪祝之士也。舉尸先盥以絞束之也。士,喪祝之士也。舉尸先盥

婦尸西,東面。遷尸。卒斂,宰告,主人降,堂廉,楹西,北面,東上。主人房外南面。主先入升堂。君即位于序端。卿、大夫即位于主人迎,先入門右,巫止于門外。君釋菜,祝大夫之喪,將大斂,既鋪絞、約、衾、衣,君至,

「巫止門外」,「門外」符字耳。」主人馮之,命主婦馮之。《釋文》:「巫止,本或作北面于堂下,君撫之,主人拜稽顙。君降,升

門外。 君命 謂:主人迎者,迎於外門外也。凡主人於 門乃止,則君下之處差遠於廟門矣。」 門則祝前,互用其一,所以下天子也。 用 爾。《周官》喪祝、男巫皆於王弔則 門神也。 於哀戚,而不暇於接賓也。 君不得並用巫、祝,於廟門外則巫前,至 者,君行必與巫,巫主辟凶邪也。 喪,不入諸臣之家也。」 鄭氏曰:「先入右者,入門而右也。 「主人不迎賓,若有所迎則不哭,蓋禮然 巫、祝者,其亦與神交之道與。 ,則迎於寢門外,於君親至,則迎於外 迎君不拜者、蓋喪禮 必禮門神者,禮,君非 敖氏繼公曰 若 不迎賓,以 君弔 問疾、弔 釋菜,禮 巫 前 巫止 則 至 必 廟 廟 愚 國

階上 又 在 主人 互. 士既 撫,撫尸也。 也。 迎 人、主婦 命主人、主婦馮之者,君雖已撫之,必使主 西而東面 西,東面者,時尸 於阼階,此「即位於序端」,亦以大斂在阼 主人之位在門右北 相 而 備 殯而君 (西楹 房外南 阼階下中庭,臣於君弔受禮之處也。 Щ 賓之義 不 也 避之也。 拜,蓋於迎之禮所 得自盡 也。 東,北 注:注]其禮略同,而文各有詳略 也。 面,大夫之子尊 君撫尸 北 其情也。 面。」此不待君命即升堂, .猶在兩楹之間,主婦在其 面 《士喪禮》:「君升主人, 先入門右者,君 「於堂下,在阼階下中 面 則視斂事畢,故降。 也。 此與下文「大夫、 有不備,亦猶其 君至臣家,即 也。 弔 主 於臣 婦 庭 F 位

鄭氏曰:「其餘,謂卿大夫及主婦之位。」士之喪,將大斂,君不在,其餘禮猶大夫也。

也。 謂: 楹西之位矣。 在 在」。 孔 君,而卿大夫不可越主人而東也。若君 面,卿大夫繼之,東上」,蓋以士卑不敢近 在位,則卿大夫位亦在堂廉近西。」 女之儀事,悉如大夫也。 ,則主人當在序端 氏 《士喪禮》君視大斂,「主人西楹東,北 卿大夫視斂在 日 其餘 : 士 禮猶大夫者 卑, 君 堂廉 不 ,而卿大夫自 視 謂鋪 楹 若有大夫來 斂, 西者,位之正 故 衣、列位、男 云『君 在 而 廉 不 不 愚 君

客不與拾踊者也。 之踊,不以三者三爲節,且惟主人踊,而賓鄭氏曰:「目孝子踊節。」 愚謂:此無算

娣。《釋文》:「姪,大結反。娣,大計反。」君撫大夫,撫内命婦。大夫撫室老,撫姪、

鄭氏曰:「撫,以手按之也。内命婦,君之

世婦。」

文》、「長,竹丈反。」
本文、「長,竹丈反。」
本其尸。凡馮尸者,父、母先,妻、子後。《釋父、母、妻、長子、庶子。庶子有子,則父母不君、大夫馮父、母、妻、長子,不馮庶子。士馮

^{勇反。」} 「奉,芳之,,寿於妻、於昆弟執之。《釋文》:「奉,芳之,婦於舅姑奉之,舅姑於婦撫之。妻於夫君於臣撫之,父母於子執之。子於父母馮

奉之,捧當心上衣也。拘之,微引心上衣尸心,身不服膺也。馮之,服膺心上也。類必當心。」 孔氏曰:「撫之,以手撫按鄭氏曰:「此恩之深淺尊卑之儀也。馮之

執則爲尊也。舅姑於婦,婦於舅姑及昆者則無、知次之,執次之,執次之。尊者則馮、奉、與者則無、執。執理於其門不馮之者,廉耻之道存焉。拘臣無,父母於子執。」 吴氏澄曰:「總言臣撫,父母於子執。」 吴氏澄曰:「總言臣撫,父母於子執。」 吴氏澄曰:「總言乃於其尸不馮之者,廉耻之道存焉。拘乃於其尸不馮之者,廉耻之道存焉。拘乃於其尸不馮之者,廉耻之道存焉。拘以之,執其心上衣也。馮者爲重,奉也。執之,執其心上衣也。馮者爲重,奉

馮尸不當君所。

弟,非主其喪則不馮也。

鄭氏曰:「不敢與尊者所馮同處。」

凡馮尸,興必踊。

「枕,子鴆反。闰,苦內反。襢,章善反。」不言。君爲廬,宮之,大夫、士襢之。《釋文》:父母之喪,居倚廬,不塗,寢苫枕凷,非喪事

方北户。 而 其北開户以出入也。 牆,用草蓋之,其南北亦以草爲屏蔽,而於 門外就東牆爲之,以木抵於地 襢之,不惟障也。」 氏曰:「宫之者,謂廬外以帷障之如宫牆。 宫,謂圍障之也。 鄭氏曰:「倚廬,倚木爲廬,在中門外,東 則遠,故爲廬於殯宮門外者,欲其近殯宮 無至於褻也 苫,編 稾。 檀,祖也,謂不障。」 愚謂:倚廬,於殯宫 於殯宫則褻,於異 **垱**, 堛 也。 而 《喪服》注。 斜 倚於 孔 室

皆宫之。《釋文》:「拄,張主反。楣,音眉。」既葬,拄楣,●塗廬,不於顯者,君、大夫、士

曰:「拄楣以納日光,又泥塗以辟風寒。鄭氏曰:「不於顯者,不塗見面。」 孔氏區之。《釋文》:「拄,張主反。楣,音眉。」

而下可作户也。」
楣,又施短柱以柱起其楣,架其檐令稍高,曰:「始者無拄與楣,檐著於地,至是乃施曰:「始者無拄與楣,檐著於地,至是乃施

隠者爲廬」。 文》:「適,丁歴反。」〇按《儀禮・喪服》賈疏引此作「倚於凡非適子者,自未葬,以於隱者爲廬。《釋

士言公事,不言家事。 既葬,與人立。君言王事,不言國事。大夫、

不與人立,既葬後可與人並立也。猶不群鄭氏曰:「此常禮也。」 孔氏曰:「未葬

❶ 「拄」、《禮記註疏》作「柱」。

於一國以治其人民者也。國事,政令之施境外,以蕃輔天子者也。國事,政令之施謂:王事,謂朝聘、會盟、征伐之事,施於問》據無事之時,此有事須言故也。』」 愚問之,不旅行」,此既葬而與人立者、《曾子武之。庾氏云:《《曾子問》「三年之喪,練不立。庾氏云:《《曾子問》「三年之喪,練不

君既葬,王政入於國,既卒哭而服王事。 大 金革之事無辟也。《釋文》:「辟,音避。」 夫、士既葬,公政入於家,既卒哭,弁、絰、帶, 事無辟,言服喪服 所受之葛絰、葛 服以冠,大夫以上喪服以弁。絰、帶,卒哭 用喪冠之物,而如弁之制爲之者也。 也。《司服》:「凡凶事,服弁服。」服弁者, 鄭氏曰"「此權禮也。」 愚謂:弁,服弁 夫言之者,士位卑人衆,大夫位尊人少,卒 夫、士既葬」,而下言「弁、経、帶」,惟據大 帶 也。 以從軍事也。 弁、経、帶,金革之 上云「大 士喪

《喪大記》:「既葬,君言王事,不言國事。 多也。 國家有事,則或 急,故以卒哭爲斷,出使之事稍緩,故以 公者,鄭氏所謂 云:「父母之喪,使必知其反也。」此皆謂 弁、絰、帶,金革之事無避也。」《禮運》云: 度之爾,非謂 大夫、士言公事,不言家事。」此謂議 之時,必終三年之喪,然後出 之喪,祥而從政。」《公羊傳》:「古者臣 政。」又曰:「喪不貳事。」《雜記》:「三年 哭而從金革之事者,在士恒少,在大 「三年之喪,與新有昏者,期不使。」《檀弓》 云:「君既葬,王政人於國,既卒哭而服王 大喪,君三年不呼其門。」此皆謂尋常 大夫、士既葬,公政入於家,既卒哭, 〇《王制》:「父母之喪,三年不從 出 「權制」也。 有既卒哭、既練 而從政也。《喪大記 然金革之事尤 而從政 圃 出 而 論謀 無 夫 叉 也。 從 有 事 恒

「君子不奪人喪」也。
者,苟非不得已,則君三年不呼其門,所謂然此皆謂國家安危所係,不得已而變通之年爲則,於權制之中,而其中又有權衡。

爲「要期」。 士 既練,居堊室,不與人居。 又烏各反。 而 内 謀家事。 無哭者,樂作 禫,或皆作『道』。」 黝,於糾反。 既祥,黝堊。 矣故也。 禫,大感反。」〇鄭注:「黝堊,或 祥而外無哭者,禫 《釋文》:「堊,烏路反, 君謀國政,大夫、

白土也 室焉。 焉。 壘擊爲之,不塗塈。」蓋在殯宮門外東 下,就東塾之外壁,而累土於其三面 疏衰者還居寢室,斬衰者既 堊室者,疏衰者始喪之所居。 地謂之黝,牆謂之堊。」既祥之後,人居殯 鄭注《喪服》云:「堊室於 黝,黑也,謂平治其土令黑也。 , 謂 以堊塗牆壁令白也。 争 練則徙 卒哭之後 -門外 《爾雅》: 以爲 雷之 吅 屋 堊, 居 下

> 而 乎止也。 哀樂之情不並行,哀除故樂作,而哭於是 作始於琴瑟,成於笙歌,而極於金石也。 不作。]又曰: 十日而成笙歌。]又曰:「孟獻子祥,縣 弓》曰:「孔子既祥,五日 者,而猶有無時思憶之哭在於殯宮。 門之内、外也。 則不復哭,故内無哭者。 **匪**,亦當於祥前脩治之也。 令黑,若欲新之然也。 乃死者所居,故塗其屋令白,又平 宫 復寢,豈復居堊室乎? 《間傳》曰「大祥居復寢 ○鄭氏 「是月禫,徙月樂。」是樂之 大祥入居殯宫,故外 以 黝堊爲堊室,非 其 樂作 彈琴而 甸人所徹 内、外,謂 是 有 也 不 漸 也。 治 成聲 至禫 無哭 西 其 殯 殯宫 《檀 祥 mi 北 地

禫而從御,吉祭而復寢。

殯宫也。」 孔氏曰:「杜預以從御爲從政鄭氏曰:「從御,御婦人也。復寢,不復宿

也。

孔氏謂「《間傳》既祥復寢,謂不復

宿

中門外,復於殯宮之寢,吉祭後

不復

宿

殯

復於平常之寢」,是也

言「祥而復寢」者,謂復於平時之正

寝也

.傳》

若

此云「吉祭而復寢」者,謂復於平時之燕寢

常祭在禫之後月,則待後月而祭。《間

若當四時常祭之月,則於禫月行吉祭。

虞》記曰:「是月也、吉祭、猶未配。」禫祭

祭,謂奉主入廟,而以吉禮祭之也。

^②士

未入而必比御者,亦示即事之漸

也。

於燕寢侍御之所,而主人猶未入,《檀弓》

孟獻子禫,比御而不入」,是也。所以

雖

爲妻。 期,居廬,句。 不御於内。《釋文》:「期,音基,下同。爲,于僞反,下 齊衰期者,大功布衰九月者,皆三月 終喪不 ·御於内者,父在爲母、

喪不

御

於内」,既言『不御於内』,故知

此

御

職

事

·,鄭必爲御婦人者,下文云『期,終

則禫後尚在殯宫也。

殯宫乃正寢,非御婦

愚謂: 吉祭乃復寢,

·御』是御婦人也。」

人之所

,而曰「從御」者,謂婦人當御者

從

於内。 皆報,夫婦齊體,妻爲夫三年,則夫宜 恩 喪,而 御於内,特對夫他期喪之三月不御於内而 妻既葬而居堊室與。 與三年者同也。三年之喪,既 喪不御内,與其祥、禫之祭,杖履之服,皆 服,而其服乃止於期,則以不敢同 則以不敢同於父也。凡尊長於卑幼之服 室,此初喪居廬,蓋爲母既練 期,期喪也。 二服本由三年而屈,故其初 一也。爲父三年,而父在爲母 初喪居倚廬,不居堊室,且 此二事,與餘期喪異也。蓋父母之 然父在爲母,終喪不 喪居倚廬,終 而 居堊室,爲 練 終喪不御 止於期, 於母也。 而居 並 爲 堊 報 期

矣,服輕故也。」 矣,服輕故也。」 矣,服輕故也。」 一文,則妻喪雖除,亦未可遽御於内矣。○ 一文必三年然後娶,達子之志也。」用是推 三年,不可以御於内也。《喪服》傳曰: 言爾,其實喪雖已除,而心喪以終三年,未

期、九月者,既葬而歸。婦人不居廬,不寢苦。喪父母,既練而歸。

也。 兄弟爲父後者皆期。九月,謂本是期 也。不寢苫,以質弱,優之也。不居 不居廬者,婦人居喪於房中,不次於外 在練後也。」」 於夫家』。 折笄首』,鄭謂『卒哭,喪之大事畢,可 在大功者。 不寢苫,據三年者言,則期以下輕喪可 孔氏曰:「女子出嫁,爲祖父母 熊氏云:『卒哭可以歸,其實歸 按《喪服》『女子爲父母,卒哭 以 而 廬 及 知 降

E自如 大夫、士,父母之喪既練而歸,朔月、忌日則八。○ 「大夫次於公館以終喪,士練而歸。」 「大夫次於公館以終喪,士練而歸。」 「大夫次於公館以終喪,士練而歸。」 「大夫、大夫、」與君有服,則《雜記》云: 「與謂歸其家。此謂異姓之卿、大夫、士與年,未 」公之喪,大夫俟練,士卒哭而歸。

父不次於子,兄不次於弟。

鄭氏曰:「謂不就其殯宮爲次而居。」 愚

謂:子,謂衆子也。《小記》曰:「父不爲

衆子次於外。」

夫、外命婦,既殯而往。 賜,小斂焉。於諸妻,爲之賜,大斂焉。於大爲之賜,大斂焉。 夫人於世婦,大斂焉,爲之於外命婦,既加蓋而君至,於士,既殯而往, 就外命婦,既加蓋而君至,於士,既殯而往,

大斂而 不往 殯 之妻也。 鄭氏曰:「爲之賜,謂 世婦,皆謂君之世婦也。 命婦加蓋而至,於臣之妻略也。」 而 往 再往 謂 凡爲之賜而 有 也。 親 夫人於大夫、外 屬之恩者也。 有恩 小斂者,皆 外命婦,卿大夫 惠 也 命婦 非 是 於 愚謂 君 小 於外 斂、 气,既 則

止于門外,祝代之先。君釋菜于門内,祝先殷奠之禮,俟于門外,見馬首,先入門右。巫大夫、士既殯而君往焉,使人戒之。主人具

升自 奠。 于門外,拜稽顙 則 拜 人 ,執戈 奠可 稽 顙。 卒奠,主人先俟于門外。 阼 也。 階,負 立 君稱言,視祝 于前,二人立 士則出俟于門外,命之反奠乃反 墉 南 画。 于 君 而踊,主人踊。 後。 即 位 擯者進,主 君退,主人送 于 作,小 大夫 臣 X

大奠。 即成 位 君 西 於阼者,主人不敢有其 君之禮,當節之也。」 稱言,舉所以來之辭也。 小臣執戈先後君,君升而夾階立。大夫殯 之來也。 鄭氏曰:「殷,大也。 |於序端 鄉 臨大夫將大斂時,禮未成,辟執事,故即 也。 服 ,成服則君亦成服 君將來則具大奠之禮以待之,榮君 盧云: 祝負墉 此大夫、士既 『上言「即 南面,直君北,房户東也。 朝夕小奠,至月朔則 室,故君位 孔氏曰:「君 。 錫 衰 殯 視祝 位 丽 於序端 君往 而 而踊,祝 往弔之。 在 即 阼 謂 位 相 而

四

六

《士喪禮》「小臣二人執戈先,二人後」,謂 成 殯而 君言 也 戈,辟邪. 先,此既 傳》「二執戈者前矣」,非謂臨喪辟凶 之後,二人北面立於阼階西,在君之前 **阼階上,西面,二人北面立於阼階東,在君** 君行時也。此云「二人執戈立於前,二人 而往」,謂既殯以後,未葬以前也。 位 小臣執戈先後君者,君之常儀 立於後」者,謂君升即位時也。 文略也。 、檀弓》「君臨臣喪,以巫、祝、桃、茢、執戈」 ,蓋負東塾,君既即位,則進而告主人使 故 既 往」,謂殯日既殯之後也。 即 殯 弔 氣 位 有巫,則 擯, 君 辭 也。 於阼階 往 也。 相主 君升,而小臣夾階北 無常期,故先使人告之。 亦 也。」前 人之禮者也 有 愚謂: 桃、蒴矣。 後二小 上云「於士、既 此云[既 君即 也,故《左 不言者, 臣 戒猶告 擯者之 邪 面 各執 位 也 也。 俟 於 殯

> 受弔 也。禮,弔賓不答拜,況君之於臣乎。 主人之辭,非弔辭也。 哭,拜稽顙,成踊。」君稱言者,蓋舉其 中庭。《士喪禮》: 凡臣於君臨其 於君弔不拜迎,蓋禮然爾,説已見前 必君之留也。 迎不拜,拜送者,拜迎則爲君之答己」,非 也 拜稽 門外,外門外也。 顙 喪,皆即 「主人中庭,君哭,主人 拜於阼階下之中 出俟於門外,不敢 位 於門右,受禮於 ○鄭氏 庭也。 慰 굸 臣

壹問之。在殯,壹往焉。石經壹並作「」。 君於大夫疾,三問之。 也。 問殷勤之意,即上文「大夫既殯 鄭氏曰:「所以致殷勤 而往者,謂既弔又於殯後更往 然《士喪禮》不見有殯後君弔之禮 ,故在殯又往與。 也。」 愚謂: 一,以 而君往」是 致 其 在 此 疾 慰 殯

君弔 ,則復殯服。 鄭注:「復,或爲『服」。

蓋

謂

於君有親屬之恩

在殯,三往焉。

夫人於大夫、士既

殯而往

,升堂即位,即

謂: 鄭氏 服 服 也 皆免。」其齊、斬之服無變也。 雖 之服,苴絰、免、布深衣也,不散帶。」 弔也。 」 亦不錫衰」,則君弔於殯後,主人之服不變 曰 爲殯 新 ,惟加免爲異耳。 君弔、「必皮弁、錫衰、主人未喪服 不當免時也,主人必免,不散麻。 復殯服,謂免也。 曰 君事也。 時末成服之服」,非也。 孔氏曰:「 復,反 謂臣 也。 殯服 喪既殯後 反其 《小記》曰:「君弔, 謂殯 未 殯、 注疏 **君** 佘小 待未 未 乃 成 ,記》又 3謂「殯 ,則君 親者 成 始 服 服 愚 來 之

於阼

階上·

也。

拜稽顙於下,拜於阼階下

中

庭。

必

以

主

婦

拜者

,喪禮男主拜

男賓,女

主人送于大門之外,不拜。君至之禮。夫人退,主婦送于門内,拜稽顙,西階,拜稽顙于下。夫人視世子而踊,奠如首,先入門右。夫人入,升堂即位,主婦降自夫人弔於大夫、士,主人出迎于門外,見馬

祝也。 已拜,故主人不拜。」 於門内,門,寢門也。 者,主婦拜竟而設奠事,如君弔禮。若 祝」之誤也 踊」,則夫人當視女祝而 祝代之而詔 巫》: 主人送於大門外,不拜者,喪無二主,主婦 則亦如主人先出 子非所以 主拜女賓,雖於君、夫人之弔亦然也。 三王 則夫人之弔,當女巫止於門外,女 后弔,則與祝前。」祝,謂天官 相夫人之禮事者、《周禮· 相其禮矣。 孔氏曰:「奠如君至之禮 而聽: 命反奠也。 婦人迎送不出門。 踊,「世子」蓋「女 前云「君視祝 主婦送 女 士 女 世 而

君命,命夫、命婦之命,四鄰賓客,其君後主北面,衆主人南面,婦人即位于房中。若有大夫君,不迎于門外,入即位于堂下。主人

人而拜。

鄭氏 子也。 君也。 孔 後 也。 之位。 殺,故 東房 人之位 堂下者,即 北,婦人即位於房中,君雖不升堂,猶 之下,西面,下正君也。 君之南而北 辟者,大斂哀深,故不辟君。 今既斂後哀 在尸 氏 丽 中也。 後主人而拜者,將拜賓,使主人陪其 曰 曰:「大夫君,謂大夫之臣 君前拜。 · 辞也。 .西,其既殯已後,君雖 今此大夫君云『婦人即位房中』, 君既即 不迎於門外,貶於正君。 在堂,其君既 一人即 作階下位 面 又前君臨 中中 按未大斂之前,君雖來,主 不俱 阼階下位,故適子避之,在 位于下 婦人即位於房中者,婦 拜者,主人無二也。」 來,故婦人並爲位於 而 大斂,主婦尸西,不 西 衆主 不 鄉 升 也。 來,不 堂 人 入即位 稱大夫爲 南 丽 主人, 立. 顯 面 避之 阼 婦 於 於 婦 適 其 階 明 人

大夫君 階下 其 也。 以 正 國之臣,其君爲主之義也。 爲首者當堂角之坫。」此衆主人之位 面 斂,「衆主人辟於東壁,南 主人南面,爲君辟也。《士喪禮》君視 夫之位,皆當如君視大夫大斂之禮也。 則當升堂視斂,大夫君與主人、主婦 此謂大夫君於既殯後至者,若當大斂時 下,二也。主人北 有 夫 君道 後,而 君 三焉: 君 ,則當坫之東。」賈疏 -中庭 其君後主人而拜者,其君使 即 既 臨其臣之賓客也。 殯 位 妻來,當同 己代主人拜賓,亦猶 不迎 而 而 於堂下,非 來, 北 於 面 婦 也。 門外, 夫人禮 面 人 (亦即位房中 不即位於門右,三也 徒下正君, 此所降於正君之禮 云: 也。 主人北面,在 也。 面」,注云:「 南 然 諸 面 即 君 亦爲 侯 主人 也 愚謂 ·; 則 位 命 弔 、卿大 於堂 (陪於 與 於異 亦 又若 西 不 大 然 頭 南 大 衆 可

譏 則是喪有二孤矣,此季康子之所以見 東面立於大夫君之後,哭而不拜也。 位於阼階之南,大夫君東 夫、命婦之命及四鄰賓客來弔,則弔 内之右,在大夫之後,哭而 主人之位不同。 夫、命婦之命及四鄰賓客來弔,大夫 面,大夫君當在中庭 君拜在前,主人拜在後」,誤也。 也。 若君命,則弔者升堂 稽顙,主人 面 不拜 拜之,主 北 也。 如其説, 面 入亦 若 君 疏謂 於 賓 門 即 命 與 西

「浴」。」
君弔,見尸、柩而后踊。鄭注:「踊,或爲「哭」,或爲

弔,則不 雖 也。」又曰 見尸,謂 上言「既 在 塗内 . 踊 殯君往」,「視祝 未殯時。 猶 也。 反 爲 未 丽 《檀弓》曰:「葬也者, 藏未亡 亡焉,失之矣。」殯時 見柩,謂 也。 而 未 踊」,若既葬 葬 時 也。 君 柩 故 藏

> 必奠。 大夫、士若君不戒而往,不具殷奠,君退

八寸,屬六寸。下大夫大棺六寸,屬四寸。 君大棺八寸,屬六寸,椑四寸。 士棺六寸。《釋文》:「屬,音燭。 鄭氏曰 卒可具,不具殷奠,亦爲不敢久留君也。 告殯,以榮君來故也。」 不先戒,當時 : 〜祭 君之來。」 雖 不 得殷奠,君去後必 愚謂: 殷奠非倉 牌,步歷反。」 孔 氏 上大夫大棺 曰 : 設奠 君 來

也。 杝。 孔氏曰: 以内説而出也。 厚三寸,杝棺一,梓棺二。 曰:『天子之棺四重:水、兕革棺被之,其 鄭氏曰:「大棺,棺之在表者也。 寸之椁。 趙簡子云『不設屬、椑』,時僭也。」 庶人之棺四寸。 是庶人之棺四寸。 「孔子爲中都宰,制四寸之棺,五 然則大棺及屬用梓,俾用 上大夫,謂列國之卿 四者皆周。」此 哀公二年,趙 《檀弓》

棺 子之棺四重:水、兕革棺被之,一 椑以杝木爲之、"檀弓"所謂「杝棺」也。 屬,以梓木爲之,《檀弓》所謂「梓棺」也。 椑, 僭也。 簡 夫加屬四寸爲一尺,上大夫大棺加二寸爲 革棺,棺三重,大夫無椑,棺二重。 士惟大 棺二,三也。杝棺一,四也。 大棺,外棺也。 無椑,今云罰始無椑,是當時大夫常禮用 制,與《檀弓》注互異,似當再考。 棺三寸,共爲二尺二寸。 寸,不設屬、椑,下卿之罰也』。 一尺四寸,君加椑四寸爲一尺八寸。 子與 一重而已。 (鄭師 蓋九寸,屬六寸,椑四寸,水、兕革 戰 庶人棺四寸,士棺六寸,大 愚謂:君,謂五等之君 於 牌,親身之棺也。 鐵 簡子自誓 鏘鳴按:此説天子棺 天子以下至士, 諸侯無水、兕 云『桐 大夫依 也。 大棺與 天子 棺 也 天 梓 禮

> 緑,用牛骨鐕。 君裹棺用朱、緑,用雜金鐕。 牛骨鐕,不言,從可知也。」 用玄、绿者,四面玄,四角緑。 不用牙金也。士不緑者,悉用玄也。亦用 云:『貢金三品,黄、白、青色。』 大夫裹棺 義》云:『朱、緑,皆繒也。』雜金鐕、《尚書》 又用象牙釘雜之,以琢朱、緑著棺也。」《隱 繒貼四角。 鄭氏曰:「鐕,所以琢著裏。」 裹棺,謂以繒貼棺裹也。 鐕,釘 士不緑。《釋文》:「鐕,子南反。」 也。 舊説云:『用金 朱繒貼四方,緑 大夫裹棺用玄、 用牛角鐕 孔氏曰:

東。士蓋不用漆,二衽二束。 君蓋用漆,三衽三束。大夫蓋用漆,二衽二

小要也,所以連合棺之缝際者。以木爲蓋,而用漆塗合其縫際牝牡之間也。衽,小要也。」 愚謂: 君蓋用漆者,謂棺既加鄭氏曰:「用漆者,塗合牝牡之中也。衽,

皆以

四寸爲差降也。

君、大夫髼、爪實于緑中,士埋之。《釋文》:

固也。 焉。古棺無釘,君與大夫以漆塗合缝際 以連合之。又每當衽上,用牛皮束之以爲 之,兩端廣,中央狹,有似深衣之衽,故名 東,以繋棺於柩車者、《士喪禮》「乃載,踊 弓》所言者是也。 者二,則其缩者一與。○棺束有二:一是 同,則其縮者亦與天子同矣。 降於君也。 東」,惟據其横者言之也。大夫二衽二束, 又鑿身與蓋 缩,柩車之束則但有横者耳。 無算,卒束,襲」,是也。 大斂加蓋後之東,專屬於棺者,此與《檀 天子也。諸侯之衽與束,其横者與天子 檀弓》曰「棺束,缩二衡三,衽每束一」,謂 衽與東有横有縮,此云「三東」「二 士蓋不用漆,又降於大夫也。 合際處作坎,内小要於坎中, 一是葬時柩車既載後之 在棺之束有横有 大夫、士横

「鬈,音舜。」○鄭注:「緑或爲「篗」。」

也。 《檀弓》曰:「設簍、翣。」簍,柳也。 棺 鄭氏曰: 有物盛而埋之。」 謂棺内四隅也。 兩階間之坎也。 中者,殯時置棺外,及葬則實於棺 中,必爲小囊盛之。」 士埋之者,沐浴之後,埋於甸人所掘 「緑當爲『角』,聲之誤 **鬊,亂髮也。** 愚謂: 緑當作「簍」。 孔氏曰: 將實 也。 實於簍 外 「士亦 爪、髪 角中, 柳 内

置,毛本誤作「至」。疏中作「欑置」,不誤 見,賢遍反。」〇鄭注:「幬,或作「錞」,或作「埻」。」〇按:欑 帷之。《釋文》:「輴,敕倫反。欑,才冠反。● 幬,音道: 欑置于西序,塗不暨于棺。 士殯見衽,塗上。 君殯用輴,欑至于上,畢塗屋。大夫殯以幬,

冠」、《釋文》作「完」。

鄭氏曰:「欑猶菆也。

屋,殯上覆如屋者

0

之。 《檀弓》參之:天子之殯,居棺以 承塵。」此「席」字誤,當作「帝」。其諸侯則居棺以 席三重於殯上。按《周禮・掌次》:「凡喪,王則張 覆之,如屋形,以泥塗之。 於屋之上,又加 闇 取容棺。 帝三重,諸侯再重,孤、卿、大夫不重。」注云:「張帟柩上 黼於棺上,然後以木題湊象椁上之四注以 木攢聚輴之四邊。 於客位殯處,然後從阼階舉棺於輴中 欑,掘地下棺,見小要耳。 其三面。 諸侯輴不畫龍,欑不題湊象椁,其他亦如 木題湊象椁,上四注如屋以覆之,盡塗之。 也 君,諸侯也。凡殯之禮,天子先以龍輔 也,士達於天子皆然。」 大夫之殯廢輔,置棺西牆 覆也。 然則天子、諸侯差寬大矣。士不 塗之不及棺者,言欑中狹小,裁 暨,及 木高於棺,乃從上加 也。 帷之,鬼神尚幽 此《記》參差, 下,就牆 孔氏 龍 脱輔,欑 曰: 綃 以 以 置 欑

或似天子,或似諸侯,故云『參差』。」 諸侯,不得云『欑至于上,畢塗屋』。 其文 天子,應稱 哭乃徹也。 衽,其衽上出處亦以木覆而塗之,故謂 欑狹去棺近,裁使塗不及棺也。 又上不爲屋也。 又不四面欑,以一面倚西壁而三面 侯並幬覆也。 欑置于西序者,大夫不輔, 按此當云「加帝再重」。 輴 上也。帷之者,帷,障也,貴賤悉然,朝 王、侯塗之,而欑廣去棺遠,大夫亦塗,而 也,謂棺衣覆之也。大夫言『幬覆』,則王 象椁,亦中央高似屋形,但不爲四注,故經 上,又菆木於塗上,不題湊象椁也。 云『畢塗屋』,總包君也。塗上加席三重 亦 菆 木 輴外,木高於棺 龍輔,不得直云『輔』。 鄭云『此《記》參差』者,若君: 塗不暨于棺者,暨,及也, 大夫殯以幬者,幬,覆 ,後加布幕於棺 士掘肂見 若君據 · 欑之, 雖 夕 塗 不

兩下之形,象椁也。

四阿者,殿屋之形。

欑,叢木也。塗,以土塗之也。諸侯之殯, 子之所見而深感,而不能以暫離者也。 ,輔居柩,欑木於柩之四旁,上高於柩,乃 喪自大斂之後,未葬之前,必殯之者, 休之以喪次,而勞憊亦可以少息也。 於是節之以朝夕哭,而哀痛可以少 至於葬,使之晝夜哀號乎其側,必 天子畫龍於轅,諸侯不畫龍 故既斂於棺,則殯之而使暫 蓋棺柩重大,猝難移徙, 且不獨此也,尸 極者人 若 之,其上正不爲屋形也 覆也,謂覆棺以 形,但不爲四注。」此則已破鄭義矣。 孔疏云:「諸侯雖不象椁,亦中央高似 輴車,以一面倚西序,欑木於其三面 大夫言之者,舉中以見上下也。 侯椁兩下,其菆塗正各象其椁形 鄭氏以此言諸侯「畢塗屋」爲參差,非 殯」,此言諸侯之殯,而皆曰「畢塗屋」也。 兩下者,夏屋之形。 諸侯不象椁」,亦非也。 夷衾也。 故《檀弓》言「天子之

天子椁四

阿,諸

然謂

也。

腊,音昔。」 筐,加魚 熬,君四種八筐,大夫三種六筐,士二 、腊焉。《釋文》:「熬,五羔反。 種,章勇反 種四

旁,所以 鄭氏曰:「 曰:『熬,黍稷各二筐。』又曰: 惑蚍 熬者, 蜉使不至棺 煎 穀 也。 也。 將塗,設 『設熬,旁 士 喪禮 於棺

大夫殯無

加

塗

尊卑皆然,獨於

爾

輔,輔

車也。

以

有四

.阿,其菆塗象椁亦爲四阿可知。

諸侯

ネ

得爲四阿,則爲兩下之形,其攢塗亦

文公,椁有四阿」,言其僭天子也。 天子椁

中高而旁下,如屋之形也。《左傳》「宋葬

木題湊而盡塗之。屋者,言其題湊之形

以

藏焉。

至於滅性矣。

如是以

故預爲之備如此。

謂

所以爲

火備

也。

殺。

敬也。」 屬。」 孔氏 稻。 蜉 神之所在,故置熬於棺旁,亦所以致其愛 《少牢》大夫用麋。天子、諸侯當用六獸之 敖氏謂 熬與黍稷之屬,皆孝子事死 黍、稷、遣奠之屬,故殯時略仿其禮,亦有 而 殯,不得復奠於其旁,雖有奠在室,而不知 種十筐。」 7,謬説 與魚各加於每筐之中也。葬時 日 筐。』大夫三種 四筐則首足皆 賈氏公彦曰:「天子當加麥、苽,六 「致其愛敬」,是也。 也 愚謂: 「腊,謂乾腊。 敖氏繼公曰:「孝子以尸柩 加魚、腊、蓋以腊節折之, 一,其餘設於左右 加 以 《特牲》士 梁, 如事生之意 鄭以 君 四 爲惑蚍 存内 種 一用兔 加 有 既 以

貝 飾棺 新輔 列,素錦 君 [翣二,黻翣二,畫翣二,皆戴圭,魚躍 龍 帷 褚, ,三池,振 加僞 荒 容,黼 纁 紐 一六,齊 荒,火三列 五. 采 五. 拂 黻

代反。 僞,依 池。 禮》注。 誤也。 鄭氏 屬於池 於絞繒,而垂之以爲振容,象水草之動揺 居柳之中 行則魚上拂池。《雜記》曰:『大夫不揄絞 縣池於荒之爪端,若承霤然。 竹爲之,如小車笭,衣以青布。 火、黻爲列於其中耳。 銅爲魚,縣於池下。 於其上。紐,所以結連帷荒者 曰 衆惡其親 荒,皆所以衣柳 注讀爲帷。 君 披,彼義反,徐甫髲反。」○鄭注:「僞,或作『于」。」 曰:「飾棺者,以華道路及壙中,不欲 纁 若小車蓋上蕤,縫合雜采爲之,形 下。』是不振容也。 大夫以上有褚以襯覆棺 戴 央,鏘鳴 也。 六, 齊,如字,徐才細反。 荒,蒙也。 纁披六。 按: 也。 齊,居柳之中央,參用《既夕 **揄翟,青質五色,畫之** 黼荒,緣邊爲 僞當爲『帷』,聲之 《釋文》: 在 士則去魚。 翣,所甲反。 一旁日 君、大夫以 乃乃加 柳象宫室, 也。 褚 帷 1,張吕 池,以 黼文, 帷 戴,丁 反。

飾也。

振容,以絞繒爲之,長丈餘

畫

爲

雉

,縣於池下爲容飾,車行則旛

動

曰

振

荒,柳車

上覆,謂

鼈 甲

也。

紐以結之,謂之戴。結披必當棺束,於束 雲氣,其餘各如其象,柄長五尺,車行使人 士》注曰:披,柩車行所以披持棺者。 ,織竹爲籠,衣以青布,挂著荒之爪端 漢禮、翣以木爲筐、廣三尺、高 人君之德也 畫者,畫 如如 之言值 列,行 一,以白 , 四 柳 而 容, 旛 有 降 面 司 結 故縣 戴皆加璧 鄭注《縫人》云:『《漢禮器制度》「飾 皆戴圭者,謂諸侯六翣,兩角皆戴圭 《禮器》云:『天子八翣,諸侯六,大夫四。』 也。 也。 子龍、火、黼、黻皆五列」,又有龍翣二,其 之,列行相次,又連貝爲五行,交絡 車蓋 也。 相 加 葬在路,象宫室也。 白錦也。 文,又於荒中央畫火、黻各三行也。 黼荒,火三列,黻三列者,緣荒邊爲白黑斧 離,又以纁爲紐連之,旁各三,凡用 帷荒於褚外也。 翣形似扇,在路則障車,入椁則障柩 銅 ,高三尺,徑二尺餘,人君以五采繒 齊五采,五貝者,鼈甲上當中,形圓 火,形如 魚於池下,若 褚,屋 也。」魚 半環。 也。 躍 纁紐 拂 車行 於荒下用白錦 加帷荒者,褚覆竟 黻,兩『己』相背也 池者,凡池 六者,上蓋 則 魚跳 躍 必 與 有魚 棺,天 素錦 爲屋 拂 齊上 六 邊 也。

繋紐。」

孔氏曰:「帷,柳車邊

障也

持之而從,既窆,樹於壙中。

《周官

前

後披

也。

二尺四寸,方兩角高,衣以白布。

也

一,所以

連

繋

棺

束

與柳

材使相

值,因

如

瓜

分然,綴貝

絡

其上及旁。

戴

布爲之,王、侯皆畫爲龍,象

池

象平生宫室有承

雷也。

天子屋四

注

承霤,柳亦四

池。

諸侯屋

亦四注,而

池,闕於後一,故三也。振,動也。

池

衣

如

紐

牆

而

軒,車 頭出 也。 棺横 也。 棺 指 衣 虧 在棺 也。 身之中央也。 公彦曰:「齊居柳之中央,以若人之臍居 六紐,今穿纁戴於紐,以繋柳骨,故有六戴 也 右,欹右則引左,使車不傾覆 以 傾 ,有似於宫室之牆也。三池者,闕其後 其木材言之也。 也。 於戴 E 帷外, 東有三,每 繒 謂之披者,若牽車登高,則 纁 纁披六者,亦用纁帛, 君 適下則引後以 纁 戴 綵 絡過,然後貫穿戴之連繫棺束者 戴 ,餘披出之於外,使人持之以備 謂 而外 人牽之,每戴繫之,故亦 愚謂: 六 用 戴兩頭皆結於柳材,又以披 者 加 束 纁 ,事異飾棺,故更言『君』 或謂 帷荒焉。 兩 帛 棺飾,蓋以 防 邊 繫 ?翻,車 屈皮爲紐,三束有 之牆,言其四周於 棺 紐 故 頭 也 , 著 欹 以或謂 柳木爲骨 繋柳戴, (引前 左 柳骨 魺 之柳 有 賈 則 以 也 六 氏 引 防

披, 止爲 者無幾,於牽挽亦不便,疑孔氏之説爲是。 也。 於棺 穿戴 者。 霤, 貫結於戴。」賈疏謂 貫者也。 紐」,用帛爲之而連 若囊形然,故謂之褚。 賈人或謀置諸褚中以 也 短,若絡於棺上,下結於戴,則 纁帛繋棺紐」,屈束棺之皮爲之,而戴之所 披一 故 則披不得復絡棺而 《左傳》成三年:「荀罃之在 且帛之長 外,以帛一條 池視 而結之」,則是披横絡棺上 一披也。 頭繋柳 池亦象之。 《士喪禮》注云:「披,絡柳棺上, 重霤,諸侯 戴, 《士喪禮》飾柩、設牆 不過 褚,囊也 而 屬帷荒者 頭 「披在棺上絡過 四十尺,而 屋雖 出。」柩以素錦韜之, 爲二披也。 出 過,以 紐有二: 帷 四 , 所 外 注 也 礙於惟荒 议 兩端之外出 一,而 古之尺 則 韜 丽 楚 經言「纁 疏言 [用 孔 兩 帛 北 藏 而),然後 也,鄭 疏 端 於物 無重 後 度 設 故 條 謂

下同。」
下同。」
下同。」
下同。」

謂: 也。 其 綏,注翣兩角也。」 鄭氏曰:「畫 必戴綏,戴綏者不必戴玉。」 池上揄 者,庾云:『兩邊而已。』賀云:『前後各 『蕤』,蓋五采羽注於翣首也。」 一。」不振容者,謂不以揄絞屬於池下,其 披亦如之,謂色與數悉與戴同也。」 大夫畫帷者,不得爲龍,畫爲雲氣。 池象之也。 二池 皆戴綏者,翣角不圭,但用五采羽 絞則 在前後,大夫屋南北 有也。 一荒,緣邊爲雲氣。 《士喪禮》注云:「齊,以三 陸氏佃曰:「戴玉 齊三采者,絳、黄、黑 陳氏 孔氏 有承霤,故 綏當爲 澔 二池 日 曰 愚 : 者 作

「降」字之誤,言大夫降於人君,少黄、黑二三采亦然。」此疏以三采爲絳、黄、黑,絳乃恶。」此疏以三采爲絳、黄、黑,絳乃采繒爲之,上朱中白下蒼。」疏云:「《聘

色也。

緇,二披,用纁。《釋文》:「揄,音遥。 齊三采,一貝,畫翣二,皆戴綏。 士布帷,布荒,一池,揄絞,纁紐二,緇紐二, 纁。 禮俗之不同也。披繫於棺束之横者,其數 此云「士一貝」、《士喪禮》云「無貝」,蓋亦 士戴前纁後緇,通兩邊爲四戴也。 畫也。一池者,唯一池在前也。揄絞者, 孔氏曰:「士布帷、布荒,皆白布爲之而不 亦與棺束同。 人君棺三束,故兩旁各三 纁者,據一邊前後各一披,故云『二披用 亦畫雉於絞,在於池上,而池下無振容也。 若通兩旁,則亦 7四披 也。」 緇,則其反。」 士戴前纁後 二披用 愚謂:

大夫旁二披前纁後玄,士則前後皆纁,亦披。大夫、士棺二束,故兩旁各二披。但

降於大夫也

用」。 當如字,音敕倫反。國字,亦當如字,王説爲是。 作『御柩』。國,依注亦作「輇」,市專反,王如字,云「一國所 用 君 輴,依注音輇,市專反,王勅倫反。 輴,二綍,二碑,御棺用茅。 葬用輴 比,必利反。」○鄭注:「綍,或爲『率』。」○今按: 無碑, ,四綍,二 比出宫,御棺用 碑,御棺用羽葆。 綍,音弗。 功布。 士葬 用國 御棺, 《釋文》: 大夫葬 車 輴 本

鄭氏 引 車 皆當爲『載以輇車』之輇,聲之誤也。 字或作『團」,是以文誤爲『國』。 輇車 士言『比出宫』,『用功布』,則出宫而止,至 也。 至 碑, 曰:「大夫廢輴,此言『輴』,非也。 擴將 室 又 日 尊卑之差也。 桓 楹 也 一綍,而 御 棺, 在棺 居 設 前 曰 碑 綍,行 ··, 是 爲 節 以 度 連 道 ·, 柩 也 輇 言 輴 曰

朝 器。」君、大夫之輴皆自造之,士之柩 所用 又曰 中 旁,至葬時説載,則屬於柩。天子六綍,以 其名焉。 屬於柩車,謂之引,及至壙説載除飾,屬於 車 大夫、士二綍,惟屬於前後東也。 四綍屬於前後之縮束,以二綍屬於兩旁當 柩束,又謂之綍,其實則一 鄉器,故謂之國 所同用也。 其輪異耳,是以皆名爲輴車 輴」,則是柩 壙 -横束。 -,亦輔 無 廟時屬於輴及輁軸,謂之綍,葬時 矣。] 蜃 以殯之車,與載柩之車,其制相似,但 車。 車 諸侯四綍 朝廟與在塗之綍、皆屬於 也。 《鄉師》云:「鄉共吉凶禮樂之 車 此云「君葬用輔」,「大夫葬用 愚 又名爲輔車 謂 車。 曰「國車」者,言其 載 ,於前後左右分屬之。 綍,以麻爲之。 柩之車,名爲輲 物 也。天子、諸 也 也。士之 一是以 碑 爲 車 在塗 殯 車 國 或 車, 國 艻 通 及 人 兩 侯

分繫二綍也。諸侯二碑,樹於擴之前後, 行,故皆謂之碑也。天子四碑,分樹於壙之四 而云碑,諸侯謂之桓楹,通而名之,則大夫以上 内道爲之,所以繞綍以下棺者也。天子謂之豐 柩也

御棺者,居前指麾,爲柩行抑揚進止之節綍。士無碑,其二綍亦使人背而負之也。之。大夫二碑,亦樹於壙之前後,分繫二繫以二綍,其左右二綍,則使人背壙而負

乃代。」代,謂代以鄉師及匠師也。是天子及祖,飾棺,乃載,遂御。及葬,御匶出宫,也。《周禮·喪祝》:「及朝,御匶,乃奠。

柩,至將爲祖奠還車之時,乃云「商祝御夫亦然。比,及也。《士喪禮》朝廟無御之喪自朝廟以至葬,皆有御匶。諸侯、大

此言「比出宫,御棺用功布」,明朝廟無御柩」,及將行,又云「商祝執功布以御柩」。柩,至將爲祖奠還車之時,乃云「商祝御

柩也。 柩」,非是。 行,故據出宫言之。 鄭氏謂 「士出 内道近,且無險阻故也。 而云「比出宫,御棺」者,祖 士朝 功布,大功布也。 廟 無御柩者,士柩 士祖 時但還 大夫之茅, 時 車 己御柩, 差輕,官 官無 車 丽 御 未

或爲「械」。」(鄭注:「封,或皆作「斂」。咸,成,依注讀爲緘,古鹹反。」(鄭注:「封,依注作「窆」,彼騐反。以咸。君,命毋譁,以鼓封,大夫,命毋哭。以咸,君,命毋譁,以鼓封,大夫、命毋哭。以封,用綍去碑,負引。君封以衡,大夫、士

不如羽葆之華,功布則又加質矣。

咸讀 也。 綍於柩之緘,又樹碑於壙之前 棺之人坎爲斂,與斂尸相似,記者同之耳。 方小斂,般請以機封」,謂此『斂』也。 鄭氏曰:「封、《周 (為緘。 此封或皆作『斂』。《檀弓》曰『公輸若 凡柩車及壙,説載 禮》作『窆』。 後,以 除 窆, 下 飾,而) 綍繞 然則 屬 棺

平也。 棺縅, 使輓 背碑 繩。 旁持 脱 碑 禮 各繞前後二碑之鹿盧,其餘兩綍於壙之兩 碑,負引』也。 君封以衡者,諸侯禮大,物多棺重,恐棺不 **綍,其餘二綍繫於兩旁之碑也。** 各重鹿盧,前後 旁,人挽之而下。 士旁牽緘而已。 一綍,無碑」,綍有人持之法,不要 啃唯 也 間 丽 者皆繫綍 之 而平之,又擊鼓爲縱舍之節。 天子 立,漸 一頭繞碑間鹿盧,負引之人在 鹿 用綍去碑者,謂 孔氏曰:「下棺之時,將綍 人君之喪,又以 盧 ,葬有隧。 , 輓 漸應鼓聲而下,故云『用 諸 而繞腰,負引舒縱 棺 伍 侯四 庶人縣空,不引綍 其天子六綍四 丽 一碑用二 下 今齊人謂棺 **綍二碑**:前 之。 縱下之時 木横貫緘 綍,二碑 此 時 碑 前 之,備 在 也。 棺 耳。 束 後 大夫、 確也 經 下 碑 綍 用 二綍 頭繫 爲 前 也。 窆 居 外 後 去 絾 失 四

相止。」 下,備 也。 也。 以 止 卑,不得擊鼓,直使 每 衆人無得喧嘩,以擊鼓爲窆時 君,命毋譁 無 正 徒 但 夫、士不得用衡,直以綍繋於棺緘也。 正,若稱之衡然 毋譁者,主徒役者命之,蓋鄉師、遂師 合 衡, 役之辭也。 木貫於棺束,而以綍繫之,其木横 也者,士又卑,不得施教令,直以哭者自 一鼓漸縱綍也。 别 大夫,命毋哭,蓋其宰命之也。 毋哭,則 以鼓封,又擊鼓以爲下棺 以 傾 以大木爲 愚謂: 綍 頓 也。 以以 直 不得擊鼓 繋棺束之緘,而 命毋哭者,命主人以下之辭 鼓封者,謂君下 八衡,貫 大夫、士以 君封 也。大夫、士以 大夫,命毋哭者,大夫 人無哭耳。 以衡者,諸侯下棺 穿棺束之緘,平持 也。 咸者,大夫、士 命毋 棺 下於君也。 縱舍之節 縱舍之節 士哭者相 緘者,大 護者, 命 時,命令 大夫 之屬 命 而

哭者相: 也。 用斧與。 及窓,執斧以涖」。 鄉師》「及葬,執斧以涖匠師」、《冢人》 君 不 止,主人以下自相 ·命毋哭,君尊,不敢直 諸侯窆以鼓,或未必 止勿哭也。 命也。 《周 士

君松椁,大夫柏椁,士雜木椁。

寸。 自五 端長六尺。夫子制於中都,使庶人之椁五 鄭氏曰:「椁,謂周棺者也。天子柏椁以 柏椁者,天子之柏椁,諸侯之松椁,皆用 寸,卿八寸,大夫七寸,士六寸,庶人 夫、士、庶人六等,其椁長自六尺而下,其方 云:『其方蓋一尺。』以此差之,諸侯方九 曰:「按《檀弓》『柏椁以端長六尺』,注 之心,所謂 五寸,謂端方也。 寸而上,未聞其差所定 愚謂: 天子柏椁以端, 而大夫 黄腸也。 自天子、諸侯、卿、大 大夫雖用柏椁 也。」 孔 亦 '', 而 五 松松 角 氏

> 夫大棺 不得 棺一寸,則棺六寸者椁七寸,椁八寸者椁 按:此説天子椁制,亦與《檀弓》注異。 九寸。 ● 庶人四寸。 用黄腸,則降於人君矣。 同 天子椁一尺,則大棺九寸也。 八寸,下大夫與士大棺同六寸, 庶人棺四寸而椁五寸,椁大於 諸侯與上大

文》:「甒,音武。」 棺、椁之間,君容柷,大夫容壺,士容甒。 **《釋**

氏曰:「君棺、椁間容柷,若天子棺、椁間 鄭氏曰:「間 子,故此云『容柷』。」 几筵》云 『柏席,諸侯則紛純」,稍狹於天 之席」,是也。 謂『柏』,『椁』字摩滅之餘,椁席,藏中 則差寬大,故《司几筵》云『柏席用 可以藏物,因以爲節。」 諸侯棺、椁間亦容席,故《司 愚謂: 柷,樂器 **崔」,玄** 神 坐 孔

0 上「椁」,疑爲「棺」之誤。

也。士則並虞筐亦無。」 一又有虞筐。大夫雖不裹椁,而猶有虞筐也。」 吴氏澄曰:「言君之椁有物裹之,敢,「虞筐」之文,未聞君裹椁、虞筐,大夫不裹椁,士不虞筐。

禮記卷四十四終

禮記卷四十五

國史館纂脩孫希旦集解賜進士及第翰林院編脩

祭法第二十二《别録》屬《祭祀》。

鄭氏曰:「祭法者,以其記有虞氏至周天 常首言禘、郊,祖、宗之法,及篇末「夫聖王 之制祭祀也」以下,見於《國語》,爲展禽論 之制祭祀也」以下,見於《國語》,爲展禽論 於《國語》者,多有詭異,而考之其他經傳, 於《國語》者,多有詭異,而考之其他經傳,

祭法:有虞氏禘黄帝而郊嚳,祖顓頊而宗

息列反。與,音專。項,許玉反。鯀,本又作「骸」,古本反。契,是一類,可可以稱,祖文王而宗武王。《釋文》:「譽,口毒馬。殷人禘馨而郊冥,祖契而宗湯。周人禘

堯。

夏后

氏亦禘黄帝而郊縣,祖

顓

頊

而宗

以祖 其 之所自出,而 郊、祖、宗,乃宗廟之大祭。禘者,禘其祖 者,創業傳世之所自來也。 身繼堯緒,不可舍唐之祖,故推嚳以配天, 可尊,其廟不遷也。」 而舜之世系出自顓頊,故以爲始祖。 郊天,當以始祖配,則舜合以顓頊配 所謂『禘其祖之所自出』也。 曰:「虞氏禘黄帝,蓋舜祖顓頊出於黄帝 首言祭法,以冠通篇之義也。 、廟世世不毀也。 配 食也。 以 祖者祖有功,宗者宗有德 其祖配之也。 有虞氏、夏后氏皆禘黄 楊氏復曰: 宗者,德高而 郊譽者,帝王 郊者 趙 「、祀天 天,爲 凡祖 氏匡

帝,殷、臣 天也。 也,以 身嗣 譽,夏后氏郊鯀,殷人郊冥,周人郊稷者 帝者,顓頊之所自出 所命 先王 始祖 顓頊,舜之祖也,有虞氏當以顓頊配天,爲 之功,則前 而 水死,其功烈與先聖並稱,故殷人以冥配 鯀配天也。 舜之祖」,據《大戴禮・帝繫》篇而言也。 也」,與此不同。 《禮運》 (帝嚳者、稷、契之所自出 一、仁之至 一,脩其 · 堯位,故推帝嚳以配天,而 也。 其蔽於自用而績用 禮,以祖 周皆禘譽者,舜、禹皆祖 日 『杞之郊也禹也,宋之郊也契 (禮物 日 冥,契六世孫也。 愚 未成之功成 義之盡 謂: 配 而有 杞、宋以先代之後,統承 天,后稷,周之大祖 趙 也。 所改 也。 氏、楊氏 殷祖 弗 矣,故夏 鯀治 更,疏以 也。 成, 禹能 冥勤 製,周 謂 一顓頊,而 水非 以 有虞氏郊 一顓 爲 顓 其 后 祖 無 頊 時 官 氏 脩 頊 也 稷 爲 Ŧ 以 鯀 功 爲 黄 而

始祖 舜耳。 皆於始祖而外,别推一帝以配天。周以后 之祖 然宗廟必序昭、穆,舜既宗堯, 者,據其 之帝,顓 世子孫之所爲也。 堯、舜而 下於舜,夏后氏禘黄帝 情理之所宜然也。 舜受天下於堯,故以天下傳禹,必告於堯, 《大禹謨》言「受命於神宗」,神宗即 堯之宗廟,蓋受天下於人者之禮然也。 祖,蓋即 必祭始祖之父也。 「受終於文祖」,又言「格於藝祖」,藝祖、文 一,而《大戴 而上,推其有 有虞氏祖 顓 功德尤盛者言之也。 項非親黄帝子也,則禘之所祭, 無變者也。 頊 也。舜受堯禪,其所祭者即 《禮》未 顓 功德之帝而祭之,而不 禹爲顓頊之後,而受天 當禹之時,蓋郊堯而宗 殷有三宗,獨言「宗湯 項,而以黄帝爲所 郊鯀 可 而 據 祖 而宗禹,蓋其 矣。 顓 則顓 自殷以前 頊 舜 , 所因於 頭必堯 典》言 堯 自 也。 後 由 出

殷之祖 前代 祖則后稷也。 天,人本乎祖」,此所以 爲始祖 丽 一始祖 精焉者也 ,即以后 也。 《雝》之頌曰「既右烈考,亦 周祖文王,大祖 稷 《郊特牲》曰「萬物本乎 配天,此 配 上 帝也。 周 禮所監於 也,其始 虞、夏、

稷

文王 大祖」,是也。 右文母」,而序以爲「禘大祖」,《白虎通義 曰「有始祖,有大祖,后稷爲始祖,文王爲 稱祖、武王稱宗、皆百世 周立文、武之廟爲世室,而 不遷者 也。

夏宗禹 詩》曰「衎我烈祖」,然則祖、宗亦通名與。 ,而《書》曰 「明明我祖」,殷宗湯 , 而

用 燔柴於泰壇,祭天也。 騂 犢。 釋 文》:「燔, 音 瘞埋 煩。 於泰折,祭地也 瘞, 於滯 反。 折, 之

設反。」

鄭氏 坦 之名,尊神 也 曰 坦 壇、折 明 也。 貌 也 ˇ; 封 地 土 陰 折, 一爲 祀 炤 祭 晳 處 用 也 也。 黝性 必 壇 之言 與 爲 天 炤

壇 泰折者 降 柴、瘞埋 玉 神始於燔柴,祭地祇始於瘞 瘞 圭有邸以 矩,矩,方也。」 連 牲,祭地宜用黑犢,今文承『祭天』之下,故 俱 泰折,所謂『祭地於澤中方丘』。 於泰壇,所謂『祭天於地上圜 瘞繒埋牲,祭 燔之,使氣 壇者,謂 . 神者 氣 埋所以出 言『用騂 用 言其高 也。」《典瑞》曰「四 犢,連言 ,北郊之坎也。 也。 兼用 積 祀地,裸圭有瓚以肆先王」,則燔 犢』也。」 達 薪 《郊特牲》曰:「灌 ,則知泰折之爲坎矣。 地祇也。 玉矣。 於天 爾。 地 於壇上 祇 愚謂: 也。 於北 泰壇者 一,而 孔 祭宗廟 馬氏 泰者,尊之之稱 圭 燔柴所以 **瘞埋於泰折者** 氏 郊 取 有 티 : **一、晞孟** 也。 ,南郊之壇也 玉及牲置柴 邸 埋,皆用之以 丘。 始 用 「燔柴於 以 於灌、祭天 陰祀用 曰:「燔柴 主璋, 祀 降天神 折旋 折 瘞埋 天,兩 也。 謂 用 中 於 黝 上 泰

其方,則知泰壇之爲圜矣。

暑也。 也。 依注讀爲祭,榮敬反,王如字。見,賢遍反。 則祭之,亡其地則不祭。《釋文》:「相近,依注讀爲 物,皆曰神。 祭星也。雩宗,祭水旱也。 埋少牢於泰昭,祭時也。 『禳祈』,如羊反,下巨依反,王肅作「祖迎」。 音無。」 Щ 王宫,祭日也。 林、川谷、丘陵能出雲,爲風雨,見怪 有天下者祭百神。 夜明,祭月也。 相近於坎、壇、祭寒 四坎、壇、祭四方 諸侯 亡如字,無也, 幽宗、雩宗,並 在 幽宗, 其 地

求也。 當爲『禳祈』,聲之誤也。 也,亦謂陰陽之神也。埋之者,陰陽出 鄭氏曰:「昭,明也,亦謂壇也。時,四 君,宫,壇營域也。夜明,月壇也。宗皆當 坎,暑於壇。 於地中也。凡此以下皆祭用少牢。 寒暑不時則或禳之,或祈之。 王宫,日壇。王,君也。 穰猶 卻 也。 相近, 寒於 日稱 祈, 時

也。 爲壇。 太甚,祭以禳之,寒暑頓無,祭以祈之。 薦孰,惟殺牲埋之』也。 祭寒暑者,若寒暑 及『日』『月』至『山林』並少牢,先儒云『不 物也。用少牢者,降於天神也。 祈陰則埋牲,祈陽則不應埋之。 今並云 謂天子也。百神,假成數也。」 祭山林、丘陵於壇,川谷於坎,每方各爲坎 之。」四方,即謂 山川之神,則水旱癘疫之不時,於是乎祭 辰之神,則雪霜風雨之不時,於是乎祭之。 雩之言吁嗟也。《春秋傳》曰:『日、月、星 昏始見。禜之言營也。 爲『祭』,字之誤也。 「祭時者,謂四時之氣不和,祭此氣之神 『埋』者,以陰陽之氣俱出入於地中而 泰昭,壇名也。 怪物,雲氣非常見者也。 山林、川谷、丘陵之神也 春夏爲陽,秋冬爲陰。 幽 一祭,星 雩榮,水旱壇也。 壇也。 孔氏曰: 自此 有天下, 以下 生萬 星以

宗伯》

嗟,亦爲營域而祭之,故曰『雩祭』。四坎、 尊,故其壇曰『君宫』。 則於坎,寒,陰也。 者,亡,無也,境内無此山川,則不得祭也 下者祭百神,謂天子祭山 谷、丘陵,此即四坎、壇所祭之神也。 壇,祭四方者,四方各爲一坎一壇,壇以祭 域而祭之,故曰『幽禜』。水旱爲人所吁 曰『夜明』。 王,君也。宫亦壇也。 祀,此所載,謂四時乖序,寒暑僭逆,水旱 時、寒暑、水旱者,《宗伯》所言,依歲 林、丘陵,坎以祭川谷、泉澤。 , 時, 須有 祈禱 之禮 民者也。 大宗伯》 也 星至夜而出,故曰『幽』。爲營 按 諸侯祭山 小司徒》『小祭祀、奉牛 備 暑 列 ,非關正禮 則於壇、暑、陽 諸 營域如宫也。 月明於夜,故其增 祀,而不見祭四 林、川澤在 林、川澤在 一,故不 山 「林、川 有天 封 日 時 天 也 内 下 神 於 常 壇也。 祀。 门故不

Ш

圃

益

《周禮

性」,則王者之祭無不用牛。 宗」之名。天子雩上帝,諸侯雩山川,不聞 月、星辰用實柴,不應埋牲。《周禮》、《春 宫、夜明之屬,名號詭異,言不雅馴,尤非 説,用《家語》之文,以此 也,故用少牢。按《聖證論》王肅『六宗』之 祭,故皆用 别祭水旱之神也。鄭、孔以爲此祈禱之 秋》、《月令》言「雩」及「大雩」而已,無「雩 然日、月、天神之尊,不應止用少牢,祀日、 折」,固已不合於《周禮》矣。 至於泰昭、王 有「圜丘」「方澤」之名,此南北郊祭天地之 日也,月也,星也,水旱也,爲六宗,歲之常 三代湻質時所有。 孔注《尚書》亦同。」 此則云「燔柴於泰 列於《宗伯》」,然上文言禘、郊 少牢。 又孔 王肅以此 氏云一此 四時也,寒暑也 愚謂:《周禮 壇, 瘞埋於泰 爲歲之常祀 此祈禱之祭 非歲 時常

1285

衍 謂迓其來也。 鄭、王二説考之,無一而可通者。 禱之禮,雖簡於正祭,然亦未嘗相悖戾,祭 祭月宜於西郊,不宜曰「王宫」「夜明」。 禱之祭,皆就正祭之兆。 禱之爾,未有無常祀而獨祭祈禱者。 典」,是此篇所言皆常祀,不得爲祈禱。又 祖 則與《周禮・小宗伯》「兆山 則於其往者送之矣。 作「祖迎」。 寒」「逆暑」之祭,而「相近」二字,《孔叢子》 於坎、壇,祭寒暑,疑即《周禮 凡祈禱之祭,本皆歲時常祀,至有事 日、月、星辰當燔柴,不當埋牲。 不當獨異。 ,各因其方」者正合。 、宗及泰 壇、 祖猶餞也,謂送其往也。 又篇末云「非此族也,不在 泰 寒暑循環,於其來者迎之, 折, 未 而四坎、壇,祭四方, 嘗 迎寒逆暑用土鼓, 祭日宜於東郊, 專言「祈 川、丘陵、墳 籥章 凡 惟 禱 十》「迎 此 又祈 相 又祈 迎, 祈 近 以 祀 此

> 宜。 恐未必然耳。 陰陽之氣,非專屬於地者,乃概用埋牲,亦 其 尊,諸侯社稷用 禮 但四方爲地祇,固當瘞 甚 簡 質 而 少牢,則 山 林 Ш 澤 此二者用 在 埋,而寒暑爲 地祇 少 亦 牢亦 非 甚

無疑。 先宗後祖,故鄭上注云: 文》:「大,如字,徐音泰。 所更立者,禘、郊、宗、祖,其餘不變也。 折,人死曰鬼,此五代之所不變也。 大凡生於天地之間者皆曰命,其萬物 祖宗」,據孔疏作「禘郊宗祖」。 今正之。 『祖、宗通言爾。』」是當作「宗祖 更,古行反。]〇宗祖,今本並 疏又云:「上先祖後宗,此 七代之 死 皆 《釋 百

受命於天地雖同,然物則氣質昏濁,故其帝,氣之屈也。有屈則有伸矣。蓋人物之命。折者,斷絶也。斷則不復續矣。鬼形氣皆稟之於天,故生於天地之間者皆曰形氣皆。之於天,故生於天地之間者皆曰

「廟,本亦作「庿」,古字。墠,音善。」壇、墠而祭之,乃爲親疏多少之數。《釋文》:天下有王,分地建國,置都立邑,設廟、祧、

超 卿大夫之采地,及賜士有功者之地。 鄭氏曰:「建國,封諸侯也。 言貌也。 也,超 上去 宗廟者,先祖之尊貌也。 意 也。 封土日 置都立 壇,除 桃之言 三邑,爲 地 廟之

祖、禰爲親,遠者爲疏。廟少者止祭其親,墠。」 愚謂:大者謂之都,小者謂之邑。

廟多者兼及其疏。

咋 之。遠廟爲祧,有二祧,享嘗乃止。 壇,去壇爲墠。 廟,曰皇考廟,曰顯考廟,曰祖考廟,皆月祭 是故王立七廟、一壇、一墠。 意也。 始也。 墠; 也。 桃之中。 鄭氏曰:「王、皇,皆君也。顯,明也。 《聘禮》曰『不腆先君之祧』,是謂始祖廟 去墠曰鬼。《釋文》:「禱,丁老反,一音丁報反。」 所禱,謂後遷在祧者也。 享嘗,謂四時之祭。天子、諸侯爲壇、 天子遷廟之祖,**●**以昭穆合藏於一 名先人以君、明、始者,所以尊本之 諸侯 壇、墠,有禱焉祭之,無禱乃 無 祧,藏於祖、考之廟中。 日考廟,日 既事則反其 去桃爲 王 祖, 考

❶ 「祖」、《禮記注疏》、《集説》作「主」。

祭之爾。 伯禽之子也,至昭公、定公,久已爲鬼,而 主 也。 説,出於《金縢》,乃因有所禱而爲之,非宗 考,大夫、適士鬼其顯考而已。 凡鬼者 者,庶士以下鬼其考、王考,官師鬼其 亦鬼其百世,不禘、祫,無主爾。 唯天子、諸侯有主,禘、祫,大夫有祖考者, 季氏禱之而立其宫,則鬼之主在祧明矣。 主,皆升合食於大祖。』是也。 傳曰:『毀廟之主,陳於大祖,未毀廟之 盡 爲 經》『爲之宗廟 廟之外預爲壇、墠,以待他日有禱也。《孝 而不祭。」 信。」 〔墠,去墠爲鬼」,爲衰世之法,所言難以 祧 晉張融謂:[《祭法》「去祧爲壇、去壇 《春秋》文二年秋『大事於大廟』, 鬼亦 愚謂:《大戴禮·諸侯遷廟》篇 楊氏復曰:「『三壇同墠』之 在 ,以鬼享之』,非去墠 祧 顧遠之於 無 魯煬公者, 其 事 (無祖考 爲鬼 祫 「**,** 薦 皇 乃

《春秋》於周公稱大廟,魯公稱 公廟爲世室,而《明堂位》云:「魯公之廟 父之稱相亂。 考,父曰皇考」。 今乃稱曾祖爲皇考,則與 牢》稱祖曰「皇祖」,《曲禮》「王 夫謂「先王之遷主藏於文武廟中」,是也, 於二祧之中」,是以二祧爲文、武之廟也。 廟。」此注云「天子遷廟之主,以昭穆合藏 於后稷之廟,先王之遷主,藏於文、武之 氏《周禮 王考廟、皇考廟、顯考廟、祖考廟」也。 是群廟皆以謚配宮爲名,未聞其曰「考廟 爲曾祖、高祖之異稱,於義亦 祖考,則與祖之稱相亂。 而以二祧爲文武廟,則非也。 稱宮,故有武宮、煬宮、桓宮、僖宮之名 曰 告於皇考某 •守祧》注云:「先公之遷主,藏 又凡始祖 侯。」《 謂之大祖,今稱 士 且以皇考、顯考 虞 \approx 《春秋》稱魯 無所取也。 世室,群公 一父日 特性》 皇祖 鄭 爲 少

者,必其廟非己之所當祭,有爲爲之也。

祭神祇於壇,祭人鬼於廟。 祭人鬼而爲壇

壇耶? 爲墠祭之。』《喪服小記》「庶子不祭殤與無 祭於廟矣,有祈禱於遷廟之主,出主於廟 非有武王之命,則不敢自禱於天子之廟 周公禱三王,爲三壇同墠,蓋周公爲支子, 弟之殤」,鄭氏云:「此兄弟之殤,謂大功 之。』《雜記》「有父母之喪,尚功衰,而祔兄 妾祖姑,亡則中一以上而祔」,孔氏云: 後者,殤與無後者從祖祔食」,鄭氏云: 後者,祭於宗子之家」,鄭氏云:「無廟者 祭故也。 墓而爲壇以時祭,亦以宗廟非庶子之所得 故爲壇。 「宗子之諸父無後者,爲墠祭之。」「妾袝於 而注疏又爲推廣之。《曾子問》「凡殤與無 而禱焉可也。自《祭法》有「壇、墠」之説 妾無廟,今乃云袝及高祖者,當 廟雖已遷,然大祫之禮,遷廟主固 宗子去國,庶子無爵而居者,望 若天子、諸侯自祭其祖,何必爲 爲 / 壇袝

此數」,是也。然《周禮》「守祧八人」,則祧

祧」、《左傳》「其敢愛豐氏之祧」,臧武仲言

不徒爲遠廟矣。《聘禮》云「不腆先君之

蓋桃即寢也,其字從兆,乃窈窕幽邃之義。

·失守宗祧」,是雖五廟、三廟者亦有祧矣。

藏衣冠,故《守祧》云:「其遺衣服藏焉。」

聘禮》言「不腆先君之祧」,自謙,故不言

廟」而言「寢」也。

然則《記》之言亦非也。

寢在廟後,故以名焉。

廟以奉神主,寢以

祧」,蓋謂高祖之父、高祖之祖之廟也。

謂

武二廟名世室,不名祧也。

此言「遠廟爲

文世室也。武公之廟,武世室也。」是文、

之遠廟者,言其世數遠而將遷也。不及

文、武二廟者,蓋以七廟常數言之,而不

功德之祖,劉歆所謂「七者其正法,宗不

在

及

皆愚所未敢以爲然者也。 皆愚所未敢以爲然者也。 皆愚所未敢以爲然者也。 皆愚所未敢以爲然者也。 皆愚所未敢以爲然者也。 皆愚所未敢以爲然者也。 皆愚所未敢以爲然者也。 皆愚所未敢以爲然者也。

禱焉祭之,無禱乃止。去墠爲鬼。 享嘗乃止。去祖爲壇,去壇爲墠。壇、墠,有廟,曰皇考廟,皆月祭之,顯考廟、祖考廟,諸侯立五廟、一壇、一墠。 曰考廟,曰王考

中 有之,恐未足據。」 朱子曰:「月享無明文,只《祭法》、《國 秋》經傳皆言 語》有「日祭」「月祀」之文。 ·朝夕奠,月祀,蓋謂每月告朔也。 四四 時 祭宗廟 愚謂:《周禮》及《春 日祭,蓋 圃 已,惟 此篇 謂 ||《國 語 喪

> 言天子四親廟及大廟皆月祭,諸侯曾祖以 下皆月祭,以爲告朔,則不可通。蓋天子 告朔於明堂,不於廟,諸侯告朔於大廟,不 及群廟也。此外惟有薦新之禮,然新物非 每月皆有,若告朔、薦新之外又有月祭,則 濟而不敬。諸侯月祭止及曾祖,而高祖、 大祖不與,則又有豐昵之嫌。先王之典, 公不如此。

爲壇祭之。去壇爲鬼。 考廟,享嘗乃止。顯考、祖考無廟,有禱焉,大夫立三廟、二壇。曰考廟,曰王考廟,曰皇

備三廟耳。 無廟,亦非也。大夫非大宗子,則以曾祖大祖之廟而三。」今此曾祖有廟,而大祖乃大祖之廟而三。」今此曾祖有廟,而大祖乃鄭,任田,「大夫三廟,一昭,一穆,與鄭氏曰:「大夫祖考,謂别子也。」 愚

適士二廟、一壇。 曰考廟, 曰王考廟, 享嘗乃

文》:「適,丁歷反,篇内同。顯考,顯音皇,出注。」 去王考爲鬼。 官 顯考無廟,有禱焉,爲壇祭之。 師 廟 庶士、庶人無 曰考廟。 王考無廟而祭之。 廟,死曰鬼。《釋 去壇爲

鬼。

啃

《曾子問》疏 之廟也。此乃以爲王考廟,亦非 祖、禰二廟」之説,蓋已陰識鄭説之非矣。 爲義,而《曾子問》疏有「大宗子爲士,得立 氏曰:「大宗子爲士,得立祖、禰二廟也。」 無廟」,非也。當爲『皇考』,字之誤。」 鄭氏曰:「適士,上士也。 逆王后於齊」、《左傳》云:「官師從單靖公 師,三等之士也。 適士二廟者,一爲考廟,一則别子爲祖者 士者也。 庶士,府史之屬。此『適士』云『顯考 后於齊。」杜預《釋例》云:「元士、中 鄭氏以適士爲上士,孔疏雖順 愚謂: 適士,謂大宗世適 《春秋》襄十五年「劉 官師,中 也。 土、下 孔 官 注 爲 夏

> 宗子者,皆惟立一廟也。 士明矣。 會王人于洮』是也。」是官師非專爲中、下 士 稱名、劉夏、石尚是也。 官師一廟者,凡三等之士非爲大 庶士、庶人無廟 下士稱人,『公

祭於寢

也。

社。諸侯爲百姓立社,曰國社。 社, 曰侯社。大夫以下成群立社, 曰置社。 王爲群姓立社,曰大社。 《釋文》:「爲,並于僞反。」 王自爲立社 諸侯自爲立 日 王

氏云:『在藉田 之右,故《小宗伯》云『右社稷』。 姓,謂百官以下及兆民也。大社在庫門内 鄭氏曰:「大夫以下,謂下至庶人也。 立一社,今時里社是 夫不得特立社,與民族居,百家以 在, 書傳無文, 或云『與大社 詩 頌》云『春藉田 王所 也。」 Щ 自祭,以供粢盛。』 祈社稷』,是也。 孔氏曰:「群 同 處」。 王社 人上則共 雈 所 大

限 之社 之地祇。 雖 歲時祭祀州社」,是二千五百家爲社也』。 社 諸 隆 載 國之土神也。 社」「侯社」,不見於他經,鄭氏於此篇亦無 所居之州、黨,得與同居之民相與立社,而 則其社 盛。」州、黨祭社 注説,崔氏謂王社「在藉 治地大夫若州 :多少,故鄭《駮異義》引『《州長職》曰「以 有廣狹,故其神有尊卑,其祭之之禮 云『百家以上』,惟治民大夫乃得 ,爲衆特置 殺。 侯 愚謂: 大社祭畿内之地祇,國社祭 亦然。 ,祭畿内之土神也。 固民之所自立也。 故《王制》云:「天子之社稷用大 《郊特牲》曰:「惟社 大夫 一, 故 州 長者爲之主其祭也。 ,其齊盛出於民之所自供, 社 日 以以 [置社。 ·祭一州之土神也。 下, 滿 田」。今按:天子 諸侯之社,祭 言以 蓋大夫以下,於 百 家 ,丘、乘共齊 以 上一,皆 上 立 〇三王 得 社。 有 所 國 不 立

> 典也。 祭也。 侯社,於禮則凟,於情則私,必非先王之 中矣,又别立社稷於藉田 天子有大社,諸侯有國社,則藉田已在其 則未知其神居何等,而祭之又用何禮耶。 舞社稷之祭祀。」此大夫以下所置社稷之 子社稷之祭也。《舞師》:「教 牢,諸侯之社 大簇,歌應鐘 若藉田,天子止千畝,諸侯止百畝 **,**舞《咸池》,以祭地祇。」此 稷用少牢。」《大司樂》: ,而名之曰王社 %帗舞, 帥 而

二祀: 國門, 立户,或立竈 大夫立三祀: 祀。諸侯爲國立 王爲群姓立七祀: 曰 國行, 曰門,曰行。 日 國行,日 日 泰厲,曰 曰族厲, 五祀: 「公厲。 日 户,曰 庶士、庶人立 司 曰門, 命, 曰 諸侯 司 竈。 曰 命, 日 中 自 行。 王 霤, 爲 日中雷,日 自 立五祀。 日 一祀:或 ... 適士立 國 立七 門,

厲

門」。《士喪禮》曰:『疾病,禱於五祀。』司 先肝」,冬曰『其祀行,祭先腎』。 户,祭先脾」,夏曰『其祀竈,祭先肺』,中央 善惡而報之。二中霤,主堂室居處。 門、户,主 科:有受命以保慶,有遭命以謫暴,有隨命以督行。受 祀司命,秋祀厲也。或者合而祀之。 司命、行神、山神,門、户、竈在傍,是必 命與厲,其時不著。 曰"使者出,「釋幣於行」,歸,「釋幣於 『其祀中霤,祭先心』,秋曰『其祀門,祭 行,主道路、行作。 厲,主 民惡言『厲』,巫、祝以厲山爲之,謬 遭命,謂行善而遇凶也。 ",司察 非大神所祈報大事者也,小 《明堂月令》春曰『其祀 疏云:「《援神契》云:「命有三 小過 今時民家,或春 ,作譴告者爾。 隨命,謂隨其 《聘禮 一殺罰。 山即 秋 祀 春 司 《祭法》曰『七祀』,推而下之,至於『適士二 有二:其大者爲五行之神、《大宗伯》以 厲。」 祝》、《士喪禮》之所言者是也。蓋户、竈、 之神,《曲禮》、《王制》、《月令》、《周禮 奉」,是也。 祭祭五祀、《左傳》「社、稷、五祀,是尊是 祀,庶人一祀」,非周制也。」 士亦備五祀,則五祀無尊卑隆殺之數矣。 曰:「《周官》雖天子止於五祀、《儀禮》雖 無後者衆多,故言『族厲』。」 族厲,謂古大夫無後者。族,衆也。大夫 民作禍,故祀之。公厲,謂古諸侯無後者。 謂古帝王無後者也。 云『司命者,文昌宫星』,其義非也。 氏云"「非天之司命,故祭於宫中。」皇氏 乎?《 春秋傳》曰:『鬼有所歸,乃不 孔氏曰:「司 其小者爲户、竈、門、行、中霤

出

竈,主飲食之事。

命,謂年壽也。

此鬼無所依歸,好爲

泰厲

命者,宫中小

神。熊

·爲

命,主督察三命。

神居人之間

鄭氏

曰:「此

一二七五

· 小

陳氏祥道

愚謂: 五祀

理乎? 神,故 耶 ? 子爲群 者,則不知其於天神、地祇、人鬼何 之神,而乃祭之於天子、諸侯之宫,有是 侯爲國立五祀」,有中霤,則是國人宫 户、竈、門、行爲 國之在其地而 祭於宫中,若如以爲宫中小神督察三命 者,故自天子以下皆祭其神。 文昌宫星,則《大宗伯》以槱燎祭之者 自天子以下各自祭之。 至泰厲、公厲,則天子、諸侯 :姓立七祀」,有中霤、户、竈,「諸 中霤,皆關 無主後者,亦不當與中霤、 類。 於飲食起居之至 且五祀 若司命以 今乃謂「天 爲宫中 所 所 祭因 切 不 之 内 屬 當 爲 近

庶人祭子而止。 適來孫。諸侯下祭三,大夫下祭二,適士及王下祭殤五:適子、適孫、適曾孫、適玄孫、

鄭氏曰:「祭適殤者,重適也。祭適殤於

問》。 祭」,此爲《祭法》所誤也,說已詳《曾子 於《曾子問》及《小記》注 當爲之祔矣,安有祭子而止者耶? 禰,若己爲庶子,則己之昆弟爲父後者又 宗子之家,皆當室之白,謂之陽厭。 庶人之孫死,若己爲適子,則當爲之袝於 適、庶耶? 凡死未有不祔,其服未有不除者也 殤不祭。」 於其黨之廟,大失以下,庶子祭其適 廟之奥,謂之陰厭。 殤與無後者從祖 愚謂: 殤惟祔與 王子、公子祭其 皆云「庶 袝 、除服 食,如 〕,豈限 二祭。 殤 鄭氏 凡庶 殤 適 不 於 殤

勤 繼之,故祀以爲稷。 下 祀之,能捍大患則祀之。 夫聖王之制祭祀 也,其子曰 事則祀之,以勞定國 I農,能 也,法施 殖百穀。 共工氏之霸九州 則 是故厲山氏之有天 於 祀之,能禦大 夏之衰 民 則祀 之,以 也 也,其 一,周棄 菑 則 死

衆事 章。 序星 子 財用 治民 文治,直吏反。 星辰,民所瞻仰 民之菑 契爲司徒而民成,冥勤其官而水死,湯 功 曰 ,黄帝正名百物 殛,紀力反。 后 而除其虐,文王以文治,武王以武功去 辰 也,非此 而野死,鯀鄣 ,此皆有功烈於民者也。 土,能 以著衆,堯能賞 去,起吕反。」 顓頊能脩之,本或作「顓頊脩黄帝之功」。 族 平. 也,山林、川谷、丘陵,民所取 也,不在祀典。《釋文》:「鄣,音 九 以 鴻 州 明民共財,顓頊 水 ,故祀 均刑 而 殛 以 死 法以義終, 爲 ,禹能脩鯀 及夫日、月、 社。 能 帝 脩之, 以 舜 嚳 寬 之 勤 能

既 民 鄭氏曰:「厲山氏,炎帝也,起於厲 王謂之霸,在大昊、炎帝之間。 曰 封 禪 興事,知休作之期也。賞,賞善,謂禪 有烈山 禹、稷等也。 二十八載 氏。 棄,后稷名也。 乃死 能刑 也。 ,謂去四凶。 野 死 共工無 著衆,謂 謂 義終,謂 <u>"</u>Ц 有 録 苗 舜 使 或 而

作有 神。 農、后土、帝嚳與堯,及黄帝、顓頊與契之 世之子孫,爲后土之官。后,君也。 社稷,故廢農祀棄。 以勞定國,若禹是· 屬是也。以死勤事,若舜及鯀、冥是也。 烈,業也。」 民 授舜,封禹、稷,官得其人,是能賞。 而掌土,能治九州五土,故祀之以 棄皆祀之以配稷之神。后土,是共工 也,周棄繼之者,以夏末湯七年大旱,變置 名柱,能殖百穀,爲農官,因名農。夏之衰 湯及文、武是也。 其官玄冥,水官也。 死於蒼梧也。 成,謂知五教之禮 期,不失時節,故祀之也。 譽能紀星辰、序時候,以明著,使民 孔氏曰:「法施 明民,謂 農,謂厲山氏後世子孫 也。 祀以爲稷者,謂農 也。 虐、菑,謂桀、紂也。 禦大菑 使之衣服 冥,契之六世孫。 於民 ,捍大患 堯以天下 有 配 ?;若神 均,平 章 爲 社之 氏 也。 君 及 後

者 謂 鴻水,亦有微功,故得祀之。 仍巡守陟方而死,是勤衆事 老,二十八載乃殂,是義終也。 也 顓 黄帝爲物作名,正名其體 得治水九載? 等。 得祀之人,有功烈於民故也。 此皆有功烈於民者也。 謂放桀也。文、武去民之菑,謂伐 徒,掌五教,故民之五教得成。 暑』『祭水旱』,此不言者,舉日月則天地 瘞 垂衣 辰 **頊能脩之,謂能** ,謂山澤不障,教民取百物以 埋於泰折」,『祭日』『祭月』『祭星』之 五. ,民所瞻 上有『祭天』『祭地』『祭四時』『祭寒 ·裳,使貴賤分明,得其所 刑有宅,是 仰者,釋上『燔柴於泰壇』, 上古雖有百物 能 脩黄帝之法。 刑 結上『厲 有 也 法 而 若無微 也。 及夫日、月、 野 舜征 湯除其虐, 以明 丽 也。 死。 自贍也。 未 山以下 契爲司 襌 民者 紂 有 有苗 功,焉 共財 鯀 舜 名, 也。 寒 可 丽

舜,而 紀年》。 載。」 菑 爲王朝玄冥之官,溺死 者,合結上事也。 舉日月以包之也。 知 菑 燬之虐,而樂孔邇之仁,是以文治去 定事成,而 者,百物之名定,則民之視聽不惑,故 以下及親屬、七祀之等,宫中小神,所以 經所云,謂是外神有功於民,其宗廟與 七祀,并通適殤以下,此經不覆明之者,此 悉不得預於祭祀之典也。 山」以下及日、月、星辰之等無益於民者, 也。 ", 四 也 時、 不私其子也。 武 此 愚謂:以義終,謂堯崩,以天下授 紂爲民患,文王脩德,使民 王 寒暑、水旱則 所 財用給 伐紂救民,是以 言自「武 族,類 足也。 非此族也,不在祀 共,給也。 王以 日月陰陽之氣,故 於河,事見《竹 也。 冥嗣 按上陳宗廟及 若非上自『厲 武 上,農 爲 明民 功 商侯, 去 及后 民 共 民 俗 之 之 殤 如 書 財 典

禮記卷四十五終 禮記卷四十五終 禮記卷四十五終

二八〇

禮記卷四十六

國史館纂脩孫希旦集解賜進士及第翰林院編脩

祭義第二十四《别録》屬《祭祀》。

祭之義。 以祭祀言之,蓋事死事生,其道一也,故因 次言孝親之道,次言尚齒之義。篇末又專 室」章、皆明祭祀之義。 存焉爾。」 方氏慤曰:「陳乎外者祭之法,存乎中者 之義即因事兄之心而推之者,故又因 祭而言孝。 而言尚齒。 君子於祭,豈徒法爲哉,亦有 事父事兄,其道一也,而 愚謂:此篇自篇首至「公桑蠶 獨其言禮樂者,於前後不相比 次言禮樂之養人, ||孝親 敬老 義

《八文·女儿夏·夏川六女。 《六文元·元元 而錯在此篇耳。 附,而本見於《樂記》,疑《樂記》重出之文

方氏慤曰:「數、疏言其時,煩、怠言其事,方氏慤曰:「數、疏言其時,煩、怠言其事,方氏慤曰:「數、疏言其時,煩、怠言其事,方氏慤曰:「數、疏言其時,煩、怠言其事,方氏慤曰:「數、疏言其時,煩、怠言其事,

此無『秋』字、蓋脱爾。」 孔氏曰:「如將爲感時念親也。霜露既降、《禮》説在秋,鄭氏曰:「非其寒之謂,謂悽愴及怵惕皆

見之」,則悽愴亦如將見之,是其互也。」之謂」,則怵惕非其煖之謂,怵惕云『如將見之,念親如得見親也。 悽愴云『非其寒

樂以迎來,哀以送往,故禘有樂而嘗無樂。 之,放其去來於陰陽。」 爲一祭之間,孝子不知鬼神之期。 鄭氏曰:「迎來 祭初若來而樂,祭末似去而哀。 推一祭而 之,爲一祭之間,既不知鬼神來去期節 去而哀,哀其享否不可知也。小言之,則 主生長、春夏陽來、似神之來、故祭有樂、 廣論一年,神之去來似於陰陽二氣,但陽 故《那》詩云『庸鼓有斁,萬舞有奕』,下云 時之祭皆有樂,殷 秋冬陰,似神之往,故祭無樂。 春者,陽氣之至而申者也,故其祭也,所以 顧予烝嘗」,則殷秋冬亦有樂。」 而樂,樂親之將來也。 則 烝、嘗之祭亦有 孔氏曰:「小言 然周禮四 推而 愚謂 ¨, 故 樂。 送 廣

用樂,嘗祭無樂,蓋諸侯之禮也。說已見有樂;哀其往,故無樂。然天子四時祭皆故其祭也,所以送乎親之往。樂其來,故迎乎親之來。秋者,陰氣之反而屈者也,

出者同。樂、音洛、又五教反。」三日乃見其所爲齊者。《釋文》:「齊,側皆反,後不其笑語,思其志意,思其所樂,思其所嗜。齊致齊於內,散齊於外。齊之日,思其居處,思

《郊特牲》。

在後。」 也。 也。所嗜,素所欲飲食也。」 御、不樂、不弔耳。 鄭氏曰:「致齊,思此五 所樂爲之事也。 齊三日必見所爲齊者,由其專精之至也。 「先思其麤,漸思其精,故居處 散齊於外,防其外之所感也。 愚謂: 致齊於内,專其内之所思 所嗜,所嗜飲食之物也。 見所爲 者 齊者,思之熟 也。 在前 孔氏日 散 樂、嗜 資,不 所樂,

旋,本或作「旋」。 愾,開代反。」 必有聞乎其歎息之聲。《釋文》:「僾,音愛。 祭之日,入室僾然必有見乎其位; ´, 肅 然必 有聞 乎其容聲; 出 户而 聽, 周還 愾 還,音 然 出

告利 也。 也。 之聲也。 之聲。蓋人子之於祖考,以送其往爲哀 周 則祖考之心亦必以其往爲哀,故宜有歎息 人出立于阼階上,西面,祝出立于西階上, 祝東面,『告利成』,尸謖。」《少牢禮》:「主 面。」尸謖,祭畢而送之,故如聞乎其歎 人室,謂始祭時也。 還出 然言其容,愾然言其氣。」 《特牲禮》:「主人出立于户 出户而聽,謂祭畢尸將謖而主人出 成。 户,謂朝事之時出户而 祝人,主人降立于 馬氏 晞 孟 **僾然**,髣髴有見之貌 曰:「僾然言其 作階 事尸 外, 東,西 於堂 西 貌 息 面 户

是故先王之孝也,色不忘乎目,聲不絶乎耳,

肅

著、存不忘乎心,夫安得不敬乎? 心志嗜欲不忘乎心。 致愛則存,致慤則著。

不忘乎心者,言其愛、慤 存。致其誠慤之意,則雖幽 謂: 先王事死如生,事亡如存,故其耳目 也。 如此,則安得有斯須之不敬者乎? 祀之時而已也。致其愛親之心,則雖亡 之所接,心之所念,無時不在於親,非特 方氏慤曰:「色不忘乎目,常若承 聲不絶乎耳,常若受命之際也。」 無 時 一而著。 忌日 而或 著、存 顔之頃 不用, 怠也。 其私 如 祭 愚

忌日」。」 也。《釋文》:「養,羊尚反。夫,音扶。言夫日或作「言夫 非不祥也,言夫日志有所至,而 君子生則敬養,死則敬享,思終身弗辱 君子有終身之喪,忌日之謂也。 不敢 盡

鄭氏 他事,如有時日之禁也。祥,善也。 曰:「忌 日,親亡之日。 忌 日 不 志 用 舉 有

所至,至於親以此日亡,其哀心如喪時。」|

哀。 也。 事 念親 既言君子有終身之敬,又言君子有終身之 無 也 時 愚 夫日 也。 謂 忌日,親之死日。不用,不以 圃 或 思終身弗辱者,敬養、敬享之心 一,此日 忘,而思以守其身者孝其親也。 不敢盡其私,不敢盡其心於私 也。 志有所至,言志 爲他 極 於 事

作。 愉 卿、大夫相君,命婦相夫人。 也 唯聖人爲能饗帝,孝子爲能饗親。饗者, 文》:「鄉,許 相。 愉 鄉之然後能響焉。 君牽牲、夫人奠盎、君獻尸、夫人薦豆。 乎其忠也 **這亮反。** , 勿勿諸其欲其饗之也。 齊 齊, 如字。」〇鄭注:「上饗,或爲 是故孝子臨 齊齊乎其敬 尸 而 也, 《釋 不 鄉

蓋德不足以與之對,則亦非鄉之之盡也。馬氏晞孟曰:「饗帝、饗親,致其誠而已。

劉向 也。 也。 謂: 敢 欲其饗之者,言其欲神之饗之,勉勉而 爲序也。 君、夫人各以一事相對言之,故不以先後 夫人獻尸。此於三事乃逆陳之者,蓋 説益無據矣。 亦以「奠盎」之文爲疑,而欲曲通之,然其 所言爲繹祭,又以奠盎 從、君制祭、夫人薦盎」、是也。 作「薦」、《禮器》曰「君親牽牲,大夫贊幣 作者,惟其誠 聖人盡天道者也,孝子盡 人、主婦獻尸,尸皆親受之,不奠也。 懈 偷偷 色不 引之作「密勿從事」是也。 也 勿勿者,勸勉之意,《詩》「黽 和 齊齊乎其敬者,言其敬容之齊 乎其忠者,言其和順之發 面 於鄉之而已。 祭禮先薦豆,次君獻尸,次 有所變動曰 二 爲 設 盎 人道者也。」 作。 祭祀之禮 齊之尊, 注疏以 臨尸而 勉 勿勿諸 從 奠當 於誠 事, · 主 其 於 此 不 而 愚

文王之祭也,事死者如事生,思死者如不欲文王之祭也,事死者如事生,思死者如不欲文子之经而思之。祭明日,明發不寐,有懷二人」,文王之詩也。祭之見親之所愛,如欲色然,其文王與?《詩》云上明發不寐,有懷二人」,文王之詩也。祭之之日,樂與哀半,響之必樂,已至必哀。《釋之日,樂與哀半,響之必樂,已至必哀。《釋文王之祭也,事死者如事生,思死者如不欲文王之祭也,事死者如事生,思死者如不欲

日如 《大戴禮·文王官人》篇:「欲色嫗然以 者意欲隨之而死也。 孔氏曰:「思死者如不欲生者,言思念 日 偷。」蓋致齊之時,思親之所樂、嗜,故祭之 上不諱下,於祖 而光明開發也。二人,謂父母也。祭之明 詩》、《小雅・小宛》之篇。 ,明發不寐者,謂祭畢之夕,思念父母不 見親之所愛,若有欲得之色然 愚 謂 欲 廟稱親之諱,如似見親 色,謂 稱諱如見親者,廟 有欲 明發,謂將日 得之色 也。 也 中 死

> 亲,以至於明日之旦也。饗而致之者,謂 祭時如見其親也。又從而思之者,既祭而 以一歲之來往爲哀樂者也。饗之必樂, 此以一歲之來往爲哀樂者也。饗之必樂, 此以一歲之來往爲哀樂者也。饗之必樂, 是至必哀,此以一祭之始終爲哀樂者也。 上章言唯「仁人爲能響帝,孝子爲能響 上章言唯「仁人爲能響帝,孝子爲能響 上章言唯「仁人爲能響帝,孝子爲能響 上章言唯「仁人爲能響帝,孝子爲能響 上章言唯「仁人爲能響帝,孝子爲能響 上章言唯「仁人爲能響帝,孝子爲能響 上章言唯「仁人爲能響帝,孝子爲能響 上章言唯「仁人爲能響帝,孝子爲能響 是至必衰,此以一祭之始終爲哀樂者也。 是至必衰,此以一祭之始終爲哀樂者也。

也。 鄭氏曰:「嘗,秋祭也。親,謂身親執事 子、諸侯之祭,既 氏 親親也。容以自反,言非孝子所以事親也。 反,猶言自脩整也。 數之言速 成,合舞當饋食之節 室 貌自反覆而脩整也。」 及,與也。此皆非與神明交之道也。」 曰:「濟濟者,容貌自疏遠。漆漆者,容 而行饋食之禮 慤與趨趨,言少威儀 也。 漆漆,讀如 也。 行朝踐之禮於堂,乃反 容以遠,言非所以接 樂成者,樂至合舞而 也。上薦,謂進也。 愚謂: 反饋者,天 也。 朋 友 趨讀如促。 (切切。 孔 於 自 時

> 也。 將見之誠矣。 而 濟濟漆漆乃助祭者之容,而非主祭者之容 獻尸,於此時而君子乃致其濟濟漆漆。 賓長酳尸,至爲 灌朝踐,君與夫人交獻而已,至饋食而 助祭者。 籩、豆也。 下薦,謂籩、豆之實也。 有 慌惚,髣髴若有見聞之意。 濟濟漆漆之容,則情意疏遠,而 君子,即百官也。 俎,謂饋熟之俎也。 加爵 而後長兄弟、衆賓 此謂 諸侯祭禮 所進饋食之 百官、 若事鬼神 無 廟 如 長 後 蓋

以不備,虚中以治之。《釋文》:「比,必利反。」孝子將祭,慮事不可以不豫,比時,具物不可

專致其精明以交於神明也比時,及祭時也。 虚中,謂〇「此時」句絶。

虚中,謂心無他念之雜

沐浴,盛服奉承而進之。洞洞乎,屬屬乎,如宫室既脩,牆屋既設,百物既備,夫婦齊戒、

動。屬,音燭。弗,本亦作「不」。勝,音升。」
之。 庶或饗之,孝子之志也。《釋文》:「洞,音是諭其志意,以其慌惚以與神明交,庶或饗薦俎,序其禮樂,備其百官,奉承而進之。於弗勝,如將失之,其孝敬之心至也與! 薦其弗勝,如將失之,其孝敬之心至也與! 薦其

孝子之祭也、盡其慤而慤焉、盡其信 也。 既 謂: 意 謂 百物,謂三牲、魚、腊及籩、豆之實。 百物 諭 百官,奉承而進之,百官助主人進之也。 鄭氏曰: 備 專 朝踐時,下言「奉承 其志意,謂使祝祝饗及侑尸 宫室既脩,牆屋既設,慮事之豫也。 洞洞、屬屬,以其慌惚以與神明交,誠 ,具物之備也。 一,如將見之,虚中以治之之驗也 「脩設,謂糞除及黝堊也。 上言「奉承而進之」, 而進之」,謂饋 也。」 而信焉 激時 備 愚 其

> 祭也。《釋文》:「詘,求勿反。齊,如字,又側皆反。」 受命,已徹而退,敬齊之色不絶於面,孝子之 也敬以愉,其薦之也敬以欲。 孝子之祭可知也: 其立之也敬以詘,其進之 皆誠也。 禮」,云『不過失』則是禮也。 父母或使之也。」 内者無不盡也。 盡 失焉,謂著於外者無不盡 禮包衆事,非 其慤,盡其信,盡其敬,盡 慤以其固言之,信以其實言之。」 一可極,故不得云『盡 慤焉,信焉,敬焉,而 輔氏 廣曰:「慤與信、 也 退而 如或使之,如 其禮,謂存於 孔氏曰 立,如將 不 其 過

教使也。詘言其容,愉言其色,欲言其心。退,謂反其位也。如將受命,如親之有所進,謂進至於尸前也。愉,色之和也。薦,進,謂進至於尸前也。愉,色之和也。薦,者子之祭可知也,言觀其祭而可以知其孝

敬

,如親聽命,則或使之也。

盡其敬而敬焉,盡其禮

而不過失焉。

進退必

之矣。《釋文》:「敖,五報反。」〇鄭注:「而忘本,「而」而退無敬齊之色,而忘本也。 如是而祭,失欲,不愛也。 退立而不如受命,敖也。 已徹立而不詘,固也。 進而不愉,疏也。 薦而不

於心者淺,而失之速也。
也。忘本,忘其所以祭祀之本。蓋其所根心之誠敬而發,誠敬之心,所以祭祀之本。固,謂固陋而不知禮也。敬齊之色,根於

恪,非所以事親也,成人之道也。盈,洞洞屬屬然如弗勝,如將失之。嚴威儼色,有愉色者必有婉容。孝子如執玉,如奉孝子之有深愛者必有和氣,有和氣者必有愉

況反。弟,音悌。」

必如上文之所言,而後可以爲孝也。生,其事親於生時者如此,故没而祭之,亦其孺子之心也。」 愚謂:孝子事死如事鄭氏曰:「成人,既冠者。然則孝子不失

家也。《釋文》:「長,竹丈反。近,「附近」之近。乎王,於老,敬長,慈幼。此五者,先王之所以定天下也。貴有德,何爲也? 爲其近於君也。貴有是,爲其近於兄也。意幼,爲其近於弟也。貴也。告其近於君也。貴老,爲其近於弟也。貴也。先王之教,因而弗改,所以領天下國是故至孝近乎王,至弟近乎霸。至孝近乎是故至孝近乎王,至弟近乎霸。至孝近乎是故至孝近乎王,至弟近乎霸。至孝近乎是故至孝近乎王,至弟近乎霸。至孝近乎是故至孝近乎王,至弟近乎霸。至孝近兴制也。贵

事也,故曰「至弟近乎霸」。天子必有父,未必遽盡乎道之全,然亦道之所散而見哉,仁之實,由仁而極之,則王者天下一就者,仁之實,由仁而極之,則王者天下一家之心也,故曰「近乎道」。霸,諸侯之長也。事。我心也。 人有一德,雖

子、荀子明王、霸之辨,而後學者以 殷有二伯、文、武時周、召爲二伯。自孟 羞,不知孟、荀所闢,謂春秋時五霸耳。」 者,君位之極。 於是而不能外矣。〇項氏安世曰:「王 勢位之尊而 諸侯必有兄,言孝弟之心根於固有,不以 之孝弟而教之,則天下國家之人情皆統領 『伯』字,諸侯之長也。堯、舜有四岳,夏、 有所異也。 霸者,臣位之極。 先王因人心固 霸,即 霸 爲 有

錯諸天下,無所不行。」《釋文》:「錯,千路反。」 以敬長,而民貴用命。孝以事親,順以聽 始,教民順 子曰:「立愛自親始,教民睦也。 謂「不出家而成教於國」也。 其民則而效之,則所以教民者在是矣,所 敬也,而敬必自長始。 王者無不愛也,而愛必自親始。 也。 教以慈睦,而民貴有親 愛敬自盡其道,而 民貴有親 立敬自長 王者無不 命, 則 教

之易有不期然而然者矣。之心,我以人之所同然者感之,則其聽從起,民貴用命則順矣。蓋人莫不有孝順

門,敬之至也。 郊之祭也,喪者不敢哭。凶服者不敢入國

説見《郊特牲》。

祭腥、泄、騽、熟」。」 爛,音尋。」●○鄭注:「序,或爲「豫」。 祭之日,君牽牲,穆答君,卿大夫序從。 至 以刲,取膟、膋,乃退。 廟門,麗于碑,卿、大夫袒而毛牛尚耳,鸞 也。 《釋文》:「刲,苦圭 反。 爓祭祭腥 膟, 音 **爓祭祭腥,或爲1合** 律。 而退,敬之 膋,力彫反。 既 ガ 人

子也。答,對也。君牽上牲,嗣子牽其次,出迎牲,牽之而入也。穆,謂主祭者之嗣祭,謂祭宗廟也。君牽牲者,謂二灌後君

闇 ,殷人祭其陽,周人祭日 以 朝 及闇

與君

相

對

而

牽之也。

其有傳重之端也。

郊之祭,大報天而主日,配以月。 即《禮運》云『腥其俎』,爓肉,即《禮運》云 贊幣,士奉芻,以次序從君也。 廟之中庭,所以爲行禮之節,繫牲於其上, 大夫從,士執芻」,是也。 ·君親牽牲,大夫贊幣而從」、《祭統》曰「卿 尚耳,以耳毛爲尚也。 朝祭之時,先祭腥,次祭爓。而退者 三牲皆然,獨言「牛」者,以上 以告殺,又與膋並 先云『爓』者、記者文便耳。」 膟,血 卿大夫序從者,卿大夫 毛牛,取其毛以告純 嗣子答君牽牲 孔氏曰: 也。 也。 麗,繫也。 爓,沈肉於湯 鸞刀,刀之有 以 膋,腸間脂 供 夏后氏祭 《禮器》曰 一此 蒸蕭也 性 腥 者 碑在 爲 肉, 主 以 其 以迎其神而禮之也。 門之外者,祭天主日,故拜之於東門之外, 迎日者,若《鄉飲酒禮》「主人迎賓」而 事以 實從之」者然也。 之神,蓋略放郊禮而爲之者也。拜日於東 川、丘陵於西門外。」祀方明以禮天地四 自朝及闇。 日於南門外 大旂。出拜日於東門之外,反祀方明, 於經無可考。 亦以朝及闇,故夫子譏之。」 后氏大事以昏,殷人大事以 暘」之暘,謂日中時也。 者莫著焉。闇,昏時也。 鄭氏曰:「主日者,以其 日 出。」 季氏大夫之家,祭禮應少,而 ,禮月與四瀆於北門 《覲禮》曰:「天子乘龍,載 孔氏曰:「周 禮日於南門外,禮月於 所祀之神非一,而獨 朝,日出時也 光明,天之神可 陽,讀爲『曰 人人尚 日

愚謂:

郊禮

外

·, 禮

Ш

禮

1307

方

中,周人大

雨

見

夏

(文,祭天

鈴者。

刲,割也。

也。

也

因

其

便而用之也。

也。

取血

也。

朝踐之禮畢

而退也。

『熟其殽』。

乃退,殺牲之事畢而退

衆

後畢 也。 外, 北 所以 也。」 從 見 禮 能支之? 之處。」周禮祭天以朝及闇,雖有强 大次、小次」,鄭注 Ш 乃乃 矣。 門 **,於天神兼祭日月,而不及其餘** Ш 《春秋》僖 終日 了、 丘 ·也。天尊可以 祭天之禮,兼及三望,此所以 免牲 Щ 禮 , 所 川、丘 一陵。 . 行禮 日 是以 謂 猶 於南門外,禮月與四瀆於北 三主日 周 陵於西門外,所謂「三望」 而 公三十一年,「四 三望」,傳曰: 退俟,與諸臣 無 禮 統地祇,故兼 跛 而 倚之失也 配 「小次,王接祭退 掌次》「祀 以 万」也。 代 「望,郊之細 有 與 五. 祭 事 卜郊,不 於此 終 帝 四 祭 力,孰 則 天之 瀆 Ħ 此 此 者 俟 岌 門 張 丽 可

祭 致 日 祭 天下 出 Ħ Ħ 於 於 於壇、祭月於坎、以 之和 東 東,祭月於西 月 生於西,陰陽長短終 《釋文》: 「别,彼列反。 以 别 别 外 幽 明, 内 巡、依注 始 以 以 端端 相 制 上下。 其 巛 音沿。」 位 一,以

)按:巡,今如字。

之晦 始 也。 祭月 爲 明 謂 因 位 晝 此 濟 晦 於東,日以朝出於東方也。 亦 東方亦陽方也。 謂 後 陰 也。 幽 日月之東西以正 爲 謂 而 日 和 也。 於 而 生 方 位,所祭之兆也。 明 春 不 日之朝,月之朔。 氣 夏陽 可始 也。 坎坎 分朝 Ė 東,謂 坎 而 曲 巡,行也 也。 壇 莂 亦 此 祭日 日 見於西 長 亦 在 日 東 丽 以 丽 在 秋 月 之 下 致 郊。 於 月爲陰,陰主 致], 徧 分夕 陰 上 丽 也。 東郊 夭 方也。 其外内之位也。 而 短,冬陰 幽 幽 也 西, 下 月之禮 日爲陽,陽主外 者也。 明者也 明 一,謂其 終,謂 祭 之和 謂 陳氏祥 陰,謂 丽 月 西 月生於西,月 (運行 制其 長 者 也 於 一内,而 郊。 祭日於壇 日 月 一之夕 。 陰 丽 西 夜。 道 周 上下之 照 日 端, 陽 郊 徧 陽 日 西 於夜 日 照 ン, 月 陽, 短 : 相 代 生 又 方 正 於 而

之正 也。 也。 日月之禮凡有四 兼祭日月,鄭氏之誤也。 天宗,乃秦禮,以樂六變而致天神爲蜡祭, 之於東門外,秋分夕之於西門外,此祀之 之,與覲諸侯而禮之,非常祀也。 來年於天宗」,四也。《覲禮》「禮日月」,五 郊,兆日於東郊,兆月於西郊,三也。《大 祭月於西』,二也。《小宗伯》兆四類於四 西郊,即春秋分所祭之兆,非有二也。 正與常也。」 司樂》『樂六變而致天神』,《月令》孟冬『祈 報天而主日,配以月」,一也。《玉藻》曰 ·朝日於東門之外」、《祭義》曰『祭日於東, 祀日月之禮有六。 也 『雪霜風雨之不時,於是乎祭之』,六 因郊蜡而祀之,非正祀也。 愚謂:兆日於東郊,兆月於 , 而惟朝日、夕月, 乃其祀 《祭義》曰『郊之祭,大 去此二祭,則祀 類祭而祀 春分朝

> 微矣。《釋文》:「去,起呂反。奇,紀宜反。」 者,以治天下之禮也,雖有奇邪,而不治者則 天下之禮,致反始 則上下不悖逆矣。 神,以尊上也。 致義也,致讓也。 致物用,以立民紀也。 致反始,以厚其本也,致鬼 也,致鬼神也 致讓,以去争也。 う,致 和 合此五 致義, 用 也

其本。 少也。」 用 宜。 五事,若行之得理,則天下治矣。 物猶事也。 也。 至也,使人勤行至於此也。至於反始,謂 鄭氏曰:「因祭之義,汛説禮也。 姓和諧。 報天之屬也。 ,則知榮辱禮節 至於和、用,謂治民之事以足用也。 讓,謂遞 祭祀鬼神,是尊嚴其 用,謂 孔氏曰:「此 變『和』言『物』,互文也。 相 至於鬼神,謂祭宗廟之屬 推 財 ,故可以立人紀,義 讓。 用豐足。義,謂 一節明禮之大用凡 反始報天,是 上。 和,謂 民 斷 致之言 豐 制 厚 重 得

九二

必須和,和能立事,故云『互』也。」之禮,雖有異行不從治者,亦當少也。事邪惡,皆據異行之人。合此五者以治天下凶去暴,故上下不悖逆。奇謂奇異,邪謂凶去暴,故上下不悖逆。奇謂奇異,邪謂

極也 聰明爲魄。 鄭氏曰:「氣,謂嘘吸出入者也。耳目之 之鬼之盛。」 之屬皆是魄,但耳目能視聽 者,故謂之神之盛。 夫運動云爲,皆是神,但氣是充盛發於**外** 所謂「天地之功用,造化之迹」,張子 言之者,蓋宰我所問者祭祀之鬼神,故夫 二氣之良能」也。 朱子曰:「人之精神知覺,與 合鬼神而祭之,此聖人教之至 愚謂:鬼神體物不遺,程子 丽 四肢九竅,與夫精 夫子乃專以氣 而 精明,故 所 與 謂 魄 謂 Щ

> 子專 之義詳矣。物生始化云者,謂受形之初 也。 氏注曰:『嘘吸出入者氣也。耳目之精 也 有物,《易》所謂『精氣爲物』是也。 間有神者,名之曰魂也。 生魄,陽日 精血之聚,其間有靈者,名之曰魄 爲魂,地氣爲魄」,高誘注 之禮所由起也。 爲魄。』氣則魂之謂也。 曰:「陰主藏受,陽主運 曰:『氣也者神之盛 **【人生始化** 則魂升而 魄,人陰神也。」此數説者,其於魂、魄 以其在人身者言之,以 魂者、既生此魄、便有暖氣、其 曰 魄。 爲 〇朱子曰:「子産有言: 神,魄 既生魄,陽曰 ,魄也者鬼之盛。」鄭 《淮南子》曰『天氣 降 用。 二者既合,然後 曰:『魂,人陽 而 明報 凡能記憶,皆 爲 鬼矣。」又 魂。』孔 氣、 及其 也。 報魄 既 散 神 明 子

也。

合鬼與神,教之至也。」

曰

「氣也者,神之盛也。

魄也者,鬼之盛

宰我曰:「吾聞鬼神之名,不知其所謂。」子

❶ 「教之至極」、《禮記注疏》、《集説》并作「之教致之」。

魂魄雖各自分屬陰陽,然陰陽中又各自有魄之所藏受也。至於運用,發出來是魂。

陰陽也。」又曰:「魂魄是形氣之精英。」

衆生必 云反。 悽愴,此 下,陰爲野土。 斃,本亦作「弊」,婢世反。 蒿,許高反。」〇鄭注: 死 百 ,死必歸 物 之精 其氣發揚于上爲昭明,焄蒿 土,此之謂鬼。 也,神之著 陰,依注音廕,於鴆反。 「蒿,或作「藨」。」 也。 骨肉斃于 《釋文》: 煮,許

明其 蒿 肉 也。 鄭氏曰:「陰,讀爲『依蔭』之蔭,言人之骨 也 愴 其光景之著見也。 生,兼人、物而言也。 蔭 也。 ,氣蒸出貌。 悽愴,謂其感 、與人同也,不如人貴爾。」 於 氣之發揚於上者,魂之升而爲神 骨 地 肉之掩 中 爲土壤 上言『衆生』,此言『百物』, 於下者,魄之降 動 **煮蒿,謂其** 乎人,而使人爲 也。 陰猶掩也。 **煮**,謂香臭 、香臭之發越 愚謂: 昭明 而 之悽 爲 行謂 也。 也 衆 鬼

> 魄爲尤盛耳。 此皆人物之所同,但人爲萬物之靈,其魂

則。百衆以畏,萬民以服。因物之精,制爲之極。明命鬼神,以魄爲尤盛耳。

爲

一點首

之也。」 也。 鄭 言聖人因人、物之精靈制爲尊極之稱 黔,黑也。 神,不可 之鬼神,以爲百姓之法則,而天下皆畏敬 百衆,謂百官、衆庶。 氏 曰 : 孔氏 復 凡人以黑巾蒙頭 明 加 曰:「明猶 命, 也。 猶 黔 尊 首 萬民,謂天下衆 名 尊 謂 也。 也。 ,故謂之黔首 民 也 尊 命,名也。 極 則,法 於 謂 民。 鬼

也。衆之服自此,故聽且速也。 别親疏遠邇,教民反古復始,不忘其所由生聖人以是爲未足也,築爲宫室,設爲宗祧,以

廟謂之宗,後爲寢謂之祧。古、始,皆謂祖周於外者謂之宫,處於内者謂之室。前爲

尊,而 始則 考也 盡 追 神之感人,而人之欲敬事其祖考,乃出 是立宗 之,故人莫不服從而速於聽命也 而事 (心之同然而不容已者,而聖人因 其報本追遠之意,而衆莫不服之。 曰 .無所以事之之禮,則於情爲未足,於 始。 之也。 以 廟,制祀典,使天下之人莫不 其 反古復始,謂設爲祭祀之禮 己 往 聖人以 則 曰 古, 明 以其爲身之所 命鬼神, 其 名 蓋鬼 有 丽 於 以 雖 自 導 以

薦 薌,見以蕭 間,合爲「覵」字,並音「間厠」之間。俠,古洽反。 至 武。」〇今按:羶,讀如字。 端既立,報以二禮。 也。 鬯,以報 黍稷,羞肝、肺、首、心,見間以俠甒,加 《釋文》: 魄 光,以 也。 「羶,依注音馨。 報氣 教民相愛,上下用情 也。 建 見以,依注見作『覸』,見 設朝 此教衆 事 *, 燔 反 始 燎 禮之 甒,音 也。 羶 以

二端,謂鬼也,神也。二禮,報氣、報魄之

羊腸 謂熟而 薌,間 也。 間, 禮 者。 祭肝 報之也。 尸 以其氣感神,所以 香蒿之光。 以 教民反始也。薦黍、稷,謂饋熟時也。 以報氣者,血、腥與燔燎皆不 人之始,氣又爲祖、考之始,故報氣者所以 也。 也。 共尸祭:有虞氏祭首,夏后氏祭 鄭氏皆讀 蕭光,謂蒸之而 必用 間 ,周祭肺也。 以蕭 既有黍稷及 聖 脂 羞之於俎 加 人 朝事,謂 以鬱鬯,謂 兩者,以玄酒配設 也。 光,謂取 此饋食之初,尸 既 爲 立爲鬼神之名, 羊膏 覸。 也。 俠,兩也。 報氣之陽也。 薦 俎,又間 膟、膋燔之, 羶, 有火光也。 覸,雜 Щ 加以 肝、肺、首、心,皆所 牛 腥也。 · 膏 祭初鬱鬯之灌 雜以 也。 也。 未入室 甒,所以 可以飲食,而 薌。 又設二禮 羶、薌,牛 而 甒 覵 蕭, 祖、考爲 燔燎羶 見 間 酒 以 時 香蒿 與 雜 以 俠 盛 也。 見 以 以 獻 甒 酒

謂

節

室

焫蕭_ 之具,所以 以報魄,故合而言之。教民相愛者,飲食 《禮器》及《郊特牲》注,謂「朝踐、饋食皆有 氣以 鬼神之禮,此爲至極也。 其下也。 黍、稷,羞俎實,與二灌 奠,然後焫 下用情以愛其上。 南,乃饋熟之始,尸在堂行朝踐禮畢,未 朝踐 一時也。 而 奠灌爵」,又非 而 以 氣,報魄 」,長樂陳氏、草廬吴氏又謂 以 亦 報魄者,黍、稷、牲、 時」,皆非 其 非兩度焫 禮之至者,言報氣、報魄,所以 既奠然後 (致其 蕭合羶、薌。」奠,謂祝酌奠于 味享神,所 以實,各首其類。二〇 相愛之實 也。 也。 蕭矣。 尸酢主人,上用情以愛 焫 蕭 以 灌 《郊特牲》曰 不同 則固 報 以 陸農 也。 魄 酒之屬 瓚,酌奠以斝 時, 鄭氏 之陰 師 不當朝踐之 主人事尸 以其 謂 「焫 日 : 「 孔 可以 也 「既奠, 蕭 俱 疏 飲 既 鉶 據 報 事 所 薦 專 盡也。 豈 醍 事

1313

在

侯祭惟 夫人 角。 特性》以升首爲報陽,謂初殺 《祭統》曰: 首,熟而升之者也。 之者也。此以羞首爲報魄,謂 黍稷,羞肺、肝、首、心,間以 鬯,尸亦飲之明矣。 曰:「醴酒在室,醍酒在堂。」彼得用 可 齊者,或上公之禮,或大給禮 、薦盎。 比 郊特性》「舉斝、 朝踐 而 之哉? 君割牲、夫人薦酒。」此云「薦 執 獻盎 強慢 齊, 《禮器 鬱鬯亦 角 之,執 Щ 饋 韶妥尸」, \Rightarrow 俠甒」,則是諸 食 曰:「君 爲報魄 鐙。」《坊 牲 獻 盛 有 時 以 也 虞 腥 **注醴齊、** 酒 牽牲 是 則 氏 而 矣。 也。 鬱 郊 祭 升

也。

敬,發其情,竭力從事, 君子反古復始,不忘其所由 以報其 生也。 親 是以致 不 敢 其 弗

致其敬者,盡之於心。 竭力從事,謂下文所言耕藉、巡牲、蠶 發其情者,達之於

繅之事也。

[精]。紘,音宏。齊,音咨,本亦作[叠]。」 起、山川、社稷、先古,以爲醴、酪、齊盛,於是地、山川、社稷、先古,以爲醴、酪、齊盛,於是諸侯爲藉百畝,冕而青紘,躬秉耒,以事天是故昔者天子爲藉千畝,冕而朱紘,躬秉耒,

載也。 郊。 耕三推,示親其事也。先古,先祖也。稷 藉,藉田也。 黍、稷,言「齊盛」者,以稷爲主也。 日 明齊。 冕而耕者,敬其事也。 盛,謂盛之於簋 天子藉田在南郊,諸侯在 也。 躬秉耒者,躬 祭祀兼 酪,酢 有 東

巡牲,所以致力,孝之至也。《释文》:「朝,直遥吉然後養之。君皮弁、素積,朔月、月半,君之至也。君召牛,納而視之,擇其毛而卜之, 、若天子、諸侯必有養獸之官,及歲時,齊戒 古者天子、諸侯必有養獸之官,及歲時,齊戒

反。牷,音全。」

相明也。 時也。 耕藉言「敬之至」,於養牲言「孝之至」,互 牲,每月巡視之,亦所以自致 子以皮弁,則諸侯以朝服也。 之服也。 即上文所謂「齊戒沐浴而躬朝之」,蓋以察 朔月、月半,即上文所謂「歲時」也。 巡牲 牧人而視之也。擇其毛,謂擇其完具 下, 覆明上文之事也。納而視之, 謂納 其芻豢之肥瘠也。 雜者也。卜,謂祭前三月卜牲也。 卜者養於牧人,既卜而後養之於充人也。 之三月。事先王亦如之。」歲時 養獸之官,謂充人也。 《周禮·充人》: 掌繫祭祀之牲、牷、祀五帝則繫于牢、芻 色純曰犧,體具曰牷。「君召牛」以 以視朝之服巡牲,敬其事也。天 皮弁、素積,天子視朝 其力 君不 ,謂每歲依 牲之未 也。 可自養 加 於 於 不

唯有世婦也。養蠶非一人,唯云『世婦之 川 吉者」,擇其吉者以爲主領也。 之,取其浴蠶種便也。築宫,謂築養蠶 互天子之禮言之。 天子有三夫人,若諸侯 王后,故三宫。 大昕之朝,季春朔日之朝也。諸侯夫人半 牆,牆上置棘。 牆七尺曰仞。 之桑,於其處而築養蠶之室也。近川 緒也。」 孔氏曰:「公桑、蠶室者,謂官 三淹也。 與? 禮之,禮奉繭之世婦也。三盆手者 禕,王后之服,而云『夫人』,容二王之後 性惡溼也。 『歲』者,蠶,歲之大功,事畢於此 者,初於仲春時已浴之,至蠶將生之時 凡繅,每淹大總,而手振之以出 歲單,謂三月月盡之後也。 仞有三尺,牆高一丈也。 世婦,諸侯之世婦。 外閉,謂扇在門外 奉種浴 也。 閉也。 此 而爲 官。 棘 副

脆採之,風戾之,使露氣燥,乃以食蠶,蠶夫人三宫,半王后也。風戾之者,及早涼鄭氏曰:「大昕,季春朔日之朝也。諸侯

類,又音律,又所律反。」

勇反。食,音嗣。單,音丹。與,音餘。

褘,音暉。

率,音

文》:「近,「附近」之近。 昕,許斤反。奉,芳勇反。

種,章

者,使繅,遂朱绿之,玄黄之,以爲黼黻文章。

之。古之獻繭者,其率用此與。及良日,夫

人繅,三盆手,遂布于三宫夫人、世婦之吉

以爲君服與。」遂副

褘而受之,因少牢

以

禮

以示于君,遂獻繭于夫人。

夫人曰:「此

所

服既成,君服以祀先王先公,敬之至也。《釋

吉者,使人蠶于蠶室,奉種浴于川,桑于公

之朝,君皮弁、素積,卜三宫之夫人、世婦之

之,築宮仞有三尺,棘牆而外閉之。

及大

昕

川而

爲

古者夭子、諸侯必有公桑、蠶室,近

桑,風戾以食之。歲既單矣,世婦卒蠶,奉繭

又浴之也。戾,乾也。

風戾以食之者,凌

之洫。 之初。 《考工記·匠人》:「爲溝洫,井間廣四尺, 也。 不與外祭,故云『以祀先王先公』,其實養 **洫之廣、深同,則澮之廣、深亦同,是二仞** 深四尺,謂之溝。成間廣八尺,深八尺,謂 仞、说文》云「伸臂一尋,八尺」,是也。 淹之,每淹則以手振出其緒也。」 曰:「三盆手者,置繭於盆中,而以手三次 蠶爲衣,亦事天地、山川、社稷。」 夫人自繅也。三盆手者,猶三淹也。 早采桑,必帶露而溼,蠶性惡溼,故乾 淹,以手振出 此所獻之繭。 爲君之祭服,故夫人首著副,身著褘衣,受 單,盡 良日、吉日也。更擇吉日、日至而後、 同間 蠶是婦人之事,故獻繭于夫人。 也。 |廣二尋,深二仞,謂之澮。]溝、 其絲,故曰『三盆手』。婦人 少牢以禮之,接獻繭之世婦 歲既單,謂三月之末,四月 陳氏 愚謂: 而 每 擬 澔 食

禮也者,動於外者也。 者也。 焉,舉而錯之無難矣。」樂也者,動於内者也。 莫不承順。 **煇動乎内,而民莫不承** 不與争也,望其容貌而衆不生慢易焉。 和,禮極順。 者動於内者也,禮也者動於外者也。 斯須不莊不敬,而慢易之心人之矣。 故樂也 中斯須不和不樂,而鄙詐之心人之矣。 天則不言而信,神則不怒而威,致樂以治心 心生則樂,樂則安,安則久,久則天,天則神。 心,則易直子諒之心油然生矣。易直子諒之 君子曰:「禮樂不可斯須去身。 尺」,言「一丈」可矣,何必繁其 者多曰仞。若七尺曰仞,則此「仞 即二尋也。 致禮以治躬則莊敬,莊敬則嚴威 故曰:『致禮樂之道 内和 但古人言廣者多曰 而 外順,則民瞻其顔 故禮主其減,樂主其 聽 理 發乎外, (辭乎? ,而天下塞 致樂以 尋,言高深 外貌 色而 故德 樂極 有三 而 治

故禮有 盈。 反 〈則安。 禮 減 報 禮之報,樂之反,其義一也。」 減 而 而 樂有 進 而 以以 不 反。 進 進爲文。 則 禮得 銷,樂盈 其 樂盈 報 則 而 樂,樂得其 不 而反,以 反 則放 反

曾子曰:「孝有三:大孝尊親,其次弗辱,其説已見《樂記》。

下能養。」《釋文》:「養,羊尚反,後同。」

子至· 天分地以養父母也。」 下文『中孝用勞』也。 社稷、宗廟、祭祀,不使傾 次弗辱,謂賢人爲諸侯、卿、大夫、士,各保 聖人爲天子者也。 孔氏曰:「大孝尊親,即下文『大孝不匱』, 也,與下文『小孝用力』爲一。 大德,俾人頌美其先 葬祭之以禮,全父母遺體,没身無毀者 庶人,孝道有三:立身行道,有大 尊親,嚴父配天也。 丽 黄氏裳曰:「 其下能養,謂庶 尊 危以 重之,上也。 能養, 辱親也,即 自天 謂 功 其 人 因

> 薦反。」 曾子曰:「是何言與? 者也,安能爲孝乎?」《釋文》:「與,音餘。 所謂孝者,先意承志,諭父母於道。 公明儀問於曾子曰:「夫子可以爲孝乎?」 次也。 謂:下文言「小孝用 然,曰「幸哉有子如此」,此則能尊親者也。 薦之,此僅能養而已者也。 孝,亦未嘗不有大小焉。 物,固不足以 分者也。蓋大孝之極,非天子之博施 親,其次弗辱,其次能養」,以行之優劣 匱」,以位之尊卑而異者也。 事父母 盡之,然即 盡 其 力,中孝用勞,大孝不 色養者,下 是何言與? 大夫、士而 亨熟羶薌 使國 此言「大孝尊 也。」 君子之 人 參直: 掌 へ稱 言 願 其 備 丽 愚 丽

蓋非大舜之得親順親不足以當此。直,諭猶曉也。善承父母之意,能諭之於道,

一二九九

但

也

又作「涖」。陳,直覲反。」 遂,烖及於親,敢不敬 不信,非孝也。戰陳無勇,非孝也。 君不忠,非孝 之遺體 曾子曰:「身也者,父母之遺體 ,敢不敬乎? 也。 涖官不敬,非孝也。 乎? 居處不莊,非 《釋文》:「蒞,音利,本 也。 孝 五者不 行父 也 朋 母 友 事

豈孝也哉!」 遂,則烖及其身。裁及其身,是及其親也,方氏慤曰:「身者,父母之遺體,五者不

此者也。强者,强此者也。樂自順此生,刑禮者,履此者也。義者,宜此者也。信者,信安可能也,卒爲難。父母既没,慎行其身,不安可能也,卒爲難。父母既没,慎行其身,不安可能也,卒爲難。父母既没,慎行其身,不好之所謂孝也者,國人稱願然曰『幸哉有子字之所謂孝也者,國人稱願然曰『幸哉有子亭、熟、羶、薌,嘗而薦之,非孝也,養也。君

自反此作。」《釋文》:「亨,普彭反。 遺,如字,❶又于

計反。」

事也。 難。 德,無所不在,而 字,皆指孝而言。仁、禮、義、信、强五者之 親,則其爲孝也大矣。「仁此」以下七「此」 以及其至焉。曰養,曰安,曰卒,皆事親之 未有離乎養者,故首以此言之,而遞推之 之實者謂之養也。 在於孝也。其行曰養者,言孝之見於行 衆之本教曰孝,言聖人之教衆人,其根 顯父母,孝之終也』,故卒爲難。」 敬爲難。 方氏慤曰:「《論語》云『不敬何以别』,故 《孝經》曰『立身行道,揚名於後世,以 卒則守身之事 揚子曰『孝莫大於甯親』,故安爲 無非所以成其孝也。順 養固未足以盡孝,而 屯。 能以守身爲事 愚謂 本

❶ 「如」,原重文,今據《釋文》删。

也。反乎此則三千之罪莫大,刑之所以乎此則樂而至於手舞足蹈,樂之所以生

作

也

東,自 進 文》:「溥,本亦作「敷」。 乎四海,施諸後 曾子曰:「夫孝,置之而塞乎天地,溥之而 而 準 推 ', 推 南 而 放諸 自 而 放 北 諸 北 無 世 西 海 思不服。」此之謂也。」《釋 放,甫往反。」 海 而 而 無朝 準。 而 準 5夕,推| 《詩》云:『自 推 而 放 而 放諸 諸 南 西 海 東 自 海 横 而

己。」 散之。 至也。 方氏慤曰:「置,謂直而立之。 之、溥之、施之、推之而 心,無古今之殊,無遠近之異,此 施, 愚 謂 謂其 孝 之德本 出 無 窮。 無所不同也。 ·乎天 推,謂 地 溥,謂 協協 其 所 進 以 乎 敷 置 不 而

曾子 夫子曰 曰 斷 樹 木 樹 以 時 殺 伐 焉 獸,不 禽獸 以 其 以) 時 時 ?,非孝 殺 焉

也。』《釋文》:「斷,丁管反。」

沉其大焉者乎。 而推之,則雖一物之微,有不可不愛者,而親親而仁民,仁民而愛物,故由愛親之心見,夫子曰」以下,曾子述孔子之言也。君子

用勞矣。 孝有三: 思慈愛忘勞,可謂 施,始豉反。」 小孝用 博 施 備 力,中 物,可謂 用 力矣。 -孝用 不匱矣。《釋文》: 尊仁安義,可謂 勞,大孝不匱

1319

孝也 博施 鄭氏 謂天 愛,而忘其躬 安義,則體 其所及者遠,而所致者大也。 思父母之慈 謂謂 地 曰:「勞猶 之間 德 教 不 加 虧 (耕之勞,庶人之孝也。 可 於四海,刑於百姓。 功也。」 而名不辱,士大夫之孝也 薦 者 無不咸在,人 愚謂:不匱,言 備物, 尊仁 君之

父母愛之、喜而弗忘。父母惡之、懼而無怨。

路反。」之粟以祀之。此之謂禮終。」《釋文》:「惡,烏之粟以祀之。此之謂禮終。」《釋文》:「惡,烏父母有過,諫而不逆。父母既没,必求仁者

既不能備祭禮,然猶不敢苟取以事其 明謂能卒也。此言中孝用勞之事。蓋君 子既不能爲不匱之孝,又不可止爲用力之 孝,所當自勉者,用勞而已。 黄氏曰: 章,所當自勉者,用勞而已。 黄氏曰: 「粟者,禄也。父母既没,必仕於仁諸侯、 「粟者,禄也。父母既没,必付於仁諸侯、 「本者,禄也。父母既没,必付於仁諸侯、 「本者,禄也。父母既没,必付於仁諸侯、 「本者,禄也。父母既没,必付於仁諸侯、 「本者,禄也。父母既没,必付於仁諸侯、 「本者,禄也。父母既没,必付於仁諸侯、 「本者,禄也。父母既没,必付於仁諸侯、 「本者,禄也。父母既没,必付於仁諸侯、 「本者,禄也。父母既没,必付於仁諸侯、 「本者,禄也。父母既没,必付於仁諸侯、 「本者,禄也。

大。父母全而生之,子全而歸之,可謂孝矣。一諸夫子曰:『天之所生,地之所養,無人爲問也,善如爾之問也! 吾聞諸曾子,曾子聞問也,善如爾之問也!」樂正子春曰:「善如爾之僧。門弟子曰:「夫子之足瘳矣,數月不出, 樂正子春下堂而傷其足,數月不出,猶有憂樂正子春下堂而傷其足,數月不出,猶有憂

罗高曾子之言,其義與《孝經》相爲表裏。
 高萬物之靈也。父母全而生之,子全而歸
 高萬物之靈也。父母全而生之,子全而歸
 高高,川行也。言悖而出者,亦悖而入,
 也。游,川行也。言悖而出者,亦悖而入,
 也。游,川行也。言悖而出者,亦悖而入,
 忠言不出於口,則忿言不反於身矣。○
 高高,川行也。言悖而出者,亦悖而入,
 忠言不出於口,則忿言不反於身矣。○
 忠言不此之。○
 忠言不此,明孝之道,而
 忠言不此,明孝之道,而
 忠言不以,以其全天地之心而
 忠言不以,以其全天地之心而
 忠言。○
 忠言不以,以其全天地之心而
 忠言。○
 忠言。○
 忠言不以,以其全天地之心而
 忠言。○
 忠言。○
 忠言不此,明孝之道,而
 忠言。○
 忠言不以,以其全天地之心而
 忠言。○
 忠言。○

夏、殷、周,天下之盛王也,未有遺年者。年齒,殷人貴富而尚齒,周人貴親而尚齒。虞、昔者有虞氏貴德而尚齒,夏后氏貴爵而尚

之貴乎天下久矣,次乎事親也

以 宗盟,異姓爲後」,《周禮》「王天揖同姓,時 以 弊,至於忘功,故殷人救之以貴富,貴富 無不尚齒者,言各於其所貴之中,而又皆 貴與尚,皆尊之也。 揖異姓,土揖庶姓」,周人之尚親者然 救之以貴爵,貴爵所以明貴賤也。 政異也。 方氏慤曰:「四代之所貴不同,由救弊之 人救之以貴親。」 明世禄也。 爲 尚 貴德之弊,至於忘君,故 也 三者之弊,至於忘親,故 愚謂:《左傳》曰「周之 四代之所貴不同,而 貴爵之 夏 后 也。 周 所 氏

席。八十不俟朝,君問則就之,而弟達乎朝是故朝廷同爵則尚齒。七十杖於朝,君問則

廷矣。《釋文》:「朝,直遥反。弟,音悌,後皆同。」

朝 朝。二 也。 鄭氏 就 爲之布席而使之坐焉,所以優禮之也。 凡朝、君既揖群臣、退適路寢聽政、卿大夫 席,八十不俟朝, 大夫在朝,皆待治事畢 之,則入至路寢之堂。 事,則《王制》云: 『七十不俟朝,八十杖於 許,異其禮而 亦就治朝左右而 是君不許致事者。 立於庭,不俟朝,君揖之即退,不待朝 則席,爲之布席於堂上而與之言。 其 謂 就之,就其家也。 (家而問之,彌優之也 曰:「同爵 不待朝事畢而先退 愚謂:席,謂席於路寢之堂 已。」 尚齒,老者在 治事。 君問則就之。 故七十杖於朝 孔氏曰:「此經所云」 若七十者 老而致仕,君 而後退。 君 有 君有 上也 疑,召 八十不俟 疑則使 1,則君 若許 7,君問 凡 或不 事畢 加 朝 君 也 卿 命 問 致 則 問

矣。《釋文》:「併,步頂反,徐扶頂反。辟,音避。」斑白者不以其任行乎道路,而弟達乎道路行,肩而不併,不錯則隨,見老者則車、徒辟,

擔持。 行。 代之也。」 者或乘車,或徒步,逢老者則辟之。 隨從而在後也。見老者則車、徒辟,謂 隨者,若兄黨則爲雁行之參錯,若父黨則 鄭氏曰:「錯,雁行也。 肩臂不得相併,則朋友肩隨是也。 而不併者,謂老少並行,少者差退在後。 斑白,髮雜色也。」 斑白者不以其任行乎道路,少者必 父黨隨行,兄黨 孔氏 曰:「行,肩 不錯 任,謂 少 則 雁

貧且無子孫,無棄忘也。一鄉者五州。巷鄭氏曰:「老窮不遺,以鄉人尊而長之,雖寡,而弟達乎州巷矣。《釋文》:「遺,本又作「匱」。」居鄉以齒,而老窮不遺,强不犯弱,衆不暴

猶間

也。一

音蒐。」〇今按:甸讀爲田。 達乎獀狩矣。《釋文》:「甸,田見反。獀,本又作「廋」,古之道,五十不爲甸徒,頒禽隆諸長者,而弟

長者,而多與之禽也 者,謂未五十而與於田役者,則計其 役也。頒,分也。 與追胥竭作。」五十不爲甸徒,免於竭 起徒役,毋過家一人,以其餘爲羨。 于社,宗則爲位」,是也。《小司徒》:「凡 有司而饁獸于郊」、《肆師》「凡師甸 甸讀爲田,《周禮· 隆,多也。 小宗伯》「若大甸 頒禽隆諸 則 唯 用 長 田 帥

狩,脩乎軍旅,衆以義死之而弗敢犯也。孝弟發諸朝廷,行乎道路,至乎州巷,放乎獀

吴氏澄曰:

「朝廷,政令所自

出,故先言

衆人以孝弟爲所宜行,故甯死而不敢犯不用衆於内,軍旅用衆於外。義,謂所宜行。一之。道路,民所行。州巷,民所居。獀狩

天下之大教也。《釋文》、「食,音嗣。更,古衡反。之養也。朝覲,所以教諸侯之臣也。五者,學,所以教諸侯之德也。耕藉,所以教諸侯更於大學,所以教諸侯之弟也。祀先賢於西東於大學,所以教諸侯之弟也。食三老、五老、不弟之事也。」

德也。 周氏諝曰:「先王之教也,豈必ぞ,尊而祀之於學,所以教諸侯使自勉於學,聲,當成均之法,有道者、有德者使教焉,樂》「掌成均之法,有道者、有德者使教焉,樂》「掌成均也。 光賢於西學,《周禮・大司學, 成均也。 光賢於西學,《周禮・大司本學,成均也。 光賢於西學,《周禮・大司本學,成均也。 光賢於明堂以配上帝也。 西

彼者,乃教之至也。」 諄諄然命之哉? 禮行於此,而人自得於

衆不暴寡,此由大學來者也。也。是故鄉里有齒,而老窮不遺,强不犯弱,饋,執爵而酳,冕而總干,所以教諸侯之弟食三老、五更於大學,天子袒而割牲,執醬而

學,故天下化之,而孝弟無所不達也。由大學來者,言由天子躬行尚齒之教於大

齒爲次序也。 居中,南面,謂之成均。齒,謂與學士以年庠在北,瞽宗在西,東序在東,而當代之學天子立四學,周制也。周立四代之學:虞

《釋文》:「守,手又反,本亦作「狩」。竟,居領反。」天子巡守,諸侯待于竟,天子先見百年者。

待于竟,天子未見諸侯而先見百年者,急百年者,齒之最尊者也。天子巡守,諸侯

天子設四學,當入學而大子齒。

於致敬而不敢稍緩也。

行者弗敢過,欲言政者,君就之可也。八十、九十者東行,西行者弗敢過,西行,東

弗敢 立以 親 皆駐立以待之而不敢過也。 行乎道路之中,若東行,則西行之人皆駐 八十、九十者,齒之尊次乎百年者也。 者,君就之」,謂已致仕者也 則就之」,謂不許致仕者也。 則車、徒辟」,謂辟之而旁行也。 此遇之而 就 待之而不敢過;若西行 其家也。 過,則不但辟之而已。 前云「八十不俟朝,有問 此云「欲言政 君就之,謂君 前言[見老者 ,則東行 之人 焉, 其

有七十者弗敢先。 壹命齒于鄉里,再命齒于族,三命不齒。族

祭正齒位禮言之也。天子下士一命,中士此《周禮•黨正職》之文,據天子之國,蜡壹命齒于鄉里,再命齒于族,三命而不齒,

悖者如 也。 不敢先,長 氏夢得曰:「三命不齒,貴貴 于先生、君子』,是老者明日乃入也。」 無七十者,故《鄉飲酒》『明日乃息司正,告 乃入也。 齒,席之於賓東。不敢先,謂既一人舉觶 深明七十者之尊也。 年齒也。弗敢先,不敢先之而人也。 序也。不齒,謂雖有同族之人,不與之計 里之人以年齒爲次序也 再 三命不齒者,天子之上士也。 正齒位」,故有七十者,若鄉飲酒之禮,則 三命之尊,然猶不敢先七十者而 族』爾。」 命,上士三命。 齒於族,謂與其同族之人以年 此。」 雖非族 人長也。 熊氏 此 心亦然。 7據《周 安生日: 先王之道,其並 齒於鄉 禮 承『齒乎族』,故言 里,謂 鄭氏曰: 族,同高 「《黨正》『飲 黨正 《鄉飲酒禮 也。 與其 入,所 七十者 》之文。 祖 行 쎯 「不復 雖有 而不 一之親 同 爲 葉 酒 鄉

據諸 皆不齒,不以命數爲限也。 或再命,或一命,而皆席於賓東,是卿 侯之國,故云「諸公大夫皆席 三等之國,卿 或三命,或再 《鄉飲酒》雖 命,大 於賓 大夫 據 夫

賓賢能之禮,其實《黨正》正 正》『正齒位』,三命乃不齒」,非 疏謂「列國鄉飲酒 ,卿大夫皆得不齒、《黨 齒位亦然。 也。正齒 孔

禮 位之禮,六十者坐,五十者立於堂下。 侯之黨正,士也。 「、黨正坐於堂上爲主人,而其卿再命,大 若子男之國正齒位 .諸 之

君必與之揖讓 七十者,不有大故不入朝。 而后及爵者。《釋文》:「朝,直 若有大故 而

夫一命,反位於堂下,可乎?

遥反。」

辭也 勞之也。 此謂致仕在家者也。 君既先揖之,則辭讓 ○自「有虞氏貴德而 大故,謂兵寇。 令退,不欲久 尚齒」至此 讓 猶

明弟長之義

父母,存諸長老。 卿大夫有善,薦於諸侯。 天子有善,讓德於天。 禄爵慶賞,成諸宗廟,所以 諸侯 士、庶人有善,本諸 有善 口, 歸 諸 天子。

示順也。《釋文》:「長,竹丈反。」 之。」 孔氏曰:「有善讓於尊上,以示敬 鄭氏曰:「薦,進也。 成諸宗廟,於宗 廟

命

順之道,不敢專也。」

抱龜南面,天子卷冕北面,雖有明知之心,必 昔者聖人建陰陽天地之情,立以爲《易》。 進斷其志焉,示不敢 人,過則稱己,教不伐,以尊賢 一卷,古本反。知,音智。斷,丁亂反。」 專,以尊天也。 也。 《釋文》: 善則稱 易

《周禮》卜有「三兆」,筮 謂吉凶之著見也。 建,立也。 《易》」而不言「兆」,下言「抱 天地言其體,陰陽言其 《易》,謂卜筮之書也。 有「三易」。 龜而 氣。 此言 情

牢》筮日,主人 而 謙讓之德也。 之尊天而言聖人之尊賢,皆所以教天下以 因舉卜筮一事以見聖人之尊天,又因聖人 者皆用其祭之服。此云「天子衮冕」,蓋十 端」、《少牢禮》筮 外」,則西面。 謂卜筮之官也。 二章之冕服也。 「卜日,主人北 蓍」,皆互相 推廣言之。 郊之禮與。 備 〇此上二節,又因弟長之意 此卜者南面,天子北面,蓋 《 特 面」,而卜者「席于闑 與筮者皆西面、《士喪禮》 也 按《士冠禮》、《特牲》、《少 此因上言天子讓善於天, 日,「朝服」,是卜筮祭 牲禮》「筮日,主人 易抱 龜 南 面 此 (西、 閾 「易」 日 玄

必温,身必詘,如語焉而未之然。宿者皆出,温,行必恐,如懼不及愛然。其奠之也,容貌物,以脩宫室,以治百事。及祭之日,顔色必孝子將祭祀,必有齊莊之心以慮事,以具服

陶 其 作「述」。」〇今按:陶,如字。 魚御反。 術省之,孝子之志也。 目不違心,思慮不違親。 遂遂,如將復 立. 卑 陶,音遥。 静 以 正 遂,本又作「燧」。思,息嗣反。 入然。 如 將 弗 《釋文》、「齊,側皆反。 是故慤善 見 結諸心,形諸色,而 然。 及 不違身,耳 祭之後 陶

宿之。 者,謂 之也。 致其送之之意也。 親往,故其立卑静以正,如將弗復見親,而 容貌必温,身必詘者,爲親之已饗,而若受 命於其前也。 之不果饗,而不及致其愛親之心也。 顔色必温者,爲親之將饗之,而和顔 語己而猶未語然。 初祭時也。奠之,謂奠置祭饌於神前也。 助祭之賓也。 宿者皆出,謂祭畢而出也。 行必恐,如懼 如語焉而未之然,如親之將 陶,如 此皆謂正祭時也。 助祭之賓,於祭前 不及愛然者,又恐親 「鬱陶」之陶。 祭畢 此謂 以 陶 宿 而 必 承

御公立於象魏之外」,立當遠火也。《春秋

至桓、僖二廟,廟邇公宫也。『季桓子至,

建國之神位,右社稷而左宗廟。

曰『出,及中門之外』,廟在中門内明矣。曰『公出送賓,及大門内』、《周官·司儀》稷,陰也,故居右。」 戴氏震曰:「《聘禮》陳氏祥道曰:「宗廟,陽也,故居左。社右,路門外之西。左,路門外之東也。

曉然可見矣。 門,皐門有伉。乃立應門,應門將將。 皐門,次作應門,次立社稷。 廟」,此章乃以自外及内之序言之;首作 將營宫室,宗廟爲先。 内明矣。」 門,雉門謂之闕門。 左右相對,天子在應門內,諸侯在雉門內, 立冢土,戎醜攸行。」冢土,大社也。 所在爲言,宜繫君臣日見之朝,社在 傳》曰『間于兩社,爲公室輔」,以朝廷 不出闕門者,得出祭門者也。《春秋左氏 祭門,諸母、兄弟不出闕門。」廟門謂之祭 穀梁傳》曰:『禮,送女,父不下堂,母不出 愚謂:《縣》之詩曰:「乃立 闕門在外,祭門在内。 此詩上章先言「作 社稷與宗廟 中門 君子 執 泉

禮記卷四十六終

《春秋》『桓宫、僖宫災,火自司鐸踰公宫』,

0

禮記卷四十七

賜 國 史 進 館集 士及第翰林院 脩 孫希 旦 編脩 集解

祭統第二十五《别録》屬《祭祀》。

祭有四時,皆以申首段未盡之義也。又次 以明《祭統》之義。次言祭有十倫,又次言 於祭末,次第言之,而皆歸本於心之自盡 統猶本也。 言鼎銘,又次言魯賜重祭,又因祭祀致敬 五段:首言祭禮之重,又自未祭之先以及 本則統於一心,故以《祭統》名篇。 祭有物有禮,有樂有時,而其 篇中凡

賢者之祭也,必受其福。非世所謂

福

也。

福

於祭。 也。 鄭氏曰:「禮有

《釋文》:「怵,敕律反。」〇鄭注:「怵,或作「述」。」 心怵而奉之以禮。是故唯賢者能盡祭之義。 夫祭者,非物自外至者也,自中出生於心也。 無思親之實心,則不足以盡 動於中,而後奉之以禮,此祭之義 之心應之。唯祭則不然,乃由思親之心先 昏、賓客之禮,皆先有其事於外,而後以我 謂心有感動也。」 陳氏澔曰:「怵,即前篇『必有怵惕之心』, 莫重於祭,以吉禮爲首也。」 五經,謂吉、凶、賓、軍、 愚謂: 物猶事也。 乎祭之義矣。 也。 冠、

之謂備,言内盡於己而外順

於道

也。

忠

臣

以

者,備也。

備者,百順之名也。

無所

不順者

凡治人之道,莫急於禮。

禮有五經,莫重

而

廣其義也。

矣。不求其爲,此孝子之心也。《釋文》:「長,竹道之以禮,安之以樂,參之以時,明薦之而已賢者之祭也,致其誠信與其忠敬,奉之以物,之謂備。唯賢者能備,能備然後能祭。是故

丈反。 道之,音導。 爲,于僞反。」

賢者之所謂福也。」 道 備者百順之謂而已。 謂 時 不 備 神,以事死言。 者,言忠孝俱由順出也。」 福 輔氏廣曰:「必受其福,以理必之,世所謂 物」至「參之以時」,所謂外順於道也。 -順也。 ,則仰不愧天,俯不怍人,心安體胖,是 ,則不可必也。 ,則以事鬼神,事君長,事其親,而無乎 鬼神之佑助。 謂 一歲四祭,不煩不怠也。 誠信忠敬,所謂「内盡於己」也。 孝於其親,以事生言。 名猶『名言』之名,猶言 蓋賢者之祭,有得福之 内盡於己,外順於 鄭氏曰:「其本 愚謂:順於 「奉之以 爲, 鬼 能

理,而無求福之心也。

道不逆於倫,是之謂畜。《釋文》:「養,羊尚反,下祭者,所以追養繼孝也。孝者,畜也。順於

同。畜,許六反。」

之謂。 孔氏曰:「親没而祭之,追生時之養,繼 不逆於倫者,得親之謂。顺於道者,順親 於倫,謂承順 道,謂立身行道,而能諭諸其親也。 時之孝也。畜,謂畜養。」 乎親,而於 倫 理 愚謂: 無 所 件也。 順 不逆 於 生

子之行也。《釋文》:「行,下孟反。」哀也,祭則觀其敬而時也。盡此三道者,孝則喪,喪畢則祭。養則觀其順也,喪則觀其是故孝子之事親也,有三道焉:生則養,没

時,舉「時」以見物與禮、樂也。誠、信與忠。 外盡於道,則有禮、樂、物、内盡於己,則有誠、信、忠、敬,舉「敬」以見

「取,七住反。」
邑,事宗廟、社稷。」此求助之本也。《釋文》:
夫人之辭曰:「請君之玉女,與寡人共有敝既內自盡,又外求助,昏禮是也。故國君取

矣。 也。 之異,草木之實,陰陽之物備矣。 生,地之所長,苟可薦者,莫不咸在,示盡物 官備則具備:水草之菹,陸産之醢,小物備 夫祭也者,必夫婦親之,所以備外内之官也。 取夫人之辭,謂納采之辭也。 玉女者,美言之。君子於玉比德焉。」 三牲之俎,八簋之實,美物備矣。 外則盡物,内則盡志,此祭之心 凡天之所 鄭氏 也。 昆 日 蟲

全也。簋盛黍、稷。祭用八簋,天子之禮也。昆蟲之異,若《醢人》「蚳醢」「廳」之物」「榛」、「奧」之屬也。祭祀之具,莫非陰陽「榛」、「奧」之屬也。祭祀之具,莫非陰陽「榛」、「奧」之屬也。祭祀之具,莫非陰陽之氣所生,獨於昆蟲、草木三具,莫非陰陽之氣所生,獨於昆蟲、草木三具,是一種之人。簋盛黍、稷。祭用八簋,天子之禮之以物」

也。

「粢」。」 此祭之道也。 之謂盡,盡之謂敬,敬盡 郊以共純 咨。純,側其反,下「純冕」亦同。」○鄭注:「齊,或 也,王后、夫人非莫蠶也,身致其誠信。 人蠶於北郊以共冕服。 是故天子親耕於南郊以共齊盛,王后蠶於北 服。 《釋文》:「齊,本亦作「叠」,與粢同,音 諸侯耕於東郊亦以共齊盛,夫 天子、諸侯非莫耕 然後可以 事 神 誠信 明。

此及下節,皆承《内則》「盡志」而言。 鄭

謂之小物者,以其莝之以爲醢,非體骨之

禮

醢

人》「茆菹」「芹菹」之屬。

陸産之

夫人薦籩、豆之屬

也。

水草之菹,若《周

官猶職也。

具,祭饌也。

具備,謂君割

牲,

醢

,若《醢

人》「鹿臡」「麋臡」之屬。

陸産亦

也。夫人不蠶於西郊,婦人禮少變也。」見繒色,冕以著祭服。東郊,少陽,諸侯象氏曰:「純服,亦冕服也,互言之爾。純以

恭敬也 其 志 無止 齊以致齊者也。是故君子非有大事也,非有 及時將祭,君子乃齊。 明之德也。 耳不聽樂。 後可以交於神明也。《釋文》:「齊也、齊不齊、以致 齊之。定之之謂齊。 動,必依於禮。 齊、以齊之,並如字,餘側皆反。」 也。 也。 ,則不齊。不齊則於物無防也,耆欲 及其將齊也,防其邪物,訖其耆欲 心不苟慮,必依於道。 故《記》曰「齊者不樂」,言不敢 故散齊七日以定之,致齊三日 是故君子之齊也,專致其精 齊者,精明之至也,然 齊之爲言齊也,齊不 手足不苟 以 散

祀而致其恭敬者,如齊戒以見君是也。物事也。恭敬,則以其心言之,蓋亦有非祭齊之爲言齊,言齊一也。大事,謂祭祀之

之類。 正。 止也。 自外至,故曰「防」。 申言「致齊以齊之」也。 齊,申言「散齊以定之」。 慮、苟動,特於齊尤致其慎爾。 不當飲、不當食、雖謂之邪物 防其邪 訖其耆欲,謂不御也。 酒與葷不可謂之邪物,然於齊時 物者,謂若不 耆欲 齊者精明之至, 自内 飲 可也。 君子未嘗苟 、酒、不 定之之謂 出 訖 故 茹 亦 則 日

亞裸。 夫人薦 宗婦執盎從,夫人薦涚水。 副褘立於東房。 於内,然後會於大廟。 齊七日,致齊三日。 是故先期旬有一日,宫宰宿夫人,夫人亦 才用反。 「先,悉薦反,又如字。 及迎牲,君執約 涚,舒鋭反。 豆豆 此之謂「夫 君執圭瓚裸尸,大宗執璋瓚 大廟,音泰,下同。紖,以忍反。從, 嚌,本亦作「齊」,才細反。」○鄭注: 君致齊於外,夫人致 '卿大夫從,士執芻, 君純冕立於阼,夫人 婦 君執鸞刀,羞嚌, 親之」。 《釋文》: 散

24

「芻,或爲「穪」。」

供告殺 伯攝 寢。 祭日 重也。」 之,故士執之以從也。 故 入即 也。 有 鄭 大宗,大宗伯也。半圭 夫人亞君 七日,致齊三日也。《周禮 大宗執 前 執網 氏 期 ,故云「十日」,此兼數祭日,故云「旬 而 位 純冕,純 内,夫人之正寢也。 日也。 日 Ŧ 裸 時 也。 白 璋瓚亞裸」者,容夫人有故,則宗 獻 卿 丽 愚謂 也。 宿 帥 裸 大夫從者,或驅牲 也。 芻, 讀 衣而 宫宰,内宰也。 ,此既 執 瓚, 爲肅 藁也 先期 紖,牛鼻繩。 事 冕 裸 前 服 云「夫人副 器 旬 肅 **卜日,遂戒。**」彼不數 宗婦 一曰璋。 也。 殺 有 猶 大廟,大祖之廟 以 牲 戒 ,同宗之婦也 圭 大宰職》: 立 日者 則 也 , 或 外,君之正 諸侯祭禮 璋 君親 一於阼 以 褘」,又云 爲 1,容散 執 戒 芻 之柄。 、幣,以 牽性, ··, 謂 輕 藁 藉 初 齊 肅

> 嚌也。 舉肺 婦實盎 也。 及佐食皆主婦自洗、酌於房中,夫人則宗 贊、《少牢禮》雖有「婦贊者受爵」,然獻 之」,是也。 與佐食之爵,以從夫人。 與佐 宗婦執盎從者,謂於夫人獻尸之時,宗婦 水, 涚 執盎以從之也。 盎 王 酌。 一, 盎 |后以樂羞齍,則贊,凡王后之獻 因 及牲體、皆「振祭、嚌之」,故謂 嚌,謂俎 食,故夫人 明 齊也 於爵 水,明 此一 水 配 節申言「道之以禮」也 《特牲禮》主 以從,尊卑之禮異也。 實 薦 水 齊 也。 執 主人與主婦獻尸,併獻 而 也。 獻 盎 設,故并言「涚水」也 也。 《特牲》、《少牢禮》尸 齊獻尸,宗婦執獻 獻 戸用 涚即 《周禮 婦獻尸,宗 盎 齊 也 而 外宗 俎 不 羞,進 盎 婦 亦 實 用 齊 職》 爲 祝 不 如 祝 祝 明 Е

總干,率其群臣以樂皇尸。是故天子之祭及人舞,君執干戚就舞位。君爲東上,冕而

之之義也。《釋文》:「樂,並音洛。竟,音境,篇内冕而總干,率其群臣以樂皇尸,此與竟内樂也,與天下樂之,諸侯之祭也,與竟內樂之。

皆同。」 重也。 鄭氏 也。 戚就 也。 之,得一國之歡心以 得萬國之歡心以事其先王也。 朱干玉戚,以舞《大武》,此天子之禮,兼云 申言「安之以樂」也。 「諸侯」者,據魯禮言之也。 舞有文、武,獨言「干戚」者,以武舞爲 舞位,所謂「朱干玉戚,以舞《大武》」 言『君尸』者,尊之。」 曰:「君爲東上,近主位 冕而總干,象武王之總干山立也。 事其先君也。此一節 愚謂: 與天下樂之, 也。 與竟内樂 君執干 皇,君

道者,所以假於外而以增君子之志也。故與升歌,舞莫重於《武宿夜》。此周道也。凡三夫祭有三重焉: 獻之屬莫重於祼,聲莫重於

禮,以奉三重而 之祭也,必身自盡也,所以明重也。 志進退: 而 ·釋文》:「獻之屬,一本無「之屬」二字。」 求外之重也 志輕則亦輕,志重 ,雖聖人弗能 薦諸皇尸,此聖人之道也。 訶 得 流重。 也 是故君子 輕其志 道之以

之義也。 《武宿夜》爲重。 敬」也。有誠信、忠敬之志,則能自盡矣。 管、間歌,而升歌爲重。 也。 此一節,又因祭之用禮樂,而歸本於自盡 九獻,侯伯七,子男五,而裸爲重。聲有下 謂之《武宿夜》,象武王之師次孟津 升歌,謂升歌《清廟》也。《大武》之第一成 宿夜》者,舞之始。天子祭禮十二獻,上公 裸者,獻之始。 志,即上所謂「誠信」「忠 升歌者,聲之始。 《武》有六成,而 而宿 《武

故古之人有言曰「善終者如始」,餕其是已。夫祭有餕,餕者,祭之末也,不可不知也。是

三五五

也。 以出 反。 廟中 是故 而 君起,大夫六人餕,臣餕君之餘也。 也,可以觀政矣。 《釋文》: 將至也,由餕見之矣,故曰「可以觀政矣」。 故上有大澤,則民夫人待于下流,知惠之必 先下後耳,非 大者也。 士八人餕,賤餕貴之餘也。 士起,各執其具 興施惠之象也。 脩,一本作「徧」。 也。 凡餕之道,每變以衆,所以别貴賤 ,陳于堂下,百官進,徹之,下**餕上之餘** 古之君子曰「尸亦餕鬼神之餘」也, 「百官進、依注作「餕」。 是故上有大澤,則惠必及下,顧上 廟中者,竟内之象也。 上積重而下有凍餒之民 重,直龍反。見之,如字。」 是故尸謖,君與卿 是故以四簋黍,見其脩於 别,彼列反。 祭者,澤之 見其 大夫起 四 也。 之等 惠 賢遍 餕 是 術

食,尸

乃食之,故曰「尸亦

餕

鬼神之

祭之餕,以上之所食者逮及於下,此

曰餕。

鬼神享氣,朝踐時先薦

腥

爓

士進 遂徹之也。 簋、鉶以出於室也。 觀政 稷之器也。《特牲禮》二敦,以一敦餕,留 之别,而又以象其惠之漸廣也。 於廟者也。進當作「餕」。 執其具以 非有事於廟中者不得餕可見矣。 長兄弟爲下養、《少牢禮》以二佐食養,則 世子者之禮與。 受爵,則以上嗣。」此君自與卿餕,蓋未立 \equiv 施 人餕者,皆有事於廟中者也。 敦爲陽厭。 敦爲陽厭、《少牢禮》四敦,以二敦餕 卿 惠之道也。 一 敦黍於上佐食,又進一敦黍於下佐 也。 也。 《文 王 謖, 出者,士既餕畢,各執其所餕之 餕之道每變以 起 爲政 又《少牢禮》二佐食養, 也。 一世子》曰:「其登、餕、獻、 大夫、士衆多,其六人、八 在於施惠 君與 百官,謂餘士之無 **餕徹**,言既餕 卿四人餕,君與 衆,既以 ,故於餕 《特牲禮》以 簋 士起,各 ,盛黍、 、 爲 可以 司 錭 而 事

惠徧於廟中,猶君之惠徧於竟内也。 思徧於廟中,猶君之惠徧於竟内也。 為八簋,若《特牲禮》佐食分簋、鉶之爲也。 為八簋,此得有四簋黍者,蓋别用一簋分樓三簋,此得有四簋黍者,蓋别用一簋分食,則是餕皆以黍矣。蓋尸食黍而不食

必由 人,行諸已,非教之道也。 則不以使下。所惡於下,則不以事上。非諸 故君子之事君也,必身行之: 所不安於上, 子孫順 明君在上,則諸臣服從,崇祀宗廟、社稷,則 之以尊其君長,内則教之以孝於其親。 也,其教之本與? 夫祭之爲物大矣,其興物備矣。順以 祭者,教之本也已。」《釋文》:「長,竹丈反。惡,烏 其本,順之至也,祭其是 孝。 盡其道,端其義,而教生焉。 是故君子之教也,外則教 是故君子之教也, 與。 故曰: 是故 備者 是

> 言。 以下,皆以明設教之必本於身也 教之以孝於其親,則子孫順孝。「盡其道 其親也。教之以尊其君長,則諸臣服從。 民尊其君長也。 者,乃其本也。 爲物,猶爲禮也。 人君教民之事 祭祀事尸如事君,所以教 追養繼孝,所以教民孝於 備 非 以 一, 而 物言, 盡 順 禮 兼 於祭祀 心 與 褿

此之謂十倫。《釋文》:「見,並賢徧反。殺,色界反。」事之均焉,見長幼之序焉,見上下之際焉。之殺焉,見爵賞之施焉,見夫婦之别焉,見政義焉,見父子之倫焉,見貴賤之等焉,見親疏夫祭有十倫焉:見事鬼神之道焉,見君臣之

倫,謂義,禮之次序也。

祊,此交神明之道也。《釋文》:「爲,于僞反。」鋪筵,設同几,爲依神也。 詔祝於室而出于

鋪筵,設同几,謂祭以某妃配,而同鋪一

之非一 也。 道 事之有定所。 精 依神者異於生人也。 筵大,几同 筵 毛韶於室」。 同 也 氣 合 蓋生時形體異,故男女别筵,死 設 處。 ,故男女同 則 几 此二者,皆所以交神明之 筵 出于祊,所謂「爲祊於外」 死則不知神之所在,故求 也 可 几。 知。 特言「同 韶祝於室,所謂 生人有象可接,故 爲依神者,言所 .几」者,几 血血 , 時 以 小

於臣 君,入廟門則全於臣,全於子。 君迎牲而不迎尸,别嫌也。 臣之義 ,在廟中則全於君。 也。 君在 尸在廟門外 廟門外則疑於 故不出者,明 則 疑

君

臣 鄭氏曰:「不迎尸者,欲全其尊也。 也。 .則 ,故不出者,所以全君之尊,而君臣之義 伸。」 鬼神之尊在 愚 謂 君出 廟中,人君之尊, 迎尸,則君 尸,神 屈 出 於 廟

> 所 以 明 也

孟反。」 也。 子行也。 夫祭之道,孫爲王父尸,所使爲尸者,於祭者 此父子之倫 父北面而事之,所以明子事父之道 也。《釋文》:「行,戶剛反,徐胡

大夫。 尸 齒,明尊卑之等也 飲五,君洗玉爵獻卿。 也。 時尸在堂上南面,主人北 故尸於主祭者爲子行,主祭者於尸爲諸父 之,以其昭穆同也。此據祭考廟而言之, 尸用所祭者之孫,無孫則取族中孫行者爲 北 尸飲九,以散爵獻 面 而事之者,天子、諸侯之禮,朝踐 尸 士及群有司 面而事之也。 ,飲七,以瑶爵 皆以 獻

獻尸而爵止,君乃以玉爵獻 蓋凡《禮記》言諸侯之祭,多據魯禮,此謂 上公九獻者也。 一,至饋 食,主人獻 尸 飲 尸 丽 五. |者,裸獻 爲 五. 卿。 也。 玉爵 二,朝 夫人 又 獻 獻

夫、士不

同

時

者

,人君之臣尊卑

殊

其

皆以

、齒,同

爵

則

尚

盎

也。

《特性

一禮》賓

長

以

同

以

 \equiv

獻

爵

止

後獻之,此

獻

卿、大

獻

士

之有

事

於廟者

也。

群

有司,衆

士也。

以

散爵獻

士,亦用

獻尸

之爵

也。

獻

士,謂

散、

明堂位》曰「加以璧散、璧角」是

也。

也。

五

升

曰

散,以

璧飾之。

爲

加

爵者用璧

尸

作

止爵飲之,賓長又酳尸而

爲九也。

既

爵

獻大

夫,亦因

酳尸之爵也。

尸飲

九者,

以瑶

則

長

兄弟爲加爵而爵止,君乃以散爵獻

士

此篇 禮 尸 禮 前 故 也。一 獻之後與。 五 獻 尸 尊 也 作 也。 卿 而 飲五。」蓋 》賓長獻尸爵止,而主人、主婦致 ,而二裸尸 者先獻之、卑者後獻之、是明尊 獻 用 鄭氏 戸飲 止 疏 ○《周 賓 玉爵 人君獻尸用玉爵,酳尸用瑶爵 爵 謂 ,則致爵當在其前,其於主人 飲 :「此據九獻之禮,主人 注云:「尸 **T**i. 禮 畢 注 ,因獻尸之爵,此必在酳尸之 獻 亦卒爵,益 疏 司 而主人 卿, 之説,皆謂 尊 飲 | 彝 | 疏 爲 人獻賓。 酳 五 可見矣。 , 謂 尸三獻 謂「此據 二裸尸不 **育**尸 此於尸飲 が育 卑之等 《 特 之 Ŧī. 侯伯 尸 後 爵 , 此 付饋 牲 · 飲 爲 獻

職》曰

「后之裸、獻,則贊,瑶爵亦如之。」

, 所用·

之爵,以瑶

爲

飾

者。

 \sim

周

禮

内

室

因

獻

尸之爵

也

尸

飲

七者

, 作

止

爵

及

൬

爵

止

一,君乃以瑶爵獻大夫也。瑶爵,酳

畢

君醑

尸而爲七也。

既則夫人又酳

P

尸

, 所

用之爵,以

玉爲飾者。

以

玉

爵

獻

卿,

鄭氏云「瑶爵、后酳尸之爵」,是也。

之殺也 則 幼、親疏 夫祭有昭 群昭、 群 之序 穆。 穆咸在 圃 昭穆者 無 而 亂 不失其倫。 也 ,所以别父子、遠近、長 是故 有事 此之謂親 於大 朝, 疏

三九

可得 昭、群穆 人衆之多,而其父子、遠近、長幼、親疏皆 中,昭爲一 始祖爲大廟。 來耳。」 世爲穆 而 群穆,謂子孫之昭穆也。 序也。 咸在,若餘 ,而子孫亦以爲稱。 列,穆爲一列,雖 自此以下,每一 孔氏曰:「祭大 廟,唯所出之子 ·其世數之久, 其在大廟之 世爲昭,每 宗廟之禮 廟 則 孫 群

之,再拜稽首,受書以歸 **阼階之南,南鄉,所命北面,史由君右執策命** 廟,示不敢專也。 古者明君 爵賞之施也。《釋文》:「鄉,許亮反。 爵 有德 故祭之日, 丽 禄 有功, ,而舍奠于其廟 必賜 一獻,君 舍,依注音釋。」 爵禄 降 立 於大 此 于

以行爵賞也。若天子命群臣,則不因常祭神,未暇策命。至尸食已畢,祭事方了,可孔氏曰:「酳尸之前,皆爲祭事,承奉鬼鄭氏曰:「一獻,一酳尸也。舍當爲『釋』。」

命也。」 大功若召穆公者,則不待祭時 卿大夫,蓋亦因祭時 詔辭自右也。策,所以書命辭者也。王於 既受策書,歸而釋奠於家 前,南鄉」,是也。 侯則儐」,注云『王將出命,假祖 之日,特假於廟。 愚謂:史,内史也。 故《大宗伯》云『王命諸 舍奠于其 命之,其命諸侯 廟,告以受君之 廟 與 由君右者 者,卿 「廟,立 公及有 大夫 一依

獻尸,此人執醴以授夫人,至夫人薦豆,又也。」 孔氏曰:「執醴授之執鐙者,夫人鄭氏曰:「校,豆中央直者也。鐙,豆下跗

凡爲

俎

者,以骨爲

骨有貴賤。

殷人貴

酢之易爵,皆以明男女之别也 與夫人所立之異所,執器之異處,主人自 尸受夫人亦執柄矣。 執柄,夫人受尸執足,則夫人獻尸亦執足, 授之者,皆與大夫、士禮異矣。 執鐙」,是夫人獻尸不親酌,其薦豆又有 自東房,亦無贊授之者。 禮》主人、主婦獻尸,皆親洗、酌,主婦薦 不承婦人爵也。」」 主婦,更爵自酢。 不相因故處也。 不相襲處 醴之人授夫人以 執 爵尾,夫人受尸執爵足也。 校也。爵爲雀形,以尾爲柄。 豆 以 授 ,謂夫婦交相致爵之時,其執之 夫 人。 酢必易爵,謂主人致爵於 豆 獻 鄭注《特牲》云:『男子 ,執鐙,夫人受之乃執 與薦皆此 愚謂:《特牲》、《少牢 夫婦,猶言男女。君 此云「執醴授之 夫婦相授受, 尸酢夫人執 人所 尸酢夫人 掌。 攢 豆 執

焉。」《釋文》:「髀,必氏反,又必履反。 重,直龍反。」 也。 骨。貴者不重,賤者不虚,示均也。 立者,不可不知 政行,政行則事成,事成則功立。功之所以 祭之必有惠也。 髀,周人貴肩。 善爲政者如此,故曰:「見政事之均 也。 凡前貴於後。 是故貴者取貴骨,賤者 俎者, 所 以明惠之必 俎者, 惠 所 均 以 取 均 則 賤 明

爲尸 肫、骼也。 脊三:正脊、脡脊、横脊也。 **胉各三:代脅、長脅、短脅也。 其右胖** 主人以下及助祭者之俎也。凡牲之體骨, 臑之屬。」 鄭氏曰:「殷人貴髀,爲其厚也。 兩肱各三:肩、臂、臑也。 前貴於後,據周言之。」 肩之薄。 肩,爲其顯也。 俎,其左胖以爲主人、主婦及助祭者 周文,貴肩之顯,賤髀之隱。 孔氏曰:「殷質,貴髀之厚,賤 凡前貴於後,謂脊、脅、臂、 兩股各三:髀、 愚謂:爲俎,謂 周人貴 凡 以 兩

之俎。 賤次第用之也。 骨,賤者取賤骨,言自主人以下之俎,以貴 見政事之均焉。 徧,必由於政事之均乎,故於爲俎而 各有所取 人貴前,而 殷 ,則惠 人 肩 負 則 、後,而髀則後體之上者。 無不均矣。 然骨雖有貴賤,而未嘗不 前體之上者。 人君欲恩 貴者取 可以 惠 周 貴 周

協。 凡賜爵,昭爲一,穆爲一,昭與昭齒,穆與穆 卿 賜 第獻之也 昭爲一列,穆爲一列,而以年齒爲序。 士」,是也。其士之無事於廟者,同姓則使 姓則雖不 云「玉爵獻卿」,「瑶爵獻大夫」,「散 大夫及士之有事於廟者、皆别獻之、前 爵,謂獻之也。 凡群有司皆以齒。 、飲九」,「獻群有司皆以齒」,是也。但 序昭穆 此 獻 而 昭 群有司,謂異姓之士也。 穆及 亦以齒爲序,而皆次 此之謂長幼 群有司,即上 有序。 爵 云 異 獻

别長幼,義各有所主也。賤,此則就同於爲士之中而序其齒,所以上則通卿、大夫、士而等其位,所以明貴

之。 民無凍餒者矣。此之謂上下之際。《釋文》: 賤,而以其餘畀之,是故明君在上,則竟内之 也。尸又至尊,以至尊既祭之末而不忘 古者不使刑人守門。 翟者,樂吏之賤者也。 煇者,甲吏之賤者也。 德之君爲能行此。明足以見之,仁足以與 夫祭有畀煇、胞、翟、閻者,惠下之道也,唯有 **煇,依注作『韗』,況萬反,又音運。胞,步交反。**」 畀之爲言與也,能以 此四守者, 吏之至賤者 閽者,守門之賤者也。 胞者,肉吏之賤者也。 其餘畀其下者也。 至

官也。翟,謂教羽舞者也。古者不使刑人者也。煇、《周禮》作『韗』,謂韗磔皮革之見之,見此畀者也。仁足以與之,與此畀畀,謂頒胙及之也。 鄭氏曰:「明足以

申「道之以禮」之義也。 中「道之以禮」之義也。 中「道之以禮」之義也。 中「道之以禮」之義也。 中「道之以禮」之義也。 是,然後見惠下也。此政事之均,與上下 是,然後見惠下也。此政事之均,與上下

也。 嘗,冬祭曰烝。礿、禘,陽義也。嘗、烝,陰義 陰 服,順陽羲也。於嘗也,出田邑,發秋政,順 凡祭有四時:春祭曰礿,夏祭曰禘,秋祭 也。」草艾則墨,未 曰:「莫重於禘、嘗。」古者於禘也,發爵 《釋文》:「礿,羊灼反,字又作『禴』。 艾,音刈。」 義也。 禘者,陽之盛也。 故記 曰:「嘗之日,發公室,示賞 發秋政,則民弗敢草也。 嘗者,陰之盛也。 故 賜 曰

鄭氏曰:「莫重於禘、當者,夏時尊卑著,

則民弗敢艾草也。 發秋政矣,故其時可以艾草。 輕者始,象天道之殺物有漸也。 之時也。墨,五刑之輕者。每歲行刑,自 賜也。草艾,謂季秋草木黄落,伐薪爲 殺之政也。發公室,謂發公室之貨財以賞 大禘,因夏禘行之,諸侯之大祫,因秋嘗行 改,故《春秋》魯有禘祭,而晉人亦曰「寡君 之: 春曰祠,夏曰禴。而諸侯之祭其名不 謂: 而秋萬物成。爵命屬陽,國邑屬陰。J 故車服屬夏,田邑屬秋。」 之,故記者因以禘、嘗爲重也。 之未禘祀」,是也。莫重於禘、嘗者,魯之 天子别有大禘之祭,故周改春夏祭名以避 賞以春夏,刑以秋冬。」其實四時皆有賞 礿、禘、嘗、烝,夏、殷四 孔氏曰:《左傳》云: 時之祭名也。 未發秋政, 秋政,謂 行墨刑則 愚 刑

故曰:「禘、嘗之義大矣,治國之本也,不可

明 不 其 知 所當然也 明其義者,知其所以然。 義,君人不全。不能其事,爲臣不全。」 也。 明 其義者君也 ,能其事者臣也。 能其事者,循其 不

夫義 故也 德盛 使之必敬也 可 是故君子之祭也,必身親涖之,有故則使人 其祭也敬,祭敬則竟内之子孫莫敢不敬 民 也 父母矣? 者其志厚,其志 者,所以濟志 其德薄者其志輕,疑於其 雖 使 人也,君不失其義者,君明其義 弗可得已。 也,諸德之發也。 厚者其義章,其義章者 祭而不敬,何以 養 圃 是故 求 祭, 矣。 爲 其

者不能 濟,成也。 也 然後志重,故義者所以濟志也。 可 以 爲 民父母。 而 明,故明於其義,乃諸德之所 不敬 志,即「 則 〇此上三節,申 與 無 志 以 進 爲 立教之本,故 退」之志。 義非 前「參之 後見 見 有 義 明 德

> 惡。此孝子孝孫之心也,唯賢者能之。 之美,而明著之後世者也。 夫鼎有銘,銘者,自名也,自名以稱揚其 有美焉,莫不有惡焉。 以 時」之義,而又歸本於志也 銘之義 爲先祖者, 稱 美而 莫不 不稱 先

袓

賞、聲名列於天下,而酌之祭器,自成其名 也。 焉,以祀其 文》:「譔,音撰。 銘者,論譔其先祖之有德善、功烈、勳勞、慶 鄭氏曰:「銘,謂書之刻之以識 自名,謂稱揚其先祖之德,著己名於下。 身比 2焉,順 先 比,毗志反。」 祖 者 也。 也。 明 顯 示後 揚先祖 世,教 一, 所 事者 也。 以 也。 **《釋**

鄭氏 勞。 也。 後 稱 揚 世 身比] 也。」 년 : 先 酌之祭器,言斟酌 祖 焉,謂自著名於下也。 之德,孝順之行也。 「烈,業也 王 其美 功 曰 傳 勳 教,所以教 著於 自著名 事 鐘 功 以 鼎 日

文》、「知、音智。見、賢遍反。」〇今按、見,如字。 之,可謂賢矣。賢而勿伐,可謂恭矣。《釋之者,明足以見之,仁足以與之,知足以利之觀於銘也,既美其所稱,又美其所爲。爲夫銘者,壹稱而上下皆得焉耳矣。是故君子

所爲,美其子孫能稱其先祖之美也。美其所稱,美其先祖有可稱之美也。美其祖。」 愚謂:上,謂先祖。下,謂己身。與其先祖之銘也。利之,利己名得比於先與其先祖之銘也。利之,利己名得比於先

又,又如字。難,乃旦反。奔,本又作『犇』。射,音亦。」無射。《釋文》:「悝,孔回反。假,加百反。左右,音佐公乃命莊叔隨難于漢陽,即宫于宗周,奔走故衛孔悝之鼎銘曰:「六月丁亥,公假于大故衛孔悝之鼎銘曰:「六月丁亥,公假于大

聵也。德孔悝之立己,依禮褒之。假,至鄭氏曰:「孔悝,衛大夫也。公,衛莊公蒯

也。 五年冬,蒯聵得國,十六年六月,飲孔 之深室也。射,厭也,言莊叔奔走勞苦而 國,坐殺弟叔武,晉人執而歸之於京師,寘 焉。漢,楚之川也。 者,成公爲晉文公所伐,出奔楚,命莊 酒而逐之。 不厭倦也。」 乃猶女也。莊叔,悝七世祖孔達也。 『叔舅』者,公爲策書,尊呼孔悝而命之也。 至於大廟,謂以夏之孟夏禘祭。 此得六月命之者,蓋命後即 孔氏曰:「按《左傳》哀公十 即宫于宗周,後反得 公曰 隨難 叔 涿 悝

啟右獻公,獻公乃命成叔纂乃祖服。之。 孔悝是異姓大夫,故稱叔舅。」

公反國,命成子繼莊叔之事,欲其忠如孔孫成子烝鉏也。纂,繼也。服,事也。獻世,啟右獻公,使得反國也。成叔,莊叔之失國得反。右,助也。言莊叔之功流於後與民曰:「獻公,衛侯衎,成公曾孫也,亦鄭氏曰:「獻公,衛侯衎,成公曾孫也,亦

達也。」

《釋文》:「耆,市志反。解,古賣反。」其勤公家,夙夜不解。民咸曰:「休哉!」」乃考文叔,興舊耆欲,作率慶士,躬恤衛國。

通,故『慶雲』亦言『卿雲』。」
「曹之也。慶士,鄉士也。古『卿』『慶』字所存,言其先世之忠皆以愛君憂國爲耆所存,言其先世之忠皆以愛君憂國爲耆所存,言其先世之忠皆以愛君憂國爲耆卿氏曰:「文叔者,成叔之曾孫文子圉,即

鼎。』」此衛孔悝之鼎銘也。 首曰:『對揚以辟之。勤大命,施于烝彝公曰:『叔舅,予女銘,若纂乃考服。』悝拜稽

功以褒美之,而因以勉其後也。對,答。公、莊公皆失國得反,故莊公稱悝先世之器,女當繼乃考文叔之事也。蓋成公、獻若、乃,皆女也。言予命女以此辭銘著於

鼎也。 君也。 秋,避天子也。 之大常,祭于大烝」,是也。 殷勤尊大之命也。 揚,舉也。 子大袷以冬,《司勳》「凡有功者,銘書于王 彝鼎,法度之鼎也。 命,己當對答稱揚,用以施於烝祭法度之 獨言「烝」者,大夫干給在冬與。天 以,用也。 大夫干袷以冬,又避其 烝,冬祭也。 言君有此殷勤尊大之 辟,君 也。 諸侯大祫 彝,法也。 勤 以

也。 守宗廟、社稷者,其先祖 者也,以比其身,以重其國家如此。子孫之 也。此三者,君子之所耻 古之君子,論譔其先祖之美,而明著之後 有善而弗知,不明 也 也。 無 美 知 圃 而 弗傳,不仁 稱之,是 世

也,故廣而言之。然孔悝之事本無足道,言祭祀致敬,而稱揚先祖,亦敬親之一端自「夫鼎有銘」至此,明鼎銘之義。因上文

記者亦節取之耳。

又以重其國也。 世者周公旦有勳勞於天下,周公既没,成王、 世《象》,朱干玉戚以舞《大武》,八佾以舞《大 管、稀是也。夫大嘗、禘,升歌《清廟》,下而 管、參》,朱干玉戚以舞《大武》,八佾以舞《大 以重祭。外祭則郊、社是也,内祭則大 以重祭。外祭則郊、社是也,内祭則大 以重其國也。

以後之僭禮,而託言出於王賜耳。記之所以後之僭禮,而託言出於王賜耳。記之所以列,互言之耳。康,猶褒大也。」 愚謂:大嘗,大給也。諸侯皆得社與大給,謂:大嘗,大給也。諸侯皆得社與大給,情,列生言之耳。康,猶褒大也。」 愚怖而并言「嘗」耳。然魯之郊、禘,本惠公鄰氏曰:「言此者,王室所銘,若周公之鄭氏曰:「言此者,王室所銘,若周公之

餘説已見《文王世子》及《明堂位》。言,則因魯之所自託者而遂傳以爲實也。

禮記四十七終

禮記卷四十八

國史館纂脩孫希旦集解賜進士及第翰林院編脩

經解第二十六《别録》屬《通論》。

此篇凡爲三段:首論六經教人之得失,次 言天子之德,終言禮之正國。其義各不相 學校以《詩》、《書》、《禮》、《樂》爲四術。 學世大夫多能言其義者。《春秋》者,列國 學士大夫多能言其義者。《春秋》者,列國 學士大夫多能言其義者。《春秋》者,列國

> 子之所删定者,名之爲經,因謂孔子所語 易》,删《詩》、《書》,定《禮》、《樂》,脩《春 胄之貴或亦莫得而盡見也。 《春秋》亦先王之所以教人者也。 善而 六者之教爲《經解》爾。 未有經之名。孔子没後,七十子之徒尊孔 秋》,因舉六者而言其教之得失,然其時猶 高者不足以語此。《春秋》藏於史官,非世 盡人皆教,而《易》則義理精微,非天資之 於申叔時,叔時曰『教之《春秋》,而爲之聳 抑惡焉,以 戒勸其心』。 孔氏贊《周 是《易》與 蓋四術

奢、《易》之失賊、《禮》之失煩、《春秋》之失也。故《詩》之失愚、《書》之失誣、《樂》之失恭、儉莊敬、《禮》教也。屬辭比事、《春秋》教恭。故《詩》之失愚、《書》教也。蔣静精微、《易》教也。孫與其數可知也:其爲人也,

亂。《釋文》:「易良,以豉反。屬,音燭。比,毗志反。」

之事而 蔽於温 於疏 日 故 情之無不 也 通 温 貶,故至於亂。 謂害於正 静精微 安,故至於煩。 廣博易良 ·精微。 達 繋月,以事繋日也。比事者,比次列國 柔 於 通知遠 以 廣博,言其理之無不包。 ||柔敦厚| 辭 而 政 書之也。 順。 理也。 屬辭者,連屬其辭,以月繫年, 而 事。 入於隱怪,故失之賊。 氣言,敦厚 圃 不 而 洗心藏密故絜静,探賾索隱 知 不 知遠,言能 蔽於屬 失,謂 所 知闕疑,故至於誣。蔽於 蔽於恭儉莊敬 不知通變,故至於愚。 反,故至於奢。 以性: 不善學者之失也。 辭比事而 情言。 遠 知帝王之 易良,言其 賊 而 疏 妄爲 失其所 害也 蔽於絜 通 言,謂 事 褒 蔽 以

也。疏通知遠而不誣,則深於《書》者也。廣其爲人也,温柔敦厚而不愚,則深於《詩》者

而 博易良而不奢,則深於《樂》者也。 煩,則深於《禮》者也。 不賊 則 深於《易》者也。 屬辭 比 恭儉 事 丽 莊 絜静 不 敬 亂 精 而 微 則 不

深於《春秋》者也。」

則有得而無失矣。深,謂學之而能深知其義也。深知其義

忒。 《頌》之音,行步則有環佩之聲,升車則 朝廷 文》:「道,音導。」 萬事得其序。 和之音。居處有禮,進退有度,百官得其宜 與日月並 天子者,與天地參,故德配天地,兼利 其 儀 則 道 不太,正 仁聖、禮 明,明照四海,而 《詩》云:「淑人君子,其儀不 是四 義之序,燕 國。」此之謂 不 遺微小。 處 則 聽 也。《釋 萬物, 其 在 有 雅 总

節也。 佩 鄭氏曰: 象 環 五寸。 環取其無 「環佩、佩環、佩 人君之環,其 窮止,玉則 玉 以比德焉。 也,所以 制 未 聞 爲行 也。

惟 以德配天地,明並日月,非求之於遠也,亦 序,謂言之有次第也。」 鸞、 正 無 澄 與 動 内 曰 白其 是四國」者以明之。 非 日 7,馬 燕處也。 和 ·僻之干而已,故引《詩》言「其儀不忒 田車鸞在鑣,乘車 動則鸞鳴,鸞鳴則 皆鈴 Ė 「聖者,生知之智,無所 一身正之,使外無非禮之動,而内 『鸞在衡,和在軾前。』升 進退,行步與升車 也,所以 爲車行節 和應。 鸞在衡。」 愚謂:天子之所 也。 不通 居處 也。 車 者也。 朝 吴氏 孔氏 韓 則 廷 馬 詩

發號 也。 地之害,謂之義。 説,音悦。 有治民之意而無 民不求其所欲而得之,謂之信。 出 令而 王,徐于況反。」 民説,謂之和。 義與信,和與仁,霸王之器 其器 ,則不成。《釋文》: 上下相 親 除去天 謂之

上言其德之具於身,此又言其德之施於政

事。 者也 善不可 有治民之意 以 人君 爲 操四者以 政 也 而 無其器則不成,所謂 治民 猶 人操器 以 徒 作

作「成」。」 欺以 曲直也,規矩之於方園 誠設,不 禮之於正國也 姦詐。《釋文》: 輕重; 繩 可欺 以 「圜,音圓。 墨誠陳,不可欺以曲直, ,猶衡之於輕 方圜。 縣,音玄。」○鄭注: 君子 也。 審禮 故 重 也,繩 衡 一不可 誠 縣,不可 墨 「誠,或 規矩 誣 之於 以

謂彈、畫也。」鄭氏曰:「衡、稱也。縣、謂錘也。陳、設,

子親 文》:「長,竹丈反,下同。」 曰: 則敬,以入朝廷則貴賤有位,以處室家 禮謂之無方之民。 是故隆禮 ,兄弟和 安上治民,莫善於禮。」此之謂 、由禮謂之有方之士,不隆禮、不 以以 處鄉 敬讓之道也,故以 里 一則 長 幼 有 序。 也。 奉 孔子 則父 宗 廟 由

禮以敬讓爲道,故以之奉宗廟,人朝廷,處隆,謂尊奉之。由,謂踐履之。方,道也。

列反。 序也。 爲無所用而去之者,必有亂 禁亂之所由生,猶坊止水之所自來也。 禮,所以使諸侯相尊敬也。 舊坊爲 明臣子之恩也。 故朝覲之禮,所 室家、鄉黨,無所往 坊,音房,本又作『防』。」 昏姻之禮,所以明男女之别也。 無所 用而壞之者,必有水敗, 以 鄉飲酒之禮,所以明長幼之 明 君 而不得其宜 臣之義也。 患。 喪祭之禮,所 《釋文》: 以 聘 「别,彼 舊 問 故以 夫禮 禮 以 之

而倍死、忘生者衆矣。聘、覲之禮廢,則君臣鬪之獄繁矣。喪祭之禮廢,則臣子之恩薄,多矣。鄉飲酒之禮廢,則長幼之序失,而争故昏姻之禮廢,則夫婦之道苦,而淫辟之罪

矣。《釋文》:「辟,匹亦反。倍,音背。●行,下孟反。」之位失,諸侯之行惡,而倍畔、侵陵之敗起

聘問。 之行惡,而至於侵陵。 君臣之位失,而至於倍畔。 國。 齒位之禮,故 陵,其惡相通也。」 姻,後聘、覲,而 朝覲、後昏姻、又殊别君臣、故先朝覲、後 鄭氏曰:「苦,謂不至、不答之屬。」 曰:「倍畔,謂倍畔天子。 上經尊重者在前,卑輕者在後,故先 此經據 廢 人倫 則長幼之序失。 聘、觀合言者,以倍畔、 急切者 愚謂:《鄉飲酒》 侵陵,謂侵 聘禮廢則 在前,故 覲 禮 先 諸 孔氏 有正 陵 廢 侵 侯 則 昏 鄰

徙善 故禮之教化也微,其止邪 易》 遠罪 曰: 「君子慎始。 而不自 知 也, 是 差若豪氂,繆以千 也 以 · 於未形 先 王 隆之也。 ,使人日

❶ 「背」、《釋文》作「佩」。

豪,依字作「毫」。 氂,李其反,本又作「釐」。」里。」此之謂也。《釋文》:「遠,于萬反。 差,初佳反。

解》《漢書》顔師古注皆以爲《易緯》之所引《易》曰」、《周易》無此文、《史記集

哀公問第二十七《别録》屬《通論》。

哀公所問有二:前問禮,後問政。二者非

親,昏姻、疏數之交也。君子以此之爲尊敬禮,何其尊也,」孔子曰:「左世八人,不足以知禮。」君曰:「否。吾子言之也。」孔子以知禮。」君曰:「否。吾子言之也。」孔子以前事天地之神也,非禮無以辨君臣、上下、以節事天地之神也,非禮無以辨君臣、上下、正世之位也,非禮無以所由生,禮爲大。非禮無人,不足。」君曰:「大禮何如? 君子之言言如之位也,非禮無以别男女、父子、兄弟之言之也。」君曰:「大禮何如? 君子之言言。一時之言,記者合而記之。

制限事之,若天子祭天地,諸侯祭社稷也。節,制限也。天地之神,尊卑不同,各以其然。《釋文》:「長,竹丈反。别,彼列反。數,色角反。」

本亦無此句。腊,音昔。幾,音祈。」 行禮者如此。」《釋文》:「雕,本亦作「彫」。 備其鼎俎 刻鏤,食不貳味,以 居,節醜其衣服,卑其宫室,車不雕幾,器不 其宗廟,歲時以敬祭祀,以序宗族,即 之、然後言其喪筭、備其鼎俎、設其豕腊、脩 事,然後治其雕 然後以其所能教百姓,不廢其會節。 鏤、文章、黼 與民 门同利。 黻 以 昔之君子之 嗣。 安其 其 有. 順

喪筭,謂喪之月數也。 方氏慤曰:「以其會,謂會聚其行禮之人。節,謂品節也。

其所。 當,丁浪反。」 艶反。敖,五報反。午,五故反,一音如字,王肅作「迕」。 固民是盡,午其衆以 今之君子莫爲禮也。」《釋文》:「好,呼報反。厭,于 昔之用民者由前,今之用民者 伐有道、求得當欲、不以 由後。

事,言教之有成也。

治其雕鏤、文章、黼黻

以嗣,治其器以嗣其道也。

鼎俎,祭器也。

所

能

教

百姓,所

謂 こ以

身教』者也。

有

成

也。」 行禮哉? 所行 國非人之所欲也,況伐有道乎? 今乃逆 取之力也。盡,竭其所有也。」 也。 鄭氏曰:「實猶 其所也。 而行,是求當於一己之欲,而不顧民之失 所言。」 孔氏曰:「午,忤也。 忤,違逆 所猶道也。 如 午其衆,逆其族 此 陳氏澔曰:「固,猶「固獲」之固,言 禮以恭敬、辭讓爲本,當時諸侯 則禮之本固已亡矣,其將何以 由前,用上所言。 富也。 類 淫,放也。 也。 當 由後,用下 愚謂:伐 猶 固猶故 稱也。

利。

儉爲德也。

儉者不奪人,故能

與民

同

其

议

其居』以下,至於『食不貳味』,皆言其

使各從其類,而不至於僭差也。

自『即安

之,無事乎改爲也。

節醜其衣服者,節之

與穆齒」也。即安其居者,即其所居而

安

也。以序宗族、《祭統》所謂『昭與昭齒,穆

祭祀、《孝經》所謂『春秋祭祀,以時思之』

豕腊,祭物

也。

宗廟,祭所也。

歲時

以敬

固。

當時人君僭侈,故此言行禮,而

專

歸

愚謂:禮貴得中,奢則不孫,儉則

孔子侍坐於哀公。 哀公曰: 敢問 人道

之以儉」也

之於儉,蓋所以救時之失,所謂

「國奢則示

公曰:「今之君子,胡莫之行也?」孔子曰: 今之君子,好實無厭,淫德不倦,怠荒敖慢,

爲大。」《釋文》:「坐,才卧反。愀,七小反,又音秋。」也,百姓之德也。固臣敢無辭而對:人道政大?」孔子愀然作色而對曰:「君之及此言

無辭而對,言不辭讓而對也。治人之道也。固臣,自謙言固陋之臣也。德猶福也。辭,讓也。」 愚謂:人道,謂鄭氏曰:「愀然,變動貌也。作猶變也。

之矣。」 是。」 是,可胜之所從也。君所不爲,百姓何從?」 爲,百姓之所從也。君所不爲,百姓何從?」 爲,正也。君爲正則百姓從政矣。君之所 公曰:「敢問爲政如之何?」孔子對曰:「政

子,有父子然後有君臣,故其序如此。萬民,而莫不一於正矣。有夫婦然後有父正,則身脩道立。以之正朝廷,正百官,正庶物,謂衆事也。爲政在於脩身。三綱

之也。 與?」《釋文》:「迎,逆敬反。舍,音捨。 敬爲大。 道,可得 公曰:「寡人雖 弗愛不親,弗敬不正。 大昏既至,冕而親迎,親之也。親之也者,親 人爲大。 『不』皆作『弗』。 與,音餘,下並同。」 是故君子興敬爲親,舍敬是遺親 聞 敬之至矣,大昏爲大,大昏至矣。 所以治愛人,禮爲大。所以治禮, 乎?」孔子對曰:「古之爲政,愛 無似 也, 願聞 愛與敬,其政之本 所以行三言之 不親、不正,一本 也。

本。 其 服 大昏既爲敬之至極,故國君雖尊,必服冕 子、諸侯之昏也。 似,肖也。 蓋夫婦之道,乃父子、君臣之所從出。 公以妾爲妻,國人不服,則夫婦失其正,而 上 以親迎也。 而敬之至極之中,尤莫大於大昏也。 |服:公衮冕,侯伯鷩冕,子男毳冕 無似,猶言不肖也。大昏,謂 士親迎服爵弁,則親迎皆服 爲國 以 禮,而禮以 敬爲 也。 哀 天

迎之於所館,禮之節也。」 愚謂:下文言

合二姓之好」,「以爲天地、宗廟、社稷之

有遠邇,或迎之於其國,或迎之於境上,或

爵則有尊卑,以國則有大小,以道塗則

而行親迎之禮與。胡氏謂「天子不親迎」,也。然則天子、諸侯之昏,皆於其國爲館桓公書「會齊侯于讙」,則以齊侯親送女故矣。《春秋》十二公皆不書出國迎夫人,惟主」,朱子以爲通天子而言,則天子亦親迎

君何謂已重乎?」《釋文》:「好,呼報反。」以繼先聖之後,以爲天地、宗廟、社稷之主,乎?」孔子愀然作色而對曰:「合二姓之好,公曰:「寡人願有言然。冕而親迎,不已重

則無以相合而疏,弗敬則無以相别而褻。

親

,則愛得其正矣。」

方氏慤曰:「弗愛

及言諸侯親迎遠邇之差,恐皆未然。

彼以褻爲親者,未要其終也。

惟以敬

爲

以致其親愛之意也,是興敬所以爲親也。

曰:「冕而親迎,躬親之也。 躬親之者,所

道,而孔子特以大昏之重告之。

輔氏

廣

父子、君臣從之矣。

故問所以行三言之

主」。 主」。 主」。 主」。 主」。 主」。 主」。 主,問公也。」 生子曰:「天地、蓋通天 大一言。」 是謂:婦人不與外祭、然后、 大型、周公也。」 生子曰:「天地、蓋通天 本子曰:「天地、蓋通天

以

不親迎,使卿逆,公監之,禮也。若夫邦君

安國曰:「娶妻必親迎,禮之正也。天子

海,故曰『愛與敬,其政之本與』。」○胡氏

於不敢慢於人,而德教加於百姓,刑於

四

廣而充之,其愛至於不敢惡於人,其敬至

愛敬之道,始於閨門之内,夫婦之間,及乎

公曰:「寡人固、句。不固、焉得聞此言也?

端也。 宗廟之中,君在阼,以象日之生於東, 嗣 固 以「繼先聖之後」明其重,此又以「萬世之 此言也。 昏之重,然若不固陋,則不問,不得聞孔子 之神明」也。直,正也。言,謂教令也。名 (在房,以象月之生於西: 所謂 ,謂固陋也。哀公自言固陋,故不知大 明 其 大昏者所以繼祖宗,延嗣續,故 (重也。 蓋公欲再問,而先爲謙辭 宗廟之禮,謂祭祀之禮也。 「配天 以 發 夫 地 其 上

矣。 其敬。 不正 耻,謂國之衰 物,事也。物耻,謂事之廢壞 喪也,則有若譏之,其何以取敬於人哉? 莫敢不敬矣。如哀公爲妾齊衰,而曰「魯 之教令皆合於禮,而上而朝廷,下而 人以妻我」,則其有愧於心,而言之不直甚 故其立也,則宗人辭之,國人惡之,其 則言不順,言不順則不足以服人而 若夫婦之分定,則名正言順 弱 而可 耻 也。 有 丽 禮 可 則綱紀 耻 萬民 , 所出 國 致

其本。 也。 也。身以及身,子以及子,妃以及妃,君行此 與 ? 子也者,親之後也,敢不敬與? 子也,有道。妻也者,親之主也,敢不敬 孔子遂言曰:「昔三代明王之政,必 立,國家安,故物耻可振,而國耻可 敬身爲大。身也者,親之枝也,敢 不能敬其身,是傷其親。 傷其本,枝從而亡。三者,百姓之象 傷其親 君子無 一敬其妻 興 、是傷 不敬 與? 也。 敬

之言雖過,民猶

稱其辭, 君之行雖過,民

鄭氏曰:「則,法也。

民者,化君者也。

君

三者,則愾乎天下矣,大王之道也。如此則

國家順矣。」《釋文》:「大,音泰。」

也。 也。 身,亦莫不敬其妻、子,所謂『愾乎天下』 者,百姓之象,言身與妻、子者百姓之象 夫,蓋得其政矣。」 『百姓之象也』。 曰:「三者,君行於上而民傚於下,故 至妻也,子也,亦莫不 鄭氏曰:「愾猶至也。」 大王愛厥妃,至於内無怨女,外無曠 蓋能敬其身,則能 百姓象其行,莫不敬 然。」 敬百姓之身矣,以 方氏慤曰:「三 葉氏夢得 其 E

敬其身,能敬其身,則能成其親矣。」辭,動不過則,百姓不命而敬恭。如是,則能過言則民作辭,過動則民作則。君子言不過公曰:「敢問何謂敬身?」孔子對曰:「君子

言而 言而 言 能 不命而敬恭,能敬身之效也。能敬 猶 至也,故曰「如是,則能敬其身」。 命而敬恭矣。未至於此,則必我之敬 议 立身揚名,以顯父母矣。」 ,則無過言。 無過辭,敬於動而無過 世爲天下則,動 爲法。」 馬氏晞孟曰:「擬之而 議之 而世爲天下 丽 後 動 則 愚謂: 則 則百 法 無 (身,則 , 百 姓 過 敬於 姓不 後

也已。」也日,是使其親爲君子也,是爲成其親之名也者,人之成名也。百姓歸之名,謂之君子公曰:「敢問何謂成親?」孔子對曰:「君子公曰:「敢問何謂成親?」孔子對曰:「君子

謂"君子者,道德成就之名。己能立身行謂『不遺父母惡名』者,如是而已。」 愚而無虧矣,故曰『人之成名也』。《祭義》所方氏慤曰:「君子者,君國、子民之稱也。

鄭氏曰:「有猶保也。」 放蕩 身而 異,不能愛人,決不能自愛,不能自愛,則 樂循天理。」 於天,而順之之謂也。 而爲欣、戚,豈能樂天? 安土者,無適 雖有此身,猶無有也。 有其身,謂不能持守其身而陷於非僻。 安 一謂安其所 得之謂。 不至於自棄也。 ,豈能安土? 不能安土,則以 處之位 樂天者,以禍福得喪 《講義》曰:「我與人本無 而無外求。 不能有其身,則 有其身者,知有 人能安於平易之 朱子曰: 樂天,謂 示不 欲、惡 歸之 心 能 而 隨 其 有

《大學》所謂『止於仁,止於孝』也。 從《家語》。」〇周氏諝 鄭氏曰:「物猶事也。」 其身之所履,皆在義 觀,其理尤實。 其能過此乎?」 微,莫不具性命之理,則求其所以成身者, 備於我矣。』則凡在我身者 然之理也。 生蒸民,有物有則。』《孟子》曰:『萬物皆 不過乎物,是天道也」。 語》作『夫其行己也不過 『格物』,蓋 性分之内,萬物皆備,即 《易》曰『言有物』,《大學》言 仁人孝子不過 應氏 理之内 曰:「《詩》云:『天 以上下文推之,當 、鏞曰:「物者,實 乎物,謂之成身。 朱子曰:《家 ·•, 雖 丽 乎 不 物者, 過 毫髮之 違則過 ()焉,猶 物 即

形無不踐矣。天生蒸民,有物有則,故不物,莫不有以止乎至善之地,而性無不盡,過耳。」 愚謂:不過乎物,則於一事一雖聖人豈能加毫末於是哉,亦循循然而不之,止則不過矣。夫物有定理,理有定體,

成,是天道也。已成而明,是天道也。」是天道也。不閉其久,是天道也。無爲而物曰:「貴其不已,如日月東西相從而不已也,公曰:「敢問君子何貴乎天道也?」孔子對

過乎物者,是乃天道之本然也。

亦不已,篤恭而天下平焉。 問。天道如此,君子貴之,而其法天也,純故曰『已成而明』。」 愚謂:孔子言「不過故曰『已成而明』。」 愚謂:孔子言「不過而能久」。」 方氏慤曰:「物成而功可見,而能久」。」 方氏慤曰:「物成而功可見,

公曰:「寡人意愚冥煩,子志之心也。」《釋

反。❷ 志,依注音識。」○今按:志,如字。文》:「憃,如容反,❶一音丁絳反。 冥,莫亭反,徐忌

定

曉也。 「所志記於心者,欲其告以要言而使之易 が記也。哀公言己之愚昧不明,乃孔子素 を亦愚也。冥者暗於理,煩者亂於事。志

反。辟,音避。」是故孝子成身。」《釋文》:「蹴,子六天如事親。是故孝子成身。」《釋文》:「蹴,子六子不過乎物。是故仁人之事親也如事天,事孔子蹴然辟席而對曰:「仁人不過乎物,孝

事親,此與《孝經》明察之指略同。先儒張民德秀曰:「仁人之事親如事天,事天如思遇事,以孝事親,是所以成身。」 真鄭氏曰:「蹴然,敬貌。事親、事天,孝敬鄭氏曰:「蹴然,敬貌。事親、事天,孝敬

- | 「如」、《釋文》作「始」。
- 「忌」、《禮記注疏》、《釋文》作「亡」。

出 氏 故 親,則父母愛之,喜而不忘也。 天之憂戚 之以爲善之資,乃所以厚其責。 悖之,即天之不才子也。 具人之形而盡人 謂:天之予我以是理也 天如事親,此二語實張子《西銘》之所自 則仁矣。」 愚謂:仁人之事親如事天,事 天,孝子事也,而孔子以爲仁人,蓋孝之至 其所以事之者,豈容有二哉? 夫事親如 怨也。即此推之,親即天也,天即親也。 其不能。 我者,非厄我也,將以拂亂其心志,而增益 當順其正。天之福澤我者,非私我也,予 之性,即天之克肖子也。禍福吉凶之來, 作《西銘》,即 曰 「孝子成身」。 仁孝無二道,事天與事親亦無二理 譬之事親,則父母惡之,懼而不 事親以明事天之道 ,莫非至善,而 譬之事 一大略 我

公曰:「寡人既聞此言也,無如後罪何?」孔

以哀公有志於行而勉之也。行之不能無過也。孔子言是「臣之福」者,罪猶過也。哀公既聞孔子之言,而自恐其子對曰:「君之及此言也,是臣之福也。」

禮記卷四十八終

禮記卷四十九

不中禮謂之逆。」子曰:「給奪慈仁。」《釋文》:

中,竹仲反。」

而不中禮謂之野,恭而不中禮謂之給,勇而

國史館纂脩孫希旦集解賜進士及第翰林院編脩

仲尼燕居第二十八《别録》屬《通論》。

「汝」。語,魚據反,下同。」
問流,無不徧也。」《釋文》:「女,音汝,後同,本亦作子曰:「居,女三人者。 吾語女禮,使女以禮仲尼燕居,子張、子貢、言游侍,縱言至於禮。

以此周旋流轉,而無所不徧也。起。」 愚謂:禮經緯萬端,故明於禮則可事。居,使之坐。凡與尊者言,更端則鄭氏曰:「退朝而處曰燕居。縱言,汎説

子貢越席而對曰:「敢問何如?」子曰:「敬

則子張之辟,於給爲近與。 故足以奪其本心慈仁之德,張釋之所謂 禮義而妄動,故失於逆亂 質,故失於便給。 爲徑情直行之失,給則有務外説人之意 恭以見於貌者言。 越子張之席而先對也。 文,故失於鄙野。 三子侍坐,以齒爲序。子貢居子張之次, ·徒文具而無惻怛之意」也。 勇而不中禮,則不度於 恭而不中禮,則文過其 敬而不中禮 敬以主於中者言 就三子言之, 然野與亂,猶 ,則質勝其

乎? 禮。夫禮,所以制中也。」《釋文》:「食,曰:「敢問將何以爲此中者也?」子曰:「禮之母也,能食之,不能教也。」子貢越席而對子曰:「師爾過,而商也不及。子産猶衆人

音嗣。」

過、不及之義,朱子於《論語》訓之至矣。 過、不及之義,朱子於《論語》訓之至矣。 過、不及之義,朱子於《論語》訓之至矣。 過、不及之義,朱子於《論語》訓之至矣。

食,音嗣。」 食,音嗣。」 (釋文》:「與,音餘。穆,亦作「經」,音同。 所以仁昭穆也。饋奠之禮,所以仁死喪也。 所以仁昭穆也。饋奠之禮,所以仁死喪也。 好者與?」子曰:「然。」「然則何如?」子 子貢退,言游進曰:「敢問禮也者,領惡而全

美。領惡、全好,猶《禮器》之言「釋回增領猶治也。惡者氣質之偏,好者德性之

文》:「長,竹丈反,後皆同。 施,加於身而錯於前,凡衆之動得其宜。」《釋 得其哀,辨説 時,樂得其節,車得其式,鬼神得其饗,喪紀 也。是故宫室得其度,量鼎得其象,味 禮,故戎事閑也。 幼辨也。以之閨門之内有禮,故三族和 以之朝廷有禮,故官爵序也。 指諸掌而已乎! 子曰:「明乎郊社之義,嘗禘之禮,治國其 得其黨,官得其體,政事 是故以之居處 以之軍旅有禮,故武 量,音諒。 錯,七故反,本又作 以之田 有禮 放故 得其 得 功成 也。 有 如

也。 得其式也。 及獻所宜也。黨,類也。」 斗、斛也。 掌邦教之類。」 庫之類。 説得其黨,若在官言官,在府言府,在庫言 語、飲食、居處、衣服,而各得其宜 則小者輕者可知。 之大,鼎爲器之重。大者、重者得其宜,❶ 功成於尚功之時,故於軍旅言之。量爲器 鄭氏曰:「三族,父、子、孫也。 戎事閉於無事之日,故於田獵言之。 鬼神得其饗,若天神皆降,地示皆出, 喪紀得其哀者,發於容體、聲音、言 官得其體,若天官掌邦治,地官 味,酸、苦之屬。 辨五路之用,乘車之得其式 車有六等之數,作車之 四時有所多, 方氏慤曰: 量、豆、區、 也。 武 辨

其事必有其治。治國而無禮,譬猶瞽之無相子曰:「禮者何也? 即事之治也。君子有

反。倀,勅良反。」 以祖洽於衆也。」《釋文》:「治,並直吏反。 於身而錯於前,凡衆之動失其宜。 樂失其節,車失其式,鬼神失其饗,喪紀失其 其制,宫室失其度,量、鼎失其象,味失其時 哀,辨説失其黨,官失其體,政事失其施,加 爵失其序,田獵、戎事失其策,軍旅、武功失 處,長幼失其别,閨門、三族失其和,朝廷、官 耳目無所加,進退揖讓無所制。 之中,非燭何見? 與,倀倀乎其何之? 若無禮,則手足無所錯, 譬如終夜有求於幽室 是故以之居 如此則無 相,息亮

子曰:「慎聽之,女三人者。吾語女:禮,猶

❶「宜」、《集説》作「象」。

《雍》,徹以《振羽》,是故君子無物 文》:「縣,音玄。 其禮樂,備其百官,如此而 子,不必親相與言也,以禮樂相 行中規,還 入門 之中,事之聖人已。 有九焉,大饗 在細、在絲二反。」 矣。入門而金作,示情也。升歌《清廟》,示 象》,句。《武》、《夏》籥序興,陳其薦俎,序 而縣興,揖讓而升堂,升堂而 下而管《象》,示事也。 中 中,竹仲反。還,音旋。 有 矩, 四 焉。 和 兩 总 君相見,揖 苟知此 中 《采 后 君子知仁焉。 齊》, 矣,雖在畎畝 齊,本又作「薺」、 是故古之君 示 樂闋 讓 而已。」《釋 Щ 客 而 不 了,下管 入 門 出 在 褿 以

籥,言《大夏》之舞執籥以舞也。序興者 謂聖。 闋」,是也。「升堂而樂闋」下當有「升歌 清》之詩也。《武》,《大武》之舞也。 也。」《維清》以奏《象》舞,故因謂《維清》爲 清》之篇也。序云:「《維清》,奏《象 牲》云「賓入大門而奏《肆夏》,卒爵 凡《九夏》之詩,皆以鐘鼓奏之,下文獨言 門縣興,謂大饗納賓,金奏《肆夏》之三也 聖人也。縣,鐘鼓之縣 知禮樂之情者能作。 而酢主人,主人又飲,卒爵 而樂闋者,升堂之時,主人獻賓,賓飲卒爵 畎畝之中,體此禮於身而行之,而可以 〈象》。 清廟》」一句,文脱 金作」者,以金爲重 下管《象》,謂堂下之樂以管 知 此者,知禮樂之情者也。 也。 也。 述者之謂明,作者之 也。 《象》,《周 闋,止也。 而樂止、郊 興,作也。 頌 故雖在 播 升 圃 維 舞 特 爲 樂

禮,所以仁賓客」,是也。 之樂也。 樂》「大享不入牲,其他皆如祭祀」,是也 諸侯,徹時歌《雍》,賓出奏《肆夏》,《大司 趨,故惟言其趨之節也。《雍》、《振羽》,皆 外趨,迎賓之時,車行宜疾,蓋雖門内 以《采齊》。車出亦如之。」此獨言「和鸞中 行之節,而車之和、鸞,其聲與樂相應也。 謂車出迎賓之時,奏《采齊》之詩,以爲車 者,知主人以恩意相接,上文云「食饗之 也。正樂有歌、管、間、合四節,而惟舉其 言文武之舞次第而 兩 采齊》者,凡車及行步之節,門内行,門 周禮·樂師》:「教樂儀,行以《肆夏》,趨 周頌》篇名。 相見,客出奏《雍》,徹時歌《振羽》,降 間歌非樂之所重而略之也。 升歌、下管、合舞,正樂之三節 《振羽》,即《振鷺》也。 起也。 和鸞中《采齊》, 入門金奏,納 王饗 知仁 亦 賓

與燕,升歌《大雅》,合《小雅》,天子與次 《渠》,天子所以享元侯也。《文王》、《大 國、小國君燕亦如之,與大國君燕,升歌 明》、《綿》,兩君相見之樂也。』然則諸侯 先王功德之盛,皆可得而見也。○鄭氏 如此,故不必親相與言,而賓主情意之洽, 所以示事,故舉其一以該之也。大饗之禮 武》,大合樂以事」,●蓋管《象》、合舞,皆 興」者,《文王世子》曰「下管《象》,舞《大 下,覆明四者之禮。不言「《武》、《夏》籥序 舞,所以象文王征伐之事也。「金作」以 發文王之德也。示事者、《維清》以奏《象》 和,以示其情之和也。 於天子也。 曰:「《春秋 物,事 傳》曰:『《肆夏》、《繁遏》、 也。 示德者、《清廟》以 示情者,取金聲之

[「]樂」,據《文王世子》篇,當爲「衆」之誤。

樂之重也。 穆叔 夏》,天子所以享元侯」,謂納賓之樂也 等諸侯自相享,皆與天子同。」鏘鳴按:此 諸侯,升歌《大雅》,合《小雅》。享臣子,歌 子享元侯,升歌《頌》,合《大雅》。 按:此引《儀禮•燕禮 其納賓皆奏《肆夏》之三,不獨元侯矣。 人牲,其他皆如祭祀。] 則是天子享諸侯, 出人奏《肆夏》,牲出人奏《昭夏》。 大饗不 《周禮 廟》」,則大饗皆升歌《頌》也。《春秋傳》謂 「《文王》,兩君相見之樂」,謂升歌之樂也 《文王》爲兩君相見之樂」,不云「饗」,則 〔周禮・大司樂》:「王出入奏《王夏》,尸 小雅》,合鄉樂。若兩元侯自相享,及五 頌》,合《大雅》。 |獨言「元侯」者,蓋舉其尤尊者以明其 鐘師》疏 此及《郊特牲》皆言「升歌《清 注。 其笙、間之詩未聞。」 愚謂:《春秋傳》「《三 賈氏公彦曰: 享五 一天 鏘 而 引 鳴

《象》與。 之篇以奏之。《勺》即《籥》也。 等七篇以奏之,舞《象》則歌《周 之,則天子燕諸 饗舞《大武》,諸侯燕臣子舞《勺》,以 樂」,則是樂之輕者,間歌之後合樂,樂之 間」,即繼之以「簫《韶》九成」,而不言「合 凡 酒禮》、《燕禮》樂有工歌、笙人、間歌、合樂 侯,升歌《大雅》」,其説皆非是。 樂,又謂「燕大国君,升歌《頌》,享五等諸 用樂之差也。鄭、賈以《三夏》爲升歌之 侯之臣子,皆升歌《小雅》。此燕、饗尊 相饗,皆升歌《頌》。 重者,間歌之後合舞,合舞即合樂也。 自相燕,皆升歌《大雅》。 天子及諸 兩君相見者,燕也。 四節, 舞《大武》則歌《周頌•桓》、《賚》 而無舞、《益稷謨》言「笙、鏞 侯及諸侯 天子燕諸侯,及諸 天子饗諸 自 1相燕 侯,及 頌 《籥》謂之 又《鄉飲 侯燕諸 維清 此差 (兩君 以 卑 侯

雅》,升歌《小雅》者合鄉樂,蓋合樂所用,禮有不用舞者,則升歌《大雅》者合《小《南籥》,則歌《二南》之詩以奏之也。然燕

例

降於升歌一等也

「繆,音謬。」不能樂,於禮素。薄於德,於禮虚。」《釋文》:無理不動,無節不作。不能《詩》,於禮繆。無理不動,無節不作。來能《詩》,於禮繆。子曰:「禮也者,理也。樂也者,節也。君子

《茅鴟》而不知者,能不繆於禮 《詩》以見志,不能《詩》,將有賦《相 崇德,所以實禮行也。」 繁,然各有其理,故不煩。 鄭氏曰:「繆,誤也。 之意,而無欣 所以通禮意也。 其減,樂主其盈。 不能樂,則有撙節 各有其節,故不流。古人行禮之際,每歌 喜 一歡愛之情,其於禮不亦樸 作樂,所以同成禮文也。 素猶質也。歌《詩》, 愚謂: 樂之情至和,然 乎? 禮之文至 退 禮主 鼠 讓

無忠信之實,其於禮不爲虚僞乎?素乎? 忠信之人,可以學禮,薄於德,則

所謂其人也。」 馬氏晞孟曰:「制度者,文爲之體。文爲馬氏晞孟曰:「制度者,文爲之體。不然,非者,制度之用。篚、簋、俎、豆,所謂制度之,故行之在皆禮之法也。徒法不能以自行,故行之在皆禮之法也。徒法不能以自行,故行之在以,就以,成於樂,厚於德,然後可。不然,非

也,古之人也。」 也,古之人也。」 一也,古之人與? 古之人也。達於禮,謂之素。達於樂而不達於禮,謂之室於樂,謂之素。達於樂而不達於禮,謂之子貢越席而對曰:「敢問變其窮與?」子

輔氏廣曰:「達,謂窮盡其義而無不至

議也 也。 不 禮 也 ·如其於樂深耳,可謂之偏,未可謂之窮 故 再言「古之人」者,深明其未可 愚 八其窮。 謂 子貢 然夔之於禮 以 夔 達 於 ,非全不達,特 樂 而 不 以 達 輕 於

曰 : 又反。 服體 也。 子明於禮樂,舉而錯之而 酢,然後謂之禮乎? 子張問政。子曰:「師乎,前,吾語女乎。 面 而 作鐘鼓、然後謂之樂乎? 而 立。 行而樂之,樂也。 樂之,音洛。」 師,爾 百官莫敢不承事矣。」《釋文》: 夫是以天下太平也,諸 以 爲 必 鋪 爾以爲必行綴兆 几筵,升降、 君子力此 己。」子張復問。 言而履之,禮 侯朝 二者 酌 獻 「, 以 ´; 萬 「復,扶 興 子 物 膕 南 羽 君

舞足蹈」也。如此則内和外理,而以之平而樂之,《孟子》所謂「樂則生」而至於「手言而履之,《曲禮》所謂「脩身踐言」也。行

車 上下, 也。 亂 禮之所興,衆之所治也 塗出也。」《釋文》:「奧,又作「隩」,烏報反。」 則亂於位也。 車則有左右,行則 長幼、遠近、男女、外内,莫敢相 物服體 也。 也。 治 室而 天下 則亂於席上也。 行而無隨 目巧之室,則有奥、阼,席 **無奥、阼,則亂於堂室也。** ,言萬事莫不順 不難矣。 昔聖帝、明王、諸侯,辨貴賤、 則亂 有隨,立則 物, 於塗 事 車 其 也 禮之所廢,衆之所 而 理 也。 無 也 服 有序,古之義 左右 踰越,皆由此 猶 立 則 順 ·; 則 而無序, 席而 有上下, 也。 亂於 無 萬

處也。 興 改 之所亂,衆之所以 鄭氏曰:「衆之所治,衆之所以治 目善意作室,不 、廢,此所以 也。」 自『目巧』以下,古今常事,不可 陳 氏 爲 澔 由法度 政先禮也。 曰:「衆之治 亂 也。 猶 目巧, 有奥、阼 目巧, 亂 謂 謂不用 由 也。 賓 但 全主之 禮 用 巧 之 廢

也。」 愚謂:遠近以地言,外内以位言。爲尊者所處,堂之有阼,以爲主人之位简爲之,亦必有奧阼之處。室之有奧,以規矩準繩,但據目力相視之巧也。言雖苟

三子者,既得聞此言也於夫子,昭然若發

此「塗」,謂禮也

矇矣。

見也。 鄭氏曰:「乃曉禮樂不可廢改之若發矇者,謂若目不明,爲人所發而有所

意也。」

孔子閒居第二十九《别録》屬《通論》。

樂之原,以致五至而行三無,以横於天下。母矣?」孔子曰:「夫民之父母乎,必達於禮『凱弟君子,民之父母』,何如斯可謂民之父孔子閒居,子夏侍。子夏曰:「敢問《詩》云

作「悌」,徒禮反。横,古曠反。」《釋文》:「凱,本又或「愷」,❶又作「豈」,丘在反。弟,本又四方有敗,必先知之。此之謂民之父母矣。」

也。 也。 謂之行。横於天下,即下文所謂「志氣塞 鄭氏曰:「退燕避人曰閒居。 乎天地」也。 文謂「無聲之樂,無體之禮,無服之喪」也。 民之父母。 使四海之内,無 患,所以維持而安全之者,無所不用其極, 有憂民之實心,而其識又足以察乎幾微 由此而推於彼,謂之致。 蓋聖人之於天下,明於其利,達於其 横,充也。」 四方有敗,必先知之者,惟其 一物不得其所,故可以爲 愚謂 由心而達於事, 禮樂之原 凱弟,樂易 即下

子夏曰:「民之父母,既得而聞之矣。敢問

❶ 「或」、《釋文》作「作」。

焉。 謂 聽之,不可得而聞也。志氣塞乎天地,此之 是故正明目而視之,不可得而見也。 亦至焉。 何 謂 五至。」《釋文》:「哀樂,音洛。」 《詩》之所至,禮亦至焉。 五. 至?」孔子曰:「志之所至、《詩》亦 樂之所至,哀亦至 焉。 禮之所至,樂 哀樂 傾耳 相 生。 而 至

也。 鄭氏曰:「凡言『至』者,至於民也。 民之父母者,善推其所有以與民共之。 樂者,樂也。 以 耳不能聞,目不能見,行之在心胸也。」 恩意也。言君恩意至於民,則其《詩》亦 之,而有治民之禮,故禮亦至焉。 之心存於内,則必有憂民之言形於外,故 詩》亦至焉。 節之,則 ··在心爲志,發言爲《詩》,既 詩,謂好惡之情也。 必 既與民同其樂,則必與民同 既有憂民之言,則必有以 有 樂 以 和 之,故樂 自此 以下,皆謂 亦 既 有憂民 至焉。 志,謂 有禮 人 至 踐

> 地而無所不至,故謂之五至。 見聞之所能及,而其志氣之發,充滿乎天其哀,故哀亦至焉。五者本乎一心,初非

其,依注音基。逮,大計反。選,宣面反。」 子夏曰:「五至既得而聞之矣,敢問 「『夙夜其命宥密」,無聲之樂也。 之喪,此之謂三無。]子夏曰:「三無既 無?」孔子曰:「無聲之樂,無體之禮 匐救之』,無服之喪也。」《釋文》:「近,「附近」之近 逮,不可選也」,無體之禮也。『凡民有喪, 而聞之矣,敢問 何《詩》近之?」 孔子 一威 何謂 儀 無 曰 得 服 匍 略 逮

之禮,謂心之敬 至。 喪,謂心之至誠惻怛而 無聲之樂,謂心之和 存乎心,由是 詩》,行之則爲禮、爲樂、爲哀 蓋五至者禮樂之實,而三無者禮樂之 而 之焉 而無 而無待於聲 待於事 則 無待於服也。 爲 志,發 也。 了, 而 也 焉 無 無 三者 服 則 所 無 爲 之 體 於遠

五

也

貌。 成王 也。 作「基」。 原 擇,無體之禮之意也。 之篇,言仁人之威儀無不閑習,而 服之喪之意也 於己有親屬,然聞其喪則匍匐 丽 棣棣」,閑習之意。 静 也。 此《詩・周頌 此《詩 夙 謐,無聲之樂之意 夜積德,以 宥,宏深 基者,積累於下,以承籍乎上者 邶風 也。 • 昊天有成命》之篇,言 · 谷風 》之篇, 言凡民 承籍乎天命者,甚宏深 此《詩 密,静 匍匐,手足並 也。 謐 邶風 速速、《詩》作 也。 而往救 其、《詩 不可 柏舟》 行 選 無 非 之

服之也 子夏曰:「言則大矣,美矣,盛矣。 而已乎?」孔子曰:「何爲其然也? ,猶有 五起焉 言盡 君子之 於此

服 君子行此三無,由 猶 ,其次第有 行也,言行 此三無 内以 也。 發於外 起猶 ,由近以及 發也

> 海; 服之喪,以畜萬邦。 禮,威儀翼翼; 内 志 子 畜,許六反。聞,音問,下「令聞」同。」 無 無體之禮,日就月將; 之樂,氣志 聲 恕孔悲。 不違 夏 無服之喪,施于孫子。」《釋文》:「施,以 日 之樂,氣 無體之禮,威儀遲遲 何 既 無聲之樂,氣志 如?」孔子 從, 志 無服 既 無體之禮,上 起 之喪,施 無聲之樂,日聞 無服之喪,純德孔明。 Ĭ E 無 體 既 及 之禮, 無 得; 四 下 聲 無 國。 和 之樂,氣 服 無 施 四 同 之喪, 方, 及) 豉反。 無 體 之 四 無 聲

皆起 得,謂得於理也。 也。 聞於四方矣。 故 從 氣志不违者,言其發之中 容 曰「既從」。 既無乖戾,則合於理矣,故曰 不 而應之矣。 迫也。 從,順 和 既著聞乎四方,則民之氣志 威儀 圃 既得於理,則 有 也 節 遲遲,行禮以 則又見其翼翼 -節,而 既 順 於民 順於民矣, 無所 既 ',則著 和, 乖 戾 丽 丽

嚴 既有愛人之心,則必有及物之恩,而施及 者,以己度人,而實致其惻怛慈愛之意也。 德一,風俗同,而施及四海矣。 將,而行之不倦矣。 則其德純 實,而可以 於四國矣。既有及物之恩,則民有被恩之 者如此。 其澤矣。 惟及於當時,而又施及孫子,使後世 歪 正 矣。 上下既一於禮 禮達 蓋禮樂之原於一心,而横乎天下 養畜萬邦矣。 而顯明矣。 而分定,則上下和睦 則 人皆行禮不倦,則 日有 德既甚顯明,則不 恩足以畜 所 就 内恕孔悲 , 月 丽 萬邦 一亦蒙 有 齊 道 所 同

斯可 孔子 以勞 子夏曰:「三王之德,參於天地。 謂參於天地矣?」孔子曰:「奉三無 天下。」子夏曰: 奉斯三者,以勞天下,此之謂三無私 「天無 私覆,地無 「敢問 私 何 載,日月 謂 三無私?」 敢問 無 何 私 私 如

> 夷反。」 如字。 其 本亦作[照]。 不 命式于九圍。」是湯之德也。 遲,聖敬 在《詩》曰: 日齊, 湯齊,依注音躋,亦作「躋」,❶子兮反、《詩 側皆反、《詩》作『躋』。 日 齊。 帝 昭假 命 不違,至於 遲 遲,上 《釋文》:「炤,音照, 假,音格。 湯 帝是祗 齊。 祗,諸 湯 帝 降

天有四時,春秋冬夏,風雨霜露,無非教也。 九州 時。 勞,勞來也。 而不 之德,故帝命之使爲法於天下 以至於湯。湯之生也,應期 日齊、《詩》作「日躋」。 曰:商之先祖,既有明德,天命未嘗去之, 也。 息,惟上帝是敬,故帝命之使爲法於 其聖敬又日 愚謂: 《詩》,《商 躋升,以 引《詩》以 躋,升也 頌 至 昭 而 長發》之篇。 證 也 假於天,久 降,適當其 湯 有 無 私

●「躋」、《禮記注疏》、《釋文》作「隮」。

無非教也。呂氏大臨曰:「此衍「神氣風霆」四字。」地載神氣,神氣風霆,風霆流形,庶物露生,

天 故於天地皆言之。乾資始,故言「風 天,雷霆出乎地,而風則鼓盪於天地之間 見而發生也。天以四時運於上,地以 私 物,非有所私 鄭 者,天何言哉,四時行焉,百物生焉,莫非 露」,舉其所以施之者而已。 應於下,播五行於四 「品物露生」,而究其功用之著焉。 氏日 也。 地無私之政教也 神氣,五行之精氣也。 :「言天之施化收殺,地之載生萬 也。 [時也。 愚謂:此言天地 雨及霜露降於 坤資生,故言 露生,謂 無非教 雨霜 神氣 乏 露 無

甫,維周之翰。 嶽,峻極于天。 天降時雨,山 清明在躬,氣志如神。 川 出雲。 四 維嶽降神,生甫及申。 國 于蕃,四方于宣。」此文武 其在《詩》曰:『嵩 耆欲將至,有開必· 維申及 高 先。 維

而記 臣。 無私 義 甫侯,穆王 出 輔佐之,猶天之將降 事,但爲之開其端,而天 神明,而能上 其有物欲之累也,故不能無 者,德澤之及於民也。 耆欲,謂所願欲之事也。 也。 雲也。《詩・大雅 ,故其德之在躬者,極其清明,合於 此《詩》宣王時尹 者引之,以證文武之事,斷章之 時賢臣。 格乎天焉。 • 申 雨澤而 人之德本清明,惟 吉甫送申伯 , 申 嵩高》之篇。 八必先 其於所願 聖人之所願 伯,宣王 所蔽 爲 Ш 川先 生賢 所作, 欲之 時 爲之 聖 臣 甫, 欲

而立,曰:「弟子敢不承乎?」《釋文》:「弛,徐式此四國」,大王之德也。」子夏蹶然而起,負牆子,令聞不已』,三代之德也。『弛其文德,協三代之王也,必先其令聞。《詩》云『明明天

音厥。」
氏反,一音式支反,皇作「施」。大,音泰。蹶,居衛反,徐

不失隊 者。」 王之祖。 鄭氏曰:「弛 德,和此四方之國。 三代之王,前文唯云 陳也,言宣王陳其文德,和協此四方之國。 故令聞不已。 父、祖未王之前,先有令聞也。 以其無私, 也。 戰争取天下,恐其有私,故特舉之。」 此云『弛其文德』,弛,施也,言大王施其文 之王先以令聞爲務也。 有天下,治水過門不入,無私事明,殷 湯』與『文武』,不稱『夏』者,以夏承 令聞者,無私之德之著見而不可 先其令聞,謂先有令聞爾,非謂 孔氏曰:「三代所以王天下者,必 也。 周道將興,始有令聞。 起負牆者,所問竟,辟後來 。《詩》本作『矢其文德』,矢, 施也。 協,和也。 然三王皆有令聞 大王,文 承,奉承 掩者 ·禹 周以 三代 愚 後

德,以見周之先有無私之德者,不獨文、武而周之積累尤久,故又引《詩》以明大王之

禮記卷四十九終

已也。

國 賜 史 進 館 士及第翰林 孫 希旦 院 編

坊記 第二十《别録》屬《通論》。

亦反。 以坊德、刑以坊淫、命以 不足者也。大爲之坊、民猶踰之、故君子禮 子言之:「君子之道,辟則坊與? 譬喻」之譬,今從之。 此篇言先王以制度坊 坊,音防,徐扶訪反。」○今按:「辟」字,張子讀 民之事。 坊欲。」《釋文》:「辟,匹 坊民之所 爲

所 謂 鄭氏曰:「民所不足,謂仁義之道也。 낈 教令。」 坊民之失,譬如水之有坊,所以止水 愚謂: 辟讀 爲 譬。 君子之道, 命,

禮記卷五十

不可廢 輔之。 欲也。 流。 焉,君子不謂性也。」。 足、制其所有餘。 而有餘,天理 理人欲,相 陸氏佃曰:「命以坊欲、《孟子》所謂『有 命以禁之於將發,故曰「坊欲」,坊其 德」,坊其悖於德也。 之。大爲之坊、民猶踰之、所以深明坊之 於德,則入於邪辟,故先王設爲制 之放泆也。 人坊民之具至是盡矣。 而養其源,性之蕩爲淫,刑以坊之而遏 曰「坊淫」,坊其入於淫也。命,謂政令。 出德則 篇中所言,皆以禮坊民之事也 君子之坊民,以禮爲本,而 也。 與消長。 民之所 人於淫,故出禮則入於刑 禮 一消 以 滅 教 性之善爲德,禮以 而 不足者,德也 欲動 之於未然,故 不 刑以治之於已犯,故 然人之欲無窮 之 。 情勝,人欲 應氏 禮 鏞曰:「天 坊 其 刑 度 民 日「坊 所 熾 坊之 與 動 以 不 · 聖 政 於 坊 足

1373

三五五五

愚謂: 賤妾進御,求逞其欲,何能 防 稱『子言之』。」 悉稱『子云』,唯此一章是一篇總要,故特 儒,皆以爲「子罕言命」之「命」,其義亦通。 衾與襉,寔命不猶。] 苟不知 羡慕者止,而 於天,各有分限,以是防之,則覬 ○孔氏曰:「此篇凡三十九章,三十八章 開 所可 「命」字,鄭氏之説 盡 ,聖人於是有命之説焉。 欲 不 得肆矣。 盡其心 爲 命有貴賤 《詩》曰: 確 乎?」 覦 宋 者 時 命出 『抱 諸 則

者也。 驕, 亂。禮者因人之情,而爲之節文,以爲 子云:「小人貧斯約,富斯驕。 慊,或爲[嫌]。 釋文》:「喬,音驕,本亦作「驕」。 貧 不至於約,貴不慊 故聖人之制 富 貴 也,使民 於 慊,□簟反。」○鄭注 上,故亂 約斯盜 富 示 益 驕 足 民 以 坊 斯

鄭氏曰:「約猶

窮也。

節文,謂農有田

里

薄也。 之差, 則餒矣」,是也。 也。 慊。」 也。」 慊有不滿之義、《孟子》「吾何慊 伐冰之家,不畜牛羊,所以制貴 驕。匹夫受田百畝,所以制貧而不至於約。 上,如滿而不溢,高而不危之意。」 曰:「家富不過百乘,所以 禄秩,隨功而 賙,不令至於約也。 至於約者,制農田百畝,桑麻自膽,比 服之事、皆有法度、不足至於驕也。貧 不足以驕者,制富者居室、丈尺、俎豆、衣 貴貧賤之法也。 又有滿足之義、《孟子》「行 士有爵命之級也。 不云『賤』者,從可 輔氏廣曰:「慊,謂滿足。 孔氏曰:「聖人之制富貴,制爲 施,則 此「慊」字,鄭氏以不滿 不云『貧賤』,文略也 貴臣無復恨君爵 貴不慊於上者 知 慊,恨,不滿之貌 制富 也。 有 貴不慊於 乎 Mi 丽 不嫌 不使之 哉 愚謂 方氏 不 ·使之 禄 制 於心 閶 解 慤 之 其 富 相 富

三五七

之,方氏、輔氏以滿足解之,義皆可通。

文》:「好,呼報反。幾,居豈反。乘,繩證反。」《釋不過百乘。以此坊民,諸侯猶有畔者。」《釋毒。』故制國不過千乘,都城不過百雉,家富天下其幾矣!《詩》云:『民之貪亂,寧爲荼子云:「貧而好樂,富而好禮,衆而以寧者,子云:「貧而好樂,富而好禮,衆而以寧者,

乘。雉,度名也。高一丈,長三丈爲雉。 出兵車一乘,此兵賦之法也。 亂。《詩》言民之貪爲亂者,安其荼毒之 鄭氏曰:「甯,安也。 廣,其兵賦唯千乘,故《論語》注云: 『雖大 則是過千乘。 里有畸。 方五里。 百雉,爲長三百丈,方五百步。子男之城 行,惡之也。古者方十里,其中六十四井, 孔氏曰:「千乘之國,地方三百一十六 按《周禮》,公五百里,侯四百里, 百雉者,此謂大都,三國之一。」 云『不過千乘』者,其 大族衆家,恒 成國之賦千 1多作 地 雖

賦,其地千成,居地方三百一十六里有畸, 氏 都,杜預同焉,與鄭此注異也。 過焉。」 唯公侯之封乃能容之,雖大國之賦 爲通,通十爲成。成出革車一乘。」千乘之 畝、畝百爲夫、夫三爲屋、屋三爲井、井十 子男三里。』此云『百雉』者,謂侯伯之大 者九,合成方十里者九百,得九百乘也,計 者百,方三百里者三三而九,則爲方百里 十六里有畸』者,以方百里者一,爲方十 夫亦多畔,而言諸侯者,舉其重也。」 羲》云:『天子城九里,公七里,侯伯五里, 凡有二義,鄭之此注,子男五 大都,三國之一爲百雉也。 國之賦,亦不是過焉。」子男之城 七里,公九里,天子十二里。又鄭《駁異 融曰:「《司馬法》:『六尺爲步,步百 邢氏昺曰:「云『居地方三百 但 里 國 於時 , 則 侯 伯 城之制, 五里,其 成亦不是 卿大 里 爲 馬

千 也。 角猶缺方十六里者一也。方十六里者一, 百里,引而接之,則長六百里,廣十六 百里者一,六分破之,每分得廣十六里,長 爲方一里者二百五十六,然曏割方百里者 南西兩邊,是方三百一十六里也。 按《周禮• 有 則每邊不復得半里,故云『三百一十六里 四十四,又復破而埤三百一十六里兩邊, 爲六分,餘方一里者四百,今以方一里者 方二百里。 伯之地 方五百里。 二百五十六,埤西南角猶餘方一里者一百 乘之國,居地方三百一十六里有畸,伯、 乘 ·畸』也。云『唯公侯之封乃能容之』者 半折之,各長三百里,將埤前三百里 猶少百乘,方百里者一也。 ,封疆方三百里。諸子之地,封疆 大司徒》云:『諸公之地,封疆 諸侯之地,封疆方四百里。 諸男之地,封疆方百里。』此千 又以此 然西南 諸 里 方

> 賦,亦不是過焉」。」 地雖廣大,以千乘爲限,故云『雖大國之『唯公侯之封乃能容之』。制國不過千乘,子、男自方三百以下,則莫能容之,故云

此皆爲使民疑惑,不知孰者尊也。盍旦,大夫有臣者稱之曰主,不言君,辟諸侯也。大子爲天王,稱諸侯不言天公,辟王也。

晝夜而亂昏明,況於臣之僭君也。」 孔氏夜鳴求旦之鳥也。求不可得,人猶惡其反

曰:「此逸《詩》也。夜是闇時,盍旦必欲望不下離十里,沒加上之情;也。

求明,欲反夜而爲晝,猶臣之奢僭,欲反

臣

曰君。《左傳》司徒老祁、慮癸謂南蒯曰而爲君。」 愚謂:大夫之家臣,稱大夫亦

祁盈之臣曰,「憋使吾君聞勝與臧之死也「群臣不忘其君」,此謂季氏爲君也。 又晉

徒攻桓氏,其新臣曰『從吾君之命』」,此稱以爲快」,此稱盈爲君也。 又宋司馬「命其

皇野爲君也。然但稱於其臣,至他人稱之後攻極民,其業昌臣,從吾君之命。」 此種

則不然,故曰「大夫不稱君」。

服,示 子云:「君不與同 民不嫌 也 姓同車,與異 以 此 坊民,民 姓 猶得 同 車 同 木 姓 同 以

弑其君。」《釋文》:「殺,音試,本又作「弑」。」

恒朝服,君則各以時事,唯在軍同服。」及之道者也。其非此,則無嫌也。僕、右鄭氏曰:「同姓者,謂先王、先公子孫有繼

於食。」《釋文》:「自此以下「子云」本或作「子曰」。」益亡。故君子與其使食浮於人也,寧使人浮子云:「君子辭貴不辭賤,辭富不辭貧,則亂

道 亂之禍息矣。 鄭氏曰:「食,謂禄也。 以其道得之,不去焉,則退讓之道著,而争 富與貴不以其道得之,不處焉,貧與賤不 甘於貧賤,而必求富貴,争亂之所由起也。 己則近貪,己勝禄則近廉。」 而 :去貧賤-而處富貴也。 也。 君子不使食浮於人,不以 甯使人浮於食,不以非道 在上日浮。 愚謂: 人不 禄勝 非

衽席之上,讓而坐下,民猶犯貴。 朝廷之位,子云:「觴酒、豆肉,讓而受惡,民猶犯齒。

相怨一方。受爵不讓,至于己斯亡。」讓而就賤,民猶犯君。《詩》云:『民之無良,

以 鄭氏 《小雅 事也。 觴酒,盛酒於觴也。 禮讓以示民,而民猶不免於有所犯 夫、士所立之位也。 設之席也。朝廷之位,謂人君視朝,卿、大 美,少者宜惡,若《鄉飲酒義》云「五十者二 羞胾、炙之屬 同,皆所以爲君臣、貴賤之别。於衽 豆,六十者三豆」,是也。 衽席,謂享、燕所 而受惡,讓而坐下,讓而就賤,皆君子躬行 ·犯貴」,於朝廷言「犯君」,互見之也。 上,籩、豆有加。 曰:「犯猶僭也。 角弓》之詩,以證犯貴、 也。 酒肉 貴,秩異者。」 豆肉,盛肉於豆,謂 席位、朝位,尊卑不 齒,年也。禮,六十 所 以養老、老者宜 愚謂 犯君之 也。 席言 庶 引 讓

子云:「君子貴人而賤己,先人而後己,則民

無告。」《釋文》:「倩,音佩。畜,許六反,《毛詩》作「勗」。」一者而後存者,則民可以託。《詩》云:『先子云:「利禄先死者而後生者,則民不偕。先子云:「利禄先死者而後生者,則民不偕。先作讓。故稱人之君曰君,自稱其君曰寡君。」

寄託 亡而後 也。 者。 鄭氏曰:「言不偷於死亡,則於生存信。」 死之義也。 言戴嬀恒勉己思念莊公。引之以證 作「勗」,勉也。 妾戴嬀之詩也。 是也。《詩・邶風・燕燕》之篇,莊姜送歸 愚謂:亡,謂 仕者之子孫,恒世其禄,先死 也,若《孟子》言「託其妻子於其友」, 臣有故而去,君三年不收其田里,先 存也。 號無告,謂負人之託,使老弱 **俏**,謂 寡人,莊姜自謂 出 先君,謂莊公。 在國 死 外者。 而背之也。 存,謂 也。 畜、《詩》 而後生 託,謂 莊 不偝 在 姜 國

呼號而無所告訴也。

治技而賤車,則民興藝。故君子約言,小人治去。「有國家者,貴人而賤禄,則民興讓,

也。 約則小人多矣,小人先則君子後矣。」 也,故皆興起於技藝。 愛其爵禄,則人知爵禄之不可以無德受 德而不尚言,故約言。約言者,讓也。 不愛其車服,則人知車服之不可以無能 也,故皆興起於禮讓。 人尚言而不尚德,故先言。 人,謂有德之人也。人君貴尚有德,而 鄭氏曰:「約與先,互言耳。 約,寡也。 人君貴尚技能 先言者,不讓 君子尚 君 子 小 一, 而 得 不

『先民有言,詢于芻蕘。」」《釋文》:「施,始豉反。」信讓以涖百姓,則民之報禮重。《詩》云:言,則犯也。下不天上施,則亂也。故君子子云:「上酌民言,則下天上施。上不酌民

文字。 一定 本。 本。 本。 大矣。」 是,則民感其德,而所以報之者重矣。引《大 是,則民感其德,而所以報之者重矣。引《大

「體」。」〇今按:履,讀爲體。
上爾筮,履無咎言。」」《釋文》:「履,如字,《毛詩》作則稱人,過則稱己,則怨益亡。《詩》云:『爾子云:「善則稱人,過則稱己,則民不争。善

己,以明過則稱己之意。此與《詩》之本義《詩》言爾之卜筮,本無咎言,而致咎者在矣。履、《詩》作「體」,謂兆卦之體也。引争見於事,怨在於心,怨亡則不止於不争

不同,蓋斷章取之爾。

武王成之。」」《釋文》:「度,徒洛反,《毛詩》作「宅」。」 《詩》云:『考卜惟王,度是鎬京。 子云:「善則稱 讓善者,以善相讓,則又不止於無怨而已。 武王不自以爲功,而讓之龜卜也。故引以 之篇。言武王以龜爲正,而成此鎬京,是 陳氏 澔曰:「《詩》、《大雅 人,過 則 稱 己, 文王有 則民 惟 龜 讓 正 聲》 之, 善。

下火吳反。」
下火吳反。」
「於乎,是惟良顯哉!」」《釋文》:「於乎,音鳥,
安乃順之於外。曰:「此謀此猷,惟我君之
女乃順之於外。曰:「此謀此猷,惟我君之
子云:「善則稱君,過則稱己,則民作忠。

爲

[讓善之證。]

罪。 子云:「善 大誓》曰: 紂克予,非朕文考有罪,惟予小子無 則 『予克』 稱 親 紂,非 過 則 予 稱 武,惟 己, 則 朕 民 文考 作 孝。 無

> 子云:「從命不忿,微諫不倦,勞而不怨,可 《論語》曰:「三年無改於父之道,可謂孝 謂孝矣。《詩》云:『孝子不匱。』」 《釋文》:「大,音泰。 矣。」「高宗云:『三年其惟不言,言乃讙。』」 良。]]子云: 也。 者、《周書·無逸》篇述殷高宗之事也。 不 鄭氏曰:「弛,猶棄忘也。 以改父之所行,是以既言而人喜悦之也。 言,謂不出教令也。 讙,《書》作「雍」,喜悦 母之過。 言高宗居喪三年不言,不欲遽出教令, 蘿當爲『歡』。」 「君子弛其親之過, 弛,式豉反。讙,依注音歡,火官反。」 孝子不記藏 愚謂: 而敬其 引高 く美。」 父

敬起孝,悦則復諫。」此所謂『不倦』。匱,有過,下氣怡色,柔聲以諫。諫若不入,起見志不從,又敬不違。』《内則》曰:『父母順,不用鄂鄂。《論語》曰:『事父母幾諫,鄭氏曰:「微諫不倦者,子於父母,尚和

從,而不敢乏止也。 從,而不敢乏止也。 之命,雖不合於理,爲人子之諫父母雖不見 可怠倦,雖父母不悦,至於勞之,而不可以 可怠倦,雖父母不悦,至於勞之,而不可以 不可遽有忿怒之心。又當幾微以諫,而不 之命,雖不合於理,爲人子者且當從之,而 之也。孝子無乏止之時。」 愚謂:父母

反。痛,羊主反。」
松。不令兄弟,交相爲瘉。』」《釋文》:「綽,昌灼裕。不令兄弟,交相爲瘉。』」《釋文》:「綽,昌灼因睦以合族。《詩》云:『此令兄弟,綽綽有子云:「睦於父母之黨,可謂孝矣。故君子子

之人,不善兄弟,交相爲病害也。」有德之人善於兄弟,綽綽然有寬裕。無德雅・角弓》之篇。令,善也。瘉,病也。言难以會聚宗族,爲燕食之禮。《詩・小之道以會聚宗族,爲燕食之禮。《詩・小孔氏曰:「因睦以合族者,言君子因親睦

衣,君子以廣孝也。」《釋文》:「上「衣」字,於既反。」子云:「於父之執,可以乘其車,不可以衣其

亦『錫類』之義也。」等。」 陳氏澔曰:「廣孝、謂敬之同於父,以乘其車、車於身差遠也。謂今與己位鄭氏曰:「父之執、與父執志同者也。可

辨?」《釋文》:「養,羊尚反。」子云:「小人皆能養其親,君子不敬何以

『厥辟不辟,忝厥祖。』」《釋文》:「辟,並必亦反。」子云:「父子不同位,以厚敬也。《書》云:何以辨者,言何以别於小人也。

父不自尊嚴,而與卑下相瀆,亦辱累其先高,而與臣下相褻,則辱其先祖。若爲人辭。辟,君也。忝,辱也。言爲君不自尊既曰:「《書‧太甲》三篇,伊尹戒太甲之,與氏曰:「同位,尊卑等,爲其相褻。」 孔

之内,戲而不歎。君子以此坊民,民猶薄於子云:「父母在,不稱老,言孝不言慈,閨門

祖也。」

孝而厚於慈。」石經「猶」下有「有」字。

者也。 子之心。」歎,謂有憂戚之聲也。」 望其親 不 稱老,爲其感動 《孟子》曰:『舜年五十而不失其 也。 鄭 氏 親 曰:「戲,謂孺 也。 不言慈,嫌 子 言笑 以 孺 恩

文》:「長,竹丈反。」子云:「長民者,朝廷敬老,則民作孝。」《釋

此坊民,民猶忘其親。」有事也。脩宗廟,敬祀事,教民追孝也。以子云:「祭祀之有尸也,宗廟之有主也,示民

焉。 寔 不 以 子云:「敬則用祭器,故君子不以 德。』以此示民,民猶争利而忘義。」 受 親饋則客不祭。故君子苟無禮,雖美不食 美没禮。 《易》曰:『東鄰殺牛,不如西 《其福。』《詩》云: 故食禮,主人親饋則客祭,主人 既 醉 以 酒 菲 鄰之禴祭 ¨, 既 :廢 禮 飽 以

> 不可 屬 鄭氏 薄,凡以重義而輕利而已。 於飲食之際,務於行 矣。食者利之所在,禮者義之所出,君子 不存矣。 不以禮爲重焉。 有宜於菲而薄者,有宜於美而豐者,而莫 酒肴,亦以觀威儀,講德美。」 儉 美過禮而去禮。 敬事於賓客則用之,謂饗食也。 而 爲燕器。 敬也。 以其薄不及禮而不行禮,亦不可以其 曰 : 食美而禮 祭器,籩、 不 引《詩》言君子饗、燕、非專爲 以 菲 食薄而禮 引《易》以喻奢而慢,不如 :廢禮 不逮,則 豆、簋 禮而 ,不以美没禮,言 不行 不惟其物之厚 、鉶之屬也。 禮 ,則禮 没 愚謂: 盤、盂之 圃 不 廢 見 丽 食

一,示民有上下也。因其酒肉,聚其宗族,以堂,澄酒在下,示民不淫也。尸飲三,衆賓飲過之者趨走,以教敬也。醴酒在室,醍酒在子云:「七日戒,三日齊,承一人焉以爲尸,

睦

也。 設尊之處,在東楹之西,而沈齊又在其 而在 《小雅·楚茨》之詩,以證祭祀之禮,無 泛齊又在其北 齊設於室内,而在盎齊之北。《禮運》云 禮》設尊之處,在室户外之東。 侯之祭,其盎齊之尊,蓋當《特牲》《少牢 之間」,以《禮運》及此記推之,天子、諸 禮》「尊於户東」、《少牢禮》「尊於房、户 户之内,則是在室也。」 盡 觀乎堂上之人以爲法也。卒,盡也。 「醴、醆在户」,則醴齊在室户内之東,而 『醴、醆在户』,此云『在室』,不同 玄酒在室」, 一得其 Ŧī. 盎齊之南。 齊之上,又有鬱 度也。 謂鬱鬯也。 也。 〇 孔 醍齊之尊,蓋當《燕禮》 醍齊、沈齊設於堂上, 氏 曰:「《禮運》云 鬯。 鬱鬯又當在泛 愚謂:《特牲 《禮運》云 泛齊、醴 者,在 南 不 引

唯 肉, 得獻少,示民以上下之分也。因祭祀之酒 堂下,示民 蓋尸乃神象,故齊戒以承之,趨走以避之, 戒,謂散齊也。承,事也。過之者趨走,謂 之人以爲法也。 酳尸而爲三也。 醴齊、醍齊味薄 教民以敬事其祖、考也。 爲君尸者,大夫、士見之則下車而 夫、士祭禮饋食之後,主人、主婦、賓長 也。 酒 聚其宗族於宗廟而獻酬之,教民 獻之也。尸尊,故得獻多,賓客卑,故 醍 堂上觀乎室,言堂上之人觀乎在 齊 以不淫於味也。 也。 澄,清也。 而 衆賓飲一,謂主人於衆賓 堂下觀乎上,言堂下之人 在室堂,三酒味厚而 醴酒,醴齊也。 澄酒、三酒 尸飲三,謂大 趨 走 以 也。 也。 室 各 在 和

醍

齊,側皆反。醍,音體。度,如字,法度也,徐徒洛反。」

詩》云:『

禮儀卒度,笑語卒獲。』《釋文》:

睦也。

故堂上觀乎室,堂下觀乎上。

齊之北,則在北

墉下也。

○鄭注:「阼,或爲「堂」。」 殯於客位,祖於庭,葬於墓,所以示遠也。 於中霤,飯於牖 諸侯猶有薨而不葬者。」《釋文》:「飯,户晚反。」❶ 云:「死,民之卒事 人弔於壙,周人弔於家,示民不偝也。]子 「賓禮每 進 下,小斂於户 以讓, 也,吾從周。 喪禮 内,大斂於 每 加 以此坊民, 以 遠。 殷 浴

葬,謂 也。 壙,既窆而弔也。 喪至葬而送死之事乃畢,故自 之情文爲尤盡 情,於是爲甚,故弔於壙者,不如弔於家者 死爲人之終事,反而亡焉失之矣。 哀痛之 而弔之,所以示民不偝其親也。 加以遠,所以爲即事之漸也。 蓋以尸柩既藏,孝子哀慕 不能 如期 也。 而 周人弔於家,反哭而 諸侯五月而葬,薨 葬 也。 趙 [内而] 迫切,故從 殷 氏 卒,終也 人人弔 汸 外, 日 而 不 弔 於 每

期來告,亦無由往會之爾。」皆由魯不會,苟其國葬不以禮,而不以葬者」,謂不成喪也。是故諸侯不書『葬』,非告諸侯。《坊記》云『諸侯猶有薨而不葬

「殺、音弑。」「我自客階,受弔於賓位、教民追孝子云:「升自客階,受弔於賓位、教民追孝子云:「升自客階,受弔於賓位,教民追孝子云:「升自客階,受弔於賓位,教民追孝

也。」 時也。 鄭氏曰:「升自客階,受弔於賓位,謂 之所在,今上堂而不見,孝子之哀於是爲 反哭受弔則在 至反哭猶然。 愚謂: 既葬矣,猶不由阼階,不忍即父位 受弔之禮 居喪之禮,升降不 西階上。 ,皆在阼 蓋西階之上,殯 階 由 阼 下,惟 反哭

周末文繁禮備,葬或有缺,則不敢以葬期

甚,故 ,皆所以追孝於其親也。 不忍 離 其 所 丽 於此 受弔也。 未没喪,不 此二 稱 也。 以

君,謂· 之,當云「未踰 史册所 書也。 年,不稱君」,記者之誤 以下文引《春秋》推

爾。 蓋一歲不二君,未踰年而稱君,則是

及卓,皆晉獻公之子。《春秋》僖公九年 急於受國,而有争奪其父之心矣。 奚齊

秋九月"「晉侯佹諸卒。冬,晉里克弑其

君之子奚齊。」奚齊不稱君,立未踰年也。 十年春正月:「里克弑其君卓。」卓稱君,

已 踰年也。

臣 子四海之内無客禮,莫敢爲主焉。故君適 子云"「孝以事君、弟以事長、示民不貳 有其身,不敢私其財,示民有上下也。 三年,喪君三年,示民不疑也。 故君子有君不謀仕,唯卜之日稱二君。喪父 自阼階,即 位於堂,示民不敢有其 父母在 故天 不 也。 室 其 敢

> ·弟,音悌。饋,本又作「餽」,音同。」 此 父母在,饋獻不及車馬,示民不敢專也。 坊民,民猶忘其親 而貳 其君。」《釋文》:

者相 曰:「不貳者,不敢自副貳於其君,謂與尊 亦統於君也。 身及財皆當統於父母也。不敢有其室,臣 不明。有猶專也。不敢有其身,私其財, 之尊也。 晉惠公獲於秦,命其大夫歸擇立君,曰: 之日,謂君 之子父在者也。不謀仕,嫌遲爲政也。 孝以事君,謂以事親之孝事君 『其卜貳圉也。』喪君三年,示民不疑於君 『貮』,唯卜之時,辭得曰『君之貳某』爾。 「不貳,不自貳於尊者也。 長,謂以事兄之弟事長也。 敵。」 君無骨肉之恩,不重其服,至尊 有故 車馬,家物之重者。」 而 爲 之卜也。二當爲 君子有君,謂君 也。 鄭 弟以事 氏 孔氏 日 ۲

子云: 《易》曰:『不耕穫,不菑畬 也。 民猶貴禄而賤行。」《釋文》:「行,下孟反。」〇鄭注: 争,故君子 或云「禮之先辭而後幣、帛」。」 先財 禮之先幣、帛也,欲民之先事 而後 於有饋 禮 則 者弗能 民 利, 無 見,則不 ,凶。」以 辭 而 行 視 此 情 而 坊 其 則 後 民 饋 民 禄

先有 行情 後 不 利 相 然後用幣、帛以 璧以享也。 帛,若《聘禮》先執 鄭氏曰:「禮,謂 無 内 猶 幣、帛,是 見,乃奉幣、帛以脩好 也。」 謂 食 辭 也。 以 用幣、帛以 相接也,無禮不相見也」,是也 相 通 辭,賓主 不能見,謂 孔 後禄。」 ,然後執贄以相見,既相 氏 致其情。 所執之贄以見者也。 曰:「先 圭 致其情 一相 以 愚謂: 接之辭、表記 聘,而後 有 也。 先財 疾 相 也 也。 見, 財,幣、帛 禮之先 賓主 而後禮 用東帛加 是先 不視,猶 相 汽無 **₩** 幣、 見, 事 接 也。 既

> 則不 歲日 而後 土舒 墾之而菑殺其草木也。 爻辭云「不耕穫,不菑畬,則利有攸往」,無 不能行禮,而徒取財 子於有饋者不能見,則不視其饋者,爲 尚,故民化之,而有貪利争奪之心 辭 凶」字,此蓋 而 緩 得 禄之意也 行情, 畬 也。 ,二歲曰 以以 則是不 引《易》言不耕則不得穫,不 喻爲其事 衍 新田,三歲日畬。」菑 文 務行禮 也。 也。 爾爾 而後獲其利,先 畬,謂既耕之而 《易・無妄》六一 河面 雅 》 三 「 唯 以 也。 貨 謂 田 財 菑 其 其 始 爲 君

子仕 此 菲 夫 有遺秉,此 子云:「君子不盡 坊民 不 無 則 坐羊,士不 以 民 不稼,田 下 有 猶忘義 體 不 德 斂 則 坐 利 音 丽 犬。 不 穧 以 争 莫 漁,食 伊 遺 利, 違 《詩》云:『采葑 民。 寡), 及 以亡其身。」《釋 時 婦 《詩》云: 不力 爾 之利。」故 同 死 珍。 君 采 彼

菲,芳尾反。」 文》:「遺,唯季反。穧,子賜反,又才計反。葑,芳容反。

彼處 隱 仕 根 之者與。 坐其皮。 食也。大夫得食羊,士得食犬,則不得復 田 孔氏曰: 珍物唯天子及養老用之,士、大夫不得常 「王珍用八物。」《王制》:「八十常珍。」蓋 四時之利,則不得力求珍羞。《周禮》: 婦捃拾以 而以餘利遺與民也。 也。 矢魚, 臧僖伯諫之。 則不漁者 則不稼者,仕 有遺 言歲時 引《邶風 「不盡利以遺民,謂不 葑,蔓菁也。 然則古者燕居之席,蓋有 爲利,證以利遺民也。」 秉把,此處有 ,田獵取禽,則不得復漁 豐稔,田稼既多,穫刈 · 谷風》之詩,言采葑菲者 而受禄,則不得復稼穡也。 《詩》,《小雅 菲, 营類也。 食時不力珍者,食 不斂之穧束,與寡 盡竭其 愚謂: · 大田 以 下體 、促遽, 故魯 皮爲 利

> 義。 法爾 既 取 其 此 與《 葉, 無得 詩》 之本 兼 取 其 義 根, 不 同, 以 證 亦 斷 盡 章之 利 之

反。 父母。』」《釋文》:「别,彼列反。 嫌,以爲民紀者也。 如之何? 斧不克。 不相見,恐男女之無别也。 子云:「夫禮,坊民 有自獻其身。 告,音谷。」〇按:伐柯、詩》作「析薪」。 取妻如之何? 横從其畝。 《詩》云: 所淫,章民之别,使 故男女無媒不 :『伐 取妻如之何? 匪媒 取,七樹反。 以 柯 此 不得。』『蓺 如之何 坊民, 交,無 ? 必告 民 民 麻 猶 匪 幣 無

也。 也。 於色。 也。 鄭氏曰:「淫猶貪也。 後行親 幣,納徵之幣也。 無媒不交,男女行媒,然後交相 獻猶進 男女無别,則族姓不明,故嫌 迎之禮,執贄以 也。 愚謂:淫,貪也 章 納徵 相 明也。 見 而 也。 昏 禮 嫌,嫌 自 成 獻 知 謂 疑 其 然 名 疑 生

「自此以下、總坊男女淫欲之事。」待媒妁之言,父母之命也。○孔氏曰:風・南山》之篇。引之以證昏姻之禮,必風・南山》之篇。引之以證昏姻之禮,必身,謂不待媒妁、幣聘而奔人者。《詩・齊

《釋文》:「去,起呂反。」去夫人之姓,曰『吴』,其死,曰『孟子卒』。」不知其姓,則卜之。以此坊民,《魯春秋》猶子云:「取妻不取同姓,以厚别也。故買妾

文。 子,宋姓 之者也。 其卒曰「孟子卒」者,孟,字, 但云「夫人至自吴」也。 是也。昭公取於吴爲同姓,故諱書其姓 書其姓,如取齊女則曰「夫人姜氏至自齊」 去夫人之姓曰「吴」者,《春秋》於取夫人皆 孟子,使若宋女者然。 夫人某 此所引蓋魯史之舊文,而孔子 氏 也。 薨 凡《春 昭公諱 秋》於夫人之喪,曰 然今《春秋》無此 故哀十二年昭夫 取 同 姓 ,謂之吴 ,已删

> 者而書之也。 人薨,經但書「孟子卒」,蓋因昭公之所稱

禮。」《釋文》:「殺,音弒,一音如字。繆,音穆。」陽侯猶殺繆侯而竊其夫人,故大饗廢夫人之子云:「禮,非祭,男女不交爵。以此坊民,

國名。 使 取息嬀然也。 故天子饗諸侯,及諸侯相饗,后、夫人皆 賓客,其敬之與祭祀同,必皆夫婦親之, 獻祝及佐 祭時男女得交爵、《特牲禮》主婦獻尸,并 其夫人,遂滅其國 爵,皆贊」,是也。 與於獻賓,《内宰》「凡賓客之裸、獻、瑶 也。蓋祭事嚴敬,不嫌也。陽、繆,疑二 人攝之而已。 [《]淮 食,賓長獻尸,致爵於主 南子》繆作「蓼」。 由 是而大饗廢夫人之禮 而竊之,蓋若楚文王之 繆侯饗陽 。古者於大 侯,陽侯説 一婦是

子云:「寡婦之子,不有見焉,則弗友也,君

大故 於德。」《釋文》:「見,賢遍反。辟 子 以 辟遠也。 '則不入其門。 故朋 友之交,主人不在 以此坊民,民猶以 不 色厚 有

鄭氏曰:「大故、喪病。」 愚謂: 色厚於

"音避。」

又作「逸」。」 亂於族。」《釋文》:「好,呼報 問之,不問其疾。以此坊民,民猶 男子不與同 子遠色以爲民紀。 子云:「好 則進左 德,謂好色厚於好德也 手 ?德如 席而 `,姑、姊妹、女子子已嫁 好 坐,寡婦不夜哭,婦 色,諸侯不下漁色,故 故男女授受不親,御婦 反。 遠,于萬反。 淫 丽 人疾, 佚 佚,本 反 而 君

之甚 色。昏禮始納采,謂采擇其可者也。 語》曰『未 鄭氏曰:「好德如好色,此句似不足。 而 内 一而 取 象 薄 於德 見好德 捕 魚然,中 也。 如 内 取 好色』,疾時人厚 網取之,是無所 於國 中,爲下 國君 於 《 論 漁 色

> 色者,言人好德之心當如好色之誠也。 寡 亂於族,犯非妃匹也。」 不問其疾者 人之疾,或有不可以語人者,故不問之,亦 《婦不夜哭,嫌思人道也。 ,嫌媚,略之也,問 愚謂:好德如好 婦人疾,問之, ||增損 而 己。 婦

至者。」《釋文》:「迎,魚敬反。」 以授壻,恐事之違也。 子云:「昏禮,壻親迎, 以 見於舅姑, 此 坊民,婦猶 舅姑承子 有不

爲其相褻故也

其 毋違命」,母戒之曰「夙夜無違宫事」,恐 房,父西面戒之,母 房、户外之西,南面,是見於舅姑也。 禮,壻與主人揖讓升堂,再拜奠鴈 鄭氏曰:「舅姑,妻之父母也。妻之父爲 婦從,是承子以授壻也。 外舅,妻之母爲外姑。」 女於室家之事 有違也。 '南面 戒之, 壻降 父戒之曰「夙夜 愚謂: 不至,謂男親 。 母 親 女出 迎之 出 立 而 於

中庸第三十一朱子《章句》。 电加 近 不行,若《陳風‧東門之楊》之所刺避而女不行,若《陳風‧東門之楊》之所刺迎而女不行,若《陳風‧東門之楊》之所刺

禮記卷五十終

賜 國史館纂脩孫希旦 進 士 及第翰林 院 編 脩

表記第三十二《别録》屬《通論》。

子言仁爲詳,故以《表記》名篇。」 氏申曰:「仁者,天下之表也。 程子曰:「《表記》亦近德,其言正。」 第二十三章爲第三支,專明仁之道。 兼明仁、義、報三者之道。 自第十七章至 支,言君子持身莊敬恭信之道,而言敬之 此篇凡爲八支:自首章至第九章爲第一 義爲詳。 二十四章至第二十七章爲第四支,專明義 自第十章至第十六章爲第二支, 此篇記孔 愚謂: 自第 朱

> 傳寫之誤與? 言之曰」。「君子不以辭盡人」一章,與前 之。下更廣開其義,或曲説其理,則直 數章不相蒙,乃更端之辭,而稱「子曰」,豈 章「凱弟君子」之義,非發端之辭,而稱「子 子曰。二今按「後世雖有作者」一章,結前 章至第五十五章爲第八支,明卜筮之重。 十章爲第七支,明言行之要。自第五十一 之義。自第三十四章至第四十五章爲第 云: 『皆是發端起義,事之頭首,記者詳 六支,明事君之道。 自第四十六章至第五 五支,以虞、夏、殷、周之治,明「凱弟君子」 之道。自第二十八章至第三十三章爲第 孔疏云:「此篇稱『子言之』者八,皇氏

> > 1391

不厲而威 子言之:「歸乎! 君子隱而顯,不矜而莊, ,不言而信。」

歸乎者,孔子道不行而思歸之辭也。 而

禮記卷五十一

三七四

有威儀,不待言語而人自信之,蓋其道德君子不待矜持而自然莊敬,不待嚴厲而自顯者,言君子雖隱處於下而道德顯著也。

之盛如此,此所以雖隱而顯也。

躬。』」《尚書》無「而」字。
足信也。《甫刑》曰:『敬、忌而罔有擇言在口於人。是故君子貌足畏也,色足憚也,言不知。是故君子貌足畏也,色足憚也,言

謂所言皆合於道,不可擇而去之也。篇。忌,戒也。罔,無也。罔有擇言在躬,守省察之事也。《甫刑》,《尚書‧吕刑》,不失口,故言足信。上章所言,則學者持不失足,故貌足畏。不失色,故色足憚。

燕居恒襲、《玉藻》謂「不文飾也不裼」,是濱也。」

改裼而襲。蓋禮以變爲敬,若相因則瀆,也。行禮則改襲而裼。若禮之至重,則又

瀆則不敬矣。

『勌』。」《釋文》:「樂,音洛。朝,直遥反。倦,本又作之以倦。」《釋文》:「樂,音洛。朝,直遥反。倦,本又作子曰:「祭極敬,不繼之以樂。朝極辨,不繼

樂、謂歡樂、若燕飲之禮、脫屨升坐而無不樂、謂歡樂、若燕飲之禮、脫屨升坐而無不 與一。祭禮雖有旅酬、無算爵、然皆立而 一、祭禮雖有旅酬、無算爵、然皆立而 一、祭禮雖有旅酬、無算爵、然皆立而 一、祭禮雖有旅酬、無算爵、然皆立而 一、樂、謂歡樂、若燕飲之禮、脫屨升坐而無不

耻。」《釋文》:「辟,音避。遠,于萬反。」子曰:「君子慎以辟禍,篤以不揜,恭以遠

蹈,而可以辟禍患矣。人能篤厚,則誠以「困,剛揜」,是也。人能敬慎,則擇地而篤,謂篤厚也。揜者,困迫之意,《易》曰

感人,而不至於被困迫矣。人能恭敬,則

人亦敬之,而可以遠耻辱矣。

在鑑反,又仕鑑反。」〇鄭注:「肆,或爲「褻」。」以一日使其躬儳焉如不終日。」《釋文》:「儳,徐子曰:「君子莊敬日强,安肆日偷。君子不

强。 不終日乎?」 迫,故如不終日也。君子主一以直内,無 故日至於偷。 則精神内固 程子曰:「常人之情,纔放肆則日就曠蕩, 斯須之不莊不敬,則心廣體胖,何至於如 所檢束,故儳焉散亂。外既散亂,内亦拘 自檢束則日就規矩。」 宴安則物欲肆行,縱肆則膚體 ,操存則血氣不浮,故日進於 儳然,差錯不齊之貌。 應氏 鏞 日 懈弛, 「收斂 心無

之不敬也。」《釋文》:「齊,側皆反。見,賢遍反。」子曰:「齊戒以事鬼神,擇日月以見君,恐民

鄭氏曰:「擇日月以見君,謂臣在邑

境者。」

子曰:「狎侮死焉而不畏也。」

及之,此慎以辟禍之反也。好相狎暱侮慢,不知畏死亡也,而死亡恒鄭氏曰:「伏於無敬心也。」 愚謂:小人

續則不告。」《釋文》:「三,息暫反,又如字。」 之毋相褻也。《易》曰:『初筮告。 再、三瀆,子曰:「無辭不相接也,無禮不相見也,欲民

《春秋傳》曰『古者諸侯有朝聘之事,號辭 則狎習, 尊嚴,尊嚴 者,恐其輕於相見而至於褻也。蓋罕見則 贄以相見也。 相接之辭,若《士相見禮》曰「某也願見,無 必稱先君以相接』也。」 鄭氏曰:「辭,所以通情也。 由達,某子以命命某見」,是也。 狎習則 則 相敬 相接必以辭,相見必 相褻,交之所 ,交之所以 愚謂:辭,賓主 禮,謂摯也。 全也。 以 離 禮,謂 也 數見 以 禮 執

不相告語也。《易‧蒙卦》之辭,言人再三相見,則至於

也,報者天下之利也。」子言之:「仁者天下之表也,義者天下之制

報爲德、怨之報是也。 怨報怨」,民知所懲矣。」 傷人者報以刑,滅人者報以殺,●所謂『以 報以賞,所謂『以德報德』,民知所勸矣。 於天下之公而已。 臨曰:「天下有道,所謂德怨之報者,皆出 義,宜也。制,謂裁斷於事也。」 吕氏大 氏曰:「仁爲行之盛極,故爲天下之儀表。 鄭氏曰:「報,謂禮也。 則人皆知怨之不宜樹,而競於德矣,故曰 三者之道也。 天下之利」。 〇此下七章,兼明仁、義、報 有德者報以官,有功者 德怨之報得其公, 禮尚往來。」 愚謂: 吕氏以 孔

以甯,《尚書》作「罔克胥匡以生」。辟,音璧。」非民,無以辟四方。」」《釋文》:「大,音泰。無能胥報。」《大甲》曰:『民非后,無能胥以寧。后則民有所懲。《詩》曰:『無言不讎,無德不

甲》,言君能安其民,則民能戴其君,以德勸者勉於施德,懲者戒於樹怨。引《大

德,則刑戮之民也。」子曰:「以德報怨,則寬身之仁也。以怨報

報德之義也。

謂 之怨矣。 天常,天下之亂民,法所當誅者也。」 於厚,未害其爲仁也。 吕氏大臨曰:「以德報怨,雖過於寬,而本 仁之一偏也。若以怨報德,則爲人情之所 寬猶容也。 雖非 中道,而可 以德報怨,則天下無 以怨報德,則 以寬容其身,亦 不 反 釋 易 愚

以怨報怨,

子曰:「以德報德,則民有所勸。

❶ 「滅」、《集説》作「賊」。

共忿,而刑戮必及之矣。

以民。」
下一人而已矣。是故君子議道自己,而置法于曰:「無欲而好仁者,無畏而惡不仁者,天

鄭氏曰:「一人而已,喻少 所性 臨 制法,則法無不行。」 矣,無惡也,則衆人皆可以 人而已,則非聖人不足以性仁。 『性之』者也,安仁者也。 曰:「無欲而好仁,無畏而惡不仁,所謂 而議道,則道無不盡。 安仁者,天下一 也。」 爲仁。 以衆人所能 苟志於仁 以聖人 吕氏 大 而

《釋文》:「知者,音智。」知也。仁者安仁,知者利仁,畏罪者强仁。功,其仁未可知也。與仁同過,然後其仁可子曰:「仁有三,與仁同功而異情。與仁同子曰:「仁有三,與仁同功而異情。與仁同

畏而惡不仁者也。知者利仁,有欲而好仁吕氏大臨曰:「仁者安仁,無欲而好仁,無

者也。 也,有不幸而致焉。周公使管叔監殷,管 則不同,故其仁未可知也。過者人所 侯,一匡天下,湯武之舉不過乎是,而其情 功者人所貪也,假之者有之。 舜性之,湯武身之,五霸假之,所以異也。 之所有心而勉之者也,故與仁同功,未足 以「昭公知禮」,過於諱君而已,皆出於情 叔以殷畔,過於愛兄而已,孔子對陳 三者之功,同歸於仁,而其情則異。 好,而必欲得之者也。 者,與仁爲一 以知其情之異也。過者,人之所無意 而無僞,故其仁可知。」 蹈於不仁之罪,而勉力於爲仁者也。《論 之者也,故與仁同過,而後其仁可知。 人者,不於其所勉 畏罪者强仁,有畏 者也。 ,而於其所忽也。 利仁者,真知仁之可 畏罪者强仁,自恐 愚謂: 而惡不仁者也 桓公九合諸 功者, 此 安仁 司 而 失 敗 避

身」,强仁者也。不仁者,其爲仁矣,不使不仁者加乎其語》言「好仁者無以尚之」,利仁者也。「惡語》言「好仁者無以尚之」,利仁者也。「惡

仁,尊而不親。 厚於仁者薄於義,親而不尊。厚於義者薄於仁者右也,道者左也。仁者人也,道者義也。

劣。仁者,中心所具之德,體也。 之在人者言,故曰『人也』。 道之爲用, 樂後,志至氣次』云爾。仁之爲體,以此心 物所由之路,用也。 吴氏澄曰:「日用動作之便,右優而左稍 慈惠,故人親愛之,義者,截然之裁制,故 物之氣多者,義厚而仁薄。仁者,温然之 稟,得生物之氣多者,仁厚而義薄,得 事物之義理 人尊敬之。」 而言,故曰『義也』。 仁右道左,猶云『禮先 道者, 人之氣 收 以

道有至、義,有考。至道以王,義道以霸,考

遗以爲無失。」《釋文》:「道有至義,依注讀爲有至有道以爲無失。」《釋文》:「道有至義,依注讀爲有至有

怛,愛人之仁也。率法而强之,資仁者也。 義。 子言之:「仁有數、義有長短小大。 無失。」 者,至於道之極,不可以有加也,故以王。 考」,字脱一『有』耳。 鄭氏曰:「此讀當言『道有至、有義、有 稽考之道,而事無輕舉,亦可以無失矣。」 道嚴而有方,故得其裁制割斷而 道渾而無迹,故得其渾全精粹以爲王。 道,亦庶幾乎不失矣。」 馬氏晞孟 先王,所謂『非法不言,非道不行』,雖未達 而長諸侯,故以霸。 義道者,揆道而裁之,制節謹度,可以有國 有義則無仁矣。」 「考道,非體道者也,惟稽考而已,故 王,于況反。」 應氏鏞曰:「至道 考道者,必稽古昔,稱 吕氏大臨 有至,謂兼仁義者, ,即仁也。 曰:「至道 爲 티 : 一於

仁也。」《釋文》:「惛,七感反。我今,《毛詩》作「我躬」。」《國風》曰:『我今不閱,皇恤我後。』終身之謀,以燕翼子,武王烝哉!』數世之仁也。《詩》云:『豐水有芑,武王豈不仕。詒厥孫

數。 也。 則久,可以速則速,是也,故曰『義有長 者,義無定體,長短小大,唯其所宜而已。 之數也,故曰『仁有數』。義有長短 數也。數世之仁,終身之仁,此所施遠近 其有取於外,故曰『資仁』。 此所發淺深之 互言之耳。」 短小。」 孔氏曰:「言仁有數,則義亦有 之耳。性仁義者其數長大,取仁義者其數 鄭氏曰:「資,取也。數與長短小大,互言 如孔子可以仕則仕,可以止則止 仁發於性者也。率法而强之,外鑠於仁者 以其誠心愛人,故曰『愛人之仁』。以 義有長短小大,則仁亦有長短小大, 吕氏大臨曰:「中心憯怛, ,可以久 小大 短短

難爲人,以人望人則賢者可知已矣。」《釋文》:是亦義也。」○此下七章,專明仁之道也。 夫勉也,行者莫能致也。 取數多者,仁也。 夫勉也,行者莫能致也。 取數多者,仁也。 夫勉也,行者莫能致也。 取數多者,仁也。 夫勉。 此章論仁而兼及義者,蓋仁之數

勝,音升。度,徒洛反。」

是氏大臨曰:「仁爲器重,爲道遠,隨其所 舉之多少,所至之遠近,皆可以謂之仁。 故管仲之功,微子之去,箕子之囚,比干之 死,皆得仁之名,語仁之盡,則堯舜其猶病 就,此仁所以取數之多也。舉莫能勝,行 之,故難爲人。舉今之人以相望也。盡義以求人,非聖人不足以當 之,故難爲人。舉今之人以相望人不足以當 之,故難爲人。舉今之人以相望,則大賢

奏。此亦以數而言仁也。」 愚謂:仁之矣。此亦以數而言仁也。」 愚謂:仁之矣。此亦以數而言仁也。」 愚謂:仁之矣。此亦以數而言仁也。」 愚謂:仁之矣。此亦以數而言仁也。」 愚謂:仁之

音由。鮮,息淺反。」
惟仲山甫舉之,愛莫助之。』《釋文》:「輔,音酉,一雅》曰:『德輶如毛,民鮮克舉之,我儀圖之。子曰:「中心安仁者,天下一人而已矣。《大

能至之者,又非有待於人之助也。 引《大雅·烝民》之篇,言安仁者少,其有

孳,斃而后已。」《釋文》:「仰止,本或作「仰之」。 景身之老也。 不知年數之不足也,俛焉日有孳「《詩》之好仁如此。 鄉道而行,中道而廢,忘《小雅》曰:『高山仰止,景行行止。』」子曰:

本或作「儳」,非也。斃,音弊,本又作「弊」。」〇按「行」字,行,下孟反。 行止,《詩》作「行之」。 好,呼報反。 俛,音勉,

朱子讀如字,今從之。

仁者之過易辭也。」《釋文》:「易,以豉反。」子曰:「仁之難成久矣。人人失其所好,故

有過差,其情則善,不待辭而辨矣,故曰欲,此人人失其所好者也。心誠鄉仁,雖公則所好者兼容博愛,私則所好者克伐怨吕氏大臨曰:「仁者之心公,衆人之心私。

勝其重,致其遠,此所以人人失之也。辭,不知其可好,此秉彝好德之心也。然鮮能『仁者之過易辭』。」愚謂:仁之爲道,人莫

見之,未嘗有自解免之意。然人皆知其心猶解免也。仁者有過,如日月之食,人皆

之無他,故易辭。

近I之近。」 「温温恭人,惟德之基。」」《釋文》:「近,「附一問:「温温恭人,惟德之基。」、《釋文》:「近,「附一做易容也。以此失之者,不亦鮮乎?《詩》此,雖有過,其不甚矣。夫恭寡過,情可信,子曰:「恭近禮,儉近仁,信近情。敬讓以行

近乎情則不志乎欺,斯可信矣。不奪人則禮矣。儉則不奪,得仁之意,近乎仁矣。言語必信,存心正行,近乎情矣。 三者之言語必信,存心正行,近乎情矣。 三者之言語必信,存心正行,近乎情矣。 三者之。 儉則不奪,得仁之意,近乎仁矣。

《大雅·抑》之詩,言人能有上三者之行,進於德矣。」 愚謂: 仁者,德之全也。引知足,斯易容矣。如是而失之者鮮,可與

則可以爲德之基,而漸進於仁也。

子曰:「仁之難成久矣,唯君子能之。是故 是于天。」《釋文》、「制行,下孟反。移,昌氏反。」○今 被民之有壹也。《小雅》曰:『不愧于人,不 之,容貌以文之,衣服以移之,朋友以極之, 在,容貌以文之,衣服以移之,朋友以極之, 之,容貌以文之,衣服以移之,朋友以極之, 是故聖人之制行也,不制以己,使民 是于天。」《釋文》、「制行,下孟反。移,昌氏反。」○今 要于天。」《釋文》、「制行,下孟反。移,昌氏反。」○今 要:移,讀如字。

能則病,使衆人自彰其不能則愧矣。故聖
所能,衆人必有不能者,使衆人傚己之所
仁不難成矣,故曰『唯君子能之』。君子之
以難成。君子責人以恕,而成人有道,則

耻。 跂 乎 此 一 也。 親之喪,水漿不入口者七日,此曾子之所 所 則知愧 能 聞 愧 極而後已,則一道德而同 志,其衣服必 立信以結 所謂『不制以己』也。 慢』,非性矜莊,服使然也。 曰 也。 能 制 『衰麻、苴杖者,志不 謂 服 非特 故喪以三日爲節,則 行者爲之法,所以爲達道也。 行 使然 壹,謂專壹於爲善也 水漿不入口者三日,此衆人之所能 於人,脩其内則知畏於天,故曰『不 而有所勸勉,知不及乎此而有所愧 以 其 此也,制禮 立教,必與天下共之,以天下之 也。 志 稱其容,朋友切磋相成,至於 而使之固,其容貌必 黼黻、衮冕 以節其行而使之齊, 唯不制以己,故民 存乎樂』,非 陸氏佃曰: 俗矣。 不取乎七日 是之謂移。」 者,容不 蓋脩其外 曾子 「孔子 耳 稱其 「, 此 褻 弗 執 知

> 之德。 記,今《詩》作「其」。 服。』」《釋文》:「衰,七雷反。行,下孟反。鵜,音啼。」○ 容而無其辭,耻有其辭而無其德,耻 容,則文以君子之辭。 是故君子服其服, 而無其行。 有敬色,甲胄則 維鵜在梁,不濡其翼。 是故君子耻服其服 是故君子衰經則有哀色,端冕則 有 不可 則文以 遂其辭,則 辱之色。 彼記之子,不稱 而無其 君子之容。 容,耻有 《詩》云: 實 有 议 其 有其 君 其 德 其

皆由 也。 説。 義。 及其 見於事者也。 此申上「衣服以移之」,「容貌以文之」之 行其言如此。 有其德 此 内,脩其粗者以及其精,而言語、德 蓋衣服容貌若在於外,然養其外者 德者,道之得於心者也。 而出 焉。 而 引《曹風·候人》之篇,言人 有其辭而無其德,則辭 無其行,則知之而未能 聖人之使人勸勉愧 行者,道之 蹈 爲 耻 以 Ž 勦 以 行

成也,則與中心安仁者一也。」●脩其外以移其内,率法而强之者也。及其之德必稱其服也。 吕氏大臨曰:「此皆

侯勤以輔事於天子。」天下。天子親耕,粢盛、秬鬯以事上帝,故諸天下。天子親耕,粢盛、秬鬯以事上帝,故諸子言之:「君子之所謂義者,貴賤皆有事於

育事,有所尊事也,與《坊記》「示民有事」 有事,有所尊事也,與《坊記》「示民有事」 是盡,則在下者莫敢不從矣。 孔氏曰: 自盡,則在下者莫敢不從矣。 孔氏曰: 也,祭宗廟而裸也。若不和鬱,謂之秬鬯, 也,祭宗廟而裸也。若不和鬱,謂之秬鬯, 也,祭宗廟而裸也。若不和鬱,謂之秬鬯, 也,祭宗廟而裸也。若不和鬱,謂之秬鬯, 也,祭宗廟而裸也。若不和鬱,謂之秬鬯, 章,專明義之道也。

子曰:「下之事上也,雖有庇民之大德,不敢

枚。 是,以聽天命。《詩》云:『莫莫葛藟,施于條 帝,聿懷多福。 周公之謂與? 小心而畏義,求以事君,得之自是,不得自 身,儉於位而寡於欲,讓於賢,卑己而尊人, 役仁,信讓以求役禮,不自尚其事,不自尊其 有君民之心,仁之厚也。是故君子恭儉以求 文》:「藟,力水反。 心。《詩》云:『惟此文王,小心翼翼,昭事上 「豈」。與,音餘。」 凱弟君子,求福不回。」其舜、禹、文王、 施,以豉反。 有君民之大德,有事君之小 厥德不回,以受方國。」《釋 凱,本亦作「愷」,又作

恭也。儉於位而寡於欲,儉也。讓於賢,於位,謂不求處尊位也。不自尚,不自尊,於固,謂爲其事也。儉猶約也。儉鄭氏曰:「無君民之心,是思不出其位。」

) 「安仁」、《集説》作「憯怛」。

卑己 義則 心 蓋 盡 也。 得 仁 與 一禮以 盡之自己,命則聽之於天,此君子之 丽 不 尊 得者命也,我之所當爲者義也 事君,不以 人 讓也。 小心 外之得失而 而 畏義,信 有變焉 也

嫁反。」 自卑 之善,而美人之功,以求下賢。是故君 功,以求處情,過行弗率,以求處厚,彰人 於行也。 子曰:「先王謚 而 民敬尊之。」《釋文》:「行,下孟反。 是故君子不自大其 以尊名,節以 壹惠, 耻名之浮 事,不自 下,户 尚 子雖 其

文,武 尊崇其名譽而使可傳於後 謚者,行之迹也。 耻名浮於行,故制謚之法如此。情,實也。 其善有所專。 人之善行雖多,唯節取其大者以爲謚 王非不足於文,而 如文王非不足於武,而 先王論 謚 行以 也。 日武 爲謚 惠猶 也。 善也。 , 所 君子 謚 一,使 以

> 之矣。 可得。 以求處情,則專於爲己, 率,循也。 過 敬之也。蓋小人求名浮於行,行隳而 如此則德業日進於崇高,故雖自卑而 求下賢,則人皆樂告以善,而 有踐履之實。彰人之善,而美人之功,以 不爲過高之行,以求處厚,則篤於庸 行, 過高之行,所以欺 君子求行浮於名,行脩而名隨 厚,謂篤厚也。 世 而無馳騖之心。 君子不自矜大, 而盜名者也 有輔仁之益 行,而 名不 人尊

文》:「行,下孟反。」哉? 唯欲行之浮於名也,故自謂便人。」《釋子曰:「后稷,天下之爲烈也。 豈一手一足

不自謂神聖也。」 愚謂:人莫不有所當唯欲實行過於名,故自謂便於稼穡之人,一人之手,一人之足哉,言用之者多也。孔氏曰:「烈,業也。后稷播殖之功,豈止

君之小心者,其道一也。
君之小心者,其道一也。
君之小心者,其道一也。
君之小心者,其道一也。
君之小心者,其道一也。

平?《釋文》:「强,其良反,徐其兩反。說,音悦。樂, 对說安之,樂而毋荒,有禮而親,威莊而安, 以說安之,樂而毋荒,有禮而親,威莊而安, 以說安之,樂而毋荒,有禮而親,威莊而安, 子言之:「君子之所謂仁者,其難乎?《詩》

皆强教之效,而使民有父之尊者也。樂安定之。毋荒也,有禮也,威莊也,敬也,强教,謂强勸而教訓之。説安,謂和悦而

下,謂卑下之也。命,謂君之政令。鬼,謂 尊親,以其勢言之。土與天之尊親,以其 尊親,以其勢言之。土與天之尊親,以其 於近人,人可得而載。天覆我者也,然遠 然近人,人可得而載。天覆我者也,然遠 然近人,人可得而載。所謂君之政令。鬼,謂 人,人不可階而升。君之命見於事,近人 文》:「下,户嫁反。」

忠焉。 子曰: 反,范陽江反,又丁降反,《字林》音丑降反。喬,音驕。」 文》:「遠,于萬反。近,「附近」之近。 其民之敝,憃而愚,喬而野,朴而不文。 識。 後世政教之失也。 而 後,懲神人雜糅之敝,故事鬼敬神而遠之, 神之道示人也。 尊命,謂尊上之政教也。 也 疏,則下之機智少,故其敝也,意愚而 章引孔子論虞、夏、殷、周之道,以 ,驕倨而 專以人道爲教。 「夏道尊命,事鬼敬神而遠之,近人而 先禄而後威,先賞而後罰,親而不尊。 内之忠誠勝,則外之文飾寡,故 鄙野,朴 蓋夏承 陋 忠,情實也。 喬與驕同。 而無文。 重黎絶 遠之,謂不以 意,傷容反,徐昌 〇此 地天通之 上之文網 敝,謂 申上章 其 少知 下五 《釋 被 其 鬼 容

> 無耻。 後賞,尊而不 殷人尊神,率民以事神,先鬼而後禮,先罰 畏刑罰則相競於機變,故其敝 於虛無、故其敝也、心意 肅,則可以知殷人之先罰。尚鬼神則 之先鬼。 之篇,諄諄於先后之降罰, 人承之而尊神,尊神則尚敬也。 夏忠勝而敝,其失野。 《釋文》:「勝,始證反。」 觀商之《詩》、《書》,皆駿 親。 其民之敝,蕩而不静,勝 救野莫如敬,故殷 放 則可 蕩 也,求勝上 而不安静 觀《盤 以 厲 知 馳 殷 而 45 嚴 X m 而

反,又音弊。J〇按「蔽」字,今讀爲敝。 利而巧,文而不慚,賊而蔽。」《釋文》:「蔽,畢世焉。其賞罰用爵列,親而不尊。其民之敝,周人尊禮尚施,事鬼敬神而遠之,近人而忠

以苟免,而無愧耻之心。

人承之而尊禮尚施。尊禮尚施則文勝。殷敬勝而敝,其失鬼。救鬼莫若文。故周

凱弟君子」之義也

刑

一罰寬

,故所求於民者不備。

禮文簡,故

其敝。」

之等爲輕重之差也。 列,等也。 躬坐獄訟之類。」○三代之道,或强教之意 庶人,賜君子、小人不同日,命夫、命婦不 相接以言辭,故其敝也,文辭多而不以捷 威儀揖讓之節,故其敝也,便利而儇巧。 之時不同,而救敝之道有不得不然者爾。 多,或説安之意多,其於或尊或親,皆不能 曰:「賞罰用爵列,如刑不上大夫,禮不下 力,至於困敝 給爲慚。 無偏勝焉。非聖人之德有所未至,蓋所值 儀物繁多,故其敝也,傷害於 周之賞罰,不分先後,但以爵位 而不能 振也。 文勝則實意衰,習於 吕氏大 臨 財

未瀆辭者,夏道尚忠,尚行而不尚辭也。人强民,未瀆神,而賞爵、刑罰窮矣。」民未厭其親。殷人未瀆禮,而求備於民。周民未厭其親。殷人未瀆禮,而求備於民。周子曰:「夏道未瀆辭,不求備,不大望於民,

行脩而· 事鬼敬神而遠之也。窮,盡也。 敬之俗又敝,辭雖瀆而未足以取信,故周 罰後賞,則法網密 禮尚簡,未至於瀆,亦不大望於民。 親愛其上,不至於厭斁也。 所望於民者易從。 具,備盡而無遺也。 鬼神而盡於人事,爵賞、刑罰所以爲治之 於民,而强之使從上之教矣。 人始瀆禮,而事爲之制,曲爲之防,則大望 人猶未信,故殷人始瀆辭,然其於 是以 一, 而 所求於民者備矣。 其民安其政教,而 忠之俗既敝, 未瀆神者, 言周人遠 然先

人詳,民之不從,則窮刑賞以驅之,故不勝 時,故寡怨於民。殷、周之道文。文者責 居氏大臨曰:「虞、夏之道質。質者責人 勝其敝。」《釋文》:「勝,音升。敝,音弊。」

《釋文》:「勝,世證反,又音升。」夏之文,不勝其質。殷、周之質,不勝其文。」子曰:「虞、夏之質,殷、周之文,至矣。虞、

子言之曰:「後世雖有作者,虞帝弗可及也加乎殷、周之文,則爲後世之虚飾。」也。加乎虞、夏之質,則爲上古之洪荒。方氏慤曰:「至矣者,言其質、文不可復加方氏慤曰:「至矣者,言其質、文不可復加

芳貴反。威,依《尚書》音畏。」 芳貴反。威,依《尚書》音畏。」 芳貴反。威,依《尚書》音畏。」 芳貴反。威,依《尚書》音畏。」 芳貴反。威,依《尚書》音畏。」 芳貴反。威,依《尚書》音畏。」 芳貴反。威,依《尚書》音畏。」 芳貴反。威,依《尚書》音畏。」 芳貴反。威,依《尚書》音畏。」 芳貴反。威,依《尚書》音畏。」

民如父母:有母之親,故有憯怛之愛。有尊而不親,不免流於一偏。若虞帝,則子吕氏大臨曰:「三代之道,或親而不尊,或

當之。 畏也。 也。 也。 尊仁也,耻費 寬則不慘刻,而又有辨,則非縱弛之寬也。 將之以敬也。 輕實者,輕於貨財,廉也。 者,顧畏義理。 所以尊之也。 之教者,言其實心於利民而教之也。 也,皆由於忠利之教,而君子之所以尊之 文則不朴陋,而又能静,則非浮華之文也。 有禮也,能散也,皆由於忠利之教,而民之 怛之愛,而民之所以親之也。敬也,威也, 父之尊,故有忠利之教。」 也,皆由於憯怛之愛,而君子之所以親之 蓋 畏義也,輕實也,忠也,義也,静也,辨 安也、愛也、富也、惠也、皆由 所謂「凱弟君子」者,惟舜可以 也,不犯也,順 義而順,剛 尊仁者,尊行仁道。 耻費者,耻於靡費,儉也 忠而不犯,愛而 而克之以柔也。 愚謂:有忠利 也,文也,寬 畏義 於憯 威

故其受禄不誣,其受罪益寡。」其信。是故君有責於其臣,臣有死於其言。子言之:「事君先資其言,拜自獻其身,以成

小禄。《易》曰:『不家食吉。』」小利。故君子不以小言受大禄,不以大言受子曰:「事君,大言入則望大利,小言入則望

女,音汝。」

也。進一介之善,治一官之事,小利也。則所言者小。利及天下,澤及萬世,大利吕氏大臨曰:「大言,則所言者大。小言,

陳行言聽,利斯從之矣。」 思問 是之言也。利,謂臣所建白之效也。 所資之言也。利,謂臣所建白之效也。 所資之言也。利,謂臣所建白之效也。 所資之言也。利,謂臣所建白之效也。 於其言,而不足以稱其職。大言 以,則所望者大利也,受小禄則言浮於其 是之受禄不可苟也。若以小言受大禄 大言受小禄,則所望者小利而已,受大禄 大言受小禄,則所望者小利而已,受大禄 大言受小禄,則所望者小利而已,受大禄 大言受小禄,則所望者小利而已,受大禄 大言受小禄,則不可謂之吉矣。」 大言受小禄,則不可謂之吉矣。

之,式穀以女。」《釋文》:「共,音恭,本亦作「恭」,同。《小雅》曰:「靖共爾位,正直是與。神之聽子曰:「事君不下達,不尚辭,非其人弗自。

曰:『君子上達,小人下達。』上達者進於也。非其人而自達,枉己以事君者也。傳其君者也。尚辭而實不稱,則欺其君者且氏大臨曰:「以下達之事事其君,則賊

者也。」 正矣。 《詩》、《小雅·小明》之篇。與,助也。穀, 高 非其人而由之以進,則己先不正,而無以 趨乎污下,如孟子所謂『吾君不能謂之賊 堯、舜之道不敢以陳於王前者也。下達者 正直之人是助,則無比匪之失,而所自必 善道也。靖則不尚繁辭,恭則責難於君。 石亨,猶不免爲賢者之累,況其下者乎? 正君矣。 明, 如伊 如楊龜 愚謂:自,由也,所由以進者也 尹耻 |其君不爲堯、舜, 山之於蔡京,吴康齋之於 孟子非

尸利也。」《釋文》:「調,本亦作「諂」。」子曰:「事君遠而諫,則讇也。 近而不諫,則

諫之,凌節犯分,以求自達,故曰『讇』。有失臨曰:「既無言責,又遠於君,非其職而争,則是讇佞之人,望欲自達也。」 吕氏孔氏曰:「遠而諫,謂與君疏遠,强欲諫

爲利,故曰『尸利』。」言責之臣,不諫則曠厥官,懷禄固寵,主於

子曰:「邇臣守和,宰正百官,大臣慮四方。」 不正矣。 方也,而以正百官爲急,百官正則四方無 方之大事,非徒治一職而已。 正率之。大臣,謂卿大夫也。 否,以成君德也。 慮其便辟、側媚,故欲其和 邇臣,謂侍御、僕從之臣。 冢宰統百官,故欲其 而不同,獻可替 邇臣日在君側 宰非不 大臣 謀 . 慮 慮 四 以 ДЦ

者由於心之愛君,而陳者不能然也。 陣,謂陳數其君之失也。引《詩》以明諫君愛矣,瑕不謂矣? 中心藏之,何日忘之?』」子曰:「事君欲諫不欲陳。《詩》云:『心乎

以遠亂也。」《釋文》:「易,以豉反。遠,于萬反。」難退,則亂也。故君子三揖而進,一辭而退,子曰:「事君難進而易退,則位有序,易進而

以 周氏 遠亂 有序。 易退,則 分。 不肖倒置之謂也。」 小德役大德,小賢役大賢之謂。 否之分。 於蔽賢矣。故事君者易進而難退,則亂 義,故易。」 故君子三揖而 、諝曰:「其進也 也。 易進而難退,則干進務人,而且 、量而後人,而位必與其德相 相見者易進 吕氏 進,一辭 大臨 以 愚謂:事 丽 禮,故難。 難退 曰: 而遂退,所以 ,則亂賓主 「 位 ·君難進 亂者,賢 有序者, 其退 稱 故 故 賢 也 之 至 丽

於遥反。」雖曰『不要』,我弗信也。」《釋文》:「竟,音境。要,雖曰『不要』,我弗信也。」《釋文》:「竟,音境。要,子曰:「事君三違而不出竟,則利禄也。人

於三違,則我之必不合於君,而君之必不其竟者,若孟子三宿而後出晝是也。然至道去君,或猶有望其道之行,而不忍遽出違猶去也。利猶貪也。要,求也。人臣以

非真有不忍去其君之意也。 出竟,則必其貪慕爵禄而有所求於君,而能行其道,聽其言亦可見矣。如是而猶不

子曰:「事君慎始而敬終。」

其道 出畫。 謂 鄭氏 孔子於魯,以微罪行,孟子於齊,三宿而 慎始,不敢苟進。敬終,不敢苟去也。 也。 曰: 蓋君子雖難進易退,而其去亦 不然,則未免爲小丈夫矣。 「輕交易絶,君子所 耻。 必 有 後 愚

殺,而不可使爲亂。」子曰:「事君可貴可賤,可富可貧,可生可

已。凡違乎理義者,皆亂也。」殺,唯君所命。其不可奪者,吾之理義而吕氏大臨曰:「臣之事君,富貴、貧賤、生

志則慎慮而從之,否則孰慮而從之,終事而其位而不履其事,則亂也。故君使其臣,得子曰:「事君軍旅不辟難,朝廷不辭賤。處

亦作「耷」。」〇鄭注:「終事,「事」或爲「身」。」 「釋文》:「辟,音避。難,乃旦反。朝,直遥反。慎,退,臣之厚也。《易》曰:『不事王侯,高尚其

孰思 賤,謂 得志 使爲亂 聽 避 事 所使者非己之所欲 事 失,故孰慮 己之道也。 三:易進 之道也 也 難 ', 雖 , 亂於名實者也。 去位 慮 辭 而 患 卑辱之役也。 也。 慎慮 辱 欲 亂 自 難之事,卑辱之役,不可 而 滿 ,則職守亂矣。 於理義者 以從之。 其無悖乎君之命,而又無 難 終事,謂終竟所使之事 仕不得 也。 而從之,敬慎以從事,不 吕氏大臨 退,亂 否,謂 也。 志而 於賢 也。 既終事 [《]易 事君處其位則有 曰:「此篇言 不得 孰慮 遽退 處其位 不 得志,謂 -肖者 蠱 而後退,忠厚 其志,而 而從之,謂 ,則顯其 》之上九之 丽 也。 辭 諫 不 也 亂 履其 貶乎 君 不 君之 可 行 退, 乏 若 可 有 詳 以 言 其

質而仕,反欲高尚而不事事,則曠官尸利,辭。唯不事王侯,乃可以高尚其事。若委

無

所

逃罪矣。

君 命 奔。」○今按:唯,如字。姜、《詩》作「疆 我以爲君。」、《釋文》:「唯,音雖。 子曰:「唯天子受命于天,士受命于君。 詩》曰: 順 則 『鵲之姜姜,鶉之賁賁 臣 一有順 命,君命 逆 鶉,士倫反。 列 ()人之 臣 有逆命 無 良, 故

使爲 也。 吕氏大臨曰:「此章重述事君 此所以有逆命、順命之異,然後知其不可 從,不合則爲逆天命,爲臣者雖令不從矣。 天而治者,推天之理義以治斯人而 之義也。 於天之命,臣於君之命,皆當 命合乎理義,爲順天 亂 然惟天命 也。 天道 愚謂 無私,莫 無不順,君之命 命,爲臣者將不令而 唯,發端之辭。 /非理 義 順 不 則 君 而 可 有 己。 使爲 不 所 天子 當 順 以 有 逆 君 代 亂

則害於義理,而不可以苟從矣。可諫則己之所欲,而猶無甚害於義理者也。命逆乎君矣。上章言「終事而退」,謂其事雖非逆。君命逆則君不順於天,而臣亦將不順

諫,不可諫則去之可也。

於有病者之側,不能饋 「所」字。 占反。」 文》:「行,下孟反。 壞。《小雅》曰:『盜言孔甘,亂是用餤。』」《釋 水,小人之接如醴。 有客不能館,則不問 於有喪者之側,不能賻焉,則不問其所費; 有枝葉; 天下無道 子曰:「君子不以辭盡 ○鄭注:「接,或爲「交」。」問其所費,石經無 費,方貴反。 ,則辭有枝葉。是故君子 其所舍。 君子淡以成,小人甘以 人,故天下有道, (焉,則不問其 餤,音談,徐本作「監」,以 故君子之接 所 欲; 則行 加

也。天下有道則人尚行,故行有枝葉。天君子不以辭盡人,不以言而決人之賢否

有以 行。 義也 於人也。 則行 後至於相怨,如醴之甘而必敗。 下 論言行之要,蓋以申明第 稱「子言之」,説已見篇首。 是發端起義」。 餤』。」○皇氏謂「篇中凡八稱『子言之』,皆 臨曰:「凡言之甘而不出乎誠心者,必將 人悦人以言,一時雖 圃 實也。然君子之行己,則但當致力於行, 而其後不至於相負,如水之淡而可久。小 ·無道 不可致飾於言,故不爲無實之言以取悦 盗諸人,故曰『盜言孔甘,亂 故以言觀人者,皆不足以盡其賢否之 有餘於其言,言有枝 則人尚辭,故辭有枝葉。 君子與人以實,一時若無可悦, 然此章實發端之辭,而不 可以結人之歡,而 葉則言有餘於其 此下四章,皆 一支言信之 行有: 吕氏 是 枝葉 其 大 用

子曰:「君子不以口譽人,則民作忠。故君

始鋭反。」《釋文》:「衣,于既反。食,音嗣。説,音悦,又歸説。」」《釋文》:「衣,于既反。食,音嗣。説,音悦,又之美則爵之。《國風》曰:『心之憂矣,於我子問人之寒則衣之,問人之飢則食之,稱人

口譽人之事也。 明智人, 言徒譽之以口而不根於實心 以口譽人, 言徒譽之以口而不根於實心

『矢誓』。旦,如字、《字林》作「悬」。』 思,亦已焉哉。』」《釋文》:「菑,音災。信誓,本亦作『言笑晏晏,信誓旦旦。 不思其反,反是不君子與其有諾責也,寧有已怨。《國風》曰:子曰:「口惠而實不至,怨菑及其身。是故子曰:「口惠而實不至,怨菑及其身。是故

愚謂:引《衛風・氓》之篇,言約誓者不思不許也。言諾而不與,其怨大於不許。」鄭氏曰:「善言而無信,人所惡也。已,謂

子曰:「情欲信,辭欲巧。」

犯日月,不違卜筮。非卜筮之用,不敢以其私褻事上帝。是故不于言之:「昔三代明王,皆事天地之神明,無

筮。○此以下皆言卜筮之義,又以申明第故不犯日月。既卜筮,必從之,故不違卜犯,謂犯其不吉之日也。卜筮吉,然後用,謂、私,謂情之所便。褻,謂事之所習。鄭氏曰:「所不違者,日與牲尸也。」 愚

五章「貴賤皆有事於天下」之義也。

卜筮不相襲也。

大事有時日,小事無時日,有筮説見《曲禮》。

東氏曰:「有事於大神,有常時常日也。 有事於小神,無常時常日,臨有事筮之。」 有事於小神。」 愚謂:大事雖有常 日,亦必卜之,但以常日爲主耳。《周禮・ 日,亦必卜之,但以常日爲主耳。《周禮・ 大宰》「祀五帝,帥執事而卜日,祀大神示 亦如之」,是也。天子大事先卜後筮,小事 事用卜,故云「天子無筮」。此云小事有筮 者,謂諸侯之禮也。

就見《曲禮》。 外事用剛日,内事用柔日。

無害乎鬼神,無怨乎百姓。」《釋文》:「牷,音全,本不違龜筮。」子曰:「牲牷、禮樂、齊盛,是以

亦作「全」。齊,音楽,本亦作「齍」。」

百姓。而無傷害乎鬼神,神降之福,故無怨乎不違龜筮,故用牲牷、禮樂、齊盛以祭祀,「子曰」二字,疑當在「不違龜筮」之上。言

悔,以迄于今。』」《釋文》:「易,以豉反。」其禄及子孫。《詩》曰:『后稷兆祀,庶無罪子曰:「后稷之祀易富也,其辭恭,其欲儉,

祀 歲 明不違龜筮,動合神明,故此明后稷祭祀, 帝嚳之子,世有禄位,后稷又祭祀恭儉,以 鄭氏曰:「富之言備也。 則秬、秠、糜、芑,「取蕭祭脂,取羝以軷」而 福流後世,以證成其義。」 愚謂:后稷之 世禄之饒,供儉薄之祭,故易豐備 儉者之祭,易備也。」 ,見於《生民》之篇,其**辭** 而已,無祈禱之辭,是恭 孔氏曰:「后稷乃 以傳世之禄,共 則曰「以 也。 其所欲 以前 興嗣

唯其易備故也。言自后稷始爲祭祀,以迄於今而無罪悔,已,是儉也。兆,始也,今《毛詩》作「肇」。

也。 不筮、皆簡於其在國之禮 國」,互見之也。 道,道路也。天子言「道」,諸侯言「非其 守筮,猶言守龜,言其所寶守之蓍筴也。 敬而不可 大人之器,謂龜筴也。 卜宅寢室者,諸侯適他國,於所舍之寢室, 《大卜》, ①凡國之大事, 先卜而 以 一褻用 在道,天子但 也。 天子無筮,無 威敬,言其威重嚴 也。 用筮,諸侯 宅, 處也。 後 徒 筮。 統

^{● 「}大卜」、《周禮注疏》作「蓉人」。

至尊無所疑也。者,天子適諸侯,必舍其大廟,不須卜之,卜而後處之,備不虞也。天子不卜處大廟

民,下不褻於上。」不違龜筮,以敬事其君長。是以上不瀆於子曰:「君子敬則用祭器。是以不廢日月,

禮記卷五十一終

禮記卷五十二

國史館纂脩孫希旦集解賜進士及第翰林院編脩

繼衣第三十三《别録》屬《通論》。

章之語以名篇。 其曰《緇衣》者,取次也』。」 愚謂:此篇言君上化民,人臣事也』。」 愚謂:此篇言君上化民,人臣事

不煩矣。」《釋文》:「易,以豉反。」子言之曰:「爲上易事也,爲下易知也,則刑

則民亦以機心報上。上下之交,機心相以措。」 吕氏大臨曰:「上以機心待民,鄭氏曰:「言君不苛虐,臣無姦心,則刑可

子曰:「夫民,教之以德,齊之以禮,則民有

反。惡惡,上烏路反,下如字。」」《釋文》:「好,呼報子曰:「儀刑文王,萬國作孚。」」《釋文》:「好,呼報不瀆而民作愿,刑不試而民咸服。《大雅》子曰:「好賢如《緇衣》,惡惡如《巷伯》,則爵子曰:「好賢如《緇衣》,惡惡如《巷伯》,則爵子曰:「好賢如《緇衣》,惡惡如《巷伯》,則爵人。惡惡,上烏路反,下如字。」

也。 惡,不待勸以賞而民自愿慤,不待加以 誠苟能如此,則民莫不趨其所好而避其所 雅》篇名、詩人惡讒人欲投之豺虎、有北、 勤無已如此,好賢之誠也。《巷伯》、《小 欲改爲其衣,又欲適其館而授之粲,其殷 君能法文王之德,則亦爲民所信也 有昊,惡惡之誠也。 而民皆畏服矣。 .緇衣》、《鄭國風》篇,周人美鄭武公之賢, 文王明德慎罰,故其德爲民所信。 儀、刑,皆法 人君之好賢、惡惡,其 也。 孚,信 刑

格,至也,謂至於善也。遯,逃也,謂苟逃 完之格也。匪用命,《書》作「弗用靈」。 民之格也。匪用命,《書》作「弗用靈」。 民之格也。正用命,《書》作「弗用靈」。 民之格也。子以愛之,信以結之,恭 以涖之,皆教德齊禮之事。親遜不倍,則 民之格也。子以愛之,信以結之,恭 以之,謂至於善也。遯,逃也,謂苟逃

好惡,不可不慎也,是民之表也。」行。上好是物,下必有甚焉者矣。故上之所子曰:「下之事上也,不從其所令,從其所

令之被民也淺,行之感民也深。故上之所

慎也。」

「一國之風俗,出於上之好惡。此不可不足。其俗之成,或至於不可敗。此不可不之端,其發甚微。其風之行,或至於不可之端,其發甚微。其風之行,或至於不可之端,其發甚微。其風之行,或至於不可以,其令所能勸也。 吕氏大臨好,民亦好之,非令所能禁也。上之所惡,

然此非民之皆能仁也,由禹好仁,故民皆感,成也。以仁遂,言民之仁無不成也。『成王之孚,下土之式。』『成王之孚,下土之式。』《大雅》曰:『成王之孚,下土之式。』《大雅》曰:『成王之孚,下土之式。』

之。』」《釋文》:「長,竹丈反。説,音悦。牿,音角。行,下以説其上矣。《詩》云:『有梏德行,四國順民者章志、貞教,尊仁以子愛百姓,民致行已子曰:「上好仁,則下之爲仁争先人。故長

化於仁爾。

孟反。」〇今按:梏,如字,音谷。

之好仁而惡不仁也。貞教者,以正道導 詩》作「覺」。 所好也。梏,《爾雅》云:「直也。」今《毛 愛其民,則民莫不盡力於行仁,以趨上之 在己,與教之及民者,皆在於尊尚仁道以 民,使民皆知所以爲仁而去不仁也。 志之 章,明也。 章志者,明己之志,使民皆知我 仁者民之所固有,上好之則下爲之矣。

也。 行,君子弗言也。 出如綍。故大人不倡游言: 可言也,不可 子曰:「王言如絲,其出如綸。王言如綸,其 倫,又古頑反。綍,音弗。 云:『淑慎爾止,不諐于儀。』」《釋文》:「綸,音 則民言不危行,而行不危言矣。 可行也,不可言,君子弗行 危行,而行,並下孟反。 諐,起虔 《 詩 》

反。」〇按:魯,《詩》作「愆」,同 綸,綬也。綍,引柩索也。 綸大於絲, 綍大

> 於綸。 過也。」 謂過高之言,不可見之於行事者。 可行不 不過於先王曲禮之儀,以證言行之不可 曰:「引《詩》言爲人上者,當善慎其容止, 行不敢高於言,行必顧言也。 民效之。故言不敢高於行,言必顧行也, 危,高峻也。君子之言行,不越乎中庸,而 爲游言,而虚浮之風作矣。可言不可行, 其末甚大。苟以游言倡之,則天下亦相率 言,宣之爲政教,成之爲風俗,其端甚微 可言,謂過高之行,不可言之以率人者。 游言,浮游無實之言也。 吕氏大臨 王者之

《釋文》:「道,音導。於緝,音烏。」 必慮其所終,而行必稽其所敝,則民謹 子曰:「君子道人以言,而禁人以行。 而 儀。』《大雅》曰:『穆穆文王,於緝熙敬止。』」 慎於行。 《詩》云:『慎 爾出話,敬 爾威 故言 於言

無不慎也。 無不慎也。

音二。黄,徐本作「横」,音同。行,下孟反。」民所望。」」《釋文》:「長,竹丈反。貳,本或作「貸」,同黄黄。其容不改,出言有章。行歸于周,萬其民,則民德壹。《詩》云:『彼都人士,狐裘子曰:「長民者,衣服不貳,從容有常,以齊

德之所發也。故以此化民,而民之德亦歸貳,差忒也。衣服之不忒,言貌之有常,皆

子曰:「爲上可望而知也,爲下可述而志也,

於一也。周,忠信也。

語。忒,他得反,本亦作「貳」,音二。」 人君子,其儀不忒。」」《釋文》:「吉,依注爲「告」,音 日:『惟尹躬及湯,咸有壹德。』《詩》云:『淑 則君不疑於其臣,而臣不惑於其君矣。尹吉

亦作「恭」。好,呼報反。」「釋文》:「章義,《尚書》作「善」。擅,丁但反。共,音恭,本情不貳。《詩》云:『靖共爾位,好是正直。」」子曰:「有國家者,章善擅惡以示民厚,則民子曰:「有國家者,章善擅惡以示民厚,則民

善居其厚,惡居其薄,此所以示民厚也。臨曰:「明之斯好之矣,癉之斯惡之矣。鄭氏曰:「章,明也。擅,病也。」 吕氏大

好善惡,則民壹歸於義理,此民情所以

子曰:「上人疑 則民不惑矣。臣儀行,不重辭,不援其所不 故君民者章好以示民俗,慎惡以 行,如字。 共,惟王之邛。」」《釋文》:「好,呼報反。 惡,烏路反。 及,不煩其所不知,則君不勞矣。《詩》云: '躬」。邛,其恭反。」 「上帝板板,下民卒擅。」《小雅》曰:『匪其止 不貳也。」 亶,丁但反,本亦作「擅」。 災則百 姓惑,下難知則君 共,音恭,皇本作 御民 之淫 長 勞。

其旨意不顯白也。 君之所行也。 定,而不至於惑矣。 疑,謂好惡不明 則不至援其所不及。不多爲辭説以瀆之, 援,引也。 所惡,使民皆知我之好善而惡惡,則從 爲臣者度君之所能 不重辭,不多 也。 爲上者章其所好, 儀, 度也 難知,謂 陳言於 爲 行 儀行 辭 而 説 引之, ',儀度 慎 君 也 違 其 而

> 惑,引《巧言》之詩以證下使上勞也 爲高遠難行之説,强其君以必從,亦 則不 之所可行者乎? 材質,又有昏明强弱,若不量度乎此, 當責難 言之可行,而不至於勞矣。 至煩其所不知。 於君,然時 引《板》之詩以證君 '勢有難易緩急,而 如 此 蓋 則 二爲人 君 坦 臣 然 使民 知 豈 丽 君 者 事 遽 雖 我

『播刑之不迪。』」播、《書》作「布」,又無「不」字。爵。《康誥》曰:『敬明乃罰。』《甫刑》曰:勸也,刑罰不足耻也,故上不可以褻刑而輕子曰:「政之不行也,教之不成也,爵禄不足

則民. 也。一 德 耻,民知所耻 鄭氏曰: 必有罪 ,則爵輕而 知 則刑 所勸 愚謂: 播 民 施施 褻而民不耻。 則政行。 民不勸矣。 刑罰必加於有罪,則民知所 知 也。 所勸 不,衍字耳。 則 爵禄必 教 播刑之不迪者 成 所爵者不必有 加於有德, 所刑者不 迪,道

言民之不迪者,乃施之以刑也。今《書》無

不」字。

莊士大夫、卿、士。」」《釋文》:「治,音值。 化,毗志原也,是民之道也。 君毋以小謀大,毋以遠慎也,是民之道也。 君毋以小謀大,毋以遠原不而之,是民之道也。 君毋以小謀大,毋以遠原不蔽矣。 葉公之顧命曰:『毋以小謀不疾,而遠臣不蔽矣。 葉公之顧命曰:『毋以小謀不明之道也。 大臣不治,而邇臣比矣。 故子曰:「大臣不親,百姓不寧,則忠敬不足,子曰:「大臣不親,百姓不寧,則忠敬不足,

則慢。 民。 大臣不親者,謂君疏其大臣,而大臣亦自 忠,謂待以實心也。 疏於其君也。 大臣 忠敬不足,而徒厚 君之於大臣,既富貴之,則宜 疏則政令不行,而百姓不寧矣。 大臣者,所 忠不足則疑,敬不足 以富貴,則君臣之 以 出政令以治 敬 信

反。」〇葉,當作「祭」,側界反。

也。 親 間以利相與,以貌相承,此大臣之所以不 卿、士,謂齊莊之士爲大夫、卿、士者也。 慎也。葉當作「祭」,字之誤也。將死 蔽之患生,故邇臣皆得比周 嬖御人,謂嬖寵之妾。莊后,謂齊莊之后 小謀,小臣之所謀。大作,大臣之所爲也。 穆王之言也。今見《逸周書・祭公解》篇。 日 右,所以成君德以導民,故擇之不可 以不敬。 大臣尊重,民所視以爲表率,故待之不可 |顧命。 也。 陸氏德明曰:「穢而得幸曰 嬖御士,嬖寵之近臣也。 大臣 慎,謂慎擇其人也。 祭公之顧命者,祭公謀父將死告 疏於上,而 不得治其職 以欺其君也。 Ⅰ嬖。」 邇 莊士大夫、 朝夕左 一則壅 以不 而

如不我得。執我仇仇,亦不我力。』《君陳》以親失,而教是以煩。《詩》云:『彼求我則,子曰:「大人不親其所賢,而信其所賤,民是

由聖。』」《釋文》:「陳,本亦作古「噉」字。」曰:「未見聖,若己弗克見。既見聖,亦不克

所賢,謂貴者,所賤,謂不肖者,互言之也。 者必不肖,賢者宜親,不肖者宜疏,此理之 常也。今乃反之,則賢者不見親,而所親 常也。今乃反之,則賢者不見親,而所親 權,賤者起而奪之,此教之所以煩也。引 權,賤者起而奪之,此教之所以煩也。引 權,賤者起而奪之,此教之所以煩也。 臣之證也。

也。 敬不 子曰:「小人溺於水,君子溺於口,大人溺於 虞機張,往省括于厥度則釋。』《兑命》曰: 難悔,易以溺人。夫民閉於人而有鄙 易狎而難親也,易以 民,皆在其所褻也。 《大甲》曰:『毋越厥命以自覆也。』『若 可慢,易以 溺 人。 (溺人。 夫水近於人而溺 故君子不 口費 而 可以 煩,易出 人,德 心, 不慎 可

> 泰。 催 相,息亮反。」 〇鄭注:「費,或爲「哱」,或爲「悖」。 見,或爲 書》作「弗可逭」,無「以」字。 吉,音告。 天,依注作「先」。 作孽,猶可違也」。不可以逭,本又作「跎」,呼亂反。《尚 于西邑夏,自周有終,相亦惟終。』」《釋文》: 自作孽,不可以逭。」尹吉曰:『惟尹躬天,見 亦作「説」。兵、《尚書》作「戎」。孽,魚列反。《尚書》作「天 「近,「附近」之近。費,方貴反。慢,本又作「漫」。● 大,音 戈省厥躬。』《大甲》曰: 「敗」。邑,或爲『子」。」 度,如字,又大各反。《尚書》無「厥」字。 兑,音悦,本 口 起羞 ,惟甲胄起兵,惟衣裳在笥,惟干 『天作孽 可 違也。

人覆没於禍患,不能以自出者,皆在其易也。君子,謂士大夫。大人,謂王公。凡忠信爲周。」 吕氏大臨曰:「小人,謂民忠信爲周。」 吕氏大臨曰:「小人,謂民歟氏曰:「言人不溺於所敬者。溺,謂覆

❶ 「漫」、《釋文》作「優」。

易出 此取溺之道也。 公者慢而不敬,則輕身輕上,無所不至,此 理喻,惟賤故有鄙心,多怨而無耻。 賤,上之所易也。 於己則費,於人則煩,其甚至於害身喪德, 而 終,皆君所自致也。」 患之來,●莫非自取,尹 患。《兑命》言庶政 之射禽,張機省括而後發,則無溺於民之 民之溺人也。 褻之也。 而不可悔,非口 水之德至柔,民狎之而不戒, 引《大甲》,言爲政者如虞人 古之君子,辭達 惟愚故蔽於心,而 《不可不慎,《大甲》言禍 之溺人乎? 、 告言君以忠信有 m 民 已,若 爲王 不可 愚 且

子曰:「民以君爲心,君以 之民必欲之。 體舒,心肅 明 存,亦以民亡。 Ħ 清,國家以 則 容敬。 心以體全,亦以體傷。 君以 《詩》云:『昔吾有先正,其言 寧, 都邑以成,庶民以生。 心好之身必安之,君 民爲體。 心 莊 民 好 誰 則

> 字。 能 字。資、《尚書》作『咨』。]〇按:小民亦惟 如字」。上「先正」,當音征。 至「庶民以生」五句,今《詩》皆無此語,餘在《小雅 民亦惟曰怨。』」《釋文》:「好,呼報反。 山》篇,或皆逸《詩》也。 曰:『夏日暑雨,小民惟曰 怨」下有「咨」字。 秉國成,不自爲 雅,音牙,《尚書》作『牙』。 清,舊才性反,一云「此詩協 正,卒勞百 誰能秉國成、《毛詩》無『能 夏,户嫁反。 怨。 □姓。』《 資冬祁寒,小 《尚書》無「日」 『昔吾有先正 日怨、《尚書 君 韻,宜 節 雅》 南

則 求之實理則 正,先世之賢臣也。 所由分也,可不謹與? 則君之所好,其公私得失之間,乃存亡之 民之欲惡由於君,而君之存亡係於民。 有 吕氏大臨曰"「心體之説,姑以爲譬,然 君 也 非 體傷則 : 譬也。 心悸,猶 體完則心説 國成,邦之八成也。 《詩》,逸《詩》。 民 病則君 有

▶ 「來」、《集説》作「溺」。

教乎?」《君雅》言天之寒暑小民且怨之,况君之政也。引《詩》言君不正民之所以勞也,引

格」同。」
不壹,行無類也。」《釋文》:「行,下孟反,下「行有不壹,行無類也。」《釋文》:「行,下孟反,下「行有子曰:「下之事上也,身不正,言不信,則義

陳氏祥道曰:「下之事上,以身爲本,而信 以成之也。身正然後無好異之行,是以行 之行者斯無類。言不信則德二三矣,其別 於壹。身不正則動皆反常矣,其形於可見 於壹。身不正則動皆反常矣,其形於可見 於事君之義者斯不壹。」

『淑人君子,其儀一也。』」《釋文》:「是故,一本作陳》曰:『出入自爾師虞,庶言同。』《詩》云:之;多志,質而親之,精知,略而行之。《君奪志,死則不可奪名。故君子多聞,質而守子曰:「言有物而行有格也,是以生則不可

吕氏大臨曰:「有物則無失實之言,●有格「以」。」○鄭注:「精,或爲「清」。也,今《詩》作「兮」。」

與名不可得而奪也。 守之者,服膺弗失也。親之者,學問不厭 欲博也。多志,多見而識之也。質,正也。 義,不義之名,君子所不受也。 多聞,所聞 則無踰矩之行,生乎由是,死乎由是,故 略字從田從各,乃土田之界别,故此借以 略」、「封畛土略」,證此「略」字之義,是也。 之道也。」 至約而行之。略,約也。 也。由多聞多志而得之,又當精思以求其 不敢信己,質衆人之所同,然後用之也。 古者博矣。質而守之,質而親之,則所以 爲分别之義。蓋多聞多志,則所以考之於 愚謂:鶴山魏氏 義重於生,舍生而 此皆義壹、行 引「侵敗王 取

度當歸於純一,所謂「略而行之」也。謂「質而守之,質而親之」也。引《詩》言儀其可否而行之。如此必無無物之言,踰格其可否而行之。如此必無無物之言,踰格其可否而行之。如此必無無物之言,踰格,就後分別辨之於人者審矣。於是又反之於己,而體辨之於人者審矣。於是又反之於己,而體

惡,烏路反。」○今按:正,如字。仇,《詩》作「逑」。《釋文》:「好,呼報反,下皆同。正,音匹。鄉,許亮反。惑,而遠者不疑也。《詩》云:『君子好仇。』」君子之朋友有鄉,其惡有方。是故邇者不子曰:「唯君子能好其正,小人毒其正。故

者也。是以能見信於遠邇也。 善者也。其所惡亦有一定之方,必其不善 也。君子所交之朋友,有一定之鄉,必其 此。君子所交之朋友,有一定之鄉,必其 正,謂益者之友,能正己之失者。唯君子

子曰:「輕絕貧賤,而重絕富貴,則好賢不

《詩》云:『朋友攸攝,攝以威儀。』」堅,而惡惡不著也。人雖曰不利,吾不信也。

貧賤者未必不賢也,而輕於絕之,則必有 以賢而見絕者,而好賢之心不堅矣。富貴 而見容者,而惡惡之心不著矣。如此則其 一見容者,而惡惡之心不著矣。如此則其 交也徒以勢利,而不以道義也。引《詩》言 人之交友,當相攝以威儀,不可以貧賤、富 貴爲向背也。

反,又如字。」〇鄭注:「歸,或爲「懷」。」
云:『人之好我,示我周行。」」《釋文》:「行,戶剛子曰:「私惠不歸德,君子不自留焉。《詩》

禮,則 之矣。 待孔子以季孟,而不能行其道,則孔 德義之公,則君子不以其身留之。 君子愛人以德,苟有私惠於我,而 孟子辭之矣。 齊王 饋 孟子以兼 周行, 金,而 大 道 不 齊景公 能 也 不 歸 子去 處 於 以 引

《詩》言人之相好,當相示以大道,而不可

以私惠也。

庾氏讀。 成言之,一本無「人」字。射,音數。」○今按"「敝」字,當從 見其成。《葛覃》曰:『服之無射。』」《釋文》: 見其成。《葛覃》曰:『服之無射。』」《釋文》: 是其成。《葛覃》曰:『服之無射。』」《釋文》: 是其成。《葛覃》曰:『服之無射。』」《釋文》: 是其成。《葛賈》曰:『服之無射。』」《釋文》: 與其成。《葛賈》曰:『服之無別。』」《釋文》: 與其成。《葛賈》曰:『服之無別。」」《釋文》: 與其成。《葛賈》曰:『服之無別。』」《釋文》: 與其成。《葛賈》曰:『服之無別。』」《釋文》: 與其成。《葛賈》曰:『服之無別。」」《釋文》: 與其數。 苟有衣,必見其

者、證有衣必見其蔽之義。言行不可得而掩、亦猶是也。引《葛覃》高。衣成則必衣之、而見其蔽於體。人有敝當作「蔽」。車成則必駕之、而見其軾之

爲也。』《小雅》曰:『允也君子,展也大成。』云:『白圭之玷,尚可磨也。斯言之玷,不可以成其信,則民不得大其美而小其惡。《詩》以成其信,則民不可飾也。故君子寡言而行,子曰:「言從而行之,則言不可飾也。行從

按"寡,如字。允也、《詩》作「允矣」。「割」字句絶。同。寡,音顧,出注。周田觀文,依注讀爲割申勸寧。」〇今集大命于厥躬。」」《釋文》:「行從,下孟反,下「則行」《君奭》曰:『在昔上帝,周田觀文王之德,其

奭》言文王有誠信之德,爲天所命,況於 子,展也大成,言君子非信則不成 故自有所不得然爾,非禁於勢也 以言飾之使著,是爲張其美。本有惡 大臨曰:「言之不信,所謂玷也。 小其惡者,由化於君子,皆尚行而 言飾之使減,是爲 得張大其美,而減小其惡也。 其所言者無不踐,而無虚僞之言,故民不 其言也。 行不可飾,飾則行不顧言矣。信,謂能踐 言不顧行矣。 君子之言,必從而行之,故言不可飾 君子不尚多言,而惟致力於行 君子之行,必從而言之,故 小其惡。 不得大其美而 蓋本無美而 也。 不尚言, 允也君 飾 吕氏 丽 以 則

則難。 子曰:「南人有言曰:『人而 兑,音説。 其德偵,婦人吉,夫子凶。』」《釋文》:「與,音餘 事。』純而祭祀,是爲不敬。 猶。」《兑命》曰:『爵無及惡德,民 況於人乎?《詩》云:『我龜既厭,不我 卜筮。」古之遺言與? 而作「黷于」,事煩作「禮煩」。 '煩」。」○按:《書》無作「罔」,又無「民立而正事」一句,純 《易》曰:『不恒其德,或承之羞。』『恒 偵,音貞、《周易》作「貞」。」○鄭注:「純,或爲 龜筮 猶不 事煩則亂,事 無恒,不可 能知也,而 立 圃 以 正 神 告 爲

謂:民立而正事者,言以爵加人而立之爲煩則亂,使事鬼神,又難以得福也。」 愚惡德,無恒之德也。惡德之人使事煩,事褻而用之,龜厭之,不告以吉凶之道也。言軟氏曰:「恒,常也。不可爲卜筮,言卦兆

所不可如婦人之專一也。 解,又以明所謂恒者,當因義而制其變通, 九三爻辭,以明無恒之取羞。引六五爻 則亂於典禮,而事神難以得福也。引《易》 則亂於典禮,而事神難以得福也。引《易》 即大夫,必其有恒而行正道者。若無恒之

禮記卷五十二終

禮記卷五十三

賜 國 史館 進 士 纂脩 及第翰 孫 希 林 院編 日 集解 脩

奔喪第三十四《别録》屬《喪服》。

奔喪禮,屬凶禮也。」 文,而《禮》家又貪其説,因合於《禮記》耳。 之禮,實逸《曲禮》之正篇也。 鄭氏曰:「《奔喪》者,居於他邦聞喪奔赴 藝論》云:『漢興,高堂生得《禮》十七篇 之逸《禮》,其《投壺》篇 今《儀禮》正同,其餘四十篇 於魯淹中得古《禮》五十七篇,其十七篇與 |禮》||者、《漢書・藝文志》云:『漢興,始 孔氏曰:「鄭云『逸 亦 此 類 藏在秘府 漢興後 也。』又《六 得古 謂

之者。 删者,而鄭氏尚得見之也 存。 皆《儀禮》之正經也。《儀禮》古經五十六 禮》者,此《奔喪禮》對十七篇爲逸《禮》,録 篇與前同,而字多異。』按:《漢書·藝文志》: 與《投壺》爲小戴録人《禮記》,故幸 篇,藏在秘府,世莫之見,後遂散逸。 其實祗一 入於《記》,其不入於《記》者,又比此爲逸, 七篇外,即謂之逸,下文鄭注又引逸《奔喪 多一篇,未詳其説。 《六藝論》,亦云「古文《禮》五十七篇」,視今《漢志》所言 七篇。」「《禮》古經者,出於魯淹中,多三十九篇。」此引 「《禮》古經五十六卷。」又云:「漢興,高堂生傳《士禮》十 後孔子壁中得古文《禮》五十七篇,其十七 《漢志》云「古禮五十七篇,多今《儀禮》四十篇。」又引 然此篇雖爲小戴所録,而其中已有删 鄭注所引逸《奔喪禮》,即戴氏之所 一篇也。 以此言之,此《奔喪禮》十 愚謂:此篇與《投壺 此篇 而 得

奔喪之禮:

葬而至,有除喪而後歸,其禮各不同。 喪即奔,有聞喪不得奔,有既殯而至,有既 云「奔喪之禮」,所以總目一篇之事也。 有母,有齊衰以下。 奔喪者,在外聞其 奔」者,著其急也。 親屬之喪而歸也。 以奔之遲速,則有聞 以喪之輕重 ,則有父, 首 日

始聞親 然以士爲主。」 喪,以哭答使者,盡哀,問故,又哭

孔氏曰:「此《奔喪禮》,兼記天子、諸侯,

盡

哀。

哭也 父母,聞喪而 鄭氏曰:「親,父母也。以哭答使者,驚怛 功以上之親。 文言「唯父母之喪」,則此言「親喪」,謂大 之哀無辭也。 哭,其禮亦然。」 問故 此哭,即於其聞喪之所而 ,問親喪所由也。 愚謂 雖非 下

右始聞喪。

遂行,日行百里,不以夜行。

分,别於昏明。 鄭氏曰:「雖有哀戚,猶辟害也。 哭則遂行者,不爲 位。」 晝 夜之

愚謂: 日行百里,行兼程也。 吉行日五

十里。

唯父母之喪,見星而行,見星而舍。

鄭氏曰:「侵晨冒昏,彌益促也。言『唯』,

著異也。」

父母之身痁患。 母之喪而奔,雖患不敢避也。 舍,就館舍也 非是則不以

若未得行,則成服 而 后行。

鄭氏 曰:「謂 以 君命有爲者也。 成喪服,

得行則行。」

右行。

下同。」 過國至竟,哭,盡哀而止。《釋文》:「竟,音境:

愚謂:身,父母之身也,爲父

鄭氏曰:「感此念親。」

哭辟市朝。《釋文》:「辟,音避。朝,直遥反。」

鄭氏曰:「爲驚衆也。」 愚謂:凡治民之

處皆曰朝。

望其國竟,哭。

鄭氏曰:「斬衰者也。自是哭且遂行。」

愚謂:過國至竟哭,望其國竟哭,皆謂

奔

父母之喪者也。

右過國至望其國竟。

盡哀,括髮、袒,降,堂東即位,西鄉,哭成踊,至於家,人門左,升自西階,殯東,西面坐,哭

襲、絰于序東,絞帶。

矣。 服 節 者,素委貌、深衣。 鄭氏曰:「括髮、袒者,去 衣也。 ,於是可也。 降,堂東即位者,已殯者位在下。 不於又哭乃絰者,發喪已 其未小斂而至,與在家 已成服者,固 飾 也。 自 未 踰 喪 成 服 服 日

阼階 始至即 絞帶,絞苴麻爲之。 在家者異日也。 也。 同。」 未殯至者,則終其散麻之日數,其成服 未小斂至者,成服與在 衣,明日乃袒、括髮,與在家者之禮同。 經不著殯前至者之禮,蓋始至笄、纚、深 此謂未成服而奔喪者也。 郊而後免」,故知在路皆冠也。」 冠。又《小記》云『遠葬者,比反哭皆冠,及 爲人子者,『升降不由阼階』,今父母 之縞總,似男子之素冠,故知布深衣、素 在塗」,遭喪,『改服布深衣,縞總』。女人 未忍異於生也。 升自 東西 孔 括髮、袒者,至在殯後者之禮 氏 西階、居喪之禮、不由阼階也 面之位也。 日 降自西階,堂東即 《曾子問》云『壻親 「升自 吉時有大帶,有革帶 絰,首絰、要帶也。 家者同日,既 西階者、《 入門左,變於吉 曲 愚謂 位 迎,女 禮》云 新 小 即即 也 死, 與 斂 但

帶也。 之,故謂之絞帶。蓋吉服之革帶 服乃絞之。 也 凶 云: 帶,凶服之絞帶亦 前 謂 孔 之先,要絰亦散垂,其絞者特象革帶之帶 帶之帶也。 小斂即絞帶,而衆主人又用布,此皆象革 主人袒、髻髮,絞帶,衆主人布帶」。 爲絞要絰也。《士喪》記:「小斂,既馮尸, 耳,正與《士喪》記 時 則 至笄、纚、深衣,至小斂 疏之支謬,皆鄭氏此語啟之也。 又鄭氏 「未小斂而至,與在家同」,蓋士小斂之 「不散帶者,不見尸柩。」此誤以 有 要絰自大功以 死 《雜記》「凡異居,始聞兄弟之喪」章 要經 日也。 奔喪者至三日乃成服,未成服 其象革帶之帶,初服 象大帶,又有絞帶以 奔喪者若以 同,非以不見尸 輕於要經 上,初喪皆散 而 小斂前至,則 括髮,小斂後 也 垂, 象革 輕 極不散 時 。 主人 於大 鄭 絞帶 即 至 帶 成 氏 絞

反位,拜賓,成踊,送賓,反位。有賓後至者,「知《雜記》所言,自謂至在小斂後者也。「親者终其麻、帶、絰之日數」,故生此説,「帶、絰自用其奔喪日數」,此因《雜記》言拜賓而襲、絰,皆與在家者同日。疏乃謂

則拜之、成踊、送賓皆如初

鄭氏曰:「拜賓者就其位,既拜,反位,哭鄭氏曰:「拜賓者就其位,既拜,反位也。反位也。《士喪禮》小斂後,「主人拜賓」,
「大夫,則袒而拜之,不待襲也。送賓,送之大夫,則袒而拜之,不待襲也。送賓,送之大夫,則袒而拜之,不待襲也。送賓,送之於殯宮門外。

告就次。《釋文》:「相,息亮反。」衆主人、兄弟皆出門,出門哭止,闔門,相者

衆主人,大功以上之親。兄弟,小功以下

也。次,倚廬也。 闔門,闔殯宮門則衆主人、兄弟皆出也。闔門,闔殯宮門之親也。主人出送後至之賓,殯宮事畢,

袒,成踊。 於又哭,括髮、袒,成踊。於三哭,猶括髮、

袒。」 其夕哭,但即阼階下位,不升堂也。 髮,不袒,不踊,不以爲數。」 又哭、三哭者,象小斂、大斂時也。《雜記》 明日朝也。 鄭氏曰:「又哭,至明日朝 者、象在家者襲及大、小斂三時之哭也。 『小記》云『三日五哭三祖』,故知夕哭不 曰: 『士三踊。』其夕哭從朝。 愚謂**:** 皆升堂括髮、袒,如始至。 初至三日,皆升堂鄉殯而哭 也。 三哭,又其 夕哭不括 孔氏 日 必

三日成服,拜賓、送賓皆如初。

其喪服,杖於序東。」 愚謂:鄭知成服於鄭氏曰:「三日,三哭之明日也。既哭,成

之,親者終其麻帶絰之日數」,是也 喪,及主人之未成絰也,疏者與主人遂成 者成服與在 於西房與。 序東者,以小斂襲、経于序東決之也 與在家者異日。 則凡成服者,皆於此矣。 凡奔大功以上之喪,小斂前 家者同 《雜記》曰「未服 日,小斂後至者,成服 若婦人,則成 麻 而 奔 至 服 然

右至家成服。

文》:「爲,于僞反。」奔喪者,非主人,則主人爲之拜賓、送賓。《釋

非主人,謂衆子也。此著其異者。其餘禮

與主人同。

右奔喪者非主人。

哀,免、麻于序東,即位袒,與主人哭,成踊。奔喪者自齊衰以下,入門左,中庭北面,哭盡

鄭氏曰:「不升堂哭者,非父母之喪,統於《釋文》:「齊,音咨。免,音問。」

凡袒 西階。 主人 於房,經於序東。此既不升堂,故其免與 北面,與奔父母之喪異。衆主人在家,免 此 袒,皆異於爲父母也。 鄉殯也。 所奔喪雖 絰皆於序東。 免、麻一時爲之,又既 (麻乃袒,變於爲父母也。) 也。 者於位 中庭,西階下南北之中也。 人門左,與奔父母之喪同。 麻,亦経、帶也。 有輕者,不至喪所,無 ,襲於序東,袒、襲不相因 既成踊,乃襲。 於此言麻者,明 愚謂:殯在 改 北面 服 中庭 麻乃 位 也。

送賓。
於又哭、三哭,皆免、袒。有賓,則主人拜賓、

面,如始至時也。」鄭氏曰:「又哭、三哭,亦入門左,中庭北

變也。 丈夫、婦人之待之也,皆如朝夕哭位,無

鄭氏曰:「待奔喪者無變,嫌賓客之也。

嫌骨肉之親,始至待之或異也。 嫌骨肉之親,始至待之或異也。 嫌骨肉之親,始至待之或異也。 與序入也。」、思謂:朝夕哭之位,丈夫在 以序入也。」、思謂:朝夕哭之位,丈夫在 以序入也。」、思謂:朝夕哭之位,丈夫在 以序入也。」、思謂:朝夕哭之位,丈夫在 以序入也。」、思謂:朝夕哭之位,丈夫在 以待之,未嘗爲之變也。此乃特言之者, 然實客以哀變爲敬,此骨肉哀則自哀矣。

右齊衰以下奔喪。

送賓皆如奔父之禮。於又哭,不括髮。位,西鄉哭,成踊,襲、兔、絰于序東。拜賓、奔母之喪,西面哭盡哀,括髮、袒,降,堂東即

謂明日又明日之哭也。又哭不括髮,則免於東序之東,襲衣而著免加絰也。又哭,位後改括髮而免耳。襲、免、絰於序東,謂奔母喪之禮,皆與奔父喪同。其異者,即

而已。上既云「免於序東」矣,此又云「不而已。上既云「免於序東」矣,此又云「不可已。上既云「免於序東」矣,此又云「不不可已。上既云「免於序東」矣,此又云「不

右奔母之喪。

東髽 婦人 大紒 鄭氏 自 階也,亦謂之側階。 於在室者也。 東階,東面階也。 父母、兄弟之喪不 ,即位,與主人拾踊。《釋文》:「拾,其劫反。」 側階」,是也。 奔喪,升自東階,殯東,西面 日髽。 曰:「婦人,謂姑、姊妹、女子子也 東髽,髽於東序不髽於房,變 拾,更也。」 升自側階,則出自東房 婦人人者由闈門。 · 奔。 《雜記》夫人奔 東階,東房北 愚謂:婦人非 坐,哭盡 喪, 去纚 下之 哀 升

> 可知。 踊 踊,故特言之。 衰以下及婦人之奔喪,主人或不 踊」,於婦人奔喪云「與主人拾踊」,蓋 踊,賓客之」,非 也。 「成踊」,蓋主人踊則衆主人以下隨之皆踊 ,豈由賓客之而然乎? 婦人居間。 東髽 於齊衰以下奔喪云「與主人哭成 ,謂就堂上東序而髽 奔喪者,主人無不與之俱 也。 \bigcirc 鄭氏云:「主人與之拾 經於主人奔喪,但云 也。 與之俱 凡 以 踊 齊

右婦人奔喪。

息亮反。」 拜賓,反位,成踊。相者告事畢。《釋文》:「相, 盡哀,括髮,東即主人位,絰、絞帶,哭,成踊。 盡哀,括髮,東即主人位,絰、絞帶,哭,成踊。 盡惡,括髮,東即主人位,經、絞帶,哭,成踊,

於墓,爲父母則袒。」 愚謂:此亦聞喪即鄭氏曰:「主人之待之,謂在家者也。哭

以歸也。告事畢,告以於墓無事,可四時爲之也。告事畢,告以於墓無事,可知。括髮而後東即主人位,則括髮即於北知。括髮而後東即主人位,則未除喪者可喪而後歸」者,其在墓尚袒,則未除喪者可喪而以道遠,葬後乃至也。主人,在家之

三日成服,於五哭,相者告事畢。於又哭,括髮,成踊。於三哭,猶括髮、成踊。

又哭不言「袒」,文略也。成服日又哭爲四

他 爲母所以異於父者,壹括髮,其餘兔以終事。 如奔父之禮。 哭皆免、袒、則爲父括髮、安有不袒者乎? 也。下文齊衰者奔喪不及殯,於又哭、三 文,乃鄭氏自以意足成之,非逸《禮》本文 鄭氏曰:「逸《奔喪禮》説:『不及殯日 殺,何以殺其輕者,而重者反不殺乎? 事也。 日而 哭,至明日又哭爲五哭。五哭,謂於殯宫 又哭猶括髮,即位不袒。」」疑此「不袒」之 袒有不括髮,括髮未有不袒者。 戚已久,殺之也」,非也。袒輕而括髮重 哭皆於次而已。告事畢者,告以於殯宫無 即位之哭也。 奔喪者,殯宫之哭可以止,此後朝 ○鄭氏云:「又哭,三哭不袒者,哀 是時在家者已卒哭矣,故 果哀久而 $\bar{\mathcal{H}}$ 夕

此乃言『爲母異於父』者,明及殯、不及殯,鄭氏曰:「壹括髮,謂歸人門哭時也。於

異也。 其 既著之矣。 異 (者同 又言此者,嫌不及殯者之禮 愚 謂 爲 母 之異於父者 ·; 前 或

右 奔父母喪不及殯。

則主 麻于 衰 者告事 東方、即位、與主人哭、成踊 人拜賓、送賓。 以下不及殯,先之墓,西面哭盡哀,免、 畢 賓有後至者,拜之如初。 襲。 有賓

相

遂冠 東即位,拜賓,成踊。 鄭 謂 氏曰:「不北面者,亦統於主人。」 歸,人門左,北面,哭盡哀,免、袒 於成踊言「襲」,則即 賓出,主人拜送。 位 時 亦 袒 一,成踊 可 知 愚

踊。 於又哭,免、袒,成踊。 三日成服,於五哭,相者告事畢。 於三哭,猶 免、 袒,成

拜賓者,亦主人。

孔氏曰 月之外,則不得有三日成服。」 小小 功以 下 ·不税,若奔在 愚謂 葬後 税

> 反 乃爲位,括髮、袒,成踊,襲、絰、絞帶, 聞喪不得奔喪,哭盡哀,問故,又哭 拜賓,反位 位。 與不 雖在 右奔齊衰以下之喪不及殯 免、絰成服之禮皆不異也 葬後 税,以 若 有 ,成踊。 「, 而 賓後 聞 喪 聞 之日 喪在 至者,拜之、成 賓出,主人拜送于 爲 上先,則 斷 至家之日,其 若 奔 踊、送賓 喪 盡 門 即 至 位, 哀。

非 鄭氏 始死。 至此 乃 乃爲位,故知以君命有事者也。 如於家朝夕哭位矣。不於又哭乃絰者,喪 有事,不然者,不得爲位。 絰 君命有事 ,謂不 日:二 踰 明日又哭,象小斂時。 日節,於是 聞父母 於明日之又哭也 ·,則不得 喪 可 爲位 而不 也。 一當須 得 位 奔,謂 有酇列、 孔 \sim 初聞 士喪禮》小 氏 速 不於又哭 曰: 奔。 以 **哦**喪,象 之處 君命 一若

如 初。

聞 故 即 斂乃絰,此亦當又哭乃絰。 今於聞喪之日 喪不得奔喪,乃爲位。 於聞喪之日 絰、帶者,以喪至此赴者至,踰其日節, 即 加經 、帶也。」 聞喪即 愚謂 奔者,哭 凡

下西面之位 不爲位也。爲位,敘列親疏,而己即阼階 也。 上言「乃爲位」,指其將 爲

位之事。下言「即位」,正言爲位之禮也。

襲、絰、絞帶乃即位,又變於至家者之禮

位 也。 序東,不言者,蒙前可 成踊者,謂於即位之時先拜賓,而後反 袒、括髮、成踊在 知 堂上,襲、絰、絞帶於 也。 即位拜賓,反

位 成 踊 也。

袒,成 於又哭,括髮、袒,成踊。 踊。 三日成 服,於五哭,拜 於三哭,猶 賓 括 (送賓 髪

如

鄭氏 以 喪服 曰:「不言『就次』者,當從其 廢 公職也。 其在官,亦告就次。 事,不 可

> 广 『五哭』者,以 愚謂: 五哭,謂 迫公事,五日哀殺,亦 爲位之哭也。 五. 可 哭 以

之後,哭於喪次而已。

若除喪而 右聞喪不得奔喪。

除。 袒、絰,拜賓,成踊,送賓,反位,又哭盡哀,遂 於家不哭。 后歸,則之墓,哭,成踊,東括

也。 鄭氏曰:「東,東即主人位,如不及 髮、袒者,括髮、袒 遂除,除 於墓 而東即主人之位 丽 歸。」 愚 謂 也

主人之待之也,無變於服,與之哭,不 鄭氏曰:「無變於服,自若時服 也。 踊 亦 即

括髮、袒,不言「成踊」,文略

也

者,在家者服已除,哀情已殺也。」

位于墓左,婦

人墓右。」

孔氏

曰 :

示不

踊

自齊衰以下,所以 異者免、麻

孔氏 日 齊衰以下,除服之後 喪 唯

東括

東

(殯者

免、麻、不括髮、墓所哭罷即除。」

右除喪而后歸。

哭,成踊,送賓,反位。 相者告就次。而東免、絰,即位,袒,成踊,襲,拜賓,反位,凡爲位,非親喪,齊衰以下皆即位,哭盡衰,

三日五哭,卒。主人出送賓,衆主人、兄弟皆 於外者,雖非主人皆拜賓,但不稽顙耳。 爲位之禮,亦於堂上哭盡哀,乃降而免、絰 位者,言齊衰以下不得奔喪,皆得爲位也。 言齊衰以下爲位之禮也。 父母之喪乃敢顯然爲 位,其哭之不離 而以己私未奔者也。 鄭氏曰:「謂無君事,又無故,可得奔 于序東,然後即阼階下西面之位。 「必知無君事者,若銜君命,於事爲重 聞喪之處。」 父母之喪,則不爲 位 也。」 齊衰以 愚謂: 孔氏曰 凡受弔 下皆即 一,唯 喪, 此

> 説,蓋衍文。 人出 送賓」 至 耎 止 十 五字,於 上下 不 相 屬 注 疏 皆 無 解

又明日之朝、夕而五哭。 當畢,亦明日乃成服 喪,訖夕爲位,乃出就次,一 鄭氏曰:「卒猶止也。 其後有賓,亦與之哭而拜之。」 朝、夕,備五哭而止,亦爲 也。 三日 凡云『五哭』者 不五朝哭,而 急奔喪,己私 哭也。 五哭者 與 始聞 明 數 日

若所爲位家遠,則成服而往。

遠服輕,故成服乃往耳。言有故不得奔喪者,此非有他故,直以道道遠,成服乃行,容待齎也。」 愚謂:上鄭氏曰:「謂所當奔者外喪也。外喪緩而

記也。 〇上爲正經,此下乃其右齊衰以下爲位。〇上爲正經,此下乃其

哭, 緦麻即位而哭。 齊衰望鄉而哭, 大功望門而哭, 小功至門而

出門,哭止,相者告事畢。

成服,拜賓。

按「主

鄭氏曰:「奔喪哭,親疏、遠近之差也。」

右記奔齊衰以下喪哭遠近之節。

哭父之黨於廟,母、妻之黨於寢,師於廟門

外,朋友於寢門外,所識於野張帷。

所當哭者也。 鄭氏曰:「此因五服聞喪而哭,列人恩諸 服者也。

黨,謂族

類無

逸

《奔喪禮》曰:『哭父族與母黨於廟,妻之

黨於寢,朋友於寢門外,壹哭而已,不踊。」

言『壹哭而已』,則不爲位矣。] 沈氏曰:

愚謂:母之黨哭於寢,謂母在也。哭諸 事由父者哭之廟,事由己者哭之寢。」

廟,謂母没也。 《檀弓》「師哭諸寢」,由己

事之者也。此言「師於廟門外」,謂奉父命

右記哭無服之喪之處。 事之者,若父在則亦哭之於寢也。

凡爲位不奠。

鄭氏 曰:「以其精神不在乎是。」

右記爲位不奠。

哭天子九,諸侯七,卿大夫五,士三。

鄭氏曰:「此臣聞君喪而未奔,爲位而哭,

有臣亦可見矣。

尊卑日數之差也。」

愚謂:觀此,則士之

右記哭天子以下之差。

大夫哭諸侯,不敢拜賓。

鄭氏曰:「謂哭其舊君,不敢拜賓, 避

爲主。」

諸臣在他國,爲位而哭,不敢拜賓。

鄭氏曰:「謂大夫、士使於列國。」

與諸侯爲兄弟,亦爲位而哭。

鄭氏曰:「族親昏姻在異國者。」

凡爲位者壹袒。 右記爲位不敢拜賓。

鄭氏 日: 「始聞 喪哭 而袒,其 明 日 則否。

父母之喪,自若三袒也。」

右記爲位壹袒。

從主人北面而踊。《釋文》:「爲,于爲反。」所識者弔,先哭于家而後之墓,皆爲之成踊,

又變於有服之親也。所識者弔於墓北面,外來便也。主人墓左西鄉。」 愚謂:奔父母之喪不及殯,之墓北面。齊衰以下則父母之喪不及殯,之墓北面。齊衰以下則鄭氏曰:「從主人而踊,拾踊也。北面,自

右記所識者弔。

《釋文》:「長,竹丈反。」其喪。親同,長者主之。不同,親者主之。凡喪:父在父爲主。父没,兄弟同居,各主

主之。 不爲主是也。父之所不主者,則子自其夫不爲主,祖主適孫之喪,則其世叔父喪,則尊者爲之主。若舅主適婦之喪,則

右記凡喪爲主。

聞遠兄弟之喪,既除喪而后聞喪,免、袒,成

踊,拜賓則尚左手。

鄭氏曰:「小功、總麻不税者也,雖不服,

猶免、袒。尚左手,吉拜也。逸《奔喪禮

曰:『凡拜,吉、喪皆尚左手。』」

右記遠兄弟之喪除喪而后聞喪。

無服而爲位者,唯嫂叔及婦人降而無服

者麻。

者,以麻爲弔服之絰也。凡弔服用葛絰,位哭也。處《奔喪禮》曰:『無服袒、免爲位者,以其本親也。爲兄弟服者麻。』」 愚謂:哭有服之親乃爲位,服者麻。』」 愚謂:哭有服之親乃爲位,以妻皆然,獨言「嫂叔」者,避文繁也。爲兄弟之妻皆然,獨言「嫂叔」者,避文繁也。爲兄弟之妻皆然,獨言「嫂叔」者,避文繁也。爲兄弟之妻皆然,獨言「嫂叔」者,避文繁也。爲兄弟以麻爲一人。

於士,襲而后拜之。鄭注:「或曰「大夫後至者,袒拜

凡奔喪,有大夫至,袒,拜之,成踊

而后襲。

右記無服爲位。

之乎? 舉嫂叔以該兄公與弟妻者多矣,豈容於此 兄公,於弟之妻則不能也。」孔氏云:「兄 也。○鄭氏云:「正言『嫂叔』,尊嫂也。 嫌絶之,一以出嫁降之,故哭之皆爲位,且 爲絰,重之也。 嫂叔及婦人降而無服者雖服弔服,而以麻 矣、然且爲之服而報焉,何以不遠之絶 獨生異義? 且夫之世叔父又尊於兄公 也。」《雜記》:「嫂不撫叔,叔不撫嫂。」凡 公不服者,尊絶之也。非也。《曲禮》曰: 重其弔服之絰,以别於其餘無服者之親 公,於弟妻不服者,卑遠之也。弟妻於兄 嫂叔不通問。」《檀弓》曰:「嫂叔之無 蓋二者本應有服,一以遠 服

之,爲之成踊」。」

鄭氏曰:「主人袒、降哭,而大夫至,因 之,不敢成己禮,乃禮尊者。」 右記奔喪拜大夫、士之異。

拜

禮記卷五十三終

禮記卷五十四

國史館纂脩孫希旦集解賜進士及第翰林院編脩

問喪第二十五《别録》屬《喪服》。

此篇設爲問答,以發明居喪之禮,故曰《問

口三日,不舉火,故鄰里爲之糜粥以飲食之。之心,痛疾之意,傷腎、乾肝、焦肺,水漿不入親始死,雞斯,徒跣,扱上衽,交手哭。 惻怛

《釋文》:「雞斯,依注爲「筓纚」。笄,古兮反。纚,色買反,

徐所綺反。扱,初拾反。乾,音干。漿,本亦作「滌」。糜、

鄭氏曰:「親,父母也。雞斯當爲『笄纚』,

本亦作「曆」。飲,音蔭。

食、音嗣。」

纙也。 謂韜髮之繒。 前。 之存象也。 纚,括髮也。 聲之誤 之,厚者以食之。」〇陳氏 手拊心而爲哭也。 五鄰爲里。」 者之焦傷,而 弓》『始死,羔裘、玄冠者易之而已』,則始 於帶,以號踊履踐爲妨也。交手哭,謂交 髮,去飾之甚也。]又『叔孫武叔之母 袒、括髮。』又云:『袒、括髮,變也。 死有易冠,無去冠。又云:『主人既小斂, 小斂,舉者出户,出户袒,且投其冠」,則小 五臟腎在 徒跣,無屨而空跣也。扱深衣上衽 也。 徒猶 親始死,去冠,二日乃去笄、 今時始喪者邪巾貊頭,笄、纚 心脾在其中矣。五家爲鄰, 孔氏曰:「笄,骨笄也。 親始死,孝子去冠,唯留 下,肝在中,肺在上。 空 糜厚 也。 而粥薄,薄者以 上衽,深衣 祥 道 曰 : 袒、括 死,既 之裳 $\overline{\wedge}$ 舉三 纙, 笄、 檀 飲

死徒跣 漸。 愚謂: 而變凶 雖别 端」,則知人君大斂之有弁。 他 斂乃投冠,但投冠在尸未出户之前 日 徒跣、扱衽 衽矣。笄、纚與徒跣、扱衽爲類,非出時 出也,徒跣、扱衽」,則非出時不必徒跣、扱 冠,蓋自小斂始與。 者所以爲變,冠且弁者所以爲敬。喪之有 喪之大事也,故不敢以不冠臨之。 叔孫武叔 喪大記》「君將大斂、子弁経即位于序 無 始 明 始死而去冠,至小斂而去笄、纚,自吉 無考據,然古人於吉凶之變,皆有其 小斂,而 雞斯之義未詳 樣,而 ,則首宜去冠。此鄭氏之説所以雖 ,其漸固當如此。 去冠 ,則亦不必笄、纚。 時有寒暑,體有强弱,故 可以遵信者也。 ,則知大夫、士小斂之有冠。 又《喪大記》「主人之 ,鄭氏讀爲笄、纚,此 且冠履相配,始 蓋大、小斂, 然《檀弓》言 蓋自始 耳。 笄、纚 死 小 斂 踰 不

衣、素冠之時,此孔子所以言「始死,羔裘、以前,雖出時必笄、纚,而室中亦或有深

玄冠者易之」也。

口不甘味,身不安美也。 夫悲哀在中,故形變於外也。痛疾在心,故

有笄、纚、徒跣、扱衽之變也。口不甘味,故水漿不入口。身不安美,故

三日 怪、《字林》作「數」。辟、婢尺反、徐扶亦反。」 哭踊無數。 文》:「懣,忘本反,又音滿,范音悶。 泣,哀以送之。 婦人不宜袒,故發胸、擊心、爵踊,殷殷 氣盛,故袒而踊之,所以動體、安心、下氣也。 如壞牆然,悲哀痛疾之至也。 而斂,在牀曰尸,在棺曰柩。 惻怛之心,痛疾之意,悲哀 送形而往,迎精而反」也。《釋 殷殷,並音隱。 故 動 曰「辟踊哭 尸舉柩。 、志懣、 田 壞,音 田

之然也。爵踊,足不絶地。辟,拊心也。鄭氏曰:「故袒而踊之,言聖人制法故使

哀 遷尸也。舉柩,謂啟殯及載時也。 似 謂 胸,以代袒也。 將欲崩倒 反哭及日 而往,謂葬時送其體魄而往。 視男子爲輕耳。 孝經》語以證之也。送,謂送柩也。 爵之躍,其足不離於地 以送之,謂 反哭時迎其精氣而反也 也。」 中而虞也。」 靠韩. 擊心亦拊,爵踊 愚謂: 辟踊哭泣,哀以送之,引 也。 動尸 迎其 孔氏 也。 , 謂斂及殯時 精 曰:「爵 迎精 如 神 亦 踊 壞 加 婦人發 而反, 牆 也,但 送形 反 踊 謂

故其往送也如慕,其反也如疑。也。其反哭也,皇皇然,若有求而弗得也。其往送也,望望然,汲汲然,如有追而弗及

急之情。皇皇然者,意彷徨也。如慕,如曰:「望望然者,瞻望之意。汲汲然者,促親之在前。疑者,不知神之來否。」 孔氏鄭氏曰:「望望,瞻望之貌也。慕者,以其

矣。 焉,惚焉愾焉,心絶志 以鬼享之,徼幸復反 見也,人室又弗見也,亡矣喪矣,不可復見已 求而無所得之也,人門而弗見也,上堂 孺 也 人之有疑也。」 故哭泣辟踊,盡哀 如疑,見《檀弓》,亦孔 子啼慕父母 愚謂:其往送如慕,其反 如 悲 也。《釋文》: 疑 圃 而 "; 不 子語 已矣。 止矣。 知 神 也 之來 「上,時掌反 祭之宗廟 心悵焉愴 否, 又弗 如

其形體不可復見,故爲虞祭以安之,冀幸 悽愴,恍惚愾歎 又弗見」。 之所在,故 鄭氏曰: 反諸其所養也」,故曰「上堂弗之見,入室 反哭升堂,反諸其所作也。 祭之宗廟,以鬼享之,謂虞祭於殯宫,神 「説反哭之義也。」 反而歸,不見尸柩,故其心悵恨 稱宗 ,皆言其無 廟。」 愚謂:《檀弓》曰 可 主婦人于室, 奈何之貌也。 孔氏 日

復,扶又反。」

用事生之禮,至反哭以虞易奠,然後以鬼廟,以鬼享之。」蓋葬前殯宮有朝夕奠,猶其精氣之復反也。《孝經》曰:「爲之宗

神之道享之也。

「扶服」。」

爲[入宫]。」 爲[入宫]。《釋文》:「枕,之蔭反。」○鄭注:「人處室,或 時,服勤三年,思慕之心,孝子之志也,人情 時,服勤三年,思慕之心,孝子之志也,人情 成擴而歸,不敢入處室,居於倚廬,哀親之在

孝子之心亦益衰矣。家室之計,衣服之具,敛者,以俟其生也。三日而不生,亦不生矣,或問曰:「死三日而后斂者何也?」曰:「孝或問曰:「死三日而后斂者何也?」曰:「孝或問曰:「死三日而后斂者何也?」曰:「孝或問曰:「死三日而后斂者何也?」曰:「孝以矣其生也。 對,謂憂勞。」 孔氏曰:「人情之家也。勤,謂憂勞。」 孔氏曰:「人情之家也。勤,謂憂勞。」 孔氏曰:「人情之家也。勤,謂憂勞。」

文》:「爲之,于僞反。斷,丁亂反。」○鄭注:「匍匐,或作故聖人爲之斷決,以三日爲之禮制也。」《釋亦可以成矣。 親戚之遠者,亦可以至矣。 是

《釋文》:「免,音問。」 尊也,不居肉袒之體也,故爲之免以代之也。 或問曰:「冠者不肉袒,何也?」曰:「冠至 計,言計其家室之所有以治喪也。 者欲明斂之遲,故總據三日發問也 乃襲,又明日乃斂 后斂,謂小斂也。士雖以二日而斂,然死 大夫言之,則小斂也。」 此以下皆設問以發其義 有早晚,如日晚而死,死日不及襲,則明日 曰"「三日斂者,以士言之,則大斂也,以 「三日而后斂,問之者怪其遲也。」 ,固事之所必至矣。 也。 愚謂: 鄭氏 三日而 家室之 孔 曰 記 氏

鄭氏曰:「問之者,怪冠、衣之相爲也。身

免狀 雖袒 褻其 居肉 無 飾 (尊服 袒 如 者 而 一者,謂 著 冠 茅 敢冠 而 而冠也。 冠、《郊特牲》『君袒 廣 心既悲哀,肉袒 ,冠爲褻尊服,肉袒則著免。 寸。 一 若吉事 孔氏 前 内心 形褻,故不 曰 :「此冠不 丽 肅敬,則 割性」, 可

反。」○鄭注:「或曰「男女哭踊」。」

文》:「秃,吐禄反。偏,於縷反,一音符距反。● 跛,補火哭泣悲哀,聲胸傷心,男子以消息,主」矣。 女子哭泣悲哀,擊胸傷心,男子也,身有錮疾,不可以備禮也。故曰『喪禮唯然則禿者不免,傴者不袒,跛者不踊,非不悲然則禿者不免,傴者不袒,跛者不踊,非不悲

觸地 也。 **傴者曲背,故不袒,以其不便於袒** 免者,小斂後既去笄、纚,而 者足廢,故不踊,以其不能 秃者無髮,故不免,以其無髮 無容,謂爲喪主拜賓也。 乎 以 踊 喪禮以 布 也。 可約 納 也。 反爲 其 稽 也。 跛 髮 顙

> 先免,此三疾俱不踊、不袒、不 乃主人拜賓之禮,自非主人,雖不踊 袒、不踊,故上文云「發胸擊心、爵踊」,初 地,不踊者,若此而可」,亦非也。 袒、不免也。 多矣,三疾於禮各廢其一,非皆不踊、不 袒、免、踊雖一時爲之,然喪禮襲而踊者固 其哀而已矣。○鄭氏 主,故有疾之人,雖於禮有所不能備,亦 以稽顙乎? 非爲有疾不能袒、踊 又鄭氏云「擊胸傷心 而 云「將踊 以此代之也。 免」, 先袒 稽 婦 非也 , 將 前 顙 稽 人不 顙 觸 衵 盡 口

是

也。」

于爲反。」
《禮》曰:『童子不緦,唯當室緦。』
成問曰:「免者以何爲也?」曰:「不冠者之

❶ 「符距」、《釋文》作「紆矩」。

或問

緦,又於應著免之時則免也。

當室既

應著

免,則於其父母之喪,又當爲喪主而杖矣。

曰:「杖者何也?」曰:「竹、桐一也。

冠也。 鄭氏 之細别,以 之所服,謂未冠童子之所服也。 乃有緦服也。」 不杖,不杖者不免,當室則杖而免。 無父兄當室主家事。」 愚謂:童子不免、 應著免,今非成人亦免,故問之。不冠 曰:「怪本所爲施也。 當室,謂無父兄而主家者也。 次成人也。 孔氏曰:「成人肉袒之時 緦者其免也, 言免 不冠者,猶未 當室,謂 免、冠 童子 者

接之恩,而情不可以不免,故爲應緦者服杖也。惟無父兄而主家事,則與族人有相而其於父母之喪,亦未可責其病而予之以而其於父母之喪,亦未可責其病而予之以則不必有以代之也。緦者服之末,杖者服,不怨、不杖,蓋免所以代冠,童子本未冠,

桐也。」《釋文》:「苴,七餘反。」故爲父苴杖,苴杖,竹也。爲母削杖,削杖,

桐、竹之所以不同也。 即差哲而澤,故施之於母喪之齊衰。此故施之於父喪之斬衰。削杖用桐而削之, 主,其義一也。苴杖用竹,因其苴惡之色, 主,其義一也。苴杖用竹,因其苴惡之色, 主,其義一也。苴杖用竹,因其苴惡之色, 主,其,此怪爲父母之杖不同而問之也。 即差哲而澤,故施之於母惠所用異耳。」

病也。 從天 親,哭泣無數,服勤三年,身病體 或問曰:「杖者以何爲也?」曰:「孝子喪 文》:「羸,力垂反。 此孝子之志也,人情之實也,禮義之經也,非 不杖,辟尊者之處也。 降也,非從地出也,人情而 則父在不敢杖矣,尊者在故也。 辟,音避。 堂上不趨,示不遽也。 處,昌 慮反。」○鄭注: 羸 已矣。」《釋 以以 堂上 杖 數

或爲「時」。」

尊者在、 鄭氏 憂戚也。」 孔氏曰:「此問孝子居喪何以 者之處不杖,有事不趨,皆爲其感動使之 在不杖、謂爲母喪也。 而趨 不爲喪趨,示父以閒暇不促遽也。 者之處,故爲母堂上不杖也。爲母,堂上 須杖之義也。 曰: ,則感動父情,使之憂戚也。」 ,故不敢也。 「杖者 爲母親對父之時不敢杖,以 以 何爲也,怪 堂上,父之所在,避尊 尊者在不杖,避 所爲施 若堂上 父

服問第三十六《别録》屬《喪服》。

故因上篇之名而謂之《服問》。 上篇廣言居喪之禮,此篇專言喪服之義,

姑。《釋文》:「從,如字。爲,于僞反,下皆同。」《傳》曰:「有從輕而重」,公子之妻爲其皇

庶子,其孫不降其祖者同義也。 上,諸侯之庶子也。皇姑,謂公子之母也。 皇,君也。曰皇姑者,由公子之妻尊稱之,明非適夫人。公子之妻爲其皇姑,從公子 而服者也。然公子爲其母練冠縓緣,既葬 而服者也。然公子爲其母練冠縓緣,既葬 不得伸其服,其妻則遠矣。此與大夫降其 不得伸其服,其妻則遠矣。此與大夫降其 不得伸其服,其妻則遠矣。此與大夫降其

「有從重而輕」,爲妻之父母。

之服皆降三等,其差正當然爾。 下降一等,子從母之服皆降二等,夫從妻不降一等,非服差」,非也。凡妻從夫之服不降一等,非服差」,非也。凡妻從夫之服要爲父母服齊衰,夫從妻服緦麻,是從重

兄弟。「有從無服而有服」、公子之妻爲公子之外

之義也 服,而其妻自服其從服,亦猶爲其皇姑服 也。公子之外兄弟厭於君,公子爲之無 親昆弟,猶曰「遠兄弟」云爾,非外親之謂 子之屬也。 兄弟」,謂公子旁親,如世叔父母及昆弟之 之所爲兄弟服,妻降一等。」此「公子之外 之? 兄弟,謂族親也。 從服也。 母、從母」,非也。 鄭氏謂公子之外兄弟爲「公子之外祖父 從服不累從,其妻安得又從而服 曰「外兄弟」者,以明非公子之 公子爲外祖父母、從母 《喪服》記曰:「夫 音基。」

明從服之義。

黨服。 「有從有服而無服」,公子爲其妻之父母。 黨服。 「有從有服而無服」,公子爲其妻之父母。 黨服。 「有從有服而無服」,公子爲其妻之父母。 黨服。

曰:「雖外親,亦不貳統。」○此上五節皆之父母不服,故爲繼母之黨服。 鄭氏母之黨服,記者申釋舊傳之義也。爲出母《傳》,舊傳也。爲其母之黨服,則不爲繼

故葛帶,絰期之絰,服其功衰。《釋文》:「期,三年之喪既練矣,有期之喪既葬矣,則帶其

經期之葛經也。期喪未葬,得爲三年練祭 「練」。衰八升。凡齊衰既葬,衰或八升,或 九升。服其功衰,服麤衰也。」 孔氏曰: 九升。服其功衰,服麤衰也。」 孔氏曰: 九升。服其功衰,服麤衰也。」 孔氏曰: 之喪爲練祭,至期喪已葬,乃帶其故葛帶,當作 於矣。爲父既練,衰七升。母既葬,當作 之喪爲練祭,至期喪已葬,乃帶其故葛帶, 之喪爲練祭,至期喪已葬,乃帶其故葛帶, 以所,或

也。

此謂三年既練,又值期喪既葬之節

者 之喪 皆行。』後喪三年既穎,得行前喪三年 祭,則知後喪期年未顯之前,得爲前三年 遭期 亦服 於男子,若婦 絰既除,其首空,故絰期之葛絰。 三年既練,要帶四寸百二十五分寸之七十 葬 衰 圃 衰,謂七升,父之衰也。不云『服其父衰』 麻帶已除,則要絰期之麻帶也。 重,故帶其故葛帶也。 長子,父卒爲母,並是三年,母喪既練,雖 、《雜記》云:『三年之喪,既 八升,與正服既葬齊衰同,以母服爲重 云『功衰』者,經稱『三年之喪』,則父爲 ,則又以三年之練服爲重,故於既虞、卒 八而練 喪 母之齊衰 喪既葬,其葛帶亦然。 固 也。 [改服 人,則首經練之故葛經,練 故葛帶,謂三年練葛帶也 也。 期喪 之服 愚謂:三年既練 三年既練,男子首 矣。 、 類,其: 但父帶爲 至期 服 此文主 練、 其 喪 既 功 後 練 祥 丽

衰期 哭而 爲母服 八升。 則經 詳鄭氏之意,上言父母三年既練之服,下 降服 何以 服 在爲母,同五升衰裳,八升冠,既葬,以其冠爲之受,衰 「《服問》注云「爲母既葬,衰八升」,亦據父卒爲母,與父 服期」。《喪服》「齊衰三年」章「父卒則爲母」,賈疏 禮》賈疏據之,遂謂「父喪未除 誤爲「既葬」,則似釋期喪既葬之文。 升」,此言期喪既葬之衰也。 之衰也。 衰七升 齊衰期者,爲父在屈也,父没則得伸矣, 宜 穷 必待終父喪乎? 期喪之絰 反服練服之冠衰、要帶, 是父卒爲母,未得伸三年之驗。」又謂「父在 ,母既 因 四 齊期,正服 「凡齊衰既葬,衰或八升,或九 升,既葬衰七升,既練 父在而降也。 練,衰 也。 五升」。 八升」,此言三年既 ○鄭氏云「爲父既練 母喪本三年,其 齊期 夫爲母之所以 帷 正 而「母既 練 衰 服 而母死,止 八 五. 無首經 、升矣。 子,則 《儀 練

言齊衰既葬之服,其旨甚明。若云「父在 爲母既葬,衰八升」,則下文「齊衰既葬,衰 八升」之内,足以該之矣,又何必特出其文

有大功之喪亦如之。

於上哉?

帶,故反服練之故葛帶也。 葛帶, 絰期之絰也。 者,從上省文也。亦如之者,言亦帶其故 喪,絰、帶皆麻。」 也。 作「大功。」既葬之葛帶,小於練之葛帶,又當 鄭氏曰:「大功之麻,變三年之練葛,期當 首 餘,大功既葬葛帶三寸有餘,小於練之葛 喪練後,有大功之喪既葬也。不云『既葬』 衰。凡三年之喪既練,如遭齊衰、大功之 有絰,亦反服其故葛帶,絰期之絰,差之宜 絰四寸有餘,若要服練之葛帶,首服大 此雖變麻服葛,大小同耳,亦服其功 孔氏曰:「此言三年之 三年練之葛帶四寸有 又大功既葬,

> 帶,絰期之絰,服其功衰,一如三年既練遭 期喪既葬之禮也。 易」,是也。 之喪,則改服大功之服。《雜記》「有三年 既葬同也。」 之差,故首服期之絰 功既葬之経,麤細相似,不得爲五分去一 之練冠,則以大功之麻易之,唯杖、屢不 至大功既葬,則亦帶其 愚謂:三年既練 五寸有餘,進 而 遭 與 (故葛 大功 期之

小功無變也

之親,小功以下謂之疏,不以疏變親也 喪,虞、練之後悉不得變之,蓋大功以上謂 虞、卒哭遭大功則變服。 齊衰則變服,既練遭大功則變服,齊衰既 用輕累重也。」 鄭氏曰:「無所變於大功、齊、斬之服,不 愚謂: 斬衰既虞、卒哭遭 若小功之喪值 F

麻之有本者,變三年之葛。

鄭氏曰:「有本,謂大功以上也。 小功以

愚謂: 葛」。 本,是麻之無本,不得變三年之葛 變三年之練葛。 帶,麻之根本並留之合糾爲帶。 下 功,首經去本,而帶猶 功以上,首経、要帶其麻皆有本, 後變麻服葛也。三年之喪,齊衰變既葬 則首絰、要帶皆無本也。 大功變既練,故曰「麻之有本者,變三年之 澡麻斷本。」 有本,兼首絰、要帶而言。 小功以下,其帶 孔氏 不絶本,成人小功, 日 三年之葛,謂葬 : 大大 八功以 如此 下殤小 喪自大 澡 也。」 麻 者 上 得 爲 斷

免,音問。去,起目反。」可以經必經,既經則去之。《釋文》:「斷,丁管反。既練,遇麻斷本者,於免經之,既免去經,每

事則自若練服也。」 愚謂:麻之斷本者,免、絰如其倫。免無不絰,絰有不免,其無鄭氏曰:「雖無變,緣練無首絰,於有事則

當事爲重也。 當事爲重也。 常爲五分去一之差,緦之絰又小焉。而小 明之絰者,小功之首絰,三年之練帶,皆四 服之絰者,小功之首絰,三年之練帶,皆四 小功以下之麻也。練已除首絰,乃不絰輕

絰,因其初葛帶。 小功不易喪之練冠,如免,則絰其緦、小功之

来到反其練服。 《雜記》曰父母之喪,「雖功衰,不弔,如有 《雜記》曰父母之喪,「雖功衰,不弔,如有 服而將往哭之,則服其服而往」,則三年既 服而將往哭之,則服其服而往」,則三年既 以母之喪,「雖功衰,不弔,如有

葛,以有本爲税。《釋文》:「稅,吐外反。」 總之麻不變小功之葛,小功之麻不變大功之

氏曰: 鄭 以大功之麻易之,唯杖、屨不易」也。」 乃變上耳。 雖 前喪也。」 與 氏 上 日 「緦與小功,麻絰既無本,不合稅變 一葛 同,猶不變也,此要其麻有本者 税 《雜記》日『有三年之練冠 亦變易也。 小功以下之麻, 门則 孔

也。 喪卒哭,受麻以葛。 之葛,大功變既練,齊衰變既虞、卒哭。凡 鄭氏曰:「謂大功之親爲殤在緦、小 上 非重之而不變,爲殤未成 下殤則否,言賤也。 服 可以變三年之葛,0正 小功。 婦人爲之中從下,服緦麻。」 男子爲大功之殤中從 殤以麻終喪之月數, 人,文不 一親親 也。 ·縟耳。 三年 功者

> 葛也。」 緦麻 練服 爲之變葛帶,婦人則爲之變葛絰,其冠衰 應服有本之麻者也。成人大功,得變三年 親之長、中殤帶皆斷本矣,而 此謂本服期之下殤降在小功者。 服小記》云:「下殤小功,帶澡麻不絶本。」 服之葛,不待終喪。而大功親之長、中殤 麻變上服之葛者,皆於下服既卒哭而 則不易也。終殤之月筭者,小功終五月, 葛者,以此長、中殤本大功之親,其本服 小功,中殤則緦麻。 在長、中殤,男子則爲之小功,婦 孔 終三月也。 氏曰:「長、中殤,謂 ,此長、中殤降在小功、緦,故男子 愚謂:此本服大功之殤也。 税,變易也。 如此者,得變三年之 本服 凡以下服之 得變三 大 功之喪降 人爲 若大功 一年之 反 長 <u>~</u> 上 則 74 喪

■ 「可」,北大本、《禮記注疏》作「所」。

至此,明遭喪變易之法。 室此,明遭喪變易之法。 至此,明遭喪變易之法。 至此,明遭喪變易之法。 至此,明遭喪變易之所殤,則得變三年 之葛,以齊衰之下殤帶不絶本,重於大功 之葛,以齊衰之下殤帶不絕本,重於大功 之葛,以齊衰之下殤,則得變三年 之葛,以齊衰之下殤之麻而不變,爲殤無 至此,明遭喪變易之法。

文》:「爲,于僞反,後皆同。」
君爲天子三年,夫人如外宗之爲君也。《釋

君服斬,其妻當從服期。若諸侯則服其本夫人亦從服期,故曰「如外宗之爲君也」。 詩侯爲兄弟服斬,妻從服期」,非也。君之諸侯爲兄弟服斬,故曰「如外宗之爲君也」。 对親,其人不等,有爲己之臣子者,有爲諸侯者,有爲諸侯之大夫者。惟己之臣子爲相也。 其夫與 於親,其人不等,有爲己之臣子者,有爲諸 侯者,有爲諸侯之大夫者。惟己之臣子爲 是之 於親,其人不等,有爲己之臣子者,有爲諸 以親,其人不等,有爲己之臣子者,有爲諸 以親,其人不等,有爲己之臣子者,有爲諸

以齊衰,其妻則皆無服也。服,諸侯之大夫則用本服之月數,而服之

世子不爲天子服。

月,畿外别無服。也。」 愚謂:畿内之民,爲天子齊衰三鄭氏曰:「遠嫌也。不服,與畿外之民同

太,下同。適,丁歷反。」
君所主:夫人妻,大子,適婦。《釋文》:「大,音

明之。 明之。 明之。 明之。 孔氏曰:「三人既正,雖人爲喪主也。」 孔氏曰:「三人既正,雖,以曰:「言『妻』,見大夫以下亦爲此三

君之母非夫人,則群臣無服,唯近臣及僕、驂君斬,小君期。大子,君服斬,臣從服期。」 鄭氏曰:「大夫不世,子不嫌也。士爲國大夫之適子爲君、夫人、大子,如士服。

乘從服,唯君 所服 服 也。《釋文》:「驂,七南 反。

之屬。僕,御車者。 服,私服也,故群臣不從而服。 君之母非夫人,謂妾 驂乘,車右也。近臣 母也。 君爲妾 近臣 閹 母母 寺 之

朝夕在君側,僕、右與君同車,不可吉凶 差,故皆從君 丽 服。《曾子問》:「古者天 參

也。 子練冠以居。」此庶子爲君,爲其母之服 大夫、士之庶子,父在爲其母,或大功

或期,父没皆三年,而爲父後者但服緦。

除之",父没服大功,而爲父後者服 人君之庶子,父在爲其母練冠縓緣,既葬 練冠

之外,則無可從,而服制 蓋與父在爲其母之服 同也。 有定,亦 練冠 非 在 미 唯 五. 君 服

所服者。 而《記》之言乃如此,是知 庶子爲

其 君 者 加 爲其母,雖 隆 · 無 復 定制 有練冠之制,而 ,故至春秋 而 遂有 君 各以 以

> 没得伸」之説,皆非也。婦人無以尊厭 是《曾子問》孔疏及《喪服》賈疏遂有「小君 鄭氏云"「禮,庶子爲後,爲其母 小君之服服之者,蓋禮之失非 小君服之者。時若小君在,則益不可。」於 `唯君所服」,伸君也。 《春秋》之義,有 日 緦。 也 以

矣。且喪者不祭,庶子爲後者,爲其母緦。 嗣君奉先君之宗廟,豈因 小君没而得伸其

於小君,則不因小君之存没以爲

伸不伸

之法。公子爲其母之服,皆厭於君

非

厭

《記》言「唯君所服」,蓋周末禮失耳。 私服乎? 庶子爲君,爲其 母 **練冠** 以 鄭氏

謂爲「伸君」者,蓋以庶子爲後者爲其 母 服

君」。 緦, 而 此雖未 唯君所服則當不限以服總,故曰「伸 有 以 正《記》文之失,而順 文

其 母 解 其意 練冠縓緣,既葬除之,君得服緦,爲伸 一,尚未 誤 也。 孔 疏 乃謂「公子

爲

矣,其可以服緦爲伸君乎? 公子父在 則 并鄭 一爲其 氏 (之意 母之服 而 失之。 也。 父没 練 冠 則服大功 縓 緣 乃

則否。《釋文》:「錫,思歷反。」經。大夫相爲亦然。爲其妻,往則服之,出公爲卿大夫錫衰以居,出亦如之,當事則弁

葬而 大 則君 錫衰以居,謂成服之後也。 亦加 則 其 故其服亦然。 當錫衰、素冠也。 絰,皮弁而 爲大夫,及大夫相爲,皆錫衰 大有腹 苯 後除 亦不錫衰。 服 麻 ,則服錫衰 経與。 也。 也。 心手足之誼,爲之服錫衰,蓋 加 君及大夫弔於士,皆 絰 《喪服》記曰:「朋友麻。」君 爲其 當 也。 也。 出 事,謂當殯、斂之事 大夫相爲,有僚友之恩, ,出至他所也。 妻,往則服之,謂 出則否 當事弁經,則非當 主人未成服 ,謂既弔 以 居,則 君於 ī素冠、 而 其 往 弁 卿 弔 既 出

疑衰。

活反。」 可奪喪也。」《釋文》:「兔,音勉。朝,直遥反。稅,吐 税齊衰。《傳》曰:「君子不奪人之喪,亦不 凡見人無免絰,雖朝於君無免絰,唯公門有

者也。 也。」 衰也。 首者無變也。 門。」藨屨,杖齊衰之屨也。 鄭氏曰: 齊衰之人公門者,衣與屨皆易之,唯 所言,蓋主謂 無以齊衰、藨屨入公門者矣。 絰、帶,金革之事無辟也。」則爲母之喪,必 絰重也。 大夫、士既葬,公政入於家,既卒哭,弁 愚謂:下《曲禮》曰:「藨屨不入公 朝於君無免經 於公門有免齊衰,則 「見人,謂行求見 税猶免也。 齊衰期,自父在 下《曲禮》又曰:「厭冠不人 有税 ,則冠不易矣。 人也。 齊衰 《喪大記》曰 大 高其母 此與《曲 謂 功有 無 不 免絰 其在 然則 免經 ·杖齊 以 外

了U: A-是。 公門。」冠既不入,則固當免絰矣,其爲大

功以下者與。

下附,列也。」《釋文》:「罪,本或作「梟」。上,時掌反。《傳》曰:「罪多而刑五,喪多而服五。上附

列,徐音列,本亦作「例」。」〇今按:列,如字。

各從其等列也。 止於五。重者上附於重,輕者下附於輕,列,等也。罪雖多,刑止於五。喪雖多,服

禮記卷五十四終

禮記卷五十五

國史館纂脩孫希旦集解賜進士及第翰林院編脩

間傳第三十七《别録》屬《喪服》。

鄭氏曰:「名曰《間傳》者,以其記喪服之 鄭氏曰:「名曰《間傳》者,以其記喪服之 正是。 此篇總論喪禮哀情之發,非 愚謂:名篇之義未詳,吴氏之説稍爲 愚謂:名篇之義未詳,吴氏之説稍爲 愚謂:名篇之義未詳,吴氏之説稍爲

斬衰 貌若 見諸 正 外 何以服苴? 也。 ,小功、緦 斬 衰貌若苴 麻容貌可也。 苴,惡貌也,所以首其 ,齊衰貌若枲,大功 此哀之發於 内 而

於甚薄也。」

咨。 容體者也。 黑淺。 鄭氏曰: 枲。 惡似之。 動於喜樂之事。」 不動也。 則外有此 謂衰裳、絰、杖並苴色也。 然情之厚者貌亦略變於常,其或不能然, 謂貌如平常之容。 秋之殺。 而 『苴,麻有蕡者。 枲,思里反。」○鄭注:「枲,或爲「似」。」○首,去聲。 「斬衰、苴絰、杖,齊衰、牡麻絰」、《傳》曰: 但 若苴若枲,貌各如其絰之色也。 如 齊衰 平常之容,則情不爲厚,而亦未至 《釋文》:「苴,七余反。 首其内而 「有大憂者面必深黑。 惡貌 若止,有慘戚,無歡 貌活動者象春之生,貌静止者象 稍 也。 輕 牡麻,枲也。』斬衰服苴 於斬 吴氏澄曰:「《儀禮》 枲,無子麻,色亦蒼 見諸外,謂内有哀情 小功、緦麻之服 衰,絰 苴色蒼黑,貌之 見,賢遍反。 欣 不用苴 也。 止,謂不 容貌, 雖 齊,音 而 輕, 而 經 用

文》作「您」。」

文》作「您」。」

此哀之發於聲音者也。《釋文》:「偯,于起反,《説大功之哭三曲而偯,小功、緦麻哀容可也。

「較表之哭若往而不反,齊衰之哭若往而反,

語者也。《釋文》:「唯,于癸反,徐以水反。」議,小功、總麻議而不及樂。此哀之發於言斬衰唯而不對,齊衰對而不言,大功言而不

謂:唯者, 鄭氏 於議,則又有 者,對其所問 曰:「議,謂陳説 應人而 論 圃 已,言則及於他事矣。 説之詳焉。及樂,謂及於 已,對則有言 非 時事也。」 辭 矣。 至 對 愚

對而不問」,謂既殯居廬時,故與此不語然也。《雜記》云「三年之喪,言而不語,聽樂也。此與上節皆謂始死時之聲音、言

同也。

「大功既殯不食醢、醬」、《大記》云大功「食服齊衰也。』《喪大記》云「一不食、再不食」,此云服齊衰。」 愚謂:此云「齊衰二日不食」,服齊衰也。』《喪大記》云「一不食」,此云「齊衰二日不食」,當是義

情隆者從其隆、情殺者從其殺、其差等亦而已。然条而觀之、則同爲一服之中,而同,故其情不能無隆殺、記者各言其大略意齊衰以下之喪、有降服、正服、義服之不飲猶期之喪」,則「疏食水飲、不食菜果」,

中月 期而 酒 父母之喪,既虞、卒哭,疏食水飲,不食菜果。 字,徐竹仲反。禫,大感反。乾,音干。」 ,始食肉者先食乾肉。《釋文》:「期,音基。 而 小祥,食菜果。又期而大祥,有醯、醬。 禫,禫而飲 禮酒。 始飲 (酒者 先 飲 中 禮 如

與大功既殯同,大祥後與小功既殯同,禫虞、卒哭,所食與齊衰既殯同,小祥後所食除之節也。 吴氏澄曰:「父母之喪既此又明父母之喪既虞、卒哭以後,飲食變

父母之喪,居倚廬,寢苫枕塊,不説絰、帶。

得

食肉飲

酒

,漸復常矣。」

處者也。《釋文》、「説,吐活反。 节,户嫁反。」有席。小功、緦麻、牀可也。此哀之發於居齊衰之喪,居堊室、苄翦不納。大功之喪,寢

可

得

而見矣。

復寢。中月而禫,禫而牀。《釋文》:「拄,知矩反,期而小祥,居堊室,寢有席。又期而大祥,居父母之喪,既虞、卒哭,柱楣翦屏,芐翦不納。

音張炷反。

楣,音眉。」

與小功、總麻初喪同 **节翦不納**,與齊衰初喪同 變除之節也。 此又專明父母之喪既虞、卒哭以後,居處 小祥寢有席,與大 吴氏澄曰:「既虞、卒哭, 功 也。」 初 沒喪同。 ,特居廬爲 愚謂:《大記》 禫 而 牀,乃 (異耳。

乃有席,蓋禮文曲折,禮俗或有不同,記者食醯、醬、《喪服》傳虞而「寢有席」,此小祥云「練而食菜果,食菜以醯、醬」,此大祥始

各記所聞也。

此哀之發於衣服者也。十五升去其半。有事其縷,無事其布,曰緦。八升、九升,小功十升、十一升、十二升,緦麻斬衰三升,齊衰四升、五升、六升,大功七升、

服 九升,小功十升若十一升』,此經齊衰多於 氏曰:「《喪服》記『齊衰四升,大功八 等,服主於受,是極列衣服之差也。」 鄭氏曰:「此齊衰多二等,大功、小功多 故 喪服二等,大功、小功多於《喪服》一等。 欲其文相值,故 喪服》主於受服而言,以大功之殤 ,不列大功七升。 者 於 是 經 備 略 列 丽 之也。」 又《喪服》父母爲主 不言。 \sim 喪服》既 愚 謂 : 無受 八升若 略, 喪 孔

升。 同。 升。 殤 不服 父母是正服,但正服合服小功,以尊其祖 升,冠八升,有正而已。 同六升。 同,爲父三升爲正,爲君三升半爲義 哀,哀有淺深,故布有精粗。 略之也。○賈氏公彦曰:「凶 服,而三升有半之斬衰乃臣爲君之服,故 其受服同以六升也。此《記》主言親屬之 之相受,斬衰雖有三升、三升有半二等,而 服》記斬衰二等,此惟一等,蓋喪服主於服 有義:正則五升,冠八升,義則六升 大功 章,從斬至緦,升數有異。 小 繼母、慈母雖是義,以 齊衰三月皆義服六升,冠九升。 齊衰杖期,父在爲母爲妻,同正 有 功而 齊衰三年,惟有正服 降 服 有 齊衰,非本服 義: 爲夫之昆弟之子之長 齊衰不杖期,有 配父故,與 ,故同義 斬有 《喪服》十有 四升,冠七 服 正 所 7,冠九 服 ``, 其冠 以 義 服 因 也。 13 不 表 Ŧi.

殤 己。」 繐 族是義,其餘皆正,正服衰八升,冠十升。 有 義 也。 母」,「不杖」章之「爲人後者爲其父母,女 降、有正、有義,但衰冠同十五升去其半 有義,正 十升,義則同十二升。 爲夫之族類是義,其餘皆降。降則衰冠同 夫爲天子而已。 降,亦本有三年之義者也,則 有三年之喪二,則妻之服 子子適人者爲其父母」,皆由三年而 義 服 衰 爲 唯 衰 義 周景王有后與大子之喪,而 齊衰期正服衰五升,冠八升,則降服 姑、姊妹出適之等是降,婦人爲夫 有義,服 九升,冠 愚謂:「齊衰杖期」章之「父在 ,其餘皆降。 服衰冠同十一升也。 + 四升半,冠七升,諸侯之大 殤小功有降有義: 升。 降服衰七升,冠十 小功亦 大功有降、有 雖 非 亦當爲 有降、有正 緦 由 叔 麻 \equiv 向 降服 降 亦 婦人 年 謂 护 正 者 爲 丽 有 丽 其

直龍反。」

蓋 服 凶之别,故緦 爲衰者,以其升數與吉布相近,不可爲吉 功十二升而 衰 布雖 作,非 四 升 也。 疏而 冠 七升。 止 **縷則精矣** 吉布十五 麻 用十五 十三升、十四升之布 賈 升 氏 一升去其半而 · 而 謂 喪 齊 衰 衰 則 期 極 爲之, 木 無 於 甪 小 降

去麻服葛,葛帶三重。《釋文》:「爲,于爲反。重,升。爲母疏衰四升,受以成布七升,冠八升。斬衰三升,既虞、卒哭,受以成布六升,冠七

鄭氏 爲母雖有三年、期之異,而其服 絰 圃 變除之節也。 此下四節,又申言父母之喪卒哭以 股。」去一股則小於小功之経,似非 ,不葛帶。 四糾之,帶輕,既變因爲飾 日 「葛帶三重,謂男子也,五 舊説云:『三糾之,練 但言「爲母疏衰四 也。 同 升」,然 婦 而 分 也 後 也。」 帶 去 衣 人 葛 服 去 則

虞、卒哭,要带以葛弋床,又差小於前,五一吉布相參,故稱成布也。 葛帶三重者,既麤疏,未爲成布。六升以下,其縷漸細,與孔氏曰:「三升、四升、五升之布,縷既

氏序,有时间,因此则三重,未受服之前糾之,積而相重,四股則三重,未受服之前分去一,唯有四分見在。 三重,謂作四股虞、卒哭,要帶以葛代麻,又差小於前,五

則首経雖葛 麻帶爲兩股相合也。 「成 布 事 布、事 ,猶兩股糾之也。」○張 縷, 但 . 未 此直云『葛帶三重』, 加 灰 /練」, 此 子謂 似 不

總,加灰焉,錫也。」《喪服》傳曰:「無事其然。《雜記》曰:「朝服十五升去其半而

冠之縷皆無 小功始喪而練之矣。 爲之,然則齊衰之冠,既葬而練之,大功、 其 布 則 小 事 ·功以 也。 緦 衰 上之衰,布、 練冠特練其布 有事其縷,錫衰 縷皆 , 則 無 喪 事 有

其冠則有事之,則亦精於衰矣。總衰有事也。小功衰三等,其冠衰之升數皆同,而

其縷,則其冠布、縷皆有事與。

人何爲除乎帶也? 男子重首,婦人重帶。首,婦人除乎帶。男子何爲除乎首也? 婦期而小祥,練冠、縓緣,要絰不除。男子除乎

戀反。緣,徐音掾,悦絹反。 要,一遥反。」

者先重者,易服者易輕者。《釋文》:「縓,七

除服

人重帶,帶在下體之上,婦人重之,辟男子練冠、縓緣,説見《檀弓》。 鄭氏曰:「婦

後喪所變也。」

也。

其爲帶猶五分絰去一

耳。易服,謂爲

又期而大祥,素縞、麻衣。《釋文》:「縞,古老反,

又古報反。」

除衰杖。」 愚謂:素縞、縞冠素紕也。説鄭氏曰:「麻衣、十五升布深衣也。大祥

見《玉藻》。

大祥之祭, 編

冠

朝

服

,既祭,

四四二

其冠不 吉布爲之,而 布 縓緣,然喪服之中衣皆用其衰之布爲之, 爲外服。《喪服》傳曰:「公子爲其母,練 衣」而曰「麻衣」也。 而其袂繼揜尺,是以謂之長衣。 降也。 於君 帶、麻衣、縓緣。 冠麻,麻衣、縓缘。 可 練、祥皆備,所以明其本有此服 其母及妻之服本有練、有祥者 小祥之冠,其衣即大祥之衣也。 爲之,而其袂 '見矣。 丽 變,而 由彼推 不得伸,故雖既葬而 鄭乃 以 服 謂 此,則大祥麻衣之制,灼 縓 麻 不復繼揜尺,故不曰 皆既葬除之。」此其冠 衣 麻 爲緣者也 爲 以居。 衣無 大祥既除喪,則服之 其妻,縓冠,葛絰 佩。 采飾」,非也 麻 除,而 《釋文》:「纖、悉 練中衣 衣 也, 麻衣用吉 蓋公子 用 丽 十 特以 有 其 已用 五 爲 服 爲 即 升 然 則 厭 丽

哭,遭齊衰之喪,輕者包,重者特 易服者何爲易輕者也? 吉也。」 禮》文。 鄭氏 月。 若吉祭以前,禪祭雖竟,未得無 謂橝祭既畢,吉祭以後,始 曰:「中猶間也。 佩,紛帨之屬如平常也。」又《士虞》記 其服有六:祥祭縞冠、朝服, 其尚綅冠、玄端、黄裳,故知吉祭以後始從 然平安意也。」 五 禫訖綅冠、深衣,四也。 縞冠、麻衣,二也。 也。 自喪至此,凡二十七月。 日 舊説: 祭後復常,六也。 愚謂: 黑 經白 『纖,冠 孔氏曰:「無所不佩,此 自祥而禫,自禫而 禫,祭名也,與大祥間 緯 禫祭玄端、綅冠,三也。 曰 者采纓 纖。 斬衰之喪既虞、卒 吉祭玄冠、玄端, 説詳《雜記 得 疏 心。」無 **禪之言澹澹** 也。 云 無所 所不 戴 徳《變 即吉, 佩 不 既祭 所 佩。 注 不 除

自此以下,皆因上文易服之義而 申之也。

中月

而

橝

禫

丽

纖,

無

所不

廉反。」○鄭注:「纖,或爲「綅」。」

之耳。 之節也。 新 宜主於尊,謂男子之首,婦人之要,特其葛 兩 不變之也。此言「包」「特」者,明於卑可 婦人不葛帶,鄭云「特其葛」,據男子 包斬衰之葛,謂男子要,婦人首也。 鄭 包舊也。 施,而尊者不可貳。」 氏曰: 輕者可施於卑,服齊衰之麻,以 「既虞、卒哭,謂齊衰可易斬 特,獨也,謂獨主於重喪也。 愚謂:包,謂以 重 者 以 服

龍反。」既練遭大功之喪,麻、葛重。《釋文》:「重,直

鄭氏 男子有麻絰,婦 衰已練,男子除絰 以 **經獨存,謂之單。** 葛帶,絰期之葛絰,婦人絰其故葛絰 麻,謂之重麻。 日 「此言大功可易斬服之節 人有麻帶,又皆易其輕者 單,獨也。 既虞、卒哭,男子帶其故 而帶獨存,婦人除帶 遭大功之喪, 也。 一帶期 斬 而

實是大功之絰,大功之帶也。」之葛絰,帶期之葛帶」者,麤細與期同,其之葛帶,謂之重葛。」 孔氏曰:「云『絰期

服之。齊衰之喪既虞、卒哭,遭大功之喪,麻、葛兼

也。 有矣。 帶。 鄭氏曰:「此言大功可易齊衰期服 者,包、特著其義,兼者明有経有帶耳。不 者包,重者特」之義。 麻者亦包其輕。」 言『重』者,三年之喪既練,或無絰,或無 麻,故云『麻、葛兼服之』。『兼服』之文,據 帶,其首猶服齊衰葛經,是首有葛,要有 大功之喪,男子則以大功麻帶易齊衰之葛 男子也。 言『重』者,以明今皆有,期以下固皆 兼猶兩也。不言『包』『特』而言『兩 兩者有麻有葛耳,葛者亦特其重, 婦人則首服大功之麻絰 孔氏曰:「此 齊衰既虞、卒哭,遭 即前 一要服 之節 輕輕 齊

衰之麻帶,上下俱麻,不得云『麻、葛兼

服」也。」

斬衰之葛,與齊衰之麻同。 功之麻同。 之葛,與緦之麻同。 服之差也。 鄭氏曰:「此竟言有上服既虞、卒哭遭 葛與小功之麻同,小功之葛與緦之麻同」, 功以下,則於上皆無易焉。此言『大功之 緦之麻得變小功之葛,謂成人大功之殤在 變大功以上。 麻,兼服前葛也。 主爲大功之殤長、中言之。」 後服之麻,與前服之葛麤細同,則得服後 大功之葛,與小功之麻同。 唯大功有變三年既練之服,小 此小功之麻得變大功之葛, 麻同則兼服之。 按《服問》,小功、緦不得 齊衰之葛, 孔氏 與 日 小功 大 下

鄭氏曰:「服重者,謂特之也。則者,則男兼服之服重者,則易輕者也。

長、中者也。」

子與婦, 虞、卒哭,男子反其故葛帶,婦 自受以下服之受矣。」 故葛帶,婦人反其故葛絰,其上服除,則 喪輕服,故經、注稍異也。」 其故葛絰』。但經文據其後喪 前喪,故云『男子反服其故葛帶,婦人 首,男子、婦人俱得易輕也。 謂男子要帶,婦人首絰也。 之者,謂兼輕重服之経、帶而 前喪之輕,注意則謂後喪服 前服之輕,至後服既葬之後,還須反 經』者,此明遭後服初喪,男子、婦人雖 言『易輕』者,男子則易於要,婦人則易於 人要帶也 重者,謂 ·麻、葛兼服』,但施於男子,不包婦人。 人也。 爲 重喪服其重者,謂男子首絰 易輕者,謂以 凡下服虞、卒哭,男子 孔氏 輕 服易 至輕喪既虞、 滿,還反 服之也。 云气凡 愚謂: 人反其故 初死 曰 其 一前 輕 ,反其 得易 (反服 兼 服 服 下 服 此 服 服 前 其 易 葛 文 固

卒哭,則反服重喪,至重喪既除,則又專服

輕喪也。鄭氏注自「凡下服虞、卒哭」以

下,皆以補《記》文之所未及,疏謂「經、注

稍異」,非也。

三年問第三十八《别録》屬《喪服》。

卿之書,蓋其所作也。此篇設問以發明喪服年月之義,又見於荀

禮文,故服制不可得而損益也

列反。」 群、别親疏、貴賤之節、 曰:「無易之道也。」《釋文》:「稱,尺証反。 三年之喪何 也? 曰 : 稱情 而弗 而 可 立文, 損 益 因 也 别,彼 以 飾 故

喪差降 鄭氏曰:「 制其禮也。 飾,謂 章表也。 而 稱情 各 無易,猶不易也。」 表 而 其 群,謂五服之親因三年之 立文,稱人情之輕 親 黨 也。 親 謂 孔氏 大 功 日 重 以 而

> 也。 上。 天理之當然而不可易者。 之義也。 此雖問三年之喪,其實總問三年以下五 期,卿大夫降期以下。 疏,謂 無易之道,引舊語成文也。」 人於親黨,其情之有厚有薄, 亦 功 以下。 賤,謂· 貴 謂 先王稱此以 士、庶人 天子、諸 愚謂 服 侯 立 乃 服 族 絶

《釋文》:「創,音瘡,初良反。 情而立文,所以爲至痛極也。 創鉅 倚廬,食粥,寢苫,枕塊,所以爲至痛 之。 差遲 之痛 愈。 此下五節,專明三年之喪之義。 曰:「鉅,大也。 者其日久,痛甚者其),故稱 愈,差也。 ,其創既甚,故其差亦遲也。 愚 謂: 其 、病情, 三年之喪若 賢者喪親 創 愈、徐音庾。枕、之鴆反。」 小 而立三年之文 則易差,創 愈遲。 ,傷腎乾 斬衰、苴 斬, 三年 肝 故 既 大 杖,居 者 飾 , 斬 以 則 孔 痛 也。 表 甚 難 氏 稱 鉅 斫

痛甚。

喪之正服,止於二十五月。」 吴氏澄曰:「大祥後所服,非喪之正服也。 鄭氏曰:「復生,除喪反生者之事也。」

之屬莫不知愛其類。 凡生天地之間者,有血氣之屬必有知,有知 去之。 焉,鳴號焉,蹢躅焉,踟蹰焉,然後乃能去之。 群匹,越月踰時焉,則必反巡過其故鄉,翔回 蹢,本又作「躑」,直亦反,徐治革反。 踶,徐音馳,字或作 親 小者至於燕雀,猶有啁噍之頃焉,然後乃能 踟。 也,至死不窮。《釋文》:「喪,息浪反。 蹰,音厨。 故有血 啁,張留反。 氣之屬者莫知於人,故人於其 今是大鳥獸則失喪 噍,子流反。 知,音智。」 號,音豪。 其

將由夫患邪淫之人與,則彼朝死而夕忘之, 謂:於其親,謂於其父母也。也。於其五服之親,念之無止已。」 愚獸不如人,含血氣之類,人最有知而恩深獸氏曰:「言燕雀之恩,不如大鳥獸,大鳥

餘。曾,則能反。焉,於虔反。」與群居而不亂乎?《釋文》:「夫,音扶。人與,音然而從之,則是曾鳥獸之不若也。夫焉能相然,以之,則是曾鳥獸之不若也。夫焉能相

時除也。」

孔氏曰:「駟,謂駟馬,隙謂

空

祔

、祥之禮

,而使之足以成文章。

隙。 駟馬峻疾,空隙狹小,以峻疾而過狹

急速之甚。」

則釋之矣。 故先王焉爲之立中、制節,壹使足以成文理,

猶除也,去也。」 鄭氏曰:「立中、制節,謂服之年月也。 孔氏曰:「焉是語辭。 釋

君子、小人,其意不同,故先王爲之立中人

之制,以爲年月限節。

壹,謂齊同,言君子、

三年,然後免於父母之懷,故服以三年,使 小人皆齊同。三年一閏,天道小成,又子生

由淫邪之人,則哀不足以及乎三年。由脩 足以成文章、義理,則除去其服。」 愚謂:

乎賢不肖之間,立爲中道,制其節限,使賢 飾之君子,則哀不止於三年。故先王斟 酌

者俯而就之,不肖者企而及之。文,謂文 理、謂條理。三年之中,有殯、葬、虞、 有變

> 除 除之節,而使之足以成條理。 去其服矣。 此喪之所以斷以三年 如此則可以

也? 文》:「期,音基。斷,丁亂反。更,古衡反。」 然則何以至期也? 在天地之中者莫不更始焉,以是象之也。《釋 曰:天地則已易矣,四時則已變矣,其 曰:至親以期斷。 是何

禮期而練,男子除經,婦人除帶。 此明期喪之義也。 非問三年之練除,亦非專問爲人後者及父 隆,緦、小功以爲殺,期、九月以爲間」,固 期喪設問。故下文又總之曰「故三年以爲 至期而畢也。 大功以下之義,則此「何以至期」,乃泛爲 也」,問三年之義,「由九月以下何也」,問 在爲母之服也。 「期」謂爲人後者,及父在爲母,孔氏 期應除之義。今按:下文「何以三年 〇何以至期也,鄭氏以 按「然則何以至期也」、《荀子》作 何以至期,問期喪何 此問 以爲 其 此 以

倍之,故再期也。 然則何以三年也? 曰: 三年。」是欲以牽合《禮記》「何以至期」之意,而反失之。 之日月以釋之,其義尤明。 然則何以分之」,是總問 倍,步罪反。」 《釋文》: 五服之分限,故下文歷言 楊倞注: 「加隆焉爾, 加隆焉爾也。 「分,半也,謂半於 本作『加 焉使 五 服

「殺,所界反。」人,人之所以群居和壹之理盡矣。《釋文》:爲間。上取象於天,下取法於地,中取則於故三年以爲隆,緦、小功以爲殺,期、九月以

自三年以至緦,皆歲時之數也。」 孔氏鄭氏曰:「取象於天地,謂法其變易也。

故曰 矣。」 能調 中取則於人,取法天地與人,三才並備,故 月、五月、三月之屬,亦逐人情而減殺。 年。人之一歲,情意改變,故服一期。 者,子生三年,然後免於父母之懷,故服 雖不及三年之加隆,而其情未至於殺 五服之節皆取法於天地也。 五月象五行,三月象天地一時而氣變。 象於一閏。天地一期物終,是一期取象於 法於地者,天地之氣三年一閏,是三年 曰 九月象三時,五月象二時,三月象一時,此 三年之喪,以象三年一閏,期之喪象一 上謂之親,小功以下謂之疏。 一周,九月象陽數,又象三時 和群衆聚居, 「期、九月以爲間」,言在隆殺之間 間 愚謂: 此總結五服之義。大功以 ,隆殺之間 也。 和諧專壹、義 上 取 中取則於人 象於天,下 而 期九月者, 物 理 成 盡 年, 也, 也。 此 備 取

故三年之喪,人道之至文者也。夫是之謂故,純壹而不至於僞薄者,其理盡於此矣。敢人之所以群衆居處,和睦而不至於乖則於人也。親屬相爲服,則親親之誼篤,則於人也。親屬相爲服,則親親之誼篤,此取上殺、下殺、旁殺,而服之輕重出焉,此取

以情言。此以下又專明三年之義也。文以禮言,隆

至隆。

由來者也。是百王之所同,古今之所壹也,未有知其所

前,喪服與吉服同,皆以白布爲之。故《郊知所從來」者,但不知定在何時。唐、虞以厚衣之以薪,葬之中野,喪期無數。《尚即世行之久矣。」 孔氏曰:「古之葬者,鄭氏曰:「不知其所由來,喻此三年之喪

特性》云『大古冠布,齊則緇之』。若不齊, 則皆用白布。至三代以下,吉凶異也。」 思謂:三年之喪,人情之實也。蓋自天地 是人,而親愛其父母之心固已與之俱生矣。 上特因而飾其禮焉爾,其由來不已久乎! 不子曰:「子生三年,然後免於父母之懷。 大三年之喪,天下之達喪也。」 「新天下之達喪也。」

亦有爲而作也。」受業於聖門,猶以『期可已』爲問,則此書氏晞孟曰:「世衰道微,狃於習俗,宰我親鄭氏曰:「達,謂自天子至於庶人。」○馬

禮記卷五十五終

一四五

四

禮記卷五十六

國史館纂脩孫希旦集解賜進士及第翰林院編脩

深衣第三十九《别録》屬《制度》。

鄭氏 服上衣、下裳不相連,深衣衣、裳相連,被 衣。」庶人吉服亦深衣,皆著之在表也。 之服也。 之以采。」 體深邃,故謂之深衣。」 私,尚簡 衣下裳,深衣連衣、裳爲之,以其用 而其用不同者有三: 曰:「深衣用十五 便也。 故《玉 孔氏 自深衣之外,與 曰 : 藻》曰:『朝玄端,夕深 「諸侯、大夫、士夕時 一升布, 曰中 愚謂:禮衣 鍛濯 衣,衣於禮服 深 灰治,純 衣 於 同 了, 上 餘 燕 制

裼以見美,然則自練以前未有飾也。

曰

衣」。 之内 《檀弓》:「練,練衣 服,而即以中衣爲上服,故喪服之中衣,不 謂之中衣而謂之長衣,以其袂名其衣也。 衣以筮。」蓋喪中因事而脱衰,則不復加餘 練冠以受。』《雜記》:「如筮,則史練冠、長 《聘禮》:「遭喪,將命於大夫,主人長 服之中衣也。 美,謂見此中衣之領緣也。 物爲之領緣,故《郊特牲》言「黼 曰:「以帛裹布,非 祭服皮弁用繒,朝服玄端用布,故《玉藻》 緇衣之屬 袪,裼之可也。」蓋練中 者,《 大夫、士亦以采色爲之,故裼謂之見 是 玉 也 藻》 中衣、長衣之袂皆繼掩尺。 所言錦 中衣之所用,與禮 禮也。」而 黄裹、縓緣。」又 衣、 衣始用 玄 一曰長衣,喪 别以華美之 綃 縓緣 繡 衣、 丹 故 絞 服 日 朱 衣、 同。 衣、 可 中

之,而亦緣 麻衣,大祥之所服也。 以 縓。 《喪服》記「公子爲其 麻衣用十五升布爲 母

練冠、麻衣縓緣」,是也。 縓緣者,布也。

麻衣即深衣。 大祥既除衰,故服麻衣以

居。 深衣之緣,或以繢,或以青,或以素,

皆繒· 也。 而麻衣仍小祥之縓緣 則猶 未 離

制以推之,則中衣、長衣、麻衣之制亦可 乎凶也。 此篇專明深衣之制。 由深衣之

見矣。

古者深衣蓋 釋文》:「應,於證反。」 有制 度,以應規、矩、繩、權 衡。

謂: 鄭氏曰:「言聖 此爲一篇之綱,其説在下。 人 制 事 必 有法 度。」 愚

短毋見膚,長毋被土。《釋文》:「見,賢遍反。 被,

彼義反。」

鄭氏 汙辱也。」 曰:「毋見膚,衣取蔽形。 愚謂 此總言衣裳長短之制 毋被土,爲

> 度也 也。人身雖有長短,而深衣皆以及踝爲

續衽鉤邊,要縫半下。 遥反。縫,扶用反。」○鄭注:「續,或爲「裕」。要,或爲 《釋文》:「鉤,古侯反。 要,

『優』。」

也。 鉤 上狹 不縫著,至衣之,則 縫著於後幅。 其在右者,但續於前 後際,謂之衽。衽之在左者,續於前 於前幅左右之兩旁,用布續之,以掩 六幅,而斜裁爲十二幅。前六幅,後六幅 下,下宜寬也。」 衽,在裳旁者也。 此言裳之制也。 而下狹,二者相交,上下皆廣,而 邊,若今曲裾也。 邊,即衽之交掩處也。 而下廣。 其衽之掩於後 屬連之,不殊裳前 愚謂:深衣之裳,用 鄭氏曰:「續猶 掩於後 三分要中,減 深 幅 幅 衣之裳 也。 者 中 則 鉤,曲 屬 幅 幅 後 ·央獨 以益 L 其前 而 ¨; 而 也。 也。 廣 布

脱。」

柳反。 肘。 袼之高下,可以運肘。 爲然。 也。 條,上濶下狹,綴之兩旁,如 衣之制云:「曲裾,以一幅布交解之爲 謂齊也。深衣之裳,用布六幅,斜裁爲十 亦 分,爲一尺二寸,合十二幅,則爲一丈四尺 寸爲齊,是要縫之度,半於齊縫之度也。 四寸也。以七尺二寸爲要,以一丈四尺 合十二幅,則爲七尺二寸也, 濶頭得二 《釋文》:「袼,本亦作「胳」,音各。 尺八寸,三分之:狹頭得一分,爲六寸, 幅。 無 ,則其形鉤曲矣。 其裳用正幅而襞積之,與衽相值 鉤 禮衣之衽,垂於裳之兩旁,而不屬於 斓 布廣二尺二寸,除四 要縫,謂要中所縫紩之度也。下, 邊之象,故續衽鉤邊 世反。 詘,丘勿反。」○鄭注: 勉齋黄氏與朱子論深 袂之長短,反詘之及 ,惟深衣 寸爲縫,餘布 肘,竹九反,又張 燕 尾 「肘,或爲 然。」是 C 之制 立處 四 兩

其肘。 不能不出入。 肘,又言其長短之度也。 袂之寬隘之度也。 此言衣之制也。 下各尺二寸,則袂肘以前尺二寸。」 幅於衣,詘而至肘,當臂中爲節。 尺一寸半,故反屈其袂,得及於肘也。」 脊至肩但尺一寸,從肩覆臂又尺一寸,是 詘及肘者,以袂屬於衣,幅濶二尺二寸,自 至手二尺四寸。今二尺一寸半之袂,得反 之所殺各一寸,餘有二尺一寸半在 二寸,并緣寸半爲二尺三寸半,除去其縫 也。袂之長短,反詘之及肘者,袂長二尺 曰:「袼,謂當臂之處宜稍寬大,可以 衣幅之畔,覆臂將盡,今又屬袂於衣又二 袂二尺二寸,肘尺二寸,是可運肘 袼,衣袂當掖之縫也。 絡之高下,可以運肘,言 袂之長短,反詘之及 鄭氏曰:「肘 臂骨上 ,從肩 孔氏 袂屬 運 動

劉 用布八尺八寸,中 故下文云『袂圜應規』也。 本齊之,而漸圜 氏 曰:「古者布幅二尺二寸,深衣裁 殺以 屈 至袪 丽 四 . 叠之則正方。 **,**則廣一尺二寸, 衣四 幅,而要缝 身 袖

二寸幅之袖,則二尺有五寸也。然周尺二寸,則兩腋之餘前後各三寸許,續以二尺七尺二寸,又除負繩之縫與領旁之屈積各

可反屈也。曰『反屈及肘』,則接袖初不以尺五寸,不滿今舊尺二尺,僅足齊手,無餘

身爲度,而不言尺寸者,以人身有大小長土」,及『袼可運肘』,『袂反及肘』,皆以人一幅爲拘矣。 經言『短無見膚,長無被

節爲寸」,則各自與身相應矣。」 愚謂:短之殊故也。朱子云『度用指尺,中指中

言之。劉氏爲近是。 反屈及肘,劉氏與鄭、孔之説不同,以人情

帶,下毋厭髀,上毋厭脅,當無骨者。《釋文》:

厭,於甲反。髀,卑婢反。脅,許刼反。當,丁郎反。」

處也。 鄭氏曰:「帶當骨,緩急難爲髀與脅皆有骨。脅之下,髀之上,無骨之之帶也。士無雜帶,則深衣亦用大帶矣。此言束帶之法也。大夫以上有雜帶,深衣

中也。」

刼。 袷如 正。」 王貴之。 矩 衡以應平。 制十有二幅,以應十有二月,袂圜 志而平心也。 六二之動,直以方也。]下齊如 方者,以直其政,方其義也。 取 踝,胡瓦反。齊,音咨,亦作「齎」。」○鄭注:「政,或爲 以其無 矩以應方,負繩及踝以應直 《釋文》:「應,「應對」之應。 私 故規者,行舉手以爲容,負繩、 繩 五法已施,故聖人服之。 取其直,權 衡 故《易》曰 取 權 圜,音圓。 其平。 資者 ,下齊如 以應規,曲 故規 故先 以安 袷,音 坤 栒 權

此總言深衣制度,以釋首節之義也。 鄭

軍旅。

完且弗費,善衣之次也。

《釋文》:

,謂若卿大

擯、相,謂

禮也。

獨

施

於

與後 矩、繩 也。 氏 或 其義,解『抱方』也。」 之也。 衣之背縫,及裳之背縫,上下相當 似今擁咽,故云『若今小兒衣領』,但方折 以漢時領皆向 人服之,言非法不服也。」 低或昂,則心有異志者與? 方,應《易》之文也。 行舉手,謂揖讓。引《易》者,言深衣之直 上下之殺 抱方,領之方也。 如繩之正,故云『負繩』。 亦 曰 服 幅 古者方領,如今小兒衣領。 :「制十 、權、衡也。 心之與。 相當之縫也。 也。 有二幅 袂 圜, 『下交垂,故云『古者方領』, 直其政,解『負繩』。 言「聖人服之」,則天子 ,裳六幅,幅分之以 心平志安行乃正,或 謂胡下 踝,跟也。 愚謂: 五法,謂規、 負繩,背之縫也。 孔氏曰:「鄭 也。 五法已施 齊,緝也。 绳,謂裻 袷,交領 方 爲

故可以爲文,可以爲武,可以擯、相,可以治 亮反。 趨 朝祭皆可服之,故曰『可以爲文,可 親迎,女在途,壻之父母死,深衣、縞總以 人吉服深衣。 服,夕深衣。 吉凶不嫌同制,男女不嫌同服。諸侯朝 吕氏大臨曰:「深衣之用,上下不嫌同名, 而易有也。善衣,朝祭之服也。 燕私也。 此又言深衣之所用也。 而養老。將軍文子除喪受弔,練冠、深衣。 上,深衣爲之次,庶人吉服,深衣而已。」 相,文事。 大夫、士相 夫以下作民 喪。 費,芳貴反。 此吉凶男女同也。 鄭氏曰:「完且弗費,言可苦衣 軍旅,武 見 ,

師田、

行役之事也。 大夫、士朝玄端,夕深衣。 丽 此上下同也。 爲之接賓、相 事。言深衣不 治軍旅 推其義類

1476

自士

以

有虞氏深衣

庶

朝

一, 則

以爲

武,可以爲擯、相,可以治軍旅」也。」

三十以下無父稱孤。緣袂,謂其 此言純、緣之法也。 袂 在 父母而無祖父母,以爲吉不具,故飾 若其不具,一在一亡,不必純以繢也。 則表、裛共三寸矣。 唯袷廣二寸。」 孔氏 緣,緆也。緣邊,衣、裳之側。 以多飾爲孝。純,謂緣之也。 純以青,降於績也。 曰:「具父母、大父母,所尊俱在,純以繢。 口也。 ,亦當純以青。純,緣也。純袂,謂 緣讀爲緆。 若無父母,唯祖 《既夕禮》云明衣『縓 鄭氏曰:「尊者存, 績,畫文也。 廣各寸半, 口也 少而 純 父母 有 其

猶以青也。大父母亦然。孔概云「一在一 尊,父没母存,則純當以素。母没父存,純 鄭云「三十以下無父爲孤」,非也。 者之異。上云「具父母,衣純以青」,下言 愚謂: 繢、青、素皆繒也。 以致敬也。 以績,備五采以爲樂也。 旁邊,其廣各寸半。」 後相連,然外邊曲裾揜處,其側亦有緣也。 亡,不得純以繢」,亦非也 「孤子,衣純以素」,則是無父者皆孤也。 飾有一定,深衣用於燕居,故其飾有是三 廣各寸半者,言純袂口及裳下之緣,并純 衣之旁側也。 此云『緆』,則深衣之下緣也。 綼、緆」,鄭注云:『在幅曰綼,在下曰緆。』 純以素,存凶飾以致哀也。」 深衣外衿之邊有緣,裳 陳氏祥道曰:「純 純以青,體少陽 朝、祭之服,其 純邊,謂深 家無二 難前

投壺第四十《别録》屬《吉禮》

云:宜屬賓禮。」「投壺與射爲類,此於五禮宜屬嘉禮。或如此,亦《儀禮》經之正篇也。 孔氏曰:大夫、士與賓客燕飲,而投壺以樂賓,其禮

投壺之禮:

廢也。」 容而講 正體 也。 此亦總目一篇之事也。 鵠,賓客之衆不足以備官比耦 也 必於燕飲之間,謀以樂賓,或病於不 投壺,射之細也。 ,舉席間之器以寓射節焉。 直 雖弧矢之事不能行,而 藝也。 一,所以觀德者猶在 應氏 或庭之脩廣不足以張 鏞曰:「壺,飲器 燕飲有射以樂賓 一, 此 吕氏大臨 比禮 先 制禮者因爲 則 王所 也。 比樂,志 用 其始 能 是禮 侯置 以 以 曰 習 射 不

> 諸侯,其投壺之禮又簡於燕射 之禮如鄉射、大夫、士之燕射其禮 則大射正爲司射,如鄉射之禮。」諸侯燕射 射禮繁而投壺禮簡。 投壺,射之類也。 燕,投壺」。 侯相燕,亦有投壺,故《左傳》『晉侯與齊侯 事云『請於公』,不得云『主人請賓』也。 大夫、士也。 若諸侯則《燕禮》、《大射》,每 是平敵之辭,與《鄉飲》、《鄉射》同,故知是 之節文,此投壺之所由興也。」 「投壺是大夫、士之禮。 然則天子亦有之。」 然射禮重而投壺禮輕 《燕禮》云: 經云『主人請賓』, 也 孔 宜簡 「若射, 愚謂: 氏 曰 於

芳勇反。」 主人奉矢,司射奉中,使人執壺。《釋文》:「奉,

以投者也。中,士則鹿中也。射人奉之投壺也。否則或射,所謂燕射也。矢,所鄭氏曰:「燕飲酒,既脱屨升坐,主人乃請

也。一

愚謂:

鄉射主於射,故射行於未旅

也。

唯

而

北

面

也。

賓』,故知此

《鄉射》記云『大夫兕中,士鹿中』,其形刻 使人執壺者,使人執所投之壺於司射之西 禮》將射,司射「升自西階,階上北面,告於 盛算。云『奉之西階上,北面』者,按《鄉射 衆庶禮重,異於燕射也。 射」,則知此投壺亦脱屨升坐之後。 庶羞」之後,乃云『若射,則大射正爲 降,賓反入,及卿大夫皆脱屨,升就席,羞 投壺者,按《燕禮》『取俎以 木爲之、狀如兕、鹿,而伏背上立圓圈,以 射之禮,則在飲酒未旅之前爲射,以其詢 云『使人』,不言官者,以賤 所以皆在西階上者,欲就 司射奉 「知脱屨升坐,●主人乃 也。 中亦 其奉之,西階 中,謂受算之器。 在 西階上北 出,卿大夫 上, 北 若 略之 賓處 面 皆 鄉 請 司 兕、鹿之形,而鑿其背以受算也。 禮者亦曰司射。 不同。 事,執壺者贊爲之耳。投壺於堂,則釋算 壺者,爲將設之也。 禮有司射以 賓席於牖間。 矢,主人將請 當洗」。 焉。《鄉射禮》盛矢以福,「設於中庭,南北 之,而不去皮,無羽、鏃之屬,與射者之矢 行於既旅 酬之前。 上,西面,客亦降席立於西階上,東 人,主人受之以奉於賓也。 但投壺本所以代射,故亦因名爲矢 投壺之禮、蓋亦於中庭設楅 酬 燕禮主於飲酒,故燕射與投壺, 主其禮,投壺,射之類,故其主 脱 賓,則贊者取矢於福以 主人奉矢時,降席立於阼階 屨升坐之後。 中,盛算之器,蓋刻木 設壺、設中

画。

孔氏

曰

矢,用木爲

者,投壺

射之類

坐」、北大本、《禮記注疏》並作「堂」。

0

,皆司射之

奉中、執

爲

面

射

主人席於阼,

授主

以

當 之位而立焉,執壺者在其南,皆東面 中西,東面,是時奉中升堂,預度所設 在 在堂 西 也,是中設於西階上矣。 上。 下文云「設中,東 面」, 司射之位 則 設 中 西 在 之

同,一讀下「以樂」音岳。重,直用反。」敢辭。」《釋文》:「哨,七笑反,徐又以救反。樂,音洛,下曰:「子有旨酒、嘉肴,某既賜矣,又重以樂,主人請曰:「某有枉矢、哨壺,請以樂賓。」賓

樂也。謂:又重以樂,言又重以投壺之禮以爲歡民肅曰:「枉,不直。哨,不正也。」 愚氏肅曰:「枉、哨,不正貌。爲謙辭。」 王鄭氏曰:「枉、哨,不正貌。爲謙辭。」 王

曰 : 티 : 賓曰:「某既賜矣,又重以樂,敢 主人曰:「枉矢、哨壺不足辭也,敢固 某固 枉矢、哨壺不 辭不得命 足辭 ,敢不敬從。」 也, 敢固 固 以 辭。」主人 請 以 言。」實 詩。」

鄭氏曰:「不得命,不以命見許。」 愚

請賓,投壺禮簡故 請射、賓許、適阼階上、告主人。 當有辭讓之辭如此禮與。《鄉射禮》,司射 者, 謂 於君命不敢辭也。 樂賓者也。 : 鄉射爲射 \sim 鄉 射禮》請射,賓不 《燕禮》不言 而舉,投壺則燕飲之間 也。 若敵者行燕射,則賓 清 辭 射, 此 此主人 賓 賓 辭 乃 所 再 親 亦 臣 以 辭

既許、 矢。 曲 於是賓及主人各來兩楹之間,俱南 辟亦於其階上。」 辟,進授矢兩楹 鄭氏曰:「賓再拜受,拜受矢也。主人既 折還。曰『辟』者,言辟 主人 主人投壺,乃於西階 、般還曰『辟』者,欲止 之間也。 孔氏 日 上 而不敢受也。 拜送,送矢也。 北 「般還,謂 面 賓之拜 再拜遥受 面,主 也。 賓 盤

即

兩楹間,示將投壺於此,而使人設筵也。

鄉

射》記云:「序

則物當棟,堂則

物

當

階上,見主人之拜,般還曰『辟』,亦止主人 在東授矢與賓。 面拜送矢也。 主人既授矢,還歸 賓受矢之後,歸 作階 於 西

拜也。」

已拜受矢,進即 已拜者,主人已拜送矢也。受矢者,贊者以 皆南鄉,間相 即席,欲與偕進 即 鄭氏曰:「主人既拜送矢,又自受矢。 者所立之處,兩物相去容一弓。 右 主人所投之矢授主人,而主人受之也。 記云:『物長如笴,其間容弓。』」 壺是射之類 請投。 兩楹間者,言將有事於此也。 了, 故 兩楹間,退反位,揖賓就筵 去 知 明 如 席 爲 射 耦也。 ※物。」 相去如射物。 賓席、主人席 孔氏曰:「投 故《鄉射》 退乃揖 愚謂 物 射射 退 賓 進

> 庭。 間之少 若室中,蓋在中霤之稍北,庭中,蓋在兩階 揖賓就筵也。 就兩楹間之筵,主人與賓爲耦,先投,故先 其設筵皆宜近北 設筵,主人遂揖賓就筵也。 位,反阼階上之位 楣。」此設筵在 此言「進即兩楹間」,謂在堂之禮也 へ南與。 投壺或在堂,或在室,或在 以室中迫狹,而庭中 兩楹間 也 也。 主人既 則 亦當楣矣。 衆耦投壺,皆 反位,使者 -曠遠, 反

右賓主就筵。

執

八算興。《釋文》:「度,徒洛反。」

司

射進

度壺,間以二矢半,反位

設設

中,

既設 執 鄭氏曰:「度壺,度其所設之處也。 七尺也。 坐二矢半,則堂上去賓席、主人席邪行各 算 而 中,亦實八算於中,横委其餘於中西, 立,以請賓俟投。」 反位,西階上位也。 孔 設中,東面, 氏曰:「投 壺去

中矢 而設、 隨 壺 授執 先設 受壺於執壺者,進至筵前,度其遠近之節 亦實 設中於中西,東面,手執 去席七尺。 兕、鹿,使其面 壺 壺射之類,故亦然。」 而 西階上之位也。 時 地 已在此位矣。算,所以記獲之籌也。 無釋獲者,故司射設之。 設之也。 面 、壺者, 之也 八算。 五. 廣 壺 ,於此言「反位,設中」,則知司射奉 扶, 而後設 狹 ,室中、堂上及庭中。 而 壺去席五尺。 既設壺 庭中矢九扶,壺去席九尺。 《鄉 《鄉射禮》:『實八算於中。』投 間以二矢半,其所度之度也。 度壺皆使去席二矢半也。 向東 中,事之次也。反位,反其 射禮》:「釋 司射受壺之時,其中蓋 反位,則受中於執 也。 愚謂:進度壺者, 八算而起,其中 司射之位 堂上矢七扶,壺 獲者設中。」投 東面者,中象 矢有長 在中西 壺 既 短 執 中 者 以 裹 室

釋賓與主人之獲也。八算興者,一耦共投八矢,執八算於手,擬

右度壺、設中。

者。 從二馬」句 飲,上尺證反,下於鴆反。爲,于僞反。」○《釋文》無「一 三馬既 請賓日 正爵既行,請爲勝者立馬,一馬從二馬。 立 "「順投爲人,比投不釋,勝飲 ,孔疏云:「定本無此句。」 ,請慶多 馬。」《釋文》:「比,毗 志 反。 不勝 勝 馬

鄭氏 末人,則不名爲人,不爲釋算也。 以矢本人者乃名爲入,爲之釋算。 也。 經明司射執 壺 若云技藝如此,任爲將帥 或以罰,或以慶。 比投,不拾也。 ,皆所以習武,因爲樂。」 順 曰:「請猶告也。 投爲 人者,矢有本、末,投矢於壺 八 算,起 正爵,所以正 馬,勝算也 而告賓爲投 順投,矢本 乘馬 孔氏曰:「此 禮之爵 也。 謂之馬 若以矢 壺之法 射、投 人 也。 也

是,則 序正。 偶也。 數也。 也。」 其爲 頻投 固 《投壺禮》不立三耦者,投壺輕於射也。」 禮以三馬爲成,但勝偶未必專頻得三,若 也。 請慶多馬者,若頻得三馬,或取彼馬足爲 劣偶之一,以足勝耦爲三也。三馬既立, 勝偶得二,劣偶得 飲不勝之爵也。 方氏慤曰:「上言『人』,下言『釋』,互明之 三馬,是其勝已成,又酌酒慶賀於多馬之 正 賓主當更遞而投,若不待後人投而 ,雖人亦不爲之釋算也。 雖投不爲 節 禮 吕氏大臨曰:「矢本入,則本、末之 按《鄉射禮》三耦先射,賓主乃射。 左右拾投,則賓主之儀答。 文 馬從二馬者,每一 也。 也 立馬,取算以 入,雖入不釋算,所以 故射與投壺,所以觀人之 慶馬勝算,亦爲正爵 一,一既劣於二,故徹取 勝即立一馬, 爲馬,表於勝 正爵,謂 不如 審 以 勝 己

> 而言。 疏「勝者自表堪爲將帥」,非 勝者立馬者,司射爲勝者立馬 馬象而植焉。」或投壺之馬 馬」,賈疏謂「馬爲獲禽之籌」。陳用 慶」也。 皆謂之正爵,然此云「正爵」,乃專指罰爵 云"「漢人格五之法,有功馬、散馬,皆 馬》注引《漢田律》云「争禽不審者,罰以 爲上,故以本投者謂之順。罰爵、慶爵,固 賓之辭也。 德,必容體比於禮,容節比於樂,不尚於苟 中也。」 鄭兼下文解之,故云「或以罰,或以 馬,所以表勝者也。 愚謂:自「順投爲人」以下,皆請 矢以木爲之,以本爲下,以末 亦如此 也 《周禮 以表之。 與。 大司 爲 刻 之 假

右請賓。

請主人亦如之。

請主人於阼階上,此請賓、請主人,亦皆就孔氏曰:「《鄉射禮》司射請賓於西階上,

賓主之前也。」

右請主人。

音泰。」○今按:「間」字,孔疏讀「中間」之間,《釋文》讀爲 曰 : 命 間厠」之間、《釋文》爲長 弦 節焉。」 禮》用瑟也。間若一者,謂前後樂節,中間 名也,今逸。間若一者,投壺當以爲志、取 鄭氏曰:「弦,鼓瑟者也。《貍首》,《詩》篇 於歡 疏、數如一也。投壺者當聽之以爲志,取 虞》』,不計人之尊卑。按《鄉射禮》第一番 投壺,而奏《貍首》者,猶如《鄉射》『奏《騶 投合於樂節,故須中間若 乃用樂。 偶射不釋算,第二番釋算不作樂,第三番 「諾。」《釋文》:「貍,吏持反。 者曰:「請 樂故 孔氏曰: 此發初即用樂者,投 也。」 奏《貍 愚謂: 「鄭知鼓瑟者,約《鄉 首》,間 命弦者,亦司 間、『間厠』之間。大, 也。 若 壺 既非諸侯 一禮輕 一。」大 方主 射 師 射

《貍首》者,《樂師》所言,特謂大射之樂節 大師, 射節,與大射異,故此投壺禮得奏《貍首》 諸侯以《貍首》爲節,大夫以《采蘋》爲節 也。《周禮·樂師》:「王以《騶虞》爲節 首》者、歌《貍首》之詩、而奏瑟以倚其聲 師則當命歌者,而歌者曰「諾」與。 爲之洗」,則此或亦不必有大師矣。 大師 也。樂尊人聲,則歌者當爲大師。此不命 壺之節者也。 故司射命弦者也。 也。 鄉射歌《騶虞》及《采蘋》皆五終,是餘禮用 士以《采蘩》爲節。」此大夫、士投壺,乃奏 「工四人」,投壺禮輕,蓋歌者、弦者各一人 「諾」,統於其長也。 《鄉射禮》曰 「大師 《鄉射禮》「樂正命大師」,此無樂正, 而命弦者,大師尊也。 鄉射禮 大師,工之長也。 重 也。 弦者,樂工鼓瑟以爲投 命弦者 《鄉射禮》直命 而 《鄉射禮》 大 奏《 無大 師 貍 則 曰

與。間,讀爲「離間」之間,言每終相離間也。鄉射歌五終,則五節也。投壺蓋三終

當如一也。

右命作樂。

釋一算焉。賓黨於右,主黨於左。《釋文》:左右告矢具,請拾投。有入者,則司射坐而

拾,其劫反。」

右,北 禮簡 孔氏曰:「約《鄉射禮》射畢則各反其位, 拾,更也。司射東面立釋算,則坐以南 賓 射禮》「釋獲者東面」,司射西面視之,投壺 則賓黨於右 射告時北 此投壺者畢亦各反其位也。」 鄭氏曰:「告矢具,請拾投者,司射 反 其牖間之位,主人反其阼階上之位 ,故司射釋算也。 爲左也。 画。 ,主黨於左,以南爲上也。 左謂賓,右謂主人也。 已投者,退各反其位。」 已投退,各反其位, 愚謂: 釋算 **《鄉** 也。 司 爲

> 皆在堂西,孔疏非是。 衆耦之位皆在堂西,投壼禮賓主之黨亦當位,謂主黨於東,賓黨於西。」按《鄉射禮》

右請投。

《儀禮》如字。奇,居衣反。」
曰「左右鈞」。《釋文》:「數,色主反。純,音全,鄭注曰:「某賢於某若干純。」奇則曰「奇」,鈞則容純,一純以取,一算爲奇。遂以奇算告來投,司射執算曰:「左右卒投,請數。」二算

卒投,賓主之黨皆已投也。 算,實於左手, 縮諸純下。 之,有餘純則横於下。 以取,實於左手,十純則縮而委之,每委異 耦所釋之餘也。《鄉射禮》云:「釋獲 面 **,於中西坐,先數右獲。二算爲純,一純** 興,自前適左,東面 純以委,十則異之,其餘 算爲奇,奇則 執算,執 坐,兼: 者 爲 又 東 末

若多二 處也。 亦别而 而委諸 則曰 也。 所餘之零數也。下言「奇算」,賓主二算相 文也。奇,零也。 尊賓也。 於左手,滿十純則委之於地,每委各爲 取者,取之皆以右手,數右算則從 如 謂勝也。 曰「某」者,或賓或主,不定之辭 勝者所多之算,以告賓於其席前也。 校,而勝者所多之零數也。 曰:「若右勝,則 『左賢於右』。 右 某賢於某若干純,奇則曰「奇」者,謂 獲。」投 純一奇也 一算則 地 異之,各爲一處也。 數左算則斂而實於左手,從左手取 數右算、左算不同者,以相變爲 也。每一 日 壺數算之法亦如之。 純,一 曰『右賢於左』,左勝 以純數告。 上言「一算日奇」,一純 純 鈞,等 則一委,每滿十純, 算則曰 也。 以奇算告,執 先數右算者, 若有奇者亦 《鄉射禮》 一奇,三算 地 取 純 賢, ~, 則 置 以

「遂以奇算告」以下,告勝算之法也。辭也。「二算爲純」三句,數算之法也。曰『左右鈞』。」「左右卒投」二句,請數算之曰『奇』,若左右鈞,則左右皆執一算以告

《釋文》:「奉,芳勇反。養,羊尚反。」皆跪,奉觴曰:「賜灌。」勝者跪曰:「敬養。」命酌,曰:「請行觴。」酌者曰:「諾。」當飲者右卒投數算。

也。 灌猶飲也。言『賜灌』者,服 位,在西階之西,東面,司射命行酌,蓋降 命勝者之弟子酌 約《鄉射禮》而 曰:「知賜 各與其耦於西階上,如飲 奠於豐上,不勝者坐取,乃退 鄭氏曰:「酌者,勝黨之弟子。 《周禮》曰:『以灌賓客。』賜灌 灌、敬養各與其耦於西階 知 也。」 酒 以 行 愚謂: 罰 射 爵 爵。」 而爲尊敬辭 也 而跪飲之。 命酌,司射 酌者 弟 、敬養 孔氏 子 亦 之 酌

行

者

,勝者各

揖

其耦

飲畢

也。

講立馬者

也。 階 洗而以請客亦如之」,是也。 之使飲也。 升,實之,以授賓於席前,不置於豐上,而 老、養病也。 者,俱升於西階上,北面,勝者在右,不勝者 者之弟子,洗酌奠於豐上,勝者乃揖 可知也。已諾,弟子設豐於西楹之西。 無所不敬也。 右勝飲不勝者。 養」,皆謙敬之辭也。若飲賓,則弟子洗爵 在左,取爵跪而飲之。敬養者,酒所以 而 《鄉射禮》「司射命設豐」,不請,則投壺 西面命之也。 《少儀》曰「侍投則擁矢,勝則 此實罰爵,而曰「賜灌」,曰「敬 注疏謂「請於賓與主人」,非 命弟子而曰「請」者 於主人亦然。 不 「,辭 勝 勝 揖 養

立馬,當其所釋算前也。」 愚謂:正爵既,鄭氏曰:「飲不勝者畢,司射又請爲勝者正爵既行,請立馬,馬各直其算。

則立馬直右算,主黨勝則立馬直左算,所請於賓與主人也。馬各直其算者,賓黨勝

右立馬。

以

表明孰

勝也

慶多馬。」賓主皆曰:「諾。」一馬從二馬以慶。 慶禮曰:「三馬既備,請

者。第二番耦射畢,賓主之黨皆射畢,乃 子,無豐。」 勝者以慶之。飲慶爵者,偶親爵,不使弟 也。 鼓節,乃釋算,飲罰爵。❶ 釋算,飲不勝者。 耦射,但唱獲而 鄭氏曰:「三立馬者,投壺如射,亦三 一黨不得三勝,其一勝者并其馬 孔氏 已,未釋算,亦未 第三番賓主等皆射,中 曰 「《鄉 今投壺 射禮》 一初則 飲 初 不 番 於 圃 勝 再 止

● 「罰爵」,原本誤作「卒解」,今據北大本、《禮記注疏》、

立三耦,唯賓主三番而止。」

右三投慶多馬。

正爵既行,請徹馬。

右徹馬。〇以上《投壺》正經,以下乃其

記也。

算多少視其坐。《釋文》:「坐,如字,又才卧反。」

投壺者人四矢,亦人四算。」鄭氏曰:「算視坐投壺者之衆寡爲數也。

右記算之多少。

籌,室中五扶,堂上七扶,庭中九扶。《釋文》:

「籌,直由反。扶,方于反。」

鄭氏曰:「籌,矢也。鋪四指曰扶,一指按

寸。 異,投畢皆各反其位,其設豐行爵,亦皆在 也。然其禮本簡易,故或在室以避風塵, 蓋以堂上爲常禮,以燕飲本在堂也。 八寸,九扶則三尺六寸也。」 扶,扶廣四寸。 室,日晚於堂,大晚則於庭。矢之長短,隨 西階上也。 壺之處雖不同,而主人與賓飲酒之席位不 或於庭以就明顯,又可以各隨其宜也。 言主人「進即兩楹間」,據禮之常者言之 矢長七扶。庭中彌寬,矢長九扶。 地廣狹。 或於室,或於堂,或於庭,其禮褻,隨晏早 之宜,無常處。」 《春秋傳》曰:『膚寸而合。』投壺者, 室中狹,矢長五扶。堂上差寬, 五扶則二尺,七扶則二 孔氏曰:「投壺日中於 愚謂: 四指曰 故經 投壺 投 尺

右記籌之長。

算長尺二寸。《釋文》:「長,直亮反。」○鄭注::「或曰

鄭氏曰:「其節三扶可也。」

右記算之長。

文》:「爲,于僞反。」升。壺中實小豆焉,爲其矢之躍而出也。《釋壺頸脩七寸,腹脩五寸,口徑二寸半,容斗五

言園壺之實數,注乃借方體言之,算法所 也。 鄭氏曰:「脩,長也。 謂 『虚加之數』也。 圜周二尺七寸有奇,是爲腹徑九寸有餘 寸也。以腹脩五寸約之,所得求其圜周, 加以爲實數,又皆必取全寸,不計分釐,定 知加而不知減,乃於下文遂併方體之所虚 經言『容斗五升』,注乃以『二斗』釋之,經 則爲二斗,得圜囷之象,積三百二十四 阛 實以小豆,取其滑且堅。」 壺腹徑九寸,而圍二尺七寸,則爲失 然其言知借而不知還 腹容斗五升,三分益 朱子曰:

> 其圍則僅爲二尺四寸一分五釐,其中所受 不減於五寸,其廣雖不減於八寸五釐,而 四寸八分者但爲四十八寸六分,三百二十 之,去其四角虚加之數四分之一,使六十 欲得園壺之實數,則當就此方形規而 然此方形者,算術所借以爲虚加之數,若 尺二寸二分,中受二斗,如注之初説矣。 數,乃復合此六十四寸八分者五,爲一方 此六十四寸者爲正方,又取其八分者割裂 之。今以算法求之。此言二斗之量者,計 四寸者但爲二百四十三寸,則壺腹之高雖 壺,則其高五寸,其廣八寸五釐,而外方三 而加於正方之外,則四面各得二釐五毫之 者分之,則每高一寸,爲廣六十四寸八分。 其積實當爲三百二十四寸,而以其高五寸 睘

❶ 「數」、《禮記注疏》作「素」。

禮記卷五十六

僅爲斗有五升,如經之云,無不諧會矣。」

右記壺。

壺去席二矢半。

右記壺去席之度。

去,起吕反。」 矢以柘若棘,毋去其皮。《釋文》:「柘,止夜反。

鄭氏曰:「取其堅且 大七分。]或以棘,取無節。」● 曰:「毋去其皮,質而已矣。」 重 也。 舊説云:『矢 吕氏大臨

右記爲矢之木。

言。 徐符代反,舊又蒲來反。 浮,縛謀反。」 〇鄭注:「浮,或作 魯令弟子辭曰:「毋幠,毋敖,毋偝立,毋踰 釋文》:「幠,如吾反。 匏」,或作「符」。 毋幠,毋敖,毋偝立,毋踰言。若是者浮。」 借立、 踰言有常爵。」 薛令弟子辭 踰,或爲「遥」。 敖,五報反,又五羔反。 倩,音. 曰 : 佩

鄭氏曰:「弟子,賓黨、主黨年穉者也。 爲

> 禮俗不同,記者兩記之。 《詩》言「不吳不敖」也。 幠,大言也。敖,容不肅也。 《晏子春秋》曰:『酌者奉觴而進 **偝立,不正鄉前也。踰言,遠談語也。** 者,禮衰乖異,不知孰是也。幠、敖,慢也。 令浮。」」晏子時以罰梁丘 爵,常所以 其立堂下相褻嫚,司射戒令之。 罰人之爵也。 令弟子辭異,異國 浮,亦謂是 一據。」 毋幠毋敖,猶 記魯、薛 愚謂 曰:「君 也。 常

右記令弟子辭。

○□□○,薛鼓。取半以下爲投壺禮,:	○□○○□□○□○□○半,○□(○○○□□○□○,魯鼓。○□○○○	蔵:○□○○□□○□○□○□半,○□○
	鼓。取半以下爲投壺	鼓。取半以下爲投□○□□○±	□○□□○□○□□○□□○□□○□□○□□○□□○□□○□□○□□○□□○□□

0

射之細也。射,謂燕射。」 愚謂:此鼓之 節則知其事矣。投壺之鼓半射節者,投壺鼙,方者擊鼓。古者舉事,鼓各有節,聞其鄭氏曰:「此魯、薛擊鼓之節也。圜者擊

亂反。」

侯「七節」,大夫、士「五節」。每奏《詩》一士以《采蘩》爲節。」《射人》天子「九節」,諸諸侯以《貍首》爲節,大夫以《采蘋》爲節,一節也。《樂師》:「天子以《騶虞》爲節,一節也。《樂師》:「天子以《騶虞》爲節,

《詩》篇長短有定,投壺鼓節用射節半,其終則鼓亦一終也。然鼓節可以增減,而

終爲一節,而鼓節與之相應,每奏《詩》

者與。不然,則天子之《騶虞》反少於大一定,而其長言咏歎之間,固有可舒可蹙歌《詩》之法未知何如。意者《詩》辭雖有

右記鼓節。

别哉?

夫、士之《采蘋》、《采蘩》,何以爲尊卑之差

者童子皆屬主黨。《釋文》:「長,竹丈反。冠,古司射、庭長及冠士立者皆屬賓黨,樂人及使

投壺。」 觀禮 鄭氏曰:「庭長,司正也。 皆主人之人,因投壺而分爲二黨耳。 者,授主人以矢者,皆是也。 使者,主人所使令之人,若執壺者,設筵 非一,使之彼此相代,故得與於投壺也。 子之習於樂者爲之,亦謂之樂人也。 以外,或不用瞽矇,即 謂若擊鼓、擊鼙者。而弦歌之人,自大師 與主人有堂上之席耳。 薦羞者。 而長者爲賓黨,卑而幼者爲主人黨,尊賓 有司之屬爲之。冠士、童子,主人之子弟 者也。 樂人,國子能爲樂者。 愚謂:司射、司正,蓋以私臣 立者,自司射以下皆立,惟賓 以私臣公有司及弟 樂人,奏樂之人, 使者,主人所使 此賓主之黨, 此皆 樂人 以尊 l 與於 公

無此○。□○○○□○□○。《大戴禮》下尚有□□○,朱子從之。薛鼓:○□○○□○□○□○□○□○□○□○□○□○□○□○□○□○□○□○□○□○

國 賜 進 史館纂脩 士 及 第 孫 翰 希旦 林 院 一集解 編 脩

儒 一行第四十一《别録》屬《通論》。

孔子爲魯哀公陳儒者之行也。吕氏 當爲,非以是自多而求勝於天下也。 此先儒所以存於篇也與。」 風,竊意末世儒者將以自尊其教,謂孔 之説,有誇大勝人之氣,❶少雍容深厚之 殊寡,學者果踐其言,亦不愧於爲儒矣。 言之,殊可疑。 曰:「儒者之行一出於義理,皆吾性 然考其言,不合於義理者 此篇 大臨 分所 子

魯哀 公問於孔子曰:「夫子之服,其儒 服

禮記卷五十七

音餘。 長,竹丈反。 長居宋,冠章甫之冠。丘聞之也,君子之學 與?」孔子對曰:「丘少居魯,衣逢掖之衣, 也博,其服 少,詩照反。衣逢,于既反。 冠章,古亂反。」 也鄉。 丘不知儒服。」《釋文》:「與: 逢,如字。掖,音亦。

也。」 曰: 冠焉。宋,其祖所出也。衣少所居之服, 有道藝者所衣也。孔子生魯,長而之宋而 猶大也。 異,又與庶人不同,疑爲儒服 鄭氏曰:「哀公館孔子,見其服與士大夫 者,時孔子自衛反魯,哀公館之,故衣冠異 非哀公志不在於儒,乃問 冠長所居之冠,是之謂鄉。 「禮,臣朝於君,應著朝服,而 吕氏大臨曰:「古者衣服之制,自 大掖之衣,大袂禪衣也 其服。」 言不知 而問之。 ,此君子 著 儒服, 常常 孔 逢 服 氏

0 誇」、《集説》作「矜」。

四七五

之服. 即深 也。 發問 異服 之服 尺二寸,故哀公見孔子之服,疑其爲 孔子亦服深衣以見之,蓋不敢以有加於君 皆夕深衣。 其俗也。 之,所謂「脩其禮物」也。 於此可見矣。章甫,殷玄冠之名。 寸,至袪 冠 、衣逢掖之衣,則童子之衣爲深衣之制 衣 也。 孔子見君不以朝服者,諸侯、大夫、士 也。」 也。 ,冠禮始冠緇布冠,既冠 有異於人也。 法度,此衆所以謂之儒服,哀公所 至於庶 也。 而 時人尚簡易,深衣之袂,不復二 末世上下僭亂,至於無别,儒 君子貴乎學問之廣博,其衣服 漸殺,故曰「逢掖之衣」。 深衣之袂,其當掖者二尺二 時哀公蓋服深衣就見孔子,故 人,皆有差等,未聞 愚謂: 逢,大也。 孔子之所服,蓋深 孔子既長,居宋 而 逢掖之衣 冠章 儒者之有 宋人冠 中甫,因 孔子 儒者 則 衣 以 者

> 哀公曰:「敢問儒行?」孔子對曰:「遽數之 俗之舊 直言哀公之服之失,但言己之所服者乃鄉 但 可見矣,故哀公因之遂問儒行 衣之失其制,而儒者之異於人不 隨 其 法,非 (鄉俗) 而 儒服之特異,既以 不 求異於人也 也 見 在 孔 衣 子 可終 服 時 不 亦 深 欲

加孟反。」也。」《釋文》:「行,下孟反。數,色主反。更,古衡反,一也。」《釋文》:「行,下孟反。數,色主反。更,古衡反,一不能終其物,悉數之乃留。更僕,未可終

鄭氏 若夏官大僕、小臣之屬 至於僕侍之人怠倦而 遽 哀公聞孔子之言,知儒者之所以異於人者 更之者,爲久將倦,使之相 也。僕,大僕 不在服,故進而問其行也。 數之 曰:「遽猶卒也。 則 不 能 也,君燕朝則正 盡 |其事,盡數之 更代,猶 物 也。 猶 僕,侍御之人, 代。 言儒者之行, 事 位掌擯、相。 未 乃當 也。 可 愚 留,久 盡 久留

言儒行之廣博而深厚也。

待取。 聘,夙夜强學以待問,懷忠信以待舉,力行以 哀公命席,孔子侍,曰:「儒有席上之珍以 筵也。 待取 謂: 君適 也。 鄭氏 能 道,非爲君之取我也,而自可以 忠信,所以自立其本,非爲君之舉我 爲君之來問也,而自可以待問。 子侍,蓋負東房而南向與。 玉之在席上,非 自可以 舍也。 侍,侍坐也。 其臣,升自阼階,所在 其自立有如此者。《釋文》:「强,居兩反。」 也。 此以玉之待聘喻君子之待問、待舉、 曰:「爲孔子布席於堂,與之坐 待聘,謂待諸 待舉。 夫無求: 儒者之强學,所以自致其知,非 儒者之力行,所以 有求於人,而 於世,而其自不 哀公在阼階 侯聘問之事 珍,玉也。 如主。」 聘問者自不 上西向,孔 儒者之懷 待 能 自盡 而用之 取 、也,而 舍 席, 也 猶 則 其 愚 待

可謂能自立矣。

文 *: 僞。 儒 也,粥粥若無 有 「易,以豉反。粥,徐本作「鬻」,章六反。」 大則 衣 冠 中, 如威,小則 能 動作慎。 也。 如 其容貌 其大讓 愧。 其 有 如 難 如 慢,小 此 進 者。 而 易 讓 退 如

禮也。 而不犯 難 者,若矯飾而不出於情,然非矯飾也 尊以驕人,然非 也,禄之以天下弗顧 俗而已。 「衣冠中,謂得 貌若不屑也。 如僞,爲之以爲儀爾。」 曰:「大讓,如讓國、讓天下,誠心 孔氏曰:「粥粥,柔弱專愚貌。」 進 尊道 非 色斯舉矣,所以易退。」 禮 動作慎,非禮勿履而已。 丽 ,若有所愧。 飲食辭辟之間,是小 不屈於世,若有所威。 其 自尊也,尊道也 中制,不異於衆,不 也。 非義 辭其大者,若 吕氏大臨 不就,所以 辭其 丽 非 讓也。 一, 欲 讓,其 張 流 曰 : 由 其 自 於 由 義

備 和 中正 儒 行,皇如字,舊下孟反。 爲,于僞反。」〇今按:爲,當如字。 必先信。 豫 有 處必慎 必 道 鄭 易,不争陰陽,己所不願,弗施於人也。 曰 以 忿窒慾,身立德充,可以當天下之變,任天 死 與 下之重,備豫之至也。」 有如 氏曰: 愛其 一,止不 人人争 中正,如 :「居處齊難,坐起恭敬,言必 居 養其身也。 非 處 道塗不争險易之利,冬夏不争陰陽 貪生也,蓋以懲其血氣之忿,而 死 此 齊難,其坐起恭敬,言必先信,行 ,坐起不苟,所以 競者,皆所 ,行必中正,所以進其身之德,皆**所** ·選處,所以 「齊難,齊莊可畏難 以 者。《釋文》:「齊,側皆反。 見 有 大賓,如 不 争 待也,養其身以有爲 以 遠 `險易,不争陰陽,不 愛 承 鬭 其 遠其身之害。 訟。 大祭也。 愚謂:儒者之居 死 也。 也。 吕氏大 難,乃旦 先信,行 行不争 不争險 夫 也。 /愛其 養其 反。 臨 妄 懲 其 之 必

> 也。儒者之備豫如此。 所託命,故慎以養之,而將以大有爲於世其身,非私其身也,蓋以我之身乃民物之其。非私其身也,蓋以我之身乃民物之義理之勇,以待夫事之大者而争之也。養

儒有不 立義以 見,賢遍反。近,「附近」之近。」〇鄭注:「積,或爲「貨」。」 《釋文》:「積,子賜反,又如字。 得 亦難得乎? 而後禄,不亦易禄乎? 而 所以 吕氏 謂 難 能賤之。 玉、土地、多積,不如信、義、多文之貴 易 得 應世 大臨 寶者,人之所珍藏也 爲土地。 寶金玉,而忠信以爲寶。 禄 難畜主於義 也 我之所貴,人不得而奪也。 一者,義而已。 曰:「儒者所以自爲者,德而 ,易禄而 非義不合,不亦難畜乎? 不祈多積,多文以爲富。 而 難 不畜也。 所以 易,以豉反。 其近人有如 趙孟之所貴,趙孟 ,儒者則内 自貴 非時一 不祈土 也。 畜,許六反。 不見,不 此者。 故金 先勞 藴 린 也。 地, 忠 愚 難

信,故 不見 者 以 非 鐢 乎己而無求於外若 文,故曰「多文 富也,儒者則多學於《詩》、《書》六藝 也 立 ·矣,然 也, 如此 義又未嘗不可得而畜也。 時不見,若見爲難得者,值其 ,其先勞後禄,**固** 義 也。 以 儒 曰「忠信以爲 吅 爲 者 其非義不合,若見爲難畜者 難得 土 之立 地」。 以 加 義,亦 爲 易禄也,易禄 富」。 寶」。 未嘗遠乎 此,似乎高 積聚之多,人之 因 夫儒者之内 土地各有 事 人 蓋儒者之近 制 峻 诗 情 宜 又未 而 丽 .) 所 故 難 不 而 ·; 處 之 謂 宜 嘗 足 其 畜 可 曰

不 悔 鷙蟲 義 ; 斷其 儒 有委之以 劫之以 威, **攫搏不程勇者**,引重鼎不程 ,來者不豫,過 不 習 貨財,淹之以樂好,見利不 衆,沮之以 其 謀。 言不再,流言不 其 兵,見死 (特 立 有 不 如 其 此 更其 力, 者。 極 往者 虧 污不 守 《釋 其

> 音至。 作「其勇」。 反,又丁亂反。]〇鄭注: 文》:「樂,五教 攫,俱縛反,一音九碧反。 反。 好,呼 「斷,或爲「繼」。」○勇者,《家語 報反。 搏,音博。 沮, 在吕 反。 斷,音短,直卵 騺 與 、摯同、

鄭氏 勝。 也。」 也。 吕氏大臨 再,猶不更也。 從 沮 縮,千萬人吾往矣,其勇 不能屈也。 其守,所謂富貴不能淫,貧賤不能移,威武 而 之莫能勝也,其自任也不自知其力之不足 調調 鳥,驚當作「摯」。 無 往者 引重鼎不程其 所 曰:「淹, 恐怖之也。 方氏 顧 不 曰: 鷙蟲攫 悔 不 慤 「見 非非 謂 程力,材 曰:「不程 不極,不問所從來 省聲也。 利 鷙 浸 有 力者,仁之爲器重 搏 蟲、猛 不 漬 所吝而 不程勇者,自 虧 之。 足以 也非慮勝 其義 「勇,勇」 鳥、猛 程 不改也 劫, 任 猶 7,見死 事 足 量 劫 熠 而 以 也 也。 而 一,爲其 脋 也 反 不 有 犯 後 **弄,**舉 字字 也。 不 而 更 所 難 動

豫。」 所忽 者也。 也。 動 反 以喻艱鉅之任也。言雖有凶暴之威,苟自 者 斷其威者,氣配道義而 以自信,何窮之有? 過之勇也。 而 有 有所 足以 艱 而 ,道立於豫,而不疑其所行也 鉅 縮 而 勇者,當從《家語》作「其勇」。 當 不 必任也。 之任,苟義所當爲,則不自量其 有不善未嘗復,何再之有? ,則不自程其勇而有所必赴也 愚 理 防 謂 流言,起於人者也。 圃 也,爲其機足以應 無所悔。❶ 鷙 極,窮也。 蟲 攫 此自反之功也。不 搏, 無所餒。 來者不豫, 以 過言,出於己 喻 變 不習其謀 凶 在己者可 而 暴之威 重鼎, 非 此 不 必 改 力 雖 有

其過 儒 此 殺 有 而 失可 不 可 《釋文》: '親而不可劫 可 ,辱也 微 辨 「溽,音辱。 而 其 居 不 也,可近而不可迫也,可 口 處 面 數,所具反。」〇今按"「數 數 不淫,其飲食 也。 其剛 毅 不 有 溽, 如

字,宜色主反。

吕氏大臨 鄭 淫,侈濫也。 **晋且將受之,況面數乎**?」 成湯改過不吝,推是心也,苟 義必爲,聞過而 勝之言,於義理未合。 也。其過失可微辨而不可面數,此尚 飲食,欲勝之也。不淫不溽,立義 故可親、可 交者,雖疏必親,非義加之,雖强禦不畏, 氏 曰 : 曰:「儒者立於義理而已。 | 恣滋味| 近、可殺 溽,濃厚也。 能 改也。 爲溽,溽之言欲 而不 所貴於儒者 子 可 侈其居處, 劫、 路 有 聞 過 迫、 (失, 雖 過 也。 以 辱 一以見 則喜 氣 勝 厚其 以義 也。 炽 好 欲

有如此者。《釋文》:「戴,本亦作「載」,音同。」〇更,行,抱義而處,雖有暴政,不更其所。 其自立儒有忠信以爲甲胄,禮義以爲干櫓,戴仁而

儒有 愚謂: 謂 以 也。 服人,則人莫之侮。 楯、大楯也。」 鄭氏曰:「甲,鎧。 吕氏大臨曰:「首章言自立,論其所學 者元善之長,戴仁而行,言其尊仁而行之。 之欺侮,猶甲胄、干櫓之可以禦患也。 仁 而行,仁之盛。抱義而處,義不離身。」 行,足以待天下之用而不窮。 義者事之宜,抱義而 立,論其所信所守,足以更天下之變而 禦患難。 有忠信、禮義,則人不敢侵侮也。 不更其所,不變其所立之仁義 畝之宫,環堵之室,篳門圭窬,蓬户甕 二者皆自立,而有本末先後之差焉。」 忠信以感人,則人莫之欺。 儒者以 孔氏曰:「甲胄、干櫓,所 胄,兜鍪也。干櫓, 忠、信、禮、義禦患 忠信、禮義 處,言無事不在乎義 此章言 可以禦人 禮義 也 戴仁 難 亦 所 自 以 不

> 文》:「堵,音睹。 牖; 疑,上不答不敢 易衣 面 Ц, 篳,音畢。 并 以 日 諂 窬,徐音豆,郭璞《三倉解 丽 其仕 食; 上 有 答 如 之不 此 者。 敢 《釋 詁 以

音臾、《左傳》作「寶」。」

爲畝 户。』《左傳》作「竇」,謂門旁小户也,上 宅也。環,周迴也。 謂 鄭氏曰:「言貧窮屈道,仕爲小官也。宫, 主,故曰『圭窬』。 唯一堵。 日用一日食也。 旁窬也,穿牆爲之如圭矣。 五堵爲雉。 云: 『柴門也。』 圭窬,門旁窬穿牆 下方,形如圭也。 牆 孔氏曰:「一畝之宫者,徑一步 ,若折而方之,則東西南北 垣 也。 篳門,謂 篳門,荆竹 環堵,面一 上答之,謂君應用其言。」 蓬户,謂編蓬爲户,又以 《説文》云:『穿木爲 以荆竹織門 環堵之室,東西 堵也。 織 門也。 并日 五版爲堵, 各十 也。 而 圭 爲 長 食,二 一箭,門 杜 之 南 步 百 鋭 如 氏 爲 步

食也。」 《公羊傳》「五版而堵,五堵而雉」,何休以 出 甕口 蓬 耳。 丈。 謂不日日得食,或二日、三日併得一日之 家共一衣,出則更著之也。 也。 之理,《公羊》説一堵有四十尺,庶幾近之 文,以左氏「堵長一丈」,室無周環祇 記》用左氏之説。此注所引,乃《公羊傳》 版廣二尺。五版爲堵,一堵之牆,長丈廣 堵。」古《周禮》及《左傳》説:「一丈爲版, 爲堵四十尺,雉二百尺。《五經異義》引 戴禮》及《韓詩》說,謂「八尺爲版,五版爲 者,王云:『更相衣而後 塞門,謂之蓬户也。 也。 三堵爲雉,長三丈,廣一丈。」鄭注《坊 上答之不敢以疑,自信者篤也。 甕牖者,牖如甕口,言其室狹而 又云: 『以敗甕 愚謂:堵、雉之説,諸家不同。 甕 口 牖 可以 爲 并日而食者, [牖。] 易衣 謂牖牕圓 出。」是合 上不 牖 一丈 小 丽 如

厚禄也。群富居貧,至於窮約如此,不欲諂媚以求任,將以行道,若不得其志,則辭尊居卑,然不敢以諂,自守者堅也。此言儒者之

爲楷。 反。比,毗志反。信,音伸。思,息嗣反。」 之病也。 奪也,雖危,起居竟信其志,猶將不忘百姓 民,有比黨而危之者。身可危也,而 儒有今人與居,古人與稽,今世行之,後世 適弗逢世,上弗援,下弗推。 其憂思有如此 者。《釋文》:「推,昌 志 讒 不 諂 口 之 以 誰

作。 志不 以法於來世,雖生弗逢世,至於見危 也。危,欲毁害之也。 鄭氏曰:「援猶引也,取 一己之私計也。 可 愚謂:儒者上有所考於古人,下 屈 ,猶且以百姓之病爲憂,而 蓋其憂思之深如此 也。 起居,猶 推猶 進 舉 也 不爲 其 口 動

儒有博學而不窮,篤行而不倦,幽居而不淫,

有如此 游之法 上 通 而 者。《釋文》:「行,下孟反。 不 慕賢而容衆,毀方而 困 ; 禮之以 和 爲貴、忠信之美、優 上,時掌反。」 瓦合。 其寬裕

貴於和。忠信,禮之質也,故以忠信爲美。 學不 鄭氏 裕也 陶瓦之事,其初則圓,剖之爲四,其形則 所當慕,衆亦不可不容,汎愛衆而親仁也。 則 己之寬裕也。 容之中,未嘗無分辨之意也,故曰『其寬裕 方,毁其圓以爲方,合其方而復圓 優游,用之和也,故以優游爲法。 上通 有如此者』。」 不 可久之德也。 不困,達不離道也。 窮,温故知新之益也。 困於道德不足也。」 曰 : 「幽居 「慕賢」二句,言接物之寬 謂謂 愚謂:「博學」七句,言行 幽居不淫,窮不失義 獨處時 禮之體嚴,而用 也。 陳氏 篤行不倦,賢 澔 不困 [,蓋於 日: [賢固在 既 也。 涵 博 仕

> 賢 儒 家,不求富貴。 而 有 内稱 進達之,不望其報,君得 不辟親 其舉賢援能有如此者。《釋 ,外舉不辟 怨,程功 其志。 積 苟利 (事,推 國

文》:「辟,音避。」

謂: 也。 之。 不以爲私,此儒者舉賢援能之心也 富貴,不求國家之賞也。 應氏鏞曰:「程算其功,積累其事,不苟薦 謂此賢者輔助其君,使君得遂其志也 鄭氏曰:「君得其志者,君所欲爲,賢臣成 不求其報,不望所舉者之報也。 下不求報於人,上不求報於國。」 孔氏 曰:「稱 亦 舉也。 蓋薦賢以爲國 相示也, 君得其志 爵 不求 位 相 愚 而

任舉有如此者。《釋文》:「難,乃旦反。」先也,患難相死也,久相待也,遠相致也。其儒有聞善以相告也,見善以相示也,爵位相

下之士也。任舉者,所以待其朋友而已。吕氏大臨曰:「舉賢援能,儒者所以待天

遠,不致之同進則不進。 彼 爲 爲 重於天下之士者,義有厚薄故也。 避居下,不待之同 同 同 其 其 憂 好 樂 惡 也 巾 一, 故 故 聞 爵 升 位 善 則不升。 相 相 此 先, 患 告 任 舉 見 朋 難 善 彼 相 友 相 雖 死 示 加 疏

沮, 爲高 弗知 治,直吏反。 儒 有澡身而 《釋文》:「澡,音早。 也; 同弗與,異弗非 不 加 麤而 沮,在吕反。 少 浴德,陳言而伏,静 翹之,又不急爲 而 爲多。 行,下孟反,又如字。」 也。 静, 世治 如字、徐本作「諍」、音争。 其特立獨行 不輕 也。 而 不臨 ·, 世 正之,上 有 亂 如 深 此 不 而

以 同 陳氏澔曰 於外也。 正 曰 一,未有能 正 己 惟大 也。 也。 "「翹,與『招其君之過』『招』字 静 臣 舉其過而 IE 陳言而伏者,人告嘉謀 而 爲 人者也。 正之者,將順其美,匡 能 格 諫之也。」 君 心 故澡身浴德者 之非,在 吕氏 我 圃 救 者 大臨 順 _, 所 其 未

之於世 當盡 其忠勤 謂 弗非 爲多 方氏慤 惡 也。 其正君之實也。 所以爲事君之本也。「陳言而伏」四句,言 之震矜之,所以爲假之也。 高,加少爲多,則是有自滿假之心,此 高,臨衆不以己位尊自振貴也。 知 而翹之者,明告之也。 『又不急爲 常常 ,然後麤 京謀 人臣之事 ,無可以 ,則不伐異。 同乎己者弗與,則 在 也。 匪懈之心也。 曰:「静 事不 於 也。」 未 丽 世亂不 自高 形 以己少勝自矜大 翹之,然 · 君,雖功如伊、周,皆分之所 丽 也 示 和 一, 故 正之者,隱進之也。 加 鄭氏曰:「不 ·沮,節 而 臨深而 世治不輕,道可以行 自多也。 日 亦 不同,以義理爲主 不黨同。 静 緩 而 可以 上 爲高」二句,言 蓋澡· 而 正之,既不見 知 不迫,故 苟臨深爲 弗 守之於己 不加 也 臨 異乎己者 身浴德 也 深 齊 少 面 桓 而 爲 日 愚

而 己不 與也。 前言「特立」,以行己言。 此

言「特立獨行」,以事君言也

儒 分,如字。 此者。《釋文》:「近,「附近」之近。 隅,雖分國如錙銖,不臣不仕。 强毅以與 有上不臣天子,下不事諸侯,慎静 人,博學以 知服,近文章,砥 砥,音脂,又音旨。 其規爲 而尚 厲 有 寬, 如 廉

錙,側其反。銖,音殊。」

其操可 矣。 謂: 服,行也。 儒者非不臣天子也,枉 之,視之輕如 鄭氏日 之太峻, 狹,而又能貴尚乎寬容。 與人, 不臣 非不 謂 丽 「雖分國如錙銖,言君分國 事諸 强 天子,不事 君臣之義,無所逃於天地之間, 猶《論語》「可 又 一毅矣。 能 錙銖矣。八兩曰 侯 汎 也,枉 愛以 慎静. 諸侯,其 其 與人。 其 强毅 則恐其 者與之」之與。 道 道 (心可謂: 則 則 |別慮 有所 錙。 所學極 有 規模之太 所 其 慎静 不 以 不 風 臣 愚 禄 其 裁 事

文》:「樂,音洛。下,户嫁反。行,下孟反。」

同 厭,久不相見,聞流言不信其行。 儒 而 有合志同方,營道同術,並立則樂,相下不 銖爲 浮華而無實,而又能砥厲乎廉隅。二十四 博,然博學則慮其 備而不倚於一偏,所以 蓋其廉隅之峻飭如此。 國以禄之,視之如錙銖之輕,而不臣 其所當行。 (進,不同而退。其交友有 兩,八兩 多文以爲富 爲 錙 泛濫 非其 爲儒者之規爲 而 ,然近文章 此皆言其道德周 道 失 急義,雖 歸 如此者。《釋 本方立義, 而 或 則 又 不仕, 也。 慮 能 君 其 知

其並 受勸 所合之志同其方,心意之同 鄭氏曰:「同方、同術,等志行也。 同 不信,不信其友所行如毁謗也。」 其 |立也,則樂而相下不厭,敬業樂群 善規過之益也。 **術,學業之同也。** 其不相見也 並立,謂聚處 也。 所營之道 一,則聞 愚謂 聞流 也。

言 異也。 容之意。 進而交之。不同者,損友也,異方,異術者 之失。同者,益友也,同方,同術者也 也,則退而遠之。此儒者交友之道也。 不 信,同 其行本乎方,而存於心者無阿 立乎義,而見於外者無便辟善柔 心 斷 金, 而 不間 於 出 處 語 諛 默 , 則 取 之

《釋文》:「孫,音遜。施,始豉反。」
《釋文》:「孫,音遜。施,始政反。」
、任之和也。分散者,仁之施也。儒者兼此而仁之和也。分散者,仁之施也。儒者兼此而仁之和也。分散者,仁之能也。歌樂者,名之,猶且不敢言仁也。孫接者,仁之能也。禮節為之,循行之本也。孫接者,仁之地也。寬

敬於仁者也,故爲仁之貌。出言有章,仁其與人遜接,則習仁之能事。威儀中節,『仁之地』。其規模寬裕,則稱仁之動作。曰『仁之本』。行之敬慎者可與行仁,故曰曰氏大臨曰:「質之温良者可與爲仁,故曰

必兼而有之,然後可以盡儒行之實,猶且 共而不私,則仁術之施不吝也。 與人爲善,則善與人同,凡以分散與物, 聖之心也 猶不敢自以爲仁也。夫子曰:「若聖 仁,儒者之爲仁,必兼此八者而有之,然 和以積其順,施以廣其 發之,能以爲之,貌以表之,文以飾之, 孫接應乎物。 温良稟乎性,敬慎存乎心,寬裕見乎事 不敢言仁,則聖人之志存焉。 而至於和者也。 足,不知手之舞之,足之蹈之,則安於仁 之見於外者也,故爲仁之文。 仁,則我豈敢?」蓋其尊讓 志存,則可與入聖人之域矣。」 本以基之,地以居之,作以 貨不爲己,則利與人同, 急。 。 如此,聖不自 蓋道莫大於 有聖人之 詠 八者,儒 歌之不 愚謂: 與

儒有不隕穫於貧賤,不充詘於富貴,不慁君

亦作「愍」,武謹反。」○鄭注:「充,或爲「統」。閔,或爲一恩,胡困反。累,力僞反,一音力追反。長,竹丈反。閔,本反。穫,本又作「獲」,同户各反。詘,求勿反,徐丘勿反。一之命儒也妄,常以儒相詬病。」《釋文》:「隕,于敏王,不累長上,不閔有司,故曰『儒』。今衆人王,不

實也。 隕穫者 閔,病也。 鄭氏曰:「隕穫,困迫失志之貌也。充詘 其生意也。 歡喜失節之貌。 之實,故爲人所輕,常以 吏所困迫而違道,孔子自謂也。」 儒行之實者,不可得 而 不能 「孔子説儒,凡十七條。 言今衆人之命爲儒者,本未嘗有 自强於義理也。 ,困於貧賤,若草之隕落、斬艾而失 言不爲天子、諸侯、卿大夫、群 充詘者,淫於富貴,志意充滿 慁猶辱也。 而 詬 儒 命,名也。 病 相 其從上以來, 也。 詬病。 累猶 〇孔氏 愚謂 妄,無 繫 若 也。 有 儒

加義。

「終没吾世,不敢以儒爲戲。」

然也。 條 也。 從上 其十七條之儒,是夫子自謂 至下十五 而又專以十七條爲孔子自謂,亦恐不 而第十六條所言,亦未 ,明聖人之儒,包上十五條賢 十五 且聖人之儒,非孔子固不足以當之, 條所言,未見其專爲賢人之事, 條,皆明賢人之儒。 足以 也。 盡聖人之道 其 愚謂: 人儒也。 第

信 世不敢以儒 之,問儒服而遂問儒行,乃始覺焉。言『没 魯時也。 鄭氏曰:「《儒行》之作,蓋 而館之,聞孔子之言,遂敬於儒也。言加 此經明孔子自衛反魯,歸至其家,哀公就 ,行加義,是記者所録也。 孔子歸至其舍,哀公就 爲戲」,當時服 孔子 終没吾世,不 自 孔氏 ጢ 衛 禮 初 反

孔子至舍,哀公館之,聞此言也,言加信,行

敢以 篇不類聖人氣象,先儒多疑之。而哀公爲 明哀公就見孔子而得聞儒行之由也。此 之,謂哀公館禮孔子。 至舍,謂自衛反魯,歸至其家也。哀公館 鄭稱蓋以疑之。」 幣召之,孔子乃歸。」以《傳》文無館事,故 退,命駕而行。 文子遽止之,將止,魯人以 事,則嘗學之矣。甲兵之事,未之聞也。」 攻大叔疾,訪於仲尼。仲尼曰:「胡簋之 也。按《左傳》哀十一年冬:『衛孔文子將 哀公終竟不能用孔子,是當時暫服,非久 學者,託爲此言以重其道。其辭雖不粹, 終没吾世,不敢以儒爲戲」者,亦夸大之辭 不能用,没而誄之,所謂「言加信,行加義, 人多妄,卒爲三桓所逐。 儒 蓋戰國時儒者見輕於世,故爲孔子之 爲戲,是哀公之言,記者述而 愚謂:舍,居也。 此二句追述前事, 其於孔子,則生 録之。 孔子

> 能及也。 然其正大剛毅之意,恐亦非荀卿以下之所

大學第四十二 朱子《章句》。

禮記卷五十七終

禮記卷五十八

其義,陳其數,祝、史之事也。

知

其義,則

理之所當然。

故禮之所尊,尊

其義也。

失

國史館纂脩孫希旦集解賜進士及第翰林院編脩

冠義第四十三《釋文》:「冠,古亂反,篇内惟「玄冠」如

《士冠禮》之義也。 義。 詳 謂之『義』者,訓是經之義也。 所載謂之『禮』者,禮之經也。 昏、射、鄉、燕、聘,天下之達禮也。 其本出於君臣、父子、長幼、尊卑之間,其 此下六篇,皆據《儀禮》正經之篇 見於儀章、度數、周旋、曲折之際,皆義 其辭氣相 似,疑一人所作。 吕氏大臨 《禮記》所載 先王制禮 曰 : 《儀禮 此 而言其 篇釋 冠、

> 子,和長幼。君臣正,父子親,長幼和,而后 是故古者聖王重冠。《釋文》:「長,竹丈反。」 顔色齊,辭令順。 禮義立。 齊,辭令順,而後禮義備。 凡人之所以爲人者,禮義也。 於正容體,齊顏色,順辭令。 禮雖先王未之有,可以義起也。」 故冠而 后服備,服備 故曰:「冠者,禮之始也。」 以正君臣,親 容體 禮義之始,在 加 后容體正, 正,顔 色 父

身之要也。必學而後成,必成人而後備。 門辭令三者爲始。三始既備,乃可求以三 三始也。童子之服,采衣紒。」 吕氏大臨 三始也。童子之服,采衣紒。」 吕氏大臨 三始也。童子之服,采衣紒。」 吕氏大臨 三婚也。童子之服,采衣紒。」 吕氏大臨 以一

之事。」 義立。 也。 也。 備 親父子,和長幼。 之所接者也。 之所具者也。 自外面分明有形象處把捉扶豎起來」,是 齊顔色,順辭令者,朱子謂「爲學之序,須 至於二十,則三者備矣,故冠而責以 童子於三者未能 則其於禮義固 重,身之所接者也。 聘,皆於是基之矣。 昏禮,賓於鄉則有射、鄉,仕於朝則有燕、 而後禮義備。 1,服備 蓋 故冠爲行禮之始。 容體、 未有不謹其身之所具,而能善其 則 愚謂:禮義之始,在於正 必備乎禮義,而 、顏色、辭令者,五事之要,身 故禮義備而後可以正 身之所接者無不盡 君臣、父子、長幼者,人倫之 有所 備,不可 服所以章德,童子未冠 未能 身之所具者無所忒 自是授之室則 備 以不學,學之而 後 矣。 可 成 以 ,而後禮 人則服 稱 君臣 容 成 其 體 身 有 人 服

用反。」 古者冠禮筮日、筮賓,所以敬冠事。敬冠事古者冠禮筮日、筮賓,所以敬冠事。敬冠事

加有成也。 故冠於阼,以著代也。 賢。 本」。」 臨 出,而國之所 其終身之吉。 敬至則禮重,禮重則人道立,故曰『以爲國 日,冠日也。 曰:「筮日、筮賓,質之神明,敬之至也 冠禮者,君臣、父子、長幼之道所自 馬氏晞孟曰:「筮日必吉,所以 已冠而字之,成人之道也。《釋 由重也,故曰『爲國本』。」 賓,爲子加冠者。 筮賓必賢,所以要其終身之 醮於客位,三加彌尊, 吕氏大 要

阼。 也。 鄭氏 醮焉,不代父也。 若不醴,則醮 户西爲客位。 曰:「阼,謂主人之北也。 冠者初加緇 用酒於客位 庶子冠於房 布 ·, 敬 (户外,又因 適子冠於 冠,次加 而 成之

文》:「著,張慮反。醮,子笑反。」

其名,故冠而加字之,成人之道 皮弁,次加爵弁,每加益尊,所以益成也。」 冠,再 也。 謂: 阼, 阼階也。 也。 之階,冠於阼階之上,明其將代父而 多 獨言「醮於客位」者,蓋周末文勝,用醮者 醴,或用醮,醴質而醮文,隨人之所用也。 緇布冠,爵弁又尊於皮弁,故曰「三加彌 稱字 遂 客位,以尊異之也。 適子之禮也。 若庶子,則冠於房外,南面 女故 孔 醮 ,氏曰: 酌而無酬酢曰醮。客位,户牖間 用醴謂之醴 也 焉。 加 據 既三加,則冠禮成於此矣,故醮之於 皮 而言之也。 成人之道者,幼時稱名,成人則 弁服,三加爵弁服。 「二十有爲父之道,不可 ,用酒謂之醮。 著,明也。 阼階乃主人 冠於阼,醮於客位,皆 冠禮三加: 皮弁 冠禮 也。」 始加 復 7尊於 爲主 緇 或用 之位 稱 愚 布

而與爲禮也。《釋文》:「见,賢遍反。」見於母,母拜之,見於兄弟,兄弟拜之,成人

受,子拜送,母又拜」,既字,「見於兄弟,兄 子弟者,重其爲成人之始而敬之也。 弟再拜,冠者答拜」。 以母、兄之尊而先拜 之禮禮之。若謂『脯自廟來,拜而受之』, 爲醴子設,非奠廟也。 非拜子也。」此説未然。冠禮所薦脯、醢, 持所奠脯以見母,母以脯從廟來,故拜之, 大臨日: 冠者益不可不思所以稱其服矣。 之深,正所以明其望之之重,責之之備,而 母雖尊,有從子之道,故當其冠也,以成人 則子拜送之後,母又拜,何居?」 士冠禮》冠者既醴,「取脯,見於母,母拜 「孔疏: 『冠子以酒、脯奠廟,子 蓋 過禮有 斯須之敬, 敬之 吕氏

鄉先生,以成人見也。《釋文》、「摯,本亦作「贄」。」玄冠、玄端,奠摯於君,遂以摯見於鄉大夫、

者。」 雉 鄭 辱。』見於先生之禮亦宜如之。」 愚謂 玄端,爲緇布冠服,以緇布冠冠而敝之,故 之服,不可服見君及鄉大夫等也。 君子敬其事則命以始。 見於大夫,終辭其摯,於其入也,一拜其 生,齒、德俱尊者也。 或曰:『即主治一鄉者。』未知孰是。 見者亦玄端見之。 公曰:「見於君不朝服,以其未仕也。 易玄冠配玄端也。」《士冠禮》注疏。 則易服者,蓋爵弁乃助祭於君之服,冠時 於母及兄弟,皆用三加之爵 言「日月以見君」,此亦其一端與。 不用冠之餘日,蓋别擇日以見之。 也 氏 曰 鄉 賈氏公彦曰:「易服者,爵 「易服 先生,鄉中老人爲 不朝服者 鄉大夫,鄉之異爵者。 《士相見禮》曰:『士 冠者始見於君,必 非 弁服 朝 卿大夫 事 也。 , 見 《表記》 冠者見 初冠 敖氏 弁 致 於 助 先 所 服 仕 繼 君 祭

> 之辭。 也。 皆如此與。 奠置於地 暫服之耳。 成人見者,以其爲成人之始,故見之也。 、國語》「趙文子冠」,徧見六卿,皆有戒 既冠見君 凡冠而見鄉大夫、鄉先生者,其禮 而不敢授,臣見於君之禮也。 母及兄弟以 ,則易服玄端也。 冠目 見,用冠 奠摯, 服 諭 可

與?《釋文》:「少,詩照反。之行,下孟反。」之禮行焉。將責四者之行於人,其禮可不重者,將責爲人子、爲人弟、爲人臣、爲人少者成人之者,將責成人禮焉也。責成人禮焉

備。」 以苟。」 焉。 謂四體膚革異於童 鄭氏曰:「言責人以 人少,則凡在宗族而屬之尊於我,在鄉黨 親親、貴貴、長長,不失其序之謂 愚謂: 吕氏 爲人弟,專以事兄言之。 大臨 穉 曰:「所謂成人者,非 大禮者,己接之不可 也,必知人 倫之備

皆我爲之少而當事之者也。四者之行重,而齒之長於我,在朝廷而德位之先於我,

(A) 以下,可言「以為人,」故必重其禮而後可以責之也。

曰:「冠者,禮之始也,嘉事之重者也。」《釋爲人,而后可以治人也。故聖王重禮。故故孝、弟、忠、順之行立,而后可以爲人,可以

文》:「弟,音悌。

治,直吏反。」

鄭氏曰:「嘉事,嘉禮也。 男女』也。」 丽 然後謂之成人,成人然後可以治人也。」 之行,有諸己而後可以責諸人,故人倫備 有吉禮,有凶禮,有軍禮,有賓禮,有嘉禮 則於人道無不盡,而可以謂之成矣。 愚謂: 孝於親,弟於兄,忠於君,順於長, 可 人子,然後可以爲人父。 冠屬 以 爲 、嘉禮、《周禮》曰『以昏、冠之禮親 人兄。 吕氏大臨曰:「孝、弟、忠、順 能 爲 人臣,然後可以爲 能爲人弟,然後 宗伯掌五 能爲 禮: 成

人之始,其禮爲重。他如飲食、慶賀之類,然後可以治人。嘉禮之别有六,而冠爲成君。能爲人幼,然後可以爲人長。故成人

視冠禮則爲輕矣。

不敢擅重事,所以自卑而尊先祖也。廟者,所以尊重事。尊重事而不敢擅重事。是故古者重冠。重冠故行之於廟。行之於

禮納采至親迎,皆主人筵几於廟,聘禮 吕氏大臨 敢 所以明成人之禮之重,所以厚責其子。不 義 受,爵有德,禄有功,必策 尊敬其父也。 則尊重事,一則不敢擅 示有尊而不敢專也。 也。」 擅 重 事 愚 謂: 者,以明重禮必成於禰,又所以 曰:「古者重禮必行之廟中,昏 冠禮 冠禮 行於廟有二義: 重事。 命於大廟,所 必行諸 尊重事者, 廟 ,猶是 以 廟

一四九三

昏義第四十四《别録》屬《吉事》。

子」以下,又因昏義而廣言之也。 嫁三月」一節,言婦順由於教成。「古者天下四節,明婦事舅姑之義。「古者婦人先下四節,明婦事舅姑之義。「古者婦人先此篇釋《儀禮·士昏禮》之義。自篇首至此篇釋《儀禮·士昏禮》之義。自篇首至

『昏禮者』。合,如字,徐音閤。好,呼報反。』繼後世也,故君子重之。《釋文》:「昏者,一本作昏禮者,將合二姓之好,上以事宗廟,而下以

受之以致飾者,所以敬而不苟也。昏禮 爲昏。」○吕氏大臨曰:「物不可以苟合, 必受之以賁。蓋天下之情,不合則不成, 必受之以賁。蓋天下之情,不合則不成, 必受之以賁。蓋天下之情,不合則不成, 以昏者,取其陽往陰來之義。日入三商 鄭氏曰:「娶妻之禮,以昏爲期,因名焉。

> 也。 皆男先乎女,所以别疑遠耻,成婦之順正 此與?」 大昏,而《詩》 首《乾》、《坤》而中於《咸》、《恒》,《禮》謹 知幾、慎獨之君子,其孰能體之?《易》 或褻而慢之,則天命有所不行矣。 者,其受實之義 而道行乎其間。 朱子曰:「男女居室,人之至近, 以《二南》爲正,其 乎? 幽暗之中,衽席之上,人 故 自 納 采至 一親 迎, 以

命於廟,所以敬慎、重正昏禮也。人筵几於廟,而拜迎於門外,入揖讓而升,聽是以昏禮納采、問名、納吉、納徵、請期,皆主

此二禮,一使而兼行之。納吉,謂男家既《昏禮》云『爲誰氏』,言女之母何姓氏也。也。問名,問其女之所生母之姓名。故也。問名,問其女之所生母之姓名。故故明氏曰:「聽命,謂主人聽使者所傳壻家

也。 徵,成也。 問女之名,將以加諸卜也。 堂之上,兩楹之間也。」 徵無鴈,以有幣故,其餘皆用鴈。 主人,謂 者,男家不敢自專,執謙敬之辭,故云『請』 則謂之『納幣」。 故言「誰氏」。 名辭云:「敢請女爲誰氏?」謙不敢質言, 聽命於廟,謂女之父母聽受壻家之命於廟 女父母,行此等禮時,皆設几筵於禰廟也。 納徵、請期,每一事則使者一人行。 惟納 人請女家以昏期,由男家告於女家。 大璋,天子加以穀圭。 夫則玄纁,玄三纁二,加以儷皮,諸侯 卜吉,以告女氏 男女非有行媒,不相知名。」《士昏》記問 女氏終聽男家之命,乃告之。 先納聘財,而 疏家疑婦人不以名通,故孔 也。 其庶人則緇帛五兩,卿大 納徵者,納 請期者,謂男家使 后昏 愚謂: 故《曲禮》曰: 成。 聘財 問名者, **奉** 納吉、 必請 加加 秋 也 以

> 氏謂 人,而姓氏者,尤非一人之所專也,將何以 其姓氏之理。 卜其吉凶乎? 女之姓氏」,皆非也。 問問 其 母 所生之姓名」,賈氏 而母 所生之女,非止 既已納采,固 又 無不 謂 爲 一問 知

卺,音謹、《説文》作『耋』。」 而酳 也。 于門外。 迎、主人筵几於廟、而拜迎于門外。 父親醮子而命之迎,男先於女也。 人,揖讓升堂,再拜奠鴈,蓋親受之於父母 迎,魚敬反。先,悉薦反。子承命,本或作「子承父母命」, 壻,本又作「聟」,依字從士從胥,俗從知,下作「耳」。 降出,御婦車而壻授綏,御輪三周,先俟 ,所以合體、同尊卑,以親之也。《釋文》: 婦至,壻揖婦以人,共牢而食,合卺 子承 壻 命 執 鴈 以

鄭氏曰:「酌而無酬酢曰醮。醮之禮如冠

❶ 「以告」,北大本、《禮記注疏》作「與」。

醮 婦各執 謂 牢而食,合卺而酳,成婦之義。」 御者代之,壻自乘其車,先道之歸 謂:親迎而父親醮之者,重其事也。 者,酳,演也,謂食畢飲酒,演安其氣。 西面,共一牲牢而 曰:「共牢而 行,母 外南 親 於廟,亦敬慎重正之義,不言者,蒙上 牢」,容大夫以上之禮也。 也。父母,女之父母也。《昏禮》母在 坊記》言「舅姑承子以授壻」也。 二牲以 半瓢。 迎 與 |謂之牢,《士昏禮》用 ,男先乎女,剛柔之義也。 面,女出房南 南面誠之,故言「親受之於父母」,猶 其異者於寢 一片以酳,故曰『合卺而酳』。」 以一瓠分爲兩瓢,謂之卺。 食者,在夫之寢,壻東面 食,不異牲。 耳。 面,父西面誡之,女西 壻 特豚。 《昏禮》夫婦 御 婦 車 合卺而酳 親迎受禮 此 輪 孔氏 也。 云「共 壻與 男子 房户 可 卺, 婦婦 共 周 愚 知

《釋文》:「别,彼列反。」 女之别,而立夫婦之義也。男女有别 敬慎重正而后親之,禮之大體,而所以 而 婦有義,夫婦有 半以酳,而合之則實爲一匏,故曰「合卺而 用 后君臣有正,故曰:「昏禮者,禮之本 合體之義。 酳」也。凡牢禮,以尊卑爲差。合卺而 卺」。 卺 共牢而食,同尊卑之義 以 義 而 匏 后父子有親,父子 分而 爲二,夫婦各 而 /成男 也。」 有親 用 后 夫 其

别成。親之,則夫婦之義立。 此承上二節而結之。 之義」。物之苟合者,親也不可以 婦之道不患其不順也,患其苟於順而傷於 子,故父子之親 義也,失義則順亦不可保矣,故曰「立夫婦 女有别,而 「夫義婦順。」此不言「順」而言「義」者,夫 后夫婦有 ,由於夫婦之別。有父子 義。 敬慎重正,則男女之 有夫婦然後 《禮運》曰: 久,故男 有父

聘,和於鄉、射。此禮之大體也。《釋文》:「朝,夫禮始於冠,本於昏,重於喪、祭,尊於朝、然後有君臣,故君臣之正,由於父子之親。

飲酒。」 愚謂"鄉、射,謂鄉飲酒及鄉射鄭氏曰"「始猶根也。本猶幹也。鄉,鄉

禮也。

直遥反。」

者。棗、栗、段脩,婦見舅姑之摯也。見舅倒、年也,謂係為為,以盛棗、栗、段脩為之。見婦於舅姑,謂通言於舅姑使得見以,正明也。贊,贊助行禮者,蓋以婦人人,以,是也,謂昏明日之早晨也。興,起也。

姑席。 阼階, 乃成其爲婦之禮也。 祭之於地也。 **贊代之也。** 既見,宜有以答之,故贊爲舅姑酌醴以 婦,其義亦然。 之,故《聘禮》《冠禮》皆醴賓。 婦也。凡主人於賓客之初見,則必 棗、栗,拜奠於舅席,又執笄,段脩,拜奠於 以棗、栗,見姑 西 此婦見舅姑之禮也。 面,姑席於房外,南面 婦受醴,贊者薦脯、醢 成婦禮者,婦見醴於舅姑, 以段脩。 但舅姑尊,故不自 士 香禮 贊醴婦者,婦 舅姑之醴 , 婦 || || || || 醴 有 祭,謂 執 席於 以 而 禮 使 禮

「饋,其位反。一本無「婦」字。」
舅姑入室,婦以特豚饋,明婦順也。《釋文》:

無稷,並南上。其他如取女禮。』鄭注云:於室,婦盥饋,特豚,合升,側載,無魚、腊,孝順。」 孔氏曰:「《士昏禮》:『舅姑入鄭氏曰:「以饋明婦順者,供養之禮,主於

四九八

降自西階,婦降自阼階,以著代也 厥明,舅姑共饗婦以 獻。 異尊 與醴 盡婦 若大夫以上,非惟特豚。」 氏 受爵奠於薦左,●不舉,正禮畢 在室户 賈氏公彦曰:「饗婦 者,各還其燕寢。 鄭氏曰: 姑者,爲婦孝 各以南爲上。』是特豚饋也。 更爵酢舅,姑乃酌自飲畢,更爵以 側 載者,右 卑。 道 日 婦同在客位也。 ,外西,舅酌酒 ,故繼之以盥饋者,所以 朱子曰:「以《鄉飲酒禮》約之,席 「言既獻之而授之以室事也。 「舅姑之位,當如婦見,舅席 並 南 胖 順之道也。 上者,舅 載之舅俎,左胖載之姑俎 婦見及饋饗於適寢。」 I 獻婦 獻之禮,奠酬 亦 舅獻 於舅姑適寢之上, 姑 ,婦於席西飲畢, 既 共 姑酬,共成 成婦 愚謂:供養舅 席 此是士昏禮 於 明婦順也 也。」 、奥,其 禮 酬 ,舅姑先 婦,婦 則宜 於 楊 降

禮。 阼,姑 與。」 以室事,故己降自客階,使婦降自主階,明 獻 饗禮,主人獻賓,賓酢主人,主人又酌自飲 供 不饋。」婦既不饋,則舅姑不饗之可知。 使婦代己爲主也。 **阼階者**,主人之階。 舅姑不敢當賓主之禮與。 子謂「饗婦,婦亦於席西拜受」,蓋以婦於 婦,婦席西,東面拜者,避贊者之位也。 畢,更爵以酬賓,爲一獻。 飲酒,拜送於阼階上,拜受於西階上。 養之事統於適婦,而著代之義亦惟適 而姑酬,故曰 士昏》記云:「庶婦 席於房外,而 愚謂 厥明,謂 「共饗婦以一獻之禮」。 盤饋、 婦 舅姑既饗婦,則授之 盤饋之明 行 則使 酢, 饗婦,皆適婦 此饗婦之禮 西階者,客階 舅 人醮之,婦 奠 日 酬 也。 之禮 蓋 之 醴 凡 婦 朱 凡

有「饗送者」之禮,亦不言異日,其皆爲文一婦用其明日爲宜。《士昏禮》「饗婦」後又後,繼以醴婦,又繼以盥饋,禮亦煩矣,饗此厥明饗婦爲大夫禮」,非也。《士昏禮》一有之也。〇疏謂「士禮饗婦與盥饋同日,

蓋藏。 反。 當於夫,以成絲麻、布帛之事,以審守委積 順焉也。 成婦禮 家可長久也。 略 委,於僞反。 可知也 是故婦順備而后内和理,内和 ,明婦順,又申之以著代,所以重責婦 婦順者,順於舅姑,和於室人,而后 積,子賜反。藏,才浪反。] 故聖王重之。《釋文》:「當,丁 理 而后 浪

猶不爲稱夫也。」 愚謂:婦順備,言所以稱夫者,不順舅姑,不和室人,雖有善者,人,女妐、女叔、諸婦也。當猶稱也。後言此又承上三節而結言之。 鄭氏曰:「室

理,此家室長久之道也。 委積、蓋藏,故内理。 而能當於夫,故 順於舅姑、室人者周備而 内和 能 情 成絲麻、 無 無闕也。 家之興衰,基於 不和 ·, 事 布帛, 婦順: 無 不 守 備

所以成婦順也。容、婦功。教成祭之、牲用魚、芼之以蘋藻、宮、祖廟既毁、教于宗室、教以婦德、婦言、婦是以古者婦人先嫁三月、祖廟未毁、教于公

婦人,可不重與?

類也。 也。 鄭氏 之,祭其所出之祖 室,宗子之家也。 女者必就尊者教成之。 牢,告事爾,非正祭也,其齊盛用 令也。婦容,婉娩也。 ,曰:「謂與天子、諸侯同姓者也。 祖廟,女所 魚 爲 俎 實,蘋藻爲羹菜。 出之祖也。 婦德,貞順也。 也。 魚、蘋藻皆水物,陰 婦功,絲麻也。 教成之者,女師 公,君也。 黍云。 婦言,辭 祭無 君 牲 嫁

與 使 宗教之。與小宗近者,於小宗教之。此謂 宗室,大宗、小宗之家。 毁,謂與君同高祖之父以上,其廟 所謂 故鄭 祖廟未毀,謂與君同高祖以下者,則宗室 前三月特就公宫教之,尊之也。」 嫁女,皆教於其家也。 君之同姓。若異姓,亦有大宗、小宗,族人 公宫,謂官家之宫爾,非謂諸侯公宫也 子之事夫,猶男子之事君也。然男子二十 祭祖廟之法,教成之祭輕,君又不當親祭, 亦謂繼高祖以下之宗,非大宗也。 十年不出,使姆教之。1 明前此恒教,但嫁 則宗子主其祭,而祭饌則此女設之,《詩》 君 有司告之。」 同 氏 「誰其尸之? 、謂「使有司告之」。 .高祖以下,廟未毀除 孔氏 有齊季女」,是也。女 曰 按《内則》:『女子 與大宗近者,於大 : 若卿大夫之家 祖 也。 廟 愚謂: 未 既遷也 女子無 祖 毁 廟 己 謂

> 笄而 恭敬之心,此婦順之所由成也 動其禮法之慕,重之以宗廟之告,以生其 也。爲之特舉其禮,嚴之以君宗之所,以 丽 冠 了其仕 遂嫁,故雖教之有素,而深懼其未 乃寬以二十年之久,而女子 習 剘

《釋文》:「嬪,毗人反。 道,后治陰德。 故曰:「天子聽男教,后 外治,以明章天下之男教,故外和而國治。 九卿、二十七大夫、八十一元士,以聽天下之 順,故天下内和而家理。天子立六官、三公、 婦、八十一御妻,以聽天下之内治,以明章婦 古者天子后立六宫、三夫人、九嬪、二十七世 順成俗,外内和順,國家理治,此之謂盛德。」 之法也。 前,所以承副司外内之政也。 鄭氏曰:「天子六寢,而六宫在後,六官在 陰德,謂主陰事、陰令也。」 天子聽外治,后聽内治。 治,直吏反,除「后治陰德」皆同。」 聽女順。天子理陽 内治,婦學 教

愚

謂 此也。 蓋先王之立内官,所 以三夫人、九嬪以下分屬焉。 耳。二十七大夫、八十一元士,亦惟謂其 之,欲見内外官之相當,以明其職之並 於色也。 三相倍之法如此,而其數有所不必備矣。 合六宫,而世婦止二十四人,女御止四十 下大夫以世婦充之,中士以女御充之。 然 官》:「世婦,每宫卿二人,下大夫四人,中 也。 分屬於六卿之下,若大宰之小宰、宰夫,司 八人,則二十七世婦,八十一御妻,亦略言 士八人。」世婦之卿,以三夫人、九嬪充之, 徒之小司徒、鄉師,非謂六官之屬盡於此 、周禮・天官》於世婦、女御不言其數,以 御妻、《周禮》之女御也。后之六宫, 外官三公、九卿以下亦以三相倍 體 言則曰「男女」,以德言則曰 故雖設 此數,而無其人則闕。 以 佐后之内治,非淫 《周禮·春 「陰 重

陽」,以位言則曰「外内」,其實一也。天子與后分治內外,乃夫婦之道之尤重者,故與后分治內外,乃夫婦之道之尤重者,故民之父母。后、夫人之行不侔於天地,則民之父母。后、夫人之行不侔於天地,則民之父母。后、夫人之行不侔於天地,則民之父母。后、夫人之行不侔於天地,則民之父母。后、夫人之行不侔於天地,則

蕩天下之陰事。 天下之陽事,月食則后素服 食。 食。 「適,直革反。見,賢遍反。爲,于僞反。 月,陰之與陽,相 是故男教不脩,陽事不得,適見於天,日爲之 是故日食則天子素服而 婦順不脩,陰事不得,適見於天,月爲之 故天子之與后,猶日之與 須 丽 後成者也。 而脩六宫之職, 脩六官之職,蕩 《釋文》:

傷也。蕩者,滌去穢惡也。」鄭氏曰:「適之言責也。食者,見道有虧

天子脩男教,父道也。后脩女順,母道也。

音咨。」

章咨。」

章咨。」

章文》:「衰,七雷反。資,依注作「齊」,

大王服斬衰,服父之義也。爲后服資衰,服

故曰:「天子之與后,猶父之與母也。」故爲

衰,既葬而除。爲后無服。 及列國諸侯也。諸侯之臣,爲天子服繐爲天王服斬衰,爲后服齊衰,謂天子之臣,

禮記卷五十八終

國 賜 進士及第翰 史館纂 脩 孫 希 林 院 旦 編 脩 解

鄉 飲酒義第四 十五《别録》屬《吉禮

第三 後。 爲四段:首段凡五節,皆引《鄉飲酒禮》之 酒 第 文而釋之。第二段專明黨正正齒位之禮。 此釋《儀 者,三則州長習射飲酒,四 大夫三年賓賢能,二則鄉大夫飲 四 段本别爲 段引孔子之言,明鄉飲 知 此篇有 孔氏曰:「此篇凡有四事;一 禮 • 鄉 应 一篇,而記者合之,説見於 飲酒 事者,此篇本説《儀禮 禮》之義也。 「則黨 酒 īF. 備 國 篇中凡 蜡 五. 中賢 則鄉 祭 行。 飲

> 禮。鄉則三年一飲,州則一年再飲,黨則 年 鄉 子」,鄉人即鄉大夫,君子謂國中賢者。 之事。又云『合諸鄉射』,是州長習射之 云『六十者坐,五十者立侍』,是黨 - 賓賢: 飲酒 年一飲。」 (能之禮也。 》、《儀禮》所據,是諸侯之鄉大夫三 此篇又云『鄉 人、士、君 正 飲 又 酒

注: 詳。 於人禍也,故聖 絜、敬則不慢。 者,君子之所以相 受、拜送、拜既,所以致敬 盥、洗、揚觶,所以 揖 鄉飲酒之義,主人拜迎賓于庠門之外,人三 不鬭、辨,則無暴亂之禍矣。 而后 絜,音結。 揚,今《禮》皆作「騰」。 至階,三讓 致絜,一本作「致絜敬」。 不慢不争,則遠於鬭、辨矣。 人制之以道。 接也。 致絜也。 丽 后 升, 也。 君子尊讓則 所以致尊 拜至、 尊讓、 斯君子所以免 遠,于萬反。」〇鄭 《釋文》:「庠,音 、絜、敬也 拜洗、拜 ·讓也。 不争,

五〇三

禮記卷五十九

於西階 也。 也。」 鄭 北 也。 也。 庠門外,若州長、黨正,則於序門外 拜送者,賓既受爵,主人於阼階上拜送也 拜受者 爲觶也。 洗、揚觶,謂主人盥手、洗爵而舉爵以 階,謂賓主既入門而三揖也。 下文之事也。 氏 面 愚謂 一者,以觶 下文「卒觶,致實於西階上」,亦 獻、酢以爵、酬以觶。 盤,盤手。 再拜」,是也。拜洗,主人洗爵升,賓 曰 鄉飲酒禮》「賓升,主人阼階 上北 :「鄉飲酒之義」,此一 孔氏曰:「此謂 ,主人獻賓,賓於西階 拜至,主人於賓之初至而 庠,鄉學也。 面再拜,拜主人爲己洗爵 與爵俱所以 序、庠惟 洗,洗爵。 鄉大夫,故迎賓 一門,三揖 州 盛酒,故 黨 此言獻賓 揚,舉也。 上拜受爵 日 句所 三讓, 序。 Ē 而 낈 通 揚 拜之 讓升 當 也。 謂 獻 後 丽 總 丽 盥 也。 也 楣 爵 賓 至 目 於 曰 舉

> 之也。 尊有玄酒,貴其質也。 鄉人、士、君子,尊於房户之間,賓主共之也 也。《釋文》:「下「共」字,音恭。」 既 逞於力。 盡 洗當東榮,主人之所以自絜而以事賓 也。 辨,謂競於言。 拜既 ,賓飲卒 羞出 爵 道猶禮 自 而 東房,主人共 拜 也。 也 鬬 謂

共之」。 正也。 設洗於庭,當屋翼也。 臣 質素故 西也。所以玄酒在西者,地道尊右,貴其 酒雖主人之物,賓亦以酢主人,故曰『賓主 房之西,室户之東,示賓主共有此酒也。 私,可以自專也。」 士飲國中賢者,亦用此禮也。共尊者,人 鄭氏曰: 卑,不得專大惠。 君子,謂卿大夫、士也。 也。 北面設尊,玄酒在左,謂在酒尊之 「鄉人、鄉大夫 共,共於賓 孔氏曰:「設尊於東 羞出 必在東者,示主人 也。 也。 自 榮, 屋 東 士,州 房,羞,燕 卿、 翼也。 大夫、 長、黨

夫、州 出 出自東房」,是也。 之實也。 所 東壁,自西階升」,則俎實與庶羞不由房中 也。君子,卿大夫爲僎者也。 矣。 以 白絜 長、黨正之屬也。 《鄉射》記曰「薦脯以 낈 事賓。」 又《鄉飲酒》記曰「俎由 愚謂. 士,所賓賢能 鄉 籩,醢以豆 羞,謂籩豆 人,謂 之士 鄉 大

如字。」如字。」《釋文》:「僕,音遵。坐,才卧反,又也。讓之三也,象月之三日而成魄也。四面也。讓之三也,象月之三日而成魄也。四面

嚴 氏 鄭氏曰:「陰陽,助天地養成萬物之氣也。 地 仕至於大夫,主人之所榮而遵法也。」 古文《禮》僎皆作『遵』。 凝 則 曰:「賓主象天地,介、僎象陰陽者,天 之 陰 氣 陽著成爲天地 主 在 東 南,天 ,故賓在西北,天地 遵者 地 ,謂此鄉之人 温 區厚之 孔

下。 盈 望二日而魄生,三日而 日 月,故曰「三賓象三光」。三日,謂望後三 之卑,故曰「賓主象天地」。介、僎以輔賓 著, 而明生,三日而 人」,是也。 惟三人,其長者三人耳。《鄉飲酒禮》主人 僎象陰陽」。 三賓,衆賓之長也。 主之禮,猶陰陽以助天地之化,故曰「介、 敬事,象乎天之尊,主人以禮下人,象乎地 南象夏始,賓西北象冬始,僎東北象春始 象陽之微氣。 介西南象秋始。」 「西階上獻衆賓、衆賓之長升拜受者三 也。 魄著則 三賓之尊次於介,猶三光之尊 介在 魄,月之有體而 西南,象陰之微 退 三賓席於賓西,衆賓立 而闕 四 明 面之坐象四時者,主人東 著, , 故 三 讓 者 愚謂: 魄著。 故三日謂之朏 無 光處 賓者,主人之所 氣 ; 象月之三日 明著則 也。 僎 在 衆賓 月二日 東 進 次 於 北 於 堂 굶 既 而

而成魄也。

有數,日 賓於 北,以 之學術道者 仁,以德厚者也,故坐於東南。而坐僎於東 之氣,始於東北 天 長 氣也,此天地之仁氣也。 地之尊嚴氣也 釋文》:「凝,魚矜反。」 幼 地嚴凝之氣 以義者也,故坐於西北 西北 日 輔 聖。 主人 而 ,將以得身也。 德也者,得於身也。 也。仁義接,賓主有事,俎、 聖立而 坐 ()始於 ,此天地之義 而盛於東南,此天地之盛 介於西南 將之以敬曰禮,禮以 西 南 主人者尊賓,故 丽 以 是故聖人務焉。」 氣也。 盛於 主人者,接人以 輔 賓。 西 故曰:「古 天地 賓者, 北, 温 此 體 接 坐 天 德 豆 厚

在 賓席於牖間,其位在西 之士,方進身之始,則貴於難進易退,而 上,其位 東南。 在 僎席於賓東 西南。 主人席於 ?,其位· 北。 在 作階上, 介席 東北。 於 賢 其 西 位 有 能 階

謂之禮 射、尚 也。 則以體仁義。 乎三者之義,則謂之聖,言其有通明之識 俎、豆有數,以明齒讓者 之義也。 之義也。賓主相與有事以習禮樂者,習射 義,主人以好賢爲仁,仁義相接者,賓賢能 北以輔主人。「仁義相接」以下,又兼 賓、介,則僎乃贊成主人之禮者,故坐於東 西南 故其接人也主於仁。 君,則貴於愛賢下士,而有藹然相親之情, 義,則其進也必正矣。 有誠,而其德厚矣。 介然不苟之意,故其接人也主於義。 以 通明之識立 齒之禮而言之。 輔賓。 六十者三豆,以至九十者六豆, 體 猶 鄉飲 行於習射 成 而 也,立 介者賓之次,故坐於 酒之禮,就先 以 主於仁,則其好賢也 主人興賢能而獻之 敬心奉 也 蓋賓以 ,則以體禮樂。 ,尚齒之義也。 禮 而行之,則 不 於賓賢, -苟進 生 而 行 明 習 爲 謀

必 舉其 於尚 此德也。古之學術道者,非徒明乎其義 將得之於身,故聖王務於行此三者之 **丛** 一,餘從可 則 以 體 知也。 長 幼。 獨言 得於身,言身實有 體 長 (幼」者

禮,欲天下之勉於德也

也。 觶,致實於西階上,言是席之上,非專爲飲食 也,爲行禮 成禮也。於席末,言是席之正,非專 祭薦、祭酒,敬禮也。 民作敬讓 此先禮而後財之義也。 而 啐,七内反。爲,于僞反。」 也。 不争矣。《釋文》:「薦,本亦作「麖」,同。 此所以貴禮 嚌肺,當禮也。 先禮 而 賤 而後財, 財 也。 爲飲食 啐酒, 則 卒

也。 孔 鄭氏曰:「非專爲飲食,言主於相 祭酒、嚌肺於席中,唯啐酒 氏 脯 致實 曰:「祭薦者,主人獻賓,賓即 醢 也。 謂 祭酒者,賓既祭薦又祭酒也。 盡 酒 也。 酒爲觴實。 於席末 席祭所 也。 敬 祭薦 以禮 嚌,才細反。

賓既祭酒興,取俎上之肺 敬禮,言敬 貴禮而賤財,則敬讓行矣。」 上。 人口 貴禮。於席末啐酒,是賤財也。啐,纔始 酒入於己,故在席末。 主人之禮也。 實,論其盡 之物,故祭薦、祭酒、嚌肺,皆在 飲酒禮》嚌肺在先,祭酒在後,此『祭酒』與 「人之所以争者,無禮而志於財 『祭薦』相連,表其俱敬禮之事也。 敬主人 口,成主人之禮也。 云『卒觶』者,論其將欲卒觶之時。 ,猶在席末,卒鱓則 重主人之禮也。 酒之體也。」 啐酒,成禮者,啐謂飲 席末,席西頭 席上祭薦、祭酒,是 盡 齒嚌之,所以 爵 吕氏大臨 齊肺 ,故遠在 席 也 掌禮 也。 中。 曰 **:** 酒 如知 西 \sim 階 入 啐 鄉 致

役,所以 鄉飲酒之禮,六十者坐,五十者立 豆,八十者五 明尊長也。 豆,九十者六豆,所以明 六十者三豆,七十 一侍以 聽政 者 養老 四

也。 立矣。《釋文》:「弟,音悌。行,下孟反。」 也,合諸鄉射,教之鄉飲酒之禮,而孝弟之行 可安也。 孝弟,出尊長養老,而后成教。 民 知 君子之所謂孝者,非家至而日 尊 養老 丽 后 乃 能 人 成教 孝 弟 而 見之 后 民 國 人

其 餘 於賓席之西南面坐,若不盡,則於介席之 鄉大夫親爲主人焉,如今郡國下令長於鄉 州、黨乃鄉之屬也。 禮會民而射於州序」之禮也。 神而祭祀,則以禮屬 鄭氏曰:「此説鄉飲酒,謂《黨正》『國索鬼 此正齒位之禮,賓、介等皆用年老者爲之, 次爲介,其次爲衆賓,皆以年少者爲之。 射飲酒,從大守相臨之法也。」 孔氏曰: 齒位]之禮也。 按《鄉飲酒禮》賓賢能則用 爲 衆賓。 賓内年六十以上,於堂上, 其鄉射,則《州長》『春秋以 或則鄉之所居州、黨, 民 而飲酒於序, 處 謂之鄉者, 士爲賓,其 以 正

也。」 禮,事與上殊,故又以「鄉飲酒之禮」 也。 《鄉飲酒禮》衆賓立於堂下者皆二豆,其 之衆賓,皆惟 其文也。《鄉飲酒禮》自賓、介以至於堂下 鄉飲酒禮》之義也。 酒之禮,謂十月黨正飲酒,教之以 謂合聚其民於州長鄉射之禮。 東面 北 豆,供養之物,故云『明養老』。合諸鄉射, 賓、介之豆無正文,當依衆賓之年而加之 得爲籩、豆偶也。五十者但二豆而已,則 謂立於堂下,聽受六十以上政事役使也。 六十者以上,每十年加一豆,非正禮,故不 堂下衆賓有二豆」,誤也。 東 立侍,是陪侍之義,故云『明尊長』。 北北 愚謂:上文所言,皆以釋《儀禮 面 北 上,示有陪侍之義也。 上。 籩 其五十 豆,脯 此又别言正 ·者則 、醢而已。 籩、豆必偶,而 立 以聽政役。 於 教之鄉 西 齒 階 别 疏 位 下, 禮 起 之 飲 •

正也。 禮》《燕禮》皆惟脯、醢,蓋以籩、豆相 以 禮,自賓、介以下亦尚齒,故合諸鄉射,教 加 爲偶也。 以十年遞加者,禮之變也。 (士冠: 鄉飲酒之禮,而孝弟之行立矣。 ,籩、豆相配,亦皆爲偶數矣。 禮》體子、《士昏禮》響 養老以飲食爲重,正齒位之禮,豆 《鄉飲酒禮》之一籩一豆者,禮之 然豆加則籩亦 (婦,《 鄉射之 鄉 配 飲 而 酒

《釋文》:「易,以豉反。」孔子曰:「吾觀於鄉,而知王道之易易也。」

《釋文》:「別,彼列反。」 主人拜賓及介,而衆賓自入,貴賤之義别矣。 主人親速賓及介,而衆賓自從之,至于門外, 本,尊賢、尚齒而已。」 愚謂:禮行於鄉, 本,尊賢、尚齒而已。」 愚謂:禮行於鄉, 鄭氏曰:「鄉,鄉飲酒也。易易,謂教化之

敖氏繼公曰:「主人既速介,即先歸,介及

謂:主人於賓及介皆拜迎,於衆賓揖之而衆賓皆同至賓之門外,俟賓同往也。」 愚

已,故曰「拜賓及介,而衆賓從之」。

所領反。殺,色戒反。」立飲,不酢而降,隆殺之義辨矣。《釋文》:「省,之節繁,及介省矣。至于衆賓,升受、坐祭、三揖至于階,三讓,以賓升,拜至獻酬,辭讓

矣。」 也。尊者禮隆,卑者禮殺,尊卑别 鄭氏曰:「繁猶盛也。小減曰省。 於阼階上,介之受獻,不拜洗,不嚌肺,不 亦與賓同。 讓、升,拜如賓禮」,則其揖、讓、拜至之禮 酢主人則止,主人不 飲以酬賓,是辭讓之節,其數繁多也。 至,又酌酒獻賓,賓酢主人,主人又酌而 孔氏曰:「主人於賓,三揖三讓 愚謂:《鄉飲酒禮》「主人以 然其獻之也,於其席前,而不 酬介,是及介省 ",拜其 也。」 辨猶 介揖 自 來 别

○鄭注:「一人,或爲三人」。
 ○鄭注:「一人,或爲三人」。
 ○鄭注:「一人,或爲三人」。
 ○鄭注:「一人,或爲三人」。
 ○解注:「一人,或爲三人」。
 ○解注:「人,或爲三人」。

終者,謂吹笙之人入於堂下,奏《南陔》、降,言『遂出』者,自此至去不復升也。流, 二、八,升歌三終者,謂升知。 孔氏曰:「工入,升歌三終者,謂升類失禮也。立司正以正禮,則禮不失可以、禮也。立司正以正禮,則禮不失可以、禮也。主人獻之,謂歌正也。樂正既告備而數氏曰:「工,謂樂正也。樂正既告備而數代曰:「工,謂樂正也。樂正既告備而

酬,爲有懈惰,故主人使相禮者一人爲司 《鄉飲酒》云『工告于樂正 司正者,一人,謂主人之吏,舉觶 也。降立西階東,北面。」一人揚輝,乃立 降』,注云:『樂正降者,以正歌備,無事 樂正,樂正告賓以樂備,而遂下堂也。 歌、瑟及笙俱作也。工,謂樂正。工先告 巢》合之,工歌《葛覃》則笙吹《采蘩》合之, 爲三終。堂上堂下,一歌一吹,相代而作 終,堂上歌《南山有臺》,則堂下笙《由儀》 堂上歌《南有嘉魚》,則堂下笙《崇丘》爲二 堂上歌《魚麗》,則堂下笙《由庚》爲一終, 工歌《卷耳》則笙吹《采蘋》合之。 堂上下 也。合樂三終者,工歌《關 之,謂獻笙人也。 「遂出」者,樂正自此至去不復升堂 白 華》、《華黍》,每 間歌三終者,間,代也, 一 篇 ,樂正告于賓,乃 雎》則笙吹《鵲 終也。主人獻 示 將 也。 旅

也。 間歌,次合樂,此正樂之四節 恐飲多或至惰慢,故立司正以監之也。 監察儀法者也。 取以酬主人於阼階上也。 備」,遂降立於堂下,以至於禮畢而 雖備,弦歌之工尚未得降,惟樂正既告「 則樂備矣。 之,故飲酒不流邪失禮也。」 正 爲 則立之爲司正。 人舉觶於賓,賓取奠於薦西,至旅酬則賓 而笙不升者,貴人聲也。先升歌,次笙,次 相 而 人舉觶在 謂一一 以 將旅酬,而一人舉觶乃旅酬之始,二事 因 監之也。 故 一人揚觶者,謂主人獻衆賓之後 也 人舉觶,乃立司正」者,蓋立司正 升歌之前,立司正 《鄉飲酒禮》末有無算樂,正 作樂樂賓 流,失禮 行禮之始謂之相,將旅酬 蓋旅酬之後,爵行無 了; 可 也。 謂 司正,飲酒之間 在樂備之後, 「和樂」矣,又 立 也。 愚謂: 司 四者 正 遂 升 以 算 出 樂 樂 備 歌 正

矣。

似當以孔疏

爲是。

立司 篇相合爲一終。若如賈氏,則合樂爲六終 篇爲三終,間歌與合樂皆以六篇爲三終, 瑟,堂下有笙、磬,合奏是詩。」與孔 蓋間歌則以二篇相間爲一終,合樂則以二 朱子是賈氏而 ○《儀禮》賈 正 以 防 (疏謂: 其 非孔疏。 失, 「合樂者,堂 此 和 竊謂歌與笙以三 樂 而 不 上 ·疏異, 有 流 歌 也。

文》:「少,詩召反。沃,於木反。弟,音悌。」 終於沃、洗者焉,知其能弟長而無遺矣。《釋 賓酬主人,主人酬介,介酬衆賓,少長以 孔氏曰:「旅酬之時,賓、主人之黨各以少 也。 者西面,北上,不與,無算爵然後與」,是 長爲齒,以次相旅,至於執掌罍洗之人,以 洗,是無算爵之節,《鄉飲酒》記『主人之贊 水沃、盥、洗爵者,皆預旅 此因旅 酬,遂連言『無算 酬 也。 爵」,欲見無 終於沃、 齿

恩澤 無所 敬 不 順之意 周 遺棄也。」 而無遺棄也。」 徧 也 弟,少 言使少者皆承順以事長者,而 也。 朱子 言少之與長,皆被 曰:「弟,悌也,

廢朝,直遥反。莫,音暮。」焉,知其能安燕而不亂也。《釋文》:「説,徒活反。朝,莫不廢夕。 賓出,主人拜送,節文終遂朝,莫不廢夕。 賓出,主人拜送,節文終遂降,説屨升坐,脩爵無數。 飲酒之節,朝不廢

合結上文五節之義

畢 朝 也。 故未 算 猶 者,既朝 鄭氏曰: 正 艻 後 爵之初 充備也。」 治 飲酒 乃行 脩爵 锐屨,至此 私 乃飲,先夕則罷,其 「朝、夕,朝、莫聽 無數,謂無算爵也。 也。 家 飲 之事 酒之禮也 國若狂 以前皆立而 孔氏曰:「説屨升坐,謂 徹俎之後,乃説屨升堂坐 也。 ,無不醉也。 此 莫不廢夕 謂 鄉 事 行 正 飲 也。 禮 朝不 也 未 酒 ノ,飲酒 飲畢,主 不廢之 禮 終遂, 廢 徹 朝 俎 若 禮 無

> 安燕而 貴賤明,隆殺 道之易易也。」 彼國安而天下安,故曰:「吾觀於鄉 不有闕少,知其能安燕樂而 人備 禮 不 亂,此 拜 辨,和樂而 而 送賓,節 五行者,足以 不流 制文章,終竟申 , 弟 不亂也。」 正身安國 長 而 而 無 知王 遺,

光,政教之本也。 禮也,經之以天地,紀之以日月,參之以三介、僎以象日月,立三賓以象三光。古之制鄉飲酒之義,立賓以象天,立主以象地,設

以養實,故以主象地 西,介所在 鄭氏曰:「日出 賓者,主之所尊敬,故 酒之義有所法象,前文雖 教,出於大辰。」 也 「於東, 三光,三大辰 孔 氏 僎 以 日 曰:「此覆 所在 賓 月即! 備,此 象 也。 前 天。 也 經「陰陽 更詳 天 月 説 主供物 之政 生於 鄉 也 飲

賓主。 辰。」 北 也。 陪之者參也。 謂之大辰。辰,時也。』是天之政教出於大 伐,天所以示民時早晚,天下取以爲正,故 房、心、尾也。大火謂之大辰。北極謂之 羊傳》: 『大辰者何? 北,象日出也。 别 參,然後可行,故飲酒之禮,必有此三者然 辰,北辰亦爲大辰。」故《爾雅》云:『大辰, 大同小異,而 後可行也。」 介、僎以輔之,輔之者紀也。 一傳禮之家,各爲解説其義,本異人之作, 辰。』是三大辰 但陰陽據其氣,日月言其體。 吕氏大臨曰:「飲酒之禮,莫先於 立賓象天,立主象地,禮之經也。 篇,記者見其與前篇所言,義雖大 別以「鄉飲酒之義」起其端 政教之立,必有經、有紀、有 愚謂: 介在西南,象月出 也。何休云:『大火與 自此以下,與首一段 大火也。 三賓以陪之, 也。 伐爲大 僎在 東

同,而間有爲前之所未備者,不忍割棄,因

録而附於前篇之末也。

酒,教民不忘本也。《釋文》:「亨,普萌反。」作,其水在洗東,祖天地之左海也。 尊有玄亨狗於東方,祖陽氣之發於東方也。洗之在

謂 發於東方也。 者、鄉飲酒者、大夫、士之燕禮也、狗不 鄭氏曰:「祖猶法也。海、水之委也。 尊有玄酒,非但貴其質素,且教民不忘禮 法天地之左海也。 爲陽氣之盛。亨於東方者,所以法陽氣之 酒》記「亨于堂東 欲其禮之稱也。 簡,於籩、豆惟用其一,故其牲亦惟以狗, 牢數,牲之小而輕者也, 燕禮 民不忘本者,太古無酒,用 狗者,燕禮之牲也。 洗當東榮,水又當洗之東, 東方、謂堂之東北、《鄉飲 北」是也。 古者無酒,用水而已。 鄉飲 水而 烹飪以火,火 酒牲亦 視響 已。」 食爲 用 爲 狗 愚 教

所在也 夾室。」 東夾之東北。 牲爨不於門外,而於堂東北。 之本始 一,就 也 而 亨焉。 學宮有左右房,則亦當有 敖 氏 繼 凡學宫惟 公曰 堂 堂東北 有 東 門,故 北 即即

反。 物者聖也。 賓必南鄉。 倩,音背。」**●**○鄭注:「察,或爲「殺」。」 鄉仁,右義偝藏也。 言中也,中者藏也。是以天子之立也,左聖 愁之以時察,守義者也。 長之,假之仁也。 假,古雅反。 南方者夏,夏之爲言假也,養之 東方者春、春之爲言蠢也、産萬 愁,依注讀爲「揫」。 西方者秋,秋之爲言愁也 《釋文》:「鄉,許亮反。 北方者冬,冬之爲 藏,如字,徐才浪反。 蠢,尺允

斂 聖之言生也。 鄭 仁,貴長大萬物也。」 也。 氏 曰:「春 察,猶察察,嚴殺之貌 猶蠢 假,大也。 也。蠢,動 孔氏 愁讀 日 也。 生之貌 爲 「五行春 揫。 南鄉、鄉 揫, 也。

> 仁也。 爲先。 也。 成物之功始於秋,而藏則其氣之歸 則其氣之初通者也。天地以義之德成物, 地以仁之德生物,生物之功成於夏,而聖 春作夏長,仁也。 聖也。各以義言之,理亦通也。」 皆是生育長養,俱有仁恩之義,故此 爲仁,夏爲禮。 生物爲本,聖人雖仁義並施,而常以 成物於秋也。然天雖生、成並 大夏,而以生育長養爲事也。 法天之生物於春也,於義則右之,法天之 二者不可偏廢。故其立也,於聖則左之, 聖人法天,以仁育萬物,以義正 故聖人於仁則鄉之,法天地 生物於春,如通明之聖,故東 今春爲聖,夏爲 秋斂冬藏,義也。 心仁者, 用,而常以 於藏 愚謂 之陽 一萬民, 則悄 根者 仁民 蓋 方爲 夏 春 天 亦 夏 居

0

之,尊賓之至也。此一節明賓之坐位之處也。聖人之立如此,而賓之南鄉亦如之,法天之陰居大冬,而積於虚空不用之

介必東鄉,介賓主也。

義也。

介之坐位之義也。

於賓,故其位間厠於賓主之間也。此明

附上東鄉。蓋介亦主人之所敬事,而其尊

階上東鄉。蓋介亦主人之所敬事,而其尊

主人坐位之義也。 主人坐位之義也。 主人坐位之義也。 主人者造之, 産萬物者也。 此明 造, 作也, 謂作此飲酒之禮也。 主人爲禮産萬物者也。主人者造之, 産萬物者也。 主人必居東方。東方者春, 春之爲言蠢也,

大參也。 讓,建國必立三卿。三賓者,政教之本,禮之 月者三日則成魄,三月則成時。是以禮有三

> 禮必立三賓,故三賓爲政教之本。 三賓 備矣,而所謂「觀於鄉 篇所記孔子之言,所以發明鄉飲酒之義者 取法於三月而成時也。 禮有三讓,非但法於月之三日 合之説,似皆不出於先王制禮之本義也。 者,尤非聖人不能道 於賓、介,言「三賓」則賓、介可知也。 也。 丽 建國必立三卿,行 其餘 知王道之易易」 則多附會牽 丽 成 魄,又 〇此

禮記卷五十九終

禮記卷六十

國史館纂脩孫希旦集解賜進士及第翰林院編脩

射義第四十六《别録》屬《吉事》。

之。此篇不引《儀禮》,但泛論習射之義 此 臣相與習射而射 與他篇不同。 燕、聘、鄉飲酒 也。 射,天子、諸侯饗來朝之賓,而因與之射。 皆有之,今惟諸侯《大射禮》存。二曰賓 亦謂之「饗射」、《司服》「饗射則鷩冕」,是 篇釋《儀禮 饗禮在廟,故服驚冕。 凡禮射 等,皆引《儀禮》正 大射儀》之義也。 也 有四: 自天子以下至於士 諸侯饗聘賓, 曰大射,君 冠、昏、 經而釋

射者三耦」,是也。今其《禮》並亡。三曰 禮 庶習射於州序、《儀禮・鄉射禮》是也。 燕射之可見者也。 因與之射,大夫、士燕其賓客,亦得行之。 燕射,天子、諸侯燕其臣子或四方之賓,而 亦與之射、《左傳》晉士鞅「來聘,公享之, Ĕ 鄉射君若賓以下或有不與者,惟大射則無 之禮,賓射爲重,而大射爲大。 鄉大夫以五物詢衆庶,亦用是禮焉。 質者」,鄭氏云:「質,正也。 不與射也。 人、大夫若皆與射,則遂告于賓」,則燕射、 云「君與射,則爲下射」、《鄉射禮》「賓、主 燕禮》云「若射,則如鄉射之禮」。 射甲與椹,試弓習武也。《鄉射》記 司弓矢》「王弓、弧弓,以授射甲革、椹 此外又有主皮習武之射。 四日鄉射,州長與其 樹椹以 《燕禮》記 此諸侯 爲 四 《周 者 云 射 丽

禮 射 不主皮,主皮之射者, 勝者又射,不

勝者降」,是也

幼之序也。《釋文》:「長,丁丈反。」 以明君臣之義也。 之射也,必先行鄉飲酒之禮。 古者諸侯之射也,必先行燕禮。卿、大夫、士 鄉飲酒之禮者 故燕禮者,所 ,所以明長

行也。」 鄭氏 酒 禮 皆謂大射也。 鄉飲酒之禮者,鄉射也。」 禮者,大射儀也。 力,所以禦侮克敵也。 士。 射、鄉射之禮,所以習容、習藝,觀德 事也。天下無事,則用之於禮義,故習大 也。 ,其禮 天下有事,則用之於戰勝,故主皮、呈 日 諸侯謂之燕,卿、大夫、士謂之飲 「言别尊卑老穉,然後射 吕氏大臨曰:「射者,男子所 也 鄉飲酒者,卿、大夫、士之燕 諸侯 卿、大夫、士之射必先行 與其臣行大射,必先 諸侯之射必先行 愚謂:此「射」, 以 而 觀 燕 選 有 德

> 行燕禮。 請安。」是燕禮亦謂之飲酒也 何饗焉? 侯請饗公,子家子曰:『朝夕立於其朝,又 鄉飲酒之禮。 卿、 其飲酒 大夫、士與其臣大射,必先行 《左傳》昭公二十七年:「齊 也。」乃飲酒,使宰獻而

中。 然後持弓矢審固,持弓矢審固,然後可以言 故射者,進退周旋必中禮。 也。」 外,則不疑其所行。 鵠,是必有樂於義禮,久於恭敬,用志不分 者莊矣。 養人於無事之時。 君子敬以直内,義以 鄭氏曰:「内正、外直,習於禮樂有德行者 之心,然後可以得之,則其 生於不敬。所存乎内者敬,則所以形於外 藝也,容比於禮,節比於樂,發而 此可以觀德行矣。《釋文》:「中,丁仲反。」 吕氏大臨曰:「聖王制射禮,以 内外交脩,則發乎事者中矣。 故發 内志正,外體直, 而不中節者,常 知矣。」 不失正 方 善

へ德 可

中,則 過也。 愚 進退周旋必中禮,見於未射之先者也。 之上下左右者,不審之過也。 矢之不 則於心無所偏,而持弓矢也審。 志 所能襲取哉? 周旋之中禮,内志之正,外體之直,豈 力有所專,而持弓矢也固。 矢之或出 德行矣。」 身心者久,而後可以致之,故曰:「可以 而反,若《大射禮》所謂「梱復」者,不 Ē 謂 ,外體直,謹於方射之際者也。 志氣之動,而 既審且固,則無不中矣。 射 者 淮 退 必其莊敬和樂,所以 周 旋 持弓矢 之禮 必 甚 不 煩 然而 體直 審固 固之 及侯 有 養其 進 於侯 萴於 志 一 時 矣。 内 観 退 正 不

時也。《采蘋》者,樂循法也。《采蘩》者,樂節。《騶虞》者,樂官備也。《貍首》者,樂會節,卿、大夫以《采蘋》爲節,士以《采蘩》爲其節:天子以《騶虞》爲節,諸侯以《貍首》爲

職爲節。 文》:「翳,側尤反。貍,力之反。」 成則國安。 功成而德行立,德行立則無暴亂之禍矣。 不 會天子爲節 ·失職 也 故明乎其節之志,以不失其事,則 故曰:「射者所以觀盛德也。」《釋 是故 ,卿、大夫以循法爲節 天子 以備 官 爲 節 ,士以不失 , 諸 侯 以 功 時

《騶虞》以爲射者之節。 侯「七節、三正」、大夫、士「五節、二正 《貍首》,逸《詩》。節者,歌之以爲射之節 《騶虞》、《采蘋》、《采蘩》,《召 者之節。 首》以爲射者之節。 也。《周禮・射人》王射「九節、五正」,諸 差,如《射人》之所言也。《大射儀》諸 以爲射者之節。 乘矢,其餘則用以聽者也。天子大射,歌 每歌一終爲一節。 而其節之多寡,則各 士大射,歌《采蘩》以爲射 節之正者,用以拾、發 大夫大射,歌《采蘋》 諸侯大射,歌《貍 以 南》篇 尊 侯之 卑爲 名

禮 其節,以不失其事,則天子必求賢審官,諸 能齊敬以主其事,是不失職之義也。明乎 循法度,《采蘩》之詩,言教成之祭,其女子 樂會時,未聞。《采蘋》之詩,言大夫妻能 之官也。 用射節之法於此可見矣。《騶虞》之詩,言 篆文『貍』似『鵲」,『首』似『巢』。」 愚謂 時已亡之與? 或曰:《貍首》,《鵲巢》也 内之而 能盡其職業。 侯必虔其王命,大夫必能謹於禮法,士必 劉氏謂《貍首》當在二《南》是也。 「壹發五豝」,以喻賢才衆多,足以備朝廷 《騶虞》、《采蘋》、《采蘩》三詩,皆在二 自 「南》,則《貍首》亦必其儔,豈夫子删《詩 ,與射者有大夫、士,而惟歌《貍首》,則 律 反魯 德行無不立矣。()劉氏敞 會時,謂會天子之時事。《貍首》 而樂正、《雅》、《頌》各得其所」, 如是則外之而事功無不成 孔子言 티 :

儀,皆無其篇,則今之《詩》豈必皆夫子所節,《新宫》之用於下管,《采薺》之用於樂然以今之《詩》考之,則《貍首》之用於射則《詩》之用於正樂者,夫子時必未嘗亡。

删之舊乎?

王務焉。《釋文》:「數,色角反。」盡禮樂,而可數爲以立德行者,莫若射,故聖者男子之事也,因而飾之以禮樂也。故事之是故古者天子以射選諸侯、卿、大夫、士。射

不肖,不能逃於威儀、揖讓之間,而好惡趨 有功乃升,非專以射而選,但既爲諸侯、卿 大夫,又考其德行,更以射辨其才藝高下, 非謂直以射選補而用之也。男子生有懸 弧之義,因此射事更飾以禮樂,容比於禮, 哪之義,因此射事更飾以禮樂,容比於禮, 不肖,不能逃於威儀、揖讓之間,而好惡趨 不為,因此射事更飾以禮樂,容比於禮, 如之。

禮樂。 射爲諸 有慶 樂,而中多者,得與於祭。其容體不比於禮 也。《釋文》:「比,毗志反。中,丁仲反。 與於祭而 其節不比於樂,而中少者,不得與於祭。 天子試之於射宮。其容體比於禮,其節比於 是故古者天子之制:諸侯歲獻貢士於天子, 禮 舍,常見於行同、能耦之際,故射 圃 樂以觀其德,比之以耦以觀其 益 夫君臣習禮樂而以流亡者,未之有 侯也。」是以諸侯君臣盡志於射,以習 地,數有讓而削地。 君有慶,數不與於祭而君有讓。 故曰:「射者, 與,音預。數: 類。」 而 飾之以 數 數

而不失其誠,可以奉祭祀矣。能心平體節文之多,惟射與祭爲然。能盡射之節文曰:「古之選士,中多者得與於祭,蓋禮樂三人,次國二人,小國一人。」」 吕氏大臨鄭氏曰:「三歲而貢士。舊説云:『大國

色角反。」

矣。」 事,以爵以官」,恐無臨祭而射以擇之之 祝、巫、史之屬,皆有常人,所謂 《周禮》,祭祀之禮,奉牲、贊幣,以及宗: 信也。又謂「大射爲將祭擇士,中多得與 《詩》、《書》、《周禮》、《左傳》初無諸侯貢 之必不能 以千八百國每國二人通率計之,歲常至千 多,則不必借才於境外,而無憂不足。 於祭,中少不得與於祭」,亦恐不然。 之事,獨《尚書大傳》言之,此書駁雜,不足 餘人,加以成均之所教,鄉大夫之所興,用 而 王朝一也。豈必使諸侯悉貢其賢者於我 王者以公天下爲心,則才之在諸侯,與在 侯國之人才諸侯用之。 正 獨與不賢者治其國乎? 且三歲貢士, ,持弓矢審固 愚謂: 盡,必有壅 古者王國之人才天子用之, 而中多,其敬可 滯 蓋教化美而賢才 失職之患矣。 以 宗宗 人授 鬼神 + 丽

瀆,而 理。 與習射之事, 祭廟四,若皆祭前以大射擇士 而天子一歲祭天九,祭地一 大射之禮,委曲 且將不暇給矣。 而「將祭擇士」乃附會之 繁重,亦 是大射者特君 未 , 祭 社 二, 必 則禮繁 數 數 相 而 爲

説也

焉。 樂,則安則譽也。是以天子制之,而 子,凡以庶士,小大莫處,御于君所 射,則燕則譽。」言君臣相與盡志於射 故《詩》曰:「曾孫侯氏, 爲正之具也。鄭注:「譽,或爲「與」。」 此天子之所以養諸侯而兵不用,諸 四 正具舉。 大夫 諸 以 以 沼禮 侯自 侯 燕 君 務 以

國 莫處,無安居其官次者也。 賓、獻公、獻卿、獻 鄭氏曰:「四正,正 燕以射,先行燕禮乃射也。 安則有名譽。」 大 爵四行也。 孔 氏日 夫,乃後 :「獻大夫後樂 御猶: 則燕 樂 四行者,獻 待也。 作 則譽,言 丽 射。 以

説 記》云:「萇弘設射貍首,欲以致諸侯。」是 其首而射之,則雖桀、紂之暴不至是。 嘗遽以甲兵加之。 名,未嘗不反而自責,而治其相服之本,未 脩意,不祀則脩言,不享則脩文,不貢則脩 皆射節也,然初不及射事,則《貍首》之詩 首」,則益謬矣。 義,謂《貍首》者,欲射諸 詩,非也。 證君臣習射之事,而鄭氏以爲即《貍首》之 也。 自爲 作 必不專爲射而作也。 語兮,是以有譽處」也。 之後乃射。 也,蓋出於衰周之末厭勝之小術,而 而 射,謂 (脩正之具。) 則譽,謂有名譽也,猶《詩》之言「燕笑 《儀禮》注又附會「樂會時」之 大射 正,謂脩正 《騶虞》、《采蘋》、《采蘩》、 也。 若因其不朝,而至欲抗 若燕 愚 王者於諸侯,不祭則 謂 也,言射者 記 射, 侯 者引此《詩》以 則 不來朝者之 則 滅,謂 説 是 屨 燕 諸 升 樂 侯 坐

可以證聖人之經乎?

孔 匠反。與,音預。不入,一本作1不得人」,非。」○鄭注" 相,息亮反。 將,亡國之大夫,與爲人後者,不入。 司 人。」蓋去者半,人者半。《釋文》:「矍,俱縛反 延,或爲「暫」。」 馬,使子路執弓矢出 子射於矍相之圃,蓋觀者如 觀,如字,又古亂反。賁,依注讀爲僨。 延射,曰:「賁軍之 堵 牆。 其餘皆 射 將,子 至 於

爲僨。 也。 也。 IE 鄭氏 者,而觀者畏其義,則 爲者,而往奇之,是貪財也。 射至於司馬者,先行飲酒禮,將射 一爲司馬。 「先儒謂『與爲人後者,人有後矣,而 與猶奇也。 延,進也。 曰:「矍相,地 價,猶覆 子路執弓矢出延射,則爲 敗也。 出進觀者欲射者也。 後人者,一人而已,既 名也。 或 亡國,亡君之國者 去 也。」 樹菜蔬 子路陳 乃 劉 曰 賁 以 氏 此 司 圃 敞 有 讀 射 司

大射可見矣。 用,則《射人》所言乃大射之禮,而 宫之廣,而且資其器焉。 賁軍之將無勇 説謂「士不得大射」,非也。 亡國之大夫不忠,與爲人後者不孝。 旁,所謂澤也。蓋大夫、士之欲行大射者 此子路之所惡也。」 諸弟而後其子、兄弟,則亂昭、穆也。 又往 三侯」,諸侯「射二侯」,大夫「射一侯」,士 庭或不足樹侯,器或不足供用,故假諸澤 人行大射之禮也。 嫡子而後其族,則輕其親也。 爲人後者,庶子而 後矣,安有兩後者? 而後於人,則背其族也。 射豻侯」。 豻侯, 皮侯也。 與之者也」。 矍相之圃,蓋在學宫之 有後 奪其嫡,則篡其祖也。 與之者,干之也。 愚謂: 丽 衰周此類蓋多 又往與之,是 《射人》王「射 皮侯大射所 此 諸父、諸兄、 孔子與門 士之得 異姓 〇舊 與 兩

反。 觶 或爲「將」。旄期,或爲「旄勤」。今《禮》揚皆作「騰」。」 弟,音悌。 學不倦,好禮不變,旄、期稱道不亂,者不? 去者半,處者半。 俗,脩身以俟死,者不? 句。 在此位也。」 蓋 又使公罔之裘、序點揚觶 在此位也。」蓋斸有存者。《釋文》:「罔又作「冈」。 而 屬,音勤,又音僅。」○鄭注:「序點,或爲「徐點」。 語曰:「幼、壯孝弟,耆、耋好禮,不從 耋,大結反。 好,呼報反。 序點又揚觶而語曰: 而語。 旄,本又作「耄」,莫報 公罔之裘揚 「好 壯 流流

也。 鄭氏曰:「射畢又使二人揚觶者,古者於 旅也語,語謂説義理也。三十曰壯。耆、 爲 裘、點,名也。 在此賓位也。」 耋,皆老也。 一、九十曰旄。 司 行也。● 正」,樂工 者不,言有此行不? 流 升堂復位,『賓取俎西之觶 案《鄉射禮》射畢,『司馬反 孔氏曰:「公罔、序,氏。 俗,失俗也。 百年日 期 頤。 處 猶留 稱 可以 猶言 也。

> 七十日 禮也。 旄、期稱道不亂,此所誓彌精於前。 曰旄,百年曰 否,若有,則可以在此賓位 俗也。不,●在此位者,問衆人有此諸行 言自幼、壯以來能行孝弟也。 六十曰耆, 善者。二十曰幼,三十曰壯。 主人以禮接之,不復斥言其惡,故但 之節也。 酬主人」,主人酬大夫,自相 人舉觶於賓與大夫」,則當裘、點二人揚觶 云『孝弟』 『好禮』,未能不倦不變也。 耋。 不從流俗,身行獨行,不從流移之 但射事既了,衆耦皆在賓位,❸ 耆、耋好禮,謂老 期。 好學不倦,好禮不變, 也。 酬 幼、壯孝弟, 而不倦於好 畢,❷『使二 八十、九十 前雖 簡其

0

[「]行」上、《禮記注疏》有「道」字。

[「]酬」、《禮記注疏》作「旅」。

[「]耦」、《禮記注疏》作「賓」。

[「]不」上、《禮記注疏》有「者」字。

意 ? 以責之與射之衆,豈聖人與人不求備之 情,恐於禮亦未之有也。公罔之裘、序點 擯之使不得與於無算爵,非但不近於人 疑矣。至於已與射之人,至旅酬之後,乃 以如堵之衆,而乃居其半焉,其説固已可 爲人後者,此三者之人,蓋厪有之爾。 拒人如此之甚也。 子不爲已甚,互鄉難與言,猶與其進,未聞 故 期之人,本來觀禮,雖不能射,與在賓 之所言,若在聖門,亦當爲高第弟子,而乃 |旅酬之時猶在也。| 〇吕氏大臨 愚謂: 賁軍之將,亡國之大夫,與 此《記》蓋傳聞附會之言與。 矍相之事,疑不出於聖 曰:「孔 中, 今

鵠,爲人子者以爲子鵠,爲人君者以爲君鵠,一審固,則射中矣。故曰:「爲人父者以爲父之志也。故心平體正,持弓矢審固,持弓矢射之爲言者繹也,或曰舍也。繹者,各繹己

丁仲反。鵠,古毒反,徐如字。射己,食亦反。」 侯。《釋文》:「繹,音亦,徐音釋。舍,如字,舊音捨。中, 侯也。射中則得爲諸侯,射不中則不得爲諸 侯也。射中則得爲諸侯,射不中則不得爲諸 以天子之大射,謂之射侯。射侯者,射爲諸

也。 所以直己志。」《司裘》注。 也。 中之爲雋。 鵠者,取名於鳱鵠。 以虎、熊、豹、麋之皮飾其側,又方制之以 鵠,意曰此鵠乃爲某之鵠,吾中之則成人, 鄭氏曰:「以爲某鵠者,將射,還視侯中之 之義,射中以申「舍」字之義,蓋必先繹之 能處其所射之鵠也。 爲臺,謂之鵠,著于侯中,所謂皮侯。 不中之則不成人也。 舍,處也,如《詩》「舍命不渝」之舍,言 不得爲諸侯,謂 亦取鵠之言較,較者直也,射 鳱鵠 繹己之志,以申**繹字** 有 得爲諸侯,謂有慶 讓 小鳥,難中,是以 也。」又曰:「侯 愚謂:釋,尋繹 謂之

之。大射之侯,以皮飾其側,又以皮爲之 射以觀 丽 鵠,謂之皮侯。 志者也。 爲,不中則不能勝其所爲,此所謂 念此所射者即己之鵠,中之則能勝其 卿大夫共侯,自行大射,則辟卿大夫 侯」,士「射豻侯」。 蓋士與王之大射,則與 熊侯、豹侯,卿大夫則共麋侯。』《射人》云 侯而棲鵠,則春以功」,是也。 侯,司裘不供之故也。《大射儀》諸侯之 豻侯。 《司裘》不言「豻侯」者,士自大射之 王「射三侯」,諸侯「射二侯」,卿大夫「射 「王大射則共虎侯、熊侯、豹侯,諸侯則共 後能舍之也。 ,有大侯、参侯、豻侯。 熊侯 德,故爲父子、君臣者,當射時 侯,所射者也。 也。 《考工記 參侯參於大侯、豻侯之間 鵠者,侯之中,射之的 ・梓人》云「張皮 大侯君 凡侯皆以布 《司裘》: 所 繹 対之 己 丽 ; 必 也。 爲 之 所 用

諸侯 《鄉射》記云:「凡侯,天子熊侯白質,諸侯 即 此等語皆難信。」 中則得爲諸侯,射 是燕射、鄉射之侯同 麋侯赤質,大夫布侯畫以虎豹,士布侯 之獸侯。《梓人》:「張獸侯則王以息燕。」 畫以五采,《梓人》「張五采之侯,則遠國 而 集於布之形。『矦』『佚』二字,皆從人而諧 至,以張侯之地爲候。 以鹿豕。』《燕禮》「若射,則用鄉射之禮 屬」是也。 之諸侯遠於王得伸也。 有 麋侯也。 '降避天子也。 《大射儀》用三侯,畿 豻侯,則亦降於天子也。 燕射、鄉射之侯,畫爲獸形,謂 《司裘》諸侯惟二侯,蓋畿内之 不 王氏應電曰:「矢之所 也。 中則不得爲諸侯,❶ 古文作『灰』,象矢 然其三侯無虎侯 〇朱子曰:「射 賓射之侯, 畫 外

❶ 「諸」,原作「謂」,據《禮記注疏》改。

絀地是也。《釋文》:「與,音預。絀,勅律反。」 讓,削以地,得與於祭者有慶,益以地,進爵、 於祭,不中者不得與於祭。 也。已射於澤,而后射於射宮,射中者得 天子將祭,必先習射於澤。 澤者,所以擇士 《鄉飲酒義》尤多附會牽合之説。○孔氏 「俟」。 医 日 疑皆漢儒所爲,其辭義頗淺近。 諸侯』耳。」 聲,『人』在上作『矦』,又加「人」在旁作 「此一經釋射之義,及鵠與矦之文。」 前人不識古文,遂謂『射中者得爲 愚謂: 自《冠義》以下七篇 不得與於祭者有 而此篇與 與

射於射宫,課中否也。 臣,及所貢士也。 鄭氏曰:「澤,宫名也。 爵,有讓者 有讓」,此經又重言者,前言貢士之制,故 言『數與於祭 先削 而 君 地。 皆先令習射於澤,已乃 有慶,數不 諸侯有慶者先 士,謂諸侯朝者 孔氏曰:「前 與 於祭而 經 君 進 己 諸

己。 則張 選士於澤,不射矦也,但試武而已。故《司 於圃 也。 賞罰所貢之君,此論人君將祭擇士,賞罰 퍊 弓矢》云: 『澤共射椹質之弓矢。』鄭 其中,故《書傳》論主皮射云:『嚮之取也 不中」,不云『容體』及『射節』者,文不 體比禮,其節比樂」,此經直 其士之身,故又重言也。 辟雍謂之澤,以其雍水於丘也。澤宮近辟 引此射義之文以釋之,是於澤中射椹 揖讓之取也。』是主皮之射亦近於澤也。 水澤而爲之也。 宫爲澤。澤所在無文,蓋於寬間之處,近 皮,亦揖讓也。」 又鄭注《司弓矢》云:『樹椹以爲 中,勇力之取也。 澤是宮名,於是宮射而擇士,故謂此 射甲與椹,試弓習武也。」其主皮之射 非惟祭而擇士,餘射亦 愚謂:澤,澤宫也。 今之取也於澤宫, 前經貢士云『容 云『射中』『射 司農 射 具 在 丽

所以用六者,射天地四方也。禮射惟四志,故長大重之。桑弧、蓬矢,取其質也。「此明男子重射之義。男子生而有爲射之之,人爲之射,乃卜食子也。」 孔氏曰:鄭氏曰:「男子生則設弧於門左,三日,負

文》:「弧,音胡。蓬,步工反。飯,扶晚反。」

其所有事,然後敢用穀也,飯食之謂

也。

《釋

地四方者,男子之所有事也。

故必先有志於

者必能治天地 生也,先射天地四方,而後飯食,以示爲 與。用穀,謂食子也。人莫不飯食,其初 夫、士之子,則亦家臣、隸子弟之屬代之 謂:射人代之射者,世子生之禮。若大 曰"「人爲之射,以射人代之而已。」 設飯食,故云『飯食之謂也」。」 矢,象禦四方之亂。 然則其所以責之者重矣。 四方之事,而後 射畢 用 穀, 可以飯食 猶 方 若 氏 事 人 愚 慤 華

反求,石經作「求反」。 發而不中則不怨勝己者,反求諸己而已矣。射者,仁之道也。射求正諸己,已正而后發,

諸身。」 非他人所能與也。故不怨勝己,而反求陳氏澔曰:「爲仁由己,射之中否亦由己,

升下,而飲,其争也君子。」《釋文》:「争,「争鬭」之孔子曰:「君子無所争,必也射乎? 揖讓而

争。「揖讓而升下」絶句。「而飲」一句。」

也。 揖,當物北面揖,及物揖」,此升時揖讓也 者、皆有揖讓之禮也。 射,射畢而降,及衆耦皆射畢,而勝飲不勝 下,降也。揖讓而升下,而飲者,言升堂 争矣。」 及衆射者皆升,飲射爵於西階上,一耦出, 争,惟於射而後有争。 揖如升射,升堂,卒鱓,揖,興」,此飲時揖 上耦射」,出次揖,「當階揖,及階揖,升堂 遜乃如此,則其争也君子,而非若小人之 讓 「卒射、北面揖、揖 也。」 「勝者之弟子洗觶,酌奠于豐上,三耦 朱子曰:「言君子恭遜,不與人 如升射」,此下時揖讓 《大射儀》司射「作 然其争也,雍 容揖 而

肖之人,則彼將安能以中?」《釋文》:「正,音征。發,發而不失正鵠者,其唯賢者乎? 若夫不孔子曰:「射者何以射? 何以聽? 循聲而

夫,音扶。」○鄭注:「發,或爲「射」。」

爲正。」《大射儀》注。 孔氏曰:「畫布曰正,也。」又曰:「正亦鳥名,齊、魯之間名題肩鵠之言梏也。梏,直也,言人正直乃能中也。畫布曰正,棲皮曰鵠。正之言正也。鄭氏曰:「何以,言其難也。聲,謂樂節

賓射也。 棲皮曰鵠,大射也。」

《詩》云:「發彼有的,以祈爾爵。」祈,求 反。 也。 求中以辭爵也。 鄭氏曰:「發猶射也。 養,辭見養也。」 言射的必欲中之者,以求不飲女爵也。 辭見養爾,亦君子無所争之意也。 者之所以求中者,非欲求勝於人也,特欲 養,如字,徐羊尚反。」○鄭注:「爾,或爲「有」。」 求中以辭爵者,辭養也。《釋文》:「的,丁歷 酒者所以養老也,所以養病 愚謂:此引《詩》以明射 的,謂所射之識也。 也, 辭

《文王世子》「公與族燕則以齒」,是也。 也。 者、《司儀》「王燕則諸侯毛」,是也。諸侯 體 禮 此釋《儀 燕其臣子者、《鹿鳴》之詩言「燕樂嘉賓之 禮》「燕羞,俶獻無常數」,此諸侯燕其聘賓 相 兼 禮,夏后氏以饗禮,殷人以食禮 養老而燕之者、《王制》「養老,有虞氏以燕 燕其宗族者,《行葦》之詩燕父兄宗族,及 心」、《有駜》之詩言「在公載燕」,是也。 朝亦 嚴 有三: 用之」,是也。 天子於諸侯之使臣亦有之。 ,燕則禮輕而情洽。 有之。 禮 曰 饗,日食,日燕。 燕禮》之義也。 有燕諸侯來聘之臣者、、聘 《儀禮 有燕來朝之諸 燕禮 饗、食禮 古者飲食之 ,周人 有君 侯燕 脩 重 有 自 有 侯 而 而

之。 與其 於此 瀆 禮義之相與,恩好之相交,明嫌疑 諸侯燕禮,則 皿之用,與其歌舞節奏,皆不得而詳。 王所以燕者必有樂也,故曰『掌四夷 故曰『王燕則共其計』。於《鞮鞻氏》,見 於内朝也,故曰『王燕則 則爲獻主」。於《大僕》,見王所以燕者必 王所以爲燕者非 也,故曰『王燕則諸 曰:「於《司儀》,見王所以燕諸侯者以 賓,其餘禮則不可得而考矣。 其臣子之禮,而其《記》又兼及於燕四 正》,見王所以燕賓者必 ,别貴賤 可想見焉。」 然其牢禮之物,獻酬之數,衣服 聲歌,祭祀則龡 而不亂,所謂「禮讓 邦國之相和,君臣之相接 自爲主也,故曰『王燕飲 侯毛』。 而歌之,燕 相其法』。 有多寡之數也, 於《膳夫》, 爲國』者 陳氏 於《酒 亦 八之樂 方之 祥 如 協 至 見

禮記卷六十

文「致於大子」之事也。教治,即下文「脩夫之衆子爲適子之副貳者也。戒令,即下供,如曰「諸子」,亦曰「庶子」也。諸侯,謂以名其官。公、卿、大夫、士適庶之子,因畿,作「倅」,副也。庶子之倅,謂公、卿、大夫、士 適庶之子非以名其官。公、卿、大夫、士 適庶之子,因能,不 一,故曰「諸子」,亦曰「庶子」也。諸侯,謂以名其官。公、卿、大夫、士 適庶之子,因此官掌公、卿、大夫、士 之子,因此言章公、卿、大夫、士 之子,因此言章公、卿、大夫、士 之子,因此,以名其官。公、卿、大夫、士 遗庶之诸子也。諸、庶,其之,以名其官。公、卿、大夫、士 遗庶之,以名其官。公、卿、大夫、士 遗庶之,即下文「脩、即下文「脩、即下文「脩、即下文「脩、即下文「脩、即,以名其官。以名其。

得游暇無事以脩其業也。

國子之倅不用,

倅」,而此變言「國子」,見不徒率其衆子, 或 事,謂力役甸徒、追胥之類也。存猶留也。 於大子,司馬不得以軍事役之也。 有司,謂將 事,從大子而出也。百人爲卒,五人爲伍 而並率其適子也。有甲兵之事,謂軍旅之 適、庶之子並庶子率之。 故上云「庶子之 所掌者獨其倅耳。 至有事而致於大子,則 治與别等、正位之事,非諸子之所掌,諸子 氏、保氏及大司樂之屬教之。其政令、教 大夫之適子也。公、卿、大夫之適子,則師 祭祀及征伐、會同之事 朝則尚爵,在學則尚 優劣也。 德學道 」之事 有 闬 民之政事,國子之倅存留 正其位,謂正其位序之高下,在 帥 也。 也。 司馬 别其等,謂别其材藝之 協 , 弗正 也。 也。 國子,公、卿、 ,謂國子 大事,謂若大 不用,使 國之政 別屬

掌者言之也。 藝也。 聚也,聚之而考察其所業也。 則國子可 首耳。 仍歸於學也。 則進之,而與俊選同升。藝劣則退之,而 與《燕禮》本無所當,蓋後人因篇末有獻庶 禮之義」以下者是也。此《諸子職》之文, 此篇釋《儀禮 學亦春秋習射可知。於春言「學」,於秋 長職》「春秋以禮會民而射于州序」,則國 子之事,誤以即庶子之官,遂引此冠於篇 射」,互相備也。 春秋教以禮樂,冬夏教以《詩》《書》。」《州 獨言「藝」者,舉輕以見重也。 知。 • 燕禮》之義,下文「諸侯燕 此節皆《周禮・諸子職》文。 德,德行。 獨言其倅者,亦據此官之所 考其藝,謂考其德行、道 道,道藝也。 《王制》: 藝優 合,

卿、大夫,皆少進,定位也。君席阼階之上,諸侯燕禮之義:君立阼階之東南,南鄉,爾

適之義也。《釋文》:「鄉,許亮反。適,音敵,大歷反,居主位也。君獨升立席上,西面特立,莫敢

本亦作『敵』。」

上也。 諸侯燕禮者,諸侯燕其群臣之禮也。 爾,揖而進之也。卿大夫初入門右,皆北 舉此禮,若《四牡》勞使臣,《出車》勞還帥, 臣有征伐、聘問之事,還歸其國,則亦爲特 無事則相與燕飲爲樂,以通上下之情。 臣之分雖嚴,而上下之情不可以不通,故 者,卿西面,大夫北 之事,以下皆引《儀禮》之文而釋之也。 是也。「諸侯燕禮之義」,此一句總目一篇 故揖之使進以定其位也。 立阼階之東南,南鄉,此君視燕朝之位也。 上乃主人之位也。 面東上,爾卿者,君揖 君又爾大夫,大夫皆少進。 燕禮雖 面者,乃燕朝之常位, 加使進 别立 居主位者,作階),卿皆西面 一主人,然君 定位 蓋 君 丽

故 自 無 大夫升就席,是時賓及卿大夫皆未升,故 立 曰 席 也 居 與偕立 獨升」,言無與 主位 上 西 層 也。 面 夫特爲之行 特立者 以君之尊,莫敢與之匹敵 《偕升也,曰「特立」,言 ,君既命爲賓者揖 獻 禮 耳 君 獨 卿 升

宰夫,本亦作「使膳夫」」。「爲,于僞反。」「一等而揖之,禮之也。《釋文》:「亢,苦浪反。」「使爲賓,爲疑也,明嫌之義也。賓入中庭,君降敢與君亢禮也。不以公、卿爲賓,而以大夫致寶主,飲酒之禮也。使宰夫爲獻主,臣莫設賓主,飲酒之禮也。使宰夫爲獻主,臣莫

以行獻 飲酒 使之爲主而 即膳夫,非《周禮》天官之考也。 夫也。」而《左傳》言「膳宰屠蒯」,則知宰夫 宰夫,膳夫也。 ,則爲獻主。」《檀弓》杜蕡曰:「蕡,宰 **一、酬。** 獻賓也。 君燕其臣,不自獻 《周禮 飲酒之禮,必立賓主 膳夫職》:「王 而使宰夫 爲獻主, 燕

> 所爲 又加 者, 賓乃臣子,君降一 凡燕皆不 燕亦大夫爲賓。」蓋 禮》記曰:「與卿燕則大夫爲賓,與大夫 獻主,則 踖不安,而 而禮之也 吅 臣不敢與君亢禮。 所命爲賓者則必大夫,蓋公、卿已 四 君之意 以 燕者,雖或有公、卿、大夫之不同, 命之孤 爲 可 以 賓之尊 匪 以 非 所 曰 盡 所 也。 爲燕者 낈 宴 吾之尊 等而揖之者,以其爲賓 ,則疑於君 若君自爲主,則賓將 飲之歡,體賓之心也。 爲樂矣。 卿、上大夫 燕禮之爲賓者勞,故 爲賓,優之也。 不 可 故使宰夫爲 屈 丽 也 無 也。 别 特) 尊, 也。 然 燕 踧 以

報之以爵禄,故臣下皆務竭力盡 上之禮也。 成拜,明臣禮也。 君舉旅於賓,及君所賜 臣下竭力盡能以 君答拜之,禮 爵,皆降 立功 無 再 於國 能以立功, 不答 拜 稽首 1,明君 「君必

是以 也。 者,所以明君 是以上下和親 功,然後取其什一,故 於下也。 此 國安 君臣上下之大義 上 而 必 君 臣之義也。」《釋文》:「稽,徐本作 寧。 明 而 正道 不 禮無不答,言上之不 · 相 以 怨 上用足 道民,民道之而 也。 也 而 故 和 寧,禮 下不匱 曰 : 之用 燕 虚 也 禮 有 取

"能」,音啟。

以道、道之,並音導。」

再拜 也。 也。 己之情,故於大夫之媵觶,而親 所媵觶以酬賓」,是也。 君舉旅於賓,謂舉旅酬之爵於賓。 亢禮,故使膳宰獻寶,然又以爲 「小臣作下大夫二人媵觶於公,公取大夫 堂下者,所 旅,爲士舉旅, 賓受君舉旅,及諸臣 君所賜爵,謂 稽首、君辭之、乃升成拜。 以 敬 君 其君,臣之禮當然 所取 君爲 之觶,皆 卿 蓋 得賜爵者,皆降 舉 君以 ·旅、爲 臣必 1唯君 未足 舉 臣 《燕禮 也。 大 以 不 拜 所 夫 恓 以 敢 於 賜 鑍 與 賓 君

於臣、 然也。 也。 之以明取民之法,皆以明上之與下,分 爵 氏 其志同,此所以 丽 君辭,然後升成拜。 以事上,故君舉旅、賜爵,皆降,再拜稽首 揖之,賓拜受爵,君皆答拜。 「君盡」 不通,而 不同,而其報施往來之義 取於下之義,因推之以明爵禄之道,又推 而 「禮之用也」。 不同。 不怨者,和也。 復曰:「公取媵爵 成者也。 上用足而下不匱者,寧也。 之拜必答之,所以 君之禮以下下,故賓入及庭,降 上不虚取於下,謂取之必 惠 君臣之際,其分甚嚴 無 故天地交而萬物通 不 此因 君臣 浹也。 和、寧 君答臣拜,而見上 和 天下之禮,未有不交 以 |酬賓 敬其 ,禮義行 由 如此,是以 吕氏 禮 了; 此 臣 臣 ,其情甚親 而 , 上 下 大臨 上下 也。」 盡 君 與尋常 有以 生 臣 之 ·交而 一之禮 情 不 故 和 禮 報 曰 等 雖 無 當 楊 虚 親 日

ービューリー・デル。 使宰夫爲獻主,所以嚴君臣之分。舉鱓以

酬賓,所以通君臣之情也。」

卿舉旅 就位 席 而 豆、牲體、薦、羞,皆有等差,所以明貴賤也。 《釋文》:「差,初宜反。」 后 於下。 獻 小卿次上卿,大夫次小卿,士、庶子以 士;士舉 行酬,而后獻大夫,大夫 獻君,君舉旅行酬,而 ·旅行酬,而后獻 舉 庶子。 后獻 旅 行 卿 俎、 怬 次

也。 卿 尊卑之次言之也。 卿之席不 小卿賓西,東上」,則燕禮亦當然。 不言小卿之席。《大射儀》「卿賓東,東上, 下之小司 上卿,謂三卿也。 (東近君,次於賓,小卿在賓西,又次於上 、庶子以次就位於下者、士初 大夫次小卿者,大夫又在 '徒,司馬下之小司馬也。 ·相屬,而 小卿,大夫之上,若司 曰「小卿 賓席牖間最尊,上卿 次 上卿」者,以 小 《燕 卿與小 卿 之西 徒 在

旅也。 蓋其 獻 西 行一爵,若賓若長,唯公所酬」,此爲 卿於西階上」畢,「二大夫媵爵如初,公又 首」是也。 舉旅也,即前 於公,公取大夫所媵觶 次酬賓,賓奠觶於薦東,下大夫二人舉觶 不言庶子之位,此言「士、庶子以次就位」, 獻士,士舉旅 小卿亦大夫,此「獻大夫」中兼有小卿也。 大夫於西階上」,辯,工人,升歌三終,「獻 人獻士於西階上」,辯,又獻旅食,「賓媵觚 上」,此爲大夫舉旅也。 工,公又取奠觶,唯公所賜, 方 君,君舉旅行酬者,《燕禮》獻賓後獻 、初入及既獻後之位,皆在士之南與。 東 獻大夫,大夫舉旅行酬者,「主人獻 面 , 既 獻卿, 献, 云「舉 行 幗 卿舉旅行酬者,主人「獻 立于 者,脱屨升坐之後,「主 旅於賓,賓降再 東 以酬賓,此君 不言「獻小卿」者, 方 西 以旅 画。 於 燕 西 卿 爲 舉 賓 稽

日

「貴貴之義不行、亂之所由

生

也

燕

隆殺,此皆所以明貴賤也。

吕氏大臨

是其等差也。

席有尊卑,獻有先後,饌有

薦、羞而無俎,士以下又無羞,唯薦而已,

也。公與賓薦、俎、庶羞備有,卿大夫有

夫」,辯,乃「羞庶羞」,是庶羞不及士以下

下皆無俎,以牲小故也。

又《燕禮》「獻大

席坐行之」,「大夫終受者興,以酬 於公,公取賓所媵觶,興,唯公所 旅於西階上」,此爲士舉旅也。 「主人獻庶子於西階上」也。❶ 獻庶子者, 賜,乃就 士 此節言 一、士以

禮於君

臣

貴賤之義,極其密察至於此者,

所

낈 防 亂

也。」

禮記卷六十終

0 西」、《儀禮注疏》作「阼」。

五三五

《燕禮》公與賓以下,皆惟一籩一豆,又《燕

禮》記唯公與賓有俎,燕牲用狗,故自卿以

俎實。

薦,謂豆及籩。羞,謂庶羞

也。

按

也。不爲庶子舉酬者,庶子卑也

牲體即

皆謂

庶子官所掌之庶子,非謂庶子之官

「士、庶子以次就位於下」,及言「獻庶子」,

一五三六

禮記卷六十一

國史館纂脩孫希旦集解賜進士及第翰林院編脩

聘義第四十八《别録》屬《吉事》。

徧省」,是也。 者、《大行人》『一歲徧存,三歲徧規,五 吕氏大臨 行人》「時聘以結諸侯之好,殷覜以除邦國 者,釋《聘禮》之義也。」 之慝」,是也。 也。《儀禮》所載,鄰國交聘之禮。《聘義》 人》『凡諸侯之邦交,歲相問,殷相聘』,是 聘禮》之義也。古者諸侯同在方嶽之 曰:「聘禮,有天子所以 有鄰國交脩其好者,《大行 有諸侯所以事天子者、大 愚謂: 此釋《儀 撫 諸 一歲 侯

> 焉。 内, 之禮亦有差降。 國,其出聘之卿、介有多少,主國所以待之 等,亦皆據侯伯之禮言之。 故此篇言「以圭璋聘」,又言「出入三積」之 「及竟張旜」,是侯伯之卿,大聘之禮也。 而有兄弟昏姻之好者, 大聘使卿,小聘使大夫。 《聘禮》經云「五介」,又云 久無 而三等之 事 則 相 聘

質,敬之至也。《釋文》:「傳,丈專反。」明貴賤也。介紹而傳命,君子於其所尊弗敢聘禮:上公七介,侯伯五介,子男三介,所以

侯、伯、子、男以次差之可知也。」 愚謂:公親行則九介,其卿降二等,則五介。●二等。』質,謂正自相當。」 孔氏曰:「上行人職》曰:『凡諸侯之卿,其禮各下其君鄭氏曰:「此皆使卿出聘之介數也。《大鄭氏曰:「此皆使卿出聘之介數也。《大

❶ 「則五」、《禮記注疏》作「故七」。

紹,繼也。 而 首言「聘禮」,亦總 陳 之命以告於擯,擯以告於主君、司 君迎於大門外,各陳擯、介: 而 之「交擯」,謂擯、介傳辭相交也。 命,以請於介,介以告於朝君,介又傳朝君 於主 傳辭,然亦繼賓 上 則主君迎於大門内,上擯出請事,而賓 則已慤」,是也。 爲敬矣。 命之時,不用衆介, 列 擯 立,而後 傳 命以 國 擯 相 介而 也。 對 質,謂質慤 故介紹 傳 介紹 傳聘君 下 《禮器》曰「七介以相見,不然 不交辭 命、《司 ·, 明 而 而 而 所 傳命,謂陳 之命也。 目 傳 則過於質慤,而 也 陳列,故曰「介紹 也。 '儀》謂之「旅擯 以 下文之事 命,乃聘賓所以 賓必 禮以文爲敬 旅擯之禮,介雖 有 兩 ·列衆· 擯傳主君 君 介之義也 也。 相 若聘賓 介,相繼 非 「介紹 **?儀》謂** 若 朝 致 所 而 謂 之 敬 以 傳 傳 不 但 與 主

> 至階,三讓 三讓 而 后 傳命,三 而 后升 ,, 所 讓 而 以致尊 后 人 廟門,三 也 揖 而

> > 后

傳命 辭。」 使者 鄭氏 主人 乃傳其君之聘命也。三讓而后入廟門,讓 陳擯,以大客禮當己,則三讓之,不得命, 不敢 三讓 西 賓入門左而揖,參分庭 行至參分庭一在北 三讓之文,不備也。」 辭 方之中庭,公乃與 當 ,賓至門,主人請 廟受也。 曰:「此揖、讓,主謂 而 也 而 大客則 曰 而 后 孔氏曰:「《聘禮》入廟門之時, 讓 傳命者,賓見主君使上 事 讓 之,三讓不得命,乃傳其君之 濱,小 《小行人》曰: 曰 辭 讓 而 事 之 客 揖,是三揖也。 讓 事 敖氏 一在 亦 異 偕行。」 則受其 時 賓 通 曰 也。 也。 南 繼公曰:「 辭。 凡 而揖 爾 賓見[、] 三讓 幣, 卿 四 此 愚 按《聘 請 聽 方 又偕 主人 宜 賓至 謂 而 事 於 之 無 其 后 日

擯者 禮 者以 納 陳擯」者不然矣。三讓而 揖 門每曲揖」。若讓廟受,則與公每門每曲 賓從之也。 賓」,於此時 與之偕行。 時,公先立於中庭,賓至西方之中庭,公乃 至階者,賓與主君 不 相與入門,皆主先入以道賓。三讓者,擯 加 揖,後一揖,公乃與賓偕行 「入及廟門,公揖 賓。」是始 承 必讓矣,故知讓非讓廟受也。 時當讓。 出請事 先人讓賓,賓三讓,然後擯者先 擯、紹擯未嘗出 卿爲上擯,大夫爲承擯,士爲紹 若至 按《聘禮》賓人門,「公揖人,每 ,公皮弁,迎賓于大門内 前二揖,公立於其位 而賓與擯者三讓也。 丽 請 事,繼而納賓者惟 廟門,則蚤知其當廟 入,立於中 相 也。 與揖也。 然則謂 后 而揖也。 入廟 庭, 賓 人 三揖 凡賓 門者,謂 讓 擯 而 入,而 上擯 !;大夫 廟 者 與賓 ,而后 主 擯 讓 門 主 納 君

> 也。 此 皆主人先升而賓從,賓與主君將升,主君 以先升讓賓,賓三讓 而 聘禮》皆無此文,不備也。 后 揖讓之禮,皆聘賓所 「三讓而后傳命,三讓 升者,賓與主 君讓升也 而後主君先 以 致尊讓 而 后 凡升階,亦 入廟門」, 升也。 於主 凡 國

敬也。《釋文》:「竟,音境。勞,力報反。况,本亦作之内而廟受,北面拜貺,拜君命之辱,所以致君使土迎于竟,大夫郊勞,君親拜迎于大門

『貺」。 」

朝服? 也。 客于竟。 孔氏曰:「 事,遂以 賓至于近郊,君使下大夫請行,君又使卿 聘禮》『賓入門左,公再拜』,是君拜迎于 君親拜迎于大門之内 用東帛勞』。 人』,是也。 《聘禮》賓『及竟,張旜 君使士迎于竟,謂主 此大夫郊勞者,即 大夫郊勞者、《聘禮》 圃 廟受者, ,君使 君使士 士 迎 按 卿

謂:上言「敬之至」,賓之敬也。此言「 主君所以北 禮》『公當楣再拜』,是也。 再拜,拜聘君之貺。貺,謂惠賜也。《聘 廟受也。 納賓,賓入門左』,『賓升西楹西,東面』,是 大門之内。《聘禮》又云『及廟門,公揖入, 之至」,主君之敬也。 也。所以致敬者,所以致敬於聘君。」 北面拜貺者,君於阼階之上北 面拜貺,拜聘君之命來屈 拜君命之辱,言 愚 辱 面 敬

以敬讓,則不相侵陵。敬讓也者,君子之所以相接也。故諸侯相接

合結上文三節之意。

反、《字林》音悔。食、音嗣。」
大歷反。雍、字又作「饔」。餼、許既反。還音旋。賄,呼罪食、燕,所以明賓客君臣之義也。《釋文》:「覿,食、燕,所以明賓客君臣之義也。《釋文》:「覿,寶、寶私面私覿,致饔餼,還圭、璋,賄贈,饗、卿爲上擯,大夫爲承擯,士爲紹擯。君親禮

鄭氏 而使臣 《大行人》云上公『擯者五人』,侯伯 《聘禮》注云:『主君公也,則擯者五 私 受醴,公拜送醴」,是也。 親執醴以禮賓。 擯者一人。 君親禮賓者,謂行聘已訖,君 士爲紹擯者二人。若擯者三人,則士爲紹 承副上擯也。 見主國之君也。 己禮見主國之卿大夫也。 夫徹几改筵,公出迎賓以入,公側受醴,**賓** 人』,子男『三人』,謂迎朝賓也。 人。』其待聘客及朝賓,其擯數皆然。 侯伯也,則擯者四人。子男也 人,則士爲紹擯者三人。 若擯者四人,則 曰:「設大禮,則賓客之也。 按《聘禮》私 ,則爲君臣 紹,繼也,謂繼續承擯。 以其非公聘正禮,故謂之 故《聘禮》賓行聘訖,『宰 面在後,此先云『私 也。 孔氏曰:「承擯, 賓私 私觀,私以 ,則擯者三 面,謂私 若擯者五 或不親 己禮 四四 按 故 以

覿也。 殺 禮》「君使卿 乘馬八匹私面」,於君而稱面者,因行 國客,私面私獻」,注云:『私 者,記者便文,無義例也。 贈者,還玉既畢,以賄贈之,《聘禮》云『還 禮》云『君使卿皮弁,還玉于館』,是也。 時,君使卿就賓館還其所聘之圭、璋、、聘 饔餼者,謂主君使卿致饔餼於賓館,《聘 而 又以私面爲私觀者,以《司儀》之文但 臣謂之面。 食、燕者,謂主君設大禮以饗賓,設食禮以 圭、璋』畢,『大夫賄用束紡』,是也。 私 面 見鄭伯 日 面私獻」,不云『私觀』,故以私面 亦見也。 饔,生日 《左傳》昭六年,楚公子棄疾『以 ,非正禮,故雖 章弁,歸饔餼五牢」,是也。 而《司儀》云「諸公之臣,相爲 其謂之面,威儀質也。」此於 餼。 還圭、璋者,謂賓將 君 《聘禮》注 亦 面、私覿 稱 面 也。 云 過 爲 也 饗、 牲 鄭 其 賄 致 去 私 云

也。 也。 禮於客,客是臣,故使臣敵之,是君臣之義 其於上公則五人,於侯伯則四人,於子男 皆有爲之先之辭。《周官》言天子之擯者, 出接賓曰擯。」 同,則爲上相」,相即擯也。 有三者,以多爲文也。《大宗伯》『朝覲、會 使接賓者也。 餼,還圭、賄贈之屬,皆主君不親,使臣致 主君或不親饗、食,使人致饗、致食及致饔 賓於館,主君親待之,是賓客其使人也。 明賓客、君臣之義也。饗、食之屬,使人延 賓答主人,或君親接賓,或使臣致之,是顯 覿,及致饔餼、饗、食之屬,或主人致敬,或 俶獻無常數」,是也。 食賓,皆在朝也。 《聘禮》云『公於賓壹食再饗, 吕氏大臨曰:「擯者,主國之君所 主之有擯,猶賓之有介。 敖氏繼公曰:「承、紹者 又設 君親禮賓,賓用 談燕以 人詔禮曰 燕之,燕 燕與 在 相, 擯 私 羞 寢

二人,上擯、承擯各一

《大行人》上公九介,而王之「擯者五人」, 各一人也。子男之卿三介,則主國之擯者 者雖有三人,惟上擯專相禮事,乃必立承、 聘者之尊卑而異,所以别於天子也。此擯 伯之國使卿大聘之禮,故曰「卿爲上擯,大 介,則主國之擯者三人,上擯、承擯、紹擯 侯之禮如此,則諸侯於朝、聘之賓可 自降於賓之意,亦所以爲謙讓也。 王待諸 侯伯七介,而「擯者四人」,子男五介, 紹者,所以别於諸臣之禮也。」 是諸侯之擯者三人而已,不以己爵及朝、 則三人,皆以朝者之爵爲差也。 上公之卿七介,則主國之擯者五人,上擯 一人,承擯、紹擯各二人也。侯伯之卿五 「上擯」『承擯』『紹擯』,而不言其人數,則 擯者三人」,則擯用介數之半,蓋以示其 人而已。聘禮乃侯 此但言 愚謂: 知 而 與四方之賓燕,則公迎之于大門內,揖 食大夫》之禮是也。 所以答其私覿 使卿贈如覿幣」,是也。 賄所以答其聘,贈 之、《聘禮》「賄用束紡」,是也。 用璧當四寸也。賄,謂於還玉之時而賄 舍於郊而贈之、《聘禮》「遂行,舍于郊,公 問諸侯,繅八寸,則圭亦八寸,降於其命圭 侯,朱緑繅八寸。」此謂上公之禮也。 上公 云"「所以朝天子,圭與繅皆九寸,問諸 芻之屬,獨言「饔餼」者,以牢禮爲重也。 也。 夫爲承擯,士爲紹擯」,擯者三人也。 於君 圭、璋、璧、琮以覜聘」,是也。 圭所以聘君,璋所以聘夫人,《典瑞》「瑑 言「覿」者,尊辭也。 一寸。以此推之,侯伯聘圭當六寸,子男 致饔餼兼有醯、醢、簋、簋、米、禾、薪 也。 《饗禮》今亡,食則《公 燕則《燕禮》記云「若 於臣言「面」者,質辭 贈,謂賓出 《聘禮》記

明君臣之義也。
明君臣之義也。君之所致於賓,及賓所致於主國之君者,皆所以以明賓客之義也。君之所致於賓,而差降以明賓客之義也。君之所致於賓,而差降讓、升,賓爲荷敬」,是也。凡此諸禮,君之讓、升,賓爲荷敬」,

更反。」 禮。 相陵。 侯自爲正之具也。《釋文》:「比,必履反。 厲之也。 故天子制諸侯,比年小聘,三年大聘,相 使者聘而誤,主君弗親饗食也,所 此天子之所以養諸侯,兵不用,而諸 諸 侯 \相厲 以禮,則 外 不相 侵,内 使,色 以 厲 愧 不 以

鄭氏 之邦交,歲 聘,三年使卿 三年大聘,所謂『殷相聘』也。」 「天子立制 問。」故知此『比年小聘』是歲相問也。 曰:「比 相 ,使諸侯 大大聘。 年小聘,所謂『歲 間 也。』《聘禮》記 《大行人》云: 相於,比年使大 日 相問」也。 孔 氏 『小聘 『諸侯 大夫小 日

作。 敬以 先王 《大行人》又云:『殷 先王制禮,以善養人於無事之時,使之不 親饗食,以 之中,故比年小聘,三年大聘也。使之相 夫,此兵所以不用,天下之所 安於媮惰而安於行禮,不耻於相下而 所謂「大夫來使,無罪饗之,過則餼之」也 曰:「使者聘而誤,主君不親饗食、《聘禮 諸侯相聘,是周公制禮之正 年一大聘,五年一朝。』與此不同者 制》云:「諸侯之於天子,比年一小聘, 謂三年之時,中 云,謂文、襄之法,故不同也。」 天子以是養諸侯,諸侯以 全交,必相厲以禮,故使者誤,主君不 御諸侯,使之相交以脩好,必求疏數 ,則忿争之心,暴慢之氣,無 愧厲之,然後仁達而 間 無 相 事 ·, 故 聘也。」殷,中 法、《王制 稱 以 殷 是養 平 吕氏大臨 禮行也。 也。 也。 所 ·; 此 主 自 耻 》所 念 王 禮 經

諸侯之意爲深,故其義皆曰『兵不用而諸多,養人之至者也。故二禮之義,天子養之節文之多,惟聘、射之禮爲然。節文之

民作讓矣。財而重禮之義也。諸侯相厲以輕財重禮,則以圭、璋聘,重禮也。已聘而還圭、璋,此輕

侯自爲正之具也』。」

是也。」 耳。 也。 鄭氏曰:「圭,瑞也。 質,惟玉而已,璧、琮則重其華美,加於束 聘禮之後,享君用璧,享夫人用琮。 圭、璋 致此圭、璋付與聘使而還其聘君也。 可以己之有遥復之也。財,謂璧、琮、享幣 宜作「尊璋圭之類也」,而今注疏皆作「圭、璋」,誤倒之 疏云:「尊敬此璋,同於圭,則璋是圭之等類。」玩孔意, 用之還之、皆爲重禮。 受之爲輕財者,財可遥復,重賄反幣 孔氏曰:「既聘之後,賓將歸時 尊璋、圭之類 禮必親之,不 也。 凡行 按

帛。 者, 瑑圭亦瑑刻象瑞圭, 故曰「圭, 瑞也」。 也。 聘賓將歸,還其圭、璋,而璧、琮則留之,此 受之不歸也。」 愚謂: 圭、璋無藉,但以 後,享天子用圭,享后用璋,則雖圭、璋亦 者難可報復,故用本物還之。輕者易可 還之,留其璧、琮之財,輕其財故留之。 皆輕財重禮之義。 用圭、璋以聘,而璧、琮但用 行人》『合六幣,圭以馬,璋以皮』。 主、璋與璧、琮皆爲享也。皆爲財,故《小 償,故更以他物贈之。 此據侯伯之禮,故云「以圭、璋聘」。 若子 行禮。璧、琮加於束帛,用爲貨財。 圭、璋爲聘,璧、琮爲享,若諸侯之朝天子, 也。《聘禮》『圭』『璋』與『璧』『琮』相對,故 此「圭、璋」乃瑑圭,鄭氏乃以圭爲瑞 聘使既了,還其圭、璋之玉 上但言「重禮」者,文省 此輕財重禮之義 以享,主君於 ,重其禮故 二王之 聘君 重

五四三

用號、璜矣。男則聘君用璧,聘夫人當用琮,而其享當

主國 文》:「積,子賜反。 財者不能均如此,然而用 響,燕與時賜 於内,米三十車,禾三十車,芻、薪倍禾,皆陳 而外不相侵,故天子制之而諸侯務焉爾。 盡之於禮也。 於外,乘禽日五雙,群介皆有餼牢,壹食,再 食,一本又作「壹食」,音嗣。」 待客,出入三積,餼客於舍,五牢之具 無數,所以厚 芻,初俱反。 盡之於禮,則内君臣 倍,步罪反。 財 重禮也。 如 此其厚者,言 乘,繩證 不相 古之用 陵, 《釋 反。 陳

之積 積。故《司儀》云:『遂行如人之積。』是 孔氏曰:「出入三積者,謂入三積,出 以下之臣,則不致 之臣,不致積也。」《聘禮》是侯伯之臣,故 公之臣相爲國客,則三積」,注云:『侯伯 如如 來 、時也。 此謂上公之臣。 積 也。 故《司 '儀》云『諸 若侯伯 亦 去

爵士也 五牢。 供賓道路之需者。 常數也。」 設食,再爲之設饗,其 饗,燕與時賜無數,此 鄭注《掌客》云:『爵卿也,則飧二牢,饔餼 聘卿則每日致五雙也。 從禾。」乘禽,乘行群匹之禽,雁、鶩之屬 也。 三致之也。 西,西陳。 車,設于門東,東陳。 西,是皆陳於内也。 直云『餼客』者,略言之。於舍,謂於賓 文無『致積』也。 一牢,在賓館東階,餼二牢,在賓館門内之 五牢之具,謂飪一牢,在賓館西階 爵大夫也,則飧大牢,饔餼三牢。 ,則飧少牢,饔餼大牢也。』**壹食,再** 芻薪倍禾。」鄭注:『薪從米,芻 愚謂: 此《記》皆據《聘禮》釋之,而 《聘禮》致客有饔有餼 積,謂芻、米之屬 出入三積,謂入與出 按《聘禮》:『米三十 歡 謂 禾三十車,設于門 群介皆有餼牢者, 聘卿 燕與當時之賜無 也。 所 爲之 渥 议 館

與此 卿也。 禮,其儀亦如之。」則五等之臣爲客皆有積 等諸侯相朝,「惟上介有禽獻」,其次介以 餼客,致饔餼於客也。 臣三積,侯伯之臣二積,子男之臣一積也。 積」,侯伯「四積」,子男「三積」,則諸公之 可知矣。又《周禮・大行人》上公「出 雙」,侯伯「日七十雙」,子男「日五十雙」, 故君之乘禽多。 下,蓋朝君以其乘禽分賜之,主國不特致 故《聘禮》記云「宰夫始歸乘禽,日如其饔 也 餼之數,士中日則二雙」,故聘賓之乘禽 聘禮》乃無「致積」,蓋有闕文也。 侯伯、子男之臣,以其國之爵相爲客而相 諸公之臣相爲國客,則 「乘禽五雙」之數相懸者,蓋《掌客》五 群 按《周禮·掌客》上公「乘禽日九十 介皆有餼牢者、、聘禮》「上介饔餼 此《聘禮》群介各有禽獻 乘禽日五雙,謂聘 三積」。 又云: 《司儀》 入五 莎

> 謂 能皆然,是用財不能均也。 者豐厚也。 獻」是也。 三牢,士介四人皆餼大牢」, 外侵陵之患何自而起乎? 闕,則財有所不容惜。 財之厚者,盡用之以行禮也。禮有所 財,則必不欲犯非禮以取人之所有,而内 四 時新物以時賜之,即《聘禮》所謂 厚重禮,言聘禮重,故所以待賓 聘禮之用財如此其厚 務行禮而不惜己之 然聘禮所以用 是 也。 他 時 不可 事 仮 ネ

謂之有行。 以 不敢解惰,以成禮節,以正 乾人飢而 中而后禮成,非强有力者弗能行也。 聘、射之禮,至大禮 力者將以行禮也,酒清人渴 故所貴於勇敢者,貴其能以 和長幼。 不敢食也,日莫人倦,齊莊、正 此衆人之所難,而君子行之,故 有行之謂 也,質明而 有義,有義之謂勇敢。 君臣,以 立義也。 而不敢飲也,肉 始行 事, 親父子, 故强 所貴於 齊而 日幾 有

注: 也。 也。 解,音懈。長,丁丈反。有行,下孟反。治,直吏反。」〇鄭 文》:「乾,音干。 誅者亂人也。 用之於争鬭 此之謂盛德。 無敵,用之於禮義則順治。 義,天下有事則用之於戰勝。 立 禮 義 「禮成,或曰「行成」。 故勇敢强有力者,天下無事 勇敢、强有力而不用之於禮義、戰勝,而 也 者 故 其 所貴於勇敢者,貴其 莫,音暮。齊莊,側皆反。 則謂之亂 有 故聖王之貴勇敢、强有力如 如 行 此 也 勝,或爲「陳」。」 則民順 人。 所 貴 外無敵 治而國安也。 刑罰行 於 用之於戰勝 有 則用之於 行 敢 正齊,如字。 ,内順 於國 者 行 禮 貴 , 所 《釋 治 此 則 禮 義 其

燕禮 孔氏 不 長 而 幼幼 得 不敢 醉 ,謂大夫、士之射,先行鄉 所 日 食,謂 飽 以 「酒清人渴 也 明 射禮之先,唯以禮獻 君臣之義。 以正 君臣 而 不敢飲, 了謂諸! 以 親 侯之射先 次飲酒 父子,以和 肉乾 栖 记之禮, 人 , 而 飢 行

> 謂 : 也。 解惰 此所以内順治,外無敵而國安也。」 之氣,一用之於禮義、戰勝,則教化行矣。 則德行立矣。其養人也,養其强力、勇敢 其强力、勇敢之氣,一用之於禮義、戰勝, 幾中而 禮,禮節之至繁者 有力者不能行聘禮,非勇敢者不能行射 有 齒於父族之事 此因 者,射禮也。 禮成者,聘禮也。 吕氏大臨 [聘禮 而 ·, 所 曰:「君子之自養 倂 射禮尤繁於聘,故 也。 明 낈 射 明 質明而 日莫人倦 禮 長幼之序。」 始行 蓋聘、射之 而 也 事, 非 不 禮 强 敢 日 愚

隊,禮. 何也? 縝 夫昔者君子比德於玉焉: 温潤而澤,仁也。 子貢問於孔子曰:「敢問君子貴玉而賤 非爲磖之多故賤之也,玉之寡故貴之也。 密以栗,知 也。 爲玉之寡 叩之其聲清越以長,其終詘然,樂 也。 廉 丽 面 **碣之多與?」孔子曰:** 不 劌 義 也 垂之如 **曜**者

也。 信也 也。 僞反。與,音餘。 縝,音軫,一音真。 知,音智。 劌,音 九衛 子貴之也。」《釋文》:「磻,武巾反,字亦作「瑉」。爲,于 也。」《詩》云:『言念君子,温其如玉。』故 ○孚尹,吕氏讀如字。○鄭注:「琘,或作『玟』。潤,或爲 注音浮。尹,依注音筍,又作「筠」,于貧反。見,賢遍反。」 反,又音己芮反。隊,直位反,又音遂。 '濡」。孚,或爲「姇」,或爲「扶」。」 珪、璋特達,德也。天下莫不貴者, 瑕不揜瑜,瑜不揜瑕,忠 氣 如白 虹、天也。 精神見于山 也。 詘,其勿反。孚,依 孚尹旁達 Ш 君 道 地

也。 者,不苟傷人也。 鄭氏曰:「碈石似玉。玉色柔,温潤似仁 掩 病 止 作則有聲,止 也。 似 縝,緻 忠也。 《樂記》曰:『止如稟木。』瑕,玉之 瑜,其中間美者。 也。 一則無· 孚讀爲浮。 栗,堅 如隊,禮尚謙 也。 貌。 越猶揚 尹,讀如竹 玉之性善惡不 劌, 草也。 也。 傷 也 盐 箭之 ",絶 樂, 柏 義

> 《聘義》之末。 精氣 隱翳 筠。 密而 以 温 苗、鄉愿之於德也。 似是而非,君子賤之,如紫之於朱,莠之於 所以比德而貴之也。碈,石之似玉者也, 其德之美,有似乎君子,故君子服之用之, 貴玉者,以其似君子也。」 吕氏大臨曰: 不達,不有須而成也。 諸外也。 因聘禮用玉,故以『子貢問玉』一章附於 朝、聘也。 潤而澤,如君子之仁,温厚深湻之氣形 也。 不疏則中理,堅而不解則可久也。 ,0似信也。 浮筠,謂玉 山川,地所以通氣也。 玉理密緻而堅實,如君子之知, 璧、琮則有幣,唯有德者無所 玉者,山川至精之所融結, 采色也。 虹,天氣 玉氣粹精之所發,則 道者,人無不由之。 也。 采色旁達 精神,亦謂 特達,謂 一、不相 金

❶ 「相」,北大本、《禮記注疏》作「有」。

威 謙 也。 皦 韻 不 之忠 之明 之也』者 所以與金石異也。 終殺者金也,始終若一者玉也。 重,垂之則如隊而欲下,如君子之好禮 也。 殺之漸,則君子於樂,其終詘然如玉之聲 難若 有 也 利 蘊 如以成歌者,止如稟木,其合止皆無衰 短者石也,清越 恭下人爲事,故曰『禮也』。 凡聲滯濁),信也 無隱情,善惡盡露而 洞炤乎内外,瑕 也,用之則不能 廉 玉之瑜者,其美也,瑕者,其 孚尹 於内而 不可犯,卒歸於愛人而已。 ,終條理也。 利 未 也,用之則 尹 詳。 達於外,猶君子之信 或 訓 而韻長者玉 或 其終詘然,所謂『玉 傷。 誠 瑜 日 樂之始作翕如 不能相 傷。 亦信 信 無所蓋,故曰『忠 如君子之義 玉之有廉 也。」玉 發於中 也。 揜,如君 病 此玉之聲 玉之體 始洪 由 也。 至於 之 謂 中出 其 明 Ž 振 子 以 玉 而 而 雖

下,道 石中, 箭之筠,謂玉采色也。 也。 玉 莫非物也,玉之爲物,天下貴之。 璋,特達而 璧、琮,其用 充實而 川也。 改,義亦無據 之,皆德 仁、爲知、爲義、爲 不貴者,道也。」」 也,君子之道,天下尊之。故曰: 『天下莫 氣能達於天,所謂『氣 比德焉」。 先儒 以言其德之見用於人,故曰「君子於 則 有光輝 也。 如君子之達於天,則與 光 以孚爲「浮」, 已,如 輝 也 天 ,恐未然也。 必 必 地 則與地同 見,所謂 君子之德無 有幣以 禮 以 愚謂: 言其德之著 樂、爲忠信,合 如 其文其音,既 以 將之。 白 尹 德也。 分而言之,則 「精 玉之瑩者 爲 虹也。 待 筠」, 神 乎外 天同德, 玉爲圭、 見 莫非 見 玉之爲 於 其 悉有 於 吅 韜 如 也 山 上 爲 道 諸 光

喪服四制第四十九《别録》屬《喪禮》。

夫禮

,

吉凶異道,

不得相干,

取之陰陽

也。

生也。 情,故謂之禮。訾之者,是不知禮之所由 凡禮之大體,體天地,法四時,則陰陽,順 《儀禮·喪服》之篇,故不言『喪服之義』。」 服 鄭氏曰:「名曰《喪服 每篇言『義』。 之制、取於仁、義、禮、知 「以上諸篇,皆記《儀禮》當篇之義,故 此别記 四制》者,以 喪服之四制,非記 也。」 其記 孔 氏 喪 人

體。 法則 鄭氏 所同 地者,言本天地以爲體,猶「體物不遺」之 禮儀三百,威儀三千,莫非天理之所 .曰:「禮之言體也,故謂之禮,言本有 也。 圃 此言凡禮 生也。 下文乃專以喪禮言之。 口毁曰訾。」 由是四者而生,蓋 愚謂: 五禮之 體 天

能 有定,禮制有恒,以節 門内主恩,若於門外,則變 情,謂其 鄭氏曰:「取之四時,謂其數 備禮,則變而 制也。」 行權。 孔 爲限。 氏 是皆變而從宜,取 **□** 而行義。 或有事故,不 也。 喪有 取 四制。 尊卑

也。 時,或生或成,因乎物之宜者也。 通謂之權。服之出於恩者,由性之仁爲之 服之者謂之理,立其制限謂之節,酌其 制,或隆或殺,隨乎事之宜者也。 量事度宜,非知不可也。」 知,人之所以爲人者,其道不外乎此矣。 所宜,故於服能酌其權宜也。仁、義、禮、 權宜者,由性之知爲之也。 理之節文,故於服能制其節限也。服之有 之有節限者,由性之禮爲之也。 而服之者謂之恩,本非親屬因義理之宜 情也。 服之本於理者,由性之義爲之也。 恩屬於仁, 理屬於義,節屬於禮 愚謂:天有 知能知事理之 禮者,天 喪之 有親 服 變 屬 四 四 而

喪之正服,皆以恩制,而恩莫重於父,故特者也。《釋文》:「爲,于僞反。衰,七雷反。」●其恩厚者其服重,故爲父斬衰三年,以恩制

「治,直吏反。揜,于檢反。斷,丁亂反。」故爲君亦斬衰三年,以義制者也。《釋文》:父以事君而敬同,貴貴尊尊,義之大者也。門內之治恩揜義,門外之治義斷恩。資於事門內之治恩揜義,門外之治義斷恩。資於事

義」。 尊親,其義一也。」 君。敬、愛生乎心,與生俱生者。 鄭氏曰:「貴貴,謂爲大夫君也。 奪之也。 於三年。 義率祖,而殺極於三月,自仁率親 以君爲重,爲君斬衰,尊尊之至也。 以親爲重,爲父斬衰,親親之至也。 下之愛,莫愛於父。 爲天子、諸侯也。」 蓋恩莫隆於父,而凡爲義者莫得 門外之服,以恩制者不過旁親之 是恩重而義輕也,故 極天下之敬,莫敬於 愚謂:門内之服, 吕氏大臨曰:「極天 曰「思 尊尊,謂 前 故門 内 門外 加 揜 外 隆 内 丽 自

以父言之。

君言之。

君言之。

君言之。

君言之。

君言之。

君言之。

君言之。

是言之。在物爲理,處物爲義,體用之名也。
是之義服,皆以義制,義莫重於君,此以義對原之。上以理對恩言,此以義對原治。 蓋義莫重於一期、功,以義制者,極於至尊之三年。是義期、功,以義制者,極於至尊之三年。是義用、功,以義制者,極於至尊之三年。是義

也。《釋文》:「期,音基。」不培,祥之日鼓素琴,告民有終也,以節制者以死傷生也。喪不過三年,苴衰不補,墳墓三日而食,三月而沐,期而練,毀不滅性,不三日而食,三月而沐,期而練,毀不滅性,不

之所服而已,喪畢則將除之,故雖敝而不苴衰,謂斬衰之喪用苴麻爲衰也。衰特喪地。鼓素琴,始存樂也。」 愚謂:三月而鄭氏曰:「食,食粥也。沐,謂將虞祭時鄭氏曰:「食,食粥也。沐,謂將虞祭時

也。 故雖 補。 以節其時之過 琴之聲出於器,歌之聲出於口,内外之别 之日,得鼓素琴,而子路譏「朝祥暮歌」者, 生者,所以節其哀之過。 三年爲限,示民有終盡之期也。不以 終、盡也。 庫而不培。 墳特葬之所 孝子有終身之憂,而喪以 素琴,琴之無飾 対而 已,既 告民有終者,所 葬 則 者也。 無 所 死 傷

士杖。 自執 資於事父以事母而愛同,天無二日,土無二 者不袒,跛者不踊,老病不止酒肉。 爵也。三日授子杖,五日授大夫杖,七日授 王,國無二君,家無二尊,以一治之也。 行者,扶而起。言而 不杖,不能病也。百官備,百物具,不言而 在爲母齊衰期者,見無二尊也。 事而 或曰「擔主」,或曰「輔病」。 后行者, 面垢而 后事行者,杖而起。 른 秃者不髽, 傴 杖者何也? 。婦人童 凡此八 故父 事

者 見,賢遍反。 或作「杖」。」○鄭注: 以以 權 制 擔,是 監反。 者 也。 「髽,或爲「免」。」 《釋文》: 扶而起,一本作「扶而后起」。 「爲,于 ·偽反。 齊, 音 咨。 扶

厚則 鄭氏 也。 以一 者。 謂 故 之適子爲父母是也。 擔主也。 杖 日 扶之也。 在子爲母 喪主者,假杖以表之,故雖無爵 難非 女子 也。 授士杖,若諸侯,則大夫、士皆以五 恩深 治之者,欲使其尊歸於一,以統治之 曰:「擔,假 杖本爲爵者設,蓋 童子未能惇行孝弟,故於喪未能 之未 主 喪服》傳曰: 天子七日而 屈而 非主而杖者何 ,恩深者其居喪必病,故須杖 而杖,衆子爲父母 笄者。 期 也。」 了,心喪猶三年。」 童子,謂 體 殯,殯而 有 無 賈氏公彦 ? 病 爵者德必厚, 者 爵 輔 是 須 男子 而杖 病 成服,故 也。 杖以 而杖,庶人 也。」蓋 日 之未 者 愚 (輔之, 婦 日 酒 何 交 病 冠 以 德 而 七 爲 ?

也。 言而 其 病 能 同 髮 有塵垢之容而已,其病又益淺也。 使,身自執事而後行,雖有杖 也 杖而起,或面 皆杖,以其 而授,此權乎恩之淺深而制之也。爲父母 分之尊卑而制之也。 傴,背曲也。 人皆杖,以 病 也 也。 也,而父在則母之服屈而爲期,此權 也。 不杖,此 ,而或三日而授,或五日 面 后 而 扶 垢而已者 事 而 髽, 事行,故但須杖扶而起,其病稍 杖而 起, 行 其 無 露 ,故待人 權 15 垢而 無不能病也 謂天子、諸 跛,足廢也。 不 紒 起,謂大夫、士也。 乎年之長幼而制之也。 病 謂 也。 已,此權乎位之尊卑而 也。 扶 庶人也。 爲君皆杖,有爵之所 男 子 而 而 侯 ,而或扶 婦人、童子以不 后 也。 人之愛其父母 免而 起 而授,或七日 而不用,但 庶 謂 天子、諸 派 人 無 婦 大夫、士 而起,或 可 人髽。 秃,無 成 平 渗 面 可 極 侯

踊,而 也。 窮也。 也。 袒 制之也。 也。 權制者也。 乎其不可以卻酒肉 無 所不 實。 得申,則無等差。 不可繼,此不可不以節制者也。 去,此以義制者也。情之至者,遂之則 天之合也,其愛不可解於心,此以恩制者 由二 **灬可髽** 一,權 喪 能行,則人告病。 君臣之道,人之合也,義則從,不義 者而 責之於所不能具 跛者不 乎其不便乎袒而 情至於無窮,則賢者過之,不肖 不飲酒食 愚謂:服之大端,親親尊尊 Mi 喪無 爲之制 制 之也。 〇吕氏大臨曰:「父子之道, ·踊,權 不 髽 限則爲節, 肉,而老病不 施於所不必 而制之也。 一, 而 乎其不能乎踊 喪 ,則力不給。 此不可不以權制者 無不袒 秃者 制之也。 由二者而酌其 不 用, , 而 止酒 此八者,以 慰 遂其 一,權 喪 則事 必 傴 而 而已。 肉,權 無 之於 者 所 制 乎 者 無 無 則 之 不 不 其 不

期,音基。殺,色戒反。」

而輔之以行,恩與義者其經,而節與權者變通則爲權。節與權即寓於恩與義之中,

其緯也

中庸也,王者之所常行也。《釋文》:「解,佳買反。年,賢者不得過,不肖者不得不及。此喪之恩之殺也。聖人因殺以制節,此喪之所以三始死,三日不怠,三月不解,期悲哀,三年憂,

也,期 禮,所謂『品節斯』,斯之謂禮 哭,惟朝夕哭,此期悲哀 盧 哭,哀至則哭,此三年憂 此申言「以節制」之義 日,此三日不怠也。 曰:「始死,哭不絶聲,水漿 ,

寢不説経帶,

此三月不解 合乎中者也。 聖人因 未 也。 也。 葬 也。 ,哭無時,居 也。 不 既練,不朝夕 隆 君子之 入 口 吕氏 殺 既虞、卒 丽 者 大臨 居 制 倚 喪 其

《書》曰「高宗諒闇,三年不言」,善之也。王

者,武丁。 者莫不行此禮 孔安國讀爲「諒陰」。衰,色追反。復,扶又反。文,如字, 注讀爲「梁鶴」,徐又並如字。案:徐後音,是依杜預義。 之,故謂之高宗。 而慈良於喪。當此之時,殷衰而復興,禮 徐音問。」 而 云:「高宗諒闇,三年不言。」此之謂也。 而復起,故善之。 曰「言不文」者,謂臣下也。《釋文》:「諒闇,依 武丁者,殷之賢王也。 何 三年之喪,君不言。《書》 善之故載之《書》中而 以獨善之也? 繼世 曰 : 即位 高宗 然 高 廢

如類 氏曰:「諒,古作『梁』。 者,不言而事行,此天子居喪之禮也。 諒闇、《書》作「諒陰」,朱子以爲天子居喪 所謂柱楣也。」未知孰是。 世禮廢,王者或不能行,高宗復行古禮,而 鸙之鸙。 孔氏曰:「諒,信也。陰,默也。」鄭 闇,謂廬 楣謂之梁。 也。 百官備百物具 廬 有梁者, 闇,讀 後

文,謂去大夫居喪,言而後事行者,故不能文,謂去大夫居喪,言而後事行者,故不能言,但哀痛不爲文飾耳。此《孝經》之言,而記者引之,言臣子喪禮與人君異,又以申言「以權制」之義也。 鄭氏曰:「言不文,謂喪事辨不所當共也。」

以節制之義也。 以節制之義也。 以節制之義也。 言,謂先發口也。」 愚謂:此因上亥言居喪不言,而言五服之謂:此因上亥言居喪不言,而言五服之數氏曰:「此謂與賓客言也。唯而不對,

月而沐,期十三月而練冠,三年而祥。比終父母之喪,衰冠、繩纓、菅屨,三日而食粥,三

又足以勉乎其文,有其始而又足以要乎其

兹三節者,仁者可以觀 毗志反。知,音智,本亦作「智」。弟弟,上音悌,下如字。」 文》:「衰,七雷反。菅,音姦。粥,之六反。期,音基。比 以正之,孝子、弟弟、貞婦皆可得而察焉。《釋 理 三年而 除、輕重之節,賓客弔哭之文,無不中 襲、含、斂、殯之具,虞、祔、練、祥之儀,變 痛,傷腎乾肝,非仁者之篤於愛則不能也。 哀禮之交盡也。 解,期悲哀,三年憂,比於三節之終,而 除之大節也。 其重者也。 三節者,謂三月而沐,期而 爲母則布纓、疏屢,獨言繩纓、菅屨者,舉 繩纓,斬衰冠之纓。菅屨,斬衰之屨也。 焉,强者可以 ,非知者之明於理則 祥。 蓋喪以既葬、既練、既祥爲 比終茲三節者,謂三月不 觀其志焉。 能終茲三節者,惻 其愛焉,知者可 不能也。 禮以治之,義 篤於情 怛 以 練 乎 變 而 疾 能 觀

其

乎事宜. 是矣。 弟。 子務本,本立而道生。」蓋人道 莫隆於父母。故父母之喪,雖 仁、義、禮、知莫不備於是焉。 父母之喪以結之。蓋喪服以恩爲主,而 無不貞。故曰:「孝子、弟弟、貞婦皆 本事親之孝,而推之以事兄,則爲弟 爲本而治以禮,以爲之節文,正以義,以 終,非强者之志氣堅毅則不能也。 而察焉。」上言五服之哀不同,此又歸 本事親之孝,而移之以事夫,則 ,居喪而 能如此,則其孝可知矣。 故 以 恩制 莫重於 曰:「君 以三者 爲婦 可 無 重 一, 而 恩 得 於

禮記卷六十一 終

Б. 五六

尚 書顧命解

瑞 安孫希旦 譔

希旦少 因亭林 此 爲得之者,而二家已先言之焉。 氏、吴氏於「受同」之説,則希 之説,則見其與注 乃若頗有以得其義。 文,尚沿舊義,爰以鄙見竊爲疏解,以 篇 注疏 顧 嘗讀 及蔡氏《集傳》之説,多所未 氏之説,取經文反覆而推究焉, 而 疑焉,蓋二十年于兹矣。 疏、 蔡傳初無以異,惟 於是偏考經解諸家 旦所 至 自 人俟後 於 幸 安 近 他 以 薛

禮 冕,負斧扆。」則此發顧 冕服,衮冕之服 也。 《覲禮》曰:「天子 命,服衮必矣。

水,

相被

冕服

, 憑 丢

几

衮

紛純,加繅席、畫純,加次席、 命諸侯,王位設黼依。 司几筵》:「凡大朝覲,大饗射,封國, 依前南鄉、設莞筵、 黼 純。 左右 《周

射、封國、命諸侯、設黼扆於廟中之牖 上者,但言「玉几」者,文略也。 大朝覲、饗 間

玉几。」此「玉几」即設於黼扆之前,次席之

事尤大於封國、命諸侯,而以 此則設於正寢之牖間。 蓋以天下傳子,其 疾 病 不 能

公、師氏、虎臣、百尹、御事 乃同召太保奭、芮伯、彤伯、 畢公、衛侯、毛

廟,故於正寢牖間之前設黼扆而發命

也。

君每日視朝於治朝,退適路寢聽政, 召者,自路門外治 朝 而 召入於路 寢 也。 群臣

惟四月哉生魄,王不懌。

甲子,王乃洮、

頮

者

,則不復

出

둜。

之君子。其中文義易曉,及蔡傳之所已得

治朝治 人也。 亦 從者之屬也。 不能視朝,群臣每日人寢門問疾畢,退至 有九室,九卿朝焉」者也。 則立於黼扆之左右與。 之位,當與治朝同,而其在路門之左右者 左,南面,西上。」此時王在扆前南面,群臣 「三公北面東上,孤東面,北上, 卿大夫西 面,東上,大僕、大右、大僕從者在路門之 面,北上,王族故士、虎士在路門之右,南 就 治朝左右而 事 御事、侍御之臣、大僕、大右、大僕 如常日 《周禮·司士》治朝之位 治 王將發顧命 事、《考工記》所謂 是時成王 ,則召之使 一寢疾 外外

彌留 文王、武王宣重光、奠麗陳教則肄。 王曰:「嗚呼! 用克達殷,集大命。 守文、武大訓 ,恐不獲誓言嗣,兹予審訓 ,無敢昬逾。 疾大漸,惟幾。 在後之侗,敬迓天 今天降疾殆,弗興 命汝: 昔君 病 肄不違, 日 「臻,既 /威,嗣

> 弗悟 艱 還,出綴衣于庭。 于威儀。 難,柔遠能 爾尚 爾無以 明 邇,安勸小大庶邦,思夫人自亂 時朕言, 到冒貢于非幾。」 兹既受命, 越翼日乙丑,王崩 用敬 保 元 子 釗 弘 濟 于

室,恤宅宗。 室,恤宅宗。 童•司几筵》及《幕人》《掌次》皆不言黼扆上設幄帳,此特設之者,蓋以王疾病故與。上設幄帳,此特設之者,蓋以王疾病故與。以爲幄帳,蓋設於黼扆之上者也。《周以爲幄帳,蓋設於黼扆之上者也。《周

而爲喪主也。《喪大記》諸侯、大夫、士之世。宗者,迎入正寢之室,坐於尸東,西面正寢之室尊嚴,故曰「翼室」。延入翼室,正寢之室尊嚴,故曰「翼室」。延入翼室,正寢之室也。翼,敬也。二千戈,謂執干戈者各二人也。諸侯之

其 有 喪 解翼室爲 的,而以翼室爲路寢則未有失也。 亦 喪 自未 成 必然。 誤甚矣。 「既 王始崩, Œ 殯 尸 孔傳訓翼 以 左右夾室,而後儒皆從之,不知 ,子皆坐于東方」。 前,主人無頃刻離尸側也,豈 而 康王 爲明,雖於字義未甚 乃遠處夾室者哉 此天子之禮 自 蘇 氏

丁卯,命作册、度。

聲,既三日小斂,乃代哭,然後命作册、度, 而 丁卯者,成王崩之第三日也。 以成王之命書之。 始死哭不絶

越七日癸酉,伯相命士須材。

時 顧 以召公、畢公之賢,反不及子産、叔向 狄設黼扆、綴衣』以下,即當屬之《康王之 、康王 氏曰: 可 疑。 與群臣皆吉服,而無 「讀《顧命》之篇,見 再四讀之,知其 中 · 有 成 哀痛之辭。 脱 王 初 簡 喪 誠誠 之 而

《書》之所以傳也。」 自此 秋》之於魯公,即 臣,群臣 諸侯之事也。 日,殯後之三日 史録其儀文、訓告,以爲一代之大法,此 蓋有遭時之變而不行此禮,如莊、閔、僖三 矣,故即位於廟,受命於先王,祭畢而 文無所係屬,蓋此下必有成王葬事,以終 王受顧命 崩而書之於册。自「狄設黼扆」以下,言康 自「命作册、度」以上,言召公受顧命,至王 起,不能易者也。 黼扆」以下爲康王即位之事,此雖聖人復 公者矣。康王繼體之君,當太平之時,而 以下、記明年正月上日、康 自此 一布幣 前 以上,記成王顧 即位 而見,然後成之爲君。《春 古之人君,於即位之禮 也。 位則書,不即位則不書, 越七日者,丁卯後之七 獨此 命士須材,爲葬具也。 愚謂: 節在其間 命登遐之 顧氏以「狄設 王 即 位 事 朝 群 朝 重

之誤 爲踰 位,成王以四 有 必 此 又以受同 即位之禮,實行於朝,而顧氏乃謂 始白,其有功於此經 公以成王殯後傳顧命於康王」,而 上與「伯相命士須材」之文相 年之正月,而康王 殯,其爲既葬之後明矣。 人君踰 書》有脱簡 有 殯 節之所言,而「狄設黼扆、綴衣」之上,又 赤刀、大訓、弘璧、琬琰之屬,則 年即 也 於 康王即位之年月,而今皆脱之矣。 西序,而下文西序有東鄉之席, .謂「祭先王」,則亦猶未免仍 位之禮 ,但見「狄設黼扆、綴衣」之文, 月崩,十月葬,又越二月爲 賴 一即位 大矣。 顧 氏發明之,而其義 也。 然以經考之, 先儒不 屬,遂謂「召 「在廟」, 不 年 西序 知此 舊説 知 面 其 周 明 即 無 又

純,華玉仍几。 狄設黼扆、綴衣。牖間南嚮,敷重篾席、黼

> 路寢 與 間,然在廟 也。 皆謂「此象平日見群臣、覲諸侯之位」,非 之扆。 如屏 雅》:「户牖之間謂之扆。」蓋户牖之間乃設扆之所 王發顧命、設黼扆、綴衣於牖間,今將傳顧 與,未可以其名之偶同而合以爲一也。 階、出壺、設黼扆、綴衣之屬,皆與樂吏無 然考《喪大記》及此篇,則狄之所掌者爲設 狄,蓋事官之屬,掌張設之事者也。 命,故復設此位 據《祭統》以狄爲樂吏之賤者,蔡傳因之。 也。 風,以其爲人所依,故謂之依,亦謂之扆。 阼階下,不 人君朝群臣,或 孔疏乃謂「設於扆地,故名爲扆」,誤矣。 不 在朝,與此設於路 ,若成王之親 在 牖間 在路 門 朝諸 外治朝, 命 者然。 侯 寢之 雖 先儒 位 在 或 孔 ?,故謂 庡狀 無 在 成 疏 爾

西 西 序 東嚮,敷重 敷 重 豐 席、 底席、綴純,文貝 畫 純 雕 玉 仍 几。 仍 几。 西 夾 東

嚮,敷重筍席、玄紛純,漆仍几。

者 屬 之所在,故 嚮之位,於經記無所見,疑齊必居 爲賓者席于牖前,父兄之位或在賓東,或 然則公與族燕不 階上」,此東序西嚮之位也。 内 西序東嚮爲朝夕聽事之位,西夾南嚮 祊,此交神明之道也。」此之謂也。 皆設之焉。 南嚮,以象 必遷坐,則 在賓西,公與之齒則宜在西序矣。 日 序東 私宴之位,其説皆無所據。 「公與族燕 ,平時燕群臣 「君在堂,升見無方階,辨君所在。」是 嚮 平 於平 成成王 其坐 《祭統》曰: ,則異姓爲賓,公與父兄齒」, 時 主在此 - 時 一發顧 之位也。 燕宗族之位 在阼階上之位明矣。 在 與。 路 命之位矣,然不知神 「詔祝于室而出 寢所嘗有事之位, 《燕禮》「公在 既設席於牖 《文王世子》 《士相見禮 東序 先儒 正寢,齊 西夾 爲 西 間 其 親 以 于 南 阼 繒

> 東嚮 宴,必不南 人君在堂視事,或南 矣。 公與 面 而 族 以尊臨之矣。 燕 則 面 『,或西 以 齒, 面 則 與 丽 親 不 必皆 屬 私

越玉 堂,一人冕執鉞立于西堂,一人冕執 前 阼 鋭 舞 于 弁執戈上刃 垂之竹矢在東房。 西序,大玉、夷玉、天球、河圖 東 階 衣、大貝、鼖鼓 立于側階 垂 二人雀 五重,陳寶: 面,先輅在左塾之前,次輅在 一人冕 /夾兩 <u>,</u> 執 執 階吧。 在 惠 赤刀、大訓、弘璧、琬琰 建立 大輅 立 西房, 兑之戈、和之弓、 于 一于西 畢門之内 在賓階面, 綴輅 一人冕執劉立 垂,一人冕 在東序 右 四 戣 塾之 胤之 于 人 立 東 綦 在 在 執

位在西也。此所陳寶玉、器物皆以西爲上者,鬼神之

裳入即位,太保、太史、太宗皆麻冕、彤裳,太王麻冕、黼裳由賓階隮,卿士、邦君麻冕、蟻

保承: 介圭, 上宗 奉同、瑁 由 作階隮,太史秉 書

由 隮 ,御王册命

曰

臨

禮

耶 ?

尊遠。 麻冕、 所 葬,有敬心焉。」此之謂也。 以抑哀而崇敬也。《檀弓》曰:「弁絰葛 父也,其尊近,人君之父,父也,君也,其 尹亦以冕服祠于先王。 蓋大夫、士之父, 薨而世子生,太祝裨冕」以告,三日見子, 君之齊服,裳玄色而無章者也。 麻冕、彤裳者,一章之玄冕也。 之禮皆如此,而蘇 下,又以在哀戚而 下皆冕服,然皆不用上 黼裳,蟻裳又降於彤裳。《曾子問》曰「君 ·太宰、太宗、太祝皆裨冕」。 낈 祠先 、黼裳者,三章之絺冕裳有黼黻者也。 故雖在 王,孔 .喪中,而假吉服以接神 子 不敢伸也。 氏乃以 所 以答曾子者, 服,而但用 爲訾,然則 此王 蓋古者 而《商書》伊 蟻裳者,人 彤裳降於 與太保 絺 皆非 冕 伊 即 , 所 尹 位 以 以 而

> 其能 君周邦,率循大下,燮和天下,用答揚文武之 "「皇后憑玉几,道揚末命,命汝嗣訓, 訓。」王再拜,興,答曰:「眇 而亂四方,以敬忌天威?」乃受同、瑁 ·眇予末小子,

王三宿、三祭、三咤,上宗曰:「饗!」

光

也。一 事傳顧命 子,必醮以酒,醮者有獻 之禮,無可考證,今以士禮推之。 道然也。踐阼受之先王,冠、昏受之父母, 醮、訓戒之辭,以謹成人繼世之儀,正始之 存命其子也。 死生雖異,其義一也。」 薛氏曰:「古者大禮,冠、昏之事,皆有祭 之説者皆以受同 醮子之禮,故略用臣獻君之禮,有 愚謂: 命嗣 孔傳謂「受同以祭」,於是後 然太保,臣 王,亦用酒者,如成王之生 爲祭先王。 無酬。 也,不 吴氏曰:「天子 夫喪中 敢 太保攝 父之命 獻 純 固 有 如 父 酢

之」,蓋醮之者,所以禮之也。父將以 氏、吴氏得之。《士昏禮》「父親醮子而 此,其疑誤後學,不亦甚哉? 禮尸皆自拜,初無俟 告祭耳。 尸拜,此尤謬之甚者。 之有? 至蔡傳又以下文之「王答拜」爲代 顧命於康王,而 有告神之辭,而 祭,若以爲告祭,則亦必有 注之者也。 乃鬱鬯,王則自圭瓚注之,大保則 禮》「奠菜,老醴婦于房中」之義 康王者也。 以天下乎? 命其子,必先有以禮之,親迎且然,況傳之 口「以異同,秉璋以 告祭無尸,且《特牲》、《少牢》祭 用酒謂之醮,用醴謂之醴,用 太保爲成王禮康王 故大保之同,所以 非有所告於成王也, 此皆無之。 酢」,則知此同 人代之者。 借如舊説爲祭,亦 祝以接神, 蓋此爲成 蓋此 一,猶《士 爲成 也。 之所 解經 自 節 下文 大 王 何祭 又必 唯 王 盛 禮 事 瓚 命 薛 如 傳

進也。 獻有 也。 則三 男一 器,他 奠之者,以上宗曰「饗」,則王饗此酒可 咤者,既飲卒爵而奠之也。 矣,而曰 禮》王於上公再灌而酢,侯伯 也。 蓋凡 冠禮》「以柶祭醴,三」,此三宿則有 至席前也。三宿者,三受同而進也。 成王致之,王之再拜,非爲太保拜也。 鬱鬯謂之灌。 不可以祭以飲,故注之於同 灌不酢。 行灌 酢」,則非也。 吴氏謂「不敢純用 灌而酢 王拜受而太保不拜送者,以此禮特爲 無所見,而獨見於此。 灌必設席,王既受同於大保,則 「三祭」者,據 禮者皆然也。 矣。三灌而酢者,天子之禮 此王三受同而 此所行 祭,祭酒 乃灌 每宿 父醮 王再拜者,拜受 禮 知 而 於地也。 子之禮,故有 後大保自酢, 而祭之飲之, 蓋圭 也。 王飲卒爵而 祭言之也。 灌而 瓚重大, 同之爲 二酢,子 九祭 \sim 《 周 宿 進 士

太保降,收。

諸侯出

廟門俟。

王出在應門之

内,太保率西

方

諸

侯

入應門左,畢公率東方

也。 蓋 敢 辭不以祝 不 此酒乃成王之所以禮康王,雖在 · 飲。 上宗,贊王之禮者,故告王以「饗」,饗 《士虞禮》主人受尸酢, 而 以上宗,又可以見此酒非所以 亦 喪 卒爵 亦 不

同,拜,王答拜。 太保受同,祭、嚌,宅授宗人同,拜,王答拜。 太保受同,祭、嚌,宅授宗人太保受同,降,盥以異同,秉璋以酢,授宗人

神

也

齒也。 答拜者,太保拜受而 太保之酢,自酢於王也。 與太保俱在喪中,哀戚所同, 敢煩尊者酢之,則自酢。 者,太保既嚌酒又拜,而王又答之也。 酢,但嚌之而已也。 太保之酢,所以 授宗人同,拜,王答拜 王 達康王之意,然王 拜 授宗人同,拜,王 送也。 凡獻於尊者,不 故雖受王之 嚌,飲 至

王義嗣德,答拜。幣,曰:「一二臣衛敢執壤奠。」皆再拜稽首諸侯入應門右,皆布乘黄朱。賓稱奉圭善

君路 王出· 篇。 北, 推之,亦略可見矣。 之位在畢門、應門之間,三分之,而 門之外」,而曰「王出在應門之内」,則治 位以爲臨涖群臣之始也。不云「王出 在 門外日 諸侯之禮,雖不可考,然由此篇所言 一在南與。 應門之内,所謂 視朝之位,遭 古天子即位之禮,見於此 即 喪踰 位 也。 年, 位者, 則 二在 在 就 此 朝 畢

邦、 敬告天子:皇天改大邦殷之命,惟周文、武 皇六師, 定厥功,用敷遺後人休。 誕受羑若,克恤西土,惟新陟王畢協賞罰 太保暨芮伯咸進,相揖,皆再拜稽首曰:「敢 侯、 甸、 無 男、 壞 我 衛 高 惟予 祖 寡 命 今王敬之哉! 人 !」王若曰:「庶 剑 報誥。 昔君 , 戡

文、武 釋冕,反喪服 遺鞠子羞 爾身在外,乃心罔不在王室,用奉恤厥若 伯父尚胥暨顧 方,乃命建侯樹屏,在我後之人。今予一二 家,用端命于上帝。 天下,則亦有熊罷之士、不二心之臣保 丕平 !」群公既皆聽命,相揖,趨出。 富,不 ,綏爾先公之臣服于先王 務咎,底至齊信, 皇天用訓厥道,付畀四 用 昭 乂王 明于 一, 雖 「, 無 王

臣之廬、堊室在應門之外與。所,而云「群公」「趨出」,然則天子之喪,群而歸。」時成王之喪未練,群臣尚當在王一

尚書顧命解跋

鏘鳴校《禮記集解》畢,復求先生説經之

以後世功利之見、求二帝、三王之大經大法、 也。 説。蘇氏之論,主於守經,而不知天子、諸侯 同,未可援喪服行冠禮及春秋諸侯之禮推之 之禮與士、庶人不同,天子之禮又與諸侯不 然知所定而無疑,其意遠矣。 立、特爲非常之禮以與天下共立新君,使曉 兄弟,非公之忠誠,則王室幾摇,故於康王之 公以叔父之親擁戴太子,而流言之變,起於 召公、畢公皆盛德大老,豈不知禮? 分,禮之變,非禮之失也。」止齋陳氏亦以爲 得已而然者。 之獻、宋眉山蘇氏疑焉、謂「使周公在、必不 爲此」。晁公武曰:「蘇氏之説,又本於孫氏覺。」覺,仕 成王 元祐時。 書於其家,得《尚 葉、陳、吕氏之説,出於達權,是又不免 一崩未葬,君臣皆冕服,又受黄朱、圭、幣 而石林葉氏曰:「康王之事,必有不 召公權一時之宜,正君臣之 書顧命解》一卷。 東萊吕氏 《顧命》, 蓋 見周 同此

皆由 其禮。 禮哉? 云: 冕、 平 未 之諸 氏 七日 國 加 讀 此皆求其説不得而强爲之辭者也。 日 釋冕,反喪服,於是成服 未盡即乎天理人心之安者也。 乙直謂 爲 必 備。 極 而 黼裳,入受顧命。 殯已三日矣,而 「是時成王崩就 **韙之,又取經文反** m 家,先君之喪,猶以爲己私喪也」,則 其果有 參 經 殯,既 考禮經得之,而益 「其中有脱 時也,又曷爲有不得已而創此 此誠千古不易之論矣。 而 至於疏解它文,補 朱子以爲易世授受,國之大事,當嚴 無 弗 ·合也。 殯而 協 也 簡」,詳見《日 成服 猶未 且成、康之世 刻《 殯,猶未 已受命, 誥諸 覆 而宅憂。」不 自乙丑至癸 禮 知先 成 正 丽 記 《服,豈· 舊 推 成 集解》成,遂以 生三禮之學通 説 其言「王 究 知録 康侯胡 所未 服 焉, 一, 固 有 侯, 亭林 是 酉 知 故 而 非 周 盡 天子 先 常之 其 哉 凡 而 用 氏 侯 家 説 生 後 猶 顧 ? 九 麻 又 以 太

> 儒之説於此 各極其所見,而 世 此卷附於後以 也。」至哉言乎 i之書· 也 刊 以以 正 1 廣 明者 補 俟學者審 其 余刻是《解 輯 傳 擇 非 焉 歐 以以 人之能 陽子 焉 》,故 俟聖人之 日 同 也 治 又 戊 備 使 經 復 辰 學 述 非 宋 生

項 琪 跋

月

族子鏘鳴

謹

跋

先嚴 君 間 心 田 集 先 釐 昆 ,先伯父雁湖府 解》六十一 訂 後 冗 神 吾鄉孫 於琪 捐 山府君先事 館 爲 敬 開 卷,藏 咸豐 中 軒 雕 表 先生精三 君 初 校勘,纔畢 兄弟,深懼 於家。 功甫及半,旋 與二三 年,先 禮學,著有《 同 道 生 光 先業 族子 志 十卷,而 癸巳、 謀 遭 琴西 兵 之湮,悉 燹 甲 禮 兩 板板 蕖 府 命 午 記

學項琪謹跋。 學項琪謹跋。 今幸掇拾散亡,力完是書。琪像燬其五六。今幸掇拾散亡,力完是書。琪像殿其五六。今幸掇拾散亡,力完是書。琪

